



L. 1.8





VERITATES PRACTICÆ,

EX VITA DOMINI IESV, SANCTO-
RVMQVE GESTIS IN SINGVLOS ANNI DIES.

LEGENDÆ, CONSIDERANDÆ,
PRÆDICANDÆ.

OPVS QVADRIPERTITVM.

PARS SECVNDA, PARS VERNA.

A Dominica Septuagesimæ, ad Dominicam
SS. Trinitatis.

*Authore P. JULIANO HAYNEVFVE,
Societatis IESV Sacerdote.*



ROTHOMAGI,

Sumptibus RICHARDI LALLEMANT, Illustrissimi Ar-
chiepiscopi & Collegij Societatis IESV Typographi.

M. DC. LII.

CVM PRIVILEGIO REGIS, ET APPROBATIONE DOCTORVM.

Exemplum Camaldulen Montis Regj Varsaviæ. 1694

Priiilegium Regis, Approbatio Doctorum, & Facultas
Superiorum habentur in prima parte, post Præfationem.



INDEX VERITATVM

IN SINGVLOS DIES, SECVNDÆ PARTIS.

*DOMINICA SEPTVAGESIMÆ. De otiosis
operariis in vineam missis.*

Sicut nemo otiosus operatur in vinea, sic nemo benè opera-
tur, nisi otiosus. 1.

Nullus est labor, nisi sit in vinea Domini, & in vinea Domini
nullus est labor. 5.

An oculus tuus nequam est, quia ego bonus sum?

Qua parte peccator à se timorem Dei excutit, eadem Deus
peccatori timorem magis incutit. 6.

Multi sunt vocati, pauci verò electi.

Quæ causa est cur pauci salvi sint, hæc in te causa est cur ex
illis forte non sis. 9.

Aliæ his affines veritates indicantur. 16.

*Hac hebdomade inchoatur historia Passionis Domini, à concilio Iudeorum
contra Iesum; in eaque pergitur, usque ad illum sermonem quem
peractâ cenâ Dominus cum Discipulis suis habuit.*

*FERIA 2. De consilio Iudeorum contra Dominum, ubi
Iudas proditionem suam aperuit.*

Quid nequius, quàm quod excogitavit caro & sanguis?
Ecclesi. 17. 19.

*FERIA 3. De cena Paschalis Agni secundùm legem mo-
remque Iudeorum, qui de lege violata Christum inde-
sinenter accusabant.*

Voluntatis eiusdem est, nolle afferre scandalum: & sufferre
à ij

velle, si quando prauè accipitur.

FERIA 4. De lotionè pedum.

Qui se Christi exemplo non humiliat, exemplo Dæmonis humiliabitur.

29.

FERIA 5. De institutione sanctissimi Sacramenti.

Ingratus est tanti beneficij, qui se tantum ex parte immolat, se totum imolante Christo.

34.

FERIA 6. De proditiōe Iudæ manifestata à Christo Domino.

Qui se existimat stare, videat ne cadat. 1. Cor. 10.

39.

SABBATO. De contentione honoris inter Apostolos orta.

Licet obtineres quod ambis, non esset contendendum: at verò licet contendas, non obtinebis.

44.

DOMINICA SEXAGESIMÆ. De parabola seminis seminati in terram, cuius tres partes sunt infructuosæ. SEMEN EST VERBUM DEI.

Nisi verbum Dei te conuertat, tu peruerter verbum Dei.

49.

De primo impedimento verbi Dei.

Quæ pæna timenda est in non seruato deposito, hæc est timenda in verbo Dei secus viam exposito.

54.

De secundo impedimento verbi Dei.

Qui ad tempus credunt, nullo credunt tempore.

Qui temporales sunt, nullius sunt temporis.

58.

De tertio impedimento Diuini verbi.

Inordinatæ sollicitudines ita nociuæ sunt, vt illud ipsum Christi verbum quo dicuntur alia Dei verba suffocare, suffocent.

61.

De patientia, quæ ita necessaria est ad ferendum fructum, vt nullus alioquin feratur.

Qui timent pruinam, irruet super eos nix. Iob. 6. *Id est, qui timent laborem in audiendo Dei verbo, incident in maiorem: quantoque minus pati voluerint, ut referant fructum, tantò magis patientur ex defectu fructus.* 65.

Alia conformes Euangelio veritates producuntur. 69.

Hac hebdomade, de Sermone Domini post cenam cum discipulis habito, ad eos roborandos in aduersis.

FERIA 2. De futuro Petri lapsu, à Christo Domino prænuntiato.

Nimia firmitas, infirmitas. 71.

FERIA 3. De cauenda perturbatione animi in aduersis.

Quod Christus semel suis, hoc in omni semper casu, tibi dicit, NON turbetur cor tuum. 74.

FERIA 4. De Christo D. ut est exemplar constantia, & via vera ad perfectionem.

Melius est in via claudicare, quàm præter viam fortiter ambulare. S. Aug. 78.

FERIA 5. De charitate simul & constantia coniungendis ad tolerantiam aduersitatum.

Sic charitas & constantia simul iunctæ constant, ut nisi sint simul iunctæ, non sibi consent. 83.

FERIA 6. De præuidendis aduersitatibus.

Quantum obest aduersitas improvisa, tantum præuisa prodest. 87.

SABBATO. De oratione in nomine Salvatoris facienda, ad petendum subsidium in aduersis.

Nulla in aduersis conquerendi est ratio, aut nulla erit conquerentis oratio. 91.

DOMINICA QVINQVAGESIMÆ. De caco

illuminato à Christo D. post colloquium de sua passione habitum cum discipulis.

Cæcutientibus in via perfectionis, lux perfecta Christus patiens.

95.

Contra impietatem temporis. GLADIUM EVAGINAVERVNT PECCATORES.

Quibus armis impietas hoc tempore propugnatur, iisdem expugnatur.

100.

Nihil vnquam Christiana Religio passa est grauius, quàm quod à Christianis modò patitur.

111.

Nonnullæ aliæ designantur consimiles veritates.

119.

Hac hebdomade Veritates eruentur ex illa oratione quam Christus D. ad Patrem habuit in cenaculo, & quæ refertur Ioan. 17. ad præparandos affectus qui frequentius occurrunt exercendi meditando passionem Domini.

FERIA 2. De zelo clarificandi Christi Domini. CLARIFICA FILIVM TVVM.

Scientia sine zelo, arma sine milite: zelus sine scientia, miles sine armis.

120.

FERIA 3. De nostra subiectione sub potestate Christi.

DEDISTI EI POTESTATEM OMNIS CARNIS.

Quo magis Christo subiicimur, eò magis erigimur.

124.

FERIA 4. QUAE EST CINERVUM. De perfecta imitatione Christi Domini in adimplenda Dei voluntate, sicut ille fideliter eam consummavit: OPVS CONSUMMAVI.

Non quidquid Christus egit, sed quomodo.

Pro Feria Quadragesimali. NOLITE THESAURIZARE VOBIS THESAUVROS IN TERRA.

Memento homo quia pulvis es, & in puluerem reuerteris.

Mortificandis concupiscentiis opportuna mortis memoria.

133.

Quæ viuenti res fuit gratioꝛ, hæc fiet morienti grauior. 139.

Vt vita mortem ordinat, sic mors vitam. 141.

Cum ieiunatis nolite fieri sicut hypocritæ tristes.

*Magis modò peccant, qui ne boni appareant hominibus, non ieiunant; quàm olim tristes hypocritæ qui vt boni appa-
rerent, ieiunabant.* 146.

*FERIA 5. De cauendo mundo, pro quo Christus non
orat.*

*Quà latè patet Mundus, nihil est vspiam ita contemnendum
& cauendum, quàm quod intus in te vno latet, Nempe con-
cupiscentia quæ facit mundum.* 153.

*Ad Euangelium Feria, de commendata Centurionis fide,
ac sanato eius seruo.* 157.

FERIA 6. De vera sanctitate quam suis Christus orat.

SANCTIFICA EOS IN VERITATE.

*Qui te à sanctitatè acquirenda excusas, ex aliis acquisitis bonis
te condemnas.* 158.

*Ad Euangelium Feria. De diligendis inimicis, & de ius-
titia nostra non facienda coram hominibus.* 164.

*SABBATO. De efficaci desiderio & cura salutis per media
ordinata, sicut illam desiderauit & curauit Christus
mediator noster, qui propterea dicebat Patri, PATER
QVOS DEDISTI MIHI, VOLO VT VBI SVM EGO, ET
ILLI SINT MECVM, &c.*

*Si ordinatis ad salutem mediis non vteris, mediatore Christo
abuteris.* 163.

Ad Euangelium Ferie, de discipulis laborantibus in remigando. 169.

DOMINICA I. QUADRAGESIMÆ.

De solitudine, ieiunio & tentationibus Domini. De his tribus seorsim, nec non de triplici tentatione, quā impetitus fuit Christus à demone, multa conuenienter producuntur. 171. In quibus, quæ contra tentationes maximè generalis & singulariter opportuna est Veritas, declaratur fusius.

Si tentatorem permiseris ingredi, non se permittet egredi.

Facilius excluditur quàm eiicitur.

174.

Hac hebdomade de internis Christi doloribus quos in monte oliuarum vehementius ipse in animo suo concitauit.

FERIA 2. De tristitia Domini.

Qui cum Christo dolente non dolet, nec cum ipso gaudente gaudet. 178.

Ad Euangelium Ferie, de extremo iudicio, ac de operibus misericordie. 182.

FERIA 3. De timore, anxietate, & agonia Domini.

Ab imitando Christo excusantis humanam infirmitatem infirma est & nulla excusatio. 183.

Ad Euangelium Ferie. De Domini ingressu in ciuitatem & in templum, unde vendentes eiecit. 187.

FERIA 4. De compassione Christi erga homines, & de nostra erga ipsum.

Frustra te Christi miseret, nisi te tui prius misereat. 188.

Ad Euangelium Ferie. De scribis petentibus signum è celo, quibus Ninivita opponuntur, &c. 192.

FERIA

FERIA 5. De dolore Christi ex perituris & damnandis hominibus pro quibus frustra passurus erat.

Quantò te ipsum negligis, quasi non esses cum cæteris periturus, tantò te Christus doluit præ cæteris perituris. 193.

Ad Euangelium Ferie. De Cananea. 196.

FERIA 6. De confusione Christi propter iniquitatem omnium nostrum quam Deus in eo posuit.

Quæ in malo bona est confusio, in bono mala est. 197.

Ad Euangelium Ferie, De sanato paralytico in piscina.

201.

SABBATO. De dolore contritionis quem Christus D. sensibilis habuit.

Vera contritio dolorem sensibilem nec includit nec excludit.

202.

Euangelium Ferie, idem est ac sequentis Dominica.

DOMINICA 2. QVADRAGESIMÆ.

De Transfiguratione Domini.

Ad præcipuas Euangelij partes applicantur propria veritates. 207.

Hæc inter alias ex colloquio Domini cum Moyse & Elia de excessu quem completurus erat in Ierusalem, fusiùs exponitur.

In die bona, nisi memores mala, non erit dies bona.

Et in die mala, si memores bona, non erit dies mala. 210.

Hæc hebdomade, quidquid in Oliuarum horto, dum capitur à Iudæis Dominus, gestum aut dictum fuit, recensetur.

FERIA 2. Discipulis à somno excitatis, appropinquantem passionis horam & traditorem Christus denuntiat.

ECCE APPROPINQVAVIT HORA.

2 Pars.

Si dum adest occasio, virtus abest : vix vnquam virtus adest.
215.

Ad Euangelium Ferie. IN PECCATO VESTRO MORIEMINI.

FERIA 3. Suauitas & mansuetudo Domini proditorem suum alloquentis.

Quò quis est mitior, eò est generosior. 219.

Ad Euangelium Ferie. SUPER CATHEDRAM MOYSIS SEDERVNT SCRIBAE, &c.

FERIA 4. Procedit Iesus obviam suis inimicis, eosque prosternit.

Qui supra mortem est, infra se videt omnia. Id est, qui sic paratus est pati & mori, vt Dominus, sic sibi mortem & aduersa quæque substernit, sicut ille suos prostravit inimicos. 226.

Ad Euangelium Ferie, de Matre filiorum Zebedai. 230.

FERIA 5. Gladio se defendi vetat Christus, cum sit paratus bibere calicem sibi à patre datum.

Quo in cælis corona gloriæ sumetur vultu, hoc in terris calix sumendus est. 232.

Ad Euangelium Ferie. De diuite Epulone, & de mendico Lazaro. 236.

FERIA 6. Scripturas adimplendas verbo & exemplo docet Christus.

Si propter scripturas sunt aduersa toleranda, sunt libenter toleranda. 237.

Ad Euangelium Ferie. De parabola vineæ locata malis agricolis. 240.

SABBATO. Sinit se Christus capi & ligari.

Sicut ex necessitate virtus, ita ex virtute necessitas. 241.

Ad Euangelium Ferie. De filio prodigo. 246.

DOMINICA 3. QVADRAGESIMÆ.

De Christo eiiciente demonium.

Post multas ad unamquamque partem Euangelij productas veritates, hæc ad verba Christi, QVI NON EST MECVM, CONTRA ME EST, fusiùs declaratur.

Quod difficillime crederes, te contra Christum esse; hoc est facillimum creditu, si Christo credis.

Hac hebdomade, considerantur quæcumque gesta sunt per totam noctem apud Pontifices, vsque ad matutinum diei sequentis, quo Christus ad Pilatum est adductus.

FERIA 2. Christus alapam infligenti mira mansuetudine loquitur.

Quantum fas est in ira loqui, tantum ex ira nefas. 253.

Ad Euangelium Ferie. De prima Christi D. predicatione in ciuitate Nazareth habita. 256.

FERIA 3. Christus falso accusatus nihil respondet.

Qui loquendo vinceris, silendo vincis. 257.

Ad Euangelium Ferie. De correctione fraterna & remittendis semper iniuriis. 260.

FERIA 4. Christus adiuratus à Caypha, profitetur se filium Dei.

Qui audacius loquitur inferiori, timidius Superiori loquetur. 262.

Ad Euangelium Ferie, De lauando corde potius quam manibus. 266.

FERIA 5. Christus tota nocte apud Pontificem, iniuriis exponitur.

Cæteræ pugnant virtutes, sola vincit perseverantia. 267.

Ad Evangelium Feria, De socru petri periclitante, sanata à Christo Domino. 270.

FERIA 6. Christus negantem se Petrum benignè respicit.

Læsi amoris ira, quò est suavior, eò est potentior. 271.

Ad Evangelium Feria. De Samaritana. 274.

SABBATO. De Iuda proditore, miserrimè pereunte: & de miro Christi silentio circa huius interitum.

Qui ruinâ gaudet inimici, ruinam eius in se trahit. 275.

Ad Evangelium Feria. De Muliere adultera. 278.

DOMINICA 4. QUADRAGESIMÆ. De quinque panibus multiplicatis, &c.

Multis Evangelij partibus multa subjiciuntur veritates, quas inter, quòd Christus se volentes Regem facere, fugerit; hæc singulariter declaratur.

Qui sectatur honores mundi quos fugit Christus, à Christo fugit ad mundum. 280.

Hac hebdomade, quidquid Christus D. passus est, ex quo deductus fuit à Iudeis ad Pilatum, usque ad eius condemnationem: ubi de ferendis præsertim opprobriis agitur.

FERIA 2. Christus Pilato à Iudeis presentatus & accusatus.

Qui sibi innocenti factam iniuriam nimis dolet, suæ ipse innocentiae iniuriam facit. 283.

Ad Evangelium Feria. De eiectione à templo venditoribus & nummulariis. 287.

FERIA 3. Christus ab Herode spretus.

Quem pro Christo sperni pudet, Christi pudet. 288.

Ad Euangelium Ferie. IAM die festo mediante, ascendit Iesus in templum & docebat. 292.

FERIA 4. Christus Barraba comparatus & postpositus.

Quò quis inferior est in ordine hominum, eò superior est in Christi ordine. 294.

Ad Euangelium Ferie, de caco nato. 297.

FERIA 5. Christus flagellatus.

Quæ duo infidelem à Christo auocant, dolor & ignominia, fidelem ad Christum vocant. 298.

Ad Euangelium Ferie. De Adolescente mortuo suscitato in ciuitate Naim. 302.

FERIA 6. Christus per ludibrium Rex & homo dictus.

Sic prudenter cauendum, ne vituperetur ministerium tuum; vt si nimis id caues, non satis caueas. 302.

Ad Euangelium Ferie. De Lazaro infirmo, mortuo & suscitato. 306.

SABBATO. Christus à Pilato, ex humano respectu, condemnatus ad mortem.

Humanus respectus, inhumanus Christi despectus. 306.

Ad Euangelium Ferie. EGO SUM LVX MVNDI, &c. 310.

DOMINICA PASSIONIS. VEXILLA REGIS

PRODEVNT.

Nemo cum Christo candidus, nisi sit simul rubicundus.

Nemo effectus candidus, nisi sit affectu rubicundus.

Nemo actu satis purus, nisi actum puritatis suo sit paratus tueri sanguine, contra quoduis peccatum. 312.

Circa Euangelium, (QVIS EX VOBIS ARGVET ME DE PECCATO.) Multa sunt alia veritates. 315.

Hac hebdomade, quicquid à pratorio Pilati vsque ad crucifixionem in Caluaria monte gestum est.

FERIA 2. Christus oblatam à Iudeis crucem accipit.

Non quaesitæ cruces sunt magis exquisitæ. 317.

Huic aliæ quædam subnectuntur. 320.

Et ad Euangelium Ferie. QVÆRETIS me & non inuenietis. 321.

FERIA 3. Christus impositam tollit crucem: & depositam sinit Simoni post se tollendam.

Qui sibi suas solus aptat cruces, vix vnquam aptas efficiet.

322.

Ad Euangelium Ferie. DIXERVNT ad Iesum fratres eius, transi hinc, & vade in Iudæam, &c. 326.

FERIA 4. Christus ad se sequentes & se plangentes conuersus, futuras denuntiat penas non penitentibus.

Cruce interdum quidem à corpore, sed nunquam ab animo deponenda. 327.

Ad Euangelium Ferie. QVORSVÆ animam nostram tollis? Si tu es Christus, dic nobis palam, &c. De omnibus Christi. 332.

FERIA 5. Quatuor dimensiones Christi crucis & nostræ.

Qui à cruce suas tollit dimensiones, tollit à se suam crucem.

333.

Ad Euangelium Ferie, de Muliere peccatrice, seu Magdalena penitente. 337.

FERIA 6. Christus cruci affigitur.

Quod petenti Christo iuxta crucem non negasses, hoc à te
semper petit, hoc illi semper debes, hoc illi nunquam ne-
gandum. 338.

*Ad Euangelium Ferie. De Iudaorum concilio contra
Dominum: EXPEDIT vobis, ut unus moriatur homo
pro populo.* 342.

SABBATO. Christus in cruce illus.

Quod nouo negatur homini contra veterem: hoc indulge-
tur veteri contra nouum. 343.

*Euangelium Ferie. De celeberrimo illo ingressu Domini
in ciuitatem Ierusalem, DE quo iam supra, & se-
quenti Dominica commodius.*

*Hac sancta hebdomada, de septem Christi verbis in cruce prolatis, ad
perfectam omnium renuntiationem.*

*DOMINICA PALMARVM. De illustri
palma & triumpho, quem Christus Dominus refert
ex inimicis, & qui exprimitur in primo verbo in cru-
ce prolato, PATER DIMITTE ILLIS.*

Illustrior de inimicis palma est, mori pro eis ne moriantur,
quàm ipsis perditis triumphare. 347.

*Quæ de hodierno ingressu & triumpho Domini possunt
alia memorari.* 351.

Præsertim verò, duo hæc, declarantur expressius.

Lachryma, passionis Christi vicaria. 353.

Hoc sacrum tempus Crisis est æternitatis. 356.

*FERIA 2. De secundo Christi verbo ad Latronem. Ho-
DIE MECVM ERIS IN PARADISO. Et de ea renuntia-
tionis specie quæ spectat vsum suæ potestatis.*

Impietatis genus est, pietatis cultoribus nimis commune,
plura quam possint velle facere; & quæ possint, non fa-
cere.

363.

*Ad Euangelium. De cena in Bethania, ANTE sex dies
Pasche, vel quiduis aliud sancto tempori opportu-
num.*

366.

*FERIA 3. De tertio Christi verbo. ECCE FILIUS TVVS,
ECCE MATER TVA.*

*Et de perfecta renuntiatione inordinati affectus erga pa-
rentes aut alias personas charas.*

Qui nimis suos diligit, non satis diligit.

367.

*FERIA 4. De quarto Christi verbo: DEVS MEVS, DEVS
MEVS, VT QUID DERELIQVISTI ME?*

*Et de voluntaria renuntiatione cuiuslibet sensibilis conso-
lationis.*

*Beatius est carere omni sensibili consolatione, quam ea abun-
dare.*

371.

FERIA 5. De quinto Christi Verbo. SITIO.

*Et de interna renuntiatione desiderij cuiuslibet inordinati
etiam spiritualis.*

*Sic pia etiam desideria debent esse ardentia & temperata, vt
qua ratione sunt ardentia, eadem sint & temperata.*

375.

*Quæ plura de desiderijs, de cena Domini, de sanctissimo
Sacramento, seu etiam de communione, desiderari pos-
sint.*

378.

*FERIA 6. QUAE PARASCEVE DICTVR. De sexto Chri-
sti verbo. CONSUMMATVM EST.*

*Et de absoluta consummatione omnium quæ supersunt
in hac*

in hac vita, ut consummemur cum Christo.

Aut nihil hodie ages, aut sic semper ages. 378.

Item ad illa S. Apostoli verba : QUI viuunt , iam non sibi viuunt : vel, NON estis vestri, empti enim estis pretio magno.

Nihil est in vitæ nostræ vsu minus nostrum, quàm ipse vitæ vsus. 382.

Vberius verò ad hac S. Petri. IESVM Nazarenum, virum approbatum à Deo in vobis, affigentes interemistis. Vel ad ista S. Pauli. RVRSVM crucifigentes sibi metipsis filium Dei, & ostentui habentes.

Grauius est Christo pati à peccato, quàm pro peccato. 392.
Vbi tota Dominica Passionis series percurritur.

Ad hac etiam, aut similia : CVRRAMVS ad propositum nobis certamen, aspicientes in Authorem fidei & Consummatorem Iesum.

Sic est propositum nobis certamen in septem Christi patientis stationibus, ut qui vel vnâ deserat, totius militiæ sit desertor. 419.

SABBATO SANCTO. De septimo Christi verbo. PATER in manus tuas commendo spiritum meum. De descensu ad inferos, de corporis sepultura. Et de postrema renuntiatione, quæ est libertatis.

Nemo liberior, quàm qui minùs est liber.

DOMINICA RESVRRECTIONIS.

Nemo cum Christo mortuus, qui cum ipso non resurgat :

Nemo cum Christo resurgit, nisi qui cū ipso sit mortuus. 436.

Hæc hebdomade, dotes corporis, seu gloriosa vita Christi atque anima no-

stra simul cum eo resurgentis qualitates proponuntur, indeque veritates practica paradoxaque omnes eruuntur.

FERIA 2. *De Immortalitate gloriosæ vite Christi, atque animæ cum eo resurgentis.*

In morte immortalitas.

Ad Euangelium Ferie, De duobus peregrinis euntibus in castellum Emmaus. 455.

FERIA 3. *De Impassibilitate Corporis Christi D. & animæ nostræ simul cum eo resurgentis.*

In patientia impassibilitas. 456.

Ad Euangelium Ferie, de discipulis congregatis in cænaculo, quibus apparuit Christus, ianuis clausis. 460.

FERIA 4. *De subtilitate corporis Christi, & animæ nostræ simul cum eo resurgentis.*

In infirmitate virtus, in impotentia potentia. 460.

Ad Euangelium Ferie. De septem discipulis piscantibus. 465.

FERIA 5. *De agilitate corporis Christi D. & animæ nostræ cum eo resurgentis.*

In tarditate agilitas. 465.

Ad Euangelium Ferie. De Maria Magdalena quærente Dominum in sepulchro. 469.

FERIA 6. *De claritate gloriosi corporis Christi D. & animæ nostræ cum eo resurgentis.*

In tenebris claritas.

Ad Euangelium Ferie. De nobilissima omnium apparitione Domini, facta in monte Galilææ. 473.

SABBATO. *De plagis in corpore Christi reseruatæ ad per-*

petuam memoriam.

In obliuione memoria.

474.

Ad Euangelium Ferie. De Petro & Ioanne currentibus ad sepulchrum.

477.

DOMINICA IN ALBIS. *De iisdem Christi D. plagis ad remedium infirmitatum nostrarum reservatis.*

In plagis sanitas.

478.

*De iisdem rursus plagis, ad hac Prophetæ verba; HAU-
RIETIS aquas in gaudio de fontibus Saluatoris.*

Quantò est de peccato maior tristitia, tantò est peccatori
maius gaudium de fontibus Saluatoris.

482.

*Ad hac verba Epistolæ quæ hoc die legitur. HÆC est vi-
ctoria quæ vincit mundum, fides nostra.*

Quanta olim erat fidelium gloria, mundum vincere; tanta
modò est ignominia, vinci à mundo.

485.

*Ad hac verba, quæ ex S. Petro usurpat Ecclesia. QVASI
modò geniti infantes, rationabiles, sine dolo.*

Infantes esse oportet vel bonâ vel malâ infantia.

491.

*Hac hebdomade & tribus sequentibus, Charitatis proprietates quæ ab
Apostolo referuntur, sic ad mysteria suæ apparitiones Christi resurgen-
tis reuocantur, ut his certissimis notis vera Charitas discerni possit ab
amore proprio seu zelo falso & adumbrato.*

FERIA 2. *Apparet Christus D. Beatissimæ Virgini Ma-
tri, in quâ item apparet prima Charitatis proprietas;*

CHARITAS PATIENS EST.

Quam verè Charitas includit in se patientiam, tam verè im-
paciens excludit à se charitatem.

FERIA 3. *Apparet Christus Mariæ Magdalene, ubi &*

*apparet secunda Charitatis proprietas : CHARITAS
BENIGNA EST.*

Si quid Charitas negat , tam benigna negando est , quàm
concedendo. 501.

*FERIA 4. Apparet Christus aliis mulieribus : Et alium
sue benignae charitatis effectum illis confert.*

Saepe videtur in nobis esse Charitas , & est magis carnalitas.
505.

*FERIA 5. Antequam Christus appareat omnibus disci-
pulis suis , in his apparet , quod CHARITAS NON
AEMULATUR.*

Quidquid acquiras æmulando , plus perdis quàm acquiras.
508.

*FERIA 6. Duo ex discipulis Petrus Et Ioannes currentes
ad sepulchrum , ostendunt Charitatem , QUAE NON
AGIT PERPERAM. Id est, inordinate.*

Minima quævis inordinatio cordis immundi , maior est ma-
ximâ quavis inordinatione huius mundi. 512.

*SABBATO. Apparet Christus seorsim Petro Et Iacobo : Et
in his duobus Apostolis apparet charitas , QUAE NON
INFLATUR.*

Humilitati tuendæ tutius est vix de se quàm vel humiliter
loqui. 517.

*DOMINICA 2. POST PASCHA. EGO SUM PA-
STOR BONVS.*

ANIMAM MEAM PONO PRO OVIBVS MEIS.

Nihil æstimatione speculatiua pretiosius anima nostra : sed
practicâ nihil vilius. 522.

Hac hebdomada, dum Apparet Christus D. duobus discipulis peregrinantibus, apparet Charitas, *QUÆ NON EST AMBITIOSA.*

FERIA 2. Christus apparens peregrinis in habitu peregrini, ostendere incipit Charitatem minimè ambitiosam. Sicut vinum nouum, sic nouus honor maximè temperandus.

527.

FERIA 3. De familiari colloquio Christi D. cum peregrinis.

Hic ascendit ad summos, qui descendit ad infimos. 531.

FERIA 4. Christus de opprobriis suæ passionis libenter audit & loquitur.

Quæ sunt ambitioso detrimenta, hæc sunt humili lucra. 535.

FERIA 5. Christus scripturas quæ de ipso erant, peregrinis interpretatur.

Quo gressu Charitas nobilem fugit suggestum, eodem petit ignobilem. 539.

FERIA 6. Christo loquente peregrinis, inardescunt eorum corda.

Colloquendo de diuinis, quantò magis lucet quàm ardes, tantò minùs in te diuina lucet charitas. 542.

SABBATO. Christus Dominus rogantibus se peregrinis ut secum maneat, acquiescit.

In dubio certius est, & rationi conformius, aliorum rationi te conformare quàm propria. 547.

DOMINICA 3. POST PASCHA. De tristitia & gaudio Apostolorum, ex absentia & presentia Domini.

Tres precipuæ distinguuntur Euangelij partes, ad quas

hae distinctae referuntur veritates. MODICVM Etiam non videbitis me.

Nihil tam modicè creditur quàm modicum vitæ tempus, cum nil tamen sit tam credibile. 552.

Tale est pretium huius modicæ vitæ, vt quantò maioris vitæ hanc æstimes, tantò minoris facias illius pretium. 558.

Ex modico illo quo viuis tempore, plus etiam vitæ perdis quàm viuas. 560.

Amen dico vobis quia plorabitis Et flebitis vos : Mundus autem gaudebit, sed tristitia vestra vertetur in gaudium.

Vt fur de furto, sic mundus de mundo gaudet. 567.

Non te contristes contristatus, & ipsa tua tristitia iam vertetur in gaudium. 569.

Quæ à Christo est tristitia, magis iucunda est, quàm quæ à mundo iucunditas. 573.

Iterum videbo vos, Et gaudebit cor vestrum, Et gaudium vestrum nemo tollet à vobis.

De Christo nos vidente plus esse debet gaudij, quàm de nobis Christum videntibus. 575.

Quantò felicius est illud gaudium quod nemo à te potest tollere, tantò tu infelicior qui hoc à te tollis. 577.

FERIA 2. Christo Domino apparente discipulis simul congregatis apparet charitas, QUAE non querit quæ sua sunt.

Charitas non quærendo sua, meliùs inuenit quàm si quæreret; tantò ditior quantò pauperior. 580.

FERIA 3. Apparet iterum Christus discipulis simul congregatis presente Thoma, simulque apparet charitas,

QVÆ non irritatur.

Esto appareant aliquæ irascendi causæ , multò tamen plures
sunt & validiores, ne irascaris. 585.

*FERIA 4. Apparet Christus septem discipulis de nocte
piscantibus ; ubi & apparet charitas, QVÆ NON CO-
GITAT MALVM.*

Si charitas cogitaret malum , malum de charitate cogitari
posset. 592.

*FERIA 5. Christus D. Petro suas pascendas oues concre-
dit, simulque demonstrat charitatem, QVÆ NON
GAUDET SVPER INIQVITATE.*

Gaudere super iniquitate, plerumque est iniquius quàm ip-
sam iniquitatem committere. 598.

*FERIA 6. Christus D. mittens suos in vniuersum mun-
dum, & promittens se miraculis confirmaturum quæ
predicarent, ostendit charitatem, QVÆ congaudet
veritati.*

Aut amandus tui contemptus , & te contemnenti congau-
dendum , aut non amanda charitas, QVÆ congaudet
veritati. 602.

*SABBATO. De miraculis spiritualibus quæ Charitas Do-
mini quotidie operatur, vt ostendat se congaudere
veritati.*

Sapienter ille qui maluit liber peccato possideri à dæmone,
quàm vel leui cum peccato liberare possessos. 606.

*DOMINICA 4. POST PASCHA. De necessario
Christi discessu, & in eius vicem venturo Spiritu san-
cto qui mundum arguat de peccato.*

Vado ad eum qui misit me.

Sicut à Deo, sic ad Deum.

Cui veritati multæ affines adiunguntur.

615.

Expedit vobis vt ego vadam.

Dux iam alibi propositæ veritates huc refefuntur.

616.

Si non abiero, paraclitus non veniet ad vos.

Inordinata quæuis affectio, licet parum sit mala, non est tamen paruum malum.

ibid.

Huic multæ conformes aliæ producuntur.

620.

Nec non ad illa, quæ ibidem declarantur; Cum venerit ille, arguet mundum de peccato, & de iustitia, & de Iudicio.

621.

FERIA 2. Apparet quingentis Dominus in monte Galilee, ubi & apparet Charitas, QUAE omnia credit.

Non est prius intelligendum, vt credas; sed primò credendum est, vt pòst intelligas.

624.

FERIA 3. De potestate quam sibi Christus datam dicit, unde est illa charitas, QUAE omnia sperat.

Vera fiducia confidenti nunquam infida.

628.

FERIA 4. De integra obseruatione mandatorum quam Christus suis commendat, & de illa Charitate quæ idcirco, OMNIA suffert, & omnia sustinet.

Aut nulla, aut tota est Charitas in agendis, sicut fides in credendis.

632.

FERIA 5. De charitate quæ non excidit, & quæ apparet in Christo remanente nobiscum, sicut promisit: ECCE ego vobiscum sum.

Melius erat viam iustitiæ non introisse, quàm retroisse.

638.

FERIA 6. De eadem charitate Christi Domini, quæ nobiscum

biscum

biscum semper manet in sanctissimo Sacramento.
Quàm gloriosum est Sacramento, multa in nos posse, si velimus: tam ignominiosum est pauca posse quod nolumus.

643.

SABBATO. De eadem charitate Christi, quā constanter nobiscum manet per superiores & directores.

Quasi peccatum ariolandi est repugnare: & quasi scelus idolatriæ, nolle acquiescere.

648.

DOMINICA 5. POST PASCHA. De orationis efficacia, frequentia, & aliis proprietatibus. SI QUID petieritis patrem in nomine meo, dabit vobis.

Ne dicas te petere in nomine Domini, aut ne dicas te nihil obtinere.

653.

Plures huic annectuntur Veritates.

657.

Quàm verè autem unusquisque sibi possit illud Christi applicare. VSQVE MODO NON PETISTIS QUIDQVAM, patet ex ipsa Oratione Dominica, cuius septem petitionibus cum septem opponantur vitia, quæ dicuntur Capitalia, nisi ea quisque reprimat, nihil petit: quod sic paucis expressum fusè declaratur.

Qui sibi non contradicit in suis malis desideriis, sibi contradicit in bonis.

658.

Hac hebdomade, conformes mysterio Ascensionis Domini considerationes & veritates ex primo capite Actuum Apostolorum trahuntur, atque his velut stimulis & motiuis excitantur corda nostra, VT QVÆ sursum sunt, querant & sapiant, ubi Christus est in dextera Dei sedens.

FERIA 2. IN ROGATIONIBVS. De primo motiuo celestis desiderij, quod in celo nobis promissum sit Regnum

2. Pars.

Q

Dei, de quo Christus cum discipulis loquebatur.
Quantam in te vim habet desiderium Regni Cælestis, tantam tibi vim facies. 666.

Ad Euangelium de Rogationibus, multa proponuntur quæ singulis tridui Feriis possint deservire, & his tribus Evangelicis verbis accommodari, PETITE, querite, pulsate. 670.

FERIA 3. De secundo motivo excitandi in calum desiderij: quod ibi omnia nostra desideria compleantur.

Quâ ratione terrena tantum & non cælestia desideras, eadem necesse est ut cælestia tantum & non terrena desideres. 672.

FERIA 4. QUAE EST VIGILIA ASCENSIONIS DOMINI.

De tertio motivo desiderij sursum ferendi, quod illuc suspirare nos faciat, qui in nobis habitat Spiritus sanctus.

Lachrymarum descensus, ascensus est: quo est descensus celerior, eò & ascensus velocior. 677.

FERIA 5. ASCENSIO DOMINI. De quarto motivo cælestis desiderij, quod Christus in calum ascenderit, ibique regnet.

Nemo veriùs ascendentis Christi Mysterium assequitur, quam qui veriori desiderio ascendentem Christum sequitur. 684.

Huic roborandæ veritati sequens adjungitur.

Tanti cuiusque refert se à terra retrahere, quanti ad cælum trahi. 688.

Referuntur & aliæ multæ conformes, quarum quæ postrema est, fusè declaratur;

Ex his Apostoli verbis: VIDETE ne recusatis loquentem.

Sedentem in cælo Christum, & inde nobis loquentem non audire, periculosius est, quàm dum in terris loqueretur. 691.

FERIA 6. De quinto motiuo excitandi in calum desiderij, quòd tam iustè debitum sit hoc desiderium, ut iniusti simus. Et indigni calo consequendo, nisi calum desideremus.

Sic dignum est cælum nostris desideriis, ut nisi cælum desideres, cælo sis indignus. 699.

SABBATO. De sexto motiuo acuenendi in calum desiderij; quod inde gaudium spirituale redundet.

Spes cæli, cælum est. 703.

DOMINICA INFRA OCTAVAM ASCENSIONIS. CUM venerit paraclitus, Et c. De Aduentu sancti spiritus, Et de aduersis tolerandis multa congeruntur. 709.

Explicatur vero latius, quæ est huius loci maxime propria veritas.

Vel nulla Christi recoletur memoria, vel nulla erit in eius cultu querimonia. 711.

Hac hebdomada, quæ in Actis Apostolorum narrantur fecisse discipuli Domini, dum ab eius Ascensione ad Pentecosten expectarent Spiritum sanctum, referuntur ad sex virtutes seu veritates, quæ nos ad eundem plenius recipiendum disponant.

FERIA 2. De continuata per decem dies recollectione Apostolorum: Et de nostra instituenda, ad recipiendum cum eis Spiritum sanctum.

Nulli magis necessario secedendum, quàm qui minùs necessarium sibi putat secessum. 716.

FERIA 3. De moderanda cura nostri officij, ad Exemplum principis Apostolorum sancti Petri.

Sic internis externa sunt temperanda, vt neutrum eorum in-
portunè, & vtrumque opportunè sibi cedat. 722.

FERIA 4. De perfecta obedientia quam ceteri omnes congregati S. Petro prastiterunt: & de nostra reddenda superioribus.

Qui rationes inquirat obedientiæ, rationem quærit suæ ino-
bedientiæ. 728.

FERIA 5. De unanimi consensu discipulorum in Electione duodecimi Apostoli: Et de nostro similiter procurando.

Qui sensu suo priuato saniozem se aliis putat, sano se priuat
sensu. 732.

FERIA 6. De feruenti oratione discipulorum: & de nostra consimili ad petendum lumen in dubiis.

Erranti in dubiis & non oranti, nulla est erroris excusatio.
736.

SABBATO. IN VIGILIA PENTECOSTES. De perfecta discipulorum, & nostra resignatione, ad recipiendum Spiritum sanctum.

Nemo paratior ad omnia Dei dona recipienda, quàm qui ad
nulla sibi danda, æquè paratus est. 740.

Hac sequenti hebdomada, sic pergitur in historia Actuum Apostolorum,
vt inde diebus singulis manifestetur vnum è septem spiritus sancti
donis, cui sua conformetur veritas.

DOMINICA PENTECOSTES. De missione Spiritus sancti, & de dono Sapientia.

Humana sapientia sic diuinæ opponitur, sicut humanæ stultitia. 745.

Eodem die, in illud Apostoli. NOLITE contristare Spiritum sanctum Dei.

Quod non magis lætificat, hoc magis contristat Spiritum sanctum. 751.

Item. De peccato in Spiritum sanctum.

Peccati contra Spiritum sanctum malignitas sic est singularis, vt multis tamen peccatoribus iam sit communis. 755.

Qui peccant in Spiritum sanctum, vix peccant quin blasphement. 762.

His adiunguntur alia quæ generatim spectant Spiritum sanctum. 766.

FERIA 2. De prima prædicatione S. Petri ad Iudeos : & de dono intellectus.

Quod intellectus confert actioni, hoc actio refert intellectui. 767.

FERIA 3. De primo viuendi genere nascentis Ecclesie, & de dono scientie.

Qui eminentior est in hac eminenti scientia, minus inter homines eminere cupit. 772.

FERIA 4. De primo miraculo quod refertur ab Apostolis factum, & de dono consilij.

Qui cum affectu incomposito Deum consulit, non Deum sed Deo consulit.

Non à Deo consilium petere, sed Deo dare velle videtur. 776.

FERIA 5. De prima persecutione Apostolorum, & de dono fortitudinis.

Qui non satis audet in magnis, nimis audet in paruis. 781.

FERIA 6. De prima oratione publica Ecclesie, & de

dono pietatis.

Sicut pietas valet ad omnia, sic omnia valent ad pietatem. 786.

SABBATO. De prima qua refertur in Ecclesia, perpetrata culpa, sequentique pena: Et de dono timoris.

Amori potius ab amore timendum est, quàm à timore. 791.

DIE 24. FEBRUARII. De sancto Mathia Apostolo.

Sicut in manu Domini, fors nostra est: sic in sorte nostra manus est Domini. 798.

DIE 19. MARTII. De sancto Iosepho. In 1. parte.

DIE 20. MARTII. De S. Ioachimo Patre B. Virginis.

Affinitas sanctitatis cum B. Virgine, magis æstimanda quàm sanguinis. 803.

DIE 21. MARTII. De S. Benedicto. INTER benedictos benedicetur. Eccl. 24.

Inter benedictos benedicetur, non cui meliùs omnia, sed qui ex omnibus melior. 808.

DIE 25. MARTII. In Festo Annuntiationis B. Mariæ Virginis. MISSVS est Angelus Gabriel à Deo, &c.

Sui quisque cultus ac pietatis in B. Virginem sæpe fidem facit maiorem, in parvis quàm in magnis. 813.

Ave gratia plena.

Quod cuique magis ex Virgine Matre proponi debet, est eius sanctitas: non quàm sit sancta, sed quàm tota sit sancta. 818.

Ecce concipies in utero, & paries filium.

Non tam sibi quàm nobis, Christus elegit Matrem. 827.

Quomodo fiet istud, quoniam virum non cognosco!

Frustra Beatam Virginem oras, si non quæris sicut illa, quod ignoras. 834.

Quia non erit impossibile apud Deum omne verbum.

Qui dicunt se non posse quod iubentur, non possunt id dicere sine iniuria Virginis Matris. 839.

Ecce ancilla Domini, &c.

Talis superbi fastus est, ut ne quidem Matrem Dei veneretur. 845.

Tunc praecepit & dixit mihi Creator omnium; & qui creauit me, requieuit in tabernaculo meo, & dixit mihi, in Iacob inhabita. Eccles. 24.

Qui praecepit & dixit B. Virgini, ut inhabitaret in Iacob, tibi simul praecepit & dixit, ut quantum velles illam in te inhabitare, tantum esse velles alter Iacob. 851.

DIE 2. APRILIS. De S. Francisco de Paula.

Hic erit verè maximus, qui verè est minimus. 856.

DIE 25. APRILIS. De sancto Marco Euangelista. QUI similis factus est Leoni in operibus suis.

Fortioris est animi non vinci à bonis blandientibus, quam ipsa vincere mala terrentia. 860.

DIE 1. MAII. De sanctis Philippo & Iacobo Apostolis.

TANTO tempore vobiscum sum, & non cognouistis me. Si tempus respicis comparandæ tibi virtutis, vix ullam tibi comparatam respicies. 865.

DIE 3. MAII. Inuentio sanctæ Crucis.

Si quid fortè asperius inueniatur de quo conquereris, de inuenta cruce conquereris.

Inuentæ cruci tantum quis detrahit, quantum in pænis murmurat. 870.

Considerationes & Veritates communes omnibus statibus.

PRIMA CONSIDERATIO. Non sine Deo statum esse deligendum.

Præcipitatio animi in statu vitæ deligendo, præcipitium est animæ. 875.

SECUNDA CONSIDERATIO. De non differenda status seu vocationis cognita acceptatione.

Non euitat præcipitium sed mutat, qui ne nimis sit præceps, nimis est lentus. 878.

TERTIA CONSIDERATIO. Quo die suscipitur administratio status, vt perfectè secundum Deum expleatur. Vel, quocunque die de officio ritè administrando cogitetur.

Sicut à Domino quærendum est officium: ita in officio quærendus est Dominus. 883.

QUARTA CONSIDERATIO. De ordinando statu, si forte sit inordinatus.

Reuocanti hominem Deo ab errore viæ suæ non obsequi, peius est, quàm primò vocantè ne erraret, non sequi. 888.

QUINTA CONSIDERATIO. Quo die Pontifex consecratur.

Dum consecratur Pontifex, sic affectus esse debet, vt omnes affectus habeat consecratos.

SEXTA CONSIDERATIO. Quo die sacri suscipiuntur Ordines.

In qua sanctitate Ordinandus debet esse, debet Ordinatus semper esse.

SEPTIMA CONSIDERATIO. Quo die primum celebratur Sacrum.

Sacerdos sic cum Christo sacrificet, vt sit ipse sicut Christus, sacrificans & sacrificium.

OCTAUA CONSIDERATIO. Quo die Religiosus sumitur habitus.

Non est in nouo habitu nouum cordis gaudium, sed in nouo corde.



DOMINICA SEPTVAGESIMÆ.

DE OTIOSIS OPERARIIS IN
VINEAM MISSIS.

*Ite & vos in vineam meam, & quod iustum fuerit,
dabo vobis. Matth. 20.*

VERITAS PRACTICA.

Sicut nemo otiosus operatur in vinea ; sic nemo bene
operatur nisi otiosus.

*RATIO quoad postremam partem quæ sola difficultatem habet,
hæc est, quod nemo bene operetur nisi consideratè operetur.*

Sed nemo consideratè operatur nisi otiosus.

*Ergo nec bene; ac propterea quàm diligenter Operario malum otium
est vitandum: tam bonum est illi procurandum.*

I. PUNCTVM.



*SIMILE est regnum cælorum homini Patri familias,
qui exiit primo mane conducere operarios in vineam
suam. Vide reliquum parabola; & ex multis in-
terpretationibus vineæ, applica tibi illam quæ
statui tuo magis conueniet, vt in eo discas fru-
ctuosiùs operari. Quæcumque enim interpretationes afferantur,*

2. Pars.

A

2 Dominica Septuagesima, *Ite & vos in vineam meam.*

siue Ecclesiam intelligas, siue Clericalem statum, siue Institutum religiosum, siue Sacerdotale ministerium, siue Concionandi aut Confessiones audiendi Munus, siue Officij cuiuslibet administrationem, siue animæ propriæ salutem & perfectionem, siue aliquam familiæ aut proximorum curam, aut quidquid demum simile interpreteris, eò tandem referri potest Parabola & similitudo vineæ, ut sicut ad fructum colligendum aut mercedem promerendam, necessariò colenda est vinea, & labor impendendus: ita in illa certa vocatione tua, aut illo tuo munere, tibi est fideliter laborandum. Tua hæc est colenda vinea, aut potius tua hæc est pars & portio vineæ Domini excolendæ. Sic te cogitare debes singulariter vocatum & missum à Deo in hanc tui officij partem & sortem, sicut Operarium à Patre-familias in vineam suam; cui proinde laboris impensi rationem reddas, & à quo recipias operæ bene positæ iustum & condignum præmium. O quale præmium tantillæ operæ!

Sicut verò cauendum est illud malum otium, quod labori necessario directè opponitur; ita planè aliud quod laborem valde iuuat & promouet est procurandū. Atque hinc orta est Veritas plurimum expendenda. *Vt sicut nemo otiosus operatur in vinea: sic nemo bene operetur nisi otiosus, bono illo videlicet otio quod est magnum negotium.* Ratio pertacilis; Nemo enim bene operatur, nisi consideratè operetur, id est, nisi agendo præuideat, & præordinet, quidquid habet agendum, prout apertè monet Sapiens:

- Eccles. 37. Cor boni consilij statue tecum: non est enim tibi aliud pluris illo: In omnibus deprecare Altissimum ut dirigat in veritate viam tuam. Ante omnia opera tua verbum verax præcedat te, Id est recta rei agenda notio, & ante omnem actum tuum, Consilium stabile.* Itémque
Prou. 4. in Prouerbiis; Oculi tui recta videant, & palpebra tua præcedant gressus tuos, dirige semitam pedibus tuis, & omnes viae tuae stabilientur. Et rursum: *Vbi non est scientia animæ, non est bonum: & qui festinus est pedibus, offendet.*

Hæc scientia animæ ipsa est Consideratio, ut fusè sanctus Bernardus scriptis de hoc argumento quinque libris ad Eugenium Papam; vnde sunt illa Propositioni nostræ aptissima: *Quid tam ad omnia valens, quam quæ ipsius actionis partes benigna quadam præsumptione suas facit, præagendo quodammodo, & præordinando quæ agenda sunt. Necessariò sanè ne fortè ea quæ & præuisa & præmedi-*

Sicut nemo otiosus operatur in vinea, sic nemo bene, &c. 3

tata poterant esse proficuo, precipitata magis periculo fiant. Et primum quidem, ipsum fontem suum, id est, mentem de qua oritur purificat Consideratio, deinde regit affectus, dirigit actus, corrigit excessus, componit mores, vitam honestat & ordinat: postremò diuinarum pariter & humanarum rerum scientiam confert. Hæc est quæ confusa determinat, hiantia cogit, sparsa colligit, secreta rimatur, vera vestigat, verisimilia examinat, ficta & fucata explorat. Hæc est quæ agenda præordinat, acta recogitat, ut in mente nihil resideat aut incorrectum, aut correctione egens. Hæc est quæ in prosperis aduersa presentit, in aduersis quasi non sentit: quorum alterum fortitudinis, alterum prudentia est.

Satinne patet ex istis quantum Consideratio valeat ad recte operandum: & quod nemo bene alioquin operetur, nisi consideratè, seu nisi considerationem præmiserit operi, tamquam facem in tenebris operanti? Itane verò tibi prospicis? itane agenda præuides?

II. PUNCTVM.

SED nemo consideratè operatur, nisi otiosus.

Id est, nisi ante per otium, quæ secum meditando, quæ cum aliis consulendo, considerationem adhibuerit, quæ ad recte operandum est necessaria. Hoc est otium, quod à Viris magnis ^{s. Greg. Nazian.} dicitur *magnum negotium*, quo scilicet negotia diligenti & attentata consideratione, nec non singulari cum Deo communicatione prius expenduntur, quàm expediantur. Tum quisquis ita sibi vacat, numquam minùs est otiosus, quàm cum otiosus: sic enim vel ante opus præcogitando quid & quomodo fieri debeat, rationem quodammodo suis impertit operibus: vel post opus recogitando quid actum sit, ex ipso suo opere rationem elicit & disciplinam, quæ illud ipsum opus alias perfectiùs operetur. Sic ^{Provi. 24.} aptè sanctus Gregorius explicando illud Sapientis: *Præpara foris opus tuum, & diligenter exerce agrum tuum, ut postea adifices domum tuam.* ^{10. Mat.} *SYNT* nonnulla, inquit, cogitationis acumina, quæ ex ^{16.} operatione nascuntur; sicut ab animo opus sumitur, ita ab opere animus eruditur: Mens imperat bona quæ fiant, sed postquam fieri imperata caperint, ipsa suis exercitata actionibus discit cum imperare bona inchoauerat, quantum minus videbat.

4 *Dominica Septuagesima, Ite & vos in vineam meam.*

Ad hæc autem quis non videt opus esse otio, siue vt singula diligentius pertractentur, siue vt intricata explicentur, siue vt difficilia explanentur, siue vt obscura & incerta illustrentur? Quò illud Christi Domini referas; Quis ex vobis volens turrim adificare, non prius sedens cogitat sumptus qui necessarij sunt, si habeat ad perficiendum, ne posteaquam posuerit fundamentum, & non potuerit perficere, omnes qui vident, incipiant illudere ei dicentes; quia hic homo capit adificare, & non potuit consummare. Nonne tu sic aliquando te illudendum præbuiisti? Nonne sic saepe inchoasti quæ non perfecisti? Nonne sic idcirco non perfecisti, quia non sedens & otiose cogitaueras sumptus, qui erant necessarij ad perficiendum?

III. PUNCTVM.

SICVT ergo nemo otiosus operatur in vinea, ita nemo bene operatur nisi otiosus: Quia nemo bene operatur nisi considerate, & nemo consideratè nisi otiosus, nisi in otio, nisi in secessu, nisi in oratione, nisi cum Deo à quo est omnis rerum agenda-
rum intelligentia, & illa bonorum directrix operum Sapientia, quam Sap. 9. Sapiens tantopere expetebat: Mitte illam de cælis sanctis tuis, & à sede magnitudinis tuæ, vt tecum sit & tecum labore, & sciam quid acceptum sit apud te. Scit enim illa omnia & intelligit, & deducet me in operibus sobrie, & custodiet me in sua potentia, & erunt accepta opera mea. Quasi diceret, nec aliter erunt accepta: sic enim antè præmiserat; Nam etsi quis erit consummatus inter filios hominum, si ab illo absuerit sapientia tua, in nihilum computabitur. Hæc autè Sapientia trahitur de occultis, vt est in libro Iob; id est, non in publico, non in foro; non in ipso externo opere nisi prius in recessu, in occulta Commoratione, & intima meditationi cura. Vacate & videte. **STATVE** tibi speculam, pone tibi amaritudines, dirige cor tuum in viam rectam. Vsq; quo deliciis dissolueris filia vaga? Sapientia scribe, inquit Sapiens, in tempore vacuitatis, & qui minoratur actu, Sapientiam percipiet. Ibidemque aptissime; Operamini opus vestrum ante tempus, id est ante ipsum opus cogitate de opere, & dabit vobis mercedem in tempore suo.
I. Offic. 6. Sic grauitè & luculentè sanctus Ambrosius. Ne quid turpe atque indecorum sentiamus, duo hæc, id est, & tempus & diligen-

tiam ad considerationem rerum, examinandi gratia conferre debemus. Vide quàm parum hæc duo conferas, & audi sanctum Bernardum. Audi quid redarguam, quid suadeam: si quod vivis & sapis, totum das actioni, considerationi nihil; laudo te, in hoc non laudo: <sup>1. de Con-
sid. 5.</sup> puto quod & nemo qui à Salomone audierit, Qui minoratur actu, percipiet sapientiam: & quæ plura ibi habet. Itemque paulò post egregiè, ut in operando considerationem serues, sume, inquit, exemplum de summo omnium Patre, Verbum suum emittente & retinente. <sup>2. de Con-
sid. 3.</sup> Verbum tuum, consideratio tua; quæ si procedit, non recedat; sic progrediatur ut non egrediatur, sic exeat ut non deserat.

O te inconsultum & inconsideratum qui nec antè, nec in ipso tibi attendas opere; hic te iterum plange, hic dole & geme quod est in Canticis: Posuerunt me custodem in vincis, vineam meam non custodiui. EGO loci huius occasione me ipsum reprehendere soleo, inquit idem sanctus Bernardus, quòd animarum susceperim curam, <sup>Serm. 30.
in Canticis.</sup> qui meam non sufficerem custodire. Quibus ergo lachrymis rigabo sterilitatem vineæ meæ: omnes palmites eius aruerunt præ inopia. Iacent sine fructu eo quod non habeant humorem, id est, otiosæ considerationis affectum & effectum. Propone tibi praxim quam diligentius serues cum gratia.

E O D E M D I E,

IN EADEM VERBA:

Ite & vos in vineam meam. Matth. 20.

ALIA VERITAS PRACTICA.

Nullus est labor nisi sit in vinea Domini: Et in vinea Domini nullus est labor.

SENSVS & Ratio est, quia cum labor in vinea Domini sit ille omnis labor qui rectè & secundum Deum ordinatus est, in quacumque tandem vocatione suscipiatur; profecto si quis sit alius labor non sic rectè ordinatus, nullus censeri debet, quia

6 Dominica Septuagesima. *An oculus tuus nequam, &c.*

Sap. 3.

erit infructuosus inutilis, & vanus labor. Et labores sine fructu, & inutilia opera eorum.

Sed ille tamen labor qui rectè & secundum Deum ordinatur, est tam facilis & amabilis, ut pene nullus sentiatur. Videte oculis vestris, quia modicum laboravi, & inveni mihi multam requiem.

Ecclesi. 31.

Ergo nullus est labor nisi sit in vinea Domini; Et in vinea Domini nullus est labor.



VÆ quidem Veritas attente considerata, hunc habet inter alios fructum, ut relicto labore inutili, fructuosus suscipiatur. Et cum laboris utilitas & inutilitas à rectè ordinato fine pendeat, curandum est ut rectè semper ille ordinetur finis, quemadmodum in prima parte generatim demonstratur. Vide ibi Verbo *finis, Intentio, Labor*. Particulatim vero prima Propositio satis fuse probatur, Sabbato Dominica secundæ post Epiphaniam.

Secunda item Propositio declaratur in hac secunda parte, Dominica infra Octavas Ascensionis: Et alibi satis frequenter. Vide Verbo *Difficultas, Labor, Christus, amor*.

E O D E M D I E,

AD HÆCEVANGELICI PATRIS-
FAMILIAS VERBA:

An oculus tuus nequam est, quia Ego bonus sum?
Matth. 20.

VERITAS PRACTICA.

Qua parte Peccator à se timorem Dei excutit: eadem
Deus peccatori timorem magis incutit.

RATIO EST, Quia peccator ea parte magis à se timorem

Dei excutit, quod bonus si Deus. Etenim quia non pro- Eccle. 8.
feritur cito contra malos sententia, absque timore
vlllo filij hominum perpetrant mala.

Sed ex illa parte, seu ex illo nomine, Deus peccatori timorem ma-
gis incutit.

NAM primò hinc Peccator arguitur quod abutatur Boni-
tate diuina, & quod ille abusus maiorem denotet mali-
tiam, & ingratitude, atque ex consequenti grauior- Ecclesi. 5.
es accersat pœnas. *Ne dixeris, peccaui, & quid mihi accidit tri-
ste? Aliissimus enim est patiens redditor.* Vide locum valde hîc
aptum, & ibidem Capite decimo sexto vbi præcipuè perpen-
denda sunt Verba quæ Iustitiam Diuinam eò seueriorem dicunt
quò maior præcesserit misericordia. *Sicut qui paulatim arcum
intendit, inquit sanctus Hieronymus, tempus dat alteri vt fugiat,
qui si fugere nolit, tanto fortius sagitta emissa configitur: quanto ma-
iori tempore intensio arcus fuit facta; Sic Deus qui laneos habet pedes,
sed ferræas manus, Tarditatem supplicij grauitate compensat.*

Deinde vero Peccator abutitur voce Bonitatis in prauum sen-
sum, quasi Deus sit hoc sensu bonus vt peccatis indulgeat, nec
ita moueatur ad pœnam inferendam, sicut timidi sibi persua-
dent. Quod certe dum Peccator cogitat, non leuem Deo facit
iniuriam, nec leuiter diuinam accendit iram. *Existimasti inique Ps. 49.*
*quod ero tui similis: arguam te & statuam contra faciem tuam. Intelli-
gite hæc qui obliuiscimini Deum: nequando rapiat & non sit qui eri-
piat. PROPTER quid irritauit impius Deum? dixit enim in corde Ps. 9.*
suo: Non requireret. Quali diceret, longe est alia mens Dei, qui
quanto magis est bonus, tanto magis malitiam detestatur & pu-
nit: ac nihil est quod illum magis prouocet ad puniendum, quàm
si quis sibi forte impunitatem promittat. Nam cùm sciat inde
audaciores fieri peccatores, hanc vt audaciam coerceat, timo-
remque oppositum incutiat, tum maxime pœnas exposcit à pec-
catore qui minus eas timet: *Vt quicumque audierit, tinniant amba 4. Reg. 21.*
aures eius. O QUAM bonus & suavis est Domine spiritus tuus, ait Sa- Sap. 12.
*pientia, sed quid inde infert? Idcoque eos qui exerrant, corripis
& de quibus peccant, admones & alloqueris, vt relicta malitia cre-
dant in te Domine. Hoc est scilicet esse bonum, exerrantes cor-*

riper. Vnde qui aliter sentit de bonitate, suo illam damno correctionem sentiet, & correptus non corrigitur.

Denique, licet nullas à Deo cogitaremus immitti poenas, & Bonitatem eius interpretaremur solam Beneficentiam, hac etiam parte timorem Deus magis incuteret. Nam quo esset beneficentior, maiora bona conferret, cum vero, *Nihil sit melius quam timor Dei, & nihil dulcius quam respicere in mandatis Domini*, *Ecclesi. 23.* vt ait expresse Sapiens, profecto vel non esset bonus Deus, vel Timor non esset melius bonum, vel illud daret Deus. Vnde idem *Ibid. 25.* apte Sapiens: *Quàm magnus qui inuenit sapientiam & scientiam, sed non est super timentem Dominum. Timor Dei super omnia se superposuit. Beatus homo cui donatum est habere timorem Dei. Qui tenet illum cui assimilabitur?*

Vnde tandem concluditur quod longe à vero & bono, peccator errat, quando minus timet Deum, quia bonus est Deus: & quam vere sit dictum, *Quà parte peccator à se timorem Dei excutit, eadem Deus peccatori timorem incutiat*. Nam si peccator idcirco bonum esse Deum interpreteretur, quia non infligit malum, errat, & hoc ipso magis illi Deus infliget, vt hoc errore sanetur: aut si bonum hoc sensu intelligat quasi benefaciat: non minus errat excutiendo à se timorem, cum nulla re magis benefaciat Deus quam donando timorem Dei, vnde apte Dauid: *Preuaricantes reputant omnes peccatores terra*, qui videlicet illud negant quod aiunt: & quod negant, affirmant; quod volunt nolunt, & quod nolunt volunt. Qui dicunt Deum sibi valde beneuolum, & beneficentissimum: & tamen nolunt eius beneficentiam, quâ nulla maior est quàm timor Domini. *Rob. 4.* *Multa bona habebimus si tuerimus Deum, & recesserimus ab omni peccato, & fecerimus bene.*

Vide in 1. parte Feriam 3. Dominicæ 4. post Epiph. In hac secunda, Sabbatum post Pentecosten: In 3. parte Dominicam nonam post Pentecosten. In quarta, Feriam secundam & tertiam post Dominicam decimam octauam, vbi hæc Parabola rursus proponitur. Vide & Verbo *Timor, Bonitas. Presumptio. Inuidia. Labor.*

E O D E M D I E,

AD HÆC CHRISTI DOMINI VERBA:

Multi

Causa cur pauci salui sint, hæc in te forte est, &c. 9

Multi sunt vocati, Pauci vero electi. Matth. 20.

VERITAS PRACTICA.


Quæ causa est cur pauci salui sint, hæc in te causa est, cur ex illis forte non sis.

RATIO EST, Quia causa præcipua & magis immediata cur pauci salui sint, Concupiscentia est quam pauci reprimunt.

Sed in te qui concupiscentiam non satis forte reprimis, hæc causa reperitur.

Ergo quæ causa est cur pauci salui sint, hæc in te causa est, cur ex illis forte non sis. Quod quàm sit expauescendum nisi videas, argumentum est evidens tibi propositæ Veritatis.

L. PUNCTVM.

 V A M sint reuera pauci electi & salui, iam Christus aliis in locis manifeste declarauerat, tum quæ Christum tempore præcesserunt in veteri testamento: & quæ in nouo sequutæ sunt vel Scripturæ vel sanctorum Patrum sententiæ valde confirmant.

Sic porro Christus Dominus Matthæi septimo: *Intrate per angustam portam, quia lata porta & spatiosa via est quæ ducit ad perditionem, & multi sunt qui intrant per eam. Quàm angusta porta & arcta via est quæ ducit ad vitam! & pauci sunt qui inueniunt eam!* Itemque Lucæ decimo tertio, quærenti cuidam si pauci sunt qui saluentur, sic respondit: *Contendite intrare per angustam portam, quia multi, dico vobis, quarent intrare, & non poterunt.* Non est sensus vt rectè notat Estius, quod multi quarent intrare per angustam portam quam multi potius fugiunt, sed cum quæsitum fuisset à Domino an multi saluarentur, primo admonuit eos qui aderant vt contenderent intrare per angustam portam, tum directè respondit multos fore qui vellent intrare ad salutem, & non posse: quod scilicet alia via quàm arcta, aut alia quàm angusta portâ vellent intrare; Sic sanctus Augustinus, cuius hæc

10 Dominica Septuagesima, Multi vocati, pauci vero electi.

De Verbis
Domini.

sunt Verba: Dominus indicat paucos saluari, pauci enim intrant per angustam portam.

Quæ autem in veteri testamento præcesserunt figuræ & prophetiæ mirum quàm aperte paucitatem illam adumbrent. In diluuiio cunctis pereuntibus, pauci, vt ait expressè sanctus Petrus, *id est, octo animæ saluæ factæ sunt*. In pentapolitano incendio solus cum liberis Lothus eripitur, neque decem inueniuntur quorum consideratione Deus cæteris parcat. Sexcenta erant Israelitarum millia quæ ex Ægypto in Palæstinam vocabantur, ex quibustamen soli duo Iosue & Caleb promissam illam terram ingressi sunt. Quo exemplo Apostolus magnifice vtitur ad rem nostram illustrandam: *Sed non in pluribus eorum*, inquit, *beneplacitum est Deo, nam prostrati sunt in deserto. Hac autem in figura facta sunt nostri, vt non simus concupiscentes malorum, sicut & illi concupierunt*. Et post multa de illorum concupiscentiis, & poenis consequentibus; *Hac autem*, inquit, *omnia in figura contingebant illis: Scripta sunt autem ad correptionem nostram, in quos fines sæculorum deuenerunt. Itaque qui se existimat stare, videat ne cadat. Quasi diceret, nisi aduertamus, idem nobis prorsus continget*.

Cum postea vero terram illam desiderabilem inhabitauerunt, viuente quidem Iosue, Deum satis fideliter coluerunt, sed illo mortuo. quamdiu putas in vero Dei cultu persisterunt? *Cito*, inquit Scriptura, *deseruerunt viam per quam ingressi fuerant Patres eorum: & audientes mandata Domini, omnia fecere contraria. Cumque Dominus Iudices suscitaret, in diebus eorum flectebatur misericordia, & audiebat afflictorum gemitus, & liberabat eos de cæde vastantium. Postquam autem mortuus esset Iudex, reuertebantur & multo faciebant peiora quàm fecerant Patres eorum, sequentes Deos alienos, seruientes eis & adorantes illos. Non dimiserunt adinventiones suas & viam durissimam per quam ambulare consueverunt. Iratusque est furor Domini in Israel. Quid quod Dauidis tempore, quo certe cultus Dei vigeat religiosius, audet ipse Dauid affirmare: Corrupti sunt & abominabiles facti sunt in studiis suis: Non est qui faciat bonum, non est vsque ad vnum. Dominus de cælo prospexit super filios hominum, vt videat si est intelligens, aut requirens Deum. Omnes declinauerunt, simul inutiles facti sunt, non est qui faciat bonum, non est vsque ad vnum*.

Iud. 2.

Ps. 13.

Tum de sequentibus sæculis, audiendi eorum Prophetæ: Nisi

Dominus exercituum reliquisset nobis semen, ait Isaias, quasi Sodoma 1^a. 1.
uissimus, & quasi Gomorrha similes essemus. OMNES conuersi sunt 1^a. 8.
ad cursum suum, quasi equus impetu vadens ad prælium, inquit Ie-
remias. Denique quo vno Micheæ dicto cætera continentur:

Qui optimus in eis est, quasi paliurus: & qui rectus, quasi spina de sepe. Mich. 7.

Certe cum irent omnes ad vitulos aureos quos Ieroboam fe-
 cerat Rex Israel, dicitur de seniore Tobia, *quod solus fugiebat* Tob. 1.
consortia omnium. Et Babylone cum Nabuchodonosor iplos ca- Dan. 3.
 ptiuos detineret Iudæos, suamque auream statuam omnibus
 adorandam proponeret, soli tres illi Viri dicuntur restitisse qui
 propterea in ardentem coniecti fornacem, stupendo ad omnem
 memoriam miraculo, liberi & illæsi permanserunt.

Non est quidem Canonicus quartus Esdræ liber, sed non mi-
 noris saltem est fidei, quàm ex historicis illis vnus, aut Patribus
 Ecclesiasticis: quorum nomine nostra probantur dicta. Sic autem
 paucitas Saluandorum illo in libro describitur: *Hoc sæculum fecit* 4. Esd. 8.
Altissimus propter multos, futurum autem propter paucos. Quomodo
autem interrogabis terram & dicet tibi, quoniam dabit terram mul-
tam magis, unde fiat fœtile, paruum autem puluerem unde aurum fit:
Sic & actus præsentis sæculi. Multi quidem creati sunt, pauci autem
saluabuntur. Sed ne quid dubij restet, propter incertam Autho. 1^a. 14.
 ris fidem: Propheta certus Isaias vnum hoc idem prorsus, diuer-
 sa licet similitudine nobis depingit. *Hæc erunt, inquit, in medio*
terra, in medio populorum, quomodo si pauca oliuæ qua remanserunt,
excutiantur ex olea; & racemi, cum fuerit finita vindemia. Vide ne
 disparem eorum fructuum numerum, qui plena manu carpuntur
 ex quauis planta, vel qui relinquuntur? Nonne quàm multi pos-
 sunt colligi colliguntur: & quàm pauci possunt deferri, dese-
 runt? O vere stupendam paucitatem!

NEQVE minus stupendè qui post Christum vixerunt &
 scripserunt, Apostoli, cæterique Patres de hac Saluandorum
 paucitate loquuntur. *Iustus vix saluabitur, inquit sanctus Petrus,* 1. Pet. 4.
impius & peccator ubi parebunt? Cui conformiter Apostolus: 1. Cor. 9.
Nescitis quod ij qui in stadio currunt, omnes quidem currunt, sed
vnus accipit brauium: sic currite vt comprehendatis. Omnis autem
qui in agone contendit ab omnibus se abstinere; & illi quidem vt cor-
ruptibilem coronam accipiant, nos autem incorruptam. Ego igitur,

12 *Dominica Septuagesima, Multi vocati, pauci vero electi.*

sic curro, non quasi in incertum, sic pugno non quasi aërem verberans: sed castigo corpus meum, & in seruitutem redigo, ne forte cum aliis predicauerim, ipse reprobus efficiar.

In quibus Apostoli Verbis, multa conglobantur quæ per se singula rem de qua hic agitur ita probant, vt simul iuncta, magis ac magis illam confirment. Primum est, Ipsa comparatio saluandorum cum iis qui brauium accipiunt, vt quemadmodum hi pauci sunt, ita & illi. Secundum est, quod sicut ij qui sic currunt vt brauium accipiant, ab omnibus se abstinēt, ita nos vt salutem consequamur. At quàm pauci sunt qui sic sese abstinēt, cùm tamen pro æterna & incorrupta corona longe magis vniciue abstinendum esset. Tertium est, quod se in exemplum huius continentix statuit, affirmans se proinde castigare corpus suum & cohibere omnes sensus suos, vt cum paucis qui se ita continent, salutem consequatur: quasi diceret, quod nisi se ita contineret, quantumuis esset Apostolus & Doctor gentium, saluus tamen non esset. Vnde & addit, quod quartum est præ cæteris valde stupendum, tantum abesse vt de se mortificando remittat aliquid quòd sit Apostolus & Prædicator, quin potius inde magis timeat & sibi vacet, ne forte prædicando aliis, vel negligentix, vel superbix, vel alicuius demùm culpæ fiat obnoxius, & se perdat: discantque omnes tali exemplo non esse tantum consilij sed præcepti sed necessitatis ad salutem, vt cum metu eam & tremore operentur. Quàm pauci vero sint qui hoc sibi persuadent, quis non videt?

Phil. 2.

Neque minus ad rem nostram confirmandam efficax illud est quod ait alibi: *Qui volunt diuites fieri, incidunt in tentationem & in laqueum Diaboli, & in desideria multa inutilia & nocua, quæ mergunt homines in interitum & perditionem. Radix enim omnium malorum est cupiditas, quam quidam appetentes errauerunt à fide, & inferuerunt se doloribus multis.* Quod est vno Verbo dicere, *perierunt, nec tales vmquam salutem consequuntur.* At quinam illi sunt de quibus loquitur? *Qui volunt, inquit, diuites fieri;* Non dicit qui sunt diuites, nec qui abutuntur diuitiis: sed hoc vnum qui volunt diuites fieri. Iã vero si quod ait, tales sint perituri quis non aperte videat quàm pauci sint qui saluentur cùm pauci sint & certe paucissimi qui non velint diuites fieri? Ac propterea sanctus Ioannes Chrysostomus: *Quot esse existimastis, inquit, in hac*

x. Tim. 6.

ciuitate nostra qui salui fiant? Erat autem Antiochia Ciuitas tum Hom. 40.
totius orbis florentissima, & numero Christianorum celeberrima. pop. ant.
Post vero pergens; *Infestum quidem est quod dicturus sum, dicam tamen; Non inuenientur inter tot millia, centum, quin & de iis dubito.* Tum affert plurimas rationes quas ad vnâ primariam contrahimus, vt facilius quisque intelligat quam sit sibi timendum, si hanc in se causam perditionis omnium, & tam rarâ salutis, inueniat.

Est nempe illa Cupiditas quam radicem malorum omnium vocat Apostolus, non quidem in se, cum nec ipsa sit peccatum in Christianis, sed in effectu quem producit nisi diligenter cohibeatur, quod est paucis in usu. Cum verò multi prauis sint & damnosi effectus quos producit, tum hîc eum maxime intelligimus, qui est proximus perditioni & damnationi sempiternâ, nempe Impœnitentia seu mors in peccato. Sicut enim certum est quod si quem vere pœniteret suorum criminum, quantumcumque reus esset, salutem consequeretur: ita nisi pœniteat, licet vel vnius peccati noxam contraxerit, de illius salute actum est. Vix autem eum pœnitet quem humanis rebus affixum tenet Concupiscentia, cum pœnitere nihil aliud sit quàm hunc affectum reuocare, & tam difficile sit hunc reuocare affectum quem semel rebus humanis inordinate affixeris, vt propterea dicatur: *Nul-
lus est qui agat pœnitentiam super peccato suo, quia omnes conuersi* 1er. 8:
sunt ad cursum suum. Et hî sunt vniuersim quibus à Domino dicitur: *In peccato vestro moriemini.* Nempe inquit, *Vos de mundo* Ioan. 8.
hoc estis, ego non sum de hoc mundo. Dixi ergo vobis quia morie-
mini in peccatis vestris. O verba, verba ponderanda! nam esse de mundo nihil aliud est quam affici rebus mundi ex inordinata concupiscentia: sicut alibi frequenter & fusiùs est demonstratum.

Vide in 1. parte, Dominicam 1. & 3. Aduentus. Totam hebdomadam infra Dominicam tertiam post Epiphaniam, & in Indice Verbo *Pœnitentia*, *Concupiscentia*, *Mors &c.* Abunde vero hæc declarantur in opusculo, *Via lata qua ducit ad perditionem*, In 1. parte.

II. PUNCTVM.

SED in te qui Concupiscentiam non satis forte reprimis, hac causa repperitur.

Tibi quidem relinquitur dijudicandum, an quantum satis est, Concupiscentiam reprimas, sed ne tibi palpes in re tam seria, tres regulæ seu notæ offeruntur, quibus agnoscas te minus forte quàm par esset, huic vacare studio.

Prima est, quod volenti euitare grauiores & mortales lapsus necessarium est cauere leuiiores quos vocant veniales, Nam, vt ait sanctus Augustinus, *peccata minima si negligentur, occidunt*, id est, mortalia fiunt, id est, à veniali procliuior est lapsus in mortale, *Voluntas humana facillime disponitur ab vno in aliud*, ait sanctus Thomas: vnde tu qui non satis aduigilas præcauendis illis leuicularibus culpis, quæ circa res amatas vel concupitas frequentius contrahuntur, non potes dici satis vacare huic studio, quod est ponendum in Concupiscentia reprimenda: & potest de te dici quod est apud Iobum: *Appropinquauit corruptioni anima eius: & vita illius, mortiferis.*

Secunda regula est, vt quia opus est maxima gratia quam multi sæpe causantur sibi deesse, in quibusdam difficilioribus: tunc se fidelem quisque præbeat in faciliioribus quæ agenda occurrunt; sic enim fiet vt primis gratiis mereatur secundas & sequentes necessarias. Aut certe qui hanc fidelitatem non seruat in minimis & faciliioribus, ne miretur se laborare in difficillimis, nec tam defectum accuset gratiæ, quàm fidelitatis suæ. Nam qui *fidelis est in minimo, & in minori fidelis est: Et qui in modico iniquus est, & in maiori iniquus est.* Si cogitationes impuras non ita potes, vt velles, reprimere, non aliunde est quam quia non vis oculos continere sicut posses. *Pangendum fœdus cum oculis vt non de virgine cogites.* An illud fœdus pepigisti? An pactum fideliter seruas?

Tertia denique regula est, vt quæ sunt præcepti melius fiant, fiant ea quæ sunt Consilij. Hoc est enim quod multos decipit dum se dicunt non adstrictos ad ea quæ sunt perfectionis & consilij: satisque sibi esse si quod præcipitur aut vetatur, efficiant. Omnino sane sit ita: sed non efficient nisi plerumque consiliis

adhæreant. Non desinent peierare, nisi iurare desinant, neque iurare desinent, nisi præcaueant iram, nisi primos naturæ motus repriment, nisi linguam moderentur, nisi affectus regant. Sic *Marth. 5.* eruendus est oculus si præbet scandalum: alioquin qui parcis oculo, non parcis animæ: qui consilium de continendo non seruas oculo, nec seruabis præceptum de continendo corde. *Non Apoc. 3.* sunt opera tua plena coram Deo.

Vide in 3. parte, Feria 2. infra hebdomadam quintam, vbi hæc expressa declaratur Veritas: *Qui non seruat Consilia, quia non sunt præcepta: nec ipsa etiam præcepta seruabit.*

I I I. P V N C T V M.

QUAE est ergo causa cur pauci salui sint, hæc in te forte est, cur ex illis non sis. Quia causa illa proxima est, Concupiscentiæ motus inordinatus, quem qui non satis repriment, ita peccatis assuescunt, vt in his viuant atque in his moriantur.

T V vero si te probe nosti, non satis tuos illos naturalis concupiscentiæ motus soles reprimere: Ac proinde quid sequitur nisi vt eiusdem causæ sit idem prorsus effectus? Numquid colligunt de spinis uuas, aut de tribulis ficus? *NVM QUID potest ficus uuas facere, aut vitis ficus? sic neque salsa dulcem potest facere aquam. Luc. 3.* Quasi diceret, sicut fructus pender ab arbore, & arbor à radice: ita mors à vita, & vita ex affectibus. Non possunt deprauati affectus vitam probatam producere, neque vita corrupta, mortem aduehit incorruptam. Ratum fixumque est, *Caro & Sanguis regnum Dei possidere non possunt, neque corruptio incorruptelam possidebit. NO LITE errare, Deus non irridetur. Qua enim seminauerit homo, hæc & metet: Quoniam qui seminat in carne sua: de carne & metet corruptionem. Gal. 6.*

Nempe illi valde errant, qui cum ex parte tantum & non omnino concupiscentiæ reprimendæ vacent, sibi tamen non timent nec præcauent; Et quidem in tribus errant. Primo quod alios videant nequiores, tum se satis bonos putant si non sint pessimi: contra quos expresse Christus Dominus, postquam retulit infœlicem quorundam exitum: *Putatis, inquit, quia hi præ omnibus peccatores fuerint, quia talia passi sunt? Non, dico vobis, sed nisi penitentiam habueritis, omnes similiter peribitis. Secundum in quo*

osee 13.

errant est, quod habendæ poenitentia sibi esse putant, si confessi faciant aut dicant quod sibi iussu fuerit, nec de extirpandis prauis affectibus, aut auertendo corde à peccati objectis serio cogitant, unde semper manent prauæ affecti, & numquam illos vere poenitet, vt supra est demonstratum. *Colligata est iniquitas Ephraim : absconditum peccatum eius. Dolores parturientis venient ei. Ipse filius non sapiens : nunc enim non stabit in contritione filiorum.* Notanda valde Prophetæ Verba.

Is. 58.

24. Mor.
18.

Tertium denique, quod si forte nullum in se apertum agnoscant peccatum, se propterea quasi tutos & securos habeant, nec satis humiles & pauidi ad perfectiora se extendant : *Quasi gens quæ iustitiam fecerit, & iudicium Dei sui non dereliquerit.* Quibus apte sanctus Gregorius; *Consideremus, inquit, quia nec hoc quidem sine aliquo reatu nostro est, quod laudabiliter gesimus, si remota pietate iudicemur. Quis enim nostrum vitam præcedentium Patrum valeat vel superare vel assequi? Et tamen David dicit, ne intres in iudicium cum seruo tuo, quia non iustificabitur in conspectu tuo omnis viuens. Paulus cum diceret, nihil mihi conscius sum, cautè subiunxit, sed non in hoc iustificatus sum. Iacobus dicit, in multis enim offendimus omnes. Ioannes dicit: si dixerimus quia peccatum non habemus, ipsi nos seducimus, & veritas in nobis non est. Quid ergo facient tabula, si tremunt columna? aut quomodo virgulta immobilia stabunt, si huius pauoris turbine etiam cedri quatuntur?* Responde: Et illud sancti Anselmi sæpe reuolue, si vis esse de numero saluatorum, esto de numero paucorum; Et sicut quanto de paucorum numero fueris, tanto securior de numero saluatorum eris; ita quanto magis ab eorum discedes numero qui pauci sunt, tanto à salutis securitate discedes longius. O quanta vtrunque distantia! O quantus inde metus & tremor!

Videri possunt hæc affines Veritates, ex aliis locis.

Sicut non est habenda sollicitudo anxia & scrupulosa de peccatis remissis : ita rationabilis non est depouenda.

In 1. parte, Feria 3. infra hebdomadam 4. post Epiphaniam.

Quanto te ipsum negligis, quasi non esses cum cæteris periturus,

Causa cur pauci salui sint, hæc in te forte est, &c. 17

periturus, tantò te Christus doluit præ cæteris perituris.

In hac 2. parte, Feria 5. infra hebdomadam primam Quadragesime.

Præcipitatio animi in statu vitæ deligendo, præcipitium est animæ.

Non cuitat præcipitium, sed mutat, qui ne nimis sit præceps, nimis est lentus.

In hac 2. parte, in fine ubi de statibus, prima & secunda Consideratione.

Qui sibi palpat, quod non longe erret, periculosius sæpe errat, quàm qui aberrat longius.

In 3. parte, Dominica 3. post Pentecosten.

Qua ratione fit vt plures dici possint malæ, quam bonæ arbores: eadem prorsus fiet, ni caueas, vt mala potius quam bona sis arbor.

In eadem parte, Dominica 7.

Sicut prima & puerilis ætas index est secuturæ vitæ præsentis: ita hæc vita præsens indicium est futuræ post æternitatis.

In eadem parte. In Natiuitate S. Ioannis Baptiste.

Verendum ne quod tibi deest ad perfectionem, desit etiam ad salutem.

In 4. parte, Feria 2. infra hebdomadam 17.

2. Pars.

C



CVM hinc ad vsque Pascha, Veritates desumantur ex Consideratione Passionis Domini nostri : HAC HEBDOMADE initium ducitur à Consilio Iudæorum contra Iesum , vbi Iudas proditionem suam aperuit. Tùm in his pergitur , quæ Euangelica refert historia, vsque ad sermonem Domini, peractâ cœnâ cum discipulis habitum ; & eò præcipuè referuntur Considerationes , vt agnoscas Bonitatem Domini Iesu oppositam malitiæ Iudæorum , sicque eius exemplo discas malum in bono vincere.

FERIA SECVNDA.
DE CONSILIO IVDÆORVM
CONTRA DOMINVM IESVM:
ET DE CONSILIO DOMINI IESV,
PRO SALVTE IVDÆORVM,
ET NOSTRA.

Dixit IESVS discipulis suis : scitis quia post biduum Pascha fiet ; & filius hominis tradetur vt crucifigatur. Tunc congregati sunt Principes Sacerdotum , & seniores Populi in atrium Principis Sacerdotum , qui dicebatur Caïphas : & consilium fecerunt , vt IESVM dolo tenerent , & occiderent.
Matth. 26.

Quid nequius quam quod excogitauit caro & sanguis. 19

VERITAS PRACTICA.

Quid nequius, quàm quod excogitauit caro & sanguis?

Eccles. 17.

VERBA sunt Ecclesiastici, quæ non modo aptè quadrant in Iudam & Iudeos, qui de perdendo Iesu consilium inierunt: quæ quidem impietate nihil nequius: sed in ipsas vniuersim cogitationes humanas, quæ sunt cogitationes Carnis & Sanguinis, & quæ nisi coerceantur, in eandem cum Iuda & Iudæis conspirant nequitiam, ut Dominum Iesum perdant. Ac proinde sic absolute Veritas enuntiari potest:

Nihil nequius, quàm quod excogitat caro & sanguis.

RATIO EST, Quia nihil nequius, quàm de perdendo nobis Iesu cogitare.

Sed quod excogitat Caro & Sanguis, eò tendit, ut perdat in nobis Iesum.

*Ergo nihil nequius, quàm quod excogitat Caro & Sanguis. Quod non tantum de impuris aut aperte prauis cogitationibus intelligas, sed de aliis inordinatis, quæ à quouis procedunt homine, qui Caro & Sanguis dicitur à Christo Domino: Caro & Sanguis non reuelauit tibi, id *Math. 16.* est, ullus homo: & ab Apostolo: Non acquieui Carni & *Galat. 1.* Sanguini, id est, nulli homini.*

II. PUNCTVM.

S*UPRADICTIS verbis de facto à Iudæis consilio contra Dominum, addenda sunt quæ Idem sanctus Euangelista scribit de Proditore Iuda. Tunc abiit vnus de duodecim, qui dicebatur Iudas Iscariotes, ad Principes Sacerdotum, & ait illis; Quid vultis mihi dare, & ego vobis eum tradam? At illi constituerunt ei triginta argenteos, & exinde quarebat opportunita-*

tem, ut eum traderet. O quale consilium! quales nundinae! qualis mercatura! ubi agitur de prodendo & vendendo Iesu! quale probrum sic vendi ab vno e suis! sic vendi aduersariis! sic vendi tam vili pretio!

Quam longè aliud eodem tempore cum suis Dominus inibat consilium, quo imminens suæ passionis tempus illis indicabat! quid nequius consilio Iudæorum, qui de prodendo Iesu deliberant? quid sanctius consilio Domini Iesu, qui de redimendis hominibus sermonem habet, & diem statuit? Nonne hoc est bonitate cum malitia decertare? O quoties idem nobiscum agitur! ô quoties caro, quoties ista pars animalis sua inuit consilia cum vitiis & concupiscentiis, quibus profecto in nobis periret Iesus, nisi bonus Iesus consilia illa destrueret, & meliora ipse statueret de salute nostra! O quam verè Sapiens, *Quid nequius, quàm quod excogitauit Caro & Sanguis*; cum eò tendant ex cogitationes ut Iesum perdant.

Hoc modò est expendendum; ac primò illud quàm sit nequam & impium supra omnem nequitiam & impietatem, de prodendo nobis Iesu cogitare! Nam præterquam quod tantæ est dignitatis, ut sit *Rex Regum, & Dominus dominantium*: Tantæ est insuper Bonitatis, ut ipsa sit Bonitas, nec alia in nobis vera possit esse bonitas, nisi per ipsum, *Qui*, ut ait Apostolus, *factus est nobis sapientia à Deo, & iustitia & sanctificatio & redemptio. DE cuius plenitudine nos omnes accepimus: quia lex per Moysen data est, gratia & veritas per Iesum Christum facta est. QUI propter nos egenus factus est cum esset diues, ut illius inopiâ diuites essemus. QUI dedit semetipsum pro peccatis nostris, ut eriperet nos de presenti saeculo nequam, secundum voluntatem Dei, & Patris nostri. PER quem & habemus accessum per fidem in gratiam istam, in qua stamus & gloriamur in spe gloriæ filiorum Dei. IN quo ipse Deus benedixit nos in omni benedictione spiritali in cælestibus. QUI est imago Dei inuisibilis, primogenitus omnis creatura: quoniâ in ipso condita sunt vniuersa in cælis & in terra, visibilia & inuisibilia, siue Throni, siue Dominationes, siue Principatus, siue Potestates; omnia per ipsum & in ipso creata sunt: & ipse est ante omnes, & omnia in ipso constant. Et ipse est Caput corporis Ecclesia, qui est Principium, primogenitus ex mortuis, ut sit in omnibus ipse primatum tenens, quia in ipso complacuit omnem plenitudinem inhabitare, & per eum reconciliare omnia in*

Apoç. 19.
1. Cor. 1.
Ioan. 3.
2. Cor. 8.
Gal. 1.
Rom. 5.
Eph. 1.
Coloss. 1.

ipsum, pacificans per sanguinem crucis eius, siue qua in terris, siue qua in cælis sunt.

Satisne hinc agnoscis qualis quantusque sit Iesus? Satisne hinc intelligis qualis sit ea cogitatio, quæ de illo perdendo formabitur, & quam verè nihil illâ iniquius & nihil nequius?

II. PUNCTVM.

SED quod excogitat caro; eò tendit vt perdat in nobis Iesum.

Quidquid enim excogitat caro, nisi ratione temperetur & gratiâ, totum carnale est, penè totum vitiosum & inordinatum. *Cuncta*, inquit Scriptura, *cogitatio cordis intenta est ad malum, omni tempore.* Quod & ipse Apostolus in se sentiens; *Ego*, inquit, *car-* Rom. 7.
*nalis sum, venundatus sub peccato. Non enim quod volo bonum, hoc ago; sed quod odium malum, illud facio. Scio enim quia non habitat in me, hoc est in carne mea, bonum. Inuenio legem volenti mihi facere bonum, quoniam mihi malum adiacet: Condelector enim legi Dei secundum inter-
Gal. 5.
riorem hominem; video autem aliam legem in membris meis, repugnantem legi mentis meæ, & captiuantem me in lege peccati, qua est in membris meis. Et alibi vniuersim de nobis omnibus; *Caro*, inquit, *concupiscit aduersus spiritum, spiritus autem aduersus carnem: hæc enim sibi inuicem aduersantur; Vnde euidenter patet, quòd quidquid sola caro excogitat, tam verè malum est, quàm verè repugnat bono.**

Quò verò tēdat illud malum, vbinam terminentur illæ carnis cogitationes, audi ex eodem Apostolo: *Prudentia carnis mors est,* Rom. 8.
Sapientia carnis inimica est Deo: legi enim Dei non est subiecta. Quænam est enim illa prudentia aut Sapientia carnis, nisi eiusdem cogitatio, & illa præcipue de qua loquimur quæ excogitat commoda, lucra, & emolumenta sua? Quomodo autem mors est, nisi quia perdit Iesum, qui est vita nostra, & qui quamdiu viuit in corde, mors absit necesse est; aut si mors adsit, tam verè is pereat, quàm certum est vitam simul & mortem non posse consistere? licet enim non omnis cogitatio carnis lethalis sit, ac proinde non ita Iesum ab anima fuget, quin per gratiam sanctificantem ibi remaneat: tamen de cogitatione carnis sicut de concupiscentia, & de concupiscentia sicut de igne sentiendum est, *qui numquam dicit, sufficit, vt est in Prouerbiis. Sic concupis-* Prov. 30.

22 FERIA 2. infra Hebd. Septuag. De Consilio Iudeorum; &c.

centia quasi ignis exardescit, inquit Ecclesiasticus. Et rursum, *A*
Eccles. 9. scintilla vna, augetur ignis; id est, ab vna leui & veniali cogita-
Ibid. II. cione facilis est progressus ad lethalem, qui sic à sancto Ia-
Iac. I. cobo describitur: *Vnusquisque tentatur à concupiscentia sua*,
 leui scilicet carnis cogitatione, *abstractus & illectus: deinde con-*
cupiscentia cum conceperit, parit peccatum, primò quidem ve-
 niale, tum quando consummatum fuerit, facillimè transit in
 mortale, & generat mortem. Sic ordinaria dispositio à veniali
I. 2. q. 88. ad mortale peragitur, vt expresse docet sanctus Thomas, sa-
*4. 3. tis*que esset ad nostræ propositionis euidenciam, vt sicut pri-
 mæ carnis cogitationes tendunt in mortiferas, ita eo tendunt
 vt perdant in nobis IESVM.

Addo illud verò, quòd cùm permittitur carni vt excogitet
 quæ sibi sunt cōmoda & opportuna, totus in his cogitationibus
 sic homo viuit, & occupatur, vt vetus ille homo viuat & regnet
 cum suis actibus, qui Nouo repugnat & contradicit. Quid au-
 tem nouo est repugnare homini, nisi tor eius impedire vitales
 actus, quot Dominus Iesus in nobis exercuisset, nisi vetus ho-
 mo Illi repugnasset? O quæ perditio! quæ iactura! Vide infra
 FERIA sexta & Sabbato Hebdomadæ Passionis; tum vero maxi-
 me in die Parasceues, Vbi quomodo per peccatum venunde-
 tur Christus, aperte declaratur. Interim vero hoc mirare, sic
 Iudam sibi paulatim Dominū perdidisse. Neque enim cùm pri-
 mò Eum prodidit, & Iudæis vendidit, sic arbitrabatur condem-
 nandum & crucifigendum, sicut post accidit. Cogitabat miser
 de vna pecunia sibi comparanda, putabat se ludificaturum Iu-
 dæos, tradendo illis Dominum, quem nouerat satis potentem,
 vt se, cùm vellet, ab eorum manibus eriperet, sicut iam ante
 pluries, se ab eis eduxerat. Vnde cùm postea vidit rem aliter
Math. 27. agi, ac reuera Christo parari Crucem & necem, tunc pœnitentia
ductus, retulit triginta argenteos, vt dicitur suo loco, quasi dole-
 ret factum quod futurum non putabat, quo dolore ita exarsit,
Serm. 11. vt, quod ait sanctus Leo, insurrexerit in semetipsum non iudicio
de P. 1. pœnitentis, sed furore pereuntis, vt qui vita Authorem Intersectori-
bus vendidisset, in augmentum damnationis suæ, etiam moriendo
peccaret.

Sic porro IESVS sensim perditur, cùm quasi joco, aut non
 quasi maleuolo animo, nonnihil indulgentius sibi quis primo

permittit, vnde eò tandem abripitur quò se lapsurum numquam putasset. Sic cum Isaaco fratre ludebat Ismael: sed ludus iste vocatur persecutio: jubeturque Ancilla & filius ejici, ne forte Mater & hæres Filius ab eis extrudantur, vt præclare Apostolus, ad rem nostram.

III. PUNCTVM.


QUID nequius igitur, quàm quod excogitauit Caro & Sanguis; Cum totum illud eò tendat, vt perdat in nobis Iesum, peruendo Gratias, seu quas vocant habituales, seu actuales, quibus in nobis habitat, & nobiscum viuit. Quà prodicione & perditione quid damnosius? quid nequius? *Nonne hoc est maius damnum, quàm sitotum perderes mundum*, inquit pius ille author qui de Imitatione Christi est, qui & pergens in tam suaui materia: *Quid potest*, inquit, *mundus conferre sine IESV? Esse sine IESV, grauis est infernus, & esse cum IESV, dulcis est paradysus. Si fuerit tecum IESVS, nullus poterit nocere inimicus. Qui inuenit IESVM, inuenit thesaurum bonum, imo bonum super omne bonum, & qui perdit IESVM, perdit nimis multum, & plusquam totum mundum.* Lib. 2. c. 8.

Desse hanc jacturam quam toties incurriti. Vide quibus lachrymis absentiam Filij Tobia, Mater deplorabat: *Heu Heu me, fili mi, vt quid te misimus peregrinari, Lumen oculorum nostrorum, baculum senectutis nostra, solatium vita nostra, spem posteritatis nostra: omnia simul in te vno habentes, te non debuimus dimittere à nobis.* Tob. 10. Numquid maior est IESVS Tobia? Quia vero propter debitam aliquam pecuniam recuperandam, missus erat domo à patre filius, audi iterum matrem, vt in illam pecuniam inuehatur: *Numquam fuisset ipsa pecunia, pro qua misisti eum: sufficiebat enim paupertas nostra, vt diuitias computaremus hoc quod videbamus filium nostrum.* Ibid. 5. Sic planè tibi in rem quæ causa peccati est, & per peccatum exclusi Iesu, sic tibi exardescendum & dicendum: Nunquam fuisset ista superbia, numquam iracundia, pro qua Iesus à nobis dimissus est! ò insensate à quo Iesus est ita proscripius! Gal. 3.

Caue deinceps diligentius quidquid à carne est, etiamsi leue appareat. Perpende quòd in nobis, velut in templo Christus inhabitet; & sicut in templo immundum nihil tolerati debet, ita

24 FERIA 3. infra Hebd. Septuag. De coena Paschalis agni.

nec in corde tuo, quod tanti hospitis offendat oculos. Hinc
2. Cor. 6. enim non leue censendum est; vnde Apostolus, *Quis consensus
templo Dei cum idolis? vos enim estis templum Dei viui, sicut dicit
Deus: quoniam inhabitabo in illis, & inambulabo inter eos, & ero il-
lorum Deus, & erunt mihi populus. Propter quod exite de medio eo-
rum, & separamini, dicit Dominus, & immundum ne tetigeretis, &
ego recipiam vos. O qualis illa benignitas, vt quī toties à no-
bis eiectus est, sic nos velit recipere! Tenui eum nec dimittam.*
can. 3.



FERIA TERTIA.

DE COENA PASCHALIS AGNI,

SECUNDVM LEGEM MOREMQVE IVDÆORVM,

A CHRISTO DOMINŌ, CVM

DISCIPVLIS FACTA.

Euntes parate nobis Pascha, vt manducemus.

Luc. 22.

VERITAS PRACTICA.

Voluntatis eiusdem est, nolle afferre scandalum: & suf-
ferre velle, si quando prauè accipitur.

IDEST,

1 *QVA ex causa & ratione non est afferendum aliis scandalum,
eadem prorsus est sufferendum, si forte alij prauè & iniquè ac-
cipiant. Nullos oportet offendere & scandalizare, quantum in
nobis est: At si sua sponte se ipsi scandalizent, non oportet pro-
pterea nos offendi.*

*RATIO est, quia vera causa, cur non est afferendum scandalum,
est Charitas.*

Sed

Sed illa ipsa Charitas exigit ut sufferatur si prauè & iniquè accipitur.

Ergo quâ ex causâ & ratione non est afferendum aliis scandalum, eadem prorsus est sufferendum si forte alij prauè & iniquè accipiunt. Ac voluntatis eiusdem est illud nolle, & hoc velle. Quæ tamen voluntas paucorum est.

I. PUNCTVM.

VT Bonitatem Domini Iesu oppositam malitiæ Iudæorum clariùs hîc videas & constantiùs imiteris, qui est præcipuus huius hebdomadæ finis : obserua Iudæos id imprimis obieciſſe Christo, quòd non obseruaret legem ; Propterea perſequébantur Iudæi Iesum, ait sanctus Ioannes, quia hæc faciebat in Sabbato. Malitia planè exerranda, cùm nullus inter eos vmquam extiterit tam religiosus obseruator vniuersæ legis. Huic verò malitiæ opposita Bonitas & Sapientia Domini Iesu hîc elucent, quòd discessurus ex hoc mundo ad Patrem, quidquid præscriptum erat de Agno Paschali comedendo, periectiſſimè voluerit à se suisque obseruari : idque apud nobilem Ierosolymitanum Ciuem, qui spectator & probatus esset testis huius legalis obseruantia. Euntes, inquit Perro & Ioanni, parate nobis Pascha Luc. 22. ut manducemus. At illi dixerunt, ubi vis paremus? Et dixit ad eos; ecce introeuntibus vobis ciuitatem, occurret vobis homo quidam amphoram aqua portans; sequimini eum in domum, in quam intrat, & dicetis Patri-familias domus: Dicit tibi magister, ubi est diuersorum, ubi Pascha cum discipulis meis manducem? Et ipse ostendet vobis canaculum magnum stratum, & ibi parate. Euntes autem inuenerunt sicut dixit illis, & parauerunt Pascha. Et cum facta esset hora, distribuuit, & duodecim Apostoli cum eo, & ait illis: desiderio desideravi hoc Pascha manducare vobiscum, antequam patiar. O delideria Domini Iesu quàm sunt ardentia! quàm vera! quàm efficacia!

Et tamen non destiterunt Iudæi eum semper accusare legis infractæ, & violatæ religionis: nec aliud grauius contra eum obiecerunt Pilato, quàm quòd legem haberent, & secundum legem Ioan. 8.9. deberet mori. Quod certè scandalosum, infame, & durissimum

Christo fuit. Sed qui omni modo praecauerat ne scandalum & offensiones daret, voluit hoc scandalum sibi impactum & hanc offensionem suo iniustam nomini sustinere, ut nos plenius edoceret eiusdem esse voluntatis, nolle afferre scandalum, & sufferre velle, si quando prauè & iniquè accipitur: atque ut omnes intelligant qua ex causa non est aliis inferenda offensio, ex illa ipsa esse ferendam si nobis inferatur.

Ratio est proruse eadem, nam quænam est causa cur non sit
Rom. 12. afferendum scandalum, nisi Charitas, cuius est *providere bona non*
Ibid. 14. tantum coram Deo, sed etiam coram omnibus hominibus: Illudque maximè cauet, ne ponatur offendiculum fratri vel scandalum? si enim propter cibum frater tuus contristatur seu offenditur, iam non secundum charitatem ambulas. Noli cibo tuo illum perdere, pro quo Christus mortuus est. Non ergo blasphemetur bonum nostrum: ITA-
Ibid. 15. QUE quæ pacis sunt sectemur, & quæ edificationis sunt, inuicem custodiamus. Itémque paulò post: Vnusquisque vestrum proximo suo
1. Cor. 8. placeat in bonum ad edificationem. Rursúmque alibi grauitè; Vide- te ne fortè hac licentia vestra offendiculum fiat infirmis; & peribit infirmus in tua conscientia frater, propter quem Christus mortuus est? sic autem peccantes in fratres, & percutientes conscientiam eorum infirmam, in Christum peccatis. Quapropter si esca scandalisat fratrem meum, non manducabo carnem in aeternum, ne fratrem meum scandalisem. Quæ quo sensu sint intelligenda, & quomodo Charitati repugnent, fusè Diuus Thomas, & alij: Tu vide quid hic pecces: & an illud Apostoli religiosè colas, Nemini dantes ullam offensionem, ut non vituperetur ministerium nostrum, sed in
2. 2. 9. 43 omnibus exhibeamus nosmetipsos sicut Dei ministros in multa patientia, in Charitate non ficta.
2. Cor. 6.

II. PUNCTVM.

SED illa ipsa Charitas exigit ut sufferatur scandalum si prauè & iniquè accipitur.

Tunc dicitur iniquè accipi, quando non ex infirmitate vel ignorantia, sed ex certa malitia seu inuidia bonum opus prauè detorquetur, aut quæ sapienter dicta sunt, in prauum sensum accipiuntur. Sic Pharisei sapientius scandalisabantur de Christo Domino, cui inuidebant, & quem dolebant suis diuinis operibus

agnosci, & coli à populo: quod quidem scandalum non erat datum sed acceptum, & iniquè acceptum contra æquitatem & veritatem. Atque hinc fit vt quoties sic iniqui de bonis detrahunt, & quæ hi probè dicunt aut faciunt in tam peruersum illi adducunt sensum, vt se etiam scandalisari & offendi affirmant; hoc eorum scandalum dicatur Pharisaicum & iniquum, quod tamen est ex illa charitate sufferendum, *qua est patiens & benigna, qua non inflatur, non est ambitiosa, non quarit qua sua sunt, & non irritatur, sed omnia suffert, omnia sustinet.* 1. Cor. 13.

Sic supra iam visum est, vt qua lege non essent inferendæ iniuriæ, eadè prorsus si inferrentur, essent ferendæ. Sic Christus Dominus & verbo & exemplo; vnde Apostoli tam sæpe & grauiter illud inculcant: *Hac est enim gratia si propter Dei conscientiam sustinet quis tristitias patiens iniuste: Quæ est enim gratia si peccantes & colaphisati suffertis? sed si benefacientes patienter sustinetis, hac est gratia apud Deum: in hoc enim vocati estis, quia & Christus passus est pro nobis, vobis relinquens exemplum vt sequamini vestigia eius, qui cum malediceretur non maledicebat, cum pateretur non comminabatur. Et paulò post, Non reddentes malum pro malo, nec maledictum pro maledicto, sed è contrario benedicentes, quia in hoc vocati estis, vt benedictionem hereditate possideatis.* In 1. p. die 16. Ianuar. 1. Pet. 2. ibid. 3.

Quæ dum sincerè præstantur, sicut certum est esse Charitatis affectus; sic nisi sincerè præstantur, manifesti sunt Charitatis defectus. Ac proinde pater ex hac Charitate ferendum esse illud scandalum, quod iniquè accipitur. Durum est quidem, sed durius, non exercere Charitatem: Aut certè quæ suavis & blanda est Charitas, hoc quodcumque est durum emollit & complanat.

III. P V N C T V M.

QUA ergo ex causa & voluntate non est afferendum scandalum, eadè est ferendum si iniquè accipitur. Nempe ex Charitate quæ perinde violatur, si afferas, aut si non feras tale scandalum, quod nullâ tuâ culpâ sibi alij accipiunt, & de te innocentium murmurant. Quod quia difficilius est in praxi & rarius quàm aliud de non afferendo scandalo quod nolles, ne Charitatem læderes; Idcirco hîc te ipsum ex teipso vrge & argue, si non æquo feras animo illa iniqua scandala & murmura. Cur enim non

Ecclef. 9.

aque times violare Charitatem, si non feras accepta scandala; sicut timeres eam violare si afferres, aut illam dares offensionem, cum non minus ex vno Charitas violari possit, quam ex alio? Hinc fortè dictum à Sapiente, *Qui peccauerit in vno, multa bona perdet*: Seu, vt alij vertunt, *bonitatem perdet*, quæ est ipsa Charitas. Adde, quod est valde notandum ad clariorem propositæ Veritatis intelligentiam & firmiorem praxim, si fortè tu qui pietati vacas & perfectioni acquirendæ non feras patienter quod ex Charitate ferendum est, sed contra excandescas & trendeas nonne Pusilli & in virtute infirmi poterunt inde scandalisari? At verò iam non erit acceptum inique scandalum, sed erit à te imprudenti & peccanti datum, quod ex prima propositione certissimum est pugnare contra Charitatem: iamque ille eris cui obiebat Apostolus, *Et peribit infirmus in tua conscientia frater, propter quem Christus mortuus est*; nempe offenderetur, quod tu sacerdos, tu religiosus, tu pietatis studiosus sic commouearis contra pietatem & perfectionis studium quod profiteris! Aut fortè inde etiam tuo exemplo erit liberior ad similes impatientis animi motus; quod certe est offendiculum & scandalum infirmis ponere, quod quidem nolles; sed neque aliud etiam velis, vnde illud facillimè sequitur. Esto, illi iniquè tecum agant teque innocentem diuexent: at illi iniqui sunt; Tu vero æquitatis & virtutis professor, non modo nihil iniquè debes reddere, sed ipsam iniquitatem tam placidè ferre, quam verè profiteris virtutem; aut certè professioni tuæ maculam & scandalum iners.

1. Pet. 3.

Quidquid porro vltra deprauatus appetitus possit suggere, aut fortè etiam ratio proponere ad conseruationem tui iuris & nominis, planè dilutum & solutum habes in his sancti Petri Verbis. *Et quis est qui vobis noceat, si boni amulatores fueritis? timorem autem eorum ne timueritis, & non conturbemini. Dominum autem Christum sanctificate in cordibus vestris, parati semper ad satisfactionem omni poscenti vos rationem de ea, quæ in vobis est, spe; sed cum modestia & timore, conscientiam habentes bonam, vt in eo quod detrahunt vobis, confundantur qui calumniantur vestram bonam in Christo conuersationem. Melius est enim benefacientes, si voluntas Dei velit, pati; quam maleficientes. Quod & antè iam dixerat pene iisdem verbis: Conuersationem vestram inter gentes habentes bonam, vt in eo quod detractant de vobis tamquam de malefacto-*

Ibid. 2.

Eiusdem voluntatis est nolle inferre scandalum, &c. 29.
ribus, ex bonis operibus vos considerantes glorificent Deum. Vide
quæ hîc plura prosequitur sanctus Petrus; Et quæ Thomas à
Kempis libro tertio capite tricesimo sexto, quod totum est de
hoc argumento. Quis tu, ut timeas à mortali homine? Deum time
& hominum terrores non expauesces. Quod si ad præsens vidèris suc-
cumbere, & confusionem pati quam non meruisti: ne indigneris ex
hoc, neque per impatientiam minuas coronam tuam.

Charitas non quærendo sua, melius inuenit quam si
quæreret.

Esto, appareant aliquæ irascendi causæ: multò tamen
plures sunt, & validiores, ne irascaris.

Aut amandus tui Contemptus, & te contemnenti con-
gaudendum: aut non amanda Charitas quæ con-
gaudet Veritati.

Hæ tres Veritates habentur infra in hac parte, Feria 2. 3. &
sexta eiusdem hebdomada qua est tertia post Pascha.



FERIA QVARTA.

DE LOTIONE PEDVM.

Et cœpit lauare pedes discipulorum, & extergere
linteo quo erat præcinctus. Ioan. 13.

VERITAS PRACTICA.


Qui se Christi exemplo non humiliat, exemplo Dæ-
monis humiliabitur.

RATIO EST, Quia qui se Christi exemplo non humiliat, se
contra Christum exaltat.

Sed qui se contra Christum exaltat: exemplo Daemonis humiliabitur.

Ergo & qui se Christi exemplo non humiliat. Quod certe est expauescendum & ad praxim efficax.

I. PUNCTVM.

 V A M longè errarent Iudæi, qui de Regni ambitione Christum Dominum accusabant, timebant ne se supra omnes efferret, satis patet ex hac eius humilitate, quâ se ad pedes discipulorum, atque ipsius etiam Iudæ, abiecit: O quàm diuersæ Iesu & Iudæorum cogitationes! nihil illi de Iesu nisi superbiam; Et Iesus præter humilitatem nihil cogitat!

Legendus Euangelii textus, expendenda sunt singula Christi Domini verba & facta: tam stupendum humilitatis exemplum singulari consideratione colendum, atque alte animo imprimendum. Quantum nobis hanc virtutem commendet Dominus, obseruandum accurate ex his eius verbis: *Scitis quid fecerim vobis: vos me vocatis Magister, & Domine, & bene dicitis, sum etenim: si ergo laui pedes vestros Dominus & Magister, & vos debetis alter alterius lauare pedes. Exemplum enim dedi vobis, ut quemadmodum ego feci vobis, ita & vos faciatis.* Quod de quibuslibet humilitatis actibus æquè est intelligendum, & iis præcipuè qui sunt magis necessarij, & in quibus magis laboramus. Idcirco enim suum præsertim proponit exemplum circa hanc Virtutem, quia difficilior videtur, & rariùs exercetur. Vt verò etiam magis hoc exemplum ad praxim valeat, additur in proposita Veritate, quod iam attente consideretur: *Qui se exemplo Christi non humiliat, exemplo Daemonis humiliabitur.* Quod licet exemplum vulgare sit: ex certis tamen circumstantiis singulare est, ut videbitur.

Res porrò plana est & facilis ad intellectum. Nam qui se non humiliat, cum id præcipuè quadam necessitate exigitur, sese contra Christum exaltat; cur enim tum ille non se humiliat, nisi quia vel negat id sibi esse necessarium: vel quantumvis necesse sit ad salutem & perfectionem, id negligit & fastidit; quæ quidem fieri nequaquam possunt nisi superbiat, & exaltetur.

animus, quasi se satis tutum & saluum putet sine his humilitatis actibus. Tales sunt porro actus, qui exiguntur ad obediendum Deo, Ecclesiae, & superioribus; quando videlicet confitenda sunt rite peccata, quando paupertas, defectus ingenij, & alia quae nos coram hominibus humiliant, nobis contigerint; quando arguemur de culpis; quando de nobis detrahetur; quando erit aliis cedendum; quando inuidia comprimenda; quoties denique peccaretur, nili te humiliares: tum humilitas tam necessaria est, quam est omnino necessarium non peccare. Iam verò qui se in his necessariis non humiliet, nonne se contra Christum exaltet, qui hæc ita ordinauit vt essent necessaria, & vt nobis euenirent ad praxim & exercitium humilitatis? *Quis* *Exod. 5.*
est Dominus, vt audiam vocem eius. Numquid tibi Rex Pharaon ita loquens, se contra Dominum exaltare videtur? At putasne solius huius Iactabundi voces sic se efferre? Audi quid ipse Deus de quouis superbo corde dicat: *Anima, inquit, quæ per superbiam aliquid commiserit, siue ciuis sit ille, siue peregrinus, quoniam aduersus Dominum rebellis fuit, peribit de populo suo: Verbum enim Domini contempsit, & præceptum illius fecit irritum.* Vide ne superbiam esse rebellionem aduersus Dominum? Et quod peccatur humilitatis defectu, non minus graue censeris quam ipsum Dei contemptum?

II. PUNCTVM.

SED qui se contra Christum exaltat, exemplo Daemonis humiliabitur. Est enim lata pridem sententia, quòd qui se exaltauerit, humiliabitur. Atque huius humiliationis exemplum in primo illo rebeli Angelo statutum est, qui se humiliare noluit, *Isa. 14.*
cùm illi humilitatis præceptum est datum. *Quomodo cecidisti de cælo Lucifer, qui mane oriebaris, qui dicebas in corde tuo: in cælum conscendam, similis ero altissimo? veruntamen ad infernum detraheris, in profundum laci.* Tum verò paulò post in eodem capite, quod *Ibid.*
est valde obseruandum, sic idem Propheta: *Hoc Consilium quod cogitavi super omnem terram, & hæc est manus extensa super vniuersas gentes. Dominus enim exercitum decreuit, & quis poterit infirmare? & manus eius extenta, & quis auertet eam? Quali diceret, perinde omnes qui se exaltauerint humiliabuntur, sicut ille superbus*

Job. 41. qui propterea dicitur, *Rex esse super uniuersos filios superbia*, quod
 Ps. 88. eos scilicet precedat culpa & poena. Quod & confirmat S. Augu-
 stinus, ad hunc psalmi verticulum, *Tu humiliasti sicut vulneratum
 superbum*. Vulneratum, inquit intellige diabolum, non penetrata
 carne quam non habet, sed percusso corde ubi superbus est.

Quasi diceret, primò quidem Dæmon superbus, humiliatus
 est tamquam vulneratus, tamquam debilitatus, tamquam acce-
 pto vulnere victus & exarmatus: tum deinde superbi omnes, eius
 exemplo.

Atque hinc Christus Dominus arguendum mundum dicebat,
 id est, mundanos & superbos, quod princeps huius mundi iam indi-
 catus esset. Denique nimis exultantes discipulorum animos, &
 Ioan. 16. in quandam elationem se se efferentes sic repressit: *Videbam Sata-
 Luc. 10. nam sicut fulgur de cælo cadentem. ELATIONEM eorum com-
 primens*, inquit sanctus Gregorius, *exemplo magistri elationis*. O
 qualem magitrum! qualis humiliatio! & quale exemplum!

III. PUNCTVM.

QUI se igitur exemplo Christi non humiliat, exemplo Dæmonis
 humiliabitur; quia ille videlicet sicut dæmon se exaltat
 contra Dominum, & in omnes qui se vniuersim ita exaltant, ex-
 dem humiliationis poena est denuntiata. Nam, sicut ait Sapien-
 tia, quod imitantur Diabolum qui sunt ex parte illius: sic verè dici-
 potest, quod qui imitantur illum in culpa, sunt ex parte illius in
 poena. Sic aptè sanctus Petrus; *Quibus iudicium iam olim non ces-
 sap, & perditio eorum non dormitat*. Si enim Deus Angelis peccanti-
 bus non pepercit, sed rudentibus inferni detractos in tartarum tradi-
 dit cruciandos, in iudicium reservari: Et paulò post: *Vbi Angeli
 Sap. 1. fortitudine & virtute cum sint maiores, non portant aduersum se
 2. Pet. 2. execrabile iudicium*: Quasi diceret; licet Angeli multo plura ha-
 berent quàm homines, unde gloriari & se exaltare posse videren-
 tur, punita tamen eorum est exaltatio; quanto magis homo pu-
 niatur, qui cum sit pulvis & cinis longè inferior Angelo, se se
 Ecclesi. 18. exaltare voluerit. *Quid superbit terra & cinis*? Vt vero, quantum
 sibi humiliationis, cinis superbus timere debeat, sic idem fuisse Sa-
 piens, eodem capite, pergit disserere: *Initium superbia hominis
 apostatare à Deo: quoniam ab eo qui fecit illum recessit cor eius; qua-
 niam*

niam initium omnis peccati est superbia : qui tenuerit illam adimplebitur maledictis, & subuertet eum in finem. Propterea exhonora-uit Dominus conuentus malorum, & destruxit eos vsque in finem. Sedes ducum superborum detruxit Deus, & sedere fecit mites pro eis. Radices gentium superbarum arefecit Deus, & plantauit humiles ex ipsis gentibus.

Neque hæc putes tantum in insigniores dici superbos, aut te ex illis vnum non esse : Quis enim te discernit ? an id certò affirmare ausis quod de te sentis ? Nonne sunt alia Dei de nobis & nostra iudicia ? *Qui iudicat me Dominus est*, inquit Apostolus : 1. Cor. 4 ; vnde ipsius iudicio itare debemus non nostro. At certè si Domini spectes Iudiciũ, multi actus superbiæ non modò in Phariseis, sed in Apostolis, velut graues condemnantur, qui leues alioquin viderentur.

Adeòne graue erat, quòd inter se disputassent Apostoli, *quis eorum videretur esse maior*, vt propterea audiuerint à Christo Domino, *Nisi conuersi fueritis*, ab hac scilicet ambitione, & *efficiamini sicut paruuli, non intrabitis in regnum calorum* ? Itane regnum calorum nunquam essent ingressi propter illud peccatum ? Ita quia sic Christus dixit ; quòd tamen non est ita intelligendum, quasi peccatum illud esset lethale, vel quasi quis arceatur in regno propter peccatum non lethale : sed quod nisi conuersi fuissent ab illo ambitionis affectu, grauius inde peccassent in aliis occasionibus, sicque tandem interiissent velut Iudas, qui primò quidem leuiter affectu auaritiæ peccare potuit, tum vero grauius, iuxta illud sapientis, *qui spernit modica, paulatim decidet*.

Certè qui gemunt in inferno, *Quid nobis profuit superbia*, non semper hoc lethali peccarunt peccato, sed vnum extitisse inter multa venialia mortale sufficit : Atque illi, qui spernit tamquam modica, quæ quotidie peccat venialia, facillimum est incidere in aliquod graue & mortale, quod confessione non expiabitur ; imò quod in ipsa confessione perpetrabit. *Sicut enim est confusio adducens peccatum* : ita & illius est propria hæc confusio, qui non omnem exuit superbiam, nec se libenter humiliat ; & inde peccatum manifestum adducitur, cum inde reticetur aliquid in confessione, vel aliter declaratur, quàm reuera est coram Deo. At quale putas illud peccatum ? qualis huius peccati poena ? qualis humiliatio ! quale futurum iudicium ?

Sic sancti quique à leuibus quibuscumque in hac materia sibi cauebant, vtque etiam sibi cauerent attentius, extrema quæque inde futura damna & supplicia sibi proponebant. Non deerant illis alia humilitatis motiua, neque ignorabant alias, quàm æternas esse humiliaiones, quas pro suis culpis in hac vita metuebant, quales in Dauide & Ezechia commemorantur; sed hæc præterea se cogitatione armabant, qualem ipse Apostolus de se refert; *Ne forte cum aliis predicauerim, ipse reprobus efficiar.* Auderesne tu præfidere, vbi timet Apostolus? Auderesne respuere quasi minus à te remotum quod Vir tantus non à se ducit alienum. *Itaque quod, ait Sapiens, memento ira, quoniam non tardabit. Humilia valde spiritum tuum, quoniam vindicta carnis impij, ignis & vermis.*

3. Reg. 24.
4. Reg. 10.
2. Par. 32.
1. Cor. 9.

Eccles. 7.

Vide in 3. parte, Dominica 10. & FERIA 5. hebdomadæ duodecimæ, vbi hæc duæ satis affines habentur Veritates.

Omnes insipientes & infœlices supra modum animæ superbi. *Sapient. 15.*

Superbo maxime formidandum diuini tribunal Iudicij.



FERIA QVINTA.

DE INSTITVTIONE SANCTISSIMI SACRAMENTI.

Accipite & manducate: Hoc est corpus meum.
Matth. 26.

VERITAS PRACTICA.

Ingratus est tanti beneficij, qui se tantum ex parte immolat, se totum immolante Christo.

RATIO EST, Quia ille Ingratus est, qui gratitudinem non

Ingratus est Beneficij qui se tantum ex parte, &c. 35
*reddit Benefactori, quam debet, quam potest, & quam scit
esse reddendam.*

Atqui Ille talis est, qui se tantum ex parte immolat.

*Ergo est ingratus; aut ne tale incurras probrum, omnino te to-
tum debes immolare cum Christo.*

I. P R V N C T V M.

IN qua nocte tradebatur, accepit panem & gratias agens fre. i. Cor. 10
git, & dixit, accipite & manducate; hoc est corpus meum,
quod pro vobis tradetur, hoc facite in meam commemoratio-
nem. Nihil hic non stupendendum supra omnem admirationem,
sed illud imprimis cum Apostolo pondera, quod *quâ nocte tra-*
debatur, id est, quo tempore cogitabant homines de eo perden-
do & à vita tollendo, Ipse cogitabat de admirabili illo modo
sui relinquendi, & se totum donandi omnibus & singulis ho-
minibus. Nonne est Bonitas opposita malitiæ & impietati Iu-
dæorum? Perge porro de hac bonitate cæterisque admirandis
huius Sanctissimi Sacramenti, quantum feret affectus, meditari;
Tum ad gratitudinem tanto reddendam Beneficio deuenies;
cûmque aliud quod aptius reddas inueniri non possit, quàm vt
te totum immoles cum Christo se totum immolante, sic te gra-
tum hoc modo exhibebis, vt nisi hanc reddas gratitudinem, in-
gratum te prorsus & indigum tanto beneficio sentias, quidquid
aliud præstes.

Ratio quæ hic multum expendi debet, hæc est, quod ille
ingratus sit omnium iudiciò, qui quam debet, quam potest,
& quam probè scit esse reddendam Benefactori gratitudinem
& animi testificationem, non tamen reddit. Nonne illum con-
demnabis? quid enim illum impedit à reddenda gratitudine,
quàm peruersa voluntas? Talis autem voluntas nonne mera
est ingratitudo? nam si non deberet talem gratitudinem, si ne-
sciret se debere, aut si non posset, certè esset excusandus. Sed
cûm hæc tria simul concurrant, quæ ad effectiõnem cuiuslibet
operis plurimùm valent, vt debeat, vt sciat, & possit reddere quod
peritur, nec tamen vsquam reddit; planè ingratus est & maxi-
me vitiosa eius ingratitudo, cûm sola illi desit voluntas, in qua

vna posita est gratitudo vel ingratitudo. Vellēsne tibi aliquem aut te alicui sic esse ingratum? Nonne vel hoc nomen ingratitudinis execratur animus? Possēsne huius vitij sustinere probrum à Patre factum, vel ab aliquo insigni Benefactore? An te his velles comprehensum verbis, quibus de ingratis sic queritur
 17. 1. Deus: *Filios enutriui & exaltaui, ipsi autem spreuerunt me!*

II. PUNCTVM.

ATQVI ille qui cum Christo seipsum immolante, se tantum ex parte immolat, non reddit illam gratitudinem quam debet, quam potest, & quam probè scit esse reddendam.

Quatuor hic sigillatim sunt expendenda; Primum est, quòd se Christus Dominus totum immolet in hoc Sacramento & Sacrificio; quod quidem non fit semel sicut in cruce pro omnibus hominibus, sed quotidie pro te vno. *O verbum omni gladio anticipi penetrabilius*, Pro te vno quotidie se immolat in altari, sicut semel pro omnibus! Audi Authorem libri de Imitatione
 Hebr. 4. Christi: *Latere azima mea, & gratias age Deo pro tam nobili munere & solatio singulari. Nam quoties hoc mysterium recolis, & Christi Corpus accipis, toties tua redemptionis opus peragis, & particeps omnium meritorum Christi efficeris. Ita magnum, nouum, & incundum tibi videre debet, cum celebras aut missam audis, ac si eodem die Christus primum in vterum Virginis descendens homo factus esset: aut in cruce pendens pro salute hominum pateretur, & moreretur.*

Secundū quod perpendas est, tantam huic beneficio deberi gratitudinem, quantam alteri cuicumque; vt autem debita gratitudo reddatur, ipsa debet dari vita, non ex parte sed tota. Nam si paritas aliqua quaerenda est inter beneficiū & gratitudinem, non potest hic alia reperiri, quàm vt des ei saltem semel vitam tuam, qui suam toties pro te dat, dicat, & consecrat. Erit quidem adhuc longè magna disparitas, cum vita tua longissimè sit inferior vitā Christi; quia tamen nihil supra vitam dare potes, tuā illā qualiscumque sit, contentus est: sed nisi eam integrè dones & immoles, non putes ei satisfactum, quidquid aliud agas & offeras. *Quidquid prater teipsum das*, ait ipse Dominus, vbi
 4. de Imit. Ch 8 & 9. post Euangelium apertius loquitur, *nihil curo, quia non quero datum tuum sed te. Sicut non sufficeret tibi omnibus habitis prater*

me, ita nec mihi placere poterit, quidquid dederis te non oblato. Vide ibi plura.


Tertium, Nihil à te petit quod non possis dare, cum eius gratia quâ ex eo ipso potes intelligere tibi offerri, quando petit à te quod non potes dare nisi te adiuuet. Neque verò aliud à te exigit, quàm ne quidquam ex sensuali motu liberè agas, aut loquaris; sed omnia in spiritu & veritate; seu ex ratione & gratia. Quid facilius homini rationali adiuto gratiâ, quàm ex ratione & gratia viuere? quid tibi liberius, quàm tua libertas? quid tam tuum, quàm tua voluntas quæ non vult aliquid nisi quia vult illud? *Non est hîc impendium, non est hîc labor, non est hîc temporis exercitatio: sufficit velle & totum factum est*, ait sanctus Ioannes Chrysostomus. Idémque alibi; *Magna vis est voluntatis, quâ efficitur nos posse quod volumus, & non posse illa qua nolumus.* *Hom. 16. ad Popul. de Zacch.*

Quartum denique, nonne id probe scis te debere & posse quod quaritur, aut certè ignorare non debes, cum tot nominibus ei vitam debeas, à quo eam accepisti? Nonne ipse est Creator tuus, Conseruator tuus, Redemptor, Iustificator, & Glorificator tuus? At nonne propterea te totum illi debes? Nouissimè autem cum te nouo obtrahit beneficio, quo se totum tibi quotidie immolat, & quo à te reperit quod iampridem illi debes, an ignorabis te debere? An ignoras quod ait Apostolus, *ut qui viuunt iam non sibi uiuant, sed ei qui pro ipsis mortuus est?* *2. Cor. 5.* An quod ipse Christus tam apertè, *sicut misit me viuens pater,* *Ioan. 1.* *& ego uiuo propter patrem, & qui manducat me, & ipse uiuet propter me?*

III. PUNCTVM.

INGRATVS es igitur tanti beneficij si te non immoles, vel si non nisi ex parte te immoles, dum se totum Christus immolat; quia non reddis quod debes, quod potes, & quod scis esse reddendum: vnde illud Sapientis tibi non immerito possit obijci: *Bona Repromissoris sibi ascribit peccator, & Ingratus sensu derelinquit liberantem se*, vel quod est apud Iobum: *Quasi nihil posset facere omnipotens astimabant eum; cum ille impleisset domos eorum, bonis.* Adde quod sic Ille in Sacramento & Sacrificio se immolat, vt te modum tui simul cum ipso immolandi per-

fectè doceat. Vide quomodo illic viuit & mortuus est simul. Re-
uera viuit eodem in corpore quo dum ageret inter homines vi-
xit, iidem sunt oculi, eadem aures, idem os & lingua; manus &
pedes ceteraque corporis membra : sed quomodo iis vtitur?
perinde ac si mortuus esset; non enim iis vtitur corporali modo
sed spiritali. Sic tu planè viuens morieris, & mortuus viues,
si non aliter oculis cernas, auribus audias, ore loquaris, & toto
te moueas corpore atque animo, quàm pure ex motu gratiæ &
rationis, non ex appetitu vel concupiscentia. *Rom. 8.* *Ibid. 6.* *Si spiritu facta car-*
nis mortificaueritis, viuetis, ait Apostolus; quod & antè dixerat:
si mortui sumus cum Christo, credimus quod simul etiam viuemus cum
Christo. Existimate vos mortuos quidem esse peccato, viuentes autem
Deo in Christo Iesu. Non ergo regnet peccatum in vestro mortali
corpore, vt obediatis concupiscentiis eius; sed neque exhibeatis mem-
bra vestra, arma iniquitatis peccato, sed exhibete vos Deo tamquam
ex mortuis viuentes, & membra vestra arma iustitiæ Deo. Quem
in sensum & vsum plurimæ subministrantur in 3. parte Verita-
tes, primis quidem duabus integris hebdomadis; Tùm FERIA 5.
6. & Sabbato decimæ tertiæ hebdomadæ. Atque hæc imprimis
quæ infrà declaratur FERIA 6. quartæ post Pascha hebdomadæ:
Quam gloriosum est Sacramento multa in nos posse si
velimus, tam ignominiosum est pauca posse quòd
nolimus.



FERIA SEXTA.

DE PRODITIONE IVDÆ MANIFESTATA A CHRISTO DOMINO.

Amen dico vobis quia unus vestrū me traditurus est.
Respondens autem Iudas qui tradidit eum, dixit:
numquid ego sum, Rabbi? Ait illi, tu dixisti.
Matth. 26.

VERITAS PRACTICA.

Qui se existimat stare, videat ne cadat. 1. Cor. 10.

RATIO EST, Quia stanti in lubrico & undique ab aduersariis concusso, videndum diligenter ne cadat.

Sed quicumque se existimat stare, non aliter stat, quàm in lubrico & inter aduersarios.

Ergo illi semper videndum ne cadat.

I. P V N C T V M.

IERINE potuit quod factum est? Potuitne Iudas cogitare quod exequutus est? Quis credidisset Apostolum eorumquam perfidiæ deuenturum? O Iudicia Dei! ô infirmitatem hominis! Malitia quidem Dæmonis est, qui sic hominem tentauit, vt proderet Dominum suum, sed hominis culpa & crimen est, quod se ita tentari passus sit. Et quod magis mirere, putabat Proditor ita dolose & clandestine se posse tegere facinus suum, vt omnes lateret; Ipsi etiam Iudæi consilium cum eo fecerant vt Iesum dolo tenerent. At non ita bonus Iesus, non ita dissimulanter & fictè cum suis agit; aperit latentes dolos, denudat crimen, proditorem innuit vt se agnoscat & resipiscat. Vide quid non fecerit miserator & misericors Dominus, vt perditum hominem reuocaret.

Primò quidem denuntiat omnibus Apostolis, vnum ex ipsis esse à quo sit prodendus; Deinde Apostoli multum solliciti & territi quærunt inter sese de homine, qui hoc facinus audere posset; Tum quærenti ipsi de se ipso Iudæa respondet Dominus, *Tu dixisti*. Nonne hæc ad emolliendum ferreum quodcumque peccatus sufficebant? At verò cum nihil ille propterea moueretur, tum Christus ipse Dominus horrore sceleris semetipsum turbat, vultum mutat, oculos in altum tollit, suspirat, & alia commoti animi signa dat, & protestatur; *Va homini illi per quem Filius ho-* Ioan. 15.
minis tradetur, bonum erat ei si natus non fuisset homo ille. Quid vl- Matth. 26.
tra! Benignitatem etiam & quasdam veluti blanditias minis ad-

iungit, intinctum panem porrigit proditori; quod facit, ut faciat citius, monet; ac denique permittit Satanæ, ut cum buccella introeat in eum, & ita concutiat hominem, ut sui pudeat & tædeat. O iterum pauenda Dei iudicia! ô rursus, incredibilem hominum infirmitatem!

Quam verè & sapienter pronuntiatur ab Apostolo Paulo; *Itaque qui se existimat stare, videat ne cadat.* Quis enim non sibi caueret, qui in lubrico sua ipse infirmitate vacillans & nutans staret, ac præterea multis vndique & validis concuteretur aduersariis, ad certum casum & ad ruinam proximam? Subiice tibi rem oculis, expende omnia & explora animum miserandi illius hominis, qui sic staret; inquire quid de se sentiat, quid de suo statu, de sua securitate vel periculo; an sibi vigilet, sibi attendat, sibi à se ipso caueat, à loco, ab hostibus, & aliis periculosis circumstantiis quibus cingitur? *Horrenda via,* inquit sanctus Augustinus ad illum Psalmi versum, *fiat via illorum, tenebra & lubricum, & Angelus Domini persequens eos.* HORRENDA via! Tenebras solum quis non horreat? Lubricum solum quis non caueat? In tenebris & lubrico quâ is? Vbi pedem figis?

II. PUNCTVM.

SED quicumque se existimat stare, non aliter stat, quam in tali lubrico, & medios inter aduersarios qui eum ad ruinam impellant.

Nihil notius & nihil frequentius in Scripturis & Patribus quàm descriptiones talis status. Iam audiuiti Prophetam regium non tam optantem quàm prædicentem ita fore. Licet enim dicat *fiat via illorum,* & quæ pergit: *Hæc eis futura prædixit,* inquit ibi sanctus Augustinus, *non quasi ut euenirent optauit. Quamquam, & Propheta in spiritu Dei sic ea dicat, quomodo illa Deus facit, certo iudicio, bono, iusto, sancto, tranquillo, non perturbatus ira, non amaro zelo, non animo inimicitiarum exercendarum, sed iustitia vitiorum puniendorum: verumtamen Prophetia est.* Id est, prædicat & describit quid nouissimis illis temporibus futurum sit de quibus Apostolus, *discedent quidam à fide, attendentes spiritibus erroris, & doctrinis Damoniorum.* Et rursus: *Erunt homines se ipsos amantes, cupidi, elati, superbi, proditores, proterui, tumidi, & voluptatum amatores magis quam Dei.* Tunc nihil nisi tenebræ

1. Tim. 4.

2. Tim. 3.

tenebræ & lubricum. Quod totidem pene verbis Ieremias, aut ipse per Prophetam Dominus: *In domo mea inueni malum eorum,* ait Dominus: *Idcirco via eorum erit quasi lubricum in tenebris, impellentur enim & corruent in ea.* 1er. 23.

Neque vero longa est interpretatione opus, ad declarandum quid sit illud lubricum in tenebris, & quinam illi aduersarij ac impulsores. Quis enim nescit quod aiunt tam frequentes Scripturæ, & quod nostro damno nimis experimur, *mundum totum in maligno positum esse. CREATVR A* Dei, *in odium factas, & in tentationem animabus hominum, & in mscipulam pedibus insipientium. SENSVM* ipsum & cogitationem humani cordis in malum I. Ioan. 5. Sap. 14. Gen. 8; *prona esse ab adolescentia sua?*

Quis nescit non esse nobis tantum, *colluctationem aduersus carnem & sanguinem, sed aduersus principes & potestates, aduersus mundi rectores tenebrarum harum.* Id est, qui regnant & qui plurima valent arte ac potestate in illo lubrico, dentisque tenebris ubi versamur, & rotamur quodammodo ad eorum nutum & imperium, vt de peccato in peccatum præcipites circumuoluamur; nisi nobis cum Deo diligenter inuigilemus & timeamus. Ephes. 6.

Etenim multa nobis munitione opus est, inquit diserte sanctus Ioannes Chrysostomus, quia multa sunt undique insidia, sicut Salomon admonens dicebat: *Agnosce quod in medio laqueorum transis, & super propugnaculis vrbiū ambulas.* Non dixit, aspice, sed agnosce. Obumbratus est, inquit, laqueus, neque manifesta clades, sed undique obiecta adiacet: propterea dixit agnosce; sicut enim pueri terra laqueos, sic Diabolus vita voluptatibus peccata contextit. Sed agnosce perscrutans diligenter: Et nonnullis interiectis quæ tertio post commodius puncto referuantur, sic pergit aptissime: *Si enim vnus tantum & duo laquei forent, facilis esset custodia, nunc autem ipsorum multitudinem ostendere volens Salomon, quomodo dicit, audias: Agnosce quod in medio laqueorum pertransis.* Non dixit, iuxta laqueos pertransis, sed in medio laqueorum. Vtrimque nobis voragine, utrimque doli. Proceßit quispiam in forum, vidit inimicum, exarsit ex aspectu solo: vidit amicum laudem consequentem, inuidit: vidit pauperem, contempsit & despexit: Diuitem, & inuidit. Vidit speciosam mulierem, captus est. Vidisti quot laquei? Ideo dicit, agnosce quod in medio laqueorum transis. Et in domo laquei, & in mensa laquei, & in concionibus laquei.

42 Feria 6. infra Hebd. Septuag. Unus vestrum me traditurus est.

L. de fuga
seculi c. I.

Quod & sanctus Ambrosius sic paulò strictius exprimebat: *Quis inter tot passionēs corporis, inter tantas illecebras huius sæculi tutum atque intemeratum seruare potest vestigium? Respexit oculus, & sensum mentis euerit. Audiuīt auris & intentionem inflexit. Inhalauit odor & cogitationem impediuit. Os libauit & crimen reddidit. Tactus contigit & ignem adoleuit.* Nonne hoc est stare in lubrico, nonne hoc est in medijs versari periculis? Nonne hoc est cadenti propius, quam stanti similem esse?

III. PUNCTVM.

QVI se ergo existimat stare, videat ne cadat; & eò magis videat & vigilet, quo se magis existimat stare: ne forte præsumat, & præsumptionis suæ pœnas miserando casu luat. Hinc *Prou. 28. apte Sapiens, Beatus homo qui semper est pauidus: qui verò mentis Ecclesi. 27. est dura, corrueit in malum.* Itemque alibi: *Sinon in timore Domini tenueris te instanter, citò subuertetur domus tua.* Quod & fusè Apostolus; *Tu fide stas, noli altum sapere, sed time; si enim Deus naturalibus ramis non pepercit, ne fortè nec tibi parcat. Vide ergo bonitatem & seueritatem Dei; in eos quidem qui ceciderunt, seueritatem; in te autem, bonitatem Dei, si permanseris in bonitate: alioquin & tu excideris.* Vnde & Idem de se ipso, iam compluries audiuiſti quàm serio fateretur se timere, se pugnare, se corpus suum castigare, & constringere, ne cùm saluaret alios ipse periret. Quod & sanctus Petrus suos omnes quantumcumque prouectos & sanctos *2. Pet. 3. admonēbat: Vos igitur, fratres, præscentes custodite, ne insipientium errore traducti excidatis à propria firmitate.*

Sancti quoque Patres in idipsum omnes consentiunt. *Hac sanctis causa tremendi ac metuendi, inquit sanctus Leo, ne ipsis operibus pietatis elati, deserantur ope gratiæ, & remaneant in infirmitate naturæ.* Rursùmque; *Nemo est, ait, tanta firmitate suffultus, ut de sua stabilitate debeat esse securus.* Sanctus Gregorius pene totus est in hoc argumento, nec ita pridem auditus est ubi columnas tremere, & Cedros monstrat pauore concuti. Vide Dominicam proxime præcedentem.

In medit.

De his porro Cedris copiosè sanctus Augustinus; *Vidimus multos Domine ex patribus nostris, quod utique sine magno tremore non recolo, sine multo timore non confiteor, ascendisse primitus quo-*

dammodo vsque ad cælos, & inter sydera nidum suum collocasse, postmodum autem cecidisse vsque ad abyssos: Vidimus stellas de cælo cecidisse ab impetu ferientis cauda draconis; Et quæ plura prosequitur, quæ contracta reperies capite decimo quarto libri tertij de Imitatione Christi; Ceciderunt stella de cælo, & ego pulvis quid presumo? Idem vero S. Augustinus in psalmum, *super flumina Babylonis*, Ps. 136. timori cautelam sic adiungendam docet: *Flumina Babylonis*, inquit, *sunt omnia quæ hîc amantur & transcunt. Attende quâ fluit, attende quâ labitur: & si attendas quâ fluit & labitur, caue quia trahit, vno naufragio nudus exibis, & recte te planges in flumine Babylonis quia noluisti sedere & flere super flumina Babylonis. O Sancta Sion, ubi totum stat, & nihil fluit, quis nos in ista præcipitavit? Ecce inter fluentia & labentia constituti, vix quisquam raptus à flumine, si tenere lignum potuerit, euadet.*

Sanctus autem Chrysostomus quibus & quomodo distincte ac particulatim cauendis vnusquisque inuigilet, atque ad praxim qui se stare existimat, vt videat ne forte cadat: *Si lucrum*, inquit, *Hom. 19. occurrit, ne lucrum aspicias solum, sed scrutare diligenter ne forte mors & peccatum intra lucrum sit absconditum; & si videris, refuge. Rursus cum delectatio & voluptas occurrit, ne voluptatem solum respicias, sed ne fortè iniquitas aliqua in voluptatis profundo obumbrata sit, diligenter considera, & si inueneris, reslito. Siue consulas quispiam, siue aduletur, siue obsequatur, siue honores polliceatur, siue quodcumque aliud, omnia cum diligentia examinemus & undique consideremus ne forte damnum aliquod, ne fortè periculum aliquod ex consilio, vel honore, vel obsequio, nobis eueniat; & ne celeriter & inconsideratè accurramus.*

Denique, quanta hæc fide ac cura sint in praxim quotidianam aduocanda recte his adiungetur Tridentinum, vbi agit de perseverantiæ munere. *Quod quidem aliunde, inquit, haberi non potest, nisi ab eo qui potens est cum qui stat statuere vt perseveranter stet, & cum qui cadit restituere: Nemo sibi certi aliquid absoluta certitudine polliceatur: Tametsi in Dei auxilio firmissimam spem collocare & reponere omnes debent. Deus enim, nisi ipsi illius gratia defuerint, sicut capit opus bonum, ita perficiet, operans velle & perficere: Veruntamen*
QUI SE EXISTIMANT STARE, VIDEANT NE CADANT,
& cum timore ac tremore salutem suam operentur in laboribus, in vigiliis, in eleemosynis, in orationibus & oblationibus, in ieiuniis &

44 Sabbato infra Hebd. Septuag. Facta est contentio inter, &c.

castitate. FORMIDARE enim debent scientes quod in spem gloria, & nondum in gloriam renati sunt de pugna qua superest cum carne, cum mundo, cum Diabolo, in qua victores esse non possunt nisi cum gratia, Apostolo obtemperent dicenti: Debitores sumus non carui, ut secundum carnem vivamus: si enim secundum carnem vixeritis, moriemini: si autem spiritu facta carnis mortificaveritis, vivetis.



S A B B A T O.

DE CONTENTIONE HONORIS INTER APOSTOLOS ORTA.

Facta est autem & contentio inter eos, quis eorum videretur esse maior. Luc. 22.

Nihil per contentionem, neque per inanem gloriam. Phil. 2.

VERITAS PRACTICA.

Licet obtineres quod ambis, non esset contendendum: At vero licet contendas, non obtinebis.


RATIO postrema partis quæ hic magis probanda videtur, hæc est, quia quod maximè queritur & ambitur per contentionem simul ac inanem gloriam, est humana opinio quæ benè de nobis alij sentiant & loquantur.

Sed illa humana opinio seu existimatio non obtinetur per contentionem, neque per inanem gloriam.

Ergo licet contendas, non obtinebis quod ambis: Ac proinde non omnino contendendum: cum vel licet obtineres, non esset ta-

Licet obtineres quod ambis non esset contendendum, &c. 45
men contendendum; quantò minus contendas oportet, cum ni-
hil tua contentione proficias.

I. P V N C T V M.

 V A M verè sanctus Bernardus; *Ambitio subtile malum, in Ps. 90: secretum virus, pestis occulta!* En Apostolos derepente inuadit, & eo tempore quo minimè vnquam hoc inordinato motu moueri debuissent. Quid enim magis alienum ab illo exemplo humilitatis quod eorum Magister & Dominus iam iam ediderat in lauandis eorum pedibus? quid magis aduersum præcepto, quod addiderat de se imitando? quid denique magis intempestiuum, quam dum eorum vnus auaritiâ trahitur ad Iesum perdendum, ipsi superbiâ moueantur ad augendam eius offensionem & mœstitiam. O iterum ambitio subtile malum! quis sibi ab eo non caueat vbique, & semper, cum ita penetraret Apostolica pectora recenti etiam corporis Christi communionem roborata!

Verùm ne vltra progredieretur malum, occurrit bonus IESVS, *Math. 20* & quod iam pridem illis commendarat, iterum repetit & inculcat; longè aliam sibi esse mentem, longe aliam inter eos contentionem velle se instituire, quâ scilicet de minori potiùs gradu contendant, quàm de maiori. *Reges gentium, inquit, dominantur eorum, & qui potestatem habent super eos benefici vocantur: vos autem non sic, sed qui maior est in vobis, fiat sicut minor; & qui præcessor est, sicut ministrator. Nam quis maior est qui recumbit, an qui ministrat? nonne qui recumbit? Ego autem in medio vestrum sum, sicut qui ministrat. Luc. 22.*

Quæ dum attentè reuolueris, vide quàm aptè Apostolus dicitur, *Phil. 2,* *Nihil per contentionem neque per inanem gloriam; sed in humilitate superiores sibi inuicem arbitantes.* Quæ quidem Apostoli verba non modo significant nihil esse agendum per contentionem, neque per inanem gloriam: sed licet sic ageres, licet contenderes & inaniter te efferres, nihil tamen obtineres: quo in sensu potissimum considerata sunt vt inde Veritas efficacior formaretur. Quid enim aptius ad contentionem & inanem gloriam reprimendam, quàm si probè intelligatur, nihil eorum quæ ambias sic obtineri?

46 Sabbato infra Hebd. Septuag. Facta est contentio inter, &c.

L. 10. Con-
fess. c. 36.

Sic autem demonstratur; Nam quid queritur ista honorum contentione, quid ambitur, quid prætenditur? hoc vnum est scilicet, coli ab aliis, æstimari, prædicari, esse in opinione, in sermone, monstrari digito, & dici *hic est*. Nonne illud est præcipue quod contenditur & ambitur? Sanctus Augustinus hunc ambitionis affectum, hoc esse interpretatur quod timeri & amari velle ab hominibus, quo maxime impelluntur à Dæmone qui sibi satis non cauent. *Nobis*, inquit, *quoniam propter quadam humane Societatis officia necessarium est amari & timeri ab hominibus, instat Aduersarius vera Beatitudinis nostra, ubique spargens in laqueis, EVGE EVGE, ut dum auide colligimus, incaute capiamur, & à veritate tua, Deum alloquitur, gaudium nostrum deponamus, atque in hominum fallacia ponamus, libeatque nos amari & timeri, non propter te, sed pro te, id est loco tui, atque isto modo sui similes factos secum habeat non ad concordiam Charitatis sed ad consortium supplicij, qui statuit sedem suam ponere in aquilonem: Quis crederet se his humanis affectibus & contentionibus sic immiscere Dæmonem, sic nos inescare, sic nos decipere?*

II. PUNCTVM.

SED neque obtinetur illa opinio qua queritur per contentionem aut inanem gloriam.

Prov. 16.

Ibid. 20.

Hoc enim ipso quo quis noscitur ambitiosus & superbus, de-jicitur humanâ opinione & æstimatione, adeò etiam apud, ho-mines odibilis est superbia, ut ait Sapiens, ut longè magis videas honorari humiles & alienos ab istis contentionibus, quàm ipsos contentiosos: Vnde idem Sapiens, *Honor est homini, qui separat se à contentionibus: omnes autem stulti miscentur contumeliis*. Sicut ergo diuino & humano testimonio constat, nullam viam esse certiore ad opinionem sibi etiam nolenti conciliandam, quàm si humilitatem profitearis aut præ te feras: ita planè certum est nihil esse proclivius ad humiliationem & infamiam, quàm si quis aliùs se efferat, & si propterea contendat & dimicet. Tunc Deus & homines veluti conspiratione factâ conveniunt ad illum deprimendum & abiiciendum. Sic enim passim scriptura, *Radices gentium superbarum arefecit Deus, & plantavit humiles ex ipsis gentibus*. CONTRITIONEM præcedit superbia, & ante

Ecclesi. 10.

uinam exaltatur spiritus. *QUI altam facit domum suam, quærit ruinam. SICUT eructant præcordia fœtentium, & sicut perdix inducitur in caueam, & ut capra in laqueum, sic & cor superbiorum.* Prou. 16.
Ibid. 17.
Ecclesi. 11.

Denique, ut ait sanctus Augustinus, *Nulla fere pagina est sanctorum librorum, in qua non sonet: Deus superbis resistit, humilibus autem dat gratiam.* Vbi & sanctus Ambrosius; *Tamquam sua, inquit, contumelia propulsator veluti quoddam suscepit aduersus superbiam, speciale certamen, tamquam dicat, meus iste aduersarius est qui me lacescit, mihi debetur ista congregatio.* Dicitur autem præcipuè lacescit Deus per contentionem & honorem seu ambitionem, quod Dei sit ordinare, disponere, & unicuique dare prout voluerit, non prout appetitus inordinatus ambierit. *Per me, inquit, Reges regnant, per me principes imperant, & potentes decerunt iustitiam.* Vnde ipse se opponit ambienti, vel impediendo ne obtineat gradum quem pretendit, vel in eo gradu honorem quem maxime quærit. *O Ambitio, Ambientium crux,* ait apte sanctus Bernardus, quâ videlicet maxime cruciantur, dum se minus honorari vident, quàm vellent. 3. de Doct.
Chr. c. 13.
In Ps. 118.
Prou. 8.
L. 3. de Con-
sid.

III. PUNCTVM.

LICET ergo contendas, non obtinebis quod contendis. Nihil gloriæ, nihil gloriosæ opinionis obtinebis apud homines; ac proinde nihil contentiosè & superbè agas, cum ob id vnum contendatur, ut humana gloria comparetur. Certè sunt alia motiua præstantiora quæ expendi possunt, & illud præcipuè, quod hic à Christo Domino proponitur; Sed homini contentioso & inani hoc repræsentatum est, ut si dignitate & utilitate virtutis oppositæ non mouetur; vilitate & inutilitate sui vitij deterreatur. Sic porrò vtrumque breuiter est complexus S. Cyprianus: *Ille qui præsumit & contumax est, vir sui iactans, nihil omnino proficiet, qui dilatauit tamquam infernus animam suam: Exaltatio & inflatio non de Christi magisterio, qui humilitatem docet, sed de Antichristi spiritu nascitur cui exprobrat per Prophetam Dominus: Tu autem dixisti in animo tuo, in cælum ascendam, super stellas cæli ponam sedem meam, &c. VERE inanis gloria, mala pestis, vanitas maxima, non modo quia, à vera trahit gloriâ, & cælesti spoliât gratiâ, ut ait Gerson, sed quia promissam tibi hominum opinio-* Ep. 3. lib. 1.
Is. 14.
Lib. 3. c. 40

48 Sabbato infra Hebdomada Septuagesime. Facta est contentio inter, &c.

nem non possidet, aut etiam si possideat, rem valde inanem & vacuam possidet, qualis est hominum opinio.

Psal. 4.

Filij hominum, usquequo graui corde? ut quid diligitis vanitatem, & quaritis mendacium? Quasi diceret, ut interpretatur S. Augustinus: Saltem usque in aduentum filij Dei, vester error durauerit, quid ergo ultra graues corde estis? Quando habituri finem fallaciarum si Veritate presente non habetis. Quid vultis beati esse de infimis? Sola Veritas facit beatos ex qua vera sunt omnia: nam vanitas est vanitatum, & omnia vanitas. Qua abundantia homini in omni labore suo quo ipse laborat sub sole? Vt quid ergo temporalium rerum amore detinemini? Vt quid tamquam prima, extrema sectamini, quod est vanitas, & mendacium? Cupitis enim permanere vobiscum quae omnia transeunt tamquam umbra.



DOMINICA



DOMINICA SEXAGESIMÆ.

DE PARABOLA SEMINIS
SEMINATI IN TERRAM, CUIUS TRES
PARTES SVNT INFRUCTIVOSÆ.

Semen est Verbum Dei. Luc. 8.

VERITAS PRACTICA.

Nisi Verbum Dei te conuertat, Tu peruerteres Verbum Dei.

RATIO EST, Quia nisi Verbum Dei te conuertat, manifeste videbis te repugnare Verbo Dei.

Sed tu potius peruerteres Verbum Dei, quàm manifeste velis videre te illi repugnare.

Ergo nisi Verbum Dei te conuertat, Tu peruerteres Verbum Dei. Quod certe crimen vt auertas, nonne te potius conuerti expedit?

I. PUNCTVM.

QVM turba plurima conuenirent, & de ciuitatibus properarent ad Iesum dixit per similitudinem: Exiit qui seminat seminare semen suum. Vide in textu Euangelij parabolam integram. Est enim valde insignis & fru-

ctiosa, quam cum Dominus sit ipse interpretatus de Verbo Dei, multæ hinc formantur Veritates Practicæ, quæ hic breuiter indicatæ poterunt facillime dilatari.

Prima est vniuersim de Verbo Dei sic attente audiendo & vtiliter retinendo, vt inde prorsus conuertaris, & te totum illi conformes. Nam alioquin vide quò incidas: *Nisi Verbum Dei te conuertat, Tu peruerter Verbum Dei.* Vellesne hoc tantum nefas! Sic autem facile demonstratur: Nam nisi Verbum Dei te conuertat vt iam dicetur, tu manifeste videbis te repugnare Verbo Dei. Tu quis es qui hæc legis vel audis? Aut valde perfectus es, quod non est de te præsumendum, aut erit aliquis in te defectus cui Verbum Dei opponitur. Nonne aliquid restat iræ, vel superbix, vel inuidiæ, vel negligentix, vel alicuius demum vitij perfectius edomandi? Quem teipsum facis? non forte sicut ceteros hominum, ô caue hanc præsumptionem.

Qualecumque autem sit illud vitium, nonne habet oppositum aliquod Dei Verbum, aut generatim, aut particulatim in Scriptura sacra denuntiatur? Vere enim S. Augustinus, *Quid-*
L. 2. Doct. Ch. c. 42. quid homo extrâ didicerit, si noxium est, ibi damnatur: si vtile est, ibi inuenitur; & cum ibi quisque inuenerit omnia quæ vtiliter alibi didicit, multo abundantius inueniet ea quæ nusquam omnino alibi, sed in illarum tantummodo Scripturarum mirabili altitudine, & mirabili humilitate discuntur. Quorsum autem putas illud Dei Verbū sic denuntiatur nisi vt te ab illo conuertat vitio? *Tollite vobiscum verba, & conuertimini ad Dominum,* inquit Propheta. Hoc est enim quod dicimus conuerti Verbo Dei, quasi diceretur, per auditum Dei Verbum deponere vitium aliquod, quo appposito sicut peruertitur animus, ita eo deposito conuertitur & sanatur.
ps. 106. Misit verbum suum, & sanauit eos. Nisi vero deponatur, nonne manifeste videbis quod quantum tali vitio, cui consentis, Verbum Dei opponitur, tantum te illi repugnare Verbo? Consensus ille est, qui facit vitium; Consensus ille est, cui verbum opponitur; Consensus ille est denique quo repugnas Dei Verbo. Quid clarius.

Matth. 26. Conuerte gladium tuum in locum suum. Quomodo implebuntur scriptura, quia sic oportet fieri? Quasi diceret Dominus Petro: dum pro me Petre sic pugnas ne capiar ab inimicis, repugnas Scripturis quæ dicunt me capiendum. Dum pro me te opponis

contra Scripturas; tu te mihi opponis qui loquor in Scripturis. Nisi conuertas gladium in locum suum, tu illum in me conuertis, dum sic mihi repugnas, repugnando verbis meis. Sic plane tibi superbe & iracunde, sic tibi manifeste fit, quod nisi Verbum Dei te ab illo tuo conuertat vitio, quoties illud diuinum audies Verbum, toties manifeste videbis te illi repugnare Verbo; seu quod idem est, tibi Verbum illud repugnare, sicut Pharisæi cum audirent Christum: *Cognouerunt*, inquit Sacer textus, *Marth. 21. quod de ipsis diceret, & quarentes eum tenere, timuerunt turbas.*

II. PUNCTVM.

SED tu potius peruerteris Verbum Dei, quàm manifestè velis videre te illi Verbo repugnare.

Quod enim Conscientiam manifestè lædit, & animi tranquillitatem euerit, quis nisi peruersus velit? quis vero nisi infidelis non sentiat suam lædi Conscientiam & animi tranquillitatem agitari, si manifeste videat se Verbo Dei repugnare? Quid est enim Verbum Dei nisi Veritas, nisi salus æterna, nisi gratia, nisi Dei intellectus & voluntas, nisi Deus ipse se suo Verbo manifestans? Ac proinde repugnare Verbo Dei quid est quam repugnare Veritati, salutis suæ, Diuinæ Gratix, diuino Intellectui, Diuinæ voluntati, ac ipsi Deo? Possesne vero manifeste cognoscere te ita Deo toti repugnare, nec turbari, nec angî, nec cruciari? Poterisne porro diutius in illo viuere cruciatu? Non poteris, non patieris, non ita viues. *Iucunditas cordis hæc est vita hominis,* *Ecclesi. 30.* inquit Sapiens; Qui tollit iucunditatem, tollit vitam. Tollit vero iucunditatem, qui tollit Conscientiam, id est qui tollit à se Veritatem, qui tollit à se gratiam, & Diuinam voluntatem quæ in Verbo Dei continetur.

Ac proinde hoc vnum superest, vt qui verbo Dei conuerti non vis, Verbum Dei peruerteris, id est, aliter interpreteris quàm intelligitur. Nam è tribus vnum necessario est eligendum, aut conuerti verbo, aut habere verbum sibi oppositum, aut negare illud verbum seu verum eius sensum, & alium affingere qui placeat & nobis palpet. Duo prima non vis, non vis conuerti, nec vis habere verbum oppositum, quid ergo superest nisi te aut illud negare esse Verbum Diuinum, aut tuo deprauare sensu

2. Pet. 3. quemadmodum hæretici, schismatici & alij non recte sentientes, *deprauant Scripturas*, inquit sanctus Petrus, *ad suam ipsorum perditionem*? Nam vt ait Tertullianus, *tantum Veritati obstreperit adulter sensus, quantum corruptor stylus*. Alludit ad dictum Apostoli: *Non sumus sicut plurimi adulterantes seu cauponantes Verbum Dei*, qua loquendi forma, plurimum confirmantur quæ dicta sunt; Nam licet corrupto vino permiscetur à Caupone aliqua quæ vini vitium tegant, & gustum acuant ad bibendum; ita plane qui scripturas deprauat, quia sibi amaras sentit, suum illis corruptum immiscet sensum vt dulciores faciat. *Si quis apposuerit ad hæc, apponet Deus super illum plagas scriptas in libro isto. Et si quis diminuerit de verbis libri Prophetie huius, auferet Deus partem eius de libro vite.*
1. de præscript. c. 17.
2. Cor. 2.
- Apo. 22.

III. P V N C T V M.

QUAM satius igitur cedendum esset Veritati! Quàm fatius Verbo Dei conuertendus esses! Nam aperte vides quod nisi Verbum Dei te conuertat, Tu verbum Dei peruerteres, tu tibi finges sensum quo non erit tibi oppositum Verbum vt sic tranquille viuas, & sic tibi cauteriatam facias Conscientiam, de qua fusè dictum est in prima parte: sicquæ sensim eo deuenies vt vel aperte accuses Deum qui tibi contradicit, vel te falso excuses, fingendo te aliter audiuisse & accepisse quod dixit.

- Sic apte sanctus Augustinus in illud Psalmi: *Sape expugnauerunt me à iuuentute mea, etenim non potuerunt mihi.* *QVARE* expugnauerunt, inquit, *quia non potuerunt mihi: quid est non potuerunt mihi, non illis consensi ad malum. Omnis enim malus ideo prosequitur bonum quia non illi consentit bonus ad malum. SONAT VERBUM, SONAT SERMO CONTRADICTOR LIBIDINIS, At ille amicus libidinis sue, & inimicus sermoni contradicenti amicæ sue, infestus est & odit Sermonem Dei. Facta est amica auaritia, inimicus Deus. Contradicit enim Deus auaritia. Et post nonnulla, Cum odisse ceperit, qua scilicet iubet Deus, incipit velle criminari eos à quibus audit bona præcepta, & velle per suspiciones suas crimina quarere seruorum Dei. Qui nobis ista dicunt, & ipsi non faciunt ista, Nos quid respondemus? Noli me attendere, sermonem istius attende, ipse tibi loquitur per quemlibet, huic tu inimi-*
- Ps. 128.

Nisi verbum Dei te conuertat, tu peruerteris verbum Dei. 53

cus es. Concorda cum aduersario tuo cum es cum eo in via. ADVERSARIUM TVVM SERMONEM DEI FECISTI. Noli attendere quia ille tibi loquitur: malus est per quem tibi loquitur, sed non est malus qui tibi loquitur, sermo Dei. Accusa Deum, accusa si potes. Creditis fratres, huc vsque peruenisse eos de quibus dicitur, saepe expugnauerunt me à iuuentute mea, vt etiam ipsum Deum accusare non dubitent.

Nolles quidem id apertè, sed vide tamen quid sentias de his aut similibus scripturæ locis, quæ tuos premunt inordinatos affectus. *Va cum benedixerint vobis homines. VAE vobis qui ridetis* Luc. 6.
nunc. Va vobis quia diligitis primas cathedras. NISI conuersi fueritis & efficiamini sicut paruuli, non intrabitis in regnum Calorum. Ibid. 11.
VOS autem non sic, vbi scilicet agitur de honore, non sic sicut sentitur & agitur. Regnum meum non est de hoc mundo. SI in viridiligno hac faciunt; in arido, quid fiet? QVIA tepidus es, incipiam Matth. 13.
te euomere ex ore meo. Luc. 22.

Certe nisi de tuo corrupto sensu his Christi Domini Verbis affingas, habes in illis quod videas tibi oppositum, seu præiudicatum, & quod in illa timeas oppositione. Si vero quid affingas, longe magis habes quod timeas. *Non potest solui Scriptura.* Ioan. 10.

Vide in 4. parte, Feria secunda intra hebdomadam decimam quintam:

Quod nisi se quisquis Christo conformet, sibi Christum conformabit.

E O D E M D I E,

DE PRIMO IMPEDIMENTO VERBI DEI:

Et dum seminat, aliud cecidit secus viam, & conculcatum est, & volucres cæli comederunt illud. Hi sunt qui audiunt, deinde venit Diabolus, & tollit Verbum de corde eorum, ne credentes salui fiant. Luc. 8.

VERITAS PRACTICA.

Quæ pœna timenda est in non seruato deposito, hæc est timenda in Verbo Dei, secus viam exposito.

RATIO EST, Quia pœna grauior quæ est timenda in non seruato deposito, prouenit ab ea culpa quæ dicitur lata uel latissima.

Sed eadem culpa interuenit in Verbo Dei, secus viam exposito.

Ergo & quæ pœna timenda est in non seruato deposito, hæc est timenda in Verbo Dei secus viam exposito.

I. PUNCTVM.

AUDITORVM Verbi Diuini quadruplex esse genus designat Dominus per similitudinem quadruplicis terræ, cuius tres partes non sunt aptæ ad referendum fructum.

Prima pars seu species terræ in qua semen perit, terra est secus viam, id est, extrema illa campi pars est quæ viæ iungitur & à viatoribus perinde teritur, & calcatur ac ipsa via, vnde fit vt semen ibi iactum, sit magis expositum siue vt conculcetur & dispergatur à trāseuntibus, siue vt à volucris auferatur, quia non latet intra glebas vel sulcos, sed patet extrā, & aues ad se allicit tamquam ad escam, & facile ab eis carpitur.

Hi sunt autem homines qui audiunt quidem Verbum Dei, sed oscitanter, nulla cum attentione, nulla vel Intellectus vel voluntatis applicatione ad res quas audiunt; vel alia omnia cogitant, illo ipso quo audiunt tempore: vel tamen si audiuerunt, tam parum auditis afficiuntur & mouentur ac si nihil audiuisent. Longe alia mens illis est, Toti sunt in nugis, & in his captandis mundi reculis quæ primò incurrunt obuia, quo in statu nihil prorsus proficiunt ex audito Dei Verbo.

Quia vero multi tales sunt qui nec quantam inde iacturam faciant, nec quantam propterea incurrañt culpam & pœnam, recogitant, idcirco proposita Veritate admonentur vt resipiscant & audiant, *Quod quæ pœna timenda est in non seruato deposito, hæc*

est timenda in verbo Dei secus viam exposito, Id est, sic audito verbo sicut ab his auditur hominibus qui sunt similes terræ secus viam positæ, quæ nullum accepti seminis fructum refert.

Ratio petitur ex illa Doctrinæ moralis parte quæ de iure agit & de Iustitia, vbi quæstiones de Deposito & de Commodato proponuntur, an si pereant culpa illius apud quos deponuntur, pœnam is incurrat restituendæ rei perditæ. Respondentque vno prorsus ore iuris Interpretes, quod si culpa sit levis, nullam incurri pœnam, si vero sit culpa grauis & quam ipsi vocant latam, id est ex aperta & patenti negligentia proficiscentem, tunc astringi Depositarium ad iacturam reparandam. Dicitur vero patens & aperta negligentia quando non ea est diligentia quam vulgo solent homines eiusdem status & conditionis adhibere in rebus suis eiusmodi obseruandis, vt si quis depositam pecuniam in obserata non seruaret arca, sed eam foris exponeret; Neque enim *Prou. 2.* solet pecunia sic exponi, vnde Sapiens monet sic quærendam & seruandam sapientiam sicut seruari solet pecunia. Mereretur certe Sapientia diligentius obseruari, neque tamen ita colitur & obseruatur sicut pecunia: sic sunt homines rerum internarum & spiritualium prauis æstimatores!

II. PVNCTVM.

SED eadem culpa interuenit in Verbo Dei secus viam exposito. Id est eiusdem culpæ & negligentia reus est ille, qui se non aliter exhibet ad Verbum Dei audiendum quàm se illa terra exhibeat ad recipiendum semen quæ est vicina viæ, vt dictum est. Sic expresse Tirinus interpretatur moraliter illa verba *secus viam*, negligendo; & apertis periculis exponendo Verbum Dei, quasi diceretur, hoc ipsum peccando quod peccat qui exponit furto rem commodatam aut sibi concreditam, ac depositam; lata est vtrobique negligentia, par in vtroque culpa.

Cur enim peccat qui exponit depositum, nisi quia non eam adhibet diligentiam quæ ad illud seruandum esset adhibenda? Nonne vero ille auditor oscitans, & peruius quibuscumque recipiendis cogitationibus animum aliò distrahentibus, nonne idem prorsus peccat? Nonne tamquam depositum accipit Dei Verbum? Nonne acceptum tenetur tam diligenter custodire vt

ipſius non pereat negligentia ? Nonne deest ſuo huic officio, dum nulla custodia ſeruat cor ſuum, nullis ſpinis ſepit aures ſuas, nulla lege continet oculos, nullo fræno linguam moderatur ? Nonne hoc intendebat Apoſtòlus, cum diceret ; *O Timothee depositum custodi, denitans profanas vocum nouitates, & oppoſitiones falſi nominis ſcientia, quam quidam promittentes, circa fidem exciderunt* ; Quasi diceret, ſerua tam diligenter incorruptum illud Dei Verbum quod à me accepisti, vt ne quidem loquendo de diuinis rebus, noua quædam uſurpes nomina, quæ præ ſe ferunt aliquid ſingulare & eximium. Quod in ſequenti epiſtola ad eundem ſic aperte explanat : *Formam habe ſanorum verborum quæ à me audiſti in fide & in dilectione in Chriſto Ieſu ? Bonum depositum custodi per ſpiritum ſanctum qui habitat in nobis*. Id eſt non vulgari, non mundana, & humana, quantumuis ſolicita custodia ſeruandum eſt hoc depositum, ſed ſpirituali, ſed diuina, ſed quali Spiritus ipſe ſanctus illud custodit : nihil plane committendo quod ſit oppoſitum, nihil prorsus omittendo quod ſit appoſitum.

Poteratne fingi aliquid altius ad illam diligentiam commendandam ? Poteratne dici quidquam apertius ad oppoſitam illius manifestandam negligentiam & latam culpam, *Qui, vt ait ſanctus Matthæus, ſecus viam ſeminatus eſt*.

III. PUNCTVM.

QUAE pœna igitur timenda eſt in non ſeruato deposito, hæc eſt timenda in Verbo Dei ſecus viam expoſito, Quia pari culpæ par pœna reſpondet ; par autem culpa eſt vbi par negligentia reperitur, in re conſimili, quæ aperte omnem exigebat cautionem & diligentiam. *Serue male & piger ! INVTILEM ſeruum eijcite in tenebras exteriores.*

Certe ſi quæ eſt culpæ diſparitas, in eo potiſſimum eſt, quod quàm longe pretioſius eſt re quauis humana, Verbum Dei : maior ſit etiam illius hominis qui Verbum Dei accipit, obligatio vt illud ſeruet, & maior proinde negligentia ſi eius culpa pereat : vnde non dubitauit ſanctus Auguſtinus affirmare tantam huius eſſe culpæ grauitatem, quanta eſſet ſi Corpus ipſum Chriſti Domini, per cuiuſquam incuriam, forte in terram caderet.

Verba eius referuntur in 3. parte, Feria ſecunda infra octauam

uam hebdomadam: satis modò hîc grauis pœna colligitur inde luenda, quod qui negligit Verbum Dei, non minus sit reus, nec minori pœnæ obnoxius, quam qui neglecti & periti depositi reus esset. Cum enim talis reus teneatur restituere depositum perditum, siue aliquid æquiualens reddere; quis non videat quales se in angustias redigat qui negligit, & qui sua negligentia perdit Verbum Dei? Quid enim æquale reddet perduto Dei Verbo! Quid æquale reddet tot donis & tot gratiis quæ simul cū Verbo Dei paratæ erant sese in te effundere? Quid æquale reddes diuino Sanguini qui pro illis fusus est gratiis? Quid æquale reddes diuinæ Gloriæ quæ inde sequutura erat? Quid æquale salutis & æternitati, cuius perit bonum cum Verbo pereunte?

Ah si scires donum Dei, & quis est qui loquitur tecum! Ah *Ioan. 4.* si scires fraudem Diaboli, & quis est qui te auertit ab illo audiendo? *Abjiciet eos Deus meus, quia non audierunt eum: & erunt osee 9.* *vagi in nationibus.* Quod primo fit culpæ, fiet pœnæ; culpa eorum est quod nimis vagentur animo per res vniuersas, nec se satis contineant audiendo Dei Verbo: at eorum etiam erit pœna quod sic deinceps vagentur, vt cū velint se continere, non ita possint, vt poterant.

DE SECVNDO IMPEDIMENTO VERBI DEI.

Et aliud cecidit super petram, & natum aruit, quia non habebat humorem.

Qui cum audierint, cum gaudio suscipiunt Verbum: & hi radices non habent, qui ad tempus credunt, & in tempore tentationis recedunt.
Luc. 8.

Non habet in se radicem, sed est temporalis. Facta autem tribulatione & persecutione propter Verbum, continuò scandalizatur. Matth. 13.

VERITAS PRACTICA.

Qui ad tempus credunt, nullo credunt tempore.
Qui temporales sunt, nullius sunt temporis.

RATIO EST, Quia nullo hi credunt tempore nec ullius sunt temporis, quantum ad virtutis spectat exercitium, qui non exercent fidem aut aliam virtutem, quo debet exerceri tempore.

Sed qui ad tempus credunt, & qui sunt temporales, non exercent fidem aut virtutem, quo debet exerceri tempore.

Ergo nec illo credunt tempore, nec ullius sunt temporis aut virtutis.

Quod certe frequens est & valde lugendum.

I. PUNCTVM.

SECVNDVM genus eorum qui sine fructu Verbum Dei audiunt, hi sunt velut terra petrosa quæ recipit quidem semen in se iactum, & ex eo producit nonnullam herbam, ad aliquod tempus virentem; sed ubi sol incaluerit, & calore terra caperit aestuare; tunc arefcit illa viriditas, & elanguens herba, ipso pene quo apparet, disparet die. Sic illi plane, satis libenter & attente de diuinis audiunt, & auditis videntur affici, atque etiam de se excitare spem aliquam futuri fructus; sed quando virtutis exercendæ sese offert occasio, si quid difficultatis in illa exercenda sentiant, difficultati cedunt, & ab omni discedunt Virtute. Propterea dicuntur temporales seu temporarij qui quo tempore nihil est operosum, mira videntur operari; sed si opus sit humile, si tantisper arduum vel non probatum mundo, timeantque suæ famæ, suis studiis & suis commodis, tunc vel ad vnum jocularè verbum quo se lædi putent, seiplos lædunt & conficiunt sua leuitate & inconstantia.

Quod quam sit infrugiferum & damnosum, sic breuius & facilius ex proposito patebit Veritate, *Qui nempe sunt temporales ad virtutem, nullius sunt temporis & virtutis.*

Id est, nullo exercent virtutem tempore.

Rationes multæ sunt quæ id demonstrent, vt patet infra, in secunda Feria, post Dominicam secundam Quadragesimæ, vbi conformis Veritas agitur; Quæ vero hic affertur Ratio præsupponit quod ait Sapiens: *Tempus & responsionem cor sapientis* Eccl. 8. *intelligit. Omni negotio & omni Virtuti tempus est & opportunitas.* Omne quidem tempus virtuti est opportunum, sed non omnis virtus est opportuna temporis. *Tempus est dilectionis & tempus odij,* ^{Ibid. 3.} *sicque suis spatiis transeunt vniuersa sub cælo.* Atque inde fit vt quæ actio facta suo tempore virtus esset, fiat vitium si fiat alieno: Vnde illud Ecclesiastici: *Ex ore fatui reprobabitur parabola, non* ^{Ecclesi. 10.} *enim dicit illam in tempore suo.* Nonne & ipse Deus, *Tempore, inquit, accepto exaudiui te, & in die salutis adiunxit?* ^{2. Cor. 6.} *Ecce nunc tempus acceptabile, ecce nunc dies salutis.* Nempe huic modò temporis sua est virtus, & huic virtuti sua est gratia, quæ nec alteri temporis, nec virtuti esset opportuna, *Transiit mæsis, finita est æstas, & nos saluati non sumus.* Id est, non aduertimus ad illud ^{Ier. 8.} tempus quo saluandi eramus, sicque miseri perierunt illo ipso tempore quo saluari poterant, si aduertissent.

II. PUNCTVM.

SED temporales non exercent virtutem quo debet exerceri tempore. Tēpus enim virtutis exercendæ, tempus illud est quo virtutem deserunt, *Tempus est tentationis in quo recedunt,* vt ait Dominus, tempus est quod ad probationem virtutis, à Deo erat ordinatum: tempus est quo gratia præsens aderat: tempus est quo suam probare fidelitatem debuerant: tempus est quo præterita malè acta redimenda erant, & futuris consulendum. Tempus denique est vitandæ culpæ, quo tempore tam necessaria virtus erat vt nullo tempore sit magis necessaria, quia nihil est in omni genere necessitatis, & in omni temporis latitudine tam necessarium quàm non peccare, cui necessitati cætera cedant oportet omnia. *Nemini mandauit impie agere, & nemini dedit spa-* ^{Ecclesi. 15.} *tium peccandi: non enim concupiscit multitudinem filiorum infidelium & inutilium.* Quasi diceret Sapiens: satis multi se filios & cultores Dei præberent, si colendo Deo satis esset virtutem aliquando exercere, quando videlicet nulla eius exercendæ est dif-

60 *Dominica Sexagesima. Et aliud cecidit super petram.*

Ibid. ficultas: sed tales filij prorsus sunt infideles & inutiles, qui quò potissimum tempore probanda est eorum fidelitas & opera, tunc discedunt & deficiunt. At vero Deus tales non admittit, & mauult paucos fideles atque vtilis, quàm multitudinem infidelium & inutilium. *Non enim necessarij sunt ei homines impij, cum videlicet suam Deo non nauent operam, quando præcipue necessitas exigeret in vitandis culpis, Deus illorum operam non exigit in aliis quæ forte vellent reddere ministeriis & obsequiis.*

Matth. 5. Domine, Domine, aperi nobis. Amen dico vobis: nescio vos.

I I I. P V N C T V M.

Sap. 5. **Q**VI sunt ergo temporales ad virtutem exercendam, nullius sunt ad virtutem temporis nec vllius virtutis. *VIRTVTIS, inquit, nullum signum valuimus ostendere: in malignitate autem nostra consumpti sumus. Talia dixerunt in inferno hi qui peccauerunt. Non sic loquebantur in terra, cum sibi fingerent esse virtutem, quod erat mere naturale & politicum: quando virtutem duntaxat exercebant vbi nulla esset difficultas, nec honoris aut bonorum iactura. Sed iam in inferno de bonis & de malis huius vitæ longe aliter sentiunt & iudicant, quia suo ibi damno vident quàm decepti fuerint, dum aliquoties tantum & non semper, & non eo præsertim tempore virtutem exercere voluerunt, quo scilicet exercenda erat, quo vitandæ culpæ vel minimæ, quo erant ferendæ potius injuriæ quam inferendæ: quo erat potius moriendum quam peccandum. Agonizare pro anima tua, & vsque ad mortem certa pro Iustitia. Quid autem iustius quàm non peccare? Hoc est in quo deficiunt temporales, & in quo proficiunt æterni Verbi Cultores.*

Ecclesi. 4.

DE TERTIO ET POSTREMO IMPEDIMENTO D I V I N I V E R B I.

Et aliud cecidit inter spinas, & simul exorta spine suffocauerunt illud.

Hi sunt qui audierunt, & à solitudinibus & diui-

*Inordinatæ sollicitudines ipsum Verbum suffocant quo, &c. 61
tiis, & voluptatibus vitæ, euntes suffocantur,
& non referunt fructum. Luc. 8.*

VERITAS PRACTICA.

Inordinatæ sollicitudines ita nociuæ sunt, vt illud ipsum Christi Verbum quo dicuntur alia Dei Verba suffocare, suffocent.

RATIO quæ id demonstrat hæc est, quòd tunc sollicitudines suffocare Verbum Diuinum dicuntur, quando impediunt eius fructum. Sed inordinatæ sollicitudines impediunt fructum huius Verbi quo eas Christus dicit alia Dei Verba suffocare. Ergo & illud ipsum Christi Verbum suffocant. Unde & facile est colligere quàm sint nociuæ & cauendæ.

I. PUNCTVM.

TERTIVM & postremum illud impedimentum Verbi diuini quod proponitur, tria præ cæteris habet incommoda, quibus difficile curatu redditur. Primum est, quod sit magis vniuersale & commune, vix enim vllus est mortalium qui non nimis afficiatur erga diuitias & voluptates huius vitæ, quique propterea plus æquo non angatur & sollicitetur.

Secundum est, quod hæc diuitiarum sollicitudo longe pluribus modis quàm alia impedimenta fructum spirituales impediat; nempe his quatuor modis quibus spinæ possint nocere semini. Primo enim obstant ne semen in terram penetret; Deinde ne sol lucem & calorem infundat; Tertiò ne terra sufficientem succum subministret alendo semini, cum ipsæ spinæ bonam terræ partem exsurgent; Denique si semen pullulet, illud suffocant. Sic prorsus illæ sollicitudines, & auocant animum ne audiat Verbum Dei: & sese quodammodo diuinis opponunt luminibus: & meliorem animæ partem ad se retrahunt, vt vix vacet audito Dei verbo secum reuoluendo: & si quid demum ex auditis vellet proficere, profectum statim suffocant.

Tertium vero incommodum est, quòd sicut spinæ sunt aculeatæ & pungentes, ita & illæ diuitiarum curæ ac sollicitudines mentem excrucient & dilanient, eoque etiam animo Christus hanc similitudinem proposuerit vt perspecta hac sensibili acerbitate conjunctim cum aliis detrimentis spiritualibus, magis moueremur ad has curas excidendas. Vix tamen propterea vllus moueatur, vix vllus Christo cedat, vix vllus credat, vix vnus reuera sentiat quod diuitiæ sint velut spinæ, nec aliunde defectus ille fidei proueniat quam ex ipsis sollicitudinibus, quæ ita mentem humanam fascinant & dementant, vt quod est apud

Iob. 30.

Iob; esse sub sentibus delicias computet.

Atque hinc eruta Veritas qua manifeste pateat, Quàm sint noxiæ & cauendæ sollicitudines, vt quæ ipsum Christi Verbum quo dicuntur alia Dei Verba suffocare, suffocent.

Ratio quæ afferitur rem totam paucis explicat, dum primo suggerit suffocari Diuinum Verbum nihil aliud esse quam impediri fructum eius. Hoc est enim intentum parabolæ vt vniuersim aperiat quibus modis impediatur fructus Euangelij seu Diuini Verbi: Cumque hoc vnum ex impedimentis afferatur quod sollicitudo diuitiarum velut spinæ suffocent verbum, non alia profecto mente id dictum est, quam vt significetur sic impediri fructum eius. Sicut enim suffocatum semen redditur infructuosum sic & Verbum Dei si humano in corde opprimatur & veluti suffocetur, suo priuatur fructu. Et sicut dicuntur ea præcipue suffocari quæ aliquam habent vitam seu vegetantem seu sensitivam, ac proinde quæ respiratione quadam egent, quæ si tollitur, eorum vita tollitur: Sic Diuinum Verbum vitale est, & vitæ spiritualis ac æternæ non modo semen, sed quoddam velut initium cui sua sunt propria quædam cælitus respirandi spatia, quæ si arctius constringantur & opprimantur, tunc plane intereat necesse est; sicque interire Verbum Dei, hoc ipsum est quod esse irritum & sine fructu. Et irritum fecistis mandatum Dei. ET NON REFERVNT FRVCTVM, ait Dominus.

Matth. 15.
Luc. 8.

II. PUNCTVM.

SED inordinata diuitiarum sollicitudines impediunt fructum illius verbi, quo Christus Dominus eas dicit alia Dei Verba suffocare. Nam fructus illius verbi est, vt cum homines illud audiuerint

Inordinatae sollicitudines ipsum verbum suffocant quo, &c. 63

& crediderint, tum inordinatum diuitiarum affectum unde procreantur illae sollicitudines, deponant, aut temperent. Hoc intendebat imprimis Christus Dominus; hoc premebat, hoc urgebat; *Nolite thesaurizare vobis thesauros in terra. NON potestis Deo servire & mammona. Ideo dico vobis ne solliciti sitis, NON grauentur* *Matth. 6.* *corda vestra curis huius vitae.* Quod ut persuaderet, nihil aptius *Luc. 21;* dici poterat quam si diceretur, non modo infructuosas illas esse curas, sed & graues, damnosas & lethiferas. Hoc est autem quod Christus dixit cum dixit eas esse velut spinas quarum vel ipsa species foeda est, onus graue, & contactus tam molestus ut sit intolerandus. Velle ne spinis carne nuda circumdari? Possetne vero Cor humanum spina tangi & non laedi, & non mori?

Quis autem fructus huius Christi sermonis? Quis saecularium non sic amet diuitias? non sic eis Cor apponat suum; non sic inde sollicitetur & satagat, perinde ac si Christus Dominus nihil esset contra loquutus? Quis eorum credat suas de habendis diuitiis curas esse velut spinas, cum nihil suauius sibi esse putet quam in talibus versari curis? *Si promptuaria eorum plena, eructantia ex hoc in illud. Si oves eorum faetosa, abundantes in egressibus suis, si Ps. 143.* *boues eorum crassa,* Nonne beatum, ut olim, antequam veniret Christus, dixerunt populū cui haec sunt? Dicat quātumuis diuites miseros Christus: Illi beatos semper praedicant. Dicat quātumuis amaras opum congregandarum curas: Illi delicias suas affirmabunt. Sed Christus est qui loquitur, & qui mentiri non potest. Deus, Deus ipse est qui saeculares curas ait esse spinas. Verū id viri saeculares non recogitant, non id sapiunt, non id sibi dictum putant; Sic suis inuoluuntur curis & toti occupantur sollicitudinibus huius vitae, ut nihil super sit otij, nihil vigoris, nihil ingenij, nihil facultatis ad memorandum Christi Verbum.

At nonne sentiunt ipsos spinarum aculeos, ipsas curarum molestias, ipsas molestiarum moles & amaritudines: sentirent sane nisi sensum obtunderent, & nisi suis inebriarentur amaritudinibus? *Inebriauit me absynthio,* dicebat in eorum persona *Ie. Thron. 3.* *remias,* ut recte notauit sanctus Gregorius: *nam ebrius quisque* *20. Mor.* *quod patitur nescit, qui vero absynthio inebriatur, & hoc quod sum-* *15.* *psit amarum est, & tamen non intelligit eandem amaritudinem qua repletur. Humanum igitur genus recto Dei iudicio in voluptatibus suis sibi dimissum, atque per easdem voluptates spontaneis tribulatio-*

64 Dominica Sexagesima. Et aliud de cecidit super spinas.

nibus traditum, absynthio est ebrium, quia & amara sunt quæ pro huius vitæ amore tolerat: & tamen eandem amaritudinem, cecitate cupiditatis quasi insensibilitate ebrietatis ignorat. Mundi enim gloriam sitiens, dum multas pro ea tribulationes reperit, amarum est quod bibit; sed quia hoc nimis inhianter sumpsit, eiusdem amaritudinis malum discernere, iam præ ipsa ebrietate non sufficit. TVRBATI sunt & moti sunt sicut ebrius, & omnis sapientia eorum deuorata est. Sic nempe absorbent animum inordinatæ sollicitudines.

III. PUNCTVM.

ERGO & quàm nocivæ sint & quàm cavenda patet, cum illud ipsum Christi verbum quo dicuntur alia Dei verba suffocare, suffocent, & sine ullo fructu efficiant; Nam hic erat eius fructus ut persuaderet illas sollicitudines esse velut spinas: quod cum sibi persuasum non habeant ipsi etiam Christiani, qui plus æquo se his humanis dedunt curis: quis non videat sic suffocari Verbum istud, & hoc ipsum agi modo quod olim apud Iudæos de quibus Dominus ad Prophetam: *Et veniunt ad te quasi si ingrediatur populus, & sedent coram te populus meus, & audiunt sermones tuos, & non faciunt eos, quia in canticum oris sui vertunt illos, & auaritiam suam sequitur cor eorum.*

Expende hæc prostrema Verba non dicit præcisè auaritiā, sed auaritiā suam, id est, affectum qualemcumque habent inordinatum ad res terrenas; In hoc autē vel maxime apparet inordinatus, cum ita interstrepit Verbo Dei, ut vel non audiat vel non credatur. Sic expresse habes in Euangelio, quod inter Christi auditores Illi præcipue *qui erant avari, deridebant illum*, quia hic terrenorum affectus quem maxime Christus insectabatur, Christo etiam vel maxime resistebat. En Adolescens tam castus & innocens ut omnia Dei mandata obseruaret, vnumq; sibi deesse audit à Christo Domino, ut vèdat quæ habet & pauperibus distribuat, ac certò speret se thesaurum in cœlo habiturum; ab ita tristis nec Christo credit, quia scilicet suis nimium erat affectus rebus. Spinam gerebat in corde, unde illa tristitia suborta est: Et quam spinam voluisset Christus verbo suo auellere, ipsa potius verbum Christi auulsit; Adeo verum est quod diuitiæ velut spinæ suffocant Verbum Dei, & illud præcipue verbum quod contra ipsas profertur

Inordinate sollicitudines ipsum Verbum suffocant, &c. 65

profertur diuitias, vnde ad reliqua Verba Dei audienda vel credenda nulli minus idonei, nulli minus parati, minus bene affecti quam qui plus æquo affecti sunt suis rebus.

Illud est denique obseruandum quod hîc dicitur: *Euntes suffocari*, quasi diceretur illos tantum suffocari & perire qui sequuntur suas cupiditates; Vel potius phrasis est hebræa & loquendi modus, quo significatur nonnisi pedetentim & progressu temporis euenire detrimenta illa quæ commemorata sunt; Vnde illud etiam accedit incommodi vt ea minus aduertantur, & quò illi magis eunt, magis suffocantur & pereunt; Quò illi magis progrediuntur, minus regredientur; Quo illi ætate procedent longius, ita & cupiditate quæ semper magis ac magis incalescit, roboratur & induratur, vt fuse demonstratur in opusculo: *Lata via perditionis. TV autem, ô homo Dei, hac fuge, sectare velò iustitiam, Pietatem, Fidem, Charitatem, Patientiam, Mansuetudinem.* 1. Tim. 6.

DE PATIENTIA QUÆ ITA NECESSARIA
EST AD FERENDVM FRVCTVM, VT
NULLVS ALIOQVIN FERATVR.

Quod autem in bonam terram, hi sunt qui in corde bono & optimo, audientes verbum retinent, & fructum afferunt in patientia. Luc. 8.

VERITAS PRACTICA.

Qui timent pruinam, irruet super eos nix. Iob 6.

SENSVS est quod qui modicum illum timent laborem qui in audiendo Dei Verbo necessarius est, incident in maiorem: quantòque minus pati voluerint, vt referant fructum, tantò magis patientur ex defectu fructus.

RATIO EST, quia tantò ij magis patientur in aduersis, quantò minùs habebunt virtutis ad ea quæ occurrent toleranda.

66 *Dominica Septuag. Et fructum referunt in patientia.*

Sed qui metu laboris non audierint Verbum Dei, minus habebunt virtutis ad huiusmodi tolerantiam.

Ergo ij tantò magis patientur, quantò minus laborare & pati voluerint: ac proinde ex iis erunt de quibus Iob: Qui timent pruinam, irruet super eos nix. Quod cùm sit ridiculum & insipiens, longe satius est laborem illum suscipere, qui in audiendo fructuosè Dei Verbo requiritur.

I. P V N C T V M.



XIIIT qui seminat seminare semen suum, & dum seminat, aliud cecidit secus viam & conculcatum est.

Legenda iterum esset & acuratiùs expendenda tota parabola, quæ tota est illustris, tota mirabilis, tota frugifera, tota saluberrima. Nec refugas laborem qui in legendo & meditando necessarius est; hinc enim primo incipit perditio & iactura Verbi Dei, quod si attentè considerares, omnia alia impedimenta disceres remouere. Quamobrem in id præsertim modò est laborandum, vt agnoscas laborem illum, qui in audiendo & considerando fructuosè Dei verbo desideratur, nullo modo esse fugiendum. Quid enim prodesset hunc fugere, cùm in alium grauiorem incideres, tantoque postea magis patereris ex non audito Dei verbo, quanto minùs pati voluisses in eo audiendo?

Ratio quæ id demonstrat est euidens: Nam in confesso est apud omnes, quòd tanto magis vnusquisque patitur in aduersis, quanto minus habet virtutis & gratiæ ad illa toleranda. Sicut enim vnique virtuti hoc est maximè proprium, vt cum diuina gratia, animum nostrum corroboret contra difficultates quæ occurrunt in obiecto, circa quod illa versatur: ita planè si desit virtus, deerit etiam illud animi robur, quod præstabat; ac proinde debilior ac longè impar eris difficultati tolerandæ; sicque magis patieris, seu in externis illis aduersis quæ occurrunt, seu in internis animi commotionibus quæ à vitio virtuti opposito excitantur. *Vbi est Timor tuus, Fortitudo tua, Patientia tua, & Perfectio viarum tuarum?* Nonne id tunc tibi veriùs, quàm olim Iobo diceretur?

Iob. 4.

Hoc est certè quod quotidianâ patet experienciâ in tam diuer-

so statu hominum, qui aduersis premuntur. Vnde enim fieri putas, vt vnus alio magis labore in calumnia vel probro aliquo tolerando, nisi quia minus est humilis? Vndenam alius paupertatis difficultatē minū libenter suffert, nisi quia minus est amans paupertatis? sic de aliis virtutibus cogita, quarū defectu ita auge-
tur labor, vt hoc pene vno labore animus in aduersis, quòd virtute careat, qua aduersa illa facile & iucunde sustineret. Hinc orabat Apostolus, *vt det vobis secundum diuitias gloriae suae, virtute* Ephes. 3.
corroborari, per spiritum eius in interiori homine, Et alibi, *In omni* Coloss. 1.
virtute confortati secundum potentiam claritatis eius. O quā saepe de creaturis querimur, quæ iustius de nobis quererentur, cum si virtus adesset, nulla creatura obesset; & cum virtus deest, vix vlla creatura prodest.

II. PUNCTVM.

SED qui metu laboris non audierint aut non considerauerint Verbum Dei, minus habebunt virtutis ad huiusmodi tolerantiam.

Nam cum potissimus Verbi Diuini fructus sit ipsa virtus, aut quidquid ad eam ducit aut mouet, profectò is se virtute denudat, qui se tali fructu priuant. Sic enim de Verbo diuino, quod de Sapientia Sapiens; *Labores huius magnas habent virtutes; sobrietatem enim & prudentiam docet & iustitiam & virtutē*, (id est fortitudinem,) *quibus utilius nihil est in vita hominibus*. Sicut igitur qui se priuaret Sapientia, priuaret se eius fructu qui sunt virtutes commemoratae, sic qui se priuat fructu Diuini Verbi. Sap. 8.

Neque verò Verbum Diuinum virtutes tantum docet sicut Sapientia, sed cum diuina gratia mouet etiam voluntatem ad earum exercitium. Vnde dicitur *ignitum Dei eloquium vehementer*. Et, *Nonne cor nostrum ardens erat in nobis dum loqueretur in via, & aperiret nobis Scripturas?* Est praeterea gladius ille, qui virtuti obstantia quæque perrumpit, de quo Apostolus, *Et gladius spiritus quod est Verbum Dei*. *VI VVS est enim Sermo Dei & efficax & penetrabilior omni gladio ancipiti*. Hoc ita utebantur sancti, sicut expressè refert S. Hieronymus de sancta Paula, vt ad vnamquamque occasionem virtutis exercendae, paratam haberent Scripturae diuinæ sententiā, aut Verbum aliquod quo veluti ipso Deo iubente vel monente mouerentur, sicque Chypeo fidei & Gladio spiritus simul armati contra spiritualia nequitia, inuicti. Ps. 118.
Luc. 24.
Ephes. 6.
Heb. 4.

stabant. Hic est itaque Verbi Divini fructus, *virtutem discere & exercere*; vnde certe eo erit virtus minor, quo minor Divini verbi fructus. Ah qualis iactura, & quam deploranda! Videsne damnum? sentisne quam graue sit?

III. PUNCTVM.

QVI timent ergo pruinam, irruet super eos nix. Id est, qui paruum timent laborem qui in percipiendo Dei Verbo necessarius est, incident in maiorem: quantoque minus pati voluerint ut referant fructum, tanto magis patientur ex defectu fructus quo se priuant; quia scilicet se virtute spoliant & illis armis, quibus qui denudantur, nihil sibi superesse sentiunt, nisi vinci & pati. Quam longè igitur ille prudentior, qui non parcit labori debito ad fructum illum colligendum, seu ex meditatione
Prov. 14. seu ex lectione, seu ex piis aliis exercitiis. Et quàm bene ait Sapiens, *Impatiens operabitur stultitiam*: Et paulò post, *Qui patiens est multà gubernatur prudentiâ, qui autem impatiens est exaltat stultitiam suam*. Nam dupliciter errat impatiens; primò quidem, quòd dum se putat laborem fugere, incidit in grauiorem; deinde verò, quòd hic labor in quem incidit, non modo sit grauior quantum ad poenam corporis seu temporale damnum: sed etiam quantum ad spiritualem animi iacturam, quæ inde multis
Prov. 19. modis incurritur. Vnde idem diserte Sapiens: *Qui impatiens est sustinebit damnum: & cum rapuerit, aliud apponet*. Nam si saltem magis laborando, magis mereretur, tolerabilis esset labor; sed ipso maiori labore minus mereri, quis non deploret?

Quis non agnoscat miserandum illum laborem, quem damnati sic deplorant, *lassati sumus in via iniquitatis & perditionis, & ambulauimus vias difficiles*. Tum post multa concludunt, *Et virtutis nullum signum valuimus ostendere, in malignitate autem nostra consumpti sumus*. Verè malignitas, nolle exiguum illum laborem sumere, qui in meditando aut legendo requiritur ad fructum referendum, & in grauiorem incidere cum periculo salutis aut perfectionis. Quis ex duobus laboribus non eligeret eum, qui
Ecclesi. 20. minor est & fructuosior: quis nollet is esse qui *multa redimat modico pretio*? Denique audi alium Sapientem, quàm præclare & apte ad hæc omnia confirmanda de Doctrina Christi, pronuntiet: *Fili à iuuentute tua excipe doctrinam, & vsque ad canos inue-*

*inies Sapientiam: Quasi is qui arat & seminat, accede ad eam & susti-
ne bonos fructus illius. Injice pedem tuum, in compedes illius, & in
torques illius collum tuum: Subjice humerum tuum & porta illam, &
ne acedieris vinculis eius. Inuestiga illam & manifestabitur tibi, &
continens factus ne derelinquas eam. In nouissimis enim inuenies re-
quiem in ea, & conuertetur tibi in oblectationem. Et erunt tibi com-
pedes eius in protectionem fortitudinis, & bases virtutis, & torques
illius in stolam gloria: decor enim vite est in illa, & vincula illius
alligatura salutaris. Quibus prope similia in fine libri repetit se-
lectis quibusdam & exquisitis verbis, Colluctata est anima mea in ^{16. 51.}
illa, & in faciendo eam, confirmatus sum. Manus meas extendi in al-
tum, & insipientiam eius luxi. Animam meam direxi ad illam, & in
agnitione inueni eam. Possedi cum ipsa cor ab initio: propter hoc non
derelinquar.*

Videri possunt quæ ibi plura prosequitur: necnon hæ Verita-
tes & aliæ consimiles, quas ex aliis partibus ad Euangelicam pa-
rabolam referri est facile.

Sicut discursum nostri intellectus statim sequi debet
affectus voluntatis: ita & affectum effectus seu exe-
quutio.

In 1. parte, die 29. Decembris.

Si quid nos reuocat à Doctrina Christi, vel ob id ma-
ximè recipienda est.

In 1. parte, Feria 6. infra hebdomadam 2. post Epiphaniam.

Verbum Dei non redit vacuum: aut profit necesse est
recipienti vel obsit.

In 3. parte, Feria 2. infra octauam hebdomadam.

Qui non audit, non audietur.

70 FERIA 2. *infra Hebd. Sexagesimā. Non cantabit, &c.*

Quibus nos attentiores esse oporteret, in his magis ob-
furdescimus.

In 3. parte, Dominica undecima.

Quod te imparatum magis reddit ad ferendum fru-
ctum, hoc te paratiorem deberet reddere.

Quantò minùs puniri timet infructuosus, tantò iam
magis punitus est.

In 3. parte, in fine, ubi de renouatione votorum.



HAC HEBDOMADE, Materia Considerationum
& Veritatum comprehendetur illo Sermone, quem
Christus Dominus habuit statim à cœna cum disci-
pulis facta, vsque ad Orationem quam ibidem in
cænaculo fudit ad Patrem, prout refertur à sancto
Ioanne. Et quia illo toto sermone, hoc pene vnum ver-
sat argumentum, vt fortes sint Apostoli in persecutio-
nibus tolerandis, eò etiam præcipue spectabunt Veri-
tates, & iisdem motiuis, quæ proponuntur à Christo
Domino, innitentur ad hunc finem, vt discamus con-
stantiam in aduersis.

*c. 13. 14.
15, & 16.*

FERIA SECVNDA.

DE FUTURO PETRI LAPSV, A CHRISTO DOMINO PRÆENVTIATO.

*Quò ego vado, non potes me modò sequi, sequeris
autem postea. Dicit ei Petrus: quare non possum*

te sequi modo? animam meam pro te ponam?
Respondit ei Iesus; Animam tuam pro me po-
nes? Amen, Amen dico tibi, non cantabit gal-
lus, donec ter me neges. Ioan. 13.

VERITAS PRACTICA.

Nimia firmitas, infirmitas.

SENSVS & RATIO est, quia ubi est nimia firmitas, ibi est
presumptio animi, seu presumpta quadam securitas, quasi
nullum sit periculum, aut quasi non sis periturus in periculo.

Sed ubi est talis presumptio, ibi est infirmitas.

Ergo nimia firmitas infirmitas: ac proinde sibi diligenter cau-
endum, & non in se, sed in Domino confidendum.

I. PUNCTVM.

PER ACTA coena, & iis dictis quæ præcedenti hebdo-
mada considerata sunt; ipso etiam proditore Iuda egres-
so, ad suum facinus exequendum: Dominus Iesus, Diui-
num hunc capit habere sermonem cum suis discipulis, cuius
initium est: *Nunc clarificatus est filius hominis, & Deus clarificatus
est in eo.* Et paucis interiectis, cum de instanti suo discessu nihil
tale cogitantes monuisset, ac de mutua dilectione nouum man-
datum dedisset; Tum dicit ei, *Simon Petrus: Domine quo vadis?*
Respondit ei Iesus, quò ego vado; & quæ supra referuntur, ubi
quanta videtur Petri firmitas, tanta spectatur eius infirmitas.
Quid firmitus, quàm quod ille Christo dicit, *Animam meam pro
te ponam?* Sed quid infirmius, quàm quod illi à Christo dicitur;
Non cantabit gallus, donec ter me neges? Numquid fortè nimia fuit
eius firmitas, vnde talis infirmitas? Certè id videtur innuere S.
Augustinus, qui cum vniuersim dixisset; *Audeo dicere superbis*
esse vtile cadere in aliquod apertum, manifestumque peccatum, vnde
sibi displiceant, qui iam sibi placendo ceciderant; tum addit particu-
lar. 14. c. 13.

latim de hoc Apostolo : *Salubrius enim Petrus sibi displicuit, quam sibi placuit, quando præsumpsit.* Ex quibus sancti Patris verbis non modò elicitur Veritas proposita, *quòd nimia firmitas sit infirmitas,* sed & eius allata Ratio subiungitur, quod ubi est nimia firmitas, ibi sit præsumptio : atque ubi præsumptio, ibi infirmitas, ibi casus & interitus. Hoc primum sit contra occurrentia mundi pericula & aduersitates monitum.

Hanc porro Rationem sic expende accuratè, vt iam non Petro, sed tibi applices. Est autem ita euidentis quoad primam partem, vt nimia firmitas & præsumptio, pene vnum atque idem sub diuersis nominibus videantur intelligi. Neque enim vllus aliter nimis est firmus, quàm quòd malè præsumat ; neque vllus malè præsumat, quàm quòd opinione sua nimis est firmus, id est, supra quàm debet, inordinatè, sine vllò timore, & diffidentia sui, sine vllò respectu ad ordinem, & Prouidentiam Dei ; *Audaces, sibi placentes.* Sic apertè sanctus Thomas : *Præsumptio est nimia quadam & immoderata fiducia seu spei excessus, non modò circa proprias vires, sed etiam circa diuinam potentiam & misericordiam, quatenus aliud aut aliter atque Deus ordinauit, homo contendit.* *FACIAMVS & ipsi nobis nomen, & eamus pugnare aduersus gentes. Ipsi autem non erant de semine virorum illorum, per quos salus facta est in Israel. In die illa ceciderunt Sacerdotes in bello, dum volunt fortiter facere : dum sine consilio exeunt in praelium ?* O *P R A E S U M P T I O* nequissima vnde creata es cooperire aridam malitiâ & doloitate.

II. PUNCTVM.

SED ubi est talis præsumptio, ibi est infirmitas.

Primò quidem quæ putatur audacia & firmitas animi, mera est infirmitas ; cùm si quis animo firmus & constans esset, sibi magis attenderet, nec ita vanè præsumeret. Deinde verò statim atque præsumat, sibi relinquitur, diminuuntur Gratia, lumina, & diuina quæuis auxilia, quibus destitutus homo, quid est nisi folium quod vento rapitur, nisi stipula sicca, nisi mera infirmitas, nisi prona in lapsum, & ad omne genus peccati ruitura indoles, vnde numquam emergat ? Sic Deus dicitur, *præsumentes de se, & de sua virtute gloriantes humiliare.*

Adde, quod qui præsumat, quantumcumque auxilij & diuinæ gratiæ

gratiæ coelitus offeratur, vix ad illud attendit, siue vt in eo fidat, siue vt fideliter ei cooperetur & adhæreat: Sed quasi securus de rei exitu, cætera negligit, & in negligentia suâ poenas infirmitatem illam refert, quam de se & de aliis deplorat Dauid: *Infirmitas est in paupertate virtus mea; INFIRMATI sunt, nec fuit qui adinuaret.* O vere deplorandam infirmitatem! Ps. 30. & 106.

III. P V N C T V M.

NIMIA ergo firmitas, infirmitas: Quia sic præsumptio castigatur, vt qui nimis se posse audet, minus possit. *Audi. 15. 16.* nimis superbiam Moab: superbus est valde: superbia eius & arrogantia eius, & indignatio eius, plusquam fortitudo eius. Vnde & concludit Propheta, *Et relinquetur parum & modicus, nequaquam multus.* Hinc apte psalter Regius: *Posuisti firmamentum eius, formidinem;* id est, in quo vanè firmabatur, & nimis præfidebat, illud ipsum est quo formidandum in modum periit: illud ipsum est quod esse debet causa formidinis, ne deinceps sic vanè efferratur. Illud denique ipsum est, quod erit firmamentum eius, si bene formidet & timeat, prout ait Scriptura: *Oculi Domini super timentes eum, protector potentia, firmamentum virtutis, tegimen ardoris, & umbraculum meridiani, deprecatio offensionis, & adiutorium casus, exaltans animam, & illuminans oculos, dans sanitatem, & vitam & benedictionem.* Et alibi breuius, *In timore Domini fiducia fortitudinis.* Ecclesi. 34. & Prou. 14.

Vide ergo vt sic formidinem & timorem Domini ponas firmamentum tuum: ne si firmamentum tuum in alio statuas, vel in ipso Domino, non seruat is seruandis, *Ipsè ponat firmamentum tuum formidinem,* id est, vertat in ruinam, quod ad salutem esse firmius præsumebas. *Quoniam obtriuuit Dominus confidentiam tuam, & nihil habebis prosperum in ea.* Vide in 3. parte, Domini-
ca 10, & Sabbato infra hebdomadam 14.



FERIA TERTIA.

DE CAVENDA PERTVRBATIONE

ANIMI IN ADVERSIS.

AD HAEC CHRISTI DOMINI VERBA:

Non turbetur cor vestrum. Creditis in Deum, & in me credite. In domo patris mei, mansiones multae sunt: si quo minus dixissem vobis, quia vado parare vobis locum. Ioan. 14.

VERITAS PRACTICA.

Quod Christus semel suis, hoc in omni semper casu, tibi dicit, *Non turbetur cor tuum.*

RATIO EST, Quia cum Dominus dixit suis ne turbarentur, idcirco dixit propter tria quae subiungit, sedanda perturbationis animi motiua potentissima.

Sed illa ipsa tria motiua concurrunt in omni casu, vt te pariter moueant ad sedandam animi perturbationem, vndecumque ortam.

Ergo quod Christus semel suis, hoc in omni casu dicit, non turbetur cor tuum, Quod certe est potentissimum in aduersis subsidium.

I. PUNCTVM.

NON semel quidem hoc praeceptum siue consilium de cauenda perturbatione animi in aduersis, proposuit suis discipulis Christus Dominus. Iam enim illis ante praeceperat, *Videte ne turbemini: & Nolite terreri.* Tum verò hinc

Matth. 24.

Luce. 21.

etiam in eodem suo sermone bis repetit; *Non turbetur cor vestrum*; *NON turbetur cor vestrum neque formidet*. Nec sanè frustra sic toties; nam cùm perturbatio animi plerumque soleat impedire fructum, qui ex aduersitate colligi potest, grauius est & damnosius perturbari, quàm quæuis aduersa perpeti: proindèque diligenter præcauenda talis perturbatio; neque semel tantum, sed pluries inculcandum fuit monitum. At nihilominus in Veritate proposita, dicitur semel dictum à Domino, quia scilicet pro vno & eodem accipitur totum illud quod dixit & fecit dum viueret, sicut ipse ait Patri: *Opus consummavi quod dedisti mihi ut faciam.* Mat. 14. Ioan. 17.

QVOD itaque semel Christus suis, hoc in omni semper casu tibi dicit, *NON TURBETVR COR TVVM*. Est enim eadem prorsus ratio, cur ita sit semper verum & semper efficax in omni aduerso casu ad sedandam commoti cordis perturbationem, sicut cùm dixit Christus suis. Atque hæc ratio non vna sed triplex est, quæ deducitur ex ipsis Christi Domini verbis, quæ supra relata sunt, & quæ hîc modò sunt expendenda. *Creditis in Deum*, inquit, & *in me credite*, quasi diceret, Nonne creditis Diuinam Prouidentiam? Nonne creditis nihil prorsus aduersi vobis posse contingere, nisi Deo ac meipso permittente & volente? Ego autem non permittam vobis quidquam accidere quod noceat, imò quod non profit, si mecum aduigilare vultis. Quapropter ne turbetur cor vestrum, quia vobiscum sum, & me præsentem, nihil erit damni & detrimenti. Sicut cùm in mari & in exorta tempestate illis dixit, *habete fiduciam, ego sum, nolite time-* Matth. 14.
re. O quis tum diffidat? quis turbetur? *Obmutui & non aperui os meum*, inquit Psaltes, *quoniam tu fecisti*. Atque hæc prima ratio, quæ petitur à diuina prouidentia.

Secunda continetur his verbis: *In domo patris mei mansiones multe sunt*. Et horum sensus est ad perturbationem animi in aduersis validè reprimendam multum idoneus & efficax; Ne turbemini, quasi aduersum vobis aliquid acciderit, non enim est illud aduersum quod mansionem vestram in domo Patris mei parat: & cum multæ sint, eæque variæ mansiones, multa etiam & varia ab vnoquoque sunt toleranda, vt eò tandem perueniat, quò per illas tolerantias disponitur. *O si vidisses sanctorum in cælo coronas perpetuas! O si tibi hac scirent, & profunde ad cor transirent,*

76 Feria 3. infra Hebd. Septuag. Non turbetur cor vestrum.

quomodo auderes vel semel conqueri? Nonne pro vita aeterna cuncta laboriosa sunt toleranda? Hæc & plura libro tertio de Imitatione Christi, capite quadragesimo septimo, & quadragesimo octauo.

Tertia denique ex his deducitur, *quia vado vobis parare locum*, nempe per passionem & crucem: Sic enim patiendō & moriendō parauit nobis locum in cœlo; licet enim *prædestinando parauerit mansiones*, tamen etiam *operando parat*, inquit sanctus Augustinus; Quæ consideratio certe plurimum potest in aduersis: nam si Christo sic patiendum fuit, ut mihi locum pararet, quanto id mihi satius, ne parato excidam loco? Vnde aptè Apostolus, *Per patientiam curramus ad propositum nobis certamen, aspicientes in Authorem fidei & Consummatorem Iesum, qui proposito sibi gaudio sustinuit crucem, confusione contempta, atque in dextera sedis Dei sedet. Recogitate enim eum qui talem sustinuit à peccatoribus aduersum semetipsum contradictionem, ut ne fatigemini animis vestris deficientes. Nondum enim vsque ad sanguinem restitistis, aduersus peccatum repugnantes. Nonne est ita?*

II. PUNCTVM.

SED illa ipsa tria motiua concurrunt in omni casu, ut te pariter smoueant ad sedandam animi perturbationem, vnde cumq; certam. Quid enim horum deesset? An quidquam potest tibi euenire sine Diuina Prouidentia? Responde. An verò illud, quod Deo permittente sic tibi accidit, aliud esse potest, quàm quod proficit cælo promerendo? quamuis vel peccatum esset, si inde profectum qui capi potest capias, proderit ad salutem; *diligentibus enim Deum omnia cooperantur in bonum*, inquit Apostolus. *NEQUE*, ut ait sanctus Hieronymus, *bonus Deus mala permetteret, nisi esset aequè omnipotens, ut ex his bona faceret.*

Rom. 8.

Denique nonne exemplum Christi æquè valet ad hunc particularem casum, atque ad alios? Quid tibi est in hac aduersitate tua, quod Christus non prauiderit, & quod si alteri euenisset, non idem atque tu contrà posset objicere? Quod si verò sic liberum esset omnibus suos quosque sensus particulares obtendere, quis tandem libens volens pateretur, & quis esset cui non diceret Deus, *An condemnabis me, ut te iustifices? Interrogabo te, & indica mihi, numquid irritum facies iudicium meum,*

Iob 40.

Quod Christus semel suis, hoc tibi semper, non turbetur, &c. 77

& condemnabis me ut tu iustificeris? Attende ad hoc, quidquid te in illo tuo casu contradicentem facit, & conturbat, mera est contradictio naturalis appetitus, quam nisi reprimas, foves ut iustam, quam si iustam putas, iniustum facis Deum: Deum accusas & condemnas. O qualis illa impietas!

III. PUNCTVM.

QUOD Christus igitur semel suis, hoc in omni semper casu tibi dicit, NON TURBETVR COR TVVM. Nam si valet in aliquo, valet in omni casu propter rationes allatas, quæ sic vniuersim concludunt non esse permittendam cordi perturbationem, ut in particulari quolibet casu sit ita concludendum. Aut si casus esset, in quo id negaretur, vix id affirmari posset de alio: vix ad vllam calamitatis speciem non turbaberis, si non ad omnem sis paratus, & nisi dicas cum Dauide, *quoniam ego in flagella paratus sum*. Quidquid contrà opponat appetitus in praxi, perinde rejiciendum existima, sicut si vniuersim persuadere vellet, nihil tibi omnino esse patiendum.

Vellésne nihil omnino pati in hac vita? Non auderes affirmare, quia tot testimoniis contrà conuincere, ut te puderet non id velle, quod volendum tam apertè videres. Cùm igitur natura corrupta non ausit vniuersim contra omnes aduersitates proclamare, fingit se habere tantum, quod isti particulari opponat; sed mera fictio est & deceptio. Sic enim, ut dixi, de vnaquaque singillatim dicet, quod non audet de omnibus, & sic numquam in praxi & actu vellet pati. Quamobrem audi Dominum, & tum tibi potissimum loquentem audi, cùm obloquitur appetitus; *Quid est quod loqueris fili? cessa conqueri, consideratâ meâ & aliorum sanctorum passione; Nondum vsque ad sanguinem restitisti: parum est quod tu pateris in comparatione eorum, qui tam multa passi sunt, tam fortiter tentati, tam grauitè tribulati, tam multipliciter probati & exercitati*. Vide reliqua, libro tertio de Imitatione Christi, capite decimo nono. Et quæ tota hebdomade, imo & tota quadragesima sequuntur Veritates huic conformes.

Ex prima vero parte huc transferri possunt hæ quatuor.

Non contristabit iustum quidquid ei acciderit.

78 FERIA 4. infra Hebd. Sexag. Ego sum via, Veritas, &c.

Die decima Ianuarij.

Non quia mala sunt, perturbamur in aduersis: sed quia perturbamur, aduersa mala sunt.

Dominica 4. post Epiphaniam.

Nisi probè paratus sis ad aduersa, nec ad ipsa prospera bene paratus es.

Feria sexta hebdomada quinta post Epiphaniam.

Quanto minùs murmuramus, aut omnino tacemus flagellati à Domino: tantò altiùs altissimum eius Dominium prædicamus.

Feria 2. hebd. 6. Vide in alijs, verbo *Aduersitas*.



FERIA QVARTA.
DE CHRISTO DOMINO
VT EST EXEMPLAR CONSTANTIAE
ET VIA VERA AD PERFECTIONEM.

Ego sum via, & veritas, & vita. Ioan. 14.

VERITAS PRACTICA.

Melius est in via claudicare, quàm præter viam fortiter ambulare.

Verba sunt sancti Augustini de Christo Domino expressè agentis, ut infra videbitur.

SENSVS autem verborum, & Veritatis propositæ hic est, quòd sicut melius est pederentim incedere per veram viam, quàm si aliâ viâ minùs certâ & verâ festines, quia sic tandem certius quòd téditur peruenitur: sic planè melius est, imperfecto quodammodo & lento gradu per Imitationem & Considerationem

Christi Domini ad perfectionem tendere, quàm si alio motiuo vtereris, quod sublimius & perfectius videretur. Quidquid enim aliud cogites, siue Dei præsentiam, seu Diuinas perfectiones, seu coelestem beatitudinem, seu rerum humanarum vanitatem, seu mortem instantem, seu particulare aut vniuersale iudicium, seu ipsam inferorum æternitatem, aut quoduis denique aliud quod crebro cogitatum mouere possit ad salutem & perfectionem consequendam; non ita promouebit, quàm vnus Christi Domini cogitatio; quia Ille videlicet vera est ad salutem & perfectionem Via, & aliter incedere dici potest quodammodo, præter viam ambulare.

Hoc itaque manet demonstrandum, quod quidquid est in vna via præ aliis, vt sit viatori aptissima, hoc est in vno Christo Domino præ omnibus mediis & motiuis ad perfectionem.

RATIO EST, quia quod est magis considerandum in via, viatori, ad hæc tria refertur, vt sit via certa, brevis, & facilis.

Sed hæc tria simul in Christo sic aptè reperiuntur, vt nullibi aptius.

Ergo vna via est aptissima, & medium magis opportunum ad perfectionem, in quo tenendo, Melius est claudicare, quam præter viam fortiter ambulare.

I. P V N C T V M.

QUOD Dominus Iesus sic pergeret in sermone suo, *Quò ego vado scitis, & viam scitis; dicit ei Thomas: Domine nescimus quo vadis, & quomodo possumus viam scire? Dicit ei Iesus: Ego sum via & veritas & vita, quæ quidem verba in vernacula Meditatione ad Constantiam in aduersis transtulimus, sed hic extendenda videntur vltèrius ad omnem virtutem seu ad ipsam perfectionem. Sicenim inter alios de his vniuersim & aptè S. Augustinus, Quà vis ire? Ego sum via. Quò vis ire? Ego sum veritas. Vbi vis permanere? Ego sum vita. Veritatem & vitam* De verbis Dom. ser. 4. *omnis homo capit, etiam Philosophi Deum esse vitam quandam & veritatem viderunt; viam non omnis inuenit. Verbum ergo Dei quod apud patrem est Veritas & Vita, assumendo hominem, factum est Via; ambula per hominem & peruenies ad Deum; Melius est in via clau-*

Serm 2^o
cinnio.

dicare, quam præter viam fortiter ambulare. Quod præclare item Sanctus Leo, *Melior est gradus lentior per iter rectum, quam velocitas festina per deuium.*

Apud
Maldon.

Sic igitur nobis proponendus est Christus Dominus vt Via, non modò per fidem ad salutem, sed per imitationem ad perfectionem: sicque intelligendus est ad perfectam vitam esse via, vt licet alia media considerari & vsurpari possint, Ille tamen via sit, & veritas, & vita, id est, vt communiter ex Hæbreo omnes interpretantur, Via vera & vitalis, quasi diceretur, Via vnica & præ omnibus feligenda. Nam cum tres præcipue spectentur notæ seu conditiones, quibus vna præ aliis via seligitur: si vno in Christo singulariter quadrent, profectò nihil restare potest dubij, quin sit aliis omnibus mediis præferendus.

Hæc sunt autem tria, quæ maximè Viatori considerantur, in viâ delectu. Primum, vt sit certa seu recta & tuta, ne si occurrant anfractus, dubitet & deuiet: nec à prædonibus sibi timeat. Secundum est vt sit brevis, ne itineris molestiâ fatigetur. Tertium denique vt sit plana & facilis, ne per abrupta montium, aut concaua vallium periclitetur.

Rom. 11.
in Euang.

Atque hæc quidem per se notissima: tantum hîc iuuerit meminisse nos, quamdiu viuimus, peregrinos esse & aduenas, atque vt ait sanctus Gregorius, *In præsentî vita quasi in via sumus, quâ ad patriam pergimus. Maligni autem spiritus iter nostrum quasi quidam latrunculi obsident.* Sanctus quoque Bernardus, *Quàm multi ex hoc, inquit, à recto tramite periculossimè aberrarunt, ignorantes astutias satanae.* Multæ videlicet se viæ ostendunt ad salutem & perfectionem, nec minùs nobis est timendum, quàm viatori, ne qua incerta aut periculosa teneatur. Hinc aptè Sapiens: *Via stulti recta in oculis eius: qui autem Sapiens est, audit consilia.* Itémque paulò post. *Est via qua videtur homini recta, & nouissima eius ducunt ad mortem.* Tene aliquando perspexisti, quâ tandem viâ incederes? *Deduc me Domine in via tua, & ingrediar in veritate tua.*

Prov. 12.
Ibid. 16.

Ps. 85.

II. PUNCTVM.

SED illa tres viæ conditiones in Christo sic aptè reperiuntur, vt nullibi aptius.

Primò

Primò quidem securitas & certitudo in eo maxime est posita, ut Deo grata sit & accepta illa praxis. Quid autem potest esse illi gratius, quàm ut de Verbo cogites, cuius vnus cogitationem habet? Quid gratius Deo Patri, quàm cogitare quod cogitat? quid acceptius Filio, quàm sic tecum habitare, cuius deliciae sunt esse cum filiis hominum? Quid Spiritui sancto iucundius, qui ut iam in prima parte visum est, idcirco missus est, ut Filium vbique notificet, & in mentibus nostris præcipuè clarificet? *Deus qui dixit de tenebris lucem splendescere, ipse illuxit in cordibus nostris ad illuminationem scientia claritatis Dei in facie Christi Iesu.* Feris 4. prime Heb. in Adu. 2. Cor. 4. Cant. 2. IPSE EST quem proposuit Pater omnibus; adeo ut nullus dubitare possit de eius acceptione. Ipse est *flos campi, & lilium conuallium*, quò omnes accedere tutò possint. Non sic porro in cæteris, quæ pendent à varia hominum conditione, & de quibus dicitur, *Non omnia omnibus expediunt, & non omni anima omne genus placet.* Eccl. 37.

Secundò breuitas viæ; iam pridem dictum est, *longum esse iter* Seneca. *per præcepta, breue per exempla*; si quod autem exemplum valet, maximè Christi Domini, qui quod fecit & passus est, in exemplum nostrum ordinauit, ut sequamur vestigia eius, non quòd illa ipsa quæ fecit faciamus, sed quæ in nostra vacatione sunt facienda, exemplo eius qui longè plura & grauiora fecit, exequamur; *Est enim verbum abbreviatum, & verbum consummans & abbrevians*, Id est, quidquid in aliis omnibus mediis & motiuis continetur, ipse ita comprehendit, ut audito solo nomine IESV aut CHRISTI, statim intellectus & voluntas moueantur ad credendum, & id omne efficiendum quod occurrit. *Liber est* Apoc. 5. *scriptus intus & foris*, quia quod docet exterius verbo & exemplo, hoc Ipse suo spiritu seu gratiâ promouet in animis nostris. Vnde si de quodam Sextio dixit, qui eum legit, *In quacumque positione mentis sum, cum lego sextium, libet omnes casus prouocare, libet exclamare, quid cessas fortuna! Congredere!* quanto magis de Christo, qui est *veritas & solutio omnis difficultatis*, ut ait quidam, contra omnia dubia intellectus, & qui est *vita* contra omnes repugnantias, & metus voluntatis. Legendus esset diuus Bernardus qui de hoc argumento suauiter æque ac potenter agit, locis notatis. Serm. 17. & 20. in Cantica.

Terriò deniq; facilitas viæ; quid facilius cogitatione Christi?

82 FERIA 4. infra Hebd. Sexag. Ego sum via & veritas, &c.

at sola eius cogitatio via & motiuū est ad quemlibet virtutis actū.
Num. 21. Serpēs est æneus tantū aspiciendus in cruce & sola cogitatione
 sibi representādus, vt serpentis æmuli ignita iacula extinguantur.
 Nec timeri potest imaginationis aut capitis læsio, sicut in aliis,
 cū sit aliquid corporeum quod facile concipi potest. Vidēsne
 quanta sit motio animorum, sacro die parasceues, quo Passio-
 nis & Mortis eius memoria recolitur? Quam facile omnes om-
 nia. Sic planē, quoties sic eum religiole ad mentem reuoca-
 res. *I. I. de Imit. Chr. c. 25.* *O si Iesus Crucifixus in cor nostrum veniret, quā cito & suf-
 ficienter docti essemus!* Et idcirco inter alias rationes Deus fa-
 ctus est homo, vt haberet homo quem facillē & securē posset se-
 qui; Vnde sanctus Augustinus; *Sequendus Deus erat qui videri
 non poterat, sequendus homo non erat qui videri poterat: Deus fa-
 ctus est homo quem sequeretur homo.* *VEREBUNTUR* filium meum,
 dicebat Pater æternus, quasi diceret: Habent certē quem verean-
 tur, & cuius respectu & consideratione moueantur. Nonne id
 ita? at verō, itāne moueris hoc exemplo? *Bene verecundari po-
 tes inspectā vitā Iesu Christi, quia nec dum magis illi te conformare
 studuisti.* *I. I. de Imit. Chr. c. 25.*

III. PUNCTVM.

QUID QUID est igitur in via præ aliis, vt sit viatori aptissi-
 ma, hoc est in vno Christo Domino præ omnibus mediis & mo-
 tiuis ad perfectionem: Ac proinde melius est in illa via claudica-
 re, quā præter illam fortiter ambulare, quia sic tandem cer-
 tius & felicius quod contendis, peruenies. Ad hoc vnum cogitan-
 dum pene alia omnia reducunt Apostoli: *Christo in carne passo, &
 vos eādē cogitatione armamini.* *RECOGITATE* eum, id est co-
 gitare non semel sed iterum, & quoties opuserit ad virtutem,
 reuocate tantū in mentem vestram, vestrum Christum Iesum.
Omnia in te vno habentes, te non debuimus dimittere à nobis, dice-
 bant de Tobia filio, parentes eius: quanto magis nos de Christo
 Domino. *O Veritas Deus, fac me vnum tecum in Charitate perpe-
 tua. Tadet me sape multa legere & audire, in te est totum quod volo
 & desidero. Taceant omnes doctores, sileant vniuersa creatura in
 conspectu tuo, tu mihi loquere solus.* Caput est nostrum; *Et sapien-
 tis oculi in capite eius, vt ait Sapiens.* *I. I. de Imit. Chr. c. 3.*
Eccles. 2.


Melius est in via claudicare, quàm præter viam, &c. 83

Denique, *crescamus in illo per omnia, qui est caput Christus, ex quo totum corpus compactum & connexum est.* *SICVT ergo accepistis Iesum Christum Dominum nostrum, in ipso ambulate radicati & superadificati in ipso, & confirmati in fide, sicut & didicistis, abundantes in illo in gratiarum actione.* *Ephes. 4.
Coloss. 2.*

Obserua quàm rectè simul duo hæc coniungantur, *radicati & superadificati*; Vnum enim sine alio mancum esset & deficiens. Nam quod est radicatum crescit quidem, sed facile euellitur. Quod est autem ædificatum non facile conuellitur, sed non crescit. At vbi duo hæc coniunguntur, & firmitas ædificij & incrementum radice, tum præclare sunt omnia. Quamobrem sic in Christo semper crescendum, vt firmiter hæreas; & sic hærendum firmiter, vt semper in illo crescas. Vide plura, verbo *Christus*, & hanc præcipue Veritatem.

Exemplo suo Christus nos magis vrget quàm Imperio.

In prima parte. Die 13. Ianuarij.



FERIA QVINTA.

DE CHARITATE SIMVL ET CONSTANTIA CONIUNGENDIS AD TOLE- RANTIAM ADVERSITATVM.

Sicut dilexit me pater, & ego dilexi vos: manete in dilectione mea. Ioan. 15.

VERITAS PRACTICA.

Sic Caritas & Constantia simul iunctæ constant, vt nisi sint simul iunctæ, non sibi consent.


RATIO EST, Quia Caritas & Constantia non sibi constant, si frangantur ab oppositis difficultatibus.

84 FERIA 5. infra Hebd. Sexagesima. Sicut dilexi me, &c.

Sed si non sint simul iunctæ, franguntur ab oppositis difficultatibus quas simul iunctæ frangerent.

Ergo sic Caritas & Constantia simul iunctæ constant, ut nisi sint simul iunctæ, non sibi consent: ac proinde simul iungendæ sunt nec umquam separandæ.

I. PUNCTVM.

 V M sermo ille Domini, qui hac hebdomade suscipitur conderandus, sit multò longior, quàm ut totus considerari possit, multaque ex eo veniant in Euangelia Dominicarum post Pascha, quæ tum commodius expenduntur: seligenda modò sunt aliqua, quæ iuxta præfixum hebdomadi finem, tolerantiam in aduersis corroborarent. Sunt autem illa præcipuè, quæ Christus Dominus de Caritate habet, quæ postquam in textu legeris; Vide quàm arctè simul Caritas & Constantia cohæreant, quàmque illa sit certa & necessaria Veritas quæ proponitur; *Quod sicut hæ duæ virtutes simul iunctæ fortiter constant in aduersis, ita nisi sint simul iunctæ, non omnino sibi consent.*

Ratio est facilis quoad illam primam partem quâ dicitur, Caritatem & Constantiam non constare sibi, si frangantur ab oppositis difficultatibus. Sicut enim constare sibi nihil aliud est quàm constanter resistere contrariis, & nulla eorum vi frangi: sic planè non constare hoc est, si non resistant, aut quantumcumque resistant, si frangantur. *Va dissolutis corde! Va his qui perdiderunt sustinentiam, & qui dereliquerunt vias rectas, & diuerterunt in vias prauas! Et quid facient cum inspicere caperit Dominus? quasi diceret, non erit quò fugiant, non erit quod excusent: & quia noluerunt resistere aduersantibus sibi, cum commodè possent & deberent pro salute animæ, tunc & si vellent, non commodè poterunt.*

II. PUNCTVM.

SED si Caritas & Constantia non sint simul iunctæ, franguntur ab oppositis difficultatibus, quas simul iunctæ frangerent.

Sicut enim Caritati in his quæ spectant ad Dei vel praximi

dilectionem, multæ occurrunt difficultates: sic Constantiæ suis in obiectis plurimæ obuersantur: & quemadmodum Caritas oppositis frangeretur difficultatibus, nisi constans esset, aut nisi constantiâ iuaretur; sic planè Constantia infrigetur, nisi Caritate roboretur. Hinc aptè Apostolus, primò dixit, *Caritas* 1. Cor. 13. *patiens est*, vt ostenderet Caritati opus esse constantiâ, tum verò post iunxit, *Caritas omnia suffert, omnia sustinet*; vt indicaret non minùs necessariam esse constantiæ Caritatem, quàm Caritati constantiam. Nec frustra repetit, *omnia suffert, omnia sustinet*: sic enim Apostolus duo illa significat, quæ in Propositione nostra continentur; primò quidem, quod Constantia deficeret sine Caritate, *qua omnia suffert*; deinde verò, quòd numquam deficiat, si caritati iungatur *qua omnia sustinet*. Quod postremum sic disertè confirmat S. Augustinus: *Nihil est tam durum atq; ferreū, quod non amoris igne vincatur*; quò enim se anima rapit in Deū, super omnem carnificinam libera & admiranda volitabit pennis pulcherri-
mis & integerrimis, quibus ad Dei complexum amor castus innititur. Nisi vero amatores auri, amatores laudis, amatores sceminarum, amatoribus suis Deus faciat esse fortiores, cum ille non amor, sed congruentius cupiditas vel libido nominetur. In qua tamen apparet quantus sit impetus animi, ad ea quæ diliguntur, indefesso cursu per immania quæque tendentis, argumentoque nobis est, quàm sint omnia perferenda, ne deseramus Deum, sit tanta illi, vt deserant, perferunt.

His conformiter Thomas à Kempis, *Magna*, inquit, *res est* L. 3. c. 5. *amor, magnum omnino bonum, quod solum leue facit omne onerosum, & fert aqualiter omne inaequale. Nam onus sine onere portat, & omne amarum dulce & sapidum efficit.* Vide quæ plura refert toto illo capite; aut si mauis, breue illud sancti Bernardi dictum reuolue: *Opus meum vix est vnius hora: & si plus, pra amore non sentio.* Itane tecum agitur? Hinc explora vtrum verè diligas Deum, an non. Sic enim vere est de Charitate: omne onus exonerat, tuque si aliter sentis, manifestè contradicis Veritati Caritatis, seu Caritati veritatis, de qua Apostolus, postquam de iis qui pereunt, egit: *Eo quod*, inquit, *Caritatem Veritatis non receperunt, vt salui fierent.* 2. Thess. 2. Quasi diceret, propter difficultates perierunt, quas si superassent salui fuissent; illas autem verè superassent, si veram Caritatem habuissent, quæ nihil reperit difficile quod non perrumpat.

III. PUNCTVM.

SIC ergo Caritas & Constantia simul iunctæ constant, ut nisi sint simul iunctæ, non sibi consent; Quia cum disiunctæ sunt, franguntur illis difficultatibus quas simul iunctæ fregissent. *Judith 4.* Si venis mecum, vadam; si nolueris venire mecum, non pergam. Sic Barac Israelitarum Dux dicebat Debboræ: sic nos Caritati, non verbo sed re ipsa iungamur necesse est, si fortiter & foeliciter dimicare volumus contra occurrentes difficultates. Alioquin vel pugnam detrectabimus, & cedemus turpiter: vel in conflictu periclitabimur, & damnosè cademus, sicut illi, *2. Mach. 11.* qui sine consilio & contra Charitatem exierunt in prælium, & inde fusi fugatique redierunt cum magna suorum iactura, ut est in primo libro Machabæorum. Longè alius fuit aliorum exitus, qui, ut ibidem dicitur, ex Charitate pugnautes, conualuerunt animis: non solum homines sed & bestias ferocissimas, & muros ferreos parati penetrare. Ibant igitur prompti, de cælo habentes Adiutorem, & miserantem super eos Dominum. Leonum autem more, impetu irruentes in hostes, prostrauerunt ex eis multa millia, quæ ibi recensentur distinctius.

2. Ioan. 4. O quanta vis Charitatis! ô quantum interest, bene vel malè cum ea conuenire! sicut enim Deus Charitas est, ita Deum unusquisque habet adiuuantem aut repugnantem, prout bene vel malè cum Charitate conuenit.

Vide in 3. parte, FERIA 2. hebdomadæ nonæ, ubi hæc proponitur Veritas: *Affectum probat effectus.*



FERIA SEXTA.

DE PRÆVIDENDIS

ADVERSITATIBVS.

Hæc locutus sum vobis, ut cum venerit hora eorum, reminiscamini quia ego dixi vobis. Ioan. 16.

VERITAS PRACTICA.

Quantum obest aduersitas improuisa, tantum prauisa prodest.

RATIO EST, Quia idcirco aduersitas improuisa obest, quòd cum afferat maiorem doloris sensum, minus tamen meritum causet.

Sed è contra sic prauisa prodest, vt cum minorem causet doloris sensum, maius tamen afferat meritum.

Ergo quantum obest aduersitas improuisa, tantum prauisa prodest; ac proinde solerter prauidenda.

I. PUNCTVM.

REPETENDA sunt ex superiori capite decimo-quinto Euangelij sancti Ioannis, quæ Dominus prædixit suis ventura mala: Sunt autem hæc inter alia: *si mundus vos edit, scitote quia me priorem vobis odio habuit. Si de mundo fuissetis, mundus quod suum erat, diligeret: quia verò de mundo non estis, sed ego elegi vos de mundo, propterea odit vos mundus. Mementote sermonis mei quem ego dixi vobis; non est seruus maior Domino suo, si me persecuti sunt & vos persequentur. Quæ & alia huiusmodi, ibidem commemorata, cur illis sic distinctè enarraret, rationem addit: hæc locutus sum vobis, vt cum venerit hora eorum, reminiscamini quia ego dixi vobis: quasi diceret, ne vos imparatos ista mala inuoluant, idcirco præmoneo. Multum enim interest ad malorum tolerantiam, si improuisa aut prauisa obuenant; Nam quantum obest aduersitas improuisa, tantum prauisa prodest.*

Hoc est modò expendendum, inuestigando primùm accuratè, vndenam aduersitas improuisa obsit, nempe ex hoc duplici capite, quod cum maiorem afferat doloris sensum, minus tamen meriti apud Deum causet. Nonne hoc est luctuosum & miserandum? Nam si saltem cum minori merito minus mali patereris, malum esset tolerandum: aut si cum grauiori malo meritum cresceret, solatium esset aliquod mali tolerati: sed simul

multum pati, & parum mereri, certe hoc est geminum auersitatis damnum deplorandum. Atque hoc vtrumque est damnum, quod secum infert aduersitas improuisa: Nam primò quidem de doloris sensu certum est, eo esse vehementiorem, quo nos minùs cogitantes adoritur, vnde multum repentino dolore sic deficiunt, vt propè tum enecentur.

Deinde verò cum animus ita dolet & angitur, vt suum vnum dolorem sentiat, suam vnam calamitatem cogitet & deploret, tam longè se retrahit ab eo statu, qui ad virtutem exercendam & meritum inde referendum requiritur, quàm se in moerorem & lamenta profundè abdit. Quod vtrumque damnum sic breuiter Eccl. 39. Sapiens complectitur, dum ait: *à tristitia festinat mors; & cooperit virtutem*, id est, ita obruit & opprimit hominem, vt vix vlla virtus in illa mortali tristitia exerceatur. Quale autem meritum sine virtute, cum quanta fuerit virtus, tale sit meritum?

II. PUNCTVM.

SED è contra sic aduersitas prauisa prodest, vt cum minorem causet doloris sensum, maius tamen affert meritum.

Nam primò quidem de minori doloris sensu, patet ipsa quotidiana experientià quod scripsit sanctus Gregorius; *Iacula prauisa minus feriunt, & nos tolerabilius mundi mala suscipimus, si contra hac per præscentia clypeum munimur.* Itémque fulius in moralibus ad hæc Scripturæ verba de equo, *procul odoratur bellum*, sic ad rem nostram, *Malum*, inquit, quod consilio præuenitur, decertanti contra se animo ex ratione subjicitur; quia tanto quisque minùs aduersitate vincitur, quanto contra illam præsciendo paratus inuenitur. Sape enim graue timoris pondus vsu lenigatur, sape mors ipsa, sicut inopinata perturbat, ita deliberatione præuenta latificat. Vnde & rectè de hoc equo subiungitur, *procul odoratur bellum*, ac si apertius dicatur, idcirco quodlibet certamen exsuperat, quia mentem certamini ante certamen parat: bellum quippe procul odorari est, aduersa quaque longe adhuc posita cogitando prænoscere, ne fortasse valeant improuisa superare. Hoc ipsum egregiè Seneca: *Nisi quid quid fieri potest pro futuro habeas, das in te vires rebus aduersis, quas infregit quisquis prior vidit. Precogitati mali mollis ictus venit: Sapiens assuescit futuris malis, & quæ alij diu patiando lenia faciunt,* vir

Rom. 35.
in Evang.

Iob. 39.
31. Mor. 16.

7. lib. de
Cons. ad
Mart. c. 9.

uir sapiens leuia facit diu cogitando.

Paratus sum & non turbatus, ait cum Dauide quisquis mala ps. 118.
præuidit, & liberando se à preturbatione animi, maiorem poenæ partem sustulit.

DEINDE verò, quod aliud est propositæ quæstionis caput, qui sic minus patitur, suum tamen inde meritum vehementer auget, quia libentius & constantius patitur; quod ad meriti virtutem & augmentum facit vel plurimum. Cum enim ad patientium sese præparauerit, sese obtulerit, & occasionem libens volensque expectarit, mirum quanto ardore ad illam accedat, dicatque cum sancto Andrea: *ô bona Crux diu desiderata, & iam concupiscenti animo præparata, securus & gaudens venio ad te.*

Adde, quod cum sit imperturbatus animo & sibi præsens, liberè potest cum gratiâ quosuis actus virtutum exercere, à quibus retardatur imparatus & perturbatus animus: *Nam non est* Ecclesi. 27.
sensus ubi est amaritudo.

Denique cum præuidendo aduersa, seseque ad ea muniendo, sibi nobiliora quæque motiua proposuerit, quale est Christi exemplum & prouidentia quæ sic nos regit, tum facile recordabitur & exequetur quod hic ab eo commendatur, *ut cum venerit hora eorum, reminiscamini.* Quod quidem vires non modò addit, sed & meritum eo auget amplius, quo memoria & amor Christi erit præsentior: Atque eo quidem erit præsentior, quo studiosius præuisa fuerit aduersitas, & animi præparatio diligentius abhibita. *Quia propter te mortificamur tota die, aestimati* Rom. 8.
sumus sicut oues occisionis: sed in his omnibus superamus propter eum qui dilexit nos. Certus sum enim quod neque mors. Nosti cætera, sed te ipsum in his nosce, quàm sis dissimilis. Et vide hanc in cæteris secundæ quadragesimalis hebdomadæ, Veritatem:

Quo quis est mitior, eo est generosior.

III. P V N C T V M.

QUANTVM ergo aduersitas improuisa obest, tantum præuisa prodest; Quia quod improuisa damnum infert, vt maioris poenæ minus sit meritum; hoc præuisa lucrum oppositum affert, vt minoris poenæ maius sit meritum. Non enim semper in

merito spectatur poenae grauitas, quando illa præcipue grauitas ex culpa, seu ex defectu Virtutis prouenit: neque etiam poenae leuitas quidquam de merito tollit, quando illa leuitas ex virtute & diligentia est comparata. Sic enim perfectiores quique minùs laborant in suis frangendis cupiditatibus, quàm imperfecti; neque minùs tamen merentur, imò eo magis, quo sunt perfectiores & quo perfectiori animo & ex motiuo nobiliori operantur. Hinc sanctus Ambrosius, *perfectorum est corona; non patiuntur angustias nisi imperfecti*. Quamobrem, vt idem luculentè monet;

1. 2. Po. 16.
& 30.

Præparandus est animus, exercenda mens, stabilienda ad constantiam, vt nullis perturbari animus possit terroribus, nullis frangi molestiis, nullis suppliciis cedere. FORTIS est viri non dissimulare, cum aliquid immineat, sed prætereundum & tamquam explorare de specula quadam mentis, & obuiare cogitatione prouidâ rebus futuris, ne fortè dicatur postea, ideo in ista incidi, quia non arbitrabar posse euenire.

Eccl. 1.

Sic Author Ecclesiastici toto pene secundo capite, ad hoc ipsum hortatus; *Præpara, inquit, animam tuam ad temptationem: deprime cor tuum & sustine: sustine sustentationes Dei*. Sic in suis

Eph. 6.

passim Apostolus Epistolis, sed in illa præcipue, vbi omnibus armis nos instruens: *Accipite, ait, armaturam Dei, vt possitis resistere*

Act. 2.

in die malo, & in omnibus perfecti stare. Sic eidem Apostolo, *Spiritus sanctus per omnes ciuitates protestabatur, dicens, quoniam vincula & tribulationes Ierosolymis ipsum manerent*. Et de nocte assi-

Ibid. 23

stens ei Dominus, ait, constans esto: sicut enim testificatus es de me in Ierusalem, sic te oportet & Romæ testificari. O quale motiuum constantiæ, sic præmoneri à Domino! sic pro Domino laborare!

At nonne tu sic toties præmoneris? Nonne sic laborandi pro Do-

2. Tim. 1.

mino se multæ offerunt causæ? Itane verò libenter & constanter

Eccl. 4.

laboras, sicut bonus miles Christi Iesu? Vide iterum in quo deficias: vbi, quando, & quomodo acriùs decertandum. Agonizandum pro anima, & vsque ad mortem certandum pro iustitia.

Qui supra mortem est, infra se videt omnia.

Vide FERIA 4. hebdomadæ 2. in quadragesima.

Nulla in aduersis conquerendi est ratio, aut nullus erit, &c. 91



S A B B A T O.

DE ORATIONE IN NOMINE SALVATORIS FACIENDA, AD PETENDVM SVBSIDIVM IN ADVERSIIS.

*Amen, Amen dico vobis, si quid petieritis Patrem
in nomine meo, dabit vobis. Vsque modo non
petistis quidquam in nomine meo, petite & ac-
cipietis, ut gaudium vestrum sit plenum. Ioan. 16.*

VERITAS PRACTICA.


Nulla in aduersis conquerendi est ratio, aut nulla erit
Conquerentis oratio.

RATIO EST, Quia nulla erit oratio, si non sit facta in nomine
Saluatoris.

Sed si sit ratio conquerendi in aduersis, non erit oratio conqueren-
tis facta in nomine Saluatoris.

Ergo aut nulla est in aduersis conquerendi ratio, aut nulla erit
Conquerentis oratio. Quod certè est ad comprimendas in ad-
uersis querelas opportunum.

I. P V N C T V M.

 V A M sit necessaria in aduersis oratio, tam clare patet,
quàm clarum est in aduersis necessarium esse subsidium
Dei, quod per orationem maximè impetratur. *Inuoca me Ps. 42.*
in die tribulationis.

92 *Sabbato infra Heb. Sexag. Usque modo non petistis, &c.*

Vt autem oratio sit Deo gratior, & nobis efficacior, hinc admonemur à Domino faciendam esse in eius Nomine, prout infra explicatur.

Tract. 101. in Ioan. At verò si sic fiat oratio in Nomine Domini, tunc planè cessandum est à querelis: Et modò agnoscendum, *Nullam prorsus esse in aduersis conquerendi rationem, aut nullam Conquerentis futuram orationem.*

Nulla est enim oratio, si non sit in nomine Saluatoris: id est, vt interpretatur sanctus Augustinus, si non sit ex ratione nostræ salutis. *Non enim sonum literarum, inquit, ac syllabarum, sed quod sonus ipse significat, & quod eo sono recte ac veraciter intelligitur, hoc accipiendus est dicere, cum dicit, IN NOMINE MEO.* Quasi diceret, cum hoc sanctum Iesu & Saluatoris Nomen ad integram salutis nostræ rationem & significationem exprimendam sit institutum; hinc fit vt quidquid petitur in hoc nomine, ad hanc salutis rationem spectare debeat, aut nihil alioquin ad nomen Saluatoris spectabit, sicque non erit oratio in eius nomine.

Ibid. Iam verò quòd nulla sit oratio, si non sit in nomine Saluatoris, seu ex ratione nostræ salutis, perinde verum est, ac cum dicitur, nihil quicquam aliter in oratione peti. Nam vnum & idem est nihil peti, & nullam esse petitionem siue orationem. Quod autem nihil petatur, nisi petatur in nomine Saluatoris, & nisi sit de ratione salutis, patet ex verbis Domini; *Usque modo non petistis quicquam: Quæ sic expressè declarat idem S. Augustinus; Quidquid aliud petitur, nihil petitur: Non quia nulla omnino res est, sed quia in tanta rei comparatione, quidquid aliud concupiscitur, nihil est.*

Vellēsne Deum non orare? vellesne orando nihil petere, nihil proficere, nihil referre? Usque modo non petisti quidquam, si non petisti in nomine Saluatoris.

II. PUNCTVM.

SED si esset ratio conquerendi in aduersis, non esset oratio Conquerentis facta in nomine Saluatoris.

Sibi enim contradiceret Conquerens in oratione sua, & in ratione conquerendi. Nam cum aduersa sint de ratione salutis, quoties oraret in nomine Saluatoris, toties aduersa peteret

prout Deus quem orat, cognosceret ipsi aduersa prodesse ad salutem. Quando vero in aduersis rationem conquerendi produceret, tūm vel negaret aduersa sibi prodesse ad salutem, vel tamenli prodesse, negaret se illa velle; quod est manifestè sibi contradicere, & Nomini Saluatoris non leuem inferre iniuriam, quasi non comprehenderet quidquid ad salutem nostram spectat, aut licet comprehendat, tu tamen negligas. *Et peribit nomen eius? Irritat aduersarius nomen tuum! V AE duplici corde, & labiis scelestis.* Hoc est videlicet duplex habere cor, & labia scelestas, cum aliud corde & aliud ore profiteris, aut cū illud ipsum quod orasti, negas te velle. *Purificate corda, duplices animo.*

*Pf. 73.
Ecclesi. 2.*

Iac. 4.

III. PUNCTVM.

NULLA est igitur in aduersis conquerendi ratio; aut nulla est conquerentis oratio: Nam vel oras in nomine Saluatoris, vel non oras. Si hoc secundū, nulla est oratio tua, quæ aliud præter salutem aut contra Dei voluntatem petit: si primum, nulla est in aduersis conquerendi ratio; quia non est ratio contra Diuinam Prouidentiam & contra rationem salutis; hæc est autem Domini voluntas, & hæc tuæ salutis ratio, vt aduersis exercearis. Quod ex eo vel maximè patet, quod post factam in Nomine Domini orationem quæ suum semper effectum obtinet, hæc aduersa remaneant. *Sufficit tibi gratia mea, nam virtus in infirmitate perficitur.* Si sic dictum Apostolo, qui ter rogauerat Dominum, vt à se tolleretur Angelum Satanae, à quo colophisabatur: an negabis tibi sufficere eandem gratiam tuis in inaduersis? an dolebis te habere, quod tu ipse orasti, si vniquam in nomine Saluatoris orasti? *Quid murmurauit homo viuens, vir pro peccatis suis? QVI impatientiam suam & improprium murmurationis contra Dominum protulerunt, exterminati sunt. OMNIA facite sine murmurationibus, & hesitationibus, vt sitis sine querela & simplices filij Dei.*

2. Cor. 12.

Thren. 3.

Iudith. 83

Phil. 2.

Huic affines sunt istæ Veritates, ex aliis petendæ locis.

Ne dicas te petere in Nomine Domini, aut ne dicas te nihil obtinere.

In hac 2. parte. Dominica 5. post Pascha.

94 *Sabbato infra Hebd. Sexag. Usque modo non, &c.*

Nemo paratior ad omnia Dei dona recipienda, quàm
qui ad nulla sibi danda, æquè paratus est.

In eadem parte, Sabbato seu Vigilia Pentecostes.

Nisi diligenter aduertas, quod petis à Deo iustiùs, hoc
est quod petis iniustiùs.

In 3. parte, Sabbato hebdomadæ septimæ.

Quò sæpe vchementiùs aliquid Deum oras, ore qui-
dem illi astas propiùs, sed corde distas longiùs.

In 3. parte, Feria 4. hebdomadæ decimæ quartæ.





DOMINICA QUINQVAGESIMÆ.

DE CÆCO ILLVMINATO A
CHRISTO DOMINO, POST COLLOQVIVM
DE SVÆ PASSIONE HABITVM
CVM DISCIPVLIS.

Domine ut videam. Luc. 18.

VERITAS PRACTICA.

Cæcutientibus in via perfectionis, lux perfecta Christus
patiens.

RATIO EST, *Quia cæcutientes in via perfectionis illi sunt,
qui ignorant, aut qui se scire dissimulant quid in triplici gra-
du vel statu perfectionis sit agendum.*

*Sed his ignavis lux tam perfecta Christus est patiens, ut inde
non modò illustrentur intellectu ad cognoscendum; sed etiam
accendantur affectu ad volendum.*

*Ergo cæcutientibus in via perfectionis, lux perfecta Christus pa-
tiens: ac proinde tam diligenter unicuique considerandus est,
quam vehementer velit non cæcutire, nec errare in via per-
fectionis.*

I. PUNCTVM.



ASSUMPSIT Iesus duodecim, & ait illis: Ecce ascendimus Ierosolymam, & consummabuntur omnia quæ scripta sunt per Prophetas de filio hominis: tradetur enim gentibus, & illudetur, & flagellabitur, & conspuetur: & postquam flagellauerint, occident eum: & tertiâ die resurget. Et ipsi nihil horum intellexerunt, & erat verbum istud absconditum ab eis, & non intelligebant quæ dicebantur.

Factum est autem, cum appropinquaret Iericho, cæcus quidam sedebat secus viam mendicans. Vide quæ plura narrantur de hoc cæco illuminato à Christo Domino. Tum expende quàm apte duo ista concurrant: Colloquium Christi de passione sua: & illuminatio Cæci sedentis in via. Sic enim apertè innuitur quod habet proposita veritas, *Cæcutientibus in via perfectionis, lux perfecta. Christus est patiens.* Quod certe est plurimâ consideratione dignissimum; nam de triplici statu hominum seu de triplici gradu viæ, quæ spectatur in progressu perfectionis hinc agitur; quandoquidem illi non aliter cæcutiunt in via perfectionis, quàm quod ignorant, aut se scire dissimulant quid sibi sit agendum in unoquoque gradu.

S. 25. 2. 2. Hic ergo primò quod sæpe alias audiui, ad mentem reuoca,
q. 24. 6. 9. ca, tres esse status hominum qui ad perfectionem tendant, nempe Inchoantium, Proficientium, & Perfectorum: seu quod eodem recidit, triplicem esse perfectionis viam ac vitam, nempe Purgatiuam, Illuminatiuam, & Vnitiuam.

Deinde verò accuratè considera, quòd status Incipientium seu Via Purgatiua in eo maxime sistat, vt graue peccati odium concipiatur, & ab eo sese purget integerrimè quisquis serio velit incipere. Status autem Proficientium seu Vita illuminatiua in eo sit, quòd proficiens virtutem sic æstimet, vt vnicum suum bonum quo ad summum bonum tendit, sitque totus in ea excolenda, de Virtute in Virtutem progrediendo per singulos vitæ actus. Status denique Perfectorum, seu Vita vnitiua id exigat, vt non modo spectetur quid ex necessitate, vel obligatione sit agendum; sed vltra voluntariè, libenter, vltro, & feruenter quid quid

quid perfectius & ex perfectiori motiuo fieri potest, fiat cumulatè & constanter vsque ad mortem. *Vt abundetis magis.*

1. Thess. 4.

Quibus ita perpenſis, iam illud facile est capere quod prima Propositione dicitur Cæcutientes in via perfectionis illos esse qui ignorant aut qui scire dissimulant, quid in vnoquoque viæ gradu sit agendum. Nesciunt videlicet aut minimè curant grauitatem peccati, sicut scire & curare oporteret Incipientes, & viam incedentes purgatiuam. Virtuti pretium non illud ponunt, quale agnoscunt ponendum Proficientes in via quam terunt illuminatiua. Nec debitum denique Perfectioni studium adhibent, aut quæ sit vita vnitiua non capiunt. Hoc est cæcutire, hoc est ignorare eâ cæcitate & ignorantia, quam Scripturæ passim arguunt in iis præcipuè qui se diuino cultui mancitant; *Quis cæcus nisi seruus meus? Quis cæcus nisi seruus Domini? Qui vides multa, nonne custodies? AVD I popule stulte qui non habes cor, qui habentes oculos non videtis; & aures, & non auditis. ET nescis quia tu es cæcus & nudus.* Hæc est tua fortè duplicata cæcitas, cæcum esse, & nescire, nec clamare, *Domine vt videam.*

Is. 42.

1er. 52.

Apor. 3.

II. PUNCTVM.

SED his ignaris lux tam perfecta Christus est patiens, ut inde non modo illustrentur intellectu ad cognoscendum, sed etiam accendantur affectu ad volendum.

Primò quidem pro vita purgatiua, de grauitate peccati, quid sit cogitandum nullibi melius discas, quam in Christo patiente. Ecce enim vel pro vno mortali peccato in rigore iustitiæ expiando, oportet vnicum Dei filium, tam indigna pati! *Propter scelus populi mei percussit eum.* Agnosce, inquit sanctus Bernardus, *quàm graua sint vulnera peccatorum, pro quibus necesse fuit Christum Dominum vulnerari!* Sed quod magis stupendum, licet extrema sint illa quæ passus est, longe se tamen magis pati queritur & deplorat ex vno solo peccato, quàm ex suis quantumcumque atrocibus poenis. Vide infra in die parasceues vbi hæc Veritas fusissime pertractatur, quæ in hæc modò pauca, sic posset contrahi. Certè cum in mortali corpore pateretur, libens volensque pro patris gloria & nostra salute patiebatur: at modò cum per peccatum offenditur, simul ab vno peccatore omnia

renouantur illi tormenta, quæ nullo modo potest velle. Simul proditur & negatur: simul conspuitur & alapis cæditur: simul accusatur & condemnatur: simul creaturæ comparatur & post-
I. de fuga ponitur, simul illuditur, crucifigitur, & moritur. *Sanè moritur*
seculi c. 2. *nobis, si à nostra anima separatur,* inquit sanctus Ambrosius, & rur-
Hebr. 6. sum Idem, ac sancti Augustinus & Bernardus, prout infra di-
 cto loco referuntur, conformiter his memorandis Apostoli ver-
 bis: *Rursum crucifigentes sibi in crucis Filiū Dei, & ostentui habentes.*

Atque hinc duplex ratio, cur de culpa magis doleat, quàm de poena: Primò quia culpa est offensa Dei, Deum autem qui offenditur magis amat Christus, quàm suum corpus quod lædatur. Deinde cùm læderetur in corpore, se tantùm lædi videbat vt hominem; *si enim cognouissent, numquam Dominum gloria crucifixerent:* at peccato sic læditur, prout iam à peccatore cognoscitur, nempe Deus & Dominus gloriæ, quem toties sic offendit, vt dictum est, quoties peccat. O quoties his præsertim diebus, & quàm dolendum!

SECVNDO, pro statu proficientium in virtute. Quid videbis in Christo patiente nisi virtutes? & vbinam illas apertius videbis, quàm in Christo patiente? Percurre stationes vniuersas, vbi dum pateretur, tantisper stetit, siue in horto, siue apud Pontifices, siue coram Pilato & Herode, siue in Columna & Prætorio, siue in Caluaria & in Cruce, sic vbique virtus relucet, vt nihil præter virtutem appareat. Nullæ illic diuitiæ, nullæ facultates, nulli fauores, nihil eorum planè quæ suis mundus offert, aut quæ cupiditas naturalis desiderat, sed omnia potius illis opposita, plagæ cruciatus, opprobria, in quibus constanter ferendis totus est, &
Ephes. 1. in eo totæ virtutes. *Hac est supereminens magnitudo virtutis eius: hac operatio potentia virtutis eius,* de qua sanctus Apostolus.

Reuolue etiam septem postrema eius Verba, & ex vnoquoque prominentem intuere Virtutem contra vnumquodque ex septem vitiis capitalibus. *Pater dimitte illis, nesciunt quid faciunt,* Mansuetudo est contra iram. *Hodie mecum eris in paradiso;* Charitas est contra inuidiam. *Ecce filius tuus: ecce mater tua:* Illustissima est Castitatis commendatio. *Deus meus, Deus meus, vt quid dereliquisti me?* admiranda prorsus Humilitas. *Sitio,* singularis Temperantia. *Consummatum est.* Perfecta diligetia quæ est acedia.

opposita. Habentur infra per totam hebdomadam de his Virtutibus Meditationes integræ: satis hic fuerit delibasse, ut videas quanta sit cæcitas mundi, qui pro vna vanitate aut voluptate Virtutes omnes prodigit: quantaque sit in Christo patiente, huius cæcitatis illuminatio, cum Christus omnia sua tradat pro vna Virtute exercenda & docenda. *Sicut sol lucet in virtute sua.* Apo. I.

TERTIO denique pro statu Perfectorum; expende quod non quilibet Virtutum actus à Domino patiente exerceantur, sed perfectiores, sublimiores, & longè plures, quàm ad nostram salutem viderentur esse necessarij, ut esset copiosa redemptio, & ut esset exemplar luculentissimum Virtutis non constringendæ intra fines & terminos strictæ cuiusdam obligationis, sed ultra & ulterius extendendæ, quantum se quidem offert Gratia: Nam alioquin, *declinantes in obligationes adducet Dominus cum operantibus iniquitatem.* Ps. 124.

Hoc est scilicet quod vehementius orabat Apostolus, *ut possitis comprehendere cum omnibus sanctis, quæ sit latitudo & longitudo, & sublimitas & profundum: scire etiam supereminentem scientiæ Charitatem Christi, ut impleamini in omnem plenitudinem Dei.* Ephes. 3.

LATITUDO virtutis Christi patientis est, omne genus virtutum. LONGITUDO est continuatus & numquam intermissus Virtutis actus. SVBLIMITAS est pura Charitas seu obedientia Charitatis. PROFVNDVM est stupenda illa exinanitio, quæ se velut peccatorem & tamquam omnium peccatorum reum exhibet pro peccatis immolandum. Possitne aliquid amplius ad perfectionis intelligentiam & amorem eius excitandum desiderari? *Quid est quod debuit ultra facere, & non fecit? Quid vero est quod tu debueris, & feceris?* 1s. 5.

III. PUNCTVM.

CAECVTIENTIBVS igitur in via perfectionis lux perfecta Christus est patiens, cum sic vnumquemque suo in statu illuminet & accendat, nullus ut iam ignorare possit quid sit sibi præstandum, nec dubitare quin illud omni modo præstare teneatur. Sic per Prophetam ipse Dominus olim prædixerat: *Ducam cecos in viam quam nesciunt, & in semitis quas ignorauerunt, ambulare faciam: ponam tenebras coram eis in lucem, & praua in recta:* 1s. 42.

100 *Dominica Quinquagesima. Contra impietatem Temporis.*

hæc verba feci eis, & non dereliqui eos. Sed pauendum quod sequitur: Conuersi sunt retrorsum. Neque plura his addantur, sed hæc serio cogita, tibi que toties retrorsum conuerso applica, & in
Ephes. 5. *viam lucis sic redi, ne retrò vniquam respicias. Vt filij lucis ambulate: fructus enim lucis est in omni bonitate & iustitia, & veritate, probantes quid sit beneplacitum Deo: & nolite communicare operibus infructuosis tenebrarum, magis autem arguite.*

Luc. 11.

Ioan. 9.

Quod si te satis illuminatum putas: Vide ne lumen quod in te est, tenebra sint: Et ne ex illis sis quibus aiebat Dominus: si cæci essetis, non haberetis peccatum. Nunc verò dicitis, quia videmus: peccatum vestrum manet. Id est, vt interpretatur sanctus Augustinus. Si vos agnosceretis ignorantes, & vos à me doceri velletis, non haberetis peccatum infidelitatis, tunc in me facile crederetis: sed cum vos satis doctos ex lege & Prophetis arbitremini, neque à me putetis esse docendos, idcirco peccatum vestræ infidelitatis manet, & perseuerat in vobis. Sic plane multis doctrina est occasio grauioris peccati; vel dum non faciunt quod sciunt; vel dum se satis scire putant, cum se tamen ignorent.

IN EADEM DOMINICA.

SIVE IN SEQUENTIBVS FERIIS:

CONTRA IMPIETATEM TEMPORIS.

Gladium euaginauerunt peccatores, intenderunt arcum suum. Pl. 36.

VERITAS PRACTICA.

Quibus armis impietas hoc tempore propugnatur, iisdem expugnatur.

VEL SIC

Quibus armis hoc tempore Pietas impugnatur, iisdem propugnatur.

RATIO EST, *Quia triplex armorum genus est quo pietas*

Quibus armis hoc tempore pietas impugnatur, iisdem, &c. 101
modo impugnatur : Nempe sic ferunt tempora : sic vniuersim
agit mundus : sic videntur exigere prope aduertantes esuriales
ferie.

Sed hoc ipso triplici armorum genere, Pietas propugnatur.

Ergo quibus armis hoc tempore Pietas impugnatur, iisdem propu-
gnatur. Quod certe est & plurima dignum consideratione,
& opportuna proxi perutile.

I. PUNCTVM.

SICVT nullum iustius est bellum quàm quo Supremus
Aliquis rebellantes coercet subditos, sic nulla est glo-
rior pugna & victoria, quàm quæ talem hostem, aut
quemuis alium suis expugnat armis. *Fac Domine, vt gladio pro-* *Iudith. 9*
prio eius superbia amputetur. Sic Iudith Deo qui Supremus est om-
nium Dominus quem Holofernes armis impetebat; sicque reue-
ra factum est, vt hic Dei hostis suo perierit gladio. Sic puer Da- *1. Reg. 17.*
uid in Domino, vel in Dauide puero Dominus famosum illum
Gygentem non alio confecit ense quàm proprio: Ac cum iste
puer, Rex factus est, & prælia Domini præliabatur, hoc vel ma-
xime precabatur, vt Dei hostes suis expugnarentur armis. *Gla. 25. 32*
Gladius, inquit, euaginauerunt peccatores : Gladius eorum intret in cor-
da ipsorum.

Hi nempe sunt conjurati contra Deum hostes qui peccatis
ipsum offendunt, tumque apertius gladium euaginant quando
liberius & impudentius peccant. Quemadmodum hoc solet fieri
tempore, quando rationes sui peccati propalant & ratione si-
mul ac peccatis cum Deo certant. Hic est videlicet euaginatus
peccatorum gladius: sed hic eorum gladius intret in corda ipso-
rum, id est, illo ipso armorum genere, aut illis ipsis rationibus
quas in Deum conspiciunt, deiciantur.

Certe posset Deus vel nullos habere hostes, vel statim vt insur-
gunt deprimere, quis hoc ignoret? posset peccatores quo ipso
peccant momento extirpare, proterere, & æternis addicere sup-
plicis? Quis contra obstitit? Sed quandoquidem illos tolerat,
quandoquidem se ab eis impugnari patitur, quandoquidem ipse

Is. 43.

cum illis pugnam inire non detrectat, nihil erat vel Deo gloriosius, vel peccatori utilius, quàm ut suis peccator armis & rationibus reninceretur: *Iudicemur simul. Narra si quid habes ut iustificeris.* O Bonitatem ineffabilem: & tamen prædicandam!

Hoc est quod modò agitur. Hæc est veritas quæ modo proponitur expendenda, siue ut magis innotescat peruersitas peccatoris, quæ tam perfractæ & impiæ rationes peccati sui audet obtendere; siue ut clarius appareat Diuina Bonitas, quæ eo usque se demittit ad impios, ut obtentas eorum rationes audire velit: siue ut denique facilius resipiscant, cum viderint se suis ipsos expugnari armis & rationibus.

Ps. 58.

Age ergo quid proponunt, quid effutiunt, quid præ se ferunt rationis, qua se in peccatum liberius efferri posse contendunt? *Ecce loquentur in ore suo, & gladius in labiis eorum:* Ecce quod loquuntur, ecce quo gladium exacuunt & inferunt: **N E M P E** sic obtinuerunt tempora, sic Mundus agit vniuersus, sic videntur exigere quæ propediem expectantur, grauiora ieiunia.

Ps. 56.

Job 1.

Hoc est scilicet triplex armorum genus quo impietas pietatem impetit; *Dentes eorum arma & sagitta, & lingua eorum gladius acutus;* Triplex acies quam Dæmon modo intruit. Sicut olim tres Chaldæorum turmas contra Iobum, ut in Deum ipse acrius & vehementius pugnet. Hoc omne tempus est in tres suas diuisum differentias, quo se peccator tueri vellet suo in peccato. Præteritum nempe profert cum ait sic obtinuerunt tempora: Præsens producit, cum sic mundus agere dicitur vniuersus: ac denique Futurum aduocat cum futuri ieiunij grauitatem causatur.

Iud. 3.

Ps. 27.

Ps. 105.

Hæ sunt adinuentiones peruersitatis humanæ, de quibus Scripturæ passim vniuersæ. *Non dimiserunt adinuentiones suas & viam durissimam per quam ambulare consueuerunt. DA illis secundum opera eorum & secundum nequitiam adinuentionum ipsorum. ET irritauerunt eum in adinuentionibus suis, & multiplicata est in eis ruina.*

Ps. 93.

Ingemisce ad hæc: & suspira cum Dauide: *usquequò peccatores Domine, usquequò peccatores gloriabuntur? Esabuntur, & loquentur iniquitatem, loquentur omnes qui operantur iniustitiam; nisi videlicet comprimatur, nisi obstruatur, nisi contradicatur.*

II. P V N C T V M.

SED hoc ipso triplici armorum genere Pietas propugnatur: his ipsis armis expugnatur impietas: his ipsis rationibus peccato potius resistendum est quam cedendum.

Primo quidem ostendetur nullam esse in fauorem peccati, rationem propositam: Deinde vero perpendetur, inde potius concludi Pietatem hoc tempore magis esse colendam.

Quod itaque primum emittitur, *quia sic obtinuerunt tempora*, verum id quidem, ratione facti ut dicitur, sed falsum, ratione iuris. Neque enim ius vllum vlli vmquam tempori fuit, ut peccatum non esset malum, non esset vetitum, non esset puniendum, de hoc enim nunc agimus, de hoc decertamus; dantur quidem à Sapiente, sua cuique rei tempora; *Suis*, inquit, *spatiis transeunt* Eccl. 3: *uniuersa*, *Tempus ridendi*, *tempus flendi*, Perge cum illo quantum velis, nullum ibi reperies tempus peccandi. Hoc vnum Scriptura excipit; *Nemini dedit spatium peccandi*. **DISCANT** *timere me* Eccl. 5: *omni tempore*. **CAVE** *ne aliquando peccato cōsentias*. **NON** *amuletur* Deut. 4: *cor tuum peccatores*, *sed in timore Domini esto tota die*. Quid clari- Tob. 4: *us aut apertius?* An putas contra Deum posse præscribi? An putas contra diuina, posse præualere humana? Vbi hæ voces, *numquam* aut *semper*, diuinitus enuntiantur: nihil humanitus contra pronuntiati potest. Prou. 23:

Sunt affirmatiua quædam præcepta quæ non semper hoc sensu obligant, ut non quouis ea tempore & momento sint seruanda, quia sunt suis astricta tēporibus; sed quæ dicuntur *negatiua* sic omni sunt tempore obseruanda, ut nullum prorsus sit tempus quo non debeant obseruari. *Fornicatio*, *immunditia*, *impudicitia*, *luxuria*, *ebrietates*, *commessationes*, & his similia quæ prædico Gal. 5: *vobis*, sicut prædixi, quoniam qui talia agunt, regnum Dei non consequentur. **HOC** scitote intelligentes quod omnis fornicator aut im- Ephes. 5: *mundus non habet hereditatem in regno Christi & Dei*. Nemo vos seducat inanibus verbis, fingendo videlicet tempus quo hæc minus vetentur.

Sicut enim nullo licet loco peccare: sic neque vlllo tempore: sicut Deus vbique est qui peccatū spectet & puniat; sic ille semper sanctus, qui semper peccatum oderit & infectetur. *Deus enim il-* Iudith 16:

lorum odit iniquitatem.

Neque ab illa umquam ullus hominum dispensare quemquam potest, cum & ipse Deus non possit. Quæ quidem impotentia non est defectus potentia, sed potius summa Dei perfectio ut qui tam sanctus & tam sanctè perfectus sit, ut non modo non possit peccare, sed nec peccato consentire. Nullum est enim peccatum quod non sit inordinatio, nulla inordinatio quæ non sit contra vel præter legem Dei, nihil porro præter Dei legem potest probare Deus, cum ipse sibi contradiceret; & qui malum vetaret, malum approbaret, mali esset author & iudex, *quo sacrilegio*, inquit sanctus Augustinus, *nihil detestabilius mihi occurrit.*

L. 1. de ordine.

Indib. 7.

1. Reg. 13.

Exodi 32.

1. Reg. 13.

Is. 3.

Putabant Bethulitæ post quinque servatos obsidionis dies: Saul post septem quibus expectavit Samuelem: Israelitæ post quadraginta quibus Moses ab illis abfuit; putabant inquam illi, solutos se ea lege post elapsum tempus quo se illa teneri credebant, sed male illis cessit. *Stulte egisti, nec custodisti mandatum Dei tui, nequâquam regnum tuum ultra consurget*, ait Sauli Samuel. Vellesne de his peccatis numquam confiteri, numquam poenitere, numquam ne in morte quidè meminisse? Nolles profecto, ne in peccato moreris, unde apparet quàm sit ficta & simulata ratio quæ à tempore petitur, & quam vere à Propheta dictum, *agnitio vultus eorum respondit eis*. Ex ipso vultu apparet quàm aliter sentiant ac loquantur.

SED quia tamen ita prævalent tempora ut hoc sibi assumant quod non possunt. Esto sane ut dicunt impij, hoc est præsumptum tempus peccandi; sic fingitur; sic euulgatur; sic persuadetur: An idcirco nil timendum? an laxiores propterea sunt habenæ soluendæ cupiditati? o quam longe erras qui hoc putes? Numquam magis sibi timendum quàm modò; numquam maior adhibenda est sui custodia quam hoc periculoso tempore. Nam quò tempus est liberius, & proclivius ad peccatum inducendum, eò certe præsentius & euidentius est peccandi periculum: at quo euidentius apparet tale periculum, nonne oportet esse cautiorem & magis sollicitum ad illud evitandum? Nonne qui se manifeste exponit peccandi periculo, peccat: iuxta illud Sapientis, *qui amat periculum in illo peribit*? at nonne est se exponere periculo, se exponere periculoso tempori sine ullo metu, sine vlla cautione & tutela?

Ecclesi. 3.

tutela? sicut tempore pestis aut belli qui se temere morbo vel hostibus ingereret sine vlllo præsidio, sine vllis armis, merito censeretur inconsultus & temerarius. Sic planè modo qui viuit sine metu, sine cautela, sine attentiore sui custodia, temeritatis aut negligentia notam & pœnas non effugiet.

Periclitamur quidem omni tempore, semperque versamur inter hostes quibuscum nobis tam assidua est concertatio, vt vita ipsa dicatur militia & tentatio super terram. Sed tamen certa sunt quædam tempora quibus hostes sunt actiores, & militia sauior, vnde & oportet esse magis instructum & paratum ab omnibus, prout crebro nos mouent Scripturæ: *Fili conserua tempus, & deuota à malo.* *SAPIENS in omnibus metuet, & in die* *bus delictorum attendet.* Expende Verba. Sic & noster Apostolus. *Accipite armaturam Dei vt possitis resistere in die malo.* Quid est, *die malo* nisi periculoso, nisi proclui ad peccandum, quale tu ipse agnoscis esse hoc tempus: Tunc accipienda est armatura Dei, tunc induenda est armatura robustior; sic enim ille bis reperit; tanti refert hoc præceptum; sic galeam salutis vult assumi, loricam fidei, scutum & gladium spiritualem quo possimus stare incolumes & infracti, tantis obfessi periculis.

Alioquin certe quod monuerat Sapiens, *sicut pisces hamo capiuntur, & aues laqueo: sic homines in tempore malo.* *INVOCAVI Dominum, aiebat Ecclesiasticus, exaudita est oratio mea, liberasti me de perditione, & eripuisti me de tempore iniquo.* Quasi diceret, hoc inter accepta numero beneficia tamquam singulare & eximium, quod me iniqui temporis periculo liberauerit Dominus; & vnicuique sum author vt tum fideliter ipsum oret, quia protectio diuina quærenda est, & oratione quærenda est.

Sic plane docent omnes Doctores, tam necessariam in quouis periculo esse orationem, vt qui tum minime oret, non minime peccet, quia medium est diuinitus ordinatum ad promerendum illud auxilium quod est tali periculo magis opportunum. Ac propterea videtis hoc tempore publicas indici preces, quibus indulta quæ vocant plenaria, conjunguntur, vt sic pfouocemur ad remedium periculi comparandum.

Certe quando nulla esset alia causa non omittendæ pietatis, quàm participatio bonorum spiritualium quæ abundantius modo conferuntur, non esset negligenda occasio, sed cum oratio-

nis & Sacrae Communionis proposita sit illa causa quæ à periculo temporis petitur, non potest omitti talis Communio nisi remedium periculi omittatur. Extremis malis extrema sunt adhibenda remedia. Extremum malum est peccare impudenter, sicut peccatur hoc tempore. Extremum vero siue summum remedium, Sacra est Communio: tum quia sic est institutum hoc Sacramentum, *ut à peccatis mortalibus præseruemur*, sicut expresse habet Concilium Tridentium: tum quia sic est ab Ecclesia particulatim his diebus proposita eius Communio, ut per eam singulariter hoc tempore protegamur à peccati periculis. Vnde illud est valde considerandum, quod tamen si Sacra Mensa non haberet ex se ut nos semper præseruaret à peccatis, haberet illud tamen hoc tempore, quia sic ab Ecclesia proponitur, cuius intentione & fine quidquid operamur, sortitur efficacius suum effectum.

Quamobrem ut concludamus hanc primam partem, aperte patet tantum abesse ut ratione temporis solutiores simus in peccatum, quin potius ipsa conclamante Ecclesia, quæ tamquam Christi vox audiri debet, hoc vel maxime tempore pietati vacemus, pericula caueamus, remedia conquiramus, & quantum *saluti prospectum volumus, tantum Timori Altissimi demus locum.*

SECUNDVM quod obiciebatur pro solutiore & liberiore vita, *Mundus est vniversus sic viuens.* Validum sane ac potens motiuum quam se cumque in partem dedat Mundus! quis enim non audeat agere quod tam multi faciunt? Imo quis audeat non agere quod pene omnes agunt? Et certe fateor cum sancto Augustino multos inde sua in improbitate roborari hoc tempore: sic enim ille scribit, *Sic uiintueri vacat quæ faciant, quæue patiantur: inueniet tam indecora honestis, tam indigna liberis, tam dissonantia sanis, ut nemo dubitaturus fuerit, furere eos si cum paucioribus furerent; Sanitatis patrociniū est insanientium turba.* Non quod reuera sit legitimum insanix patrociniū, sed quod se illo tueantur insani, ut à sua se insanix quoquo modo tutos præstent.

At vero ut manifeste videant, nullum esse in peccatis tale Mundi patrociniū, dicant ipsi, an putent mendacium, iuramentum, detractionem, & similia quædam peccata, minus esse reipsa & coram Deo peccata, quia vulgaria sunt & communia

Mundo pene vniuerso?

An tu minus mentiris, aut mentiendo minus peccas, quia sic omnes vendendo vel emendo mentiuntur? An auaritiæ, fornicationis, aut gulæ vitium minus est vitium, quia multorum est & pene omnium? An tu putas ex numero vel qualitate peccantium detrahi aliquid ex peccati malitia, vel peccatoris poena? Num legisti quod ait Sapiens: *Non subtrahet personam cuiusquam Deus, nec verebitur magnitudinem cuiusquam, quoniam pusillum & magnum ipse fecit?* *VNUM QVEM QVE*, inquit, *iuxta vias suas indicabo. VNVS QVIS QVE nostrum pro se rationem reddet Deo.* *VNVS QVIS QVE onus suum portabit.* Referet unusquisque propria corporis prout gessit siue bonum, siue malum. *NE accipias personam ut delinquas.* Quorum Scripturæ Verborum hic vnus sensus est, ne putes alienis peccatis tua excusari.

NVLLA est itaque ratio cur hoc tempore liberius pecces quia sic libere Mundus peccat, imo est ratio cur non pecces, quia sic mundus peccat. Hæc est enim lata via perditionis quam multi terunt, & quo plures in ea sunt, tanto magis via dignoscitur & tantò magis fugienda designatur. Deinde, quo plures sunt qui simul peccant, peccatum sæpe augetur, maiori perpetratur audacia, mutuam sibi communicant omnes malitiam, ex singulorum peccato fit vnum quoddam grauius quo magis irritatur Deus ad poenas inferendas. Sic ipse ad Prophetam: *Iniquitas domus Israel & Iuda, magna est nimis valde, & repleta est terra sanguinibus, id est peccatis, & ciuitas repleta est auersione: dixerunt enim, Id est, quali dixissent, dereliquit Dominus terram & Dominus non videt. Igitur & meus non parcet oculus neque miserebor: viam eorum super caput eorum reddam.* Vnde & Sapiens: *Non semines mala in sulcis iniustitiæ, & non metes ea in septuplum.*

Denique tum potissimum suos probat Deus, cum inter multos peccantes, se à peccatis continent; cum inter Sodomitas Lottus est castus: Inter profanos Iob religiosus: Inter idololatrias fidelis Tobias senior: Inter murmurantes temperatus Caleb & Iosue: vnde cum aliquando Ierosolymis pene omnes effusus in peccata ruerent, missus est Vir, qui transiret per mediam ciuitatem & signaret Tau super frontes virorum gementium & dolentium, super euntis abominationibus quæ fiebant in medio eius. Hoc est scilicet se probare fidelem seruum, tum seruire magis Deo quando

minus ab aliis colitur.

2. Reg. 16. *Hæc est gratia tua ad amicū tuum, dicebat Absalon Chusai quem putabat deferuisse partes patris sui Davidis tūm exulantis: Quali diceret, Itane te fidelem probas, vt in aduersis amicum deferas? Hæc est gratia quam reddis amicitia, quam reddis Amici meritis? Quid responderes Christo sic conquerenti?*

R E D I T V R V M te scilicet cum illo in amicitiam, ad proxime sequentes ferias quæ ieiuniis & poenitentia consecrantur. Nunc vero quia molestiores instant illi dies, diluenda est liberiori gaudio molestia, & lautius excipienda sunt ieiuniorum tempora. Hoc est nempe postremum quod obijciunt & quod suis peccatis obtendunt qui hoc tempore liberiores sunt in peccando.

Sed nihil poterat dici absurdius, nihil iniquius, nihil magis alienum à lege.

Primo enim quid absurdius quàm se liberius illi vitio mancipare cuius oppositam velis exercere virtutem? quid absurdius quam idcirco superbum esse quia velis esse humilis: idcirco iracundum quia te ad mansuetudinem paras; idcirco intemperantem vt sis postea sobrius? *Non est per temulentiam aditus ad ieiunium*, inquit sanctus Basilius, *nec ad iustitiam iter per fraudem, nec ad sobrietatem per lasciniam, nec per malitiam ad Virtutem.*

Deinde quid iniquius & magis impium quàm idcirco audacius Deum offendere quia tempus instat expiandarum offensionum, quasi præterita non sufficerent, quasi per impudentiam aut infirmitatem peccauisse parum esset, nisi ex mera malitia certoque studio peccata peccatis cumularem? *Non est iste sermo qui misericordiam prouocet, sed potius qui iram excitet.*

Denique quid magis alienum & à lege & à fine instituti ieiunij, quàm se vltro peccatis implicare; quæ meliorem ieiunij partem exhauriunt, & vim bonorum operum elidunt potentiores.

1f. 58. *Numquid tale est ieiunium quod clegi, dicit Dominus.*

O quam diuersa sentiunt de ieiunio Deus & peccator! Deus ait non placet mihi ieiunium in peccato: Peccator verò, non placet mihi ieiunium nisi in peccato. Deus ait, relinquendum peccatum vt ieiunes; Ego vero, inquit peccator, idcirco peccabo vt ieiunem. Deus ait, nō aspiciam illud ieiunium quod peccato infectum est;

Peccator contra, non suscipiam aliud ieiunium nisi quod peccato sit infectum. Possentne contradictoria dici magis opposita? Possentne vero excusari apud Deum quæ sic Deo contradicunt? Nonne hæc verior à proximis ieiuniorum feriis peti debet conclusio: En instat tempus acceptabile quo, si recte affecti sumus, magna nobis comparandæ salutis subministrantur media: sic nos igitur recte affectos esse conuenit: sic nos igitur his peruersis diebus cauere decet ne peruertamur. Sic nobis igitur præcipuo cultu pietati vacandum est: Sic apte Sapiens: *Qui timent Domini, Ecclesi. 2. num, inquirent quæ beneplacita sunt ei, & qui diligunt eum, replebuntur lege illius. Qui timent Dominum præparabunt corda sua, & in conspectu illius sanctificabunt animas suas.* Itemque paulo post: *Sapiens cor & intelligibile abstinebit se à peccatis, & in operibus iustitia successus habebit.* *Vid. 3.*

III. PUNCTVM.

QUIBVS ergo armis hoc tempore pietas expugnatur, iisdem propugnatur; Et quibus rationibus Impij sibi persuadent liberiores peccandi licentiam, iisdem non modo dissuadentur, sed contra potius conuincuntur & urgentur, vt majori cautione adhibita refrænent illam suam libertatem quæ vel à Tempore, vel à Mundo, vel ab instantibus Ieiuniis emendicatur. Nam si quid inderectum, si quid sanum, si quid rationabile deduci potest, totum pietati fauet & militat. *De ore tuo te iudico, serue ne- Luc. 19. quam,* Non est autem genus iudicij ad condemnationem potentius, *Ex verbis tuis condemnaberis.* Vnde & Daniel cum adhuc *Matth. 23. esset puer sic Susannam falso accusatam liberauit, cum ex vtriusque Accusatoris responso conuicit ipsum mendacij, Recte menti- Dan. 13. tus est in caput tuum.* Statimque populus in duos illos Iudices qui se falsos præbauerat accusatores, insurrexit & lapidibus obruit: *Conuicerat enim eos Daniel ex ore suo falsum dixisse testimonium.* Quasi diceret Scriptura, non est mirum quod de illis tam subita sint poenæ sumptæ, nam nihil restat dubij quando quis ex ore proprio conuictus est. *Sic stultus ceditur labijs.* *SIC qui mittit in Prou. 10. altum lapidem, super caput eius cadet. Ecclesi. 27. Id est, qui contra coelum, contra Veritatem, contra pietatem ratione pugnare voluerit, sua secum ratione pugnat.*

Prov. 26. Atque hinc duo illa Sacra Prouerbia, quæ videntur sibi oppositi, facillime conciliantur, *Ne respondeas stulto iuxta stultitiam suam, ne efficiaris ei similis. Responde stulto iuxta stultitiam suam ne sibi sapiens esse videatur.* Non est ita quippe respondendum quasi assentiaris & adhæreas eius dictis: Sed ita potius respondendum, ut & ipse suis reuincatur sermonibus, & ad sanio rem mentem reuocetur.

Hoc est autem quod ad praxim his diebus nobis proponitur: *Ne respondeas stulto iuxta stultitiam suam;* Caue assentiaris, caue putes aliquid culpæ quantumcumque leuicularis, magis licere hoc tempore, quam quouis alio. *Responde stulto iuxta stultitiam suam:* quidquid audieris quo in sua sibi libertate blandiri videatur impius, tu ne finas impune verbum labi, *cadatur labiis suis stultus,* suo iudicetur ore, suo perimatur gladio, suo ipse dicto reuincatur impietatis & stultitiæ. Non est silentium ubi silentio roboratur impietas: roboratur autem silentio, quando adumbratis in sui patrocinium rationibus nemo contradicit. Non est Christiani, non est tolerare incorreptam blasphemiam. Blasphemum vero est, Rationem peccato conjugere. Iniuria est non modo rationis Diuinæ, quasi erret vetando malum, sed & rationis humanæ, quasi peccato patrocinetur. Si ratio esset peccati, iam non esset peccatum, aut esse ratio desineret. Tanta est vtriusque naturalis pugnantia, ut vno posito destruat alium necesse est. Nihil gloriosius peccato posset accidere, quàm ut rationi jungeretur: Nihil ignominiosius Rationi posset contingere, quam si cum peccato conueniret. *Nec ratio, nec prudentia erunt apud inferos quo tu properas,* dicebat Sapiens: essent vero, ibi essent, & ratio & prudentia, si hic esset aliqua peccandi ratio. Cum enim omne prorsus peccatum illic puniatur, ratio esset cur non puniretur, quia ratio fuerat cur peccaretur. Ac proinde, ô impietatem, ô blasphemiam inauditam proinde sequeretur, iniquum fuisse Dei iudicium, iniuste damnatos esse peccatores, iniquum & iniustum Deum qui æterna puniat poena quod cum ratione & æquitate factum est; sequeretur reuocandam esse sententiam, appellandum in jus ipsum supremum ludicem, & vno verbo nullas fore peccatorum poenas, quia nullus peccator est qui rationem peccato suo non adumbrat.

Hoc fateatur necesse est qui se profitetur peccato suo rationem adiungere. Tanta vero hæc est blasphemia, ut ne ipsi damnati quorum est blasphemare vita, ne quidem ausint in hanc erumpere: sed quidquid gravius de pœnis gemant & exposculent, fatentur tamen omnes & profitentur, *se in malignitate sua* ^{Sap. 5.} *esse consumptos.* Id est, se sua dignos pœna, nullam sibi esse rationem contra Deum, rationem esse suæ pœnæ quia nulla fuit ratio suæ culpæ.

Eant nunc impij quò sua feruntur libidine, suas in concupiscentias toti deuoluantur, si ratione & pietatē non possunt retrahi, liberum illis quidem est qua libertate possunt peccare: Sed ne dicant sibi esse liberum qua libertate numquam licet peccare. Ne Christiani hoc tolerant quod ne profani probarent. Non est satis modò, non est Christi seruo satis, non peccare liberius; sed ne quis audeat, toto debet annisu contendere, tota debet contentione prohibere. *Nolite communicare operibus infructuosis tenebrarum, magis autem redarguite.* ^{Ephes. 5.} Quasi diceret, non tantum non est idem committendum quod illi Tenebriones audent, sed ne audeant est annitendum. Quod si vero impedire facta non possis, at saltem quod tu potes, eorum dicta potenter argue. Si ne peccent impediri non possunt, impediuntur peccando blasphemare, impediuntur dicere sibi modo id esse licitum. Contra clametur, contra contendatur; ne si forte tu silueris, ille tuo silentio se innocentem putet, & tu illius culpæ sis reus.

ADIUVGENDA PRÆCEDENTI
VERITAS PRACTICA: VEL SEORSIM,
HIS DIEBUS PROPONENDA.

Nihil umquam Christiana Religio passa est gravius
quàm quod à Christianis modò patitur.

RATIO EST, *Quia nihil est gravius quod passa sit Religio
Christiana, quam quod magis vergebat ad animarum interitū.
Sed nihil umquam passa est quod magis vergeret ad animarum
interitum, quam quod modo patitur.*

Ergo & nihil umquam passa est grauius. Ac proinde merito indicuntur preces publicæ tamquam in publica calamitate ad diuinum subsidium postulandum, siue vniuersim, siue particulatim.

IN P V N C T V M.



AD primam propositionem, cum sint varia & prope innumera persecutionum genera, quæ Christiana Religio pene semper sustinuit, tum vero triplex est magis generale & commune ad quod cætera omnia referuntur. Primum est cum ei restitit Mundus ne reciperetur, ne crederetur, ne prædicaretur. *Præcipiendo præcepimus vobis ne doceretis in Nomine isto.* Hoc primum quod est Religioni oppositum, Ne diuulgetur, ne dilatetur.

Act. 5.

Secundum est grauius, cum non modo non permittitur Religio dilatari, sed eius etiam prohibetur professio, minæ intendantur omnibus Christianis, bonorum publicatio, catenæ, carceres, exilia, verbera, scorpiones, equulei, catastæ, plûbata, rotæ, quidquid demum ad terrorem & cruciatum corporis excogitari possit, totum hoc per multos annos, per vniuersum terrarum orbem, per potentissimos quosque Principes impenditur: & esse Christianum nihil est aliud quam esse vicinam propediem immolandam. *Venit hora, vt omnis qui interficit vos, arbitretur obsequium se prestare Deo.* Grauis fane vexatio.

Ioan. 16.

Sed grauior tamen in tertio quodam genere quo non corpora sed animæ sempiterno morituræ interitu petebantur. Cum enim viderent Imperatores infensissimi religionis hostes adeo non cedere tormentis Christianos vt potius roborarentur in dies: nec religionem inde minus sed magis crescere, hoc excogitarunt ad religionis perniciem, vt promissis, & blanditijs, pecunia & voluptatibus, gloria & propositis magistratibus, Christianorû animos demulcerent. Sic de Iuliano apostata singulariter, *Commenrator librorum sancti Augustini de Ciuitate Dei*, non tam ferro inquit & armis agebant quam blanditijs & dolis. Quo in persecutionis genere tria inerant supra quoduis aliud grauissima:

Niceph. l. 10. c. 4.

L. 18. c. 51.

Primum quod licet morte obita perirent in terris Christiani, viuebant

viuebant tamen in cœlo: vitam non perdebant sed mutabant, meliore sui parte, quæ est anima, seruabantur. At dum à fide deficiebant per voluptates, viuebant quidem in terris, sed moriebantur cœlo, viuebant corpora sed interibant animæ: quantaque est corporum & animarum differentia, tanto grauitatis & malignitatis interuallo, distabat ab aliis hæc persecutio quæ animas perimebat.

Secundum est, quod tamen metu pœnarum deficerent aliqui, non tam multi tamen quam per voluptates inescati, nec illorum defectio deficientibus ita erat perniciosa quam istorum. Neque enim erat tam voluntaria, tam interna, tam vera defectio fidei quæ per metum extorquebatur, quàm quæ ex voluptate & blanditiis eliciebatur. Peccabant illi quidem metu mortis quantumuis acerbissimæ, at certe non ita grauitur quam qui amore vitæ & blandioris vitæ se inescari sinebant. Nam præterquam quod hi à fide toti deficerent, dabant se etiam impuris voluptatibus quibus implicati numquam emergebant. Vix aliquos metus mortis terruerat & à corde fidem extorserat, quin paulo post ad se reuersi, fidem reuocarint & resipuerint. Vix vnus ex his vero qui blanditiis emollitus fuerit, ad meliorem mentem se receperit, sed peruicaci omnes animo sua in defectione perierunt. Quod certe est ad perniciem grauissimum.

Tertium denique, defectio fidei quæ metu ab inuitis excidebat, non ita probro vertebatur religioni, quàm quæ sponte prodibat à deliciis. Quid enim vilius breui voluptate? quid caducis istis rebus fragilius? Et tamen hæc præferre cœlo! præferre Christo! ah probum! ah perfidiam! *Secuti viam Balaam ex Num. 22. Bosor, qui docebat Balac mittere scandalum coram filiis Israel, edere, 2. Pet. 2. & fornicari. Apoc. 2.*

II. PUNCTVM.

SED nihil umquam passa est Religio quod magis vergeret ad hunc probrosum animarum interitum, quàm quod à Christianis modo patitur.

Quod antequam demonstretur, declarandum paucis est, quàm recte quidquid modo sibi liberior indulgent peccatores, nomen persecutionis Ecclesiæ seu Religionis Christianæ sibi attrahat.

*Gen. 21.
Gal. 4.*

Primo enim sic omne illud appellatur quod ad vitium quodcumque inducit, siue id metu, siue voluptate fiat. Sic enim aperte Apostolus ait, Ismaelem persecutum fuisse Isaacum, cum tamen in alio scripturæ loco talis persecutio ludus dicatur, ut iam alibi notatum est ex Genesi vigesimo primo, & ad Galatas quarto; nempe ludo isto procax Ismael innocentem & reluctantem Isaacum pelliciebat in aliquod prauum vitium quod est Apostolo teste, ac reipsa persequi. Ac proinde cum modo Christiani sic pelliciantur ad vitium, cur non persecutionis tempus dicatur? Deinde vero quia forte dices de fide & de Christo præsertim agi oportere, ubi de persecutionis nomine agitur, responderi facile potest, neque hoc deesse huic temporis libertati. Nam articulus fidei est Ecclesiam esse sanctam, id est nihil falsum, nihil iniquum prorsus & prauum docere. Hic autem articulus his diebus disceptatur, peruertitur, violatur. Fingunt videlicet sibi hoc tempore nonnulla licere peccata quæ nollent alias admittere, neque enim liberius peccant, quam quod laxiorem putent peccandi libertatem, quod qui credit, non credit sanctam esse Ecclesiam ac puram religionem Christianam, quæ si aliquo tempore peccatum permitteret, certe nec sancta nec pura esset.

Quod & Christo Domino non potest non esse iniuriosum multis modis. Nam cum ipse sit Author Religionis, & Caput Ecclesiæ, si quid Religio non sanctum non castum non illæsum admitteret, redundaret in eius Authorem & Caput à quo regitur & docetur. Quid porro magis alienum à mente Christi quam peccatum, qui ut peccatum in suo mystico corpore destrueret, suum naturale corpus destrui voluit, *ut exhiberet ipse sibi gloriosam Ecclesiam, non habentem maculam aut rugam aut aliquid huiusmodi, sed ut sit sancta & immaculata.* Sed quomodo sancta & immaculata si aliquod modò permittat peccatum? aut quomodo Christum & Ecclesiam non impugnet qui se modo peccare posse contendat, quod non auderet alias.

Eph. 5.

Addo, quod est præcipuè obseruandum ad persecutionis nomen, quidquid hoc tempore sibi à quoquam indulgetur, certa quadam & peculiari ratione dici potest in odium Christi & Christianæ religionis sic indulgeri. Cur enim potius hoc tempore quàm alio? quia scilicet instant longiora jeiunia, recurritque celebranda Memoria passi olim Christi, quæ cum sint mæsta

tempora , lugubria , & pauenda , solatium aliquod quaritur quo mitigetur asperitas illius venturi temporis. Nam si non esset passus Christus , aut si eius recolendæ passioni non imminerent Sacraei dies , cessaret ista peccandi licentia , nemo sibi modo largius indultum vellet ; Vnus est Christus passus propter quem quadragesimale iubetur ieiunium , & propter quem bacchanales instituuntur dies ; Longe quidem diuersus est finis & status vtriusque tēporis , sed tamen ex eodem fonte ac capite deriuatur , quidquid modo proponitur laxius , & quidquid deinde arctius ? Vnde quàm apte & congruenter persecutionis nomen huic competat Tempori manifeste patet , restatque illud vt demonstretur quantum in animarum perniciem atque interitum hæc persecutio fauiat , supra illas etiam omnes quas olim passa est Christiana Religio.

TRIA sunt autem quæ id euidenter manifestent , primum est quod tanto certior & grauior sit animarum interitus quanto est minus præuisus & agnitus , *velut si auis festinet ad laqueum , & nescit quod de periculo anima illius agitur.* Sic se habent vero tempora hæc comparata priscis temporibus , vt quæ olim patebant & cernebantur pericula , nunc plane lateant & ignorentur. Quando Persecutor erat apertus religionis hostis , licet blandiretur , licet mira promitteret , quis ab eo tamen sibi non cauisset ? Sed quando persecutor est Christianus , quando ipse est ciuis , ipse contubernalis , ipse amicus , ipse frater , quando hoc idem omnes agunt , quis sibi timeat ? Sic itaque modo tanto plures & certius pereunt animæ , quanto minus certa patent pereundi pericula , *vt pisces capiuntur hamo , sic homines in tempore malo.* Vnde & Propheta Deo permittenti latens periculum sic aiebat : *Et facies , inquit , homines quasi pisces maris , & quasi reptile non habens principem. Totum in hamo subleuauit , Nempe hostis , traxit illud in sagena sua , & congregauit in rete suam. Super hoc letabitur & exultabit. Propterea immolabit sagena sua , & sacrificabit reti suo , quia in ipsis incrassata est pars eius , & cibus eius electus.* Quasi diceret , erit tempus quo se immergent in omnem homines voluptatem , & erunt quasi pisces maris : Dæmon vero quasi piscator qui totum id est vniuersos illo viuentes tempore in hamo & sagena congregabit ; tantique faciet illud tempus , quantum omnium desideratissimam vt qui nihil audius desideret ,

quàm animarum interitum.

- Dices fortè, quidquid sit siue persecutionis siue periculi, paucorum dierum est malum, quod vel etiam proxime consequenti ieiunio facillime diluitur & expiatur. Respondetur & hac responsione secundum declaratur quo manifesta sit maior æternæ salutis iactura quàm putetur. Non est, vt putas peccator, non est paucorum ista dierum persecutio, non sunt vnus aut alterius mensis pericula, sed totius vitæ; toto quo viuís tempore, viuunt hæc in te tempora; mutantur in te dies, tu nullis in diebus mutaris; diuersa sibi succedunt agendorum spatia, tu vnus & idem hoc semper agis quod modo agis. Reuolue præteritos annos, fuitne vnus ex quo agnouisti tempus hoc, tempus esse libertatis, fuitne vel vnus annus quo non te huic permiseris tempori, non te præteritæ libertati tradideris? *Et erit sicut hodie sic & cras & multo amplius*, vt est in Propheta: sic cæteri consequentur anni; sic semper credes hoc peccare tempore, minus esse vetitum quàm alio; quidquid confitearis & quantumcumque communices, manet illa in te semper hæresis, dicamne an infidelitas, an deceptio, an fascinatio, quod non aliter sit viuendum hoc tempore quàm viuitur. Quæ mens, quæ voluntas sic viuendi quamdiu manet in animo, tamdiu viuunt in te hæc tempora, tamdiu latet periculum, latet peccatum, latet interitus. *Colligata est iniquitas Ephraim, absconditum peccatum eius.* Quidquid videlicet hoc peccas tempore, colligatum est & inuolutum in ea voluntate quæ in te manet eiusdem semper tenendi vitæ cursus quem modò tenes. *Habitatio tua in medio doli.* Dolus est & fraudulenta cogitatio te posse aliter peccatum deponere nisi deponatur voluntas non modo non peccandi, sed ne ipsius rei attingendæ, cui peccatum annexum est. Quæ voluntas cum vix aut ne vix deponatur, manet in illa semper velut in radice peccatum idem, atq; idem salutis periculum, animæque interitus. *O si cognouisses & tu! Nunc autem abscondita sunt ab oculis tuis,* quæ Sapiens olim præuidit: *Frutex peccati radicabitur in illis, & non intelligetur.*

Tertio denique quia hæc dicuntur abscondita, quia non putantur ita esse periculosa vt dicuntur, quia latent & ignorantur, vix vllus est qui non sibi fingat quod quantumcumque esset periculum & peccatum, non tamen eius esset reus quia nescit, quia non putat se peccare, non putat esse peccatum sic largius viuere;

Quamobrem inde deducitur grauius esse periculum. Ignorantia est affectata qua certè nihil est perniciosius. Nam ex ignorantia te putas excusatum, & tamen non excusatur talis ignorantia, quia poteras & debebas scire ac credere quod modo edoceris. Poteras quidem quia idcirco publicæ denuntiantur preces & Conciones quibus id singulariter intelligatur; debebas verò quia tua res vel maxime agitur, nec villo umquam debito strictiori deuincimur quàm procurandæ salutis animæ. *Ne ponas animæ tuæ scandalum, & à filiis tuis cane, & à domesticis tuis attende.* Ecclesi. 32. *In omni opere suo, crede ex fide animæ tuæ.* Id est, Caue periclitaris de anima, quam debes rebus omnibus & personis præferre. Quidquid excusabis, nullum erit, quia nihil à salutis cura & negotio potest excusare. *Nonne anima plusquam esca? Noli propter* Rom. 14. *escam destruere opus Dei.*

III. PUNCTVM.

N I H I Ergo umquam Christiana Religio passa est grauius, quàm quod à Christianis modo patitur. Quia quod modo patitur plurimum vergit ad sempiternum animarum interitum, quod quidem animarum interitu nihil grauius pati potest Religio, quando præsertim coniungitur, vt supra vilum est, cum ipsius religionis ac Christi probrosa iniuria, vnde genus illud persecutionis emergit quod specie quidem videtur mollius, sed reipsa durius & acerbius.

Emergit nouum genus cladis, aiebat sanctus Cyprianus, & quasi Serm. 1. de lapsis. *parum persecutionis procella sanierit, accessit ad cumulum sub titulo misericordiae, malum fallens, & blanda perniciēs.* Nempe dum Christiani metu poenarum lapsi, & resipiscentes facilius reciperentur, nec nili blande & molliter cum illis ageretur, multi fidem deserebant spe illa sustentati, quod rursus nullo negotio reuocarentur & admitterentur in cætum fidelium: eratque nouum cladis genus & noua persecutio, quæ quo blandiorem habebat faciem, magis erat deploranda, videbaturque quasi cumulus aliarum omnium vexationum, quia videlicet magis exponebatur salus animæ, dum in spem veniæ & misericordiæ sic facilius peccabatur.

At nonne hoc ipsum est quod his peccatur diebus? nonne

hoc ipsum sub titulo misericordiae malum est fallens, & blanda perniciēs? Nonne quia bonus & misericors fuit Dominus nos redimendo, nunc idcirco, vt diximus, geniales agimus dies? Nonne quia bonus est & misericors, patiēdo toleranter quae agimus, minus timemus & peccamus audacius? Nonne quia bonus & misericors Deus nos breui poenitentes statim recipiet, minus propterea peccati damna metuimus? Hic est *Titulus misericordiae* quo malum praesens fallit, & blanda perdit perniciēs. Hic est Titulus quo peccandi licentia, vocatur honesta libertas: quo laxiores epulae dicuntur mundi leges: quo luxus, ludus, & quidquid concupiscentiae libeat, appellatur ius temporis; Hic est Titulus quo virtus exulat: quo pietas inimica iucundae societatis abigitur: quo timor peccati, debilitas animi creditur: quo salutis monita, sunt mentis tormenta. Hoc titulo nihil modo peccatur: aut si quid peccatur, nihil punitur. Hoc denique Titulo, nunc Misericordiae caetera Diuinitatis inscribuntur attributa, dicta & facta; Si iustitiam, si potentiam, si praesentiam, si minas, si scripturas, si iudicia, si quidquid demum de Deo dixeris ad continendum peccatorem; Vnum proferet Titulum Misericordiae quo se contra omnia tutum putabit.

Itane vero ille Titulus quo nullus est potentior ad puriores quosque concitandos affectus, sit ille Titulus quo nostri deprauentur appetitus? Suntne hi bone IESV fructus tuae Crucis? Suntne haec Bonitatis illius expectationes quam moriens exhibuisti? Siccine bonum te esse oportebat vt nos essemus mali! sic te nobis misericordem, vt in te atroces essemus! sic te nobis piū, vt in te essemus impij! Tanta certe me tenet huius impietatis ignominia, vt nihil satis infame & pudendum cogitare possim, quod non subirem libens ad hanc reparandam iniuriam Bonitati tuae nunc illatam.

Quis mihi det vt pro te moriar, Diuina bonitas, quae Deum meum pro me mori voluisti! quis mihi det ferali constrictum fune per vniuersam trahi urbem, capite pedibusque nudum, facem praeferre, qua cuncto spectante populo confitear, nimis esse iniuriosam hanc nostram licentiam qua sub *Titulo misericordiae*, libentius nobis indulgemus. Agnosco capitale crimen! agnosco supremae maiestatis laesa iniuriam! agnosco perduellionis humani nefas. Abjuro facinus, detestor audaciam &

contra quosuis impugnantes, profiteor hodie tali cultu semper nobis esse obseruandam Dei Bonitatem ac Misericordiam, vt sit duplicare peccatum, sub hoc peccare Titulo, & quo magis nobis patet Diuina Bonitas, tanto minus peccare liceat, tanto magis peccantes oporteat arguere, & ne grauiores poenas luant, tantò Deum magis precari & placare.

Huic affinis est illa Veritas quæ habetur Feria sexta Parasceues:

Grauius est Christo iam à peccato pati, quam quod olim pro peccato est passus.

Aptè conueniunt Verba Euangelij: *Ecce ascendimus Ierosolymam*: Et quæ sequuntur, Vnde in tres partes tota Christi passio diuiditur, cuius quoddam compendium opportunè in hos dies traduci posset.

Videnda sunt etiam ex Indicibus quæ alibi de Cæcitate Concupiscentiæ referuntur; & de defectu fidei, præsertim Dominica quæ in Albis dicitur, vbi hæc sancti Ioannis leguntur verba, *Hæc est victoria qua vincit mundum, fides nostra*, Et quæ inde formatur Veritas, hodierno Euangelio atque his diebus non incongrua.

Vide & in 3. parte, Feria sexta hebdomadæ 14. In 4. parte: Feria sexta, & Sabbato hebdomadæ 18. Feria 4. & sequentibus hebdom. 19. Feria 5. hebdom. 20. Feria 3. hebdom. 22. Feria 5. hebdom. 24.



HAC HEBDOMADE Veritates eruentur ex illa Oratione quam Christus Dominus ad Patrem habuit, & quæ refertur Ioannis capite decimo septimo. Cùmque illa Oratio variis abundet affectibus, sex præcipui seligentur qui frequentius occurrunt exercendi in meditatione Passionis Domini, sicque ad eos in sequentibus mysteriis facilius efformandos, cum gratia disponemur.

FERIA SECUNDA
DE ZELO CLARIFICANDI
CHRISTI DOMINI:
AD HAEC PRIMAEIVS VERBA:

*Pater, venit hora, clarifica filium tuum, ut filius
tuus clarificet te. Ioan. 17.*

VERITAS PRACTICA.

Scientia sine Zelo, arma sine milite: Zelus sine scientia,
miles sine armis.

*SENSVS est quod sicut arma sine milite, aut miles sine armis,
nihil in bello efficiunt: ita scientia sine Zelo, aut Zelus sine
scientia nihil contra hostes salutis, aut inimicos Christi pro-
sunt: ac proinde quàm necessarius est horum vsus, tam ne-
cessariò simul iungi debent.*

*RATIO est, quia quando ad aliquem effectum duo sunt ita ne-
cessaria, ut vnum sine alio nihil efficiat, simul illa iungi de-
bent tam necessariò, quàm verè talis effectus prætenditur.*

*Sed Christo Domino clarificando, Zelus & scientia sunt ita ne-
cessaria, ut vnum sine alio nihil efficiat.*

Ergo simul iungi debent, aut nihil ages pro Christo.

I. PUNCTVM.

MULTA hîc fructuosè considerari possunt ante ipsam
propositæ Veritatis considerationem. Primum est quod
*Tract. 104.
in Ioan.* dicit sanctus Augustinus de vniuersa hac Christi Do-
mini oratione, *Ita se, inquit, Patri exhibere voluit precatorem, ut
meminisset*

meminisset nostrum se esse doctorem: proinde eam quam fecit orationem pro nobis, notam fecit & nobis, quoniam tanti Magistri non solum ad ipsos sermocinatio, sed etiam ipsius pro ipsis ad patrem oratio, discipulorum est edificatio: & si illorum qui hac dicta adgerant audituri, profecto & nostra qui fueramus conscripta lecturi.

Deinde verò contemplare quo cultu, quâ reuerentiâ cum internâ tum externâ Christus Dominus oraret Patrem. *Hac loquutus est IESVS*, ait Euangelista, *& subleuatis oculis in cælum, dixit: Pater, venit hora, clarifica filium tuum, ut filius tuus clarificet Te.*

Tertiò perpende quomodo passionem suam vocet clarificationem suam, nempe, ut dicit sanctus Hilarius, *Clarificat Pater deficiente sole, tremante terra, proclamante Centurione.*

Et verò etiam tot Christi patientis Virtutes elucent, ut inde multum clarificari possit.

Quartò aduertere diligenter quòd, si quam Christus petat clarificationem, non aliter eam expetit, quam ut Patrem clarificet; quod est summæ fidelitatis argumentum. Sic autem in ea ipsa filij passione Pater clarificatur, cum Diuina eius attributa, Bonitas, Misericordia, Sapientia, Iustitia, & alia innotescunt. O qualis Iustitia cum summa Bonitate coniuncta.

Denique sic persuasum habe, quod quantum de Christo bene mereri optas, tantum à te clarificandum oporteat, quibus omnino modis & personis ipsum notificare possis contra obsistentes quosque aduersarios. Ad hoc autem tam eximium & tam diuinum Opus operandum, Scientia & Zelus sunt ita necessaria, ut nisi vtrumque adsit, nihil prorsus efficias. Atque hinc ratio & motiuum efficax simul illa duo coniungendi desumitur, quia quando ad vnum effectum duo quædam sunt ita necessaria, ut vnum quidem sine alio nihil efficiat, efficiant verò simul iuncta, tunc simul illa iungi debent tam necessario, quam verè & efficaciter talis effectus prætenditur. Quod quidem inproposita similitudine armorum & militis tam clarè patet, ut nihil euidentius videatur. Quid enim Miles sine armis, aut arma sine milite? ac proinde si bellum est gerendum, nonne oportet militem armis esse instructum? sic planè de cæteris vniuersim quæ mutuam à se exigunt operam, ut si quid videre velis, cum non possis sine lumine & oculis, nonne vtrumque adhibes? si quid audire optas, cum non aliter fieri possit quam per sonum & aurem, nonne alteri

Proo. 20. alterum iungis? Hinc illa sapiens Sapientis exprobratio in Ipi-
grum iacta. *Propter frigus piger arare noluit, mendicabit ergo æstate,*
& non dabitur illi; quali diceret cum non aliter vitæ subsidia sub-
ministrantur à terra, quàm dum excolitur & aratur; si quis ter-
ram non arat, non modò nihil sibi ad vitam colliget, sed neque
ab aliis meretur quidquam accipere, quod in re tam clara cæcu-
tatur, & duo illa tam necessariò simul adiungenda neglexerit.

O quàm multo plures sic æternæ vitæ sibi subsidia denegant,
quam huius temporalis & caducæ! vix vllus est qui suum non
colat agrum, & vix vllus est qui suum excolat animum.

II. PUNCTVM.

SED Christo Domino clarificando, Zelus & scientia sunt ita ne-
cessaria, ut vnum sine alio nihil efficiat, simul autem iuncta pluri-
um possint.

Nam primò quid efficiet scientia sine Zelo, cum sit hoc Zeli
proprium scientiam acuere, excitare, & in medium producere
ut se ipsa prodat ad opus externum, quæ alioquin non sic excita-
Ecclesi. 20. ta lateret & otaretur. Hinc Sapiens semel & iterum, *sapientia*
& 41. *absconsa & thesaurus inuisus, quæ utilitas in vtrisque?* MELIOR
est qui celat insipientiam suam, quàm homo qui abscondit sapientiam
In Ps. 118. suam. ANGELI quoque, inquit sanctus Ambrosius, sine Zelo ni-
hil sunt, & substantiæ suæ amittunt prærogatiuam, nisi eam Zeli ar-
dore sustentent. Tum paulò post, Et quid miramur si Angeli eum ha-
bent; Ipse Deus Pater ait, Zelans Zelabo Ierusalem Zelo magno.
Quia Deus magnus, ideo & Zelus magnus est, & pro vniuscuius-
que qualitate, ita & Zelus aut mediocris, aut magnus est. Zelo vin-
dicatur Ierusalem, Zelo Ecclesia congregatur, Zelo fides acquiritur,
Zelo prudentia possidetur. Dominus quoque Iesus ait, Zelus domus
tuæ comedit me. Et nonnullis interiectis. Zelus utilis in Sacer-
dote præcipuè, ne negligens ac remissus sit. Ac denique Zelum vo-
cat Dei vitam, quali diceret, Zeli ministerio Deum in illis vi-
uere quibus prædicatur.

Quòd vero etiam Zelo Scientia sit adiungenda, dupliciter in-
telligi potest; primò quidem ut per scientiam intelligatur Dis-
cretio & Prudentia. Deinde verò etiam pericia seu intelligen-

tia eorum, quæ spectant ad cognitionem Domini Iesu. Quid enim doceas quod ignores; aut quomodo fructuosè doceas, nisi prudenter discernas, quid, quibus, vbi, quando? Quod præclare sanctus Gregorius in hæc verba Iob, *Quis dedit gallo intelligentiam?* ^{Iob. 38.} GALLO, inquit, *intelligentia de super tribuitur, quia Doctori veritatis Virtus discretionis, ut nouerit quibus, quid, quando, vel quomodo inferat, diuinitus ministratur.* ^{3. Mor. 5. & 6.} Non enim una eademque cunctis exhortatio conuenit, quia nec cunctos par morum qualitas astringit. Sape enim aliis officiunt, quæ aliis prosunt. Vide quæ plura prosequitur. Quem in sensum recte etiam sanctus Bernardus, ^{Serm. 19. in Cant.} *facillimè Zelo tuo spiritus illudet erroris, si scientiam negligas: nec habet callidus hostis machinamentum efficacius ad tollendam de corde dilectionem, quam si efficere possit ut in ea incautè & non cum ratione ambuletur.* Itémque alibi, *Importabilis, ait, absque scientia est Zelus, vbi ergo vehemens æmulatio, ibi maximè discretio est necessaria quæ est ordinatio Charitatis. Semper quidem Zelus absque scientia minùs efficax, minùsque utilis inuenitur, plerumque autem & perniciosus valde sentitur.* ^{Serm. 49.} Hoc est denique quod Apostolus de Iudeis dicebat, ^{Rom. 10.} *Æmulationem quidem Dei habent, sed non secundum scientiam.* Non est hoc æmulari Deum, sed seipsum.

III. PUNCTVM.

SIC ergo Scientia & Zelus coniungi debent ad clarificandum Dominum Iesum, ut nisi simul coniungas, nihil efficias. Sic defectu scientiæ corrigitur ille cui dicitur, *Quia tu scientiam repulisti, repellam te, ne sacerdotio fungaris mihi.* Defectu autem Zeli ^{Osee 4.} arguuntur ij, quibus Apostolus, *Et vos inflati estis, & non magis* ^{1. Cor. 5.} *luctum habuistis, ut tollatur de medio vestrum qui hoc opus fecit!* Ab utroque verò simul coniuncto præclare commendatur celebris ille Apostoli discipulus Apollo nomine, de quo sic in actis Apostolorum: *Hic erat edoctus viam Domini, & feruens spiritu loquebatur, & docebat diligenter ea quæ sunt Iesu.* ^{Act. 18.} Expende accuratè quænam ea sint quæ sunt Iesu: an illa probe teneas, an loquaris feruenter, & communices quibus oporteret, seu ex officio, seu ex Charitate? Si quidem ita est, dic cum Apostolo, *Deo gratias qui semper triumphat nos in Christo Iesu, & odorem notitiæ suæ manifestat per nos in omni loco, quia Christi bonus odor sumus Deo, in iis qui*

15. 6. *salui sunt, & in iis qui pereunt. Si verò deficiis, geme cum Propheta: Ve mihi quia tacui; accendatur velut ignis Zelus tuus. Frequenter illud repete quod Christus Dominus, coniunctimque cum illo vehementer obsecra; Pater, venit hora, clarifica filium tuum, ut filius tuus clarificet te. Innotescat toti mundo, Scythis & Barbaris, Cannadenlibus, & quibusvis gentibus, populis, linguis, & nationibus; Innova signa, & immuta mirabilia. Glorifica manum & brachium dextrum. Suscita predicationes quas loquenti sunt Propheta priores: Sic quondam Sapiens, à quo illud postremum audies, Eris eruditus in omnibus, & probabilis in conspectu omnium virorum.*

Ecclesi. 36.

Ibid. 42.

Vide in 1. parte, hanc inter alias, Veritatem.

Nemo minus sibi Christum servat, quam qui magis sibi soli servat.



FERIA TERTIA.

DE NOSTRA SVBIECTIONE

SVB POTESTATE CHRISTI.

AD HÆC EIVS VERBA:

Sicut dedisti ei potestatem omnis carnis, ut omne quod dedisti ei, det eis vitam aeternam. Ioan. 17.

VERITAS PRACTICA.

Quò magis Christo subijcitur, eò magis erigimur.

RATIO EST, Quia eò magis erigimur, quo propius ad finem nostrum supernaturalem accedimus.

Sed eò propius accedimus, quò Christo magis subijcitur.

Ergo & eo magis erigimur. Et tamen non vis subijci!

L. P V N C T V M.

NON est dubium quin Potestas Christi Domini, sit potestas diuina, & proinde vniuersalis, & quanta potest esse maxima & perfecta. Cogitari tamen hîc potest certa quædam potestas, quam sibi vt homini datam, ait à Patre, *vt omne quod dederit ei, det eis vitam æternam*; nempe potestas regendi animas, ad beatam illam vitam, & ducendi vnâquamque ad finem suum supernaturalem; per media siue gratias quas illi ordinat & præscribit. Sic enim vt Redemptor & Saluator animarum de singulis particulatim disponit, sicut Architectus de lapidibus quos parat & exæquat ad ædificium. Sic sanctus Augustinus explicans illud Psalmistæ, *Aedificans Ierusalem Dominus, dispersiones Israel congregabit.* ILLO, inquit, *sanguine colle-* Ps. 146.
git dispersiones Israel, collecti sunt dispersi vt in manu artificis ad ædificium formarentur.

Et verò Natura nostra deprauata illi resistit potestati, resistendo gratiis quibus nos regit & dirigit ad gradum perfectionis, quò ipse nos destinauit; Neque id tantum in sensualibus, sed & etiam in spiritualibus nisi aduertamus, diuinæ eius Directioni nos ipsos opponimus, quoties eius ductum non sequimur meditando, communicando, loquendo, aut quidquis aliud operando; sed potiùs impulsu quodam humano & particulari ad ea ferimur, vel ad eum modum illa tractandi quem fortè noler, *Vsq; quo non vis subijci mihi?*

Exodi 10.

Ad hanc Subiectionem promouendam opportuna est Veritas modò expendenda, quâ monemur nostram vnica perfectionem sic in ea subiectione consistere, vt quo magis Christo subijcitur, eo magis erigamur. Et ratio est manifesta ex ante dictis; nam eo magis erigimur, quo propiùs ad finem nostrum supernaturalem accedimus; Est enim Finis vniuscuiusque rei, sua potestrema perfectio, suum complementum & quod postremum desiderare possit: vnde Finis & Summum Bonû conuertuntur, vt quod est summum bonum alicui sit eius finis, & quod est finis, sit summum bonum. Sic etiam dicitur finis prima esse inter alias causas, quia scilicet eas mouet ad agendum, & quidquid agunt, totum est propter finem, *quo sublato*, vt ait sanctus Tho-

126 FERIA 3. infra Hebd. Quinquag. Omne quod dedisti ei, &c.

mas, necesse est alias omnes subtrahi. Sic enim expressis ille verbis: *Causarum ad inuicem ordinarum si prima subtrahatur, necesse est alias subtrahi: prima autem est causa finalis.* Atque hinc *nobile est illud Effatum quod finis cognitio, vita humana est ordinatio, si videlicet tamquam sagittarij, aliquid quod spectemus habeamus.* Hinc tam multi præcipue de fine disputant quem tamen pauci consequuntur; quia forte magis de fine disputant cognoscendo, quam assequendo.

II. PUNCTVM.

SED eò propius ad finem nostrum accedimus, quò magis Christo subiiciamur.

Nam cum finis noster proximus & immediatus sit ille gradus perfectionis & gloriæ, quò nos Dominus destinauit, cùmque ad illum gradum non aliter proueamur, quàm per gratiam quâ nos ipse Christus eò ducit, atque ex consequenti per subiectionem quam illi gratiæ reddimus; profectò hinc sequitur, quòd eo propius finem nostrum attingemus, quo magis Christo subiiciamur. Nam illa est Christi subiectio seu gratia cui subiiciamur, quæ nos eò vehit, *sicut aquila non modo prouocans pullos suos ad volandum, sed & eos portans & fouens in volatu.* Hoc est illud *destinatum brauium supernæ vocationis Dei in Christo Iesu*, quod tantopere persequebatur Apostolus. Hæc est operatio Christi secundum quam certare se Idem testatur, dum ait, *vt exhibeamus omnem hominem perfectum in Christo Iesu, in quo & laboro, certando secundum operationem eius, quam operatur in me, in virtute.* Hæc est *mensura regulæ quâ mensus est nobis Deus*; Hæc *mensura donationis Christi, secundum quam unicuique nostrum data est gratia.* Hæc denique *sobrietas ad quam oportet sapere, ne sapiamus plusquam oportet sapere: Unicuique*, inquit, *sicut Deus diuisit mensuram fidei, sicut enim in vno corpore multa membra habemus, omnia autem membra non eundem actum habent, ita multi vnum corpus sumus in Christo; singuli autem alter alterius membra, habentes donationes secundum gratiam quæ data est nobis differentes.* Vide quænam est tua singularis, quomodo te ei subiicias vel resistas, & an tibi loquatur Apostolus: *Inflatus sensu carnis tuæ non tenes caput, ex quo totum corpus.*

Deut. 32.
Phil. 3.
Coloss. 1.
2. Cor. 10.
Eph. 4.
Rom. 12.
Coloss. 2.

III. PVNCTVM.

HINC igitur patet, quod eo magis erigimur in virtutem, in perfectionem, in gratiam & gloriam, quo magis Christo subiicimur; Quia magis attingimus nostrum finem in quo vno adepto tota nostra prouectio & beatitudo consistit. Sic aptè sanctus Augustinus explicans quomodo Christus Dominus ab Apostolo finis legis dicatur: Quoniam, inquit, quidquid agimus ad illum referimus, & cum ad eum peruenerimus, ultra quod quæramus non habebimus. Dicitur enim finis qui consumit & dicitur finis qui perficit. Aliter quippe intelligimus cum audimus, finitus est cibus qui manducabatur: & aliter intelligimus cum audimus, finita est vestis quæ texebatur. In utroque audimus, finitum est, sed cibus ut iam non esset: vestis ut perfecta esset. Finis ergo noster perfectio nostra esse debet, perfectio nostra Christus est: In illo enim perficimur quia ipsius capitis membra sumus. Sic ad praxim egregie sanctus Paulinus Nolanus, Ergo, inquit, illum amemus, quem amare debitum est; illum osculemur, quem osculari castitas est; illi subiiciamur, sub quo iacere, supra mundum stare est; propter illum deiiciamur cui cadere resurrectio est; illi commoriamur in quo vita est. Vtrumque etiam Apostolus videtur esse complexus his verbis, quibus & nos crescere simul & subiici Christo velut capiti membra nos admonet; Crescamus in illo, inquit, per omnia qui est Christus, ex quo totum corpus compactum, & connexum per omnem iuncturam subministrationis, secundum operationem in mensuram vniuscuiusque membri, augmentum corporis facit in adificationem sui in Charitate. Quale monstrum & portentum, si membra corporis nollent regi à capite, seseque illi opponerent! Tale tu monstrum efficeris Anime, si Christo repugnas. Verumtamen illi subiecta esto anima mea, quoniam ab ipso patientia mea. Quia ipse Deus meus, & saluator meus, adiutor meus, non emigrabo. Id est, inquit sanctus Augustinus, quamuis hostes insidiantur ubi possunt, calumniantur ubi possunt, verumtamen Deo subijciatur anima mea, sic subiicietur, sic erigetur. Venit dolor meus, veniet & requies mea: Venit tribulatio mea, veniet & purgatio mea. Numquid lucet aurum in fornace aurificis? In molili lucebit, in ornamento lucebit. Patiatur tamen fornacem ut purgatum à sordibus veniat ad lucem. Quod vult aurifex facio: ubi me

128 FERIA 4. Cinerum. Opus consummaui quod dedisti, &c.

ponit artifex tolero: inbeor tolerare, nouit ille purgare. Ardeat licet palea ad incendendum me, & quasi consumendum me, illa in cinerem vertitur, ego sordibus careo, quia Deo subiicietur anima mea.

Vide de hac subiectione Christo debita, in 3. parte, FERIA 6. hebdomadæ nonæ: & Dominica 14. fusiùs. Expendi etiam potest Veritas quæ habetur in eadem parte, FERIA 2. hebdomadæ vndecimæ:

Quod vel inimico numquam negares, sæpissimè recusas Christo.



FERIA QVARTA,

QVÆ EST CINERVM.

DE PERFECTA IMITATIONE

CHRISTI DOMINI, IN ADIMPLENDA DEI

VOLVNTATE, SICVT ILLE FIDEDITER

EAM CONSVMMAVIT.

AD HÆC EIVS VERBA:

Ego te clarificaui super terram, opus consummaui
quod dedisti mihi vt faciam. Ioan. 17.

VERITAS PRACTICA.

Non quidquid Christus egit, sed quomodo.

SENSVS est, quòd ad perfectam Christi Imitationem non est
ita spectandum quid egerit, quàm quomodo illud egerit: vt
sic, quæ sunt officij nostri conemur perfectè agere, sicut ille
suum opus consummauit.

RATIO est, Quia perfecta Christi imitatio in vna Dei Volun-
tate

tate fideliter adimplenda consistit.

Atqui ad hanc Dei Voluntatem fideliter adimplendam, ex parte nostra sicut Christus adimplevit, non ita spectandum est quid egerit, quàm quomodo quidquid egerit.

Ergo & ad eius imitationem hoc præcipue spectandum est: ac proinde inexcusabiles sumus, nisi Eum studeamus imitari, cum hoc vnum sit agendum quod agimus, dum bene illud, sicut Christus suum peregit opus, peragamus.

I. PUNCTVM.

TRIA hîc diligentissime sunt obseruanda; primum quòd Christus Dominus de tota vita sua suisque omnibus & singulis rebus gestis loquitur, tãquam de Opere siue Negotio sibi commisso, quasi nihil ex se ageret, diceretue, quod non tibi præscriptum esset: Sic enim ipse apertissimè iam dixerat, *Ego ex meipso non sum locutus, sed qui misit me Pater, ipse mihi mandatum dedit quid dicam, & quid loquar: quæ ergo ego loquor, sicut dixit mihi Pater, sic loquor.* Certe hoc mirum! Ioan. 12.

Secundum obseruatu dignum est, quòd illud omne quod tota vita gessit & dixit, vnum opus vocat; *Opus*, inquit, *quod dedisti mihi*; quasi hoc vnum habuisset agendum; vt voluntatem patris impleret, quasi hoc vnum spectasset in sua infantia, in suis miraculis, in suis sermonibus, in suis quibusuis aliis operibus; *Vt faciam*, inquit, *voluntatem eius qui misit me, vt perficiam opus eius.* Ioan. 4.
Et proximus Passioni; *Vt cognoscat mundus quia diligo Patrem,* Ibid. 15.
& sicut mandatum dedit mihi Pater, sic facio. Hoc est profectò diligere.

Tertium denique quòd sicut dixit, sic perfectissimè opus sibi datum consummauit, ne syllabâ quidem aut apice vno desiderato. Quod maxime patet in eius passione, vbi omnia ad Patrem refert, & idcirco libentissimè & plenissimè complet, donec omnibus absolutis dicat, *CONSUMMATVM est, & inclinato capite spiritum tradat.* Ibid. 19.
O verè obedientem filium, qui ne perderet obedientiam, perdidit vitam. S. Bernard.

Sic nobis imitandus modò proponitur, vt habet Veritas, non

130 FERIA 4. Cinerum. Opus consummavi quod dedisti, &c.

in iis præcisè quæ fecit, sed in obedientia quam Patri reddidit, ut sicut ille, sic & nos fideliter nobis commissæ & præscriptæ faciamus. Quod ut distinctius videas, expende illud primò, quàm verum sit quod est in declaratione positum, perfectam Christi Imitationem in vna Dei voluntate adimplenda consistere. Nam cum Ipse hoc vnum opus se peregrisse dicat, & idcirco dicat, ut intelligamus quid in ipso sit propriè imitandum; certè nō potest dubitari, quin perfectæ eius imitatio in vna Dei voluntate adimplenda consistat, quam ille in suis omnibus dictis factisque tamquam vnicum vitæ scopum & finem spectavit. Atque hinc Apostolus vno verbo quæcumque de Christo sunt, commendare volens, hoc vnicè vrget: *Hoc enim sentite in vobis quod & in Christo Iesu, qui cum in forma Dei esset &c. Humiliauit semetipsum factus obediens usque ad mortem, mortem autem crucis: Vnde & paucis interiectis concludit, Itaque Charissimi mei, sicut semper obedistis, non ut in præsentia mea tantum, sed multo magis nunc in absentia mea, cum metu & tremore vestram salutem operamini. Deus est enim qui operatur in vobis & velle & perficere pro bona voluntate. Omnia autem facite sine murmurationibus & hesitationibus, ut sitis sine querela & simplices filij Dei. Hoc est verè* *Phil. 2.* *obedire, & hoc est fortè quod minus facis. Si subtraxerit se non placebit anima mea.* *Hebr. 10.*

II. PUNCTVM.

AT QVI ad hanc Dei voluntatem perfectè adimplendam ex parte nostra, sicut Christus adimpleuit, non ita spectandum est quid egerit, quàm quomodo illud egerit.

Manifestum est enim, quòd quæ omnia Christus gessit, non à nobis gerenda velit Deus. Numquid Paulus crucifixus est pro vobis, aiebat idem Paulus, tam perfectus imitator Christi, ut nos sui imitatores vellet, sicut & ipse Christum imitabatur. Et tamen quàm multum abest, ut ea omnia fecerit aut passus sit, quæ Christus Dominus? Est ergo Christus exemplar vniuersalissimum, vnde singuli exprimere debeant quod sibi sit proprium & singulare. Sic egregiè sanctus Gregorius Nyssenus: *Sua quisque vita pictor est, artifex huius operis est voluntas, colores sunt virtutes, exemplar Christus.* Sic & sanctus Bonaventura; *Resurgent* *1. Cor. 1.* *Ibid. 11.* *Ep. 2.* *In Apol.*

à Christo, sicut à totius nostra salutis exemplari & originali principio, actus multiformes: In his qua sunt severitatis, & diuinitatis est ^{Paup. part. 3.} Presidentiū & Pralatorum; in his qua condescensionis, est infirmorum.

Quid autem à singulis velit Deus, hoc illis declarat, in suo cuique officio seu vacatione in qua vocatus est: vnde & toties idem Apostolus postquam dixit, *Volo omnes vos esse sicut meipsum*, statim addit, *sed unusquisque proprium donum habet ex Deo; alius quidem sic, alius verò sic*; Et post nonnulla, *unicuique*, in- ^{1. Cor. 7.} quit, *sicut diuinit Deus, unumquemque sicut vocauit Deus, ita ambulet, & sicut in omnibus ecclesijs doceo; Circumcisus aliquis vocatus est? non adducat praputium: In praputio aliquis vocatus est? non circumcidatur; Circumcisio nihil est, & praputium nihil est, sed observatio mandatorum Dei. Vnusquisque in qua vocatione vocatus est, in ea permaneat. Vbi duo hæc simul confirmantur, & quod maxime spectari debeat voluntas Dei, & quod in vocatione propria potissimum dignoscatur. Quid agimus anime? quid hîc hæres diutius? non est quod te excuses de ignorata voluntate Dei: cum in his omnibus vbi frequentius peccas, non ignores quid de te velit Deus. Quod notum est Dei, manifestum est in te.*

Rom. 12

III. PUNCTVM.

NON quidquid igitur Christus egit, sed quomodo quidquid egerit, id spectandum est ad perfectam eius imitationem, vt in his potius quæ sunt nostri officij, quàm in ipsis Christi operibus, quomodo egerit, sic nos agamus: cum in his quotidianis nostris actionibus longè manifestior sit Diuina Voluntas, in qua vna perfecte adimplenda, vt dictum est, tota consistit Imitatio Christi: Cuius etiam exemplo plurimū excitamur ad illam in nostro statu Diuinam penitus exequendam Voluntatem: quod proinde Deus proponit vt intueamur assidue, tamquam Exemplar luculentissimum quod imitemur. Si enim Filius æqualis Patri, sic ei obediens fuit in opere tam arduo & difficili, quid nos seruos præstare conuenit in quotidianis nostris obsequiis, quæ sunt tam facilia, vt præ facilitate & exiguitate rei, vix credamus vllius esse meriti. Et tamen si perfecte & integre complerentur, ita Deo placent, itaque valent ad sanctitatem nostram; vt quantum in illis fideles & perfecti fuerimus, tantum perfectionis & san-

132 FERIA 4. Cinerum. Memento homo quia pulvis es.

Citatis affecuturi simus : quia Christo Domino similiores erimus , & in eo genere similitudinis & perfectionis quod maxime placet Deo , & maximè valet ad meritum , nempe in diuina eius voluntate facienda. Vide in 3. parte de Obédientiæ voto , vbi hæc tractatur Veritas satis opportuna huic loco :

Quam gloriosa est similitudo Christi , tam gloriosa est Obédientia.

Heb. 13. Hoc est quod potissimum nobis optabat Apostolus dicens ,
Deus pacis aptet vos in omni bono , vt faciatis eius voluntatem , faciens in vobis quod placeat coram se , per Iesum Christum. Quidquid verò sit quod impediatur tantum bonum , vide quam breue sit & euanidum ; *Tamquam dies hosterna qua præterit* , sic planè omnia transeunt , & tu cum eis pariter. *Et mundus transit & concupiscentia eius , qui autem facit voluntatem Dei , manet in æternum* , ait dilectus discipulus. Sic & aptè Sapiens , *Omne opus corruptibile deficiet , & qui illud operatur ibit cum illo.*

Hoc est quod profiteamur hodie in Cinerum asperusione ; hoc *Matt. 6.* est quod in Euangelio Missæ auditur , *Nolite thesaurizare vobis thesauros in terra ; thesaurizate autem vobis thesauros in cælo.*

Ingredere teipsum hodie penitiùs ; Conuertere seriò ad Dominum , vt ait Sapiens , *& relinque peccata tua ; precare ante faciem Domini , & minue offendicula.* Reuertere ad Dominum & auertere ab iniustitia tua , & nimis odito execrationem , & cognosce iustitias & iudicia Dei , & sta in sorte propositionis & orationis altissimi Dei. *Pf. 39.* *DEVS meus volui , & legem tuam in medio cordis mei.*

IN EADEM FERIA QVADRAGESIMALI.

AD EVANGELICAM LECTIONEM , ET CINERVM IMPOSITIONEM.

Nolite thesaurizare vobis thesauros in terra. Matt. 16.
Memento homo quia pulvis es , & in puluerem reuertèris.

VERITAS PRACTICA.

Mortificandis Concupiscentiis opportuna Mortis memoria.

RATIO EST, Quia mortificandis Concupiscentiis opportuna est illa memoria quæ rei concupitæ Veritatem seu vilitatem representat.

Sed mortis memoria præcipue Veritatem seu vilitatem rei concupite representat.

Ergo mortificandis concupiscentiis opportuna mortis memoria, proindeque simul apte hodie conjunguntur illa duo, quibus homo admonetur ut & nolit thesaurizare in terra, & meminerit se esse terram, vereque Deo possit dicere, Et in puluerem ps. ii. mortis deduxisti me.

I. PUNCTVM.

HÆC est sanctorum omnium Patrum Sententia, Tempus hoc Quadragesimalis Ieiunij, sic ordinatum esse præsertim refræmandæ gulæ, ut tamen omnibus vniuersim vitiis refecandis impenderetur. Sic inter alios grauius S. Leo: Quod ergo, dilectissimi, in omni tempore unumquemque conuenit facere Christianum, id nunc sollicitius est & deuotius exequendum, ut Serm. 6. de Quadrage. Apostolica Institutio quadraginta dierum ieiuniis impleatur, non ciborum tantummodo parcitate, sed priuatione maxime vitiorum. Nam cum ad hoc castigatio ista sumatur ut carnalium desideriorum fomites subtrahantur: Nullum magis scetandum est continentia genus, quam ut semper simus ab iniusta voluntate sobrij; & ab inhonesta actione ieiuni, Quæ deuotio non omittit agros, non secernit inualidos, quia etiam in languido atque inutili corpore potest animi integritas reperiri, si ubi fuit sedes prauitatis, ibi confirmantur fundamenta virtutis.

Ex quibus sancti Papæ verbis non id solum habetur quod vitiis omnibus sit modo abstinendum, cum id omni tempore iu-

beatur, sed ita nobis esse temperandū, vt ad ipsam vitiorum stirpem euellendā, & confirmanda in reliquos vitæ dies fundamenta virtutis, intendamus; quod non aliter efficacius efficitur quàm si quæ radix est malorum omnium Concupiscentia sic continuò refrænari discatur, vt quæ inde permanant vitia, contineantur.

Ser. 4.

Quod idem aperte alibi sic declarat, *Ingressuri dies mysticos & purificandis animis atque corporibus sacratius institutos, præceptis Apostolicis obedire curemus, emundantes nos ab omni inquinamento carnis ac spiritus, vt castigatis colluctationibus quæ sunt inter vtramque substantiam, animus quem sub Dei gubernaculis constitutum, corporis sui decet esse rectorem, dominationis suæ obtineat dignitatem.*

2. Ioan. 2.

Quamobrem in hunc finem congruenter proponuntur illa hodie Domini Verba: *Nolite thesaurizare vobis thesauros in terra,* id est, nolite affici rebus huius mundi, nolite mundum diligere, nolite terrena concupiscere; Quod non tantū de terrenis & temporalibus quæ fortunæ dicuntur, bonis intelligas, sed de honorū ambitu, de carnis voluptatibus; ac vno Verbo de triplici Concupiscentia, de qua tam sæpe ex sancto Ioanne auditur, *Omne quod est in mundo concupiscentia carnis est, & concupiscentia oculorum, & superbia vitæ.*

Hi sunt thesauri quī thesaurizantur in terra. Hi sunt quibus humana figuntur corda; seu potius ipsa sunt humana corda, triplici quodam nexu, rebus affixa perituris, quæ sunt ita modò reuocanda, vt deinceps oderint quod nimis amant, & fugiant quod auidius prosequuntur, ac sensim perfectius mortificari discant. Opportune verò Mortis memoria quæ per impositos Cineres renouatur, opportune inquam, mortificandis illis Concupiscentiis nobis offertur, vt habet Veritas, nunc expendenda.

Nam cum in res illas humanas non ferantur Concupiscentiæ nisi prout apparent vel iucundæ, vel vtilis, vel honorificæ, quæ sunt tres boni species; profecto nihil æque potest Concupiscentias à confectandis inordinate rebus auocare, quàm quod apparentem illam rerum speciem denudabit, veramque earum faciem & naturam statuet, & quàm sint potius viles, caducæ, infirmæ & Christiano indignæ, repræsentabit.

Sic olim cum Iudæi tam florentes & beatos se putabant vt

nullis possent hostium viribus appeti, Propheta Ieremias iubente Domino, lagunculam figuli testeam coram illis in valle Topheth confregit ac in minutissimas contriuit partes, vt hoc facto docerentur, suam illam quam putabant securam sortem ita breui conterendam, ne vt vmquam resurgeret, sicque iam ante discerent quam parum illi fiderent. *Hac dicit Dominus exercituum, sic conteram populum istum, & ciuitatem istam, sicut conteritur vas figuli quod non potest ultra instaurari.*

O si talis rerum quas cōcupiscimus imago nobis exhiberetur!

II. PUNCTVM.

SED Mortis memoria rerum illarum quas prosequuntur Concupiscentia, veritatem & vilitatem imprimis representat.

Tres enim Corporis mortui considerari possunt status, in quorum vno vnaquæque Concupiscentia suum illud obiectum quod tantopere deperit, quale sit in veritate, & quam vile sit in substantia, facile possit intueri. Tres illi status à Christo Domino nobis exhibentur in tribus illis Mortuis quos duntaxat suscitasse memoratur. Prima illa puella est, Tabitha nomine quæ iam defuncta, lecto adhuc suo detinebatur exaniminis, & domesticum eiulatū circumfuso luridi vultus horrore concitabat. *Matth. 91*

Hic est primus Mortis character, hæc prima eius effigies, & exanimati corporis primus status, in quo vide vt statim atque diuulsa est anima, quæ pars hominis reliqua superest quàm sit foeda! quàm indecora, quam tota expers omnis sensus & membrorum vsus! quam aliena quouis humano consortio! quàm manca! quam abiecta, quàm nulla: Vnde Sapiens, *Melior est canis viuus leone mortuo*, id est, nullum tam vile est animal dum sit viuum quod non præstet alteri mortuo, quantumcumque sit præstans & illustre.

In hoc autem statu Concupiscentia quæ carnis dicitur, habet quod discat, quidnam amet, quando carnem amat & carnalia conseqatur. Sic præclare sanctus Gregorius ad illa Iobi verba, *Iob 24.
16. Mor. 31* *Dulcedo illius vermis.* POTES, inquit, *apertius vermis nomine, caro designari. Vnde & superius dicitur: Homo putredo, & filius hominis vermis. Luxuriosi igitur cuiuslibet atque carnis voluptatibus dediti, quanta sit cecitas demonstratur, cum dicitur: Dul-*

cedo illius vermis. Quid namque caro, nisi putredo ac vermis est? Et quisquis carnalibus desideriis anhelat, quid aliud quàm vermen amat? Quae enim sit carnis substantia, testantur sepulchra. Quis parentum, quis amicorum fidelium quamlibet dilecti sui tangere carnem scatuerientem vermibus potest? Caro itaque cum concupiscitur, pensetur quid sit exanimis, & intelligitur quid amatur. Nil quippe sic ad edomandum desideriorum carnalium appetitum valet, quam ut unusquisque hoc quod vinum diligit, quale sit mortuum penset. Considerata etenim corruptione carnali, citius cognoscitur, quia cum illicite caro concupiscitur, tabes desideratur. Bene ergo de luxuriosi mente dicitur: dulcedo illius vermis, quia is qui in desiderio carnalis corruptionis astat, ad fetorem putredinis anhelat.

Quibus sancti Patris verbis nihil videtur addi posse ad rem nostram illustrius exponendam, nisi forte illud Sapientis: *Melius est ire ad domum luctus quàm ad domum conuiuij: In illa enim finis cunctorum admonetur hominum, & viuens cogitat quid futurum sit.*

SECVNDVS status in illo demonstratur Adolescente qui iam positus in ferali loculo ferebatur in sepulchrum. Diues multarum erat opum & plurima clarus parentela, sed quid tandem ex omnibus secum refert? Linteolum quo sepeliatur. Nihilne præterea? Nihilne pecunia? nihil supellectilis & tanticultus quem ita studiose conquisiuit? Nihil prorsus. *Nudus egressus est de utero matris suae, & nudus reuertetur illuc. RELINQVENT alienis diuitias suas, & sepulchra eorum domus illorum in aeternum.* En quò recidit tandem quidquid Concupiscentia oculorum de terrenis rebus sibi tam auide attrahit. En quod expendat accuratè quisquis opibus potius quam bonis operibus cumulandis vacat. *Nihil intulimus in hunc mundum, haud dubium quod nec auferre quid possumus.*

Sic Christus Dominus hanc concupiscentiam refrænabat, *Stulte, hac nocte animam tuam repetunt à te, quae autem paraasti, cuius erunt? Sic est omnis qui sibi thesaurizat, & non est in Deum diues.* Quo de Christi sermone sanctus Petrus Chrysologus tantum ad rem nostram momenti deriuabat, vt diceret: *Quotiens Diues iste venit in medium, quem tot saeculis, orbe toto, die omni, clamor diuina vocis accusat; quotiens diuitiarum fallax fugatur illecebra, quotiens cupiditatu furens flamma restinguitur, auaritia quotiens rabies*

Mortificandis concupiscentiis opportuna Mortis memoria. 137
rabies vesana mitigatur. Quia videlicet quàm sint euanida & nulla terrena omnia, cum hic euidenter à morte pateat, facile despuuntur.

TERTIVS est status Lazari quadrituò iam iacentis in se. Ioan. 11.
pulchro. Postrema domus hæc est humani corporis, & funesta illa hæreditas quam cum serpentibus habitat, vbi vix aliquot hæsit diebus cum ecce paulatim in tabem, in puluerem, in cineres, & in horrendum penè nihilum quidquid erat reducitur. *De-tracta est ad Inferos superbia tua, concidit cadaver tuum, subter te* 1s. 14.
sternetur tineæ, & operimentum tuum erunt vermes.

Sic superbia vitæ deprimitur, sic illa Concupiscentia quæ animos effert sublimius, habet quò se abjiciat & contundat, dum vno vili puluisculo se ita constrictam intuetur, vt ne vltra cineres, & infima quæque terræ segmenta possit emergere.

Diceres Deum superbiæ nostræ Cinerem, quo tumorem eius infringeret, velut intumescenti mari arenam apposuisse, & hoc ipsum nobis morituris quod Iobo dicere: *Circumdedit mare termi-
nis meis, & posui vectem & ostia, & dixi, vsque huc venies, & non
procedes amplius, & hic confringes tumentes fluctus tuos.* Et quod per Ieremiam: *Posui arenam terminum mari, præceptum sempiter-
num quod non prateribit, & intumescant fluctus eius, & non transibunt.* Ita plane superbis hominibus, quantumcumque se in sublime tollant, illic tandem in sepulchro fixus est puluis & cinis exiguus quo tota illa sublimitas detumescat & deficiat, vnde iam illis dicitur, *Quid superbis terra & cinis?* Sic vesiculam gutturis & Ecclesi. 10
plumas auium immolatorum, quæ sunt superbiæ symbola, sacerdos sacrificaturus prolicere iuebatur, *prope altare ad orien-
tem plagam, in loco in quo cineres effundi solent,* inquit Scriptura, Leuit. 1
quali diceret, vbi superbus suos aliquando fore cineres cogita-
bit, ibi suam deponet & sacrificabit superbiam. *Quia gloria eius* 1. Mach. 2
*stercus & vermis est: hodie extollitur, & cras non inuenietur: quia
conuersus est in terram suam, & cogitatio eius periit.*

III. PUNCTVM.

MORTIFICANDIS igitur concupiscentiis opportuna mortis
memoria, quæ rerum vilitatem quas appetunt Concupis-
2. Pars. S

- centiæ, dum demonstrat; tam facile appetitum earum retundit, quam facile est cum Dei Gratia quæcumque sunt vilia & abiecta non concupiscere. *Nolite declinare post vana quæ non proderunt vobis, neque eruent vos, quia vana sunt;* adde quia sunt vilia, fœda, indecora, fallacia, scelerata, noxia, perniciosissima quæ peccatum & æternam inuehunt perniciem. Et tamen his confectandis rebus, his nutriendis concupiscentiis, his appetitionibus sustentandis tota Mortalium vita transmittitur! *O vere terra inanis & vacua! ô vere vanitas vanitatum, & omnia vanitas. Quid habet amplius homo de vniuerso labore suo quo laborat sub sole? id est, quid aliud agit & laborat homo, quam sic vanitatem confectari? Verè mendacium possederunt Patres nostri, vanitatem quæ eis non profuit.* Resipiscamus ab hac insania. Ecce nunc tempus cum cineres imponuntur nobis, quasi iam eo redacti simus, quasi iam de carne nostra dicatur quod aliquando dicendum est:
- Gen. 8.* Hæccine est illa quæ corrupit viam suam? Hæccine est illa quæ sui curam in desideriis volebat fieri? Hæccine est illa quæ concupiuit aduersus spiritum? Hæccine est illa Iezabel!
- 4. Reg. 9.*

Perge per omnes corporis & vitæ partes, tibi ac aliis vehementius objicere, quanto interuallo status discedant à seipsis, qui suis olim vixerunt concupiscentiis, & qui modo in sepulchris iacent.

- Bar. 3.* Vbi sunt principes Gentium? vbi sunt qui argentum thesaurizant & aurum in quo confidunt homines? Exterminati sunt & ad inferos descenderunt, & alij loco illorum surrexerunt.

- Exædificentur quantumvis ampla & magnifica monumenta: statuantur obelisci, pyramides, & ad omnem posteritatis memoriam transmittendam, incidatur Cedro, vel æri, memoratum illud HIC IACET, fallacia tantum est, umbra est, pulvis est,
- Dan. 2.* Cinis est, hoc vnum iacet in sepulchro. Mors tamquam absissus lapis de monte sine manibus, percussit statuam in pedibus eius ferreis & fictilibus, & comminuit eos. Tunc contrita sunt pariter ferrum, testa, as, argentum & aurum, & redacta sunt quasi in favillam æstiuæ aræ, quæ raptæ sunt vento. Denique Memoria vestra comparabitur cineri, & redigentur in lutum ceruices vestra. Quibus Iobi verbis declarandis apte concludet sanctus Gregorius: Omnes qui cogitatione terrena huic sæculo conformantur, per omne quod agunt, huic mundo relinquere sui memoriam conantur. Alij bellorum
- Iob 13.*
- L. II. Mor. c. 17.*

titulis, alij altis ædificiorum mœnibus, alij desertis doctrinarum secularium libris instanter elaborant, sibi que memoria nomen adificant, sed cùm ipsa ad finem celerius vita percurrat, quid in ea fixum stabit, quando & ipsa celeriter mobilis pertransit? Aura etenim cinerem rapit, sicut scriptum est: Non sic impij non sis, sed tamquam pulvis quem projicit ventus à facie terræ. Rectè ergo stultorum memoria cineri comparatur: quia illic ponitur, ubi ab aura rapiatur, quantumlibet enim quisque pro facienda gloria sui nominis elaboret, memoriam suam quasi cinerem ponit, quia hanc citius ventus mortalitatis rapit: quo contrà de justo scriptum est: In memoria aterna erit iustus. Eo ipso enim quo facta sua solius Dei oculis imprimit, nomen sua memoria in aternitate figit. Psalm. i.

Tum vero pergens explanare quod in sacro sequitur textu. Et redigentur in lutum cervices vestra. SICUT, inquit, per oculum visus, sic per cervicem solet superbia designari. Cervix itaque in lutum redigitur, cùm superbus quisque humiliatur in morte, & elata caro tabescit in putredine. Intueamur enim qualia in sepulchris iaceant diuitum cadavera, quæ illa in extincta carne sit imago mortis, quæ tabes corruptionis, & certè ipsierant qui extollebantur honoribus, habitis rebus tumeant, despiciebant ceteros, & quasi solos se esse gaudebant: & dum non perpenderent quo tendebant, nesciebant quid erant. Sed in lutum cervix redacta est: quia despecti iacent in putredine, qui tumeant in vanitate. In lutum cervix redigitur, quia quantum carnis potentia valeat, tabes corruptionis probat. Ps. iii.

ANNEXA PRÆCEDENTI, AD INORDINATOS RERVM AFFECTVS, MEMORIA MORTIS, ORDINANDOS.

VERITAS PRACTICA.

Quæ viuenti res fuit gratior, hæc fiet morienti
graviior.

RATIO est non solum quia gravius est morienti relinquere quod
viuenti fuit gratius: verum quod hic vel maxime conside-
randum est; Hæc censenda est morienti res graviior quæ infæ-

licem mortem potest inuehere.

Sed quæ uiuenti res fuit gratior, hæc infœlicem mortem potest inuehere.

Ergo & hæc manifeste fiet morienti grauior; ac proinde diligenter ordinanda rei prouidendum ipsâ propositâ mortis memoriâ.

REM valde ponderosam continet prima propositio, sed minimè dubiam aut intellectu difficilem.

Secunda ex antedictis in 1. parte, Dominica 4. Aduentus: & in 2. partè, Dominica Septuagesimæ, sat fuse probari potest sic procedendo: Mors infœlix illa censenda est, quæ in peccato accidi; sed mors plerumq; talis accidit ab illa re quæ uiuētī fuit gratior, inordinate scilicet concupita, seu quæ fuerit *Inmunditia, impudicitia, luxuria*, seu quiuus prauus & impurus amor triplicis illius concupiscentiæ de qua supra; Vnde & etiam inimicitia, contentiones, amulationes, ira, rixæ, dissensiones, secta, inuidia, homicidia, ebrietates, comessationes & his similia quæ prædico vobis, inquit Apostolus, sicut prædixi; quoniam qui talia agunt, regnum Dei non consequentur. Quid est regnum Dei non consequentur, nisi quod in peccato moriantur? Cur autem in illo peccato moriantur? Nonne possunt confiteri? Sed non conterentur, non rite confitebuntur, non eos vere pœnitebit. Hoc certe necesse est ex verbis inferre Apostoli: nam sicut si rite confiterentur aut contererentur, regnū Dei consequerentur, ita plane si quod affirmat Apostolus, regnum Dei non consequantur, neque illi conterentur, neque illos vere pœnitebit. Cur porro non illos pœnitebit? Quia, vt locis supra indicatis differitur, non est vera pœnitentia, nisi exuatur non tantum peccati, sed & rei affectus quæ plus nimio colebatur; vix autem illi exuunt talem affectum moriendo quem viuendo nimium nutrierunt. Hoc est cor durum quod habebit male in nouissimo: ET omnis qui ceciderit super illum lapidem, conquassabitur, ait Dominus, super quem autem ceciderit, comminuet illum. OSSA eius implebuntur vitis adolescentia, & cum eo in puluere dormient. Hæc pridem ex Iobo, dicta sunt, sed non ista quæ sunt valde illustria. Pauit, inquit Beatus Iob de peccatore, pauit sterilem & quæ non parit, & vidua bene non fecit: Vbi Diuus Gregorius: Quæ hoc loco sterilis nisi Caro nominatur?

Gal. 5.

Ecclesi. 3.

Luc. 20.

Iob 20.

Ibid. 24.

Quæ viuenti res fuit gratioꝛ, hæc fiet morienti grauior. 141

quæ dum sola præſentia appetit, bonas gignere cogitationes neſcit. Quæ autem vidua, niſi anima nuncupatur? quæ quia ſibi Conditor coniungere voluit, ad thalamum vteri virginalis venit, Pſalmiſta atreſtante, qui ait: Et ipſe tanquam ſponſus procedens de thalamo ſuo: Pſalm. 18. quæ recte vidua dicitur: quia eius vir pro ea mortem pertulit, & nunc in cœli penetralibus ab eius oculis occultus, quaſi in parte aliterius regionis viuit.

Iniquus ergo ſterilem paſcit, & vidua benefacere negligit, quia carnis deſideriis ſeruiens, curam animæ vitamque contemnit. Tota namque intentione omnique ſtudio cogitat, quomodo ſine ullis neceſſitatibus caro moritura ſubſiſtat, & curare animæ vitam deſpicit, quæ vel in morte vel in beatitudine procul dubio in perpetuum viuit.

Recte autem cùm diceretur. Pauit ſterilem: protinus adiungitur: Et quæ non parit. Quædam namque ex Sacra Hiſtoria ſæminas nouimus ſteriles extitiſſe, & tamen in tempore extremo peperiſſe. Caro autem non ſolum ſterilis, ſed etiam quæ non parit dicitur: quia ſuo ſenſu bonas cogitationes gignere, nec in vltimis valet. A vigore enim iam proprio deſicit, & tamen adhuc tranſitoria concupiſcere non deſiſtit: iamque à priſtino robore laſſata, penè ab ipſo quem diligit mundo repellitur, & tamen adhuc annuſu improbo obtinere temporalia conatur. Agere iam peruerſa non ſufficit, ſed tamen cogitare vel quæ non agit nequaquam deſiſtit.

Recte ergo non ſolum ſterilis, ſed etiam non pariens dicitur: quia ſuo ſenſu, vt diximus, ad bonæ cogitationis prolem, nec cùm infirmata fuerit, fætatur.

Ex quibus, quàm manifeſta ſit Veritas ſat liquido patet; ſed vrgenda eſt acrius, & quoties illa incus, dicendo ad populum, tundenda obuenerit, non eſt parcendum ſermoni, nec timenda repetitio quia hoc vnum cùm alias, tum hoc agenda poenitentia tempore, comprimis inculcandum. *Conuertimini ad me in toto cor. 2.* corde veſtro, in ieiunio, & fletu & planctu, & ſcindite corda veſtra, & non veſtimenta veſtra.

ET VERO, IN EVNDEM FINEM, ALITER.

VERITAS ITA POSSET ENUNTIARI.

Vt Vita mortem ordinat, ſic Mors vitam.

142 FERIA 4. Cinerum. Ad affectus ordinandos, mortis memoria.

SENSVS & Ratio est quod tunc vita mortem dicitur ordinare quando bene est ipsa ordinata vita. Nihil hinc dubij.

SED vt bene ordinetur vita, facit imprimis attenta Mortis Consideratio, vnde facile est intelligere quod sicut vita mortem ordinat, sic mors vitam, hoc sensu vt mortis recordatio sit vitæ ordinatio.

Gen. 2.

Certe hoc vno videtur Deus voluisse primum hominem suo in officio continere: *In quocumque die comederis*, inquit, *morte morieris*, id est, morti eris obnoxius; Quod ita quidem homo sibi alte impresserat, vt cum primum à Serpente moueretur ad esum vetitum, hoc se vno verbo tutatus sit, *Ne forte moriamur*. Tum vero fraudulentus hostis cum animaduerneret quantas iam haberet vires in humanis animis, ad vitā recte ordinandam, ista mortis Cogitatio, cepit omnibus machinis illam conuellere, *Nequaquam*, inquit, *morte moriemini*, qua persuasionē facta, mox hominem facile de suo dejecit statu. Ac tum præcipue dicitur miser ille homo peccati poenitudinem sensisse sui, cum Abelem vidit enecatū. Vidit quid esset corpus sine anima, quam foedum & horrendum! quid anima sine corpore, quam infelix & destituta, nisi dum vixisset foelicitati suæ comparandæ vacasset!

Enc. 12.

Sic humani generis Reparator Dominus, nos totos voluit in ea mortis cogitatione, cum nos in quouis vitæ momento ita succinctos & paratos voluit quasi iam iam morituri essemus: nec aliter vitam traheremus quam vt Gubernator ex puppi quæ est postrema pars naui, nauigiū ducit; sic nos à morte vitam regere disceremus, & cum Apostolo diceremus: *Mors in nobis operatur*. Ad quæ verba S. Ambrosius: *Certe Apostoli moueor autoritate*

2. Cor. 4.

1. de bono
mortis c. 3.

dicētis, Ergo mors in nobis operatur, Tum tūc narrans quamobrem sic à morte vita dirigitur & inordinatur. *Sæpe*, inquit, *fallimur visu, & aliter pleraque quam sunt videmus: fallimur etiam auditu, & ideo non contemblemur illa quæ videntur, sed quæ non videntur, si nolumus falli. Quando igitur anima nostra non fallitur? quando solum veritatis attingit, nisi quando se ab isto secernit corpore? Et quæ plura profequitur, quorum sensus est, Quod sicut ad vitam recte ordinandam oportet rectum de rebus humanis iudiciū sibi formare: sic ad rectum hoc formandum iudiciū, oportet aduocare sensum mortis non vitæ: oportet de rebus id sentire & iudicare quod in-*

stante morte sentiemus, quia tunc anima non fallitur sicut in vita, cui sensus illudunt; ac proinde rectius & sanius sentit.

Quod & sanctus Gregorius sic apertius dilucidat: *Qui confi-* 13. Mo. 19.
derat, qualis erit in morte, semper fit timidus in operatione, atque
vnde in oculis suis iam quasi non vivit, inde veraciter in oculis sui
Conditoris vivit. Nil quod transeat appetit, cunctis presentis vite
desideriis contradicit, & penè mortuum se considerat qui moriturum
minime ignorat. PERFECTA enim vita est mortis Imitatio,
quam dum Iusti sollicitè peragunt, culparum laqueos evadunt; Vnde Ecclesi. 7.
scriptum est:

In omnibus operibus tuis, memorare nouissima tua,
& in æternum non peccabis.

Cuius quidem diuinæ Sententiæ tamquam Veritatis admodum practicæ, vel coniunctim cum aliis, vel separatim, posset hæc reddi Ratio & fructosè perpendi.

Cum vix aut ne vix aliter pecces quam cupiditate boni, vel timore mali, si hæc duo sustuleris, non peccabis.

Sed memorare nouissima tua, nec difficulter hæc duo tolles.

Ergo non peccabis.

AD primam propositionem, explicandum esset ex aliis sparsim locis, quod sicut vita naturalis vnde omnes humani actus procedunt, duobus duntaxat cordis motibus consistit qui dicuntur Diastole & Systole, seu dilatatio & contractio, quibus spiritum siue aërem Cor animantis vel extrudit vel attrahit, vnde pulsus efficitur: sic illa vita quæ dicitur in homine sensualis vnde cuncta emanant vitia, duobus hinc præcipuis agitur affectibus, Complacentia seu Cupiditate rei sensibilis, & displicentia seu Timore mali oppositi.

Sic Aristoteles in Ethicis: *Quod in cogitatione affirmatio & negatio, hoc in appetitu, persecutio & fuga.* 6. Eth. 3.
Sic sanctus Augustinus in Psalmis. *Omnia peccata duæ res faciunt in homine, cupiditas & timor.* In Ps. 79:
Cogitate, discutite, interrogate corda vestra, perscrutamini Conscientias, videte utrum possint esse peccata, nisi aut cupiendo aut timendo. Vide quæ plura prosequitur in prima parte, die 2. Decembris. Sic & sanctus Gregorius: *Duobus modis ad culpam* 6. Mor. 13:
unusquisque pertrahitur: aut enim delectatione perducitur, aut timore superatur.

Fieri posset inductio per vniuersas peccatorum species. Vnde enim Auaritia nisi ex cupiditate bonorum temporalium, vel metu paupertatis? unde Acedia nisi ex nimia quietis cupiditate vel laboris metu? unde Ira nisi ex cupiditate vindictæ, & proprii timore damni. Sic perge in aliis, & aduerte quod est valde deplorandum, sic horum alterutro Cor humanum esse affixum, ut si vnum superet, superetur ab alio, nisi cum Diuina Gratia diligenter aduertat, & vtatur mediis ordinatis, quorum vnum est præstantissimum, *Memorare nouissima tua*. Sic enim vtrumque temperatur, & cupiditas boni sensualis & timor mali, quæ secunda erat propositio, & quæ satis euidenter ipsa comprobatur experientia.

Nam cum memorata nouissima repræsentent cupiditati maius bonum quam quod peccato quæritur, & timori maius malum quam quod, nisi peccet, timetur: profecto sicut naturale est præferre maius bonum aut malum minori, sic bene iuuante Domino, facillimum erit omnem cupiditatem, vel inordinatum metum reprimere, propositis illis vel maioribus bonis vel malis quæ in futurum expectantur.

Ep Ps. 79. Sic apte sanctus Augustinus: *Amabas terram, ama vitam eternam, timebas mortem, time gehennam. Quidquid tibi iniquo promiserit mundus, numquid potest dare quantum dabit iusto Deus? quidquid tibi iusto minatus fuerit mundus, numquid potest facere quod facit iniquo Deus? Vis audire quid daturus est Deus si iuste vixeris: Venite benedicti Patris mei, percipite regnum quod vobis paratum est ab origine mundi. Vis audire quid facturum est impiis: Ite in ignem eternum qui paratus est Diabolo & angelis eius. Bene quidem tu nihil aliud vis quam ut tibi bene sit: Nam in eo quod amas, vis ut benè tibi sit: & in eo quod times, non vis ut malè tibi sit: sed non in ea regione queris in qua quarendum est. Festinas, nam & sine indigentia vis esse, & sine molestia. Bonum est quod vis, sed tolera quod non vis ut assequaris quod vis.*

Rom. 66. in Ioan. Sic Christus Dominus in hodierno Euangelio, ut dehortetur à thesauris thesaurizandis in terra, thesauros in coelo proponit qui & merito & dignitate terrestres superent. Nam & Corporum pulchritudo, inquit Diuus Chrysostomus, quoad pulchrius non deprehenditur, in admiratione habetur: cum vero aliud præstantius apparuerit, illa prior despicitur.

Sic

Sic sanctus Eucherius in sua parænetica, quod Nepoti hoc nobis. *Amantes*, inquit, *vitam*, hortamur ad vitam: vera ratio est persuadendi, cum id poscitur ut impetremus à vobis quod concupiscitis, pro vita quam diligitis legatione apud vos fungimur: & sane quam omnes exiguum amatis, insinuamus ut ametis aeternam, quam quo pacto amemus nescio, si non hanc quam amamus esse quam speciosissimam cupimus. Itaque istud quod & cum actum sit placet, placeat magis si potest esse perpetuum, & quod apud nos pretium habet cum finem habeat, sit nobis supra pretium si potest esse sine fine.

Neque dicas, præsentia nos longe magis afficere quam futura, non est enim usquequaque verum: & manifeste apparet in multis naturalibus ac humanis rebus, quantum futuris demus potius quam præsentibus. Cum semen terræ mandas, cum pecuniam credis Mercatori, cum mari merces exponis, quid hoc aliud est quam præ futuris præsentia spernere?

Et licet humana deessent exempla, nonne in contemptu præsentium ac futurorum expectatione, tota nostra versatur Christiana Religio? Nonne hæc sunt Fidei, nonne Spei & Caritatis maxime propria munia, credere quod non vides, sperare quod non adest, & quod abest diligere? *Non contemplantibus nobis* 2. Cor. 4. *qua videntur, sed qua non videntur; qua enim videntur, temporalia sunt: qua autem non videntur, aeterna sunt.* Quamobrem quantum æterna credes commoda vel incommoda longe his esse temporalibus grauiora; tantum necesse est ut in utrorumque contentione cedant minora maioribus; ac proinde cum illa bonorum & malorum huius vel futuræ vitæ contentio tunc interueniat quando in occurfu peccati nouissima memorantur: Nonne vides quam vere sit & sapienter dictum ut illa memoreris, & non peccabis?

Qua de re, quantum ad praxim, sic iterum sancti Patres. *Nihil* L. 2. de Gen. c. 28. *sic retinet homines à peccato*, inquit sanctus Augustinus, *quemadmodum imminentis mortis cogitatio.* Et rursum, *si diem mortis sue homines cogitare vellent, animum suum ab omni cupiditate vel malitia cohiberent.* Sic coherenter sanctus Ambrosius de futuro iudicio, *Si mente cernerent peccatores quale iudicium imminet mundo,* Serm. 3. de Innoc. *sensus humanus non dispergeretur vanitate seculari, si non infidelitate* L. ad Virg. lapp. c. 8. *grauaretur.* Frænum hoc animæ peccatricis vocat sanctus Basilii. In Ps. 35. *lius.* Cassianus vero generaliter hoc esse ait omnium vitiorum collat. 10.

146 FERIA 4. Cinerum. Cum jeiunatis, nolite fieri sicut, &c.

L. 3. de vita consēp. c. 12. peremptorium; Sanctus Hieronymus de se passim profiteretur, contra rebellantes cupiditates his præsertim pugnasse armis. Sanctus denique Prosper, postquam multa sane horrenda de futuræ vitæ suppliciis commemoravit; *Hæc*, inquit, *& similia multa cogitare, nihil est aliud quam vitiis omnibus repudium dare, & omnia blandimenta carnalia refrænare.*

Sicque opportunè hoc ineunte tempore quo peccato debellando potissimum aperitur campus, Mortis memoria, tamquam armatura potentior exhibetur. *MEMENTO homo quia pulvis es.* MEMORARE novissima tua. *INDVITE vos armaturam Dei.*

IN EADEM FERIA.

AD HÆC VERBA EVANGELII:

Cum jeiunatis, nolite fieri sicut hypocrita tristes, &c.
Matth. 6.

VERITAS PRACTICA.

Magis modo peccant qui ne boni appareant hominibus, non jeiunant: quàm olim tristes hypocritæ qui vt boni apparerent, jeiunabant.

RATIO est, quia magis peccant qui peccata multiplicant quam qui vnum duntaxat peccant. Cæteris scilicet paribus. Vnde *Eccl. 7.* *Sapiens, Non semines mala in sulcis iniustitiæ, & non metes ea in septuplum. Ac paulo post: Neque alliges duplicia peccata, nec enim in vno eris immunis. Hæc sunt plana.*

SED qui ne boni appareant hominibus, non jeiunant, peccata multiplicant, cum tristes hypocrita tantum vno peccent. Præsupponitur, quod est satis certum & evidens, multos modo esse, qui propterea non jeiunant, aut qui certe parati sunt non jeiunare, siue jeiunium soluere, quando quid humanum verebuntur; ne ab aliis scilicet dicto noerentur aliquo.

Tanta est humani respectus inhumanitas & prope dixerim Immanitas, ut sic multorum appetat Conscientiam & prorsus enecer. Ducebatur honori quondam Pietas, unde ut sibi famam colligerent, se videri pios ac jeiunantes gestiebant hypocrita: quod erat certe impium. At modò pietas quasi probrosa esset & indecora sic à plerisque despicitur, ut ne ipsi despiciantur, nolunt videri pij & jeiunantes. Quod tanto magis est impium quo plura in vno colliguntur peccata. Vide & exhorresce. Primo non jeiunant, quod est illi capitale qui præcepto tenetur, *Nam, Serm. 61. ut ait sanctus Augustinus, aliis diebus jeiunare remedium est, aut de temp. premium: In quadragesima non jeiunare, peccatum est.* Secundo, non jeiunant contra Conscientiam: quia jeiunarent, nisi hoc respectu prohiberentur, quod satis vident non esse legitimum impedimentum, sed tamen ita validum sentiunt ut illi cedant. Qua in re non sibi solis injuriam faciunt sed religioni sed Christo, cuius obsequium ita postponunt mundo, ut dum coram hominibus apparere jeiunantes erubescunt, erubescant servire Christo.

Dicent se vanam fugere gloriam; Sed vanum illud est quod dicent, & gloriosum effugium: Nam constans illa teneri debet Veritas, quæ tertia parte declaratur: *Sicut humana aspectu gloriæ* *Per. 6.* *non est opus ponendum, ita nec eius despectu deponendum.* Siue lau- *Hebd. 4.* dent, siue vituperent homines, Christo serviendum erat, præcepto parendum erat, nec propter hominem Deus deferendus. *Ne Ecclesi. 42.* accipias personam ut delinquas.

Adde id quod expendi multum deberet ad peccatorum cumulum facilius agnoscendum. Libertas hæc ita soluendi jeiunii ex humano metu siue respectu, vix umquam abest à scandalo, quod & probis & improbis datur. Probis quidem, quia vident eum quem alioquin satis probatæ norunt vitæ, sic turpiter mundo cedere, ut non ausit profiteri se Christi servum ac eius Ecclesiæ filium. *Væ illi per quem hoc scandalum venit.* Improbis vero quia *Manb. 18.* sic indurantur in sua prauitate, nec putant id habere locum præcepti quod tam facile soluitur ab iis etiam qui minus soluti sunt. *Confortastis manus impij ut non reuerteretur à via sua mala.* O ter *Ezech. 13:* geminum malum! Et peccare non jeiunando! Et non jeiunare metu quodam humano! Et sic soluto jeiunio, solutiores nonnullos alios reddere! O quam vere dictum: *Humanus respectus, Inhumanus Christi despectus.* Vide infra Sabbato Hebdomadæ Passionis.

148 FERIA 4. Cinerum. Cum ieiunatis, nolite fieri sicut, &c.

QVIA tamen vox illa *hypocrisis*, & quam in se complectitur malignitatem plus aliquid semper horroris infert ad detestationem vitij quam quidquid diximus contra eos qui ex humano respectu non ieiunant, Age videamus hoc etiam nomine quàm illi grauius supra quam tristes hypocritæ peccent: Et hæc propterea præcedenti adiungatur

VERITAS PRACTICA.

Non est minus hypocrita qui ne appareat hominibus, non ieiunat: quam qui ieiunat vt appareat.

RATIO est facilis, vt quæ ex ipsa *hypocrisis* notione & natura petitur. Quid est enim esse hypocritam nisi esse dissimulantem, & sua dissimulatione affectantem apud homines aliquam gloriam? Nonne hoc vnum est quo illi tristes hypocritæ arguuntur qui ieiunando suas exterminant facies, vt appareant hominibus ieiunantes, & inde rumusculos aucupentur? *Va vobis hypocritæ qui similes estis sepulchris dealbatis.*

Sed qui ne appareant hominibus, non ieiunant, sic dissimulanter agunt, & sua dissimulatione sic affectant apud homines aliquam gloriam.

Primo quidem dissimulatores sunt, nam dum nolunt apparere ieiunando quales sint, apparent non ieiunando quales non sint; apparent enim id agere ex animo quod ex humano duntaxat agunt intuitu: apparent id probare intus vel improbare quod foris tantum præ se ferunt; apparent denique sic conuiuantes sine timore quasi nullam ieiunij legem ac religionem crederent, quod est omnino falsum & simulatum. *Ingredere vxor Ieroboam, quare aliam te esse simulas? Ego autem missus sum ad te durus nuntius.*

Quod vero vanam inde venientur gloriam, ipse humanus respectus, ad quod vnum mouentur mobile, satis aperte indicat. Neque refert quod forte dicunt se non tam quærere gloriam, quàm contemptum fugere; nam eiusdem superbix prorsus est si pecces ne contemnaris, ac si pecces vt lauderis. Fac peccatum ablit dum contemni fugies, sic effugies superbix notam: sed malle peccare non ieiunando ne contemnaris, quàm contemni ieiunando; plane superbi est, non minus execrandi quàm qui ieiunet vt prædi-

cetur. Hoc est enim vt dictum est, Christum erubescere, si non audes profiteri quando Religione teneris; teneris autem, quando peccas nisi ieiunes, peccas vero si ex solo humano respectu ieiunij legem violas.

Si voluntarium esset ieiunium & non præceptum, forte aliquando ex occurrenti & non præuiso quorundam congressu hominum solui posset: sed dum solennes hi ieiuniorum aguntur dies, non est Christiani timere mundum irridentem, non est Catholici se alium fingere quam quis esse vellet, nisi timeret. *Va Eccles. 2: duplici corde. Va dissolutis corde. Va his iterum qui perdiderunt sustinentiam, & qui dereliquerunt vias rectas, & diuerterunt in vias prauas. Et quid facient cum inspicere caperit Dominus? Nonne hæc illos Scriptura tangit?*

Tangit & acriter inter alios Patres, sanctus Basilius in suo hexameron, vbi de natiuis quorundam animalium proprietatibus. *Non silebo, inquit, polipi dolos ac furacitatem: Is cuiusque saxo ad-* Hom. 7.
haferit, illius colorem subit, atque adeo vt piscium complures ad ipsum de improviso nantes, tamquam ad saxum appellant, paratamque se prædam illi offerant. Tales sunt qui sobrietatem cum sobriis laudant, INTEMPERANTES sunt cum INTEMPERANTIBVS, atque ad id quod cuique placet, suam omnino sententiam vertunt.

Quod & idem expressius alibi: *Hypocrita dicitur histrio qui in* Hom. 7. de ieiunio.
theatro personam sustinet alienam: Sape Heri cum sit seruus, aut Regis cum sit priuatus. Itidem in hac vita plerique vitam suam veluti è proscenio ad ostentationem componunt, aliud in corde gerentes, aliud in specie, hominum oculis præ se ferentes.

Cui conformiter S. Augustinus: *Sunt hypocrita simulatores, tamquam pronuntiatores alienarum personarum, sicut in theatricis fabulis, sic in omni vita quisquis se vult videri quod non est, hypocrita est.*

Ac proinde si hoc ita nomen infame est, vt ab honesto quocumque sustineri nequeat, quomodo non confundetur potius hoc nomine qui confusionem metuit viri ieiunantis? *Confusi sunt, quia abominationem fecerunt, quin potius confusione non sunt confu-* 1er. 6.
si, & erubescere nescierunt; quamobrem cadent inter ruentes, in tempore visitationis sue corruent, dicit Dominus. Vide locum Scripturæ.

150 *Feria 4. Cinerum. Quam graviter peccent non jeiunantes.*

QVÆ vero plures de Ieiunio proponi possent Veritates, in hanc commode incident, qua gravius & damnosius esse intelligetur quam putetur, peccatum non servati ieiunij.

Vix aliud peccatum est minus solubile, quàm soluti ieiunij.

RATIO est, quia peccatum illud est minus solubile, cuius est rarior pœnitentia, seu cuius peccatorem rarius pœnitet; Vnde si nulla erit peccatoris pœnitentia, nulla est prorsus peccati solutio. *Ep. 48.* Nec quemquam putes, inquit sanctus Augustinus, ab errore ad Veritatem, vel à quocumque seu magno seu parvo peccato ad correctionem, sine pœnitentia posse transire.

Sed rarius huiusmodi peccatorem pœnitet sui soluti ieiunij Quadragesimalis. Vix enim vniquam talis emendatur, & quantumcumque peccatum confiteatur, vix emendationem proponet ex animo. Certum est autem nullam esse peccati pœnitentiam, nullam eius Confessionem aut solutionem, nisi firmum emendationis propositum adiungatur. Sic idem sanctus Augustinus: *Serm. 7. de Temp.* pœnitentiam certam non facit nisi odium peccati, & amor Dei, quando sic pœnitet, ut tibi amarum sapiat in animo, quod antè dulce fuit in vita. Sic in sacris Conciliis vbi explicantur partes pœnitentiae, semper adiungitur Contritioni vel Attritioni, *Sess. 14. c. 4.* propositum non peccandi de cætero. Expressa sunt Tridentini verba.

Si quis forte vno aut altero ieiunii die peccasset, certe is puto quantocyus in ipsa etiam Quadragesima confiteretur, & confitendo proponeret resipiscentiam: sed qui nullos vel paucos dies inexcusati abstinent, & pro more suo sibi quod volunt totis indulgent esurialibus Feriis, iamque ad annuam accessuri synaxim de Confessione cogitant; confitentur quidem se non ieiunasse, nec ignorant esse peccatum, sed an verè de peccato doleant & ita resipiscant; ac proponant se totam deinceps ieiunaturos Quadragesimam, sicut omnino necesse est ut proponant & id verè velint; valde est rarum, & vix vniquam verum. *1. 56.* Canes impudentissimi, nesciunt saturitatem. Omnes in viam suam declinaverunt.

Vnde huius defectu propositi, nulla prorsus est pœnitentia, nulla peccati solutio, nulla vel vnius peccati remissio: Neque enim vno mortali retento, soluuntur alia. Vel nullum vel om-

nia Confessione simul dimittuntur. Ex hac porro manca Confessione quid sequitur nisi sacrilega Communio, nisi vita scelerata, nisi mors impia, seu pessima mors impiorum? Nam in illa postrema vitæ deficientis tempora reservare propositum servandæ Quadragesimalis inediæ, quis non videat ridiculum?

PATET igitur euidenter, non modo vix aliud peccatum esse minus solubile quam soluti ieiunij, sed quanta inde salutis pericula, quanta inde futura importentur exitia, & æterna damna! Nec iam miror sanctos Patres tot grauibus, sacrum hoc commendasse ieiunium, verbis ac sententiis, cum optimè nossent, quanta in hoc esset multorum licentia, & quanta inde pernicies.

Audi sanctum Ambrosium, qui totus alioquin est melleus: *Quisquis Christianus ieiunando non impleuerit Quadragesimam; prauaricationis & contumacia reus tenebitur.* Et rursum, *Non leue peccatum est fideliter indictam Quadragesimam à Domino, non ieiunare.* Neque id temerè dictum putes, & non certa scientia: nam tametsi abessent illa damna & exitia quæ peccatum, vt vidimus, consequuntur, in ipso etiam peccati actu non vna quædam est malitia, sed multiplex & robusta quædā improbitas, non tantum ex graui numero repetiti per tot dies actus, sed multo magis ex peruiacitate quadam animi qua tanto tempore, contra tot mentis stimulos, obstinatè peccator persistit in sua vitæ intemperantis licentia. Itane ventris ingluuies tam expresso præualeat & præcepto, & tam certo salutis periculo? *Si ignorans Ionathas*, inquit idem sanctus Ambrosius, *indictum à Patre ieiunium quia resoluerit, morti addicitur, qui sciens à Christo indictum resoluit, quid meretur?* quasi diceret, quæ Ionathan excusabat ignorantia, nullum eorum excusat qui non ieiunant, quia vel probe id sciunt se teneri, vel id scire possunt: & si malint ignorare ne sciant se obligatos, non minus ignari peccant non ieiunando quam si scirent quod ignorant. Præterea vero Ionathas semel tantum peccauit; at illi quoties? Ionathas vnâ duntaxat mellis guttam in summitate Virgæ delibauit, at illi quibus se tradunt epulis? Ionathas in sua singulari necessitate id præstitit; illi vero mera ex voluptate.

Dicent forte, non id ex gula sibi assumere, nec se pluribus onerare cibis quam si ex lege ieiunii victitarent; sed his legibus

152 FERIA 4. Cinerum. Quam grauiter peccent non ieiunantes.

non posse se deuincire, non posse non facere sibi liberum quolibet tempore, sibi quid indulgere. Sic plane est ut dicunt, tanta est ieiunij facilitas ut vix à solita discrepet mensa: sed tanta est illorum viuendi libertas, ut licet exile sit quod ieiunando exigitur, nolint omnino tamen; non quod illis sit molestum, non quod operosum aut difficile: sed quia nolunt, quia non placet, non placet libertatem suam constringere, volunt esse liberi: ieiunabunt si forte placet, aut si non placet, non abstinébunt. O peruicacem mentem, ô verè rebellem animum, cui pridem à Domino dictum: *Confregisti iugum meum, rupisti vincula mea, & dixisti, non seruiam.*

Ier. 2.

Rom. 16.

Hoc est scilicet se manifestè subtrahere à Christi cultu & mancipio. Hoc est sibi non Christo viuere: siue ut ait Apostolus, hoc est non Christo, sed suo ventri seruire. Hoc est totum Euangelium eiurare, quod totum est in se abnegando & ferenda cruce, non quam sibi quis imponit, sed quam habemus Christi lege impositam. Hoc est à Deo denique de industria recedere, nam mera puta malitia est, pura mera peccandi libertas, cum ex ipsis qui non ieiunant multi non tam ieiunij lege teneantur quàm opinione suâ, de qua si vellent instrui aut de modo ieiunandi, tunc immunes à peccato, castè sanctèque viuerent: sed tam alieni sunt à subeundo Christi iugo, ut neque astringi velint ad hoc ipsum discendum, quo teneantur: Et siue obstringantur, siue non: siue peccent, siue non peccent: hoc vnum satagunt ut liberè viuant, ut sui iuris sint & non diuini. *Quoniam*, inquiunt, *hac est pars nostra, & hac est sors.* Quamobrem licet reuera, vel ab officio, vel à negotiis, vel à naturali temperamento possent habere, quo ne ieiunarent, excusarentur: reipsa tamen non excusantur, & pari cum aliis pœnâ punientur, quia non excusationem à lege, sed à seipsis; non immunitatem ab auctoritate legitima sed à sua libertate sibi vindicant & addicunt. O diuitias Bonitatis & patientiæ, & longanimitatis Dei! quamdiu feres hanc peccandi licentiam, quamdiu patieris tam effrœnem viuendi libertatem? Itane sint illi filij Belial, id est, absque iugo, qui se seruos dicunt tuos? Numquamne constringes illos tuis præceptorum vinculis? semperne ut pullos onagri se liberos natos putabunt?

Sap. 2.

1ud. 19.

Iob 11.

Ah miseram & damnosam libertatem! ô diuinam in hac misera

fera libertate iustitiam ! Iam agnosco, quod dolebamus initio, cur sua in prauitate sic indurescant, nullo vt tempore quantumuis sacro, nullâ vt Confessione, nulla vt Cômunionem relipiscant, aut induci se vmquam patiantur ad exoluendum ieiunium. Hæc est scilicet pœna libertatis quam sibi assumunt, hoc est supplicium voluntariæ rebellionis, quâ in legem insurgunt: vt qui supremâ lege duci nolunt, eâdem deferantur. Et qui suæ se viæ ducēs habere voluerunt, sui sint duces interitus, ac tandem illud Sapientiæ compleatur: *Comedent igitur fructus viæ suæ, suisque Pron. 1. consiliis saturabuntur.*



FERIA QVINTA.

DE CAVENDO MVNDO, PRO
QVO CHRISTVS NON ORAT.

Ego pro eis rogo, non pro mundo rogo, sed pro his quos dedisti mihi, quia tui sunt. Ioan. 17.

VERITAS PRACTICA.

Quia latè patet Mundus, nihil est vspiam ita contemnendum & cauendum, quàm quod intus in te vno latet.

RATIO EST, quia nihil est ita cauendum in vniuerso mundo, quàm quod mundum peruersum & odiosum Deo facit.

Sed quod mundum peruersum & odiosum Deo facit, intus in te vno latet, nempe Concupiscentia.

Ergo quia latè patet mundus, nihil est vspiam ita contemnendum & cauendum, quàm illa Concupiscentia quæ intus in te vno latet: Quod certe est valde expendendum.

I. PUNCTVM.

CONSIDERARI possunt hæc antecedentia Christi Domini ad Patrem Verba: *Manifestaui nomen tuum hominibus quos dedisti mihi de mundo. Tui erant, & mihi eos dedisti, & sermonem meum seruauerunt. Nunc cognouerunt quia omnia quæ dedisti mihi abs te sunt, quia verba quæ dedisti mihi, dedi eis, & ipsi acceperunt & cognouerunt verè quia tu me misisti.* EGO PRO EIS ROGO, NON PRO MVNDO ROGO.

In his porro postremis verbis, magis hærendum, quia plurimum valent ad persuadendum mundi contemptum, aut certe, valde disponunt cum Diuina gratia ad hunc affectum & effectum ex sequentibus Passionis Christi Mysteriis eliciendum. Quid enim funestius, & quid magis tremendum, quam sacramentum omnium, quas Christus fudit, orationum participatione semoueri & excludi; nulla cum illo meritorum communicatione iungi, nullam cum eo habere Societatem & partem: ac denique velut anathematizatum & excommunicatum esse à Christo Domino? Hoc enim volunt illa verba: **NON PRO MVNDO ROGO.** Quamobrem in his etiam atque etiam consistendum, ne quid animis nostris de mundo tam odioso prorsus adhæreat. Quem in finem opportuna videtur propositæ Veritatis Consideratio quæ radicem totius mundanæ peruersitatis attingit, nempe Concupiscentiam, in qua vna Mundus ille sistit pro quo Christus non orat.

Hoc itaque primum expende quod in expositione Veritatis præmittitur, nihil ita esse cauendum in vniuerso mundo, quam quod peruersum facit mundum, & odiosum Deo reddit. Nam in mundo, aliud est, esse; & aliud, peruersum esse: Sicut de homine ait S. Augustinus: *Quasi duæ res sunt, homo & peccator. Quod audis, homo, Deus fecit: quod audis, peccator, ipse homo fecit.* Sic de mundo planius, duæ res omnino sunt, mundus, & mundus peruersus. Atque ita quando in propositione dicitur nihil esse in Mundo contemnendum seu cauendum quam quod illum peruersum reddit; manifeste patet primò Mundum accipi pro rerum vniuersa vastitate quæ nec peruersa nec odiosa Deo est; Deinde vero significari esse aliquid in illa rerum mole quod mo-

Trist. 12.
in Ioan.

ralem peruersitatem in mundum inducat, & quod propterea sit cauendum. Sic aliud profecto est, esse in mundo; & aliud est, esse de mundo. Omnes enim & ipse etiam Christus Dominus, *in mundo erat sed non de mundo. Sicut ille est & nos sumus in mun-* ^{1. Ioan. 4.}
do, ait dilectus Discipulus. At vero Dominus: *Ego non sum de hoc* ^{Ioan. 8.}
mundo. Nèpe est aliquid singulare quod mundum peruerit, & de quo peruerso mūdo nō est Christus nec verus Christi discipulus.

Res quidem omnes terrenæ & humanæ, ita fluxæ & caducæ sunt, vt qui sapit numquam iis afficiatur & inhæreat: sed non ita tamen ex se peruersæ sunt & odiosæ, vt oderit eas Deus, & odio à nobis haberi velit. *Diligis omnia quæ sunt,* ait Deo Sapiens, ^{Sap. 11.}
& nihil odisti eorum quæ fecisti. Quod si ipsemet dicit, *Creaturas* ^{Ibid. 14.}
Dei in odium factas, & in tentationem animabus hominum, & in muscipulam pedibus insipientium; Id vitium est insipientium hominum, non creaturarum, quibus si benè homines vterentur, & ipsi sapientes essent, & bonæ ipsis essent creaturæ; sicut ait Apostolus, *Omnia creatura Dei bona est, & nihil rejiciendum,* quod ^{1. Tim. 4.}
cum gratiarum actione percipitur. Et rursus, *Omnia munda mundis,* ^{Tit. 1.}
coinguinatis autem & infidelibus, nihil est mundum. Sic & Sapiens tufius, *Bona bonis creata sunt ab initio, sic nequissimis bona & mala.* ^{Ecclesi. 39.}
Initium necessaria rei vitæ hominum, aqua, ignis, & ferrum, ^{Ecclesi. 39.}
sal, lac &c. hac omnia sanctis in bona, sic & impiis & peccatoribus in mala conuertentur. Omnia opera Domini bona, & omne opus, hora sua subministrabit; Non est dicere hoc illo nequius est, omnia enim in tempore suo comprobabuntur.

Ex quibus apertè patet aliquid aliud esse à creaturis, & à mundo in se considerato, vnde vitium & peruersitas influat; & illud præcipuè indagandum esse & extirpandum. Intus est hostis, in te vno latet; *Mors in olla; PERDITIO tua Israel, tantum-* ^{4. Reg. 4.}
modo in me auxilium tuum. ^{Osee 13.}

II. PUNCTVM.

SED sola concupiscentia est, quæ facit hanc mundi peruersitatem. Ipsa est sancti Augullini interpretatio verborum Christi Domini, *NON pro mundo rogo, id est, inquit, non pro iis qui viuunt secundum mundi concupiscentiam.* Non est autem alia mundi concupiscentia, quàm ipsa innata nobis cupiditas, quæ

1. Tim. 6. authore Apostolo, Radix est malorum omnium; & de qua dicitur à sancto Ioanne, *Omne quod est in mundo concupiscentia carnis est, & concupiscentia oculorum, & superbia vitæ.* Quali diceret, obiecta quidem concupiscentiæ seu res concupiscibiles sunt in mundo, sunt nempe honores, voluptates, & diuitiæ; sed quod propriè facit mundum peruersum, & hominem de illo mundo, est ipsa mundi concupiscentia, seu ille appetitus inordinatus quo res humanas homo concupiscit; quia facit eum nimis adherere mundo seu mundanis rebus, quæ si ordinatè diligerentur, neque res ipsæ malæ essent, vt dictum est, neque homo eas possidens & diligens, malus aut peruersus esset. *In omnibus talibus,* ait sanctus Augustinus, *non usus rerum, sed libido utentis in culpa est;* quando scilicet est inordinata, quando est nimia seu vehementior, seu non directæ in bonum finem.

Nam neque ipsa præcisè libido naturalis seu concupiscentia per se est mala, sed tantum prona est in malum, & in affectum inordinatum inducens hominem, qui si velit cum gratia resistere naturali inclinationi, adeo non erit peruersus ex praua sua concupiscentia, vt maximè bonus & sanctus inde existat. Tota itaque peruersitas in eo est, quod homo concupiscentiæ consentiat, quod eam sequatur in desideriis honorum, voluptatum, diuitiarum, & sic fiat de mundo. Vnde ipso statim initio mundi conditi, Deus homini dixit, *Sub te erit appetitus eius,* Gen. 4. *& tu dominaberis illius.* Ecclesi. 5. Tum Sapiens, *Ne sequaris in fortitudine tua concupiscentiam cordis tui.* Et rursus: *Post concupiscentias tuas non eas, & à voluntate tua auertere.* Ibid. 18. *ALIVD* est enim concupiscere, inquit sanctus Ambrosius, *& aliud post concupiscentias ire.* Rom. 6. Sic denique Apostolus, *Non regnet peccatum in vestro mortali corpore, vt obediat concupiscentiis eius.*

1. Pet. 4. Ah quoties iis obediisti? *sufficit præteritum tempus ad voluntatem gentium consummandam, his qui ambulauerunt in luxuriis, desideriis, & quæ fusiùs prosequitur sanctus Petrus.*

III. P V N C T V M.

QUA ergo latè patet mundus, nihil est vspiciam ita contemnendum & cauendum, quàm quod intus in te vno latet, nempe Concupiscentia quæ te facit de illo peruerso mundo pro quo Chri-

flus non orat. *Munda prius quod intus est.* Certe oportet malignam hanc esse peruersitatem mundi seu mundani affectus, pro quo Christus se non orare proficitur! Sic planè est, quando semel humanus animus se illi permittit, ita in dies induratur, ita crescunt concupiscentiæ & mutuis hominum colloquiis, moribus, & sensibus inualescunt, vt non sit animus magis in vitio induratus, & minùs capax deuotionis, pœnitentiæ, conuersionis, & cuiusuis tandem virtutis, quàm mundanus, qui omnem gratiam ac pietatis sensum expellit, si quo modo ille sensus repugnet concupiscentiæ vel mundanò respectui. Hæc est terra petrosa sine fructu, homo scilicet temporalis, *qui propter verbum continuo scandalizatur*; QUID diceretur, statim ille obiiciet, *Matth. 23.* & hoc dicto, quidquid hominum dictis opponitur, quantumcumque pium & sanctum sit, statim repellitur; *Ve mundo à scandalis.* *Ibid. 18.*

Hoc est peccatum de quo dicebat Iudæis, *In peccato vestro moriemini*; Audi & treme; *Vos de mundo hoc estis, ego non sum de hoc mundo, dixi ergo vobis, quia moriemini in peccatis vestris*: O pauendum quia. Non est in tota Scriptura verbum terribilius, & proinde ad mundi contemptum seu ad reprimendam concupiscentiam aptius & efficacius. Vide in 4. parte, decimanonam hebdomadam, & præcipuè Feria 5. Vbi alia Veritas ex illis verbis proponitur.

PRO EADEM FERIA QVADRAGESIMALI.

Ad Euangelium, de sanato Centurionis seruo.
Matth. 8.

VERITAS PRACTICA.

Maiores est animi se Diuinæ Fidei supponere, quàm se illi opponere.

In 3. parte, Feria 2. hebdomada septima. Vbi de hoc Centurione expressa est Consideratio.

Aliæ de fide plures passim habentur.

Et cum illa Centurionis quæ à Domino laudatur fides non sit tantum Virtus qua credidit, sed qua vniuersim sua in militari Vocatione laudabiliter vixit, huc commodè transferri posset hæc Veritas.

Salutis animæ nulla est certior certitudo, quàm in certo vocationis gradu attingendo.

In 1. parte. FERIA 2. hebdomada 5. post Epiphaniam.



FERIA SEXTA.

DE VERA SANCTITATE QUAM SVIS CHRISTVS ORAT.

Sanctifica eos in Veritate. Ioan. 17.

VERITAS PRACTICA.

Qui te à sanctitate acquirenda excusas, ex aliis acquisitis bonis te condemnas.

RATIO EST, Quia quidquid sit quo te excusas, si nullum id esse, aut tibi etiam esse oppositum ex aliis tuis factis indicas, tu teipsum condemnas.

Sed ex aliis acquisitis bonis tamquam ex aliis tuis factis, nullum id esse, aut etiam tibi esse oppositum indicas, quod excusas.

Ergo tu teipsum condemnas. Quod cum sit extrema dementia in re præsertim tam seria & necessaria qualis est vera sanctitas, certe id aduertendum, & excutienda omnis excusatio.

I. PUNCTVM.

MULTA hinc considerari possunt quæ breuiter indicata, perpendes acuratus. Primum, quàm nobilis, quàm generosus, & magnificus in nos fuerit Christi Domini animus qui nobis optet & imperret veram Sanctitatem. Magnifica hunc Christi animum & ei gratias exhibe.

Secundo, quanta eius Humilitas, qui cum posset ipse nobis impertiri quod vellet, aut si quid promerendum erat à Patre, cum id satis superque suis operibus esset promeritus: voluit tamen suis meritis hanc orationem adiungere qua coràm profiteatur id à Patre prouenire. O vere Patrem luminum à quo est omne donum! O vere Filium lucis qui ad eum refert à quo sunt omnia.

Tertio, quàm sit prudenter discernenda vera Sanctificatio à falsis Sanctitatibus quas vel Dæmon obiicit, vel mundus fingit, vel Caro etiam simulat. Dæmon in quibusdam Paganis & Hæreticis format quandam Sanctitatem, tegendo lupos vestimentis ouium, & per blandos sermones miscendo virus suum. *Attendi- Maub. 7. te ab his falsis Prophetis.* Mundus suam fingit, dum quod est pietatis exterius & apparens, rite quidem exequendum docet, sed quod intus est, negligitur. *Va vobis hypocrite quia mundatis quod Ibid. 23. de foris est, intus autem pleni estis rapina & immunditia, Similes estis Sepulchris dealbatis quæ a foris parent hominibus speciosa, intus vero plena sunt ossibus mortuorum, & omni spurcitia: sic & vos a foris paretis quidem hominibus iusti, intus autem pleni estis hypocrisis & iniquitate.* Caro denique quæ est natura deprauata suam simulat Sanctitatem, quando sic tenero & sensibili pietatis adhæret sensui, vt in eo vno ponatur pietas: vel si quod bonum opus est faciendum, non ex alieno ductu fiat sed proprio, non quod commune est aliis, sed quod singulare; non quod à pura Charitate vel obedientia proueniat, sed quod iudicii proprii & propriæ voluntatis lepra sit infectum, vt felse prosequitur sanctus Bernardus ex Propheta: *Ecce in die ieiunij vestri inuenitur voluntas vestra: Numquid tale est ieiunium quod elegi?* Quæ sit autem vera Sanctitas patebit in progressu.

Quarto, quod est valde obseruandum: sic petiit Christus no-

Serm. 3. in Resurrect. Dom. & 71. in Cant. 1f. 38.

2. Cor. 7. bis & obtinuit veram Sanctificationem, vt tamen ex parte nostra nonnihil sit agendum quo talis dicitur perfici Sanctificatio. Sic enim aperte Apostolus: *Itas ergo habentes promissiones, charissimi, mundemus nos ab omni inquinamento carnis & Spiritus, perficientes Sanctificationem in timore Dei.* O certe dignum opus quod vnusquisque perficiat.

Quinto, quàm pauci tamen id curant, quàm multi vel omnem Sanctitatem negligunt, vel veram non inquirunt, vel à vera se excusant, quasi sit sublimior quàm vt eò possint attingere, quasi sint indigni qui de illa comparanda cogitent, aut quidquid tandem excusent, audi si tu ex illis es, *Qui te in Sanctitate acquirenda excusas, ex aliis acquisitis bonis te condemnas.*

Rom. 2. Ratio est tam aperta quoad primam partem, vt sit satis scire quod excusatio nihil aliud sit quam prætexta Ratio quâ legitime aliquid facimus, vnde si vel verbo vel facto destruimus illam rationem, tunc ex consequenti excusationem impetimus, expugnamus, & nos ipsos condemnamus; sicut si ab aliò quopiam erroris aut falsitatis argueremur. Hinc apte Apostolus; *Propter quod inexcusabilis es, o homo omnis qui iudicas. In quo enim iudicas alterum, te ipsum condemnas: eadem enim agis quæ iudicas: Quasi diceret, non potest subsistere ratio qua vel alium peccantem iudicas, vel qua te excusas, idem peccando: nam si valet in alium, contra te etiam valet, & quo iudicio peccantem iudicas, te ipsum arguis & condemnas. Aut certe si cum aliquid peccas, te excuses, & alium idem peccando iudices, tu illo ipso iudicio quo alium iudicas, excusationem tuam accusas, arguis, conuincis, & te ipsum condemnas.*

In 5. Mat. Sic sancti Patres, illos Concionatores qui non concordant facta dictis, asserunt *sui ipsorum esse condemnatores*, Verba sunt sancti Ioannis Chrysostomi, quibus hæc sunt sancti Gregorij plane similia, *Ipsi damnationis suæ aliquo modo præcones fiunt, quia dum ea quæ agere respuunt, prædicantes insinuant, suis se vocibus damnatos clamant. Conuersi sunt in arcum prauum, in se quippe sagittas figunt.* Audi qui alium doces, & te ipsum non doces, qui in lege gloriaris, & per prauaricationem legis, Deum inhonoras!

L. 2. Mor. c. 27.

Rom. 2.

II. PUNCTVM.

SED ex aliis acquisitis bonis, tamquam ex aliis tuis factis nullum esse, aut etiam tibi oppositum esse indicas, quod excusas, in sanctitate acquirenda.

Quod enim excusas, imprimis est Impotentia tua, quasi non eò vocatus sis vt sis sanctus; quasi tu pauciori contentus gratia & gloria, sanctitatem relinquo aliis. Itane vero sanctitatem omnem ablegasti? sed nisi sanctus fueris quomodo saluus, quomodo beatus eris? Nam *sine sanctimonia nemo Deum videbit*, inquit Apo- Hebr. 12;
stolus? An velles viuere in peccato mortali? An nolles esse in gratia quæ vocatur sanctificans & quæ sola nos gratos Deo facit? Nullamne virtutem, nullumne opus conforme vocationi tuæ velles exercere? Hoc est enim vere esse sanctum, esse extra statum & affectum peccati; siue esse in Gratia sanctificanti, quæ concomitantem habet Charitatem & actuales quas vocant gratias, quibus adiutus velis & possis vacare virtutibus exercendis & acquirendis, quæ sunt conformes tuo statui. Vnde si sanctitati renuntias, renuntias illis Gratiis, illis virtutibus, & illi tuo statui ac demum sempiternæ tuæ Beatitudini. Quod certe nolles, nec velle debes; ac proinde nec refugere sanctitatem, tuo in ordine, tuo in gradu & statu comparandam. *Hac est enim voluntas* 1. Thess. 4.
Dei, sanctificatio vestra. SECVNDVM eum qui vocauit vos san- 1. Pet. 1.
ctum, & ipsi in omni conuersatione sancti sitis.

Iam verò quod id possis cum Diuina Gratia, & id magis possis quam quoduis aliud, dubitare non potes nisi de salute desperes. Quid enim spei ad salutem, nisi possis quæ sunt ad salutem necessaria? Sic propterea de Deo dicitur, *qui potens est adificare & dare* 1. Cor. 3.
hereditatem in sanctificationis omnibus. Et de nobis etiam: *Qui habet hanc spem in eo, sanctificat se, sicut & ille sanctus est.* Non est præ- 1. Ioan. 3.
sumptionis dicere, volo esse sanctus, sed potius temeritatis aperte non dicere, seu nolle esse quod per Gratiam & Voluntatem Dei debes & potes.

Et tu ergo, inquit sanctus Bernardus exponens Apostoli verba: **DILIGENTIBVS DEVM OMNIA COOPERANTVR** Rom. 8;
IN BONVM: Si posueris in corde tuo, declinare à malo & facere bonum, tenere quod accepisti, & proficere semper in melius: sed &

si quid aliquando minus recte egeris, ut est humana fragilitas, non in eo persistere, sed poenitere, & corrigere quantum potes: eris sine dubio sanctus, sed cui interim clamare necesse sit. Custodi animam meam, quia sanctus sum. Ex quibus sancti Patris Verbis manifeste vides non quaeri à te nisi quæ pendent à tua voluntate cum illa Gratia qua tu velis quod debes, & qua tu possis quod velis.

Hom. 8. &
26. ad pop.

Sufficit velle, & totum factum est, inquit sæpe sanctus Chrysostomus. Non sic in aliis, non sic. Non sic à te pendet esse doctum, esse sanum, esse diuitem, esse eloquentem; non sic dici potest te ad illa bona naturalia comparanda tam certam habere gratiam, quàm ad salutem & Sanctitatem tuam. Sic tamen acquirendæ vacas doctrinæ, sic vacas acquirendis diuitiis, sanitati, & aliis bonis quæ minus à te pendent & quæ minus possint acquiri quam Sanctitas, ut vix ab his acquirendis umquam quiescas. Et cum hæc etiam bona tibi comparaueris, audebis dicere te non sic vacare Sanctitati quia non sic potes eam acquirere? audebis excusare impotentiam tuam in re quam potes tam certo quam certum est te habere propterea Gratiam, & te omnia posse cum Gratia? O te audacem & impium! Agnosce saltem vel ex te ipso, vel ex tuo ipsius studio, quo circa dotes alias acquirendas afficeris, quàm sit nullum, quàm sit tibi oppositum & aduersarium quod excusas à Sanctitate non acquirenda.

Quod si deinde dicas, & excusas non esse quidem impossibilem sanctitatem, sed tantis esse implicatam difficultatibus, ut vix te illis expedire possis; quæro abs te, an nullæ sint in aliis bonis comparandis difficultates? An si illæ ipsæ quæ in virtute exercenda occurrunt, sese objicerent, num propterea desisteres vacare sanitati, scientiæ, diuitiis aut aliis naturæ bonis? Cur ergo propterea desistis à sanctitate? cur difficultatem in hoc potius bono acquirendo excusas, quàm in aliis? aut cur saltem non vides nihil esse quod excusas? *Arguet te malitia tua, & auerso tua increpabit te.*

Ier. 2.

Nec objicias necessitatem bonorum naturalium, utilitatem, excellentiam, & iucunditatem, quasi nil simile esset in Virtute & Sanctitate. Nam inde potius vel maxime conuinceris te tibi sic opponi & contradicere. Quid sunt enim humana omnia nisi caduca & fluxa, imo vanitas vanitatum nisi sint cum virtute & cum sanctitate coniuncta? sola autem sanctitas, ipsius est Diuini-

Qui te à Sanctitate excusas, te ex aliis factis tuis, &c. 163

tatis participatio, Christi Domini similitudo, inchoata foelicitas, summum hominis bonum, VNVM DENIQUE ILLVD NECESSARIVM siue quo nulla reliqua, & quod solum sine aliis bonum & beatum hominem reddit. *Nescit homo pretium* ^{Iob. 28.} eius, ait Iob, *excelsa & eminentia non memorabuntur in comparatione eius. INFINITVS enim thesaurus est hominibus*, inquit Sapiens, *quo qui vsi sunt participes facti sunt amicitiae Dei, propter disciplinam dona commendati. LABORES huius magnas habent virtutes: sobrietatem enim & prudentiam docet & Iustitiam, & virtutem*, ^{Sap. 7. &} id est, fortitudinem, *quibus utilius nihil est in vita hominibus.*

Ac proinde si te Boni praestantia mouet ad sui cultum & studium, quid excusare potes à non colendo illo Bono quod praestat ceteris? quid excusare potes quod non ex teipso intelligas tecum pugnare? Væ animæ audaci quæ neglecta sanctitate sperauit se aliquid melius inuenturam!

III. PUNCTVM.

QVI te igitur à sanctitate acquirenda excusas, ex aliis acquisitis bonis vel acquirendis te condemnas, quia quidquid excusas hoc ipso in te retorquetur ad manifestam tui condemnationem, quo illud ipsum & grauius fateri cogeris in illis naturalibus inesse bonis, quæ non propterea deseris sicut Virtutem & Sanctitatem. *Et pro eis sanctifico meipsum*, aiebat Dominus, *ut sint & ipsi sanctificati in Veritate.* O Verba! Verba sancta, & sanctificantia! quasi diceret, Tanti Ego facio Sanctitatem illam quam meis opto, ut propterea non dubitem me prapare ad mortem, & me in ea lubeunda totum immolare. ^{Ioh. 17.}

Poteratne efficacius indicare quanto illam haberet in pretio? potuitne vero sic loqui, sic orare, sic affici, & nobis quantum ex sua parte est, non obtinere quod orabat & quod volebat? Itane pro ceteris bonis semetipsum sanctificat & immolat? Itane pro mihi commendanda & impetranda scientia, sanitate, diuitiis, & quibuslibet naturalibus donis? Et cum hæc ita pateant, tu impotentiam tuam excusabis! tu difficultatem objicies! & tu tamquam alienum aliquid, Sanctitatem repelles, & aliud quoddamque bonum tamquam nobilius, tamquam utilius, & facilius conquires & ab acquirendo non desistes! O Christi sensa

quàm longe sunt à nostris dissita!

Sed quod addit Dominus, non minus est expendendum: *ut sint & ipsi Sanctificati in Veritate*, Id est, non frustra velim hæc mea esse dicta & facta! non sine suo fructu & fine: Finem hunc autem mihi proposui, ut sint & ipsi Sanctificati in Veritate, ut quod in ipsis est faciant, sicut ego quod meum est, non omitto: ut seipsum etiam propterea immolent sicut ego, ut nulli propterea parcant labori, nullis sumptibus, nullis studiis, nullis curis. Toti denique sint in vna Sanctitate mecum colenda, conquirenda, comparanda. Hoc est se Sanctificare in Veritate, se propterea totum immolare, sese totum huic dare studio; neque in bonis alia ducere nisi quantum nobis Sanctificandis profunt, ac proinde si quæ huic fini obsunt, tantum illa in malis habere quantum Sanctitati obsunt. *Qui timeant Dominum, preparabunt corda sua, & in conspectu illius Sanctificabunt animas suas. Hæc omnia Sanctis in bona, sic & impiis & peccatoribus in mala conuertentur.*

Ecclesi. 2.

Ibid. 39.

Vide in 1. Parte, Dominica 3. post Epiphaniam: ubi hæc declaratur Veritas: *Non dixeris, per Deum abest.*

Vide & in Indicibus Verbo, *Sanctitas.*

PRO EADEM FERIA QVADRAGESIMALI.

Ad Euangelium, de diligendis inimicis: Et de Iustitia nostra non facienda coram hominibus.
Matth. 5.

VERITATES PRACTICÆ.

Si quid videtur difficile quod dixit Christus, hoc ipso redditur facile quod Christus dixit.

Si naturæ humanæ durum est obedire Christi præcepto, longe est durius Gratiæ, naturam humanam non obedire Christo.

Qui te à Sanctitate excusas, te ex aliis tuis factis, &c. 165

Qui suam Iustitiam facit ut videatur, maximam quæ fieri potest iniustitiam videtur facere.

In 3. Parte, Feria 5. 6. & Sabbato Hebdomada quintæ.

Ex 1. Parte, possent nonnullæ huc aliæ reuocari.

Iniuriam infert Gratiæ maximam, qui pro ferenda iniuria non certat fortiter.

In die sancti Stephani.

Inimici nostri magis prodesse possent odio, quàm profuissent obsequio.

In die sanctorum Innocentium.

Iniuriosum est Christo, si nulli quidem velis inferre iniuriam, nolis autem illatam ferre.

Die 16. Ianuarij.

Ex hac 2. parte, quamplurimæ his affines occurrent in sequentibus Quadragesimæ hebdomadis, singulis pene feriis quæ legendo percurri possunt, ac ipsa etiam Dominica Palmarum.

Necnon rursus ex 3. parte, quæ de Beatitudinibus exhibentur.



S A B B A T O.

DE EFFICACI DESIDERIO,

ET CVRA SALVTIS PER MEDIA ORDINATA,

SICVT ILLAM DESIDERAVIT ET CVRA-

VIT CHRISTVS MEDIATOR NOSTER.

A D H A E C E I V S V E R B A.

Pater, quos dedisti mihi, Volo ut ubi sum ego, & illi sint mecum, ut videant claritatem meam.

Ioan. 17.

VERITAS PRACTICA.

Si ordinatis ad salutem Mediis non vteris, Mediatore Christo abuteris.

RATIO EST, Quia tunc Mediatore Christo abuteris, quando frustra tibi de illo promittis.

Sed si ordinatis ad salutem mediis non vteris, frustra tibi de illo promittis.

Ergo & sic Mediatore Christo abuteris; Quod certe est expauescendum.

I. PUNCTVM.



ADMIRANDA Vox illa quâ Christus vtitur loquens Patri, *VOLO, Volo*, inquit, *ut illi sint mecum*. Nec certè videretur esse vox propria orantis & supplicantis Christi, qui, ut ait Apostolus, *pro sua reuerentia exauditus est*, nisi aliquid mysticum & singulare esset in illa voce. Sic ergo est, sic expresse loquitur, sic sapienter ait se velle, ut intelligamus quod à nobis intelligi maxime cupit, in quo positum sit verum desiderium seu voluntas efficax procurandæ salutis nostræ; nempe in his omnibus perfectè adimplendis quæ ordinata sunt ad illam salutem procurandam. Cum enim proximus passioni ac morti suæ sic loquitur de saluandis, *volo, pater, ut sint mecum*, perinde est ac si diceret, en paratus sum facere & pati quidquid pro eorum salute à te est ordinatum. Vis me tradi & vendi ab uno è discipulis meis? *Volo*. Vis me tamquam latronem ligari, & trahi ad tribunalia iudicandum? *Volo*. Vis me illic accusari, & condemnari velut reum? *Volo*. Vis me flagellis ut vile mancipium cædi? *Volo*. Vis me in purpurea veste, & corona spinea velut ridiculum regem ludibrio ad omnem prorsus infamiam, ostentari? *Volo*. Vis me crucis supplicio coudemnari, crucem propriis baiulare humeris, inter latrones crucifigi, atque in cruce per tres horas languere, derelinqui, & mori? *Volo*.

Hoc est scilicet efficaciter velle, sic velle media ordinata quæ-

Hebr. 5.

cumque tandem illa sint. Hoc est quod ab ipso Incarnationis exordio ad extremum usque vitæ terminum non destitit profiteri, quod regius Psalter prædixerat: *In capite libri scriptum est Ps. 39. de me, ut facerem voluntatem tuam, Deus meus volui, & legem tuam in medio cordis mei.* Hoc est denique quod non modo tibi, sed & nobis ait incumbere, ut si velimus efficaciter cum ipso esse in gloria, velimus etiam cum ipso esse in mediis obseruandis, quæ à Deo sunt ordinata ad illam gloriam consequendam. Quod quidem iam antè paucis dixerat sed efficacibus verbis; *Si quis mihi ministrat me sequatur, & ubi sum ego, illic & minister meus erit;* Nempe erit mecum in patria, si fuerit mecum in via; Erit mecum in gloria, si fuerit mecum in ignominia; Erit mecum in fine consequendo, si fuerit mecum in mediis ad eum ordinatis. Neque enim ego aliter salutis humanæ sum Mediator, quàm obseruando media salutis promerendæ; sic neque vllus aliter salutem consequetur, nec vlla spes in Christo alia, quàm seruatis seruandis.

Quod ut perpendas diligentius, & intelligas quanti sit ad salutem momenti: sic de re tota cogita, sicut proposita Veritate proponitur, *Si ordinatis ad salutem mediis non vteris, Mediatore Christo abuteris.*

Est enim illud tantopere formidandum, ut si certò persuasum haberes te abuti Christo, certè id nolles, & resipisceres. Hoc est autem persuaderi facillimum, cum abuti Christo Mediatore nihil sit aliud, quàm sibi frustra de illo promittere, vel peccatorum veniam, vel gratias, vel quidquid demum spectat ad salutem. Sic Hæretici & qui liberiori vitæ licentiâ Libertini nuncupantur, sic dicuntur abuti Christo, quando sic eius meritis fidunt, ut sibi tam certò salutem suam ab illo polliceantur, ut ne quidem dubitare possint. *O presumptio nequissima, ô vana spes Ecclesi. 37. impiorum, quæ tamquam lanugo est quæ à vento tollitur, & tamquam spuma gracilis quæ à procella dispergitur, & tamquam fumus Sap. 5. qui à vento diffusus est!*

II. PUNCTVM.

SED si ordinatis ad salutem mediis non vteris, frustra tibi de Illo sic promittis.

Quid enim tibi ab illo promittis, nisi quod ipse promissit se daturum? At quomodo & quâ conditione id promissit? Nonne vt ordinata quædam media obseruares? Nonne tibi opus est Fide & Charitate? Nonne Sacramentis & bonis operibus? An te putares sine Baptismo vel Poenitentia fore saluandum? Et vbi vox illa Christi: *Nisi pœnitentiam habueritis, omnes similiter peribitis.* Luc. 13. *NISI conuersi fueritis & efficiamini sicut paruuli, non intrabitis in regnum cœlorum.* Matth. 18. Nonne hæc sunt media ordinata? Nonne hæc sunt obseruanda? Nonne is præsumat qui aliter speret; cum præsumptio nihil sit aliud, quàm inordinata spes, neque aliter spes sit inordinata, quàm quia non seruat ordinata? 2. 2. 7. 21. a. 3.

III. PUNCTVM.

SI ordinatis igitur ad salutem mediis non vteris, Mediatore Christo abuteris; quia videlicet tibi de illo frustra promittis, quod non assequeris: & dum interea vanè confidis in eius Nomine, quia Mediator est, quia Saluator est; hoc sacro nomine tam verè abuteris, quàm vere tibi nihil proderit, sicut nihil eis profuit quibus Apostolus, *Ecce, inquit, ego Paulus dico vobis, quoniam si circumdamini, Christus vobis nihil proderit: Euacuati estis à Christo, à Gratia excidistis.* Gal. 5.

Quis hîc animi tui sensus! quænam sunt tibi Media ordinata ad salutem, & perfectionem? Nam præter generalia & communia omnibus, quædam sunt vnicuique particularia, vt pati & humiliari in certis quibusdam casibus, qui à diuina prouidentia procurantur; Quoniam, vt ait Sapiens, *In igne probatur aurum, & argentum, homines vero receptibiles in camino humiliationis.* Quænam sunt tuæ probationes & humiliationes? quomodo in his te geris? an tùm putas agi de salute tua, quando hæc occurrunt occasiones tui palàm humiliandi & probandi? Num audiisti quid acciderit Mosi, quid Saûli, quid multis aliis, qui grauiora sibi intulerunt damna, quàm putassent, ex non obseruatis quibusdam obseruandis? Ecclesi. 2. Num. 20. 1. Reg. 13. 15.

Si Petro modeste recusanti, sibi à Christo pedes ablui, tam certò affirmauit Dominus; *si non lauero te, non habebis partem mecum*: quid de aliis ab eodem tibi ordinatis credendum est, quæ longè

longè maiorem cum salute tua connexionem habere viderentur? Quid erat illud abluì vel non abluì pedes? At non respicitur quid sit praeceptum, sed Quis praecepiat? Itaque, *Omne quod tibi applicitum fuerit accipe, & in dolore sustine, & in humilitate tua patientiam habe.* Vide quod reliquum est capitis annotati, & illud etiam atque etiam reuolue: *Non deflectatis ab illo, ne cadatis.* *Ecclesi. 1.*

Quæ porro Veritates aliunde peti possint ad istam illustrandam, hæ sunt inter alias.

Quo in cœlis corona vultu, hoc in terris Calix fumen-
dus est.

In hac 2. Parte, Feria 5. hebdomada 2. in Quadragesima.

Quantam in te vim habet desiderium Regni cœlestis,
tantam tibi vim facies.

In eadem parte, Feria 2. hebdomada 5. post Pascha seu Rogationum.

Qui non seruat Consilia quia non sunt praecepta, nec
ipfa etiam praecepta seruabit.

In 3. Parte, Feria 2. hebdomada 5.

PRO EADEM FERIA QVADRAGESIMALI.

*Ad Euangelium, de Discipulis laborantibus in remi-
gando: Et de fiducia in Christo habenda. Marci 6.*

VERITATES PRACTICÆ.

Vera Fiducia Confidenti numquam infida.

In hac 2. Parte, Feria 3. hebdomada 4. post Pascha.

Qui non satis audet in magnis, nimis audet in paruis.

In eadem 2. Parte, Feria 5. hebdomada Pentecostes.

Non certius in spem itur, quàm contra spem.

In 3. Parte, Feria 3. hebdomada 7.

2. Pars.

170 *Sabbato post Cineres. Quos dedisti mihi Volo, &c.*

Videri & debet quæ de hoc Euangelio magis expressa habetur Consideratio, vbi ex occasione Petri ambulantis supra mare & in illud dilabentis, proponitur hæc valde Practica Veritas:

Res aduersæ non possent quemquam deiicere, nisi se his prius vellet subiicere.

In 3. Parte, Feria 4. hebdomada 13.





DOMINICA I. QVADRAGESIMÆ.

DE SOLITVDINE, IEIUNIO,
ET TENTATIONIBVS DOMINI.

*Tunc Iesus ductus est in desertum à spiritu, ut
tentaretur à Diabolo. Et cùm ieiunasset Qua-
draginta diebus, & Quadraginta noctibus, po-
stea esuriit. Et accedens Tentator dixit ei, si
Filius Dei es, dic ut lapides isti panes fiant.
Matth. 4.*

TRIA hîc nobis exhibentur de Christo Domino. *Solitu-
tudo, Ieiunium, & Tentatio.*

DE PRIMO, siue de Solitudine, quantum ad praxim, hæ
tres aliunde possunt produci Veritates.

Nemo securè apparet, nisi qui libenter latet.

Nemo securè loquitur, nisi qui libenter tacet.

In 1. parte. Die 14. Ianuarij.

Nulli magis necessariò secedendum, quàm qui minùs
necessarium sibi putat secessum.

In hac 2. parte, FERIA 2. infra Octauam Ascensionis.

Sic internis externa sunt temperanda, Vt neutrum

172 Dominica 1. Quadragesima. Tunc Iesus ductus, &c.

eorū importune, & vtrumque opportunè sibi cedat.

Ibidem, Feria sequenti tertia.

DE SECVNDO, quod est Quadragesimale Ieiunium iam suprā satis dictum est, Feria 4. Cinerum. Quia tamen, *ecce nunc Tempus acceptabile, ecce nunc dies salutis, in quibus exhibeamus nos, sicut Dei ministros, in multa patientia, in tribulationibus, in necessitatibus, & aliis quibuscumque piis operibus, ac virtutibus exercendis quæ ab Apostolo recensentur, & quæ Exemplo seruati à Domino Ieiunij nobis commendantur; ad hanc singularem per hos dies bonorum operum obseruantiam, magis ac magis commendandam, possent hæ tres etiam conferre Veritates.*

Quò minus potes reddere quæcumque debes, eò magis debes reddere quæcumque potes.

In 3. parte, Feria 2. prima hebdomada.

Non tam spectandum est quid Deo dones, quàm quid non dones.

In eadem parte, Feria 6. hebdomada octaua.

Ne dicas, sufficiens mihi sum.

In 1. parte, Feria 4. hebdomada tertia post Epiphaniam. Vbi de Necessitate Directoris agitur, ad intelligenda bona opera quæ cuius sunt facienda.

DE TERTIO, siue de Tentationibus, quod est præcipuum Caput: si vniuersim considerentur, hæ tres opportuna videntur Veritates.

Nemo periculosè magis tentatur, quam qui se non putat tentatum.

In 1. parte, Die 15. Ianuarij.

Quod monet Sapiens: Eris eruditus in omnibus, aut eris contra Dæmonem, rudis in omnibus.

In 4. parte, Feria 4. hebdomada decima quinta.

Nisi diligenter aduertas, tunc minus obseruas Custod-

Si Tentatorem permiseris ingredi, non se permittet egredi. 173

dem Angelum, cum magis esset obseruandus.

In eadem parte. Die prima Octobris.

SIVERO particulatim vnaquæque Tentatio perpendatur, tam possent facile singulis adhiberi Veritates, quam possent commodè passim educi contra triplicem Concupiscentiam, ad quam refertur quævis earum Tentationum, quas Christus Dominus sufferre voluit, ut nobis esset Exemplo sic pugnandi & vincendi. Sic enim nos Tentator aggreditur per tres illas Concupiscentias, sed cum hac differentia, quod ut notat sanctus Gregorius tota Diabolica Tentatio foris, non intus in anima, nec in carne Christi fuerit, sicut in nobis accidit.

Prima itaque Tentatio circa gulam versatur quæ spectat carnis delectationem, *Dic ut lapides isti panes fiant.* Contra quam hæc inter alias habetur Veritas Practica:

Sibi non Domino viuit, qui temperatè non viuit.

In 1. parte, Dominica quarta Aduentus.

Secunda Tentatio spectat Vanitatem & superbiam: *Mitte te deorsum,* Nempe ut admirationem sui excitet, & inde gloriatur. Contra verò quamplurimæ sese passim obijciunt Veritates, quales sunt istæ:

Nulla re homo quantumvis gloriosa gloriari potest.

Nulla res est in humanis verè gloriosa.

In 1. parte, Feria 2. & 3. secunda hebdomada Aduentus.

Quæ sunt Ambitioso detrimenta, hæc sunt humili lucra.

Vel sic aptius.

Quæ sunt Ambitioso lucra, hæc sunt humili detrimenta.

In 2. parte, Feria quarta hebdomada secunda post Pascha.

Claritas quæ ab hominibus accipitur, mera est obscuritas.

In 3. parte, Feria sexta hebdomada duodecima.

174 Dominica I. Quadragesima. Tunc Iesus dictus, &c.

Tertia Tentatio pecuniam, seu commoditates temporales suggerit de quibus contemnendis decem proponuntur Veritates in vna quarta parte, & vna Feria quæ est quinta hebdomadæ decimæ octauæ. Hæc aliunde deducta modo sufficiat:

Omnis copia quæ Deus non est, egestas censenda est.

In 1. parte, Feria 5. hebdomadæ 4. in Aduentu.

P R Æ T E R istas autem quæ suis magis propriè delarantur locis, & quæ particularem attingunt materiam, hæc videtur contra Tentationes maxime generalis, & singulariter tamen opportuna

VERITAS PRACTICA.

Si Tentatorem permiseris ingredi, non se permittet egredi.

Facilius excluditur, quàm eiicitur.

RATIO EST, quia cum Tentator vires in nos ampliores acquirit, non sic se sinit vinci & egredi, sicut si tantas vires nos haberet.

Sed cum permissus est ingredi, majores in nos acquirit vires, quàm si non esset permissus.

Ergo si permiseris ingredi, non se sinit, non se permittet egredi.

Tunc non ita facile deiicietur quàm potuisses arcere ingredientem aut tentantem. Quapropter Principiis est obstandum.

I. PUNCTVM.



BSERVANDVM imprimis, quod hic ait sanctus Gregorius, & passim Omnes, tribus agi modis Tentationem: Suggestione, delectatione, & consensu. Quæ tria mihi quidem aptissime sic Kampensis explanauit: *Primo occurrit menti simplex cogitatio, deinde fortis imaginatio: Postea delectatio, & motus prauus & assensio: sicque paulatim ingreditur hostis*

*1.1. de Imit.
Glor. 6.13.*

Si Tentatorem permiseris ingredi, non se permittet egredi. 175
malignus ex toto, dum illi non resistitur in principio: & quanto diu-
tius ad resistendum quis torpuerit, tanto in se quotidie debiliior fit, &
hostis contra eum potentior.

Iamne his vides expressis verbis quàm aperte non tantum pro-
 posita liqueat Veritas, sed & subiecta ratio, cur si Tentatorem
 permiseris per suggestionem & delectationem in animum tuum
 ingredi, non se permittet egredi quin Consensum eliciat; quia
 videlicet cum Tentator in nos vires ampliores acquisiuit, non sic
 permittit se vinci, sicut si tantas non haberet. Nam cum in nos
 atroci superbia & malitia sauiat: superbia tanto magis eum fa-
 cit audacem quò est potentior: malitia vero sic illum semper in-
 durat, vt quantum omnino potest, tantum noceat. Sicut videre ^{Iob 40.}
 est in libro Iob. Neque enim cicuratur, nec placatur, nec mise- ^{& 41.}
 retur, nec fatigatur, nec dormitat, nec de potestate quidquam
 remittit. *Vae, vae, vae habitantibus in terra. Vae terræ & mari quia* ^{Apc 8.}
descendit Diabolus ad vos habens iram magnam, sciens quod modicum ^{& 12.}
tempus habet.

II. P V N C T V M.

SED cum permissus est ingredi, maiores in nos acquirit vires.
 Sic enim primo fit naturaliter, vt inflammata per sugge-
 tionem concupiscentia semper crescat velut ignis, qui numquam ^{Prou. 30.}
dicit sufficit. Deinde verò supernaturaliter sic permittente Deo
 in poenam facilitatis seu ignauiae, quàm permissus est à nobis Ten-
 tator ingredi. *Seruies*, inquit, *inimico tuo quem immittet tibi Do-* ^{Deut 28.}
minus, & ponet iugum ferreum super cervicem tuam, donec te conte-
rat. Et certè quis nesciat ingressos in urbem vel domum hostes
 longè magis posse in perniciem ciuium, quàm dum extra mu-
 ros essent. Hinc illæ lachrymæ & lamentationes: *Vide Domine* ^{Thren. 1.}
afflictionem meam, quoniam erectus est inimicus: manum suam misit ^{& 3.}
hostis ad omnia desiderabilia eius. VENATIONE ^{capuerunt me quasi}
auem inimici mei gratis. Lapsa est in lacum vita mea, & posuerunt
lapidem super me. Inundauerunt aqua super caput meum, dixi, perij.

Aptissimum illud est etiam quod ait Dauid, *Eripe me de luto, vt* ^{Psal. 68.}
non insgar; libera me ab iis qui oderunt me, & de profundis aquarum.
Non me demergat tempestas aqua: neque absorbeat me profundum,
neque urgeat super me puteus os suum. Vide enim vt gradatim ma-

iores tentationis vires & damna exprimat. Primò petit ne tempestate demergatur quod est certe perniciosum; sed deinde quod est perniciosius, ne absorbeatur profundo: ac denique quod est perniciosissimum, ne ita inuoluatur & includatur puteo seu Abyſſo, vt nullus sit emergendi exitus. Sic paulatim procedit tentatio & tentator roboratur: Vnde egregie sanctus Hieronymus sub alia similitudine, *Diabolus*, inquit, *serpens lubricus est, cuius si capiti hoc est primæ suggestioni non resistitur, totus intima cordis dum non sentitur, illabitur. Tentationum diabolicarum initia, flagitia sunt.* Itane sentis? itane expauescis?

III. P V N C T V M.

Sergo Tentatorem permiseris ingredi, non se finet, non se permit tet egredi; Quia per ingressum vires ampliores obtinet, quibus confusus, fit audacior, & obilinator: Et propterea, inquit sanctus Gregorius, recte *Myrmicaleon*, id est, *leo & formica dicitur*; formicis enim leo est; volatilibus formica; quia nimirum antiquus hostis sicut contra consentientes fortis est, ita contra resistentes debilis. Si enim eius suggestionibus assensus prabetur, quasi leo tolerari nequaquam potest: si autem resistitur, quasi formica atteritur.

Nonne hoc est potens motiuum resistendi? Videsne quantum sit discrimen inter formicam & leonem; ac proinde quale periculum & quale sit damnum, si quem vt formicam facile superandum habuisses, eum habeas vt inuictum leonem? Si de solo naturali affectu coercendo ageretur, sic statim vt sentitur, esset continendus; Quia, vt ipse vidit & scripsit Seneca, *non obtinebis, vt desinat, si incipere permiseris. Imbecillis est primò omnis affectus, deinde ipse se concitat, & vires dum procedit parat; Excluditur facilius, quam expellitur; Ergo intrantibus resistamus.* Quanto verò id magis obseruandum, cum se affectui Tentator iungit, & cum ad hunc quantocumque oppugnandum sacris oraculis admonemur. En vt loquuntur: *Nolite locum dare diabolo. RESISTITE diabolo & fugiet à vobis, appropinquate Deo, & appropinquabit vobis. DEVS pacis conterat Satanam sub pedibus vestris velociter.* Nota illud *velociter*, ne si detur illi mora, te ipse conterat. Totum certaminis pondus in illa est velocitate. Aut te oportet habere Satanam contritum sub pedibus tuis, aut ille sibi te conteret: Vter altero,

Si Tentatorem permiseris ingredi, non se permittet egredi. 177

altero fuerit velocior, sic erit superior. *Vigilate & orate, ut non intretis in tentationem*, Si præsens Apostolis hoc Christus dixit, quanto magis tibi? Vide Dominicam tertiam in Quadragesima.

Si quis forte inchoatos de Passione Christi Domini discursus nolit interrompere, hanc nobilem, & cœlo delapsam Veritatem sibi proponat contra tentationes.

In hoc Signo Vinces.

Ratio est, quia tentatio cognita facillime cum gratia superatur. Sed ex representatâ sibi Cruce & Christo Domino patiente, facillimè cognosci potest tentatio, indeque gratia derivatur.

Ergo & sic tentatio superatur, quod est in signo & vexillo crucis vincere; ac proinde comparanda facilitas representandi sibi Crucifixi.

Huius figura præcessit in serpente æneo, quem qui percussus à serpentibus aspicerent, sanabantur. Sic Moses longè ante Christum, eius tamen aspectu sibi proposito, dicitur maluisse affligi *Num. 21. Ioan. 3.* cum populo Dei, quàm temporalis peccati habere incunditatem. Sic passim Apostoli: *Christo in carne passo, & vos eâdem cogitatione armamini. ASPICIENTES in authorem Fidei, & Consummatorem Iesum.* *Hebr. 11. 1. Pet. 4. Hebr. 12. L. 1. c. 15. L. 2. c. 1.* Sic & luculentè liber de Imitatione Christi, locis hæc notatis.



HAC HEBDOMADE, de internis doloribus quos Christus Dominus in Passione sustinuit, atque in horto seu monte oliuarum vehementiùs Ipse in animo suo concitavit.

FERIA SECVNDA. DE TRISTITIA DOMINI IESV.

Tristis est anima mea vsque ad mortem. Matth. 26.

VERITAS PRACTICA.

Qui cum Christo dolente non dolet, nec cum Ipso gaudente gaudet.

RATIO EST, Quia non dolere cum Christo, est non habere eundem sensum circa res diuinas & humanas quem habet Christus.

Sed qui non habet hunc eundem sensum cum Christo, non potest cum ipso gaudere.

Ergo is qui non dolet cum Christo, nec gaudebit cum eo. Et miraris vnde tam modicæ consolationes diuinæ!

I. PUNCTVM.

Luc. 22.

FINITA oratione quā Christus Dominus in coenaculo ad Patrem habuit: Egressus ibat secundū consuetudinem in montem oliuarum, secuti sunt autem illum & discipuli, vsque ad villam quæ dicitur Gethsemani, quibus tum dixit, sedete hic, donec vadam illuc & orem. Et assumpto Petro & duobus Filiis Zebedæi, cepit contristari, & maestus esse; Tunc ait illis, tristis est anima mea vsque ad mortem, sustinete hic & vigilate mecum.

Matth. 26.

Sic Euangelistæ omnes, vnde apparet, primum Christi dolorem internum fuisse tristitiam, quam permisit appetitui suo concitare, ex repræsentatione malorum omnium, quæ tunc adduxit in mentem suam siue præterita essent, siue præsentia, siue futura. Cogitabat immensam illam multitudinem hominum, qui à mundo condito perierant, & peccati sui poenas luebant. Versabat animo horribilem illam peccatorum molem & massam, quæ omnes homines ita infecerat, vt vix vnus aut certè pauci in via salutis essent. Proponebat sibi statum præsentem mundi, in quo soli Iudæi Deum agnoscebant, ex Iudæis autem pene omnes excæcati, iam iamque in suam vniuersi mortem conspiraturi. Cernebat Proditorem Discipulum; periurum alium, fugaces reliquos, se solum velut agnum in medio luporum deferendum, discerpendum, dilaniaudū. O qui tum dolores animi!

At saltem qui post passionem futuri erant homines si saluarentur, si proderet omnibus Sanguis ille fundendus! Sed illud erat vel maximè quo dolor augebatur, quòd in sequentes annos tot etiam peccata cõmitterentur, totque perirent homines, perinde ac si non esset passus, imò eò magis peccarent & punirentur, quòd esset passus, atque adeo ipse inter omnes electus & dilectus populus in sua esset prauitate periturus. *Et peribunt reliquia Iuda!* Ier. 40.

Hæc ita simul conglobata sic animum eius contristabant, vt præ doloris vehementia viuere non potuisset nisi virtute diuinâ vitam sustentâset. O mi Iesu, numquid ex his vnus eram, quos cernebas in peccato, & quorum aspectu angebaris? Etiam fili, teipsum in mente habebam, & quod de te mihi magis dolebat, insensibilitas est illa tua, quâ tam parum moueris ad perfectam emendationem. Ad hoc anime quid respondes? Disce hodie saltem tritari & dolere, vt discas simul, quando & quomodo gaudeas. In his enim duobus affectibus, vel maximè peccas; & vnus ita pendet ab alio, vt nisi cum Christo doleas seu tristeris, non possis cum ipso gaudente gaudere, nec proinde vllò vquam vero & legitimo gaudio gaudere.

Ratio est vniuersalis & valde expendenda, quia videlicet nisi tristeris cum Christo, non habes eundem sensum circa res diuinas & humanas quem ille habet. Nam cum omnis tristitia sit ex malo sibi repræsentato, tam diuersa erit tristitia, quàm diuersus mali sensus, seu quàm diuersa opinio circa res illas quæ contristant; vnde sit vt tristitia sæculi sit tantum de malo huius 2. Cor. 7. vitæ, de poenis, de paupertate, de contemptu, de inuidia, & similibus, quia sæculares hæc tantum æstiment mala. At vero tristitia secundum Deum, de peccatis est, de Deo offenso, de suo proximique damno spiritali; sicque apparet ex diuerso rerum sensu, siue æstimatione & affectu, diuersam esse tristitiam: ac proinde hæc duo se simul consequuntur, seseque mutuò probant, vt qui diuersum habet à Christo sensum, diuersam ab eo etiam habeat tristitiam, vel qui non tristatur cum eo, siue de re ipsa quâ tristatur, diuersum ostendat se habere sensum. O quàm præclare Apostolus; *hoc sentite in vobis quod & in Christo* Phil. 2. *Iesu!* Videbat quippe acutius, ex illo sensu, affectus omnes nostros dependere. Itane sentis cum illo?

II. PUNCTVM.

SED qui eundem cum Christo sensum & affectum non habet, non potest gaudere cum illo.

Nam sicut tristitia, ita & gaudium prorsus diuersum est pro diuersitate sensus, siue æstimationis & affectus, quem habemus de bono quod est obiectum gaudij; vnde qui vanè & malè gaudent, idcirco ita gaudent, quia quæ vana sunt & mundana bona nimium æstimant & sapiunt, ac proinde eorum possessione lætantur, cum tamen alij qui non idem sentiunt, non ita gaudeant, etiam si eadem bona possideant. Hinc Propheta, *Confusum est gaudium à filiis hominum*: Id est, sicut varij sunt sensus hominum, ita & varium ac diuersum eorum gaudium, quod est cum sensu coniunctum & confusum.

Isa. 1.

Quisquis propterea non idem sentiat de rebus quod ipse Christus, certè non eodem etiam gaudio gaudebit quo ille; quia vt dictum est, ex diuersitate sensus, diuersum est gaudium, ac proinde quamdiu diuersa senties, sic diuersè gaudebis; & quàm verum erit & solidum Christi gaudium, tam falsum & euandidum hoc tuum erit quod est illi oppositum.

O miserandum hominem, qui numquam est miserior quàm cum magis gaudet! Nam quo magis gaudes falso tuo gaudio, eo magis diuersus es à Christo Iesu; & non est maior miseria, quàm sic diuersum esse à Christo!

III. PUNCTVM.

SIC ergo qui cum Christo dolente non dolet, nec cum ipso gaudente gaudere poterit: Non modò quia non meretur consolationes illas, quæ non dantur nisi secundum multitudinem dolorum, vt ait Propheta & Apostolus, sed quia non eundem cum ipso habet sensum. Si enim idem sentires cum Christo, quidquid illum affligit, te simul contristaret; vnde è conuerso si non te idem contristat, non eundem cum ipso habes sensum, ac proinde nec simul cum ipso gaudere potes. *Non gaudebit inimicus meus super me*, quia scilicet oppositum meo sensum habet.

Ps. 93.
2. Cor. 1.

Ps. 40.

Quod quia valde odiosum est & expauescendum, corrigem-

Qui cum Christo dolente non dolet, nec cum ipso, &c. 181

us est sensus tuus, siue iudicium illud quod formas de bono & malo, vnde procedunt affectus tristitiæ & gaudij; atque à Christo Domino discendum quid verè malum sit & deplorandum. Ipse est enim Emmanuel, qui probè *scit reprobare malum & eligere bonum*. Iam audiuisti quid eum contristaret, nempe Dei offensa & hominum perditio; hoc ergo discere verum esse malum, hoc discere deplorare cum Christo, vt cum ipso etiam gaudeas de Diuinis Perfectionibus, de Dei notitia prædicata, de hominum salute & perfectione, cæterisque similibus veris bonis. *Mundus gaudebit, vos vero contristabimini, sed tristitia vestra vertetur in gaudium.* Ioan. 16.

Quod si Passionis & mortis iam iam instantis Cogitatio non-nihil etiam Christum contristauit; at certè vide quomodo se in illa sua tristitia gerit. Discere tristitiam quæ ex corporis aut animi malis percipitur, non tam malum esse, quàm qui concitantur inde motus inordinati. Nullos vero tales in Christo perspicies; Nihil illo quietius etiam in mediis illis tristitiæ fluctibus, nihi ordinatius, nihil suauius & religiosius.

En vt supplex adit Patrem, vt illum pronus orat, vt opportune redit ad discipulos somnolentos, vt eos quietè excitat, vt blandè monet, vt omnia denique tranquillè peragit!

Sic est tristitia in virtutem conuertenda, sic toleranda benignè, sicut & ipsa mala, quæ illam excitant, quandoquidem ipsa est naturæ nostræ malum tam patienter ferendum quam quoduis aliud malum, quando aliter curari non potest. Sic aptè Sapiens, *Ne festines in tempore obductionis, sustine sustentationes Dei, coniungere Deo & sustine. Omne quod tibi applicitum fuerit accipe, & in dolore sustine, & in humilitate tua patientiam habe.* Ecclesi. 2. Iunge cor tuum cordi Christi, vt quod ille amat, tu ames: quod odit & deplorat, tu ipse oderis & deplores! Denique sicut dicebat Rex Iehu ad Ionadab: *Numquid est cor tuum rectum, sicut cor meum cum corde tuo?* 4. Reg. 10. Sic tecum Christus: Tu quid illi?

PRO EADEM FERIA QVADRAGESIMALI.

Ad Euangelium, de extremo Iudicio, ac de operibus misericordie. Matth. 25.

VERITATES PRACTICÆ.

Qui nimis humana timet iudicia, non satis reueretur
Diuina.

In 1. parte, FERIA 4. hebdomada sexta post Epiphaniam.

Numquam melius sibi prouidet fidelis Dei seruus quàm
cùm nihil sibi retinens; totum se Domino, suaquẽ
omnia consecrat.

In eadem 1. parte, In Festo sancti Nicolai.

Si quid Charitas negat, tam benigna negando est, quàm
concedendo.

In hac 2. parte, FERIA 3. hebdomada prima post Pascha.

Beati misericordes.

In 3. parte, FERIA 5. hebdomada tertia.

Videnda septima Dominica, de defectu bonorum operum quàm sit
unicuique timendus.

Qui se interrogat ante iudicium, interrogatus in iu-
dicio securius respondebit.

In eadem 3. parte, Dominica octaua.

Affectum probat effectus.

In eadem 3. parte, FER. 2. hebdomada nona.


Si vis curari, cura.

In eadem 3. parte, Dominica 12.

Nemo sui boni vel mali bonus Iudex.

In ead. 3. p. FERIA 3. hebdomada 14.

Denique, de extremo Iudicio distinctius, videnda Dominica
ultima quartæ partis, ac Sabbatum sequens; necnon Dominica
prima Aduentus.



FERIA TERTIA.
DE TIMORE, ANXIETATE, ET
AGONIA DOMINI IESV.

*Et cepit pauere, & cadere. Et factus in agonia proli-
xius orabat. Marci 14. Luc. 22.*

VERITAS PRACTICA.

Ab imitando Christo, excusantis humanam infirmi-
tatem, infirma est & nulla excusatio.

RATTO EST, quia nulla est excusatio, si Christus assumpsit hu-
manam infirmitatem.

Sed humanam Christus assumpsit infirmitatem.

Ergo à Christo imitando, excusantis infirmitatem humanam, infirma
valde est & nulla excusatio.

I. PUNCTVM.

SICVT à timore anxietas, sic ab anxietate processit ago-
nia; quantum quidem cogitari potest accidisse hoc mo-
do, qui attente & pie reuoluendus.

Permisit Christus imaginationi suæ sibi repræsentare tormen-
torum atrocitatem, quæ moriendo passurus esset, & concessit
appetitui sensitiuo inde concipere mortis timorem & horrorem,
quàm magnus & sensibilis concipi poterat; Cùm verò Voluntas
superior liberrime acceptaret illa tormenta, & consentiret in
mortem subeundam, hinc anxietas quædam orta est in eius ani-
mo, quid nempe potius ageret ex duobus sibi propositis? AN MOR-
TEM ACCEPTARE? AN DIFFERRE? Differre
suadebat timor, acceptare amor; Quid faciat? *Anxietus est super* Ps. 142

1. par. II.

2. Reg. 24.

eum spiritus eius, turbatum est in eo cor eius, ut posset dicere, Ex omni parte me angustia premunt, Coarctor nimis.

Luc. 22.

Sed tempus vrget, hora instat, adsunt hostes, concludendum quid fiat; tunc fit agonia, id est, extremum certamen inter timorem & amorem; Vter vtri cedat; Et cum timorem vicerit amor, hinc factum est ut sanguis qui ex timore circa cor se effuderat, retractus fuerit ab amore, & in omnes corporis partes tantâ vehementiâ dilatatus, ut ipsam carnem pertransierit, sicque sanguinis guttæ defluerint; *Et factus est sudor eius sicut gutta sanguinis decurrentis in terram.* O amor, eò magis admirandus, quo impugnari voluit à timore, ut se se facilius in exemplum mihi præberet. Nec enim timuisset nisi voluisset, & idcirco voluit, ut timorem meum vinceret vincendo suum. Nam suo illo timore & pauore cum apertè indicauerit humanam assumpsisse infirmitatem, planè abstulit omnem illorum excusationem, qui ab ipso imitando in quotidianis vitæ actionibus se retrahunt, suamque propterea allegant imbecillitatem.

Quid enim dicunt, quid excusant? Quidquid sit, hoc nullum planè est, si Christus humanam induerit infirmitatem; non enim aliud dicunt, quàm quod Christus Deus esset, nos autem homines; & cum longissimè distent natura Dei & hominum, hinc concludunt non id à nobis fieri posse, quod Ipse fecit.

Sed errant & quidem vehementer nescientes scripturas & virtutem Dei, atque infirmitatem Christi. Nam si nihil obstaret Diuinitas, quo minus æquè ac quiuis hominum infirmus esset Christus, quid tu homo excusas infirmitatem tuam? Adde præterea, quod est valde obseruandum, si nihil obest humana tua infirmitas quo minus æquè ac ipse Christus Dominus, potens sis & validus ad id omne præstandum eius exemplo, quod iuberis, quid est quod te ab eo imitando retrahas, & excuses quod ille fuerit potens & validus? Vbi enim paria fuerint omnia, nulla est imparitatis excusatio.

II. PUNCTVM.

SED Christus Dominus humanam planè assumpsit infirmitatem. Id est, ita timuit, ita exhorruit, & id omne sensit humanitatis quod tu naturaliter sentis in malis sensibilibus tolerandis.

Sic

Sic enim dicitur *Vir dolorum & sciens infirmitatem*: sic verè lan-^{15. 13.}
guores nostros tulisse, & dolores nostros portasse, Sic debuit per omnia
fratribus similari, ut misericors fieret. In eo enim in quo passus est ipse Helr 2.
& tentatus, potens est & eis qui tentantur auxiliari. NON enim habe-^{Ibid. 4.}
mus Pontificem qui non possit compati infirmitatibus nostris, tentatum
autem per omnia pro similitudine absque peccato.

Sic Prophetæ, sic Apostoli, sic vniuersa passim scriptura, nec
aliter eam interpretantur Patres & Doctores, quàm simpliciter
dicendo ita Christum nostrâ infirmitate fuisse infirmum, ut nos
eius virtute fortes & validi esse possimus. Ego, inquit sanctus ^{In S. Luc. 7.}
Ambrosius, nusquam magis pietatem eius maiestatemque demiror:
Minus enim contulerat mihi, nisi meum suscepisset affectum. Suscepit
tristitiam meam, ut mihi suam letitiam largiretur; & vestigiis nostris
descendit usque ad mortis arumnam, ut nos suis vestigiis reuocaret
ad vitam. Sanctus quoque Augustinus, Nos in se transtulit, nos in se
suscepit; caput nostrum membrorum suorum suscepit affectum, & ideo
ab aliquo non est turbatum, sed sicut de Illo dictum est cum Lazarum
suscitauit, turbauit semetipsum: oportebat enim ut vnus Mediator <sup>Tract. 52.
in Ioan.</sup>
Dei & hominum, homo Christus Iesus, sicut nos excitauit ad summa,
ita nobis compateretur ad infima. Sanctus item Gregorius, Fortis
super omnia, apparuit infirmus inter omnia, ut dum nobis ex assumpta <sup>16. Mor.
14.</sup>
infirmitate congrueret, ad permanentem nos suam fortitudinem ele-
uaret. Sanctus denique Leo, Nostra infirmitatis affectus participan-
do curabat, & pœnalis experientia metum subeundo pellebat. In nobis <sup>Serm. 3 de
Pass.</sup>
ergo Dominus nostro pauore trepidabat, ut susceptionem nostræ infir-
mitatis induceret, & nostram inconstantiam, sua virtutis soliditate
vestiret. Quid clarius? quid expressius?

III. PUNCTVM.

A Christo igitur imitando, excusantis humanam infirmitatem in-
firma valde est & nulla excusatio; cum ipse non minùs atque
nos infirmus fuerit: nec minùs ipsi fortes simus ad toleranda no-
stra mala, quàm ille fuerit ad sustinenda sua. Elias homo erat si-^{Lac. 7.}
milis nobis passibilis, inquit sanctus Iacobus, quasi diceret, nihil
est quod vos excusetis ab eo imitando in iis quæ sunt vestri mu-
neris, quasi alius esset à vobis. Sic planè de Christo Domino,
Christus homo erat similis nobis passibilis; nihil confert ad ex-

cusationem vestram quod fuerit Deus, cum simul fuerit homo similis nobis. Sicut enim quod fuerit Deus, non impedit quin simul fuerit homo; sic neque obstat quin fuerit homo infirmus; ac proinde tantum abest ut possis inde te excusare ab eo imitando, quod Deus esset & te fortior, quin potius ex hoc ipso quod Deus esset & maxime fortis, habes efficacissimum eius imitandi motiuum; tum quod ipse Tantus se tantillum fecerit, ut te prouocaret ad se sequendum, tum quod te, tantillus cum sis, talem & tantum fecerit, ut possis eum sequi si velis. O quantum debemus tuæ fortitudini bone Iesu, sed non minus Infirmitatis; nam si fortitudo tua nos creauit, Infirmitas tua nos recreauit, sic patiendo pro nobis, sicque nos ad patientiam tuam excitando.

S. Aug.
Tract. 15.
in Ioan.

Modum autem in aduersis propius imitandi Christi, fuse docet sanctus Augustinus variis in locis: Primò quidem in illa Domini

Tr. 52. in
Ioan.

Verba: *Nunc anima mea turbata est. Quid est hoc*, inquit, *quomodo sequi iubes animam meam, si turbari video animam tuam? Quomodo sufferam quod graue tanta firmitas sentit? Quale fundamentum queram si petra succumbit. Sed videor audire in cogitatione mea respondentem Dominum, & quodammodo dicentem, magis sequeris, quia sic me interpono ut sufferas. Audisti ad te, vocem fortitudinis meae, audi in me vocem infirmitatis tuæ. Vires suggero ut curras, nec reprimo quod acceleras, sed transfero in me quod trepidas, & substerno quâ transeas. Et post pauca, sic ad praxim aptissime: Sicut autem hic dixit, Nunc anima mea turbata est, ita etiam ubi dicit Tristis est anima mea usque ad mortem, & Pater, si fieri potest, transeat à me calix iste, ostendit hominis suscepti infirmitatem, ut doceat sic contristatum & conturbatum quod sequitur dicere, Verumtamen non quod ego volo, sed quod tu vis, Pater. Sic enim homo ab humanis in diuina dirigitur, cum voluntati humana diuina praepositur. Et in hæc Psalmi trigelimi secundi verba: Exultate iusti in Domino, rectos decet collaudatio. QVI sunt recti? qui dirigunt cor secundum voluntatem Dei. Et si eos perturbat humana fragilitas, diuina consoletur equitas. Quamuis autem corde mortali priuatim aliquid velint, quo sua interim causa, vel negotio vel presenti necessitati conueniat: ubi intellexerint & cognouerint aliud Deum velle, praponunt voluntatem melioris voluntati suæ, & voluntatem Dei voluntati hominis. Quantum enim Deus distat ab homine, tantum voluntas*

Dei à voluntate hominis. Vnde gerens hominem Christus, & regulam nobis proponens, docens nos viuere, & prestans nobis viuere, ostendit hominis quandam priuatam voluntatem, in qua suam figurauit & nostram. Pater, inquit, si fieri potest, transeat à me calix iste. Hac humana voluntas erat, proprium aliquid & tamquam priuatum volens. Sed quia recto corde voluit esse hominem, ut quidquid in illo aliquantulum esset, ad illum dirigeret qui semper est rectus: Verum non quod ego volo, ait, sed quod tu, Pater. Ecce vide, inquit, te in me, quia potes aliquid proprium velle, ut aliud Deus velit. Conceditur hoc humana fragilitati; conceditur humana infirmitati, aliquid proprium velle, difficile est ut non tibi contingat: sed statim cogita qui sit supra te. Illum supra te, te infra illum: Illum Creatorem, te creaturam: Illum Dominum, te seruum: Illum omnipotentem, te infirmum cogita corrigens te, subiungensque voluntati eius, ac dicens: verum non quod ego volo, sed quod tu vis, Pater. Quomodo disiunctus es à Deo, qui iam hoc vis quod Deus?

Itemque alibi: Ut si cui eorum inter humanas tentationes contristari & dolere contingeret, non ideo se ab eius gratia putaret alienum, in Ps. 87. & non esse ista peccata, sed humana infirmitatis indicia, tamquam voci premissa concinens chorus, ita corpus eius ex ipso suo capite addisceret. Quod & breuius repotens sanctus Papa Gregorius: Ut cum hoc, inquit, imminet, quod fieri nolumus, sic per infirmitatem ^{l. 12. Mor.} petamus ut non fiat, quatenus per fortitudinem parati simus ut voluntas Conditoris nostri contra voluntatem nostram fiat. ^{c. 8.}

PRO EADEM FERIA QUADRAGESIMALI.

Ad Euangelium, de Domini Ingressu in Ciuitatem, & in templum.

VERITATES PRACTICÆ.

Ad hæc commotæ Ciuitatis verba de Christo Domino, *Quis est hic?*

Affectu potius quam studio Christus cognoscitur.

188 FERIA 4. infra Hebd. 1. Quadrag. De Compassione Christi.

In 1. parte, FERIA 2. hebdomada tertia in Aduentu.

Quidquid de Christo se scire dicant Impij, Christum nescire dicendi sunt.

In 4. parte, FERIA 4. hebdomada 19.

Dum è templo vendentes ejicere consideratur Dominus, considerandum venit quod in 1. parte habetur in Dedicatione Ecclesiæ: *Pauete ad Sanctuarium meum.*

Sic sæpè etiam Dominus res nostras euertit vt se summum ostendat Dominum: Tunc autem QVANTO minus murmuramus, aut quanto magis tacemus, tanto altiùs altissimum Eius Dominium prædicamus.

In 1. parte, FERIA 2. hebdomada sexta post Epiphaniam.

De hoc porro Ingressu Ierosolymitano, plura in Dominica Palmarum; & Dominica nona post Pentecosten, ac tota hebdomada 26. quartæ partis.



FERIA QVARTA.
DE COMPASSIONE CHRISTI
DOMINI ERGA HOMINES: ET DE
NOSTRA ERGA IPSVM.

*In misericordia sempiterna misertus sum tui, dixit
Redemptor tuus Dominus. Is. 54.*

VERITAS PRACTICA.

Frustra te Christi miseret, nisi te tui priùs misereat.

RATIO EST, Quia frustra te Christi miseret, nisi à te tollas
quod Christum affligit.

Sed nisi te tui misereat, non illud tolles.

Frustra te Christi miseret, nisi te tui prius misereat. 189
Ergo te frustra Christi miseret, nisi te tui prius misereat. Id est,
nisi te miserum & miserabilem scias.

I. P V N C T V M.

DE hoc interno Christi dolore prout à tristitia est distinctus, tria hæc perpendi possunt. Primum est, hunc dolorem fuisse præcipue de spiritualibus miseriis humani generis, quas Christus Dominus tibi repræsentavit cum sensibili compassione, & quibus suâ Passione remedium afferre voluit. Secundum est, hanc sensibilem Compassionem fuisse dolorem vehementissimum, supra quàm etiam passa fuerit Beatissima Virgo, dum iuxta crucem staret, cruci affixo Filio compatiens. Nam cum hæc duo sint quæ compassionem excitent, amor compatientis, & miseria eius cui compatitur: Certè quo hæc duo maiora sunt, eo etiam maior est compassionis dolor. Atqui maior erat Christi amor ergò nos, quàm Beatæ Virginis erga Filium: maiorem etiam Ipse Christus Dominus reputabat nostram miseriam, quàm suas pœnas, quia scilicet in miseria nostra videbat offensam Dei, & æternam animæ nostræ damnationem, quæ duo mala suis pœnis grauiora censebat, cum vt illa mala tolleret, sualibenter toleraret, vnde apertè patet quàm grauis esset illa Compassio. *Veritatem dico in Christo, non mentior, testi-* Rom. 9.
monium mihi perhibente Conscientia mea in spiritu sancto, quoniam tristitia mihi magna est, & continuus dolor cordi meo. Optabam enim ego ipse anathema esse à Christo pro fratribus meis, & quæ plura profert Apostolus ex hoc Compassionis affectu. Qui quantus fuerit, tam longe semper inferior affectu Christi fuit, quam longe Paulus infra Christum.

Tertium est, quòd licèt toto vitæ tempore non destiterit bonus Pastor & Saluator nobis compati, tamen accedente passionis & mortis horâ, hunc maximè concitauit affectum, vt tanto magis voluntariè pateretur, quantò magis compateretur. O quanta fuit miseratio Christi Domini, si quanta esset humani generis miseria, tanta esset Christi Domini commiseratio! O quantis dignus gemitibus Christi dolor, qui meis ita doloribus ingemere voluit! sed frustra ploras anime te plorantem, nisi te primo deplores. *Frustrate Christi miseret, nisi te tui prius misereat.*

Ratio est euidens, neque hîc opus multis verbis, vbi de facto agitur. Quid est enim quòd te Christi misereat, si dum posses eum solari, tollendo à te quod ipsum affligit, mauis ipsum affligere illud retinendo, quàm consolari tollendo? Nonne hoc est propterea quod queritur, *Et sustinui qui simul contristaretur, & non fuit; & qui consolaretur & non inueni?* Itane nullum inueniat se consolantem? Ita planè nullum, si quicumque simulant eum consolari, magis ipsum affigunt. *Consolatores onerosi omnes vos estis*, dicebat iis Iob quî se venerant consolaturi, à quibus tamen magis affligebatur. Sic planè tibi Christus Dominus, nisi tollas id à te quod in te videre non potest sine mœrore, quidquid dicās ad solatium, solatium est onerosum.

II. PUNCTVM.

SED non illud tolles quo se Christus affligi queritur, nisi te tuus prius misereat.

Nempe cum sit peccatum tuum & illud maxime peccatum tuum quo magis delectaris, & quo te beatorem putas dum magis peccas, quomodo illud tolles nisi mentem mutes, & nisi miseriam reputes, quod beatitudinem credis? quamdiu enim bonum & beatum aliquid dices, illud semper amabis & coles, vnde si quid à te tolli oporteat, oportet illud prius agnosci non vt bonum sed malum, non vt beatum sed miserum. *Scito & vide quia malum & amarum est reliquisse te Dominum Deum tuum, & non esse timorem mei apud te, dicit Dominus exercituum.*

Nec dicas te nullo delectari peccato; satis enim est ad delectationem peccati si cupitis rebus ita delectaris, vt cupiditas vel delectatio sit peccatum: satis est ad peccatum superbiæ vel vanitatis, si honorem auidius cupis, si plus æquo laudibus delectaris. *Nunc autem exultatis in superbiis vestris, omnis exultatio talis maligna est*, ait sanctus Iacobus. Hoc est itaque illud peccatum tuum quo delectaris, & quo Christus affligitur; hoc est quod dicitur à te tollendum, nisi desinat delectari: neque verò vquam desinet, nisi miseriam potius quæ in illo peccato latet concipias, & sic tui misereat. *Nescis quia tu es miser & miserabilis: & idcirco collyrio inunge oculos tuos vt videas.* En tibi aptum Collyrium: *Va cum benedixerint vobis homines. VAE vobis quia di-*

Frustra te Christi miseret, nisi te tui prius misereat. 191

ligitis primas cathedras. Nonne hoc est miserum sic maledici à 16. 11. Christo Domino? nonne ille est miser, quem miserum Christus dicit? & nonne is maledictus quem Dominus maledictum denuntiat?

III. PUNCTVM.

FRUSTRÀ te igitur Christi miseret, nisi te tui prius misereat; quia nisi te tui misereat, peccatum tuum non tolles, neque hoc nisi sublato, Christum poteris consolari, sed magis affliges, & ut ait sanctus Bernardus, afflicto afflictionem addes. Hoc est enim vnum quo maximè affligitur, hoc est vnum quo vehementiùs dolet, & quod à te magis doleri vult, *Nolite, inquit, flere super me, sed super vos ipsas flete*; ita scilicet ut quantum in vobis est illud flendo tollatis, quod mihi & vobis flendi causas ministrat. Sic aptè Sapiens, *Miserere anima tua placens Deo, & contine*; *Ecclési 30* quasi dicat, si vis placere Deo, si vis illum placare & solari, miserere animæ, agnosce miseriam tuam, & quantum potes depone, *Quid enim miserius misero non miserante seipsum*, ait sanctus Augustinus. At verò sanctus Cyprianus miseriam quæ in vano laudis appetitu later, sic inter alios planissimè aperit: *Virtutum* Lib. de Cardin. Christi oper. *sudoribus laus importuna se ingerit, & subtilissimis aculeis penetrans animam, dum extollit, emollit, & pungit dum ungit: virtutem in hypocrisim vertit, & simpliciter inchoata peruertit, quasi tinea quod integrum erat, rodit & occupat, & sanctitatis fundamenta euellit & dissipat. Mens hoc veneno imbuta in miseriis deliciatur, & occupata hac scabie, in ulceribus gloriatur. Religio fit superstitio, & succedit ei ambitio subornata: extincto spiritu, quadriduano cadaueri solum supersunt exuvia, virtutis species exanimis, & simulachrum sanctitatis.*

Satinne hæc ad miseriam tuam declarandam, qui totus es in illis ulceribus, totus viuus in illa scabie?

PRO EADEM FERIA QVADRAGESIMALI.

Ad Euangelium de Scribis potentibus signum, &c.

Matth. 12.

192 FERIA 4. infra Hebd. 1. Quadrag. De Compassione Christi.

Magister, volumus à te signum videre.

VERITATES PRACTICÆ.

Nisi diligenter aduertas, quod petis à Deo iustius, hoc est quod petis iniustius.

In 3. parte, Sabbato hebdomada septima; ubi hæc ipsa scribarum petitio declaratur opportune suo loco.

AD hæc Christi verba: *Generatio mala & adultera signum querit,* contra eos qui non vtuntur mediis ad salutem ordinatis, hæc proponi potest Veritas:

Si ordinatis ad salutem mediis non vteris, Mediatore Christo abuteris.

In hac 2. parte, Sabbato præcedentis hebdomadæ.

DE viris Niniuitis pœnitentibus ad prædicationem Ionæ: Quam sit necessaria & rara pœnitentia.


Licet omni peccatori sit necessario pœnitendum, vix tamen vllus est qui necessariam agat pœnitentiam.

In 1. parte, Dominica 4. Aduentus.

- De Reciduo contra quod consequenter hîc agitur, vide Dominica 3. Quadagesimæ.

Denique de Obedientia Charitatis in qua est perfectio, & de qua possunt intelligi Verba Domini; *Quicumque fecerit voluntatem Patris mei qui in cœlis est, ipse meus frater, & soror, & mater est.*

In 1. parte, Sabbato hebdomada 4. post Epiphaniam.



FERIA QVINTA.

DE DOLORE CHRISTI EX PERI-

TVRIS ET DAMNANDIS HOMINIBVS, PRO

QVIBVS

Quanto teipsum negligis, tantò te Christus doluit, &c. 193

*QUIBUS FRVSTRA PASSVRVS ERAT
ET MORITVRVS.*

*In vacuum laboravi, sine causa & vane fortitudi-
nem meam consumpsi. Il. 49.*

VERITAS PRACTICA.

*Quantò teipsum negligis quasi non esses cum cæteris
periturus, tantò te Christus doluit præ cæteris peri-
turus.*

*RATIO EST, quia quantò teipsum negligis, tantò indicas te
minùs respondere amori & curis quas singulares de te Christus
habuit.*

*Sed hoc est quod amanti tantò dolet quantò videt amatum minus
respondere suis curis.*

*Quanto igitur teipsum negligis quasi non esses cum cæteris peritu-
rus, tantò te Christus doluit præ cæteris periturus.*

I. PUNCTVM.

CVM Christus Dominus dederit Redemptionem semet-
ipsum pro omnibus, vt disertè affirmat Apostolus; ne-
que tamen omnes, imò pauci saluentur, & multi suá cul-
pā damnentur, vt patet ex Euangelio: dubitari non potest, quin
inde Dominus singulari dolore doluerit, quod scilicet tale pre-
tium, quale nouerat suum esse sanguinem, offerret pro gratiis
quæ iam perditæ aut perdendæ erant. Nullus enim ex damnatis
adultus fuit, qui non habuerit gratiam, pro qua demerenda
oportuit Christum pati & mori. At certè si vel pro saluandis sic
pati & mori durum esset, quantò magis pro damnandis, quibus
nihil prodesset passio, nec mors, nec sanguis. Nam, vt ait san-
ctus Thomas, *prinatio finis semper est grauior, quàm ipsa mediorum
iactura quæ impenduntur ad finem.*

Quid quod videbat damnatas aut perituras animas non modò nihil ex suâ passione fructus reportaturas, sed & propterea magis damnandas & cruciandas, quòd pro ipsis passus esset, & quod illis gratias promeruisset & obtulisset quas neglexissent:

1. Pet. 2. Certe hoc illi erat peracerbum. *Sic lapis offensionis dictus est &*
 Luc. 2. *Petra scandali: Sic positus in ruinam multorum & in signum cui con-*
tradiceretur; quia videlicet inde magis in Christum & Christiana-
 nam religionem efferati fuerint, quod Christus cruci esset affi-
 1. Cor. 1. xus; *hoc erat Iudæis scandalum & gentibus stultitia*, vnde & ipsi
 Luc. 20. *accipient damnationem maiorem, ut est in Euangelio.*

Adde his hæreticos & liberioris vitæ homines qui se à Christo passo & mortuo sic iactitant esse saluatos, ut nihil sibi laborandum, nihil sibi persuadeant esse patiendum! Quin ex ipsis etiam Christianis & religiosis qui omnes carnem suam cum vitiis & concupiscentiis deberent crucifigere, quàm pauci tales, qui paupertatem, humilitatem, patientiam, cæterâsque Christi virtutes sibi proponunt imitandas! quàm multi contrà vel prorsus negligunt, vel impossibiles aut nimis difficiles, vel non sibi aptas causantur! Quæ cum omnia probe nosset, & velut præsentia cerneret Dominus, *In vacuum laboravi,* aiebat gemens & dolens, *sine causa & vane fortitudinem meam consumpsi: Ergo iudicium meum cum Domino, & opus meum cum Deo meo.*

15. 49.

Tu porrò qui hæc legis aut meditaris, an te ex his vnum esse putas, quem Christus maxime doluit? Non putas forsan, quia non times te vnum esse ex perituris, vnde & te ipsum negligis ac paulo liberiores vitam agis, quàm si magis timeres. At verò hinc timere discere, *Discere quod quanto te ipsum negligis, quasi non esses periturus, tantò te Christus doluit præ aliis perituris.* Sic enim apertè indicas te non respondere amoris & curis quas de te Christus Dominus singulares habuit. Cùm enim te videas tot præuentum gratiis & affectum beneficiis, ut de salute tua longè potius sperandum tibi videatur quàm timendum, nonne habes quod fatearis te singulari amatum affectu ab eo esse, qui te tot præuenit gratiis? At quorsum illæ gratiæ, quorsum ille amor singularis nisi ut redames amantem, & quantum vult à te diligere, tantum dilectionis impendas? Itane verò sic diligis quantum diligeris? apparet ex negligentia illa tua quàm longe sis ab illa

Quanto te ipsum negligis, tantò te Christus doluit, &c. 195
reciproca dilectione. Sicut enim qui diligit, & qui timet Deum ^{Ecclesi. 7.}
nihil negligit, sic qui negligit, non diligit.

II. PUNCTVM.

SED hoc est quòd amanti tanto magis dolet, quantò videt amatum suo minùs respondere amorì suisque curis.

Dolor enim ex amore nascitur, vt supra visum est, & quantus est amor, tantus sit dolor necesse est, si amorì non satisficit: Numquam autem satisfactum sibi putat amor, nisi amore reciproco; neque verò verbis verus amor reciprocatur, sed re & opere: Vnde quando desunt illa opera, tunc amor in amato deesse creditur, & hinc tantus in amante dolor sentitur, quantus erat amor, quantòque minùs illi ab amato respondetur. *Licet plus* ^{2. Cor. 12.}
vos diligens minus diligar, aiebat Corinthiis Apostolus; quasi diceret, licet hoc mihi sit peracerbum & graue, sic minùs à vobis diligi, quos plus diligo; non desinam tamen vos diligere, quamquam is dilectioni dolor semper miscebitur, quod ab iis minus diligar, quos magis diligo.

Nonne tu hoc ipse sentis? nonne id experiris si quem amas? quis animi dolor si à dilecto non diligeris? nonne id vehementius dolet, quàm à cæteris quos minus amas, non amari? Sic sentiebat, sic loquebatur Dominus: *Quoniam si inimicus meus male dixisset mihi, sustinuissem utique: Tu vero homo vnanimis, qui si-* ^{ps. 54.}
mul mecum dulces capiebas cibos!

III. PUNCTVM.

QUANTO igitur te ipsum negligis, quasi non esses cum cæteris perituris, tantò te Christus doluit præ cæteris perituris; quia te magis diligens minùs diligitur. Licet enim fortè magis diligatur, quàm à quibusdam perituris qui vix eum norunt, minùs se tamen reputat à te diligi, quòd minùs respondeas eius amorì, quàm illi responderint; Minus illi videlicet dilecti sunt, minus gratiæ & facultatis habuerunt ad eum redamandum, quàm tu habueris: minùs denique se ab illis quàm à te diligi voluit; vnde ^{2. Reg.}
iure conqueritur se magis de te dolere quàm de illis, quia ex maiori amore maior est dolor. *Doleo super te, frater mi Ionatha, deco-*

196 FERIA 5. infra Hebd. 1. Quadrag. Dolor Christi de perituris.

re nimis & amabilis super amorem mulierum. Sicut mater unicum amat filium suum, ita ego te diligebam. Sic amoris dolor ex æquo loquitur & respondet.

Itane cogitaueras te vnum ex grauissimis Christi tortoribus extirpasse? te illum fuisse, quem maximè doluit, quando suas doluit perire gratias, quando sua doluit virtutum exempla tam parum iis proficere, quibus vel maxime voluisset? Iam verò cum id noris, pergesne illi esse grauis & molestus? pergesne in negligentia tui profectus & salutis? vnde habes te non periturum? vnde ista præsumptio, quæ tantæ est parens negligentiae, vt à quotidianis tuis delictis non resurgas, non expauescas? *Nolite seduci*, ait Apostolus, *corrumpunt mores bonos colloquia mala. Euigilate iusti, & nolite peccare: Ignorantiam enim Dei quidam habent; ad reuerentiam vobis loquor.* Id est, pudendum certè Christiano sic viuere, quasi Deum ignoraret vel quasi ignoraret Deo displicere peccata illa, quæ non satis cauet quòd leuiora sint, & à salute non excludant. *Caue & da locum timori Altissimi.*

1. Cor. 15.

Ecclesi. 19.

Vide etiam in 1. parte, FERIA 3. hebdomadæ quartæ.

Quod sicut non est habenda sollicitudo anxiosa de peccatis remissis, ita rationabilis non est deponenda.

Et in 2. parte, Dominica Septuagesimæ.

Quæ causa est cur pauci salui sint, hæc in te causa est, cur ex illis forte non sis.

PRO EADEM FERIA QVADRAGESIMALI.

Ad Euangelium, de Cananea. Matth. 15.

Tota refertur narratio & illi conformis Veritas, in 3. parte Sabbato hebdomadæ 14. Et quæ de fide vel fiducia plures adiungi possunt, facile est ex aliis locis petere.



FERIA SEXTA.
DE CONFUSIONE CHRISTI,
PROPTER INIQUITATEM OMNIUM
NOSTRUM, QUAM DEVS
IN EO POSUIT.

*Vere langores nostros ipse tulit, & dolores nostros
ipse portauit, nos quasi oves errauimus, & po-
suit Dominus in eo iniquitatem omnium no-
strum. Il. 53.*

VERITAS PRACTICA.

Quæ in malo bona est Confusio, in bono mala est.

*SENSVS & RATIO est, quòd in malo seu peccato commit-
tendo Confusio seu Verecundia bona est, quia sic animus indi-
cat se peccatum auersari.*

*Sed in bono agendo si talis adesset Confusio quæ illud bonum auer-
saretur & refugeret, tunc mala esset.*

*Ergo quæ in malo bona est Confusio, in bono mala est seu mala
esse potest, nisi diligenter caueatur.*

I. PUNCTVM.

MANIFESTE distinctus est iste dolor ab aliis. Ad
eum autem intelligendum duo sunt præsupponenda. Pri-
mum est, Christum Dominum innocentissimum agnum
sic à peccato fuisse alienum, non modò vt nullum vmquam po-
tuerit committere, sed vt nullum à quocumque commissum fu-

finire potuerit, quin maximè abhorreret. Alterum est, quod non obstante illo naturali peccatorum horrore, omnia tamen omnium hominum peccata sic in se transtulit, aut sibi à Deo imposita sustinuit, ut se velut omnium delictorum reum intueretur, itaque coram Deo appareret.

Is. 53.

Hoc est videlicet quod ait Propheta, *Posuit Dominus in eo iniquitatem omnium nostram*, seu ut habet alia versio, transire fecit in eum omnem iniquitatem. Hoc item est quod scribit Apo-

1. Cor. 5.

stolus, *Eum qui non nouerat peccatum, fecit peccatum pro nobis*, id est, victimam quæ esset velut onerata omnium & vniuscuiusque peccato, atque eius poenas persolueret; sicut passer ille

Leuit. 16.

de quo est in Leuitico, qui dicitur peccata populi portare. In hunc

2. Pet. 2.

etiam sensum sic apertè sanctus Petrus: *qui peccatum non fecit, peccata nostra ipse pertulit in corpore suo super lignum*. Quod non

melius explicari potest, quàm si repræsentetur Spõsor seu Fideiusor, qui se pro alio constituit, licet ille nullum culpæ aut pecuniæ debitum contraxerit, tamen perinde soluit, atque si esset

Ps. 68.

reus aut debitor; sic Christus Dominus se Vadem & Sponsorem nostrum constituit, sicque in se omnem prorsus iniquitatem transferens, debitas ei poenas persoluit. *Qua non rapui, tunc exolebam. Non peccaui & poenas dabam*. Sic de Christo sanctus Augustinus.

Hinc autem nata Confusio, & verecundi sensus ille pudoris, quo anima Christi se coram Deo velut indutam & opertam peccatis omnibus vidit, viditque Deum simul illis offensum grauissimè, & valde iratum; cùmque à se omnium poenas exigeret, sibi quodammodo cernebat iratum, cùm irasci in Deo nihil aliud sit, quàm poenas exigere aut inferre; sic autem poenas in-

Is. 53.

Ps. 67.

ferebat Filio Pater, quasi si peccator aut peccatum esset; *Propter scelus populi mei percussus es eum. In me transferunt ira tua*. Quo-

certè in statu Christus non poterat non confundi & non dolere vehementissimè, sicut cùm in columna nudus apparuit coram populo, aut in veste alba vel purpurea deridendus, quis dubitat

zum eius vultum pudore & confusione suffusum? Sic suo modo interiùs coram Deo, cui soli est notum quàm sit peccatum hor-

Ps. 68.

rendum & abominabile. Propterea sic filius Patri; *Tu scis*, inquit, *improprium meum & confusione meam, & reuerentiam meam*; quasi diceret, nemo scit alius, neque id explicari po-

test; potest tamen conjici ex hoc Prophetæ loco, qui Christo adaptatur, *Ostendit mihi Dominus Iesum Sacerdotem magnum stantem coram Angelo Domini, & Iesus erat indutus vestimentis sordidis.* Zacch. 3. Quænam sunt illa vestimenta sordida nisi peccata? & quid est sic operiri Christum peccatis nostris, nisi sic confundi & erubescere, sicut nobilissimus & delicatissimus adolescens sordidas vestes abhorreret, & iis indutus confunderetur?

Hoc est scilicet esse Redemptorem, hoc est esse Iesum & Salvatorem, nihil quidquam omittere eorum, quæ ad salutem nostram pertineant, licet confusione & rubore plena. Si quid enim nos ab officio auocare solet, metus est maxime confusionis & pudoris; sed bonum Iesum nihil tale auertit quin omnia sustineret, ut nos doceret in malis quidem Verecundiam esse bonam & laudabilem, at in bonis malam & culpabilem. Age Christo gratias, & quod monet Sapiens, *Gratiam Fidei tuæ ne obliuiscaris, dedit enim pro te animam suam.* Eccles. 12.

Tum quid sit quod verecundia sit laudabilis in malo, Vide & quàm sit verum; Quia scilicet quod verecundamur & erubescimus, indicamus nos nolle; nolle autem malum quis non videt esse laudabile? Præclare admodum sanctus Bernardus de hac verecundia, *Lampas est, inquit, pudica mentis ingiter lucens, ut nihil in ea turpe vel indecorum residere attentet, quod non illa illic prodat.* Serm. 86. Cantica. Ita expuntrix malorum & propugnatrix puritatis innata, specialis gloria conscientia, & fama custos, vita decus, virtutis sedes.

Itane erubescis, & metuis in occurso mali, & peccati periculo? In honore oblato, in laude audita, in aspectu foeminae, & similibus huius virtutis obiectis? an potius *frons mulieris meretricis facta est tibi, noluiisti erubescere?* Jer. 3.

II. PUNCTVM.

SED in bono agendo si talis confusio adesset ut auersaretur propterea illud bonum, nec vellet facere, tunc mala esset & culpabilis.

Quis enim hoc non videat? Nam præter quàm quod bonum deseritur, sic bonum deserere pro tam leui causa, qualis est sensus ille verecundia vel confusionis, certè id auget culpam. Si tantum esset sensus vel primus motus absque illo affectu quo deseritur bonum, tolerari posset; nec enim est in nostra potestate:

aut si alia de causa bonum minime imperatum, ommitteretur, id fieri posset sine culpa. Sed illa duo simul iur^{ta} reddunt hanc verecundiam valde culpabilem & reprehensibilem, nempe omittere bonum vel committere malum propterea solum quod confusio coram hominibus timeatur; Hic enim manifestus est respectus humanus, hoc est scandalizari de Christo, hoc est ipsum
Matth. 21. erubescere, hic est lapis offensionis & hac petra scandali super quam qui ceciderit confringetur, super quem verò ceciderit conteret eum, ut ait Dominus.

Pleni sunt sacri Codices, & antiquorum patrum Monumenta grauib^{us} inuectiuis contra huiusmodi pudorem noxium & prauam verecundiam. *Christus*, inquit Tertullianus, *confusioni confusionem comminatur: Qui me confusus fuerit coram hominibus, & ego confundar eum coram patre meo qui in cælis est; sciebat enim à confusione vel maximè formari negationem, mentis statum in fronte consistere, priorem esse pudoris quàm corporis plagam.*

2^a Cor. 6. Sanctus Gregorius, *Quid rogo, iste faceret in dolore pœnarum, qui Christum erubuit inter flagella verborum? Sanctus Augustinus: Ille non est Christi seruus, sed subsannator & irrisor, qui eius se seruum dicit, cui seruire dissimulat. Idemque alibi, Quid facies quando dicet tibi, erubuisti de humilitate mea, non eris in claritate mea. Ac rursus, Discedat mala verecundia, accedat salubris impudentia, si impudentia dicenda est.*

III. PUNCTVM.

Hom. 10. in Ezech. **E**RGO quæ in malo bona est confusio, in bono mala est. Quæ quidem Veritas, tota est sancti Gregorij, quique eam fulius sic declarat, *Sicut verecundia laudabilis est in malo, ita reprehensibilis est in bono. Erubescere enim malum, sapientiæ est; bonum verò erubescere, fatuitatis; unde Scriptum est; Est confusio adducens peccatum, & est confusio adducens gloriam. Qui enim erubescit penitendo mala quæ facit, ad vitæ libertatem peruenit; qui verò erubescit bona facere, à statu rectitudinis cadit, atque ad damnationem tendit, sicut per Redemptorem dicitur; qui me erubuerit & meos sermones, hunc filius hominis erubescet.*

Nota verbum *fatuitatis*, quo sanctus Pater utitur, nempe fatuitas aperta est, timere confusionem humanam, nec timere diuinam,

animam, seu eam quæ à Deo verè timenda est. Nam si ex illa confusione humana, non vereris offendere Deum, cõfundet te Deus, confusione longe grauiori; Et nonne hoc est esse fatuum, euitare minus malum, vt incidas in grauius? *Cadent & infirmierunt*, ait *Ier. 20.* Propheta, *quia non intellexerunt opprobrium sempiternum.* Atque *Ibid. 23.* idem rursus: *Dabo eos in opprobrium sempiternum, & in ignominiam æternam, qua numquam obliuione delebitur.*

Et tamen quàm multi sunt sic fatui, & quod peius est, quì numquam melius sibi sapere videntur, quàm cum sic fatui sunt. Caue offendas ad hunc lapidem. Serua libertatem vbique & semper, *Noli erubescere testimonium Domini nostri. Non confundaris confiteri peccata tua.* De qua Confusione imprimis cauenda sic aptè sanctus Bernardus. *O verecundia expers rationis, inimica salutis, totius ignara honoris & honestatis; hac planè illa, quam Sapiens loquitur, confusio adducens peccatum.* Itane verecundum est homini vinci à Deo, & probro ducitur humiliari sub potenti manu altissimi? *O peruersitas! Non pudet inquinari, & ablui pudet!*

2. Tim. 1.

Ecclesi. 4.

Ep. 185.

PRO EADEM FERIA QVADRAGESIMALI.

Ad Euangelium, de Sanato Paralytico in Piscina.

Ioan. 5.

VERITATES PRACTICÆ.

Vis sanus fieri? Quod videris tibi velle, velles quidem; sed verè non vis.

In 3. parte, Feria 2. hebdomada duodecima. Vbi tota hac abundè refertur historia.

DOMINE, hominem non habeo. De Necessitate Directoris & vsu directionis, In 1. parte, tota hebdomada tertia post Epiphaniam, & præcipue 1. & 2. Feria.

SVRGE, tolle grabatum tuum, & ambula. Et statim sanus factus homo ille, & sustulit grabatum suum, & ambulabat. Quam sint hæc apta ad exprimendum perfectionis progressum, in eadem 1. parte habetur, vbi à Christo alius simili modo sanatur para-

202 *Sabbato infra Hebd. 1. Quadrag. Dolor Contritionis, &c.*

lyticus : tota quarta hebdomada post Epiphaniam.

IESVS autem declinavit à turba constituta in loco : postea inuenit eum Iesus in templo. Cur sic à turba declinauerit , curue paulò post se spectandum in templo dederit , fuse declaratur suprà dicto loco tertiæ partis , vnde est hæc Veritas valde practica :

Hæc est maxime laudabilis Humilitas, quæ sic laudes fugit vt laudanda non omittat.



S A B B A T O.

DE DOLORE CONTRITIONIS QUEM CHRISTVS DOMINVS VALDE SENSIBILEM HABVIT.

Ipse vulneratus est propter iniquitates nostras , attritus est propter scelera nostra. Is. 53.

VERITAS PRACTICA.

Vera Contritio dolorem sensibilem nec includit nec excludit.

RATIO EST, quia vera contritio in vna est detestatione peccati propter Deum offensum.

Sed illi detestationi neque necessarius est neque contrarius dolor sensibilis.

Ergo vera contritio dolorem hunc sensibilem nec includit nec excludit : vnde nec nimis anxie est quærendus si desit : nec si adsit, est repellendus.

I. PUNCTVM.

CONFUSIONI cæterisque doloribus animi & corporis quos sustinere voluit Christus, accessit Contritio de peccatis hominum, qui dolorum omnium cumulus & aliquod veluti complementum fuit. Sic enim plenius & copiosius satisfaciebatur pro peccatis nostris, cum de his etiam doleret animo, non quidem ut nos qui de propriis dolemus, cum proposito emendationis, sed quo ille modo poterat, quem postea multi sunt imitati sancti, dolentes de peccatis hominum tantâ doloris vehementiâ, ut pene disrumperentur.

Verum in Christo Domino multa erant, quæ longè supra quolibet homines siue de propriis siue de alienis peccatis poenitentes dolorem illum exaggerabant. Primum, clara cognitio grauitatis peccati; Nouerat enim quid esset Deus, quid Deus offensus, quid offensus ab homine, à tot hominibus, tanto tempore, tot offensis. Deinde ut erat ardentissimus Diuini honoris læsi, & reparandi zelator, nihil omittebat eorum quæ sciret ad id conferre; cumque in appetitum naturalem id omne posset quod veller, quis dubitet Christum non sibi pepercisse, & seipsum excitasse ad dolorem illum sensibilem quantum posset concipiendum? Quod si verò potentiam suam exeruit, ut quidquid posset, id veller; quò tandem doloris peruenisse dicenda illa erit Contritio, ad quam excitandam tria illa Christi Domini tam infinita quam Diuina, simul concurrebant, *Scientia, Potestas, & Voluntas*? Si quid enim in nostris deest, id ex alterutro eorum trium prouenit, vel quia nescimus quid sit peccatum, vel quia non possumus appetitum inferiorem sensibilibiter excitare, aut quia non sicut velle oporteret, volumus. In Christo autem nihil horum deerat, ut dictum est, sicque vehementissimus ex omni parte dolor fuit, & aliorum animi tum corporis dolorum quidam velut excitator & promotor, cum ex dolore interno, satisfactio exterior eò sequatur maior, quo maior est dolor. *Magna est velut mare Contritio tua*; Cæterorum quidem sanctorum ut fluij vel riui; sed Christi velut ipsum mare, *Ossa mea*, inquit per Psalmistam, *sicut ps. 101. cremum aruerunt; sicut in fixorio confixa sunt*, ita legit sanctus Augustinus in Psalmis.

O si sciremus quid sit peccatum! quid sit Deus offensus! dic potius anima mea dic potius, o si saltem quantum scio, aut quantum scire possum quid sit peccatum, & quàm velit Deus à me doleri & expiari, ita dolerem & diuinam detestaret offensam!

Et verò cùm dupliciter hic errare possis; Primò quidem si dolorem sensibilem & lachrymas nimis violenter extorqueas; deinde si fortè sensibilibiter mouearis, sensum illum & motum pietatis repellas; audienda Veritas, quâ statuitur in vera Contritione dolorem illum sensibilem *nec includi, nec excludi*.

Seff. 14 c. 4

Ratio petitur à vera veræ Contritionis definitione, quæ à Concilio Tridentino dicitur esse *animi dolor ac detestatio cum proposito non peccandi de cetero*. Quibus in verbis tres differentię temporis comprehenduntur; præteriti quidem dum veteris vitæ odium requiritur; præsentis verò, dum cessandum esse à peccato declaratur; futuri denique, dum vitæ nouæ propositum & inchoatio præcipitur iuxta illud Ezæchielis; *Projicite à vobis omnes iniquitates vestras, in quibus prauaricati estis, & facite vobis cor nouum, & spiritum nouum*.

Ez. 18.

Pf. 50.

Hoc in me, Domine, cor mundum crea, & spiritum rectum innoua in visceribus meis.

II. P V N C T V M.

SED illi peccatorum detestationi nec necessarius est, nec contrarius sensibilis dolor.

Primò quidem quòd non sit necessarius, ex eo patet, quòd non sit in nostra potestate, cùm multi hunc dolorem vehementer desiderent, & à Deo petant, nec tamen obtineant. Nihil autem à nobis necessario requiritur, quod non possimus cum gratia, & ad quod exequendum gratia denegetur. Sic enim vniuersum de omnibus, quod de vno affirmatur, *Mandatum hoc quod ego precipio tibi hodie, nec supra te est, neque procul positum: sed iuxta te est sermo valde, in ore tuo, & in corde tuo ut facias illum*.

Deut. 30.

Pf. 6.

Is. 38.

Quòd verò etiam non sit contrarius, ex approbatis sanctorum lachrymis liquet, qui cum Dauide dicunt, *laboravi in gemitu meo: lauabo per singulas noctes lectum meum*. Itémque cum Ezechia, *Recogitabo tibi omnes annos meos in amaritudine anima mea*.

Vera Contritio dolorem sensibilem nec includit, nec excludit. 205
Auderesne tu repellere quod tam sancti viri susceperunt?

III. P V N C T V M.

VER A ergo Contritio dolorem illum sensibilem nec includit nec excludit; Cum vera Contritio in vera peccatorum detestatione consistat, quæ sic formari potest sine dolore sensibili, ut cum eo etiam formari possit. *Sicut fuit sensus vester ut erraretis* Bar. 4. *à Deo, decies tantum iterum conuertentes requiretis eum.* Hoc est verè conteri & poenitere; tum verò bene sperandum quod dicitur: *Dominus bonus propitiabitur cunctis, qui in toto corde requirunt* 2. Par. 3. *Dominum Deum patrum suorum, & non imputabit eis quod minùs sanctificati sunt.*

Expende illud *in toto corde*, sicut enim totum in hoc toto corde reponitur, ut si quidem adsit, nihil ad veram desit poenitentiam; si quid vero desit de toto, tunc absit totum quod requiritur, nec nili forte in mendacio reuerti dicitur, qui non in toto corde 1er. 3. reuertitur. Hoc certe indicat ipsum nomen Contritionis quæ quasi quædam est totius cordis in minutissimas partes scissio, sicque Scriptura sapius, *Scindite corda vestra.* Vnde & dicitur 1oel. 2. *Sacrificium*, ac ipsum holocaustum quod est præstantius, & quod Deo totum immolatur. *In animo contrito & spiritu humili-* Dan. 11 *tatis suscipiamur: sicut in holocausto arietum & taurorum, & sicut in millibus agnorum pinguium, sic fiat sacrificium nostrum in conspectu tuo.* Sic in fornace Babylonica tres illi Viri qui se interno incendebant igne, suaque Deo mactabant corda, dum in externis flammis sua videbant spirare corpora. Sic apte S. Augustinus in Psal- ps. 50. *mus quinquagesimus: In te habes quod offeras: habes in te quod occidas: Sacrificium Deo spiritus contritulus, cor contritum & humiliatum Deus non spernit.*

Egregium porro sermonem habet sanctus Bernardus de cor- Serm. 16. in Cant. dis Contritione qui totam eius formam ad hæc præcipua refert; *Deum cogita factorem tuum, cogita & benefactorem, cogita patrem; cogita Dominum. Ad omnia reus es, plange per singula. Quamnam fronte attollo iam oculos ad vultum patris tam boni, tam malus filius? Confundor, confundor audire: si ego pater, ubi est honor meus? sed etsi pater non esset, obrueret me beneficiis.*

Et quæ plura pergit, quæ tantò erunt validiora, quanto erunt

magis vnita Cordi Contrito Christi Iesu, qui hoc ipsum quod doles peccatum ita doluit vt dolere numquam desinat, quia doloris eius meritum numquam exhauritur, sicque modò tam potest esse efficax quàm dum ipso doleret actu, si quod tuum est modo facias, & quoties dolendum erit, sic cum ipso perfectè doleas.

Quàm autem id frequenter sit exercendum, habes inferius in hebdomada Passionis, Feria quarta, vbi hæc proponitur Veritas. Crux interdum à corpore, sed numquam ab animo deponenda.

Euangelium Feriæ, prorsus idem ac sequentis Dominicæ.





DOMINICA II. QVADRAGESIMÆ.

DE TRANSFIGVRATIONE DOMINI.

*Assumpsit Iesus Petrum & Iacobum & Ioannem
Fratrem eius, & duxit illos in montem excelsum
seorsum, & transfiguratus est ante eos.*

Matth. 17.

Cur tamdiu distulerit Dominus sic transfigurari : cur ante tam paucos transfiguratus est : cur ante hos tres præsertim, non ante alios ; Abnegationis nostræ est, reuereri potius quidquid est factum, quam cur ita sit, velle discutere.

Nihil est, autem, in Abnegatione rationabilius, quàm quod in illa videtur minus rationabile.

Habetur hæc Veritas in 4. parte, Feria 4. hebdomada decima quinta.

ET resplenduit facies eius sicut sol : vestimenta autem eius facta sunt alba sicut nix.

Hæc sunt videlicet insignia Beatæ animæ ; sic nos aliquando beati, sic aliquando similes ei erimus : sic Ille reformabit corpus 1. Ioan. 3: humilitatis nostræ configuratum corpori claritatis suæ. Quam Phil. 3: vt spem & expectationem in nobis excitaret, sic apparere, sic resplendere voluit. De hac autem spe & coelesti desiderio, tota est

Ascensionis Domini hebdomada, in hac 2. parte, singulis feriis,
ac præsertim Sabbato, cuius est hæc Veritas:

Spes cœli, cœlum est.

*ET ecce apparuerunt illis Moyses & Elias cum eo
loquentes.*

Cur illi duo Prophetæ præ cæteris? Hæc inter alias ratio red-
ditur, quòd illi vehementius Deum seu Christum videre deside-
rauerint: Vide Exodi 33. & 3. Regum 19. Sic se his Christus
qui se magis desiderant, magis communicat, vnde si tam rara est
familiaris eius Communicatio, non aliunde est quàm quod rari
sunt, qui se ad illam veris desideriis ex diuina conceptis gratia
paratos velint. Hoc certe mirum!

Vix vllus est qui non se verè putet desiderare Christum;
Et vix vllus est qui Eum verè desideret:

In 1. parte, Feria 5. prima Aduentus hebdomada.

*RESPONDENS autem Petrus dixit ad Ie-
sum, Domine, bonum est nos hîc esse; si vis,
faciamus hîc tria tabernacula, Tibi unum
Moysi unum, & Elia unum. Addit S. Marcus:
Non enim sciebat quid diceret.*

Si nec in ipso cœlesti gustu sistendum est, longè mi-
nus in sensuali.

In 4. parte, Feria 5. hebdomada decima quinta.

Quò etiam spectare possunt hæ duæ Veritates.

Beatius est magis carere omni sensibili consolatione,
quàm ea abundare.

In hac 2. parte, Feria 4. hebdomada Sanctæ.

Si quid interdum sensibus licite indulgetur, non vt sen-
suale

In die bona nisi memores mala, non erit dies bona. 209
fuale est, sed ut est licitum, accipiendum est.

In 1. parte, Feria 5. hebdomada 5. post Epiphaniam.

Et ecce vox de nube dicens: Hic est filius meus dilectus in quo mihi bene complacui, ipsum audite.

Nullus est Christianus qui non credat Christum esse filium Dei: Et vix est ullus Christianus qui hoc verè credat.

Stupenda hac Veritas sapius inculcanda. Declaratur in 3. parte. In Festo Transfigurationis, sexto Augusti.

ET descendantibus illis de monte praecepit eis Iesus dicens: Nemini dixeritis visionem, donec Filius hominis à mortuis resurgat.

Humilitati tuendae tutius est, vix de se quàm vel humiliter loqui.

In hac 2. parte, Sabbato hebdomada 1. post Octavam Paschae.

HÆC sunt quæ aliunde huc transferri possint, & fructuose singillatim considerari. Sed quemadmodum in solemnioribus regni Comitibus, quid potissimum pertractetur, inquiritur; Ita in singulari hoc Conuentu ubi ex omni pene hominum statu, adsunt Viri delecti cum Christo Domino; quid simul tractent, quid conferant, quid loquantur, hoc imprimis videtur exquirendum & perpendendum. Sic autem sanctus Lucas refert:

Et dicebant excessum eius quem completurus erat in Ierusalem. Luc. 91.

Id est, salutiferam Passionem, ait sanctus Cyrillus. Quod certe mirum, cum hæc duo Myſteria tantopere diuersa sint, atque inter se discrepantia. Sed propterea sic sapienter à Domino factum est illud, ut inde MODERATIONEM ANIMI, quæ non minus rara est inter homines, quàm illis est necessaria,

2. Pars.

Dd

disceremus. Sic itaque mutuam quæ inter vtrumque Mysterium, interest, oppositionem spectare conuenit, vt quæ inde praxis ad illam Moderationem in quocumque statu, prospero vel aduerso retinendam, elicitur; vel maxime perpendamus. Quem in finem, hæc visa est magis opportuna VERITAS PRACTICA quæ ad alias adjiceretur, & singulari studio pensitaretur:

In die bona nisi memores mala, non erit dies bona.
Et in die mala si memores bona, non erit dies mala.

RATIO EST, Quia diem esse bonam aut malam non aliter censeri debet, quàm si dies in profectum animi, vel defectum cadat.

Sed non aliter dies in profectum aut defectum cadet, quàm si in die bona memores mala: aut in die mala memores bona.

Ergo nec aliter erit dies bona, vel mala. Ac proinde ex sapientis consilio & exemplo Christi Domini, In die bonorum ne immemor sis malorum: & in die malorum ne immemor sis bonorum.

Ecclési. II.

L P V N C T V M.



V M opposita iuxta se posita magis elucescant; erit operæ pretium hîc ante omnia sic inter se conferre duo illa Sacra Mysteria Transfigurationis & Passionis Christi Domini, vt quæ apparebit euidentis oppositio, lucem & splendorem vtrique augeat. Primum igitur expende oppositionem.

- Matth. 17. De Transfiguratione dicitur, *Resplenduit facies eius sicut sol, & vestitus eius albus & resurgens; & qui cum eo erant euigilantes viderunt maiestatem eius*: De Passione verò, *Non est ei species neque decor, quoniam absconditus est vultus eius & despectus, unde nec reputauimus eum*. In Transfiguratione, sic Pater auditur de Filio, *Hic est filius meus dilectus, in quo mihi bene complacui*; In Passione verò sic Filius auditur de Patre, *Deus meus, Deus meus vt quid dereliquisti me?* In Transfiguratione resplendet medius inter duos insigniores Prophetas, qui & ipsi videntur in maiestate; In Passione verò medius inter duos latrones qui crucifixi sunt cum eo. In
- Marc. 9.
Luc. 9.
Is. 53.
Matth. 27.

Transfiguratione; *Bonum est nos hic esse*, clamant Apostoli; In Passione verò, *omnes eo relicto fugerunt*. In Transfiguratione beatitudo animæ redundat in corpus & vestimenta; In Passione tormenta corporis in ipsam refluunt animam; & quoad partem inferiorem, omni priuant solatio.

DEINDE vero quantum à se inuicem elucescant, intuere; Transfigurationi quidem confert Passio, quòd in illa nihil nisi de morte Christi agatur: Quæ res omnium quæ tractari possent cum sit grauissima, non mediocrem Mysterio dignitatem affert. Passioni autem Transfiguratio multum deseruit, quia ex Transfiguratione magis apparet, quantum honoris & beatitudinis Christus Dominus sibi detraxerit vt pati posset: nisi enim splendorem illum retinuisset, vt corpus suum passibile redderet, sic semper & vbique fulgere poterat vt in monte Thabor. O quam diuersi sunt sensus Christi & hominum! conquirunt vndique homines subsidia corpori ne patiatur; at Christus quam habet impassibilitatem suo denegat corpori, vt pati possit!

Sed cur eo præcipue tempore, quo corpori debitam permittebat lætitiā & beatitudinem, de acerba morte sermo ingeritur? Cur tam lætis, tam tristia: tam iucundis tam amara immiscentur? Vt scilicet, *In die bonorum non sit immemor malorum*; *Luc. 23.* sicut in Cruce de Paradyso loquitur cū latrone, *ne in die malorum sit immemor bonorum*. O præclarum documentum ad æqualitatem animi in tanta rerum varietate conseruandam! Non egebat quidem Christus hac cautione, vt se in ea contineret, cum non esset mutabilitati & inconstantia subiectus sicut cæteri homines; sed cū esset nostrum Exemplar, sic nos efformare voluit, vt à bonis & malis euentibus caueremus. Non est autem aptior cauendi modus, quàm si in die bonorum non simus immemores malorum; nec in die malorum obliuiscamur bona. Neque ad hanc memoriam excitandam videtur aliquid fore opportunius, quàm si id plenè persuasum habuerimus quod hic proponitur, diem bonorum non esse alioquin bonam diem, nisi simul mala memorentur: aut diem malorum non esse malam, si bona pariter memorentur.

Sic autem facilè persuadetur Christiano, qui nihil in bonis aut malis ducere debet, quàm quod in profectum animi vel defectum cadit; seu quod idem est, nihil bonum homini, nisi quo

212 Dominica 2. Quadragesime. De Transfiguratione Domini.

verè bonus & beatus est: nihil verè malum, nisi quod malus & miser efficitur in omnem æternitatem: Hoc est enim vnum necessarium, cui quantum profunt aut obsunt cætera, tantum verè bona vel mala sunt. *Luc. 9.* *Quid enim proficit homo, si lucretur vniuersum mundum, se autem perdat, & detrimentum sui faciat? Hæc omnia sanctis in bona, inquit Sapiens, sic & impiis & peccatoribus in mala conuertentur.* Cui conformiter Apostolus, *Omnia munda mundis; coinquinatis autem & infidelibus nihil est mundum;* quasi dicerent; In tantum qualibet bona vel mala sunt, in quantum his homo bene vel malè vtitur; In quantum bonus vel malus ex eorum usu efficitur. O si hac horâ, si hac consideratione bene vtereris, quàm tibi bona esset!

II. PUNCTVM.

SED non aliter dies in profectum tuum spiritualem aut defectum cadet, quam si in die bonorum memores mala; aut in die malorum memores bona.

Tria hic distinctè reuoluenda: Primum est, diem bonam siue bonorum dici, quando eueniunt quæ prospera dicuntur, diem autem malam aut malorum, quando quæ aduersa putantur, incidunt. Secundò tunc esse profectum spiritualem, quando animus in prosperis aut aduersis se ita continet, vt neque nimis exultet & efferatur, nec nimis se abjiciat & deprimatur; sed æquâ lance omnia perpendendo, vnum in omnibus spectet Deum. E contrà verò tunc esse defectum, quando in alterutrum horum extremorum animus rapitur. *In quantam tribulationem deueni, & in quos fluctus tristitiæ, qui iucundus eram & dilectus in potestate mea.* *1. Macch. 6.*

Tertiò denique non aliter melius animum contineri in prosperis aut aduersis, quàm recordatione contrariorum: Sic enim continetur ne se totum dedat latitiæ vel tristitiæ, quod est vnicum medium euitandi excessus, & peccati cuiuslibet in alterutro fortunæ flantis aut reslantis statu; Quod fusc & egregie sanctus Gregorius docet, in illa verba Iob, *qui fecit ventis pondus, & aquas appendit in mensura.* *Iob 28.* *1. 19. Mor.* *5. 5. & 6.*

Sicut enim propterea excedit animus gaudento vel moerendo, quia in occasione gaudiij vel moeroris totum se abiicit in il-

Los affectus inordinatos, nullamque aliam suscipit cogitationem quàm eis conformem & agnatam; sic planè si reuocetur ab illo altu & impetu, in quem se totum rapi sinit, remedium malo afferetur. Reuocatur autem per memoriam & repræsentationem bonorum in die malorum, vt è contra: sic enim animus inordinatus diuersa cogitando diuiditur, & diuisus facillimè temperatur, ad eamque moderationem redit, in qua virtus est posita. Quis enim quantumuis lætus & gaudens, si extrema vitæ recogitet, si mortem, si iudicium, non illicò lætitiæ modum ponat? quis animo mœrens & abiectus aliquam mœroris sui partem futura Beatitudinis recordatione non sentiat euanescere vel mitigari? *Memento*, inquit Idem Sapiens, *paupertatis in die abundantia, & necessitatum paupertatis in die diuitiarum.* Itane meministi? *Fili recordare quia recepisti bona in vita tua.* O tùm infausta, & infrugifera recordatio, sed modò utilis & opportuna! Ecclesi. 18.
Luc. 16.

III. PUNCTVM.

IN die igitur bona nisi memores mala, non erit dies bona: & in die mala, si memores bona, non erit dies mala; Quia videlicet non est bona nec mala dies, nisi cùm inde boni aut mali sumus, nisi cùm inde meliores aut peiores euadimus: Vix autem possumus esse meliores in die bonorum, nisi aduersa memoremus, quibus animus à nimia effusione contineatur, & in virtute subsistat: neque etiam peiores in die malorum, si bona quædam & prospera reuocentur in mentem, quibus ipsa mens sustentetur ne in extremam ruat tristitiam, & inordinatos alios motus; ac proinde sicut iam supra visum est, sic vtrumque semper est temperandum, vt nec pura prosperitas, nec mera obuersetur aduersitas.

Videte itaque, inquit Apostolus, *quomodo cautè ambuletis, non quasi insipientes sed vt sapientes, redimentes tempus, quoniam dies mali sunt, propterea nolite fieri imprudentes, sed intelligentes quæ sit voluntas Dei*; quasi dicat, in hoc apparebit Sapiens ab Insipiente, si cautè & prudenter ambulet: tunc verò cautè ambulare censebitur, si ex quotidianis euentibus proficiat, cùm alioquin dies mali sint nisi sic prosint; ac denique vt sic fructuose proficiat, attendat necesse est ad diuinam Prouidentiam & vo-

214 Dominica 2. Quādrāg. De Transfiguratione Domini.

Job 2.

luntatem, quæ sic spectari debet in aduersis & in prosperis vt aduersa omnia velimus quia sic Deus illa vult, nec vlla velimus prospera nisi quia sic ille vult. *Si bona suscepimus de manu Dei, mala quare non suscipiamus.* Sicque vicissim sentiendum & dicendum: si mala suscepimus de manu Dei, bona quare non suscipiamus? Vbi tamen aduerte, quod quanto facilius est de bonis dicere quod ea de manu Dei suscepimus, tanto difficilius est id vere sentire: Cum enim naturali affectu erga bona propendamus, vix illum affectum ita purgamus vt non magis bona diligamus, quia nobis bona sunt, quàm quia Deus illa vult. Quamobrem in id præcipuè vigilandum: *sicut Domino placuit, ita factum est. SIC VT fuerit voluntas in cælo, sic fiat.* Vide in 1. parte, diem 9. 10. 11. & 12. Ianuarij.

Job 1.

1. Macch. 3.

Si quid porro desideres amplius huic vniuersim confirmandæ Veritati, recale historiam quæ à Taulero refertur de homine mendico, cui cum Theologus quidam precaretur prosperum diem, respondit se nullam vnquam aduersam habuisse, cum à Deo cuncta se accipere semper cogitaret: qua de re fusissimum inter eos habitum est colloquium. Refert & Cornelius à lapide in caput 12. ad Romanos.

Videri etiam potest Dominica 4. post Pentecosten in 3. parte. Vbi hæc habetur Veritas:

Nisite humiles in prosperis, prospera te humiliabunt.



HAC HEBDOMADE, Quidquid in Oliuarum horto, dum capitur à Iudæis Dominus, gestum aut dictum fuit, recensetur.

FERIA SECVNDA.
DISCIPVLIS A SOMNO
EXCITATIS, APPROPINQVANTEM PASSIONIS
HORAM ET TRADITOREM
CHRISTVS DENVNTIAT.

Si dum adest occasio, Virtus abest, vix umquam, &c. 215
Ecce appropinquavit hora, & filius hominis tradetur
in manus peccatorum: surgite, eamus, ecce ap-
propinquavit qui me tradet. Matth. 26.

VERITAS PRACTICA.

Si dum adest occasio, virtus abest: vix umquam virtus
aderit.

SENSVS est, quod Vix ulla securitas virtutis umquam
exercendæ, nisi dum se offert occasio, exerceatur.

RATIO est, quia non est securitas virtutis exercendæ, nisi exer-
ceatur quando vult Deus.

Sed nisi semper exerceatur quando sese offert occasio, vix dici
poterit quod umquam exerceatur quando velit Deus.

Ergo nec est securitas virtutis umquam exercendæ, nisi dum se
offert occasio, exerceatur.

I. P V N C T V M.

DV M internos illos dolores, de quibus dictum est, patie-
batur animo Christus, Iudæi, duce Iuda proditore, para-
bant illi externos quibus eius cruciarent corpus. En
Conscripti milites; & turba ex omni hominum genere constata
iam iam in montem atque ipsum hortum ubi orabat Dominus,
ad ipsum capiendum armata venit. *Ecce, inquit Euangelista, Matth. 26,*
ecce Iudas vnus de duodecim venit, & cum eo turba multa cum gla-
diis & fustibus, missi à principibus sacerdotum, & senioribus populi.
Qui autem tradidit eum, dedit eis signum dicens, quemcumque of-
culatus fuero, ipse est, tenete eum, & ducite cautè.

Proh qualis discipulus! qualis sermocinatio! qualis exerci-
tus contra Dominum exercituum? Hos omnes Christus videbat
aduentantes, audiebat colloquentes, & sentiebat intestinis odiis
in se furentes. Quamobrem iterum adit discipulos etiam nunc
dormientes; quibus excitatis, *Ecce, inquit, appropinquavit ho-*
ra; quasi diceret, iam non est retrocedendum, iam non est locus
Luc. 4.
Ioan. 7.

216 Porta 2. infra Heb. 2. Quadrag. Ecce appropinquauit hora.

miraculis illis quibus per medios hostes & milites tutus incedebam, aut quibus ipsi ad me capiendum missi, re infecta discedebant, quia nondum venerat hora mea, sed ecce iam modò venit, modò capiendus sum, modò tradendus sum: ecce appropinquauit qui me tradet.

Aptissimus certe ad virtutem exercendam stimulus, vt cum sese offert occasio, nunquam recusetur. Tunc enim natura deprauata solet refugere vel cunctari, & conquirere rationes differendi bonum opus. Sed contrà, hoc stimulo acuat; *Aut numquam exercenda est Virtus, aut modo est exercenda.* Vix enim bona mens in id consentiet, vt numquam virtutem exerceat; vnde si persuasum id habet, aut modo, aut nunquam: certe cum gratia stimulabitur.

Ratio autem quæ id persuadet, hæc est, quod si quæ sit securitas & certitudo in hac vita, virtutis exercitæ vel exercendæ, in eo maxime est vt intelligatur ita tunc Deum velle à nobis: nam sicut quando cognoscitur eius Voluntas tunc certus quiuis esse potest quod sit tempus virtutis exercendæ; sic nisi cognoscatur eius voluntas, dubitare quiuis potest vtrum eam exercere debeat, vtrum quod agit sit vera virtus aut ficta, ex amore proprio vel aliquo humano motu aut etiam diabolico inducatur. Quantæ enim sunt huius infensissimi hostis circumuentiones? quæ certe eo peiores sunt, quo tectiores & magis occultæ; eo vero magis occultæ quo pretextum pietatis & virtutis præ se ferunt, vnde 2. Cor. 2. Apostolus, *Vt non circumueniamur à satana, non enim ignoramus cogitationes eius.*

Hinc ergo manifestè sequitur, tantam fore securitatem veræ virtutis exercitæ, quanta fuerit certitudo diuinæ voluntatis pro ea exercenda. 2. 3. c. 11. *Non enim omnis affectio*, vt ait optime Gerson, *quæ videtur bona statim est sequenda, sed neque omnis contraria affectio ad primum fugienda.* Vide integrum caput, vbi hæc inter alia Dominus à se discenda monet, *vt desiderium tuum*, inquit, *ponas totaliter secundum beneplacitum meum, & tui ipsius amator non sis, sed mea voluntatis cupidus amulator.* Quid respondes?

II. P V N C T V M.

SED nisi semper exerceatur virtus, quando sese offert occasio, vix dici poterit quod vmquam exerceatur, quando velit Deus.

Dic

Dicenim, quandònam putas, illam exercebis? cum tibi scilicet placuerit? at credisne tum ita placitum Deo? Non vereris ne quod ex electione tua est, id ex amore proprio sit, cum præcipue neglexeris quod certò sciebas ex voluntate seu Providentia Dei esse? Non vereris quod ait sanctus Bernardus, *grande malum voluntas propria, qua fit ut bona tua tibi bona non sint?* Si tibi à Superiore vel Directore res aliqua consulta esset, tu vero, illà neglectà vel posthabità, nonnihil aliud agitares ex ductu tuo, nonne tibi suspectus esset ille ductus tuus quem sic præferres Directoris iudicio? Cur porro non idem iudicas de iis virtutum actibus quos exercere te putas ex electione tua, si illos compares cum exercendis in occasione ubi se Deus manifeste indicat, & ubi à te toties quodammodo posthabetur, quoties occasione neglecta remittis exercitium in aliud tempus quod tibi videbitur opportunius?

Sed quis tum promisit gratiam? cum potius nihil in Scripturis crebrius repetatur quam si negligatur occasio & tempus, iactura fiat gratiæ quæ se se cum occasione præsentis offerebat? *Adiuuantes exhortamur*, inquit Apostolus, *ne in vacuum gratiam Dei recipiatis*, ait enim tempore accepto exaudiui te, & in die salutis adiuui te. *Ecce nunc tempus acceptabile, ecce nunc dies salutis*; Et licet alia similis posset occurrere occasio: hoc ipsum tamen quod differs & quod præsens futuro præfers ex arbitrio tuo magis quam ex nutu Dei, nonne indicat te magis velle facere voluntatem tuam quam diuinam? Quod si vetat Sapiens, *Ne dicas amico tuo, vade & reuertere, cras dabo tibi cum statim possis dare*; quanto magis id vetitum ne sic cum Deo agas? Velle ne sic tecum Deus ageret, quando in necessitate tua rogas illum ut in adiutorium tuum intendat, ut festinet, ut ne tardet? O te inconsultum! vis Deum tibi statim adesse cum illum rogas, & cum te ille rogat seu cum tibi adest, tu illum differs & repellis! *Et noluerunt attendere, & auerterunt scapulam recedentem, & aures suas aggrauauerunt, ne audirent. Verterunt ad me tergum, & non faciem, & in tempore afflictionis sua dicent, surge & libera nos.* Potestne aliquid iniquius cogitari?

III. PUNCTVM.

SI dum ergo adest virtutis occasio, virtus abest, vix umquam
 Saderit, vix umquam certo virtutem exercebis; cum in vna Dei
 voluntate sit posita certitudo, qualis quidem in hac haberi vita
 potest, neque aliud diuinæ voluntatis indicium sit clarius quàm
 dum se se offert virtutis occasio; Quidquid de futuro tibi pro-
 mittis, nimis incertum est, vt ibi figas virtutem; nam præter-
 quam quod neque diem neque gratiam tibi certo polliceri potes,
 de ipsa tua etiam voluntate si quid tibi promittis, præsumptio
 est potius & virtutis quædam simulatio quam bona voluntas; si
 enim esset bona voluntas, esset conformis diuinæ, esset efficax
 & cooperatrix gratiæ quæ se se offert, vnde illud Prophetæ:
1er. 15. *Date Domino Deo vestro gloriam, antequam contenebrescat, & an-
 tequam offendant pedes vestri ad montes caliginosos: expectabitis lu-
 cem, & ponet eam in umbram mortis, & in caliginem.* Formidanda
 sane verba.

Et certe qui modo differt in aliud tempus, æque proferet illud
 tempus in aliud atque aliud sine modo sicut iam differt; qua
 enim difficultate, si quæ talis est, modo impeditur, eadem & re-
 tardabitur semper, imò & grauiori vt supra ostensum est; aut si
 quæ alias ratio appareat virtutis exercendæ, cum non sit melior
 neque nobilior quam quæ ex diuina voluntate petitur, *Quid ad-
 huc quaritur,* inquit Apostolus? *voluntati enim eius quis resistit?*
Rom. 9. *quis nisi fatuus, arrogans, impius?* Sic itaque semper in occurſu
 virtutis: *Ecce nunc hora;* aut modo aut nunquam. Itane verò
 nunquam virtutem exerceam? ergo modo. Et iam modò vide
 quid occurrat; atque hoc ipsum propositum virtutis cuiuslibet
 sic deinceps exercendæ, firmiter statue in Domino; *Iuravi & sta-
 tui custodire iudicia iustitiæ tuæ.* *Ps. 118.* Certa est alioquin Veritas:
 Quo longius differs, difficultatem difficilior tolles.

Vide in 1. parte, FERIA 2. hebdomadæ.

PRO EADEM FERIA QVADRAGESIMALI.

Ad Euangelium, In peccato vestro moriemini.
 Ioan. 8.

Quò quis est mitior, eò est generosior.

219

VERITAS PRACTICA.

Illa mundanis præcipuè formidanda sententia: In peccato vestro moriemini.

In 4. parte, Feria 5. hebdomada decima nona, & ubicumque de Mundo, de rara pœnitentia, & de paucis saluandis.



FERIA TERTIA. SVAVITAS ET MANSVETUDO DOMINI IESV, PRODITOREM SVVM ALLOQVENTIS.

Amice, ad quid venisti? Matth. 26.

Juda, osculo filium hominis tradis! Luc. 22.

VERITAS PRACTICA.

Quò quis est mitior, eò est generosior.

*RATIO EST, Quia quò quis est magis compos & sui potens,
eò est generosior.*

Sed quò quis est mitior, est magis sui potens.

Ergo & generosior, quod tamen vix crederetur.

I. PUNCTVM.

NVMQVAM defuerunt Christo Domino Inimici, neque his vmquam defuit mala voluntas eius perdendi; sed ad hanc vsque horam nullus fuerat ausus Eum tangere quia videlicet, *nondum venerat hora eius*; At ecce modò nunc hora, ecce primus omnium Iudas simulato amici osculo non

Ioan. 7.

Ee ij

veretur eum infami ore contingere, & faciem illam tremendam Angelis attrectare scelettis suis labiis! Paucis hæc Euangelistæ, sed emphaticis Verbis. *Et qui vocabatur Iudas, unus de duodecim* Luc. 12. *antecebat eos; & confestim accedens ad Iesum, dixit, Ave Rabbi, & osculatus est eum.* Matth. 26.

Credibile est ad hos amplexus cohorruiſſe ſacrum Chriſti Domini corpus; & ad hanc primam plagam, ſanctiſſimum eius vultum ſic erubuiſſe vt licet non fuerit admodum violenta plaga, fuerit tamen valde ſenſibilis Illi qui pectus amarulentum oſculantis cernebat, & in medio pectore Satanam inhabitantem, atque in ſe per diſcipulum ſuum irruentem. Sic enim dictum eſt, *quod introiuit in eum Satanas*. Mirum quin terra dehiſcens abſorbuerit hominem, aut cœlum fulgurans non conſumpſerit! ſed erat nobis edendum ſuauitatis & generoſitatis exemplum! Admirare, Audi, Vide quâ gratiâ, qua benignitate, quibus verbis iniuriam Chriſtus vlcificitur; *Amice*, inquit, *ad quid veniſti?* Hoc erat verbum omni telo acutius, *hic ſermo penetrabilior omni gladio ancipiti*, ad proditoris pectus confodiendum & conſcientiam ſcleris excitandam, niſi contra obduruiſſet.

Vide enim & expende vt proponit illi quæſtionem, *Ad quid veniſti*, cui erubeſcat reſpondere, & pudore conſuſus redeat in animum & reſipiſcat; ſic enim reſpondere debuiffet, *Venio te traditurus*, quod certe ſi cogitaſſet & attendiſſet, tum forte ſalubrius eum poenituiffet quàm poſtea. Tum verò compellans Chriſtus Traditorem proprio nomine, addit; *Iuda, oſculo filium hominis tradis!* Quasi ipſe Dominus reſponderet ſuæ quæſtioni, quaſi diceret quod ille miſer non audebat; Ad hoc ſcilicet tu veniſti vt me tradas! Sed attende quid facias! Nonne vel hoc infame Traditoris nomen te commouet? Tu Iuda traditor! tu ex Diſcipulo meo, ſatelles Satanæ! ex Apoſtolo Apoſtata, ex primis omnium nimis honorandis amicis, execrabilis omnium qui extiterint hominum! Hoc expende Iuda, redi in te ipſum, ad quid veniſti! ſi data eſt & accepta pecunia vt me venderes, en me tuum; habes quem quæris; ſed cum ego te, iam cariore pretio velim redimere, ne teipſum perdas; Redi ad me redimendus, ſicut ego me ipſum tibi ſino vendendum. De me nihil queror, nihil ſatago; moriendum mihi, ſed cum tibi mea morte vitam & ſalutem reſtituam, vide ne te perdas hoc ipſo tempore quo te

atque omnes homines saluos volo.

Hæc & alia recogitans, vide nùm sic aliquando tecũ suauiter & fortiter ad resipiscendum Christus egerit? Vide quæ tuæ fuerint simulatæ Confessiones, quæ ficta oscula in Communionibus; quanta Christi benignitas, qualis tua in aduersarios, & in aduersis; quanta vis & fortitudo mansuetudinis; quantũ addat ad generositatem, si modo ex virtute non ex naturali quadam indole proficiscatur; quàm illud denique verum sit, *Quò quis est mitior, eo est generosior*, seu fortior & constantior in aduersis vel sustinendis vel aggrediendis. Nam id constat apud omnes, vnumquemque eò esse generosiores quò est magis sui compos & potens animi. Nemo enim læditur nisi à seipso: neque aliter seipsum quis lædit, vt suprà visum est, nisi quia se animo turbat. In 1. parte, Domin. 4. post Epiph.
finit, & tũ velut amisso rationis clauo, quacumque eum ferunt & voluũt aduersi turbines, misere rapitur: animus vero sibi præsens & sui potens aduersa quodammodo cicurat, & iis ad nutum vititur velut cicuris animantibus. Sic de suo Sapiente Seneca, Ep. 86:

Certi sunt Romitores ferarum qui sanissima animalia cogant pati sub iugum, nec asperitatem excussisse contenti, usque in contubernium mitigant. Leonibus magister manum insertat; osculatur tygrum suus custos. Elephantem æthiops iubet subsidere in genua. Sic sapiens est artifex domandi mala, dolor, egestas, ignominia, carcer, exilium, ubique horrenda, cùm ad hunc peruenere, mansueta sunt.

At quantò magis hæc vera sunt de vero Sapiente, qualis esse debet omnis Christianus, & qualem instruit Christus Dominus Luc. 12;
in cuius paucis verbis ad amicos suos plus est ne terreantur, quam in cunctis inimicis ne ipsos terreant: *Dico vobis amicis meis, ne terreamini ab his qui occidunt corpus: & post hæc non habent amplius quid faciant*, Vide in 3. parte, FERIA 6. hebdomadæ 10.

II. PUNCTVM.

SED quò quis est mitior, eò magis est sui potens.

Sic enim Sancti omnes Patres Mansuetudinem definiunt quæ perturbationes animi sedet, & animum sibi conseruet, hæc est patientia in qua anima possidetur, hæc est terra quã possident Luc. 21.
mites, animum scilicet & corpus quod nunc est terra mortuo- Matt. 5.

rum, ut ait sanctus Chrysostomus, tunc autem terra viuorum.
 4. Strom. Mansueti vel mites sunt, inquit Clemens Alexandrinus, qui insi-
 dam quæ est in anima pugnam sedauerunt ira, & cupiditatis, & eo-
 1a Pf. 33. rum quæ sub eas cadunt. Sic verò sanctus Basilius; qui sedatis sunt
 & compositis moribus, nempe ab omni affectu vitioso liberi, adeo ut
 nullum in animabus suis perturbationi reliquerint locum, hi demum
 mansueti appellantur. Sanctus denique Ambrosius, Qui sunt man-
 sueti nisi quos nullus stimulus dissensionis exagitat, non ira pertur-
 bat, non sauitia exasperat, non rabies crudelitatis inflamat? hoc
 videlicet est quod Christus Dominus vult à se disci cum dixit,
 Math. 11. discite à me quia mitis sum & humilis corde; id est, sedationem ani-
 mi, & eo maxime tempore exercendam & demonstrandam quo
 periculum est præsentius iræ & perturbationis. Qualis tùm ani-
 mus tuus? non enim ex sensu quem modò habes, sic de mansue-
 tudine tua iudicare debes, sed ex statu & compositione animi
 quam sentis in aduersis prout ei consentis vel resistis. Hinc
 Eccl. 10. 28. aptè Sapiens: secundum ligna syluæ sic ignis exardescit, & secundum
 virtutem hominis, sic iracundia illius erit, & secundum substantiam
 suam exaltabit iram suam. Id est, quantum vniuscuiusque interest
 in re aliqua, tantùm propterea commouetur; aut certe tùm indi-
 cat se tranquillum esse & sedatum, quando non commouetur,
 cum sua multùm interesse videt.

III. P V N C T V M.

QVO quis ergo est mitior, eò & generosior, cum sit magis sui
 potens & præsens, in qua animi præsentia & potentia
 tota vis generositatis est sita. Locum tuum ne dimiseris, inquit
 Eccl. 10. Sapiens: Locus tuus est Ratio, inquit sanctus Ambrosius. Atque
 hic vide quam longe fallantur ij qui sibi nomen fortitudinis ar-
 rogant, cum iræ & vindictæ cedunt; nihil illis est imbecillius; si-
 cut ebrium, dormientem, aut impotem rationis vel leuissimo
 dejicias ictu; sic illos perturbatos, casus vel leuissimus aduersitatis
 abjiciat. Stat vero contra grauissimos quosq; turbines, immobi-
 lis & imperturbatus Mitis, quia nihil est mali in aduersis nisi
 perturbatio qua inde animus agitur, & qua mitis se liberat
 dum se tam mitem præstat in occurso aduersitatum, quam se
 præstandum nouit in meditatione vel lectione, dum se ad illas

comparat. *Paratus sum & non sum turbatus. QVASI* leo confidens absque terrore erit. Quid Moysè mitius, de quo Scriptura refert quod erat *Moyse vir mitissimus super omnes homines qui morabantur in terra?* Et quis eo generosior, qui annos quadraginta totos, duxit exercitum plusquam sexcentorum millium, per maria, per deserta, per inuia, per quidquid horrorem potest incutere, & cum etiam *centum & viginti annorum esset, quando mortuus est: non caligauit oculus eius, nec dentes illius moti sunt,* Quæ Scripturæ Verba non tantum referas ad firmam corporis eius valetudinem, sed ad constantem eius animi moderationem & æquitatem, quam nulla vnquam iræ caligo infuscauit, nec acerbior inflexit oratio.

Sic de Dauide qui suam satis apertam facit mansuetudinem cùm ait Domino: *Memento Domine Dauid, & omnis mansuetudinis eius.* At fuitne quisquam cum illo comparandus in animi fortitudine, generosoque pectore? Sic præclare sanctus Augustinus in eius persona Christum & cunctos Christianos demonstrat mansuetudine suos omnes aduersarios debellare, & vincere: *Dauid, inquit, interpretatur manu fortis, Erat enim magnus belligerator, præsumens quidem de Domino Deo suo. Confecit bella omnia, prostravit omnes inimicos suos, Deo se adiuvante, quemadmodum se habebat illius imperij dispensatio, præfigurans tamen fortem manu quendam ad debellandum inimicos, diabolum & angelos eius. Hos autem inimicos Ecclesia debellat. Et quomodo debellat? Mansuetudine. Mansuetudine enim ipse Rex noster vicit diabolum. Sauebat ille, iste sufferebat. Victus est qui sauebat, vicit qui sufferebat. In ista mansuetudine Corpus Christi quod est Ecclesia vincit inimicos.*

Hoc est igitur omni modo enitendum; *Omnes ostendentes mansuetudinem ad omnes homines,* inquit Apostolus. Et acutè Sapiens, *Verbum dulce multiplicat amicos & mitigat inimicos; & lingua Eucharis in bono homine abundat.* Ex interno quidem animi statu lingua seu verba componuntur, sed quando vel commotus esset animus, si dulce possit proferri verbum, quod certe potest cum gratia, valet vel plurimum ad ipsum animi statum tranquillandum. Magis autem in nostra potestate est linguæ vsus quàm primus animi motus; vnde qui linguæ temperandæ inuigilat, sibi toti seruit; *Qui custodit os suum & linguam suam,* inquit Sapiens, *custodit ab angustiis animam suam,* Sanctus item Iacobus

Ps. 118.
Prov. 28.

Num. 12.

Deut. 34.

In Ps. 137.

Tit. 3.
Ecclesi. 6.

Prov. 21.

224 FERIA 3, infra Hebd. 2. Quadrag. Amice ad quid venisti?

1ac. 3.

aptissime, si quis in verbo non offendit perfectus est vir, potest etiam frano circumducere totum corpus; si autem equis frana in ora mittimus ad consentiendum nobis, & omne corpus illorum circumferimus. Ecce & naues cum magna sint, & à ventis validis minentur, circumferuntur à modico gubernaculo, ubi impetus dirigentis voluerit; ita & lingua modicum quidem membrum est, & magna exaltat: id est,

1. Theff. 4. magnas excitat turbas. Operam detis, ut quieti sitis.

PRO EADEM FERIA QVADRAGESIMALI.

Ad Euangelium: *Super Cathedram Moysi sederunt Scribae & Pharizai: omnia ergo quacumque dixerint vobis servate & facite.* Matth. 23.

VERITATES PRACTICÆ.

Aut nulla, aut tota est Charitas in agendis, sicut Fides in credendis.

In 2. parte, FERIA 4. hebdomada 4. post Pascha.

Qui rationes inquirat Obedientiæ, rationem quærat suæ inobedienciæ.

In 2. parte, FERIA 4. hebdomada infra octauam Ascensionis.

Quasi peccatum ariolandi est, repugnare: & quasi scelus idololatriæ, nolle acquiescere.

In hac 2. parte, Sabbato hebdomada 4. post Pascha.

SECUNDVM opera vero eorum, nolite facere: Dicunt enim & non faciunt. Alligant enim onera graui, &c.

Si non facis quod doceris, quia qui hoc docent non faciunt; tam falsò te excusas, quàm vere illi à Domino accusantur.

Quò quis est mitior, eo est generosior.

225

In 4. parte, Feria 5. hebdomada 27. ubi de his expresse verbis Domini.

OMNIA vero opera sua faciunt ut videantur ab hominibus.

Gloriam Christi vertimus in ignominiam, si aliam à Christo quærimus gloriam.

In 3. parte, Feria 6. hebdomada 2. Vide & qua iam suprà relata est, de iustitia coram hominibus facta. In eadem 3. parte, Sabbato hebdomada 5.

AMANT primos recubitus in cænis, &c. Qui major est vestrum, erit vester minister.

Quò quis superior est in ordine hominum, eò inferior est in Christi ordine.

Aut è contra.

Quò quis inferior est in ordine hominum, eò superior est in Christi ordine.

In hac 2. parte, Feria 4. hebdomada 4. Quadragesima.

QUI autem se exaltauerit humiliabitur, &c.

Qui se Christi exemplo non humiliat, exemplo damonis humiliabitur.

In hac 2. parte, Feria 4. Septuagesima. Vide autem in 4. parte, Dominica 16. congestas simul de hac materia Veritates.



FERIA QVARTA.

PROCEDIT IESVS OBVIAM

SVIS INIMICIS, EOSQUE PROSTERNIT.

2. Pars.

EE

226 FERIA 4. infra Hebdomadam 2. Quadragesimae. Ut dixit eis, &c.

Ut dixit eis, ego sum, abierunt retrorsum, & ceciderunt in terram. Ioan. 18.

VERITAS PRACTICA.

Qui supra mortem est, infra se videt omnia.

Id est.

QUIS QVIS paratus est mori, & pati, sic sibi mortem, & aduersa quaeque substernit, ut Christus Dominus.

RATIO est, quia tunc dicuntur aduersa substerni vel subiici, quando illis superior animus minime frangitur aut leditur.

Sed quisquis est ad illa paratus, hunc animum superiorem, infra etiam & illasum habet.

Ergo & illa sibi substernit, ac proinde expedit maximopere unumquemque sic esse paratum.

I. PUNCTVM.

SIC sanctus Ioannes inter alios Euangelistas, rei gestae ferriem subiicit: *Iudas ergo cum accepisset cohortem, & à pontificibus & pharisaeis ministros, venit illuc cum lateris, & facibus & armis. Iesus itaque sciens omnia quae ventura erant super se, processit, & dixit eis, Quem queritis? Responderunt ei: Iesum Nazarenum. Dixit eis; Ego sum, Stabat autem & Iudas qui tradebat eum cum ipsis. Ut ergo dixit eis, Ego sum, abierunt retrorsum & ceciderunt in terram. Iterum ergo interrogauit eos, Quem queritis? Illi autem dixerunt: Iesum Nazarenum. Respondit Iesus; Dixi vobis quia ego sum; si ergo me queritis, finite hos abire; ut impleretur sermo quem dixit, quia quos dedisti mihi non perdidisti ex eis quemquam.*

Multa hic pie & fructuose expendi possent. Primò, quod illos interroget quorsum venerint? aut quem quærant? ut cum responderiat se querere Iesum, tum Iesus se potius sinat & permittat capi quàm se capiendum obiciat; Si enim peccarunt in

eo capiendo & male tractando, non inde est quod Christus se dederit eis, sed quod ipsi ante vt fatentur, eum perdendum quaesierint: sic optimè sanctus Leo, *Admisi in se impias manus furentium, quæ dum proprio incumbunt sceleri, famulata sunt Redemptori.* Deinde vt cum etiam sacrum nomen Iesu pronuntia-
rent, aut illum loquentem audirent, à meditato facinore de-
terrerentur, sicut olim ministri à Iudæis missi ad eum capien-
dum, redierunt re infecta, dicentes: *Nunquam locutus est homo si-*
cut hic homo. Quapropter statim atque audiuerunt eum loquen-
tem, abierunt retrorsum proiecti in terram, vt hoc miraculo
territi, & operante intus gratia, erigerentur ad agnitionem sce-
leris & ad spem veniæ. Hic verò rursus aptissimè sanctus Leo;
Quid iam poterit maiestas eius iudicatura, cuius hoc potuit humili-
tas indicanda? Voluit etiam Christus Dominus ex eorum elicere
ore hanc confessionem quod quaerent Iesum, id est Saluato-
rem, quo nomine requisitus diceret *Ego sum*, ego ille sum Salua-
tor quem quaeritis, & qui propterea me vobis trado.

Denique sic generose processit illis obuiam, sicque eos po-
tenter prostrauit vt nos doceret hanc illustrem Veritatem, *Quod*
quisquis supra mortem est, infra se videt omnia. Quisquis paratus
est mori & pati sicut Christus, sic mortem & aduersa quæque si-
cut ille sibi substernet & subjiciet. Quid enim est aliud inter ad-
uersa quæuis infracto & illæso esse animo, nisi ipsa prosternere
& nobis subjicere ne illis subjiciamur? Nam vt optime notat
sanctus Bernardus sic dicitur mors deuicta à Christo, *non qui-*
dem vt cogatur non adesse, sed non obesse. Sicque Deus promittit Is. 43.
suis, vt cum per ignes & alia pericula pertransibunt, se ita affu-
turum vt non lædantur; tametsi enim comburantur, tametsi do-
leant corpore, & moriantur, tamen quia eorum fides & animus
minime læditur, sic dicuntur superiores & victores: sicque om-
nes habent in cælo palmas, quod victi corpore vicerint animo,
& *torti torquentibus fuerint fortiores*, vt ait sanctus Cyprianus. L. 2. Ep. 66.
Videndum enim est quæ dere agatur, vt iudicetur de victoria; non
hic autem agitur de robore corporis aut de bonorum conser-
uatione, sed de constantia & fidelitate conseruanda, quæ si in ad-
uersis retinetur, profecto aduersa, Deo bene iuuante, subjiciuntur.

O admirandam Christi potentiam, qui non tantum in se sed
in suis, aduersantia quæque prosteruat! Illa illa potentia Christi.

ibid.

nostra est, si sicut ille, parati simus mori & pati. Ille qui pro nobis mortem semel vicit, semper vincit in nobis.

II. PUNCTVM.

SED quisquis paratus est mori vel pati, hunc animum habet superiorem, infractum, & illaesus ab omni casu.

*L. de Conc.
Virg. c. 4.*

*L. 1. de
Prom.*

Luc. 12.

Quia videlicet nihil quidquam animū nostrum lædit nisi quod animo repugnanti aduersatur, licet enim sit ex se aduersum & repugnās naturæ, si tamen animus hanc aduersitatem & repugnantiam libens volensq; suscipiat, non inde lædetur: sicut in voluntariis poenitentiis & mortificationibus quotidie accidit. Nihil est alicui pœna, inquit sanctus Anselmus, nisi quod est contra voluntatem. Vnde eleganter Saluianus, Nulli ut opinor beatiore sunt, quam qui ex scientia sua atque ex voto agunt: humiles sunt religiosi, hoc volunt; pauperes sunt, pauperie delectantur: sine ambitu sunt, ambitionem & honorem respuunt: lugent, lugere gestiunt: infirmi sunt, infirmitate latantur. Atqui paratus ad mortem animus & ad alia quæuis sufferenda, sic ea volens lubensque suscipit quando eueniunt, perinde ac si eligeret aut accerferet; In eo enim est animi præparatio, ut quidquid euenire potest expectet, sicut seruus absentem expectat Dominum, dicente ipso Domino; *sint lumbi vestri præcincti & lucerna ardentes in manibus vestris, & vos similes hominibus expectantibus Dominum suum, ut cum venerit & pulsauerit confestim aperiant ei.*

Venit enim, ut ait sanctus Gregorius, per agnitudoinis molestias & alia concomitantia incommoda quæ paratus animus tam lubens suscipit, quàm vere ad illa est paratus.

Ignis, crux, bestia, & tota tormenta diaboli in me veniant, tantum Christo fruar; aiebat sanctus Ignatius Martyr. Hoc est esse paratum: & hoc est esse illaesus & infractum. Itane tu? Quid te terret? Quid te retardat?

III. PUNCTVM.

SIC ergo qui supra mortem est, infra se videt omnia, Et qui paratus est mori & moriendo seu viuendo quælibet pati, tam verè dici potest substrata sibi habere, & subiecta quacumque

alios non ita paratos dejiciunt, quàm verè ab illis non frangeretur nec læderetur; Hoc expectabam inquiet; *Et Deus in medio eius non* Ps. 45. *commovebitur.* Egregia est huius parati & illæsi animi sub simbolo equi apud Iobum descriptio, & apud sanctum Gregorium interpretatio; *Exultat audacter, in occursum pergit armatis, con-* Iob. 39. *temnit pauorem, nec cedit gladio: ubi audierit buccinam dicit Vah: procul odoratur bellum, exhortationem ducum & ululatum exercitus.*

Ex multis autem quæ sanctus habet Gregorius & quæ iam supra retulimus, hæc alia rursus aptissima; *præliator Dei cum vim temptationis incumbere conspicit, utilitatem superna dispersationis considerans, ex ipsa validius aduersitate confidit: cuius aduersitatis certamina idcirco illum non superant, quia numquam improuisa tentant. Procul odoratur bellum, id est, sicut flatu navium sic prouisione cogitationum nequitias latentes indagare. De quo odoratu* Cant. 7. *Dominus recte in ecclesia suæ laudibus dicit: nasus tuus sicut turris quæ est in libano. Quid per nasum nisi sanctorum prouida discretio designatur? turris vero speculationis in altum ponitur ut hostis veniens longe videatur. Hinc Abacuc, super custodiam meam stabo.*

Atque hinc vide quantum ista valeat animi præparatio quam tanta utilitas sequitur qualis est illa constantia & infractum robur. Quid utilius quam nihil perdere ubi omnes pereunt, imo & lucrari eò abundantius, quo detrimenta videntur grauiora; cum enim superantur aduersa, non modo iactura cauetur & perditio, sed lucrum & emolumentum tale comparatur, ut inde merita nobiliora confurgant. *Vincenti dabo manna absconditum* Apoc. 2. *& dabo illi calculum candidum, & in calculo nomen nouum scriptum quod nemo scit nisi qui accipit.*

Et vero ad hanc præparationem duo imprimis iuuant. Alterum, confidentia in Deo, à quo emanat illa fortitudo. *Ego ante* Is. 45. *te ibo, inquit, & gloriosos terræ humiliabo. Tu vero illi: susceptor* Ps. 58. *meus es tu, & refugium meum, Deus meus sperabo in eum.*

Alterum, discussio quædam difficultatum, & earum præcipue quæ solent magis terrere, nam mera phantasmata sunt & timores nocturni. Timemus sæpe humiliari ubi maior est exaltatio; aut licet humiliatio accideret, timeretur longe grauius malum quam reuera sit, non tantum coram Deo, sed & coram hominibus. *Dominum non inuocauerunt, illic trepidauerunt timore ubi non* Ps. 13. *erat timor. Contrà vero imperterritus animus: Dominus Deus* Is. 50.

230 FERIA 4. infra Hebd. 2. Quadrage. *Ve dixit eis, &c.*

auxiliator meus, ideo non sum confusus, ideo posui faciem meam ut petram durissimam, & scio quoniam non confundar. Iuxta est qui iustificat me, quis contradicet mihi? stemus simul, quis est aduersarius meus? accedat ad me. Ecce Dominus Deus auxiliator meus, quis est qui condemnet me? ecce omnes quasi vestimentum conterentur, tinea comedet eos? Et tu hos timeres? tu hos ignauus fugeres quos tibi sicut tibi Christus subiecit, si cum illo velis quod cum ipso potes!

Ps. 17.

In Deo meo transgrediar murum. NON in me sed in Deo meo transgrediar murum quem inter homines & cœlestem Ierusalem peccata erexerunt, ait S. Augustinus.

Vide supra in hac parte, FERIA 3. hebdomadæ Sexagesimæ: & FERIA 6. eiusdem, cuius est hæc Veritas:

Quantum obest aduersitas improuisa, tantum præuisa prodest.

PRO EADEM FERIA QUADRAGESIMALI.

*Ad Euangelium, de Matre filiorum Zebedæi.
Matth. 20.*

Dic ut sedeant hi duo filij mei, vnus ad dexteram tuam, & vnus ad sinistram, in regno tuo.

Sic petendus à Deo status, ut non quem quisque velit Deus donet; sed quem Deus donet, quisque velit.

In 4. parte, FERIA 6. hebdomadæ 25. ubi expresse de hac materia.

Sicut à Domino quærendum est officium, ita in officio quærendus est Dominus.

In hac 2. parte, ubi de statibus in fine, 3. Consideratione. Vide etiam in Festo S. Matthiæ 24. Februarij.

Nescitis quid petatis.

Qui eminentior est in illa, quæ dicitur eminens scientia, minus inter homines eminere cupit.

Qui supra mortem est, infra se videt omnia.

231

In hac 2. parte, Feria 3. hebdomadae Pentecostes.

POTESTIS *bibere Calicem quem ego bibiturus sum? Dicunt ei possumus.*

Sicut possumus, sic debemus.

Id est.

Quâ ratione tenemus nos posse bibere Calicem Domini, eâdem tenemur bibere.

In 3. parte, in festo S. Iacobi, 25. Iulij.

Hic etiam apta est qua occurrit in proximè sequenti Feria. Vide & Dominicam 4. & consequentem hebdomadam.

NON *sic inter vos, &c. Sicut filius hominis non venit ministrari, sed ministrare.*

Quò quis est major, eò est humilior.

Se anteponit Christo qui se omnibus non postponit.

Quàm benè de Christo humilis, tam malè meretur arrogans.

In 1. parte, Feria 6. Sabbato secunda hebdomadae Adventus, & Dominica 3. sequenti.

Exemplo suo Christus D. nos magis vrget quàm Imperio.

In 1. parte, die 13. Iannarij. Quò & alia passim de Humilitate referri possunt.



FERIA QUINTA.

GLADIO SE DEFENDI VETAT

CHRISTVS, CVM SIT PARATVS BIBERE

CALICEM SIBI A PATRE DATVM.

232 FERIA 4. infra Hebd. 2. Quadrag. Calicem quem, &c.

DIXIT IESVS PETRO: mitte gladium tuum in vaginam; Calicem quem dedit mihi Pater, non bibam illum? Ioan. 18.

VERITAS PRACTICA.


Quo in cœlis Corona Gloriæ sumetur vultu, hoc in terra Calix sumendus est.

RATIO EST, Quia medium ex diuina ordinatione constitutum ad aliquem finem, tali vultu, seu tam libenter accipiendum est, quàm ipse finis.

Sed Calix iste nobis datus, tale medium est ad illam cœlestem coronam.

Ergo tali vultu tamque libenter accipiendus est, quàm ipse locus in cœlo destinatus, & Corona capiti nostro imponenda. Quod certe est rarum & plurima dignum consideratione.

I. PUNCTVM.

 VOS alij Euangelistæ non designant, Sanctus Ioannes aperte nominat, & eum qui percussit, & qui percussus est; sicut enim ait; Simon ergo Petrus habens gladium, eduxit eum, & percussit Pontificis seruum, & abscidit auriculam eius dexteram. Erat autem nomen seruo, Malchus. Dixit ergo Iesus Petro; Mitte gladium tuum in vaginam, CALICEM QVEM DEDIT MIHI PATER NON BIBAM ILLVM?

Gal. 6. Est quidem Christi honor, si eum lædi vides, exemplo Petri defendendus, sed ordinate, religiose, non in contentione & emulatione. Huiusmodi instruite in spiritu lenitatis, ait Apostolus, Non dum autem erat perfectus Petrus, inquit S. Ioannes Chrysostomus, postea vero, verberatus humiliter feret.

Maldona-
vis. Et verò attentius considera cur Christus Dominus Passionem, & mortem suam vocat Calicem sibi à Patre datum, & quem propterea libentissime bibat; Hoc erat scilicet in more positum, apud

apud Iudæos vt in suis conuiuiis, qui esset inter omnes conui-
uantes honoratior, partem cæteris & mensuram potionis fumen-
dæ præscriberet & porrigeret; vnde in prouerbium abiit, vt
quacumque fors siue casus adueniens, diceretur Calix, quasi
pars constituta & præscripta; *Dominus pars hereditatis mea* & ca- ps. 15.
licis mei, ait Psalter. Quod frequentius vsurpant scripturæ in de- Ier. 25.
signandis aduersis quæ à Deo unicuique eueniunt; Sic Propheta
Ieremias, *Accepi calicem de manu Domini*. Idemque paulo post: Ibid. 49.
Ecce quibus non erat iudicium vt biberent calicem, bibentes bibent.
Sic ergo Christus Dominus more vulgari loquens, vocat calicem
sibi à Patre datum quidquid passurus est sicut & suis iam ante
dixerat: *Potestis bibere calicem quem ego bibiturus sum*. Quia sic re- Matth. 20.
uera illud omne quod erat passurus ita definitum & ordinatum
erat à Patre, atque adeo ab ipsomet Christo, cuius erat vna ea-
demque cum Patre voluntas.

Atque illud est quod spectabat maxime in toto vitæ ac passio-
nis decursu, quodque à nobis vel præcipue intelligi volebat, vt
scilicet id omne quod figuratum aut quoquo modo de se ordi-
natum esset, quàm perfecte adimpleret; ideoq; adimpleret quia
sic esset ordinatum. Hic erat eius cibus, hoc scilicet alimento
nutriebatur; *Vt faciam*, inquit, *voluntatem eius qui misit me, vt per-* Ioan. 4.
ficiam opus eius. Quod illustrissimum perfectionis exemplum quo-
ties sese dabit occasio, singulari semper est obseruatione reco-
lendum. Quam in rem plurimum facit Veritas hic proposita si
bene expendatur, sicut enim euidenter constat quanta iucundi-
tate Locus ille beatitudinis à Deo nobis constitutus sit aliquando
suscipiendus, si semel persuaderi possis tanta Calicem Domini,
siue quemlibet Casum esse accipiendum, profecto erit quo ani-
mus erigatur in aduersis.

Sic autem facile demonstratur; Nam medium ad finem ali- L. 2. q. 8.
quem à Deo prædestinatum sic suscipiendum est, sicut ipse finis: 4. 2.
Cum enim aliter nolit Deus illum finem nisi per tale medium,
certe non potest desiderari finis nisi simul acceptetur medium.
Quod cum communè sit de quolibet fine qui non aliter verè de-
sideratur quam per sua certa media; quanto id magis verum de
æterna beatitudine diuinoque cultu, vbi rerum summa vertitur
in vna Dei voluntate adimplenda, id est in mediis, ab ipso ordi-
natis? Quis nisi stultus salutem sibi polliceretur sine Fide, sine

Charitate, sine Baptismo, & aliis constitutis mediis, sine quibus
In Matth. nulla est salus? Nam ut ait sanctus Hilarius, *de nostro est beata*
c. 7. *aternitas promerenda, præstandumque est aliquid de proprio.* Quid
 potest autem esse aptius quàm quod ipse Deus ordinarit? sic
 enim ratum fixumque est, *Non omnis qui dicit mihi Domine, Do-*
mine, intrabit in regnum cælorum sed qui facit voluntatem patris
mei qui in cælis est, ipse intrabit in regnum cælorum. An tu contra
 posses, vel auderes?

II. PUNCTVM.

SED calix iste seu quilibet casus aduersus, tale medium est à Di-
 uina ordinatione præscriptum ad illam coronam seu ad illum lo-
 cum beatitudinis obtinendum, & sic à Deo volitum sicut ipse locus
 beatus.

Sic enim particulatim intelligendum est quod vniuersim af-
Hebr. 10. firmat Apostolus: *patientia vobis necessaria est, ut voluntatem Dei*
facientes, reportetis promissionem. Quo quidem nomine Volunta-
 tis diuinæ tam necessario intelligendus est Calix seu aduersus
 casus, quàm necessaria dicitur esse patientia, quæ non est necessa-
 ria nisi ad ferendos casus aduersos.

Et certe cum dictum fuerit aduersitatem idcirco dici Cali-
 cem quasi mensuram, quia scilicet vnicuique commensuratur
 & proportionatur: quælo te, à quo potest legitime commensu-
 rari & proportionari nisi ab eo qui suum vnicuique gradum glo-
 riæ, & beatitudinis ordinauit? Nonne certo & determinato gra-
 du gloria, certa sunt determinata media? At vero cuius est, hæc
 determinare media nisi illius qui certos determinauit gloria gra-
Rom. 11. dus? *Quis nouit sensum Domini, aut quis consiliarius eius? QVO-*
NIAM ex ipso, per ipsum, & in ipso sunt omnia; Id est, sicut ab
 ipso pendet danda corona gloria, ita omnino dandus calix, ad
 illam gloriam promerendam; Ac proinde non est conqueren-
 dum & reluctandum in istis aduersis casibus, quasi sint grauiore,
 & molestiores: nam ab illo sunt qui coronam prædestinando,
 prædestinauit & aduersitates quibus corona fabricaretur; vnde
2. Tim. 2. qui certamen detrectat, detrectat & coronā; *Non enim coronabitur*
nisi qui legitime certauerit, hoc est quantum necesse est ad victo-
Apo. 2. riam referendam. *Ecce venio, ait, tene quod habes, ut nemo accipiat*

Quo in cœlis corona gloria sumetur vultu, hoc in, &c. 235
coronam tuam. Tremenda sane verba.

III. PUNCTVM.

QVO igitur in cœlis corona vultu, hoc in terris Calix sumentus est, & tam libenter accipiendus ille casus aduersus, quàm ille locus beatus; Nam idem ab eodem Deo est ordinatus: & cum in loco beato non tam locus quam ordinatio diuina sit amanda, cumque hæc ordinatio æque reperiatur in calice quàm in ipsa beatitudine, profecto sequitur æque amandam esse, aut non amari talem beatitudinis locum & gradum propter Deum sic ordinantem, sed propter seipsum; quod est nefas cogitare de beatis & ad beatitudinem aspirantibus.

Beatus vir, inquit sanctus Iacobus, qui suffert tentationem, quoniam cum probatus fuerit, accipiet coronam vitæ quam repromisit Deus diligentibus se. Iac. 1. Videsne probationem quæ in sumendo libenter calice exhibetur, medium quoddam assignari ad coronam, & iam dici beatum qui suffert, quod ex illa sufferentiâ sit beandus seu beatificandus? Sic pluribus confirmari posset ex his quæ habentur alibi de quadratis hic lapidibus ad supernam illam Ierusalem construendam. Sed sufficiat reuoluere, quod pie simul & fuisse Kampensis, Beatos omnes suo gloriæ gradu siue superiori, siue infimo sic esse contentos, vt vna Dei voluntate maxime sint contenti & beati, adeo vt si ordinem Deus vellet inuertere, vt infimi essent superiores, & superiores infimi, æque illi descenderent, atque isti ascenderent, quia æqua est omnium voluntas diuinæ voluntati plane conformis. Vnde cum duo Angeli nescientes voluntatem Dei de mansionem aut reditu Iudæorum Babylone degentium, simul concertarent pro populo suo, postea vero cum illis est manifestata Dei voluntas, tam vnanimiter acquieuerunt, vt vterque habuerit quod optabat, *quorum omnium una victoria est, sui super se opificis voluntas summa, quam dum semper aspiciunt, quod obtinere non valent nunquam volunt. Dan. 10. 17. Mer. 2.*

Quid quod aiunt multi Sancti si optionem haberent beatitudinis possidendæ aut Calicis accipiendi, se prælecturos Calicem, siue ob plura patienda propter Deum, siue ob maiorem & diuturniorem conformitatem cum Christo; siue vt ipse aiebat,

236 FERIA 5. infra Hebd. 2. Quadrag. Calicem quem, &c.

Mat. 20.

quia beatius est magis dare quam accipere; Nec aliud Deo gratius dare possumus quam animum Christo patienti conformem. Sæpe longa est æternitas beatitudini possidendæ; at breuior est vita sumendo Calici, & tolerandæ Crucis. Quò refertur tota hebdomada Passionis. Vide & in festis de Inuentione & Exaltatione Crucis.

PRO EADEM FERIA QVADRAGESIMALI.

*Ad Euangelium, de diuite Epulone, & de mendico
Lazaro. Luc. 16.*

VERITAS PRACTICA.

Inter multas quæ ex singulis historiæ partibus possent erui, videretur hæc ad populum præcipuè perurgenda, quæ quisque serio, dum se in proposito videbit Exemplari, sibi prospiciat.

Quam detestantur omnes fortem Diuitis Epulonis, eam pene omnes confectantur.

Ratio fundatur in his ad Diuitem datis verbis, *Recordare quia recepisti bona in vita tua.* Hæc est eius fors, & hanc pene omnes confectantur.

In 4. parte, FERIA 6. hebdomada 24. ubi declaranda historia locus.



FERIA SEXTA.

SCRIPTURAS ADIMPLENDAS,

VERBO ET EXEMPLO DOCET CHRISTVS.

Quomodo ergo implebuntur scriptura, quia sic oportet fieri? Matth. 26.

VERITAS PRACTICA.

Si propter Scripturas sunt aduersa toleranda, sunt libenter toleranda.

RATIO EST, Quia idcirco propter scripturas dicuntur aduersa toleranda, quod à scripturis commendentur, tanquam necessaria ad salutem, & quod oporteat scripturas adimplere. Sed non aliter scripturæ commendant aduersa toleranda, nec aliter adimplentur, quam si libenter aut patienter tolerantur. Ergo si propter scripturas sunt aduersa toleranda, sunt libenter toleranda.

I. PUNCTVM.

DVM pergit Christus Dominus cum Petro agere de cohibendo vindictæ impetu, & de sua Passione minime retardanda: *Conuerte, inquit, gladium tuum in locum suum, omnes enim qui acceperint gladium gladio peribunt: an putas quia non possum rogare Patrem meum, & exhibebit mihi modo plusquam duodecim legiones angelorum: Quomodo ergo implebuntur scriptura quia sic oportet fieri? Ex quibus verbis, postrema hæc de Scripturis adimplendis, plurimum faciunt ad scopum huius hebdomadæ, qui de comparanda generositate in occurſu difficultatum præfixus est. Nam sicut de Christo, ita & de nobis scripturæ dicunt esse patiendū, si vero quod dicunt de Christo ita fuerit adimplendum, ut ne vnus quidem apex aut iota defuerit, quanto magis quod de nobis dicunt, illud omnino est consummandum? Et vero quod præcipua consideratione dignum est: *Si propter scripturas sunt aduersa toleranda, sunt libenter toleranda.**

Cur enim propter scripturas tolerantur, nisi quia sic scribuntur & sic dicuntur necessaria esse ad salutem, ut oporteat vel scripturas solui, vel salutem perire, vel certe pati? Audi ut loquuntur in vtroque testamento: *Hoc pro certo habet omnis qui te Tob. 3. colit, quod vita eius si in probatione fuerit, coronabitur. QVIA ac- Ibid. 12. ceptus eras Deo, necesse fuit ut tentatio probaret te. OMNES qui pla- Indish. 65*

Prou. 4. cuerunt Deo, per multas tribulationes transierunt fideles. *QVEM* dicitur
Ecclesi. 2. liget Dominus, corripit. IN igne probatur aurum & argentum: homi-
Math. 11. nes vero receptibiles in camino humiliationis. *REGNUM* cælorum
Act. 14. vim patitur, & violenti rapiunt illud. *QVONIAM* per multas tribu-
2. Tim. 3. lationes oportet nos intrare in regnum Dei. ET omnes qui pie volunt
 vivere in Christo Iesu, persecutionem patientur.

Propter hæc itaque & sexcenta similia scripturæ testimonia nemo non videt tam necessario toleranda esse aduersa, quam necessarium est scripturam non posse solui, neque Deum mentiri. Non potest solui scriptura, dicebat Christus Dominus, quoniam sic scriptum est & sic oportebat Christum pati. Nonne & credis sic de te scriptum esse, & te oportere pati?

II. PUNCTVM.

SED non aliter Scriptura commendant aduersa toleranda, neque saliter adimplentur, quam si libenter & patienter tolerantur.
Iac. 1. OMNE gaudium existimate fratres mei, cum in tentationes varias incideritis, scientes quod probatio fidei vestra patientiam operatur, patientia autem opus perfectum habet, ut sitis perfecti & integri in nullo deficientes. Sic cum Iacobo Paulus de se & nobis: gloriamur, inquit, in tribulationibus, scientes quod tribulatio patientiam operatur, patientia autem probationem, probatio vero spem, spes autem non confundit. Vbi aduerte rationem manifestam cur scripturæ non aliter proponant aduersa toleranda quam patienter & libenter, quia scilicet ordinata sunt ad probationem siue ad exercitium virtutis & meriti; non esset autem virtus aut ratio vlla meriti nisi ille esset volens lubensque animus; in hoc enim velut aurum in fornace, probi ab improbis discernuntur, quod probi libenter, alij
Rom. 5. non ita patientur; sicque ut ait Sapientissima Iudith, qui tentationes non susceperunt cum timore Domini, & impatientiam suam & improprium murmurationis sue contra Dominum protulerunt, exterminati sunt ab exterminatore & à serpentibus perierunt.

Longius abiret oratio si quæ sunt in scripturis similia recenserem; Vnus sit instar omnium Apostolus; Nondum enim usque ad sanguinem restitistis aduersus peccatum repugnantes, & obliuisti estis consolationis quæ vobis tamquam filiis loquitur dicens, fili mi, noli negligere disciplinam Domini, neque fatigeris dum ab ea argueris.

quem enim diligit Dominus castigat, flagellat autem omnem filium quem recipit. In disciplina perseuerate, tamquam filiis vobis offert se Deus, quis enim filius quem non corripit Pater? quod si extra disciplinam estis, cuius participes facti sunt omnes, ergo adulteri & non filij estis. O pauenda verba! ô amanda verè aduersa, quo amore filius vult à patre amari, & amare patrem!

III. PUNCTVM.

S*I propter Scripturas igitur sunt aduersa toleranda, sunt libenter toleranda; cum non aliter commendentur quàm vt libenter inferantur, neque aliter Scripturæ impleantur, nisi id præcisè fiat quod intendunt.*

Vide autem rursus & admirare quàm sint totæ Scripturæ in illa patientia seu lubenti tolerantia commendanda, cum dicat Apostolus *quacumque scripta sunt, ad nostram doctrinam scripta sunt, vt per patientiam & consolationem scripturarum spem habeamus*; quasi diceret, idcirco quæ scripta sunt de aduersis, sunt scripta vt patienter illa feramus: seu potius, quæcumque scripta sunt in Sacris Bibliis vtriusque testamenti, siue in Genesi, siue in Exodo, in Leuitico, in Numeris, in Deuteronomio: siue in libris Iosue, Iudicum, Regum, & aliis Historialibus; siue in Psalmis, in Prouerbiis Salomonis, in Prophetis; siue in Euangelio, in Apostolorum Actis, & eorum Epistolis; quæcumque tandem Sacris illis in Paginis scripta sunt, eò omnia tendunt, vt patientiam in aduersis doceant, & inde consolationem in iis tolerandis hauriamus, quod ea sectemur, quæ tantopere nobis commendantur.

Certe vna vox Dei, vnum Christi exemplum sufficiebat ad id persuadendum, sed tam multa simul conglobata & cumulata sūt, vt magis erubesceres potiùs tam multa, te vix adhuc moueri ad libenter patiendum. *Quomodo ergo implebuntur Scriptura, nisi libenter?* hoc te vrge & preme stimulo, donec ex his esse possis quibus vere dicatur: *Libenter suffertis insipientes cum sitis ipsi sapientes.* 2. Cor. 11.

PRO EADEM FERIA QVADRAGESIMALI.

*Ad Euangelium, de parabola vineæ locatæ malis
Agricolis, qui petenti Domino fructum negarunt.*

VERITATES PRACTICÆ.

Quod te imparatum magis reddit ad reddendum fructum, hoc te paratiorem deberet reddere.

Quantò minus puniri timet Infructuosus, tanto iam magis punitus est.

In 3. parte, in fine, ubi de votorum Renouatione.

VEREBVNTVR filium meum.

Cum sit iste omnis fructus vt auferatur peccatum, non veretur filium Dei, qui peccare non veretur.

Quasi diceretur.

15. 27. Non veretur Filium Dei qui negat illi fructum quem requirit. Sed qui peccare non veretur, negat illi fructum quem requirit; Cum ex propheta, iste sit omnis fructus quem ab vnoquoque requirit, vt auferatur peccatum eius. Ergo non veretur Filium Dei, qui peccare non veretur; quidquid tandem præ se ferat pietatis.

In 4. parte, FERIA 4. hebdomada 27.

Quò etiam reuocari posset hæc Veritas.

Sic Deus dilexit mundum, vt sic mundus diligeret Deum, sicut dilectus est.

In 1. parte, FERIA 1. hebdomada 1. in Aduentu.

MALOS male perdet.

Malos quidem omnes perdet Deus, sed non male malos

nes, nisi qui bene perdi nolint.

Tam porro bonum est malis, bene perdi, quàm male perdi malum est.

In 4. parte, suprà dicta Feria 4. hebdomada 27. ubi & hac eodem spectans habetur.

Tam facile est malis, in aliena se persona nosse, quàm in sua difficile.



S A B B A T O.

SINIT SE CHRISTVS CAPI
ET LIGARI.

Cohors autem & tribunus & ministri Iudeorū comprehenderunt Iesum, & ligauerunt eum. Ioan. 18.

VERITAS PRACTICA.

Sicut ex necessitate virtus, ita ex virtute necessitas.

SENSVS & RATIO est, quia idcirco ex necessitate fit virtus, ne alioquin frustra & sine merito patiaris.

Sed nisi ex virtute fiat necessitas, sic frustra & sine merito patieris.

Ergo sicut ex necessitate virtus, ita ex virtute necessitas, prout in discursu declaratur.

I. PUNCTVM.

MIRVM sanè quod cum ita prostrati essent Iudæi à Christo Domino, ut vidimus, ausi fuerint postea dum resurgendi potestatem habuerunt, in eum inuolare, eum

comprehendere, & ligare vt latronem, atque infandis modis diuexare! Nonne ex illa sua prostratione debuerant reuereri eum cuius potestatem ita experiebantur vt nisi eo permittente se mouere non possent? At ecce inde ferociores resurgunt & quasi eos puderet sui casus, seu quasi acceptam iniuriam vlisci vellent, eò acrius in eum insiliunt quò se ab eo dolent primo impetu diutius reuocatos. Sic videlicet abutuntur homines gratiis; *sic retribuunt mala pro bonis, & odium pro dilectione.*

Interea vero dum sic ligatur Christus, Discipuli omnes eo relicto fugiunt: solus illeagnus inter lupos relinquitur, qui mansuetudinem eius, infirmitatem interpretantes, tantum in eum audent quantum illis permittit; tantum eis autem permittit, quantum humana non tantum rabie sed & diabolico furore acti defauire possunt; *Tamquam ad latronem*, inquiebat illis, *existis cum gladiis & fustibus comprehendere me: cum quotidie vobiscum fuerim in templo, non extendistis manus in me; sed hac est hora vestra & potestas tenebrarum.* Quasi diceret, non me ligaretis nisi meligari libere vellem: sic autem libere volo quia hæc est hora patiendi in qua liber in vinculis, & in libertate vinctus esse volo.

*Matth. 26.
Luc. 12.*

Admirandum certe exemplum quo discimus, *sicut ex necessitate virtutem, sic ex virtute necessitatem facere.* Quemadmodum enim Christus in vinculis erat liber, ita liberi simus oportet vt de necessitate fiat virtus: Et quemadmodum ille in libertate fuit vinctus & ligatus, ita nos ei quadammodo erimus similes, quādo ex virtute fiet necessitas. Quod quomodo fiat, nunc est considerandum attentius. Et quia maior esse potest difficultas intelligendi quomodo ex virtute fiat necessitas, quā quomodo ex necessitate fiat virtus: idcirco vnum ex alio deduci debet, & ex faciliiori difficilius explanandum.

Age ergo, quid est quod ex necessitate virtus fiat? Quando videlicet aliquid accidit contrarium & repugnans, non ex electione nostra, sed vel ex Diuina Prouidentia, vel ex obligatione tui status, vel ex superiorum ordinatione, vel denique ex qualicumque necessitate, cui vel repugnare nefas sit, vel impossibile, vel difficillimum; Tunc si libere & voluntariè talem casum acceptemus, & quidquid in eo abstinendum, vel sustinendum est, non minus generosè fiat, & cum ea virtute quæ tunc requiritur, quam si ex electione nostra esset: tunc dicetur ex ne-

cessitate fieri virtus, propter liberam illam acceptationem. *Domino dedit, Dominus abstulit: sicut Domino placuit ita factum est: sit nomen Domini benedictum.* Job 1.

Quod vero sic semper ex necessitate virtus sit facienda, hæc imprimis suadet ratio, quod cum alioquin, velis nolis, talis sit sufferenda necessitas, certe id longe satius est velle, tum propter tranquillitatem animi quæ inde comparatur, tum ne frustra patiaris & sine merito. Si enim temporalem aliquam iacturam doles, nonne id magis dolendum te in illa temporali iactura, iacturam facere spiritualis & æterni boni quod consequi possis si velis? si posses ita redimere illam necessitatem, ut nihil temporale ex ea tibi periret, nonne id velles? At ecce maius aliquid tibi offertur cum offertur occasio virtutis exercendæ: sic enim fiet ut accedente spirituali emolumento reparetur in melius damnum illud temporale quod accidit. Optanda fuisset & conquirenda talis occasio tanti boni spiritualis promerendi; at quanto magis acceptanda cum sese offert? Nihilne meriti apud Deum pro salute tua tibi vis comparare? At quandònam opportunius quàm quando minor est impensa & maius meritum? Hoc autem utrumque hic accidit, nam nihil à te petitur, nisi voluntaria damni temporalis si quod acciderit acceptatio: quid facilius? Meritum autem inde proveniens maius est quam si ex sola tua electione & non ex necessitate virtus procederet.

Sic disertè sanctus Ioannes Chrysostomus: *si iacturam audieris non tumultuemur, sed dicamus, benedictus Deus, multo plures divitias inueniemus: non enim tantum lucrabitur, in pauperes divitias distribuens, & circumiens ut egenos inueniat, quantum ipse per hæc verbum lucrifaciet, unde & Iob magis miror; Et quæ plura de hoc habet. Quæ cum ita sint ex communi cæterorum Patrum sententia, quis nisi stultus oblatam tam bene merendi occasionem non accipiat? cum alioquin ut dictum est, velit nolit sit passurus sine ullo merito nisi velit libenter pati: imo & cum demerito & poena consequente si murmuret, si indignetur aut aliter impatientiam suam prodat; quod certe proclive est nisi tunc animus ad patientiam aut aliam virtutem obfirmet cum gratia. Hinc illa sunt divina Sapientis Monita: *Qui patiens est multa gubernatur prudentia: qui autem impatiens est, exaltat stultitiam suam.* Prov. 14 Et rursum: *Qui impatiens est, sustinebit damnum: & cum rapuerit, aliud apponet.* Ibid. 17. Id est, si per impatientiam aliqua se damni parte*

putat eripere, sese in illud aut grauius damnum per ipsummet impatientiæ vitium conjicit.

II. PUNCTVM.

SED nisi ex virtute fiat necessitas; sic priuaberis multo merito; sic frustra multum patieris.

Dicitur ex virtute fieri necessitas, quando talis occasio virtutis exercendæ adest, qualem iam diximus oriri ex illis diuersis casibus, in quibus necessariò est patiendum: tunc enim sicut ex necessitate fit virtus quia necessitas in virtutem vertitur: sic ex virtute fiet necessitas, quando sic semper illa Virtus exercebitur quasi necessariò illam deberes exercere, quasi non esses liber ad eius actum & exercitium: quasi esset præceptum, quasi esset necessaria obligatio sicut esse concipitur in euitando peccato. *Gal. 4. Bonum amulamini in bono semper*, inquit Apostolus; Cur porro ita semper? Quia videlicet si non ita semper & constanter in id euigiles, sæpe deficies, sæpe Virtus deerit, & ex consequenti meritum virtuti annexum; ac proinde sic multo priuaberis merito, sic multum frustra patieris. *Ibid. 3. Tanta passi estis sine causa: si tamen sine causa!* Sic deplorabat Apostolus, quasi diceret, tunc sine causa patimini cū sine merito, sed tamen non sine causa, quia tunc erat causa meriti, si virtutem exercere voluissetis: & hæc erat causa virtutis semper exercendæ, ne sine merito vos vniquam patere-
1p. 65. mini, iuxta illud, *Electi mei non laborabunt frustra.*

Non ita quidem semper obligamur ad bonum faciendum, sicut ad malum euitandum: quia non omne genus boni debemus aut possumus facere, sicut omne genus mali debemus & possumus cum Dei gratia euitare: sed tamen hoc sensu semper obligamur ad bonum, quatenus semper tenemur bene quod facimus facere; vnde sicut non debemus otiosi sed semper aliquid agere, ita bene semper agere; cū alioquin nisi bene illud ageretur quod ageres, vel otiosum esset, vel malum: sicque merito tuæ actionis priuareris si esset otiosa, vel pœnam incurreres si mala esset. Quamobrem rectè inferebat Apostolus, *Itaque, fratres mei dilecti, stabiles estote & immobiles, abundantes in opere Domini semper, scientes quod labor vester non est inanis in Domino.*

III. PUNCTVM.

SICVT ergo ex necessitate Virtus, ita ex Virtute Necessitas; Cum non aliter efficacius persuadeatur ex necessitate virtus exercenda, quàm ne alioquin Deo gloria, & tibi meritum pereat; periret autem sæpissime nisi ex virtute esset necessitas, quo sensu dictum est; ac proinde vtrumque ex æquo est amplectendum. *Necessitate subditi estote*, inquit Apostolus, *non solum propter iram* Rom. 13^a *sed etiam propter Conscientiam*. Id est, non solum propter metum alicuius impendentis poenæ quæ non semper vobis impendet, nec proinde vos semper vrget ad virtutem: sed propter ipsam quæ in vobis est, conscientiam & quæ vos semper sollicitos ac paratos habet ad omne opus bonum, sicque *bonum facientes non deficiamus: tempore enim suo metemus non deficientes.* Gal. 6.

Itane te sentis premi ad bonum? Itane te finis vrgeri ad virtutem ex his quibuscumque casibus qui tibi vel inuito accidunt semper exercendam? Quàm sæpe deficis, quàm parùm proficis, quàm perperam omnia capis, volendo quod non habes, & nolendo quod offertur. Audi Epictetum, audi hominem Ethnicum: *Ne postules ea qua sunt ita fieri vt tu vis: sed si sapis ita velis* In Enchir. *fieri vt sunt, sic omnia secunda tibi accident.* Nihil Ilte de Deo, nihil de Cœlo & Virtutis merito loquitur, & tamen ita loquitur; Tu verò qui credis Deum præsidere istis omnibus aduersis casibus; tu qui probè scis Cœlo repositam esse virtuti mercedem; & qui tandem non ignoras quantum cœlestia sint humanis præfenda: tu nec tamen vt Ethnicus sapis & viuus! Ah qualis iniuria Christo! quale probrum Christiano!

Aduerte diligentius: & omne quod tibi applicitum fuerit accipe Ecclesi. 2. & in dolore sustine.

PRO EADEM FERIA QVADRAGESIMALI.

Ad Euangelium, de filio prodigo. Luc. 15.

246 *Sabbato infra Hebd. 2. Quadrag. Ministri Iudeorum, &c.*

Quæ multa possent inde produci Veritates, ad hanc potissimum referuntur.

Qui se à Christo subducit vt fœliciùs viuat, viuit miserius ipso misero prodigo.

In 4. parte, Feria 5. hebdomada 24. Vbi de libertate & seruitute Christi: necnon expresse de hac parabola.





DOMINICA III. QVADRAGESIMÆ.

DE CHRISTO EIICIENTE DÆMONIUM, &c.

VERITATES PRACTICÆ.

ERAT Iesus eiiciens Dæmonium, & illud erat mutuum. Luc. II.

Obedientia Dæmonum nostræ est condemnatio Inobedientix.

In 3. parte, Feria 4. hebdomada 9.

JN Beelzebuth Principe Dæmoniorum ejicit Dæmonia.

Qui sibi Innocenti factam iniuriam nimis dolet, suæ ipse innocentix iniuriam facit.

In hac 2. parte, Feria 2. hebdom. 4. Quadragesima. Vide & in 1. parte, die 16. Ianuarij, ubi de iniuriis non modo non inferendis, sed illatis sufferendis.

OMNE regnum in seipsum diuisum desolabitur, &c.

Beati mites. Beati pacifici. Beati qui persecutionem patiuntur. Beati cum maledixerint vobis.

248 Dominica 3. Quadrag. Qui non est mecum, &c.

In 3. parte, in 4. hebdomada.

Cum fortis armatus custodit atrium suum, in pace sunt omnia quæ possidet.

Multorum est Conscientia cauteriata & peruerfa, nisi se sinant dirigi.

In 1. parte, Feria 5. hebdomada 3. ubi quod de cauterio dicitur, de mala pace, & falsa quadam securitate Conscientiæ quam procurat Demon in animis quos possidet, intelligendum demonstratur.

Si autem fortior illo superueniens vicerit eum, &c.

Qua facilitate vincimur, eadem vincere possumus.

In 3. parte, Feria 5. hebdomada 7. Vbi de his Christi Domini verbis, & de nostra per ipsum contra omnes Aduersarios fortitudine.

QUI non est mecum, contra me est.

VERITATEM PRACTICAM

VERBA illa continent valde stupendam & fructuosam, quæ cum nullibi declaratur, hic est modo apertius exponenda.

Quod difficillime crederes, te contra Christum esse, hoc est facillimum creditu, si Christo credis.

RATIO est, quia ex Christi Domini verbis, facillimum creditu est, te contra Christum esse, si cum Christo non sis.

Sed est etiam facillimum creditu, te cum Christo non esse.

Ergo & aequè patet te contra ipsum esse: Quod tamen difficillime crederes, adeo res est stupenda & expendenda.

I. PUNCTVM.



VM Christus Dominus, eiectus ab humano corpore Dæmonio, diceret se tam facile ex animis hominum eiecturum hunc hostem, hoc dicebat sensu, dum scilicet vellent homines secum conspirare & concertare contra eundem Aduersarium; Nam si alioquin contra non pugnarent cum ipso, nihil illis magis prodesset quàm si ipse non certaret & vinceret, cum ipsi fugatum hostem reuocarent & se illi adiungerent. Quod vt apertius illis exponeret: *Qui non est mecum*, inquebat, *contra me est*. Qui non pugnat mecum contra hunc communem hostem, contra me pro illo pugnat. Qui non est mecum in hac pugna, contra me est. Non est autem ille mecum, qui vitæ operibus non consentit; qui non colligit omnes animæ suæ vires & facultates vt se doctrinæ meæ conformet, dispergit & dissipat quidquid loquor & operor: cumque nihil agat ex his quæ doctrina & vita mea profiteor; hoc ipso quo non vita mecum consentit, dissentit, & quo non est mecum, contra me est.

O quanta cæcitas hominum, qui cum possint cum Christo Dæmonem expugnare, malunt cum Dæmone pugnare contra Christum! O quàm multi tales non modo Iudæi & Ethnici sed & ipsi Christiani! Tene ex his vnum crederes qui contra Christum pugnent pro Dæmone? *Difficillimè omnino crederes, & tamen hoc est tam facile creditu quàm Christo Domino credes*. Audi & obstupesce.

Cum enim Christus Dominus aperte dixerit, *Qui non est mecum contra me est*: Nonne ex his verbis quibus te credere profiteris, certissimum atque euidentissimum erit te contra Christum esse, si cum Christo non sis? Nam quod vniuersim dictum est de omnibus, tam certum est particulatim de te dici, quàm verum est te vnum esse ex illis omnibus. Neque aliter te condemnandum putares si non esses baptisatus nec crederes, quam quia vniuersim dictum est, *qui crediderit & baptisatus fuerit, saluus erit*: *Mar. i. 16.* *qui vero non crediderit condemnabitur*. Cur non igitur æque tibi aut de te dictum crederes, quod ipse dixit, qui non est mecum, contra me est? An id putas verum de aliquo qui cum Christo

250 Dominica 3. Quadrag. Qui non est mecum, contra me est.

non sit? cur id vero non esset de te verum si tam vere non sis cum Christo quam ille alius de quo dici fateris? Responde, & fatere aut de nullo id esse verum, & te Christo id affirmanti non credere; aut si ipsi credis, id æque de te verum si cum Christo non es, quam de vilo mortalium. *Act. 26.* *Credis Rex Agrippa Prophetis?* aiebat Regi Paulus: *scio quia credis.* Quali diceret, Cum Prophetæ de futuris tamquam de præsentibus pronuntiarint, nonne credis tam vera esse quæ de vno tempore vel de vna persona dixerunt, atque de aliis? Sic Sapiens, *Fides in sæculum stabit*: Id est, in hoc est vera fides, vt quod vniuersim dictum est de omnibus siue personis siue temporibus, sic de singulis particulatim intelligatur & credatur. *Ecclesi. 40.*

II. PUNCTVM.

SED est etiam euidentissimum & facillimum creditu te cum Christo non esse.

Quid est enim euidentius te cum Christo non esse, si iudicio, si voluntate seu affectu, si vita & moribus ab illo dissentis? nam si vt ait sanctus Ioannes, *qui dicit se in ipso manere debet, sicut ille* *1. Io. 2.* *ambulauit & ipse ambulare*, profecto qui iudicio & affectu, qui vita & moribus ab illo dissentit, non potest dici ambulare sicut ille ambulauit, nec proinde cum ipso manere nec esse. *Amos 3.* *Numquid ambulabunt duo pariter, nisi conuenerit eis*, inquit Propheta?

Iam vero quod non minus sit euidens te sic ab illo dissentire, vt dictum est, Vide quid dixerit, & reuolue sacras Euangeliorum paginas à primo sermone ad vltimum. Audi quid loquatur, *Luc. 6.* *Beati pauperes, Beati qui nunc esuritis; Beati qui nunc fletis, Beati* *Matth. 5.* *cum vos oderint homines, Ve vobis diuitibus, Ve vobis qui ridetis nunc. Ve cum benedixerint vobis homines. Diligite inimicos vestros, benefacite his qui oderunt vos: benedicite maledicentibus vobis, & orate pro calumniantibus vos; & qui te percutit in maxillam, præbe & alteram, & ab eo qui aufert tibi vestimentum; etiam tunicam noli prohibere: omni autem potenti te tribue; & qui aufert quæ tua sunt, ne repetas.*

HOC est Christi de rebus iudicium, hi sunt eius affectus, hæc tota in terris peracta est vita, hi Christi & Christiani mores: *I. de vera* *Rel. c. 16.* vnde hæc sunt egregia S. Augustini verba: *Satellites voluptatum*

Quod difficillimè crederes te contra Christum esse, hoc, &c. 251

diuitias perniciosè populi appetebant, pauper esse voluit. Honoribus & imperiis inhiabant, Rex fieri noluit. Carnales filios magnum bonum putabant; tale coniugium prolemque contempsit. Contumelias superbissime horrebant, omne genus contumeliarum sustinuit. Iniurias intolerabiles esse arbitrabantur, quæ maior iniuria quàm iustum innocentemque damnari? Dolores corporis execrabantur; flagellatus atque cruciatus est. Mori metuebant, morte multatus est. Ignobilissimum mortis genus crucem putabant, crucifixus est. Omnia quæ habere cupientes non rectè vivebamus, carendo vitia ferit. Omnia quæ vitare cupientes à studio deuiabamur veritatis, perpetiundo deiecit. Non enim ullum peccatum committi potest nisi dum appetuntur ea quæ ille contempsit, aut fugiuntur ea quæ ille sustinuit. Tota itaque una vita eius in terris per hominem quem suscipere dignatus est, disciplina morum fuit.

Itane verò de rebus iudicas? Itane his afficeris? Itane viuus & mores componis? An potius nonne aliter prorsus iudicas, prorsus afficeris, & aliter plane viuus? Quis sensus de paupertate & diuitiis? de honore & contumelia? de bonis & malis huius vitæ? vtra eligeres si horum daretur optio? nonne id facillimum creditu quod non mala eligeres sicut ille, ac proinde quid euidentius quam te cum illo non esse, à quo ita dissentis iudicio & affectu? *Qui sunt Christi carnem suam crucifixerunt cum vitiis & concupiscentiis. & I quis spiritum Christi non habet, hic non est eius.* Gal. 5. Rom. 8.

III. PUNCTVM.

QUOD ergo difficillimè crederes, te contra Christum esse; hoc est facillimum creditu si Christo credis: Nam Christo affirmate, qui non est mecū contra me est, quid sequitur, si hoc credis nisi quod tam certum & euidentius erit te contra Christum esse, quàm clare patebit te cum Ipso non esse. Quàm verò id clare pateat, te ipsum inspicere, vide quantum à Christo dissentias: nam hoc est cum Christo non esse, sic ab eo discrepare & dissentire, sicut apparet in dictis & factis tuis per totum vitæ decursum. Nec aliter mundo Christus est contrarius quàm propter hanc morum & vitæ dissimilitudinem. Sic illi Mundani profitentur qui apud Sapientem clamant: *Contrarius est operibus nostris, dissimilis est aliis vita illius.* Quod & ipse Dominus satis aperte innuit dicens:

252 Dominica 3. Quadrag. Qui non est mecum contra me est.

Ioan. 7.

Mundus me odit, quoniam testimonium perhibeo de illo quo opera eius mala sunt. Quamobrem sicut diffiteri non potes te cum Christo non conuenire nec esse; sic plane fateri necesse est te contra ipsum esse.

Lib. de
Elem. &
bonis oper.

Itane vero tu contra Christum! durus quidem sermo, sed fortior veritas quæ à sermone non potest detrahi, quamdiu sic viues tam parum Christo similis. Sed quod horrendum magis est, sic contra Christum viuis quia sic à Dæmone persuaderis viuere! sic te ab illo reuocat per hanc vitæ dissimilitudinem, & in suas trahit partes, vt vnà simul contra Christum pugnetis. O rem execrandam? te Christus ad se vocat contra Dæmonem pugnatum: tu à Dæmone reuocatus contra Christum pro illo pugnas! Tu pro Dæmone contra Christum! expende hoc & audi S. Cyprianum, imo & Dæmonem quem S. ille Doctor inducit sic propterea Christo conuitiantem, quod te tuique similes suos fecerit: *Ego pro istis quos mecum vides, nec alapas accepi nec flagella: nec quicquam magni do, sed falsa pollicitatione deludo, & potius ipsi mihi omnia sua tradunt. Tuos tales munerarios Christe demonstra præceptis tuis monitos; Et quæ plura pergit, sed hæc sufficiant ad Veritatem confirmandam, & talem inde horrorem animi concitandum, Vnde ad conciliandam cum Christo vitæ consensio-*
nem magis ac magis exardescas. *Sequitur te, quocumque ieris.*

Matth. 3.

Et verò cauendus lapsus & reciduum, ne quod ex dictis Domini superest in hodierno Euangelio tibi contingat: *Et fiunt nouissima hominis illius peiora prioribus.* Qua de sententia, proponitur hæc Veritas:

Melius erat viam Iustitiæ non introisse, quàm retroisse.

In hac 2. parte, Feria 5. hebdomadæ 4. post Pascha.



HAC HEBDOMADE, Considerantur quæcumque gesta sunt per totam noctem apud Pontifices, vsque ad matutinum diei sequentis, quo Christus ad Pilatum est adductus. Ibi adnotantur aliquot inordinati motus cordis & linguæ, qui frequentius ex iniuriis concitantur quas ab inimicis accipimus, & qui exemplo Christi Domini corriguntur.

FERIA SECVNDA.
CHRISTVS ALAPAM INFLIGENTI,
MIRA MANSVETVDINE LOQVITVR.

*Vnus assistens ministrorum dedit Alapam IESV,
dicens, sic respondes Pontifici? Respondit ei IESVS,
si male loquutus sum, testimonium perhibe de
malo, si autem bene quid me cadis? Ioan. 18.*

VERITAS PRACTICA.


Quantum fas est in irâ loqui, tantum ex ira nefas.

*RATIO EST, quia idcirco fas est in ira loqui, vt Mansuetudo
& Charitas conseruentur.*

*Sed si ex ira loquereris, Mansuetudo & Charitas potius destrue-
rentur, quod est nefas, quàm conseruentur.*

Ergo quântum fas est in ira loqui, tantum ex ira nefas, & cauendū.

I. P V N C T V M.

 VO magis progredimur in patientis Christi mysteriis,
eo minus verborum & humani discursus videtur adhi-
bendum, sunt enim ex se tam vbera & copiosa siue ad
intellectum illustrandum, siue ad voluntatem inflammandam,
vt sola representatione rei gesta sit opus. Sic ergo habet sacer
Euangelista: *Cohors autem & tribunus & ministri Iudeorum com-
prehenderunt Iesum, & ligauerunt eum, & adduxerunt eum ad An-
nam primum.* Et paulo post: *Pontifex ergo interrogauit Iesum de
discipulis suis, & de doctrina eius.* O quæ doctrina! ô quàm rari
discipuli! quid censes de vtrisque? Respondit ei Iesus; *Ego palàm
locutus sum mundo, ego semper docui in synagoga & in templo, quò
omnes Iudæi conueniunt, & in occulto locutus sum nihil. Quid me*

234 Feria 2. infra Hebd. 3. Quadrag. Sic respondes Pontifici.

interrogas? interroga eos qui audierunt quid locutus sim ipsis, ecce hi susciunt quæ dixerim ego.

QUID ista responsione verius, mansuetius, iustius? ait sanctus Augustinus. Et tamen o prodigium audacia! Hæc autem cum dixisset; Unus assistens ministrorum dedit alapam Iesu, dicens, sic respondes Pontifici? Hic siste anime, & hæc imprimis sancti Augustini verba expende, Quid non potuisset per potentiam inbere per quam factus est mundus, nisi nos docere maluisset patientiam qua vincitur mundus? Tum vero respondit Iesus; si male locutus sum, testimonium perhibe de malo: si autem bene quid me cadis?

Tres possunt cogitari rationes cur hic responderit qui alias ita siluit ut omnes mirarentur. Prima est, ut diluat calumniam sibi factam de contempto Pontifice. Secunda, ut iniuste percutientem moneat, & ad resipisceniam excitet. Tertia, ut nos doceat aliud esse in ira, seu in iniuriis acceptis aliquid loqui; & aliud ex ira loqui. Quantum enim fas est in ira loqui, tantum ex ira nefas. Quod ut acuratus & ad praxim utilius expendatur, Ratio hæc ad exemplum Christi Domini adiungitur; Quod idcirco præcipue fas est in ira loqui, ut Mansuetudo & Charitas conseruentur: Mansuetudo quidem in eo qui iniuriam accipit, & Charitas erga eum qui eam infert, aut etiam ad aliorum ædificationem qui præsentibus interfunt. Ad hoc autem moderata confert loquela, quatenus sic temperatè loquendo animus distrahitur à cogitatione iniuriæ & vindictæ, quæ interdum silendo acuitur & inflammatur. Sic peius siluit Absalon contra fratrem suum Ammon quàm si quid fortè locutus esset: nam ex mutuo colloquio se fraterna poterant mitigare corda, quæ ex silentio magis exasperata sunt; quod aperte Scriptura indicans; Porro, inquit, non est locutus Absalon ad Ammon, nec malum nec bonum; oderat enim Absalon Ammon. Nempe vel ex odio siluit, vel ex silentio magis odit, quod utrumque peruersi silentij aperta est nota.

2. Reg. 13.

Prov. 16.

Ibid. 25.

Ecclesi. 8.

Quod itaque dicit Sapiens; Responsio mollis frangit iram; Et rursum, lingua mollis confringet duritiam, tam verè accipi potest de ipso qui loquitur, quam de aliis qui audiunt, nam sicut ex animo lingua, sic ex lingua formatur animus: si lingua mollis fuerit, emollescet loquentis animus; si lingua dura, tum animus etiam induratur. Ad conseruandam denique cum aliis Caritatem nemini dubium est quod alius ait Sapiens: Verbum dulce multiplicat

Quantum fas est in ira loqui, tantum ex ira, nefas. 255

amicos, & mitigat inimicos: & lingua Eucharis in bono homine abundat. Quamobrem hæ virtutes cum loquendo potius quam silendo demonstrentur, sic in ira loqui fas est vt demonstrentur ad ædificationem proximi, & in animis dissidentium conseruentur. Si tempus tacendi est, est etiam tempus loquendi; Tu forte neu- *Ecclesi. 2.* trum obseruas, aduerte.

II. PUNCTVM.

SED si ex ira loquereris, Mansuetudo & Caritas potius destruerentur quod est nefas, quam conseruarentur.

Hoc est enim vtriusque discrimen loquelæ, vt qui in ira loquitur, sentiat quidem efferuescentis motum sanguinis, sed rationi subiectum, vnde nihil inordinate agit nec loquitur, qualis ira in quouis homine atque in ipso etiam Christo Domino esse potuit, *3. p. 9. 15.* vt expressè docet sanctus Thomas. Sed qui ex ira loquitur, iræ *4. 9.* feruit potius quam dominetur, non solum sentit iræ motum, sed dominatum & imperium quo statim turbatur ratio, & ratione turbata, sermones effunduntur inconditi & turbulenti quibus illæ virtutes illico ruunt & destruuntur. *Ira non habet misericordiam,* inquit Sapiens, *nec erumpens furor; & impetum concitati ferre* *Prov. 17.* *quis poterit?* Quam sit autem hoc nefas, audi & contremisce: *Ira* *Ecclesi. 27;* *& furor, vtrique execrabilia sunt, & vir peccator continens erit illorum;* Id est qui peccatum non reformidat, erit illis obnoxius vitiis, quæ metu læsi numinis & offensæ conscientiæ, coercentur. Vide infra in hac parte, Feria 3. hebdomadæ 3. post Paschæ: vnde quæcumque hic & in sequentibus de ira dicuntur, multum illustrari possunt.

III. PUNCTVM.

QUANTVM ergo fas est in ira loqui, tantum ex ira nefas: Quia quæ virtutes ex vno conseruantur, destruuntur ex alio, licet ait Sapiens: *Vir iracundus prouocat rixas: qui patiens* *Prov. 15.* *est mitigat fuscitatas.*

Hæc est doctrina de qua interrogatus est Dominus, hi sunt eius discipuli, qui quod dixit & fecit profitentur; *Discite à me* *Matth. 23.* *quia mitis sum, & humilis corde;* *MITES* quippe sunt, inquit sanctus *1. 1 de serm.* *D. 63.*

256 FERIA 3. infra Hebdomadam 3. Quadragesimam. Ille autem tacebat, &c.

1. Pet. 2. Augustinus, qui cedunt improbitatibus, & non resistunt malo, sed vincunt in bono malum; Quod disertè sanctus Petrus, Misericordes, modesti, humiles, non reddentes malum pro malo, nec maledictum pro maledicto, sed è contrario benedicentes, quia in hoc vocati estis ut benedictionem hereditate possideatis.

1. 1. Ep. 82. Neque excuses naturam ad irascendum pronam, esto enim inquit S. Ambrosius, ut sit natura irasci, aut plerumque causa: hominis est tamen temperare iracundiam, non leonino raptari furore, non assuescere clamori, non ferere nec acerbare familiare iurgium; scriptum est enim, vir iracundus effodit peccatum.

1. 7. Ep. 26. Quod si tibi forte delinquentes corrigendi sunt, caue plus illis delinquas irascendo. Ira quippe, ait sanctus Gregorius, cum etiam delinquentium culpas exequitur, non debet menti quasi Domina praeire, sed post rationis tergum velut ancilla famulari, ut ad faciem iussa veniat, nam si semel mentem possidens caperit, iustum esse deputat etiam quod crudeliter facit. O quæ mentis ferocia, sic te crudelem esse! O quæ mentis fallacia, sic te iustum reputare!

Ecclesi. 9. Memento timorem Domini, & non irascaris proximo.

PRO EADEM FERIA QUADRAGESIMALI.

Ad Euangelium, de prima Christi Domini predicatione, in Civitate Nazareth habita, & à Civibus male accepta.

TOTA eius narratio & conformis Veritas habetur suo loco declarata in 1. parte, FERIA 2. hebdomadæ 2. post Epiphaniam. Quæ verò inde plures aliæ produci possent, referuntur ad Iram, ad Invidiam, & ad neglectum Dei sermonem, de quibus argumentis sat multa sunt obuia, vel in ipsis quæ modò decurruntur FERIIS.

Qui loquendo vincereris, silendo vincis. 257



FERIA TERTIA.

CHRISTVS DOMINVS

FALSO ACCVSATVS, NIHIL RESPONDET.

*Non respondes quicquam ad ea quæ tibi obijciuntur
ab his? Ille autem tacebat & nihil respondit.*

Marci 14.

VERITAS PRACTICA.

Qui loquendo vincereris, silendo vincis.

*RATIO EST, Quia vincendus vinces si premendo iræ impe-
tum à quo premereris, impediās damnum impendens.*

*Sed silendo premes illum iræ impetum à quo premereris loquen-
do, sicque damnum impendens impediēs.*

*Ergo qui loquendo vincereris, silendo vinces; ac proinde silen-
tium tibi est religiose colendum.*

L. PUNCTVM.

CVM apud Caypham Principem Sacerdotum, Scribæ & *Marci 14.*
Seniores omnes conuenissent, eò ligatum Iesum milit
Annas, vt de morte eius, communi consilio definiretur.
Tum vero, inquit Euangelista, summi Sacerdotes & omne consi-
lium querebant aduersus Iesum testimonium vt eum morti traderent,
nec inueniebant: multi autem testimonium falsum dicebant aduersus
eum, & conuenientia testimonia non erant. Et quidam surgentes
falsum testimonium ferebant aduersus eum dicentes, quoniam nos au-
diuimus eum dicentem: ego dissoluam hoc templum manufactum &
post triduum aliud non manufactum adificabo. Et non erat conue-
niens testimonium illorum. Et exurgens Summus Sacerdos in medium

2. Pars.

KK

258 *Feria 3. infra Hebd. 3. Quadrag. Ille autem tacebat, &c.*

interrogavit Iesum dicens; Non respondes quicquam ad ea qua tibi obijciuntur ab his? Ille autem tacebat & nihil respondit.

Expende hic primo, quanta Iudæorum in Christum malevolentia, ut cum nihil nisi sanctum in eo esset, conquirant undique falsa testimonia quibus eum accusent. Deinde vero considera, ut est natura hominum sui fallax & deceptrix! Non timent Iudæi de morte Iesu deliberare, & tamen nolunt sine prætextu aliquo; quasi minus nocentes sint, si ex falso prætextu occidant quam si nullo. At nonne nos sic sæpe vitiiis nostris causas præteximus ut minus mundo & nobis appareant? Sed numquid

Luc. 16. Deum celabis? *Vos estis*, inquiebat Christus, *qui iustificatis vos coram hominibus; Deus autem nouit corda vestra, quia quod hominibus altum est, abominatio est ante Deum.* Cum autem sæpe culparum & præsertim iracundiæ, quas sola libertate committimus, causas rejiciamus in naturam ipsam humanam, in officia quæ gerimus, in varias rerum occurrentium sortes, & quoslibet contingentes casus, qui non nisi Deo volente aut permittente obueniunt, quid hoc aliud est quam falsa quædam testimonia contra Dominum quærere, quibus nos excusemus, & ipsum quodammodo accusemus? Vnde & queritur: *Numquid irritum facies iudicium meum, & condemnabis me ut tu iustificeris?*

Iob 40.

Eò se videlicet aliquando iræ excitatæ impetus rapit, ut non modo apertè proximis excādescamus sed latenti quadam impietate, ipsi Deo irascamur, tamquam authori iniuriæ vel poenarum quas patimur. *Quare percussit nos Dominus hodie?* Tunc exemplo Christi silendum; & quoties sic liberiùs Ira linguam laxat, refrænanda est religiosiùs: *Sic enim qui loquendo vincereris, loquendo vinces.*

I. Reg. 4.

Quod ut apertius liqueat, non tam multa est opus probatione quam attenta Veritatis consideratione: Quid enim clarius quam in iracundiæ pugna Victorem illum esse, qui vel concitatum animi sedat impetum, aut ita cohibet ut nihil inde detrimenti, nihil inordinati procedat? *Non te superet ira ut aliquem opprimas*, inquit Scriptura; hoc est scilicet superari, si quid ab ira detrimenti contingat: ac proinde hoc est superiorem & Victorem esse, si damnum omne caueatur. O quæ damna! quàm cauenda!

Iob 36.

II. PUNCTVM.

SED silendo preme illum ira impetum à quo premereris loquendo: *Sicque damnum impedis quod loquela importaret.*

Cum enim agatur potissimum de illo naturæ impetu, quo iratus iræ causas prosequitur & impugnat, certe quemadmodum non nisi loquendo causas illas infectatur, sic plane si loqui desinat, desinet ab instituta prosecutione, quæ non aliter peragitur quàm loquendo vt dictum est: ac proinde etiam cessabit ille naturæ impetus, qui ob id vnum excitatus erat vt iniuriæ vel iracundiæ causas infectaretur. *Secundum ligna sylua sic ignis exardescit, inquit Sapiens, & secundum virtutem hominis sic iracundia illius erit: & secundum substantiam exaltabit iram suam:* Quasi dicat, tantò magis aut minus iracundus commouetur, quantum ex ira loquitur; tum verò minus ex ira loquitur, tantò minus ira causas infectatur, sicque dum cessat loqui, cessat irasci.

Quod quidem alio Sapiientis Dicto apertè confirmatur; *Cum defecerint ligna, extinguetur ignis: & susurrone substracto, iurgia conquiescent.* Ligna enim iræ, sunt verba, sunt susurri, murmura, clamores & indignationes, quibus sublatis, ira tollitur. Vnde Apostolus: *Ira, & indignatio, & clamor, & blasphemia tollatur à vobis, cum omni malitia,* id est, simul omnem iræ malitiam tollis. O quale silentij bonum, quo vno tollitur omnis iræ malitia!

III. PUNCTVM.

SIC igitur qui loquendo vincereris, silendo vinces, Dum sic preme iræ impetum à quo premereris; & illud cauebis damnum, quod certè indè impenderet, nisi caueretur.

Vince amouéque silentio malum, inquit S. Basilius, *& cogita de te periculum fieri, an Deo per patientiam adhæreas, seu per iram in aduersarij partes inclines. Audi David dicentem, dum confisteret peccator aduersum me, non irritatus sum aut ultus, sed surdus factus, & humiliatus sum, & silui à bonis.* Hinc illud scitè dictum à Sapiente; *si sufflaueris in scintillam, quasi ignis exardebit; & si expueris super illam, extinguetur: vtraque ex ore proficiuntur.* Tum nempe sufflatur in scintillam, cum quis ex ira loquitur & iræ suæ causas

160 FERIA 3. infra Hebd. 3. Quadrag. Ille autem tacebat, &c.

profert: supra scintillam verò expuis, cum vel contemnuntur iniuriæ seu quævis alia irascendi incentiua; vel si animum commouere incipiunt, statim silentio reprimuntur. Hæc autem utraque, nempe loqui vel silere, ex ore proficiuntur, id est à nobis pendent; non sic, inuitis & nolentibus nobis producuntur, sicut primi motus naturalium appetitionum animi; quamobrem maior est nostra culpa si non silemus, quàm si non irascimur, quia illud magis est in nostra potestate cum Dei gratia, quæ id etiam à nobis exigit. *VIDE VT SILEAS.* Hoc primum ad victoriam de hostibus reportandam Regi Achaz à Domino commendatur. Vide in 3. parte Dominicam 5. Vbi hæc exhibetur Veritas:

Hoc ipso est ira iniustior, quod nulli vmquam irascenti sua ira videtur iniusta.

PRO EADEM FERIA QVADRAGESIMALI.

Ad Euangelium, de Correptione fraterna, & remittendis semper iniuriis.

VERITATES PRACTICÆ.

Si quis corripere noluerit, hoc ipso magis est corripiendus.

In 4. parte, FERIA 4. hebdom. 16. Vbi de hoc expresse præcepto Domini: potestque Veritas conuenire Correptioni tam actiua quàm passiuæ. Id est, ut aque detur & acceptetur.

QVIA vero qui corripitur, timeret se contemni, tùm suggerenda hæc Veritas:

Aut amandus tui contemptus, & te contemnenti congaudendum: aut non amanda Charitas quæ congaudet Veritati.

In hac 2. parte, FERIA 6. hebdomada 3. post Pascha.

ATQVE vt modus seruetur in corripiendo, neque qui corripit inferiorem, audacius agat, opportunè occurrit quod ex crastina profertur FERIA: QVI AVDACIVS, &c.

QVOD si quis timet, ne sine sua etiam culpa, infensum sibi reddat quem corripit: tunc

Optabilius bonum bellum, quam mala pax.

In 3. parte. Sabbato hebdomada decima.

ETIAM SI aliquando non speretur fructus, tamen tentandum.

Opportunè importunè.

Sabbato hebdomada undecima.

PRO remittendis semper iniuriis.

Si semel sunt condonandæ iniuriæ, sunt semper condonandæ.

Vel nullas vmquam recte voles condonare, vel semper omnes condonare voles.

In 4. parte, FERIA 5. hebdomada 16.

Quidquid profers ne parcas aliis, contra te profers ne parcat tibi Deus.

In eadem 4. parte. Dominica 21. Vbi & alia his conformia.

Sicut pauci dimittunt suis debitoribus, ita & paucis sua dimittuntur debita.

In 3. parte, FERIA 6. hebdomada 6.



FERIA QVARTA.

CHRISTVS ADIVRATVS A CATPHA

PROFITETVR SE FILIVM DEI.

262 FERIA 4. infra Hebd. 3. Quadrag. Adiuro te per, &c.

Et princeps sacerdotum ait illi: adiuro te per Deum
vini, ut dicas nobis, si tu es Christus Filius
Dei; dixit illi Iesu, Tu dixisti. Matth. 26.

VERITAS PRACTICA.

Qui audaciùs loquitur inferiori, timidiùs Superiori
loquetur.

RATIO EST, Quia qui audaciùs inferiori loquitur, nimis se
timeri appetit.

Sed qui nimis timeri vult ab inferioribus, nimis & Superiorem
timet, & timidiùs illi loquitur.

Ergo qui audaciùs loquitur inferiori, timidiùs Superiori loquetur,
Quod licet in quibusdam casibus valere possit; in multis ta-
men damnosum est & cavendum.

L. PUNCTVM.

QVM ex falsis testimoniis contra Christum prolati, ni-
hil nisi falsum & inane concludi videret Cayphas ad
eius condemnationem; excogitavit malitiose hanc viam
eliciendæ ab eo veritatis: *Adiuro te, inquit, per Deum vini ut
dicas nobis, si tu es Christus Filius Dei.* Poterat Christus Domi-
nus non respondere, vel non nisi contemptim; & vt Supremus
Iudex poterat spectare Caypham tamquam inferiorem, & ipsum
iudicare vt arrogantem & iniquum. Poterat vero etiam ipsum
met considerare vt suum superiorem, & tamquam homo circum-
datus infirmitatibus poterat timidiorem se præbere, & vereri
quod accidit, si se manifestaret prout iuebatur, ne inde Aduer-
sarij acciperent occasionem sui condemnandi.

Verùm siue ob reuerentiam Diuini Nominis quod interpo-
nebatur, siue ob Veritatis cultum, siue vt nos doceret neque au-
daciùs agere cum Inferioribus, neque timidiùs cum Superiori-
bus, sic sapienter respondit, vt nec inferiorem contemneret, nec
superiorem nimis timeret. *Tu dixisti, inquit, Verumtamen dica*

Qui audacius loquitur inferiori, timidius superiori loqu. 263

vobis amodo videbitis Filium hominis sedentem à dextris virtutis Dei, & venientem in nubibus cæli: Quasi diceret, ita est vt dicis, sum Filius Dei, sed quia nihil modo videtis quod sit conforme huic meæ dignitati, videbitis aliquando cùm tempus accepero; Nunc est tempus meæ abiectionis, tunc erit meæ clarificationis, & quem modo iudicatis, iudicij vestri Iudicem futurum expectate. Quo in loquendi modo, vides quàm modestus esset, & alienus ab omni fastu, quàmque simul erectus & constans contra pusillanimitatem & nimiam illam abiectionem qua plerumque solemus timidius agere cum superioribus & dissimulare veritatem, aut nimis seruiliter & abiectè cum illis procedere.

Sed neque arrogantius etiam, aut audacius cum inferioribus est agendum: nam ab vno extremo facilis est prolapsus in aliud.

Quamobrem vt in illo medio consistamus, quod à Christo Domino edocemur: hoc nobis certò persuadendum, *Quod qui audacius inferiori loquitur, hic timidius Superiori loquetur.* Eadem quippe est ratio vtriusque, à superbia; quisquis enim audacius loquitur, affectat authoritatem, præ se fert arrogantiam, & superbe nimis timeri vult. Vnde Sapiens; *Noli esse sicut leo in domo tua,* Ecclesi. 4. *euertens domesticos tuos, & opprimens subiectos tibi. VAE pastoribus* Ezech. 34. *Israel, dicit Dominus Deus, qui cum austeritate imperabatis & cum potentia. NEQUE vt dominantes in cleris, sed forma facti gregis* 1. Pet. 5. *ex animo. PATRES, nolite ad indignationem prouocare filios vestros, vt non pusillo animo fiant; ET vos Domini eadem facite illis,* Coloss. 3. *nempe seruis, remittentes minas, quia illorum & vester Dominus est* Ephes. 6. *in cælis, & personarum acceptio non est apud eum. Sic docebant Apostoli, sic imperabant. Qualem te in hoc genere præbes? qualem cum pauperibus, cum discipulis, cum seruis, cum implorantibus opeem tuam? Qui obturat aurem suam ad clamorem pauperis, & ipse clamabit, & non exaudietur.* Prou. 21.

II. P V N C T V M.

SED qui nimis timeri vult ab inferioribus, nimis etiam superiores. *timet, & timidius illis loquetur.*

Cur enim nimis timeri vult, dùm est superior, nisi quia timet contemptum, timet ne si non timeretur, contemneretur: At verò dum est inferior, timor hic tantò magis crescit, quantò

magis timere potest ne à superiore contemnatur, si libere & confidenter cum illo ageret; Contemnet forte intus superiorem, sed se extrà continebit, ne quid appareat quod ab eo non improbetur, & à quo proinde magis contemnatur; Imò & quò intus superiorem magis contemnet, minus extra quicquam audebit, ne animum suum patefaciat, aut suspicionem ullam moueat suæ superbix, quâ se apud illum infamaret; sicque tandem accidit vt non nili dissimulata vel seruili timiditate agat, quod vtrumque longè est damnosissimum & longissimè distans ab ea filiali & fidei subiectione quæ est reddenda superioribus.

Ephes. 6. Obediendum quidem Dominis carnalibus iubet Apostolus, *in timore & tremore*, sed qualis sit illè timor, explicat dum subiungit, *in simplicitate cordis vestri sicut Christo, non ad oculum seruientes quasi hominibus placentes, sed vt serui Christi, facientes voluntatem Dei ex animo cum bona voluntate seruientes sicut Domino & non hominibus.* Quod & ante breuius & planius declararat, *principes non sunt timori boni operis, sed mali: vis non timere potestatem? bonum fac, & habebis laudem ex illa.*

1. Pet. 2. Sic conformiter sanctus Petrus, *subiecti estote omni humane creatura propter Deum, siue Regi quasi præcellenti, siue Ducibus tamquam ab eo missis ad vindictam malefactorum, laudem vero bonorum, quia sic est Voluntas Dei vt beneficientes obmutescere faciatis imprudentium hominum ignorantiam, quasi liberi & non quasi velamen habentes malitiæ libertatem, sed sicut serui Dei.*

O viles alioquin eorum animas qui se ab illa libertate qua Christus nos liberauit, in miserandam abijciunt seruitutem, & ancillæ filij malunt esse quam liberæ.

Gal. 4.

III. PUNCTVM.

HINC ergo fit vt qui audaciùs loquitur inferiori, timidiùs etiam Superiori loquatur; Cum eadem ex radice superbia, tumor & timor nimius enascantur. Quod luculentè apparet in illo Nabal, qui iuxta suum nomen stultus erat, sic enim Scriptura de eo refert, quòd esset ita durus, vt nemo posset ei loqui, tum vero in eam timiditatem dilapsus est, vt auditis periculis in quæ inciderat contemnendo Dauidem, emortuum fuerit cor eius intrinsecus, & factus sit quasi lapis: ac tandem paulo post obiit. Quamobrem

Qui audacius loquitur inferiori, timidius superiori, &c. 265

obrem recte Sapiens, sic ab utroque extremo, per veram humilitatem & mansuetudinem nos reuocat: *Congregationi pauperum Eccles. 4. affabilem te facito, & Presbytero humilia animam tuam, & Magnato humilia caput tuum: declina pauperi sine tristitia aurem tuam, & redde debitum tuum, & responde illi pacifica in mansuetudine.*

In vera itaque non ficta humilitate temperamentum vtriusque extremi est positum, ipsa est enim quæ nimiam in inferiores Superiorum audaciam & fastum cohibet; Nam ut ait optime sanctus Gregorius, *præponunt sibi in animo ipsos plerumque quos corrigunt: meliores æstimant eos quoque quos indicant, quod videlicet agentes, & per disciplinam subditos & per humilitatem custodiunt semetipsos.* Idemque fusè in illa verba Iob: *si contempsi subire iudicium cum seruo meo & ancilla mea, cum disceptarent aduersum me. Quid enim faciam cum surrexerit ad iudicandum Deus, & cum quaeserit quid respondebo illi? numquid non in utero fecit me qui & illum operatus est?* Hom. 34. in Enang. Iob 31.

Ipsa etiam est humilitas quæ inferiores à vili & seruili subiectione liberat; est enim magnanimitatis species quæ quanto magis se vni Deo subiicit & hominibus propter Deum, eò minus inordinate timida est & abiecta. Falsa est autem alia quæuis & simulata humilitas contra quam optime Sapiens: *Attende ne seductus in stultitiam humilieris: Noli esse humilis in sapientia tua, ne humiliatus in stultitiam seducaris.* Et Psalter, regius: *Illic trepidauerunt timore ubi non erat timor; quoniam Deus dissipauit ossa eorum qui hominibus placent, confusi sunt quoniam Deus spreuit eos.* Eccles. 13. Ps. 52.

Proponet tibi iudicium extremum sicut Chriitus proposuit suo Iudici, & illic disces timere & audere, atque inter vtrumque temperatè loqui & agere. *Horrendum est incidere in manus Dei uiuentis.* Eò certe incides si nimis timeri appetis, aut si nimis timere pergis. *Præmaturum caue casum, Nam qui timet hominem, cito corrumpet.* Heb. 12. Pr. 29.

PRO EADEM FERIA QVADRAGESIMALI.

Ad Euangelium, de lauando corde potius quam manibus. Matth. 15.

266 FERIA 4. infra Hebd. 3. Quadrag. Adiuro te per, &c.

Tota est hebdomada decima quarta tertiæ partis per quinque consequentes Férias, in hoc declarando Euangelio. Quibus quæ ad munditiam cordis, ibi valde commendatam, spectant, hæc possunt aliunde adjici.

Qui diligit cordis munditiam, habebit amicum Regem.

In 1. parte, In festo S. Ioannis Euangelista, ex Prov. 22.

Nisi quod monet Sapiens, omni custodia serues cor tuum, non omnino seruas.

In 1. parte, FERIA 4. hebdomada 4. post Epiphaniam.

Hæc sponsæ Christi fides est, ut sicut neminem præter Christum velit diligere, ita velit à nullo diligi.

In 1. parte, Sabbato hebdom. 6. post Epiphaniam.

Qui nimis suos diligit, non satis diligit.

In 2. parte, FERIA 3. hebdomada sanctæ.

Sæpe videtur esse Charitas, & est magis carnalitas.

In 2. parte, FERIA 4. hebdomada 1. post Pascha.

Beati mundo corde.

In 3. parte, Sabbato hebdomada 3.

Quò minus Concupiscentiæ mortificabis, eò magis à Concupiscentia mortificaberis.

In 3. parte, FERIA 4. hebdomada 5.

Major est voluptas, voluptatem nolle quam velle: voluptatem reliquisse quam cæpisse.

In 3. parte, in fine ubi de votis religiosis.

In 4. vero parte, vide hebdomadam 16. ubi de Infantia spirituali: Et Dominicam 17. ubi de Cupiditate refrananda, quæ proximè sequenti FERIA possunt etiam competere.



FERIA QUINTA.
CHRISTVS TOTA NOCTE, APVD
PONTIFICEM, INIVRIIS EXPONITVR.

Tunc expuerunt in faciem eius, & colaphis eum ceciderunt, alij autem palmas in faciem eius dederunt, dicentes; prophetiza nobis Christe, quis est qui te percussit. Matth. 26.

VERITAS PRACTICA.

Ceteræ pugnant Virtutes, sola vincit Perseuerantia.

RATIO EST, quia sola illa vincit Virtus, cæteris pugnantibus quæ sola finem imponit operi.

Sed sola Perseuerantia finem imponit operi.

Ergo illa est quæ sola vincit; ac proinde quantumcumque pugnent virtutes, nisi constanter perseueres vsque ad finem, nihil obtinebis.

I. PUNCTVM.

STATIM atque Christus se Filium Dei professus est, tùm Princeps Sacerdotum, scidit vestimenta sua dicens; blasphemauit, quid adhuc egemus testibus; ecce nunc auditis blasphemiam? quid vobis videtur? At illi respondentes dixerunt, reus est mortis; Tunc expuerunt in faciem eius, & quæ supra memorantur, audent in eum.

Qualis libertas & audacia, siue seruorum absque vlllo iussu, siue Pontificum ita iubentium aut dissimulantium contra Christum Iesum. Sic modo etiam homines tam libere in Deum peccant.

Act. 8.

quàm si nullus esset Deus, aut nulla iustitia. Etenim, ut ait Sapiens, quia non profertur cito contra malos sententia, absque tunc more villo, filij hominum perpetrant mala.

Luce. 22.

Et verò cum multa eaque grauissima per totam noctem patitur Dominus, tum ad hæc quinque capita reuocari possunt; Primum, iudicatur reus & blasphemus; Secundum, ut talis conspuitur in faciem; Tertium, colaphis & alapis cæditur ab vnoquoque; Quartum, velantur eius oculi ut diuinet à quo sit percussus; Quintum, ignominiose propheta nuncupatur, & in opprobrium personæ, interrogant eum dicentes, *Propheta quis est qui te percussit? & alia multa blasphemantes dicebant in eum* ut refert sanctus Lucas.

Ps. 102.

Quæ patientia Domini! qualis benignitas! quanta constantia, sic per totam noctem absque villo verbo, aut vel modico impatientiæ tædiue signo, ad eorum nutum inter tot contumelias perseuerantem conituisse! Vere longanimis, verè patiens Dominus.

2. Ioan. 1.

Hoc est scilicet quod nos docere volebat contra inordinatum illum cordis & linguæ impetum quo ex diuturnitate laborum & difficultate suscepti operis abripimur in impatientiam, & ex impatientia cedimus ignominiose aduersis, ac velut ignaui milites de statione deiectioni abiicimus clypeum, & quidquid meriti patiundo consecuti eramus, totum vno momento, defectione nostra deperdimus. Videte vosmetipsos, aiebat sanctus Ioannes, ne perdatis quæ operati estis, sed ut mercedem plenam accipiatis. Omnis qui credit & non permanet in doctrina Christi, Deum non habet. Cætera scilicet virtutes pugnant; sola vero vincit perseuerantia; Nam sola illa vincit quæ inchoato finem imponit operi, quod alioquin mancum & imperfectum esset nisi ad finem vsque perduceretur. Vnde apte Sapiens; In fine hominis denudatio operis illius: Quasi dicat, multa quidem homo inchoat, sed in fine ipsius videbitur qualia fuerint eius opera, si videlicet ea perfecerit & absoluerit. Vel sic interpretare: Multa quidem operatur homo in vita, sed vnum præcipue habet opus, ad quod cætera omnia reuocari debent, nempe salutem animæ, & perfectionem in sua vocatione, hoc autem opus nisi ex aliis quæ illi deferuiunt, denudari non potest, neque manifestari nisi in fine ipsius hominis, quia donec viuit, laborat quidem & pugnat, sed an laborem expleuerit & in pugna vicerit, id ex solo fine agnoscitur: Et quantumcum-

Ecclesi. 11.

que pugnent virtutes, sola illa vincet quæ sola finem imponet.
O quam vere dictum: *Non queruntur in Christianis initia sed finis.* S. Hier. Ep. 16. ad Fulgentium.
Paulus male capit, sed bene finiuit. Iuda laudantur exordia, sed finis proditione damnatur.

II. PUNCTVM.

SED sola perseverantia finem imponit operi.

Sic omnino aptè ad rem nostram sanctus Augustinus, aut quivis alius author Sermone ad fratres de Eremitico. *O Fratres mei, non tadeat incipere magna, nec fastidiat tenere inchoata, scientes quod perseverantia informat meritum, colorat boni propositum, remunerat currentem, coronat pugnantem, ducit ad brauium, conducit cunctos ad portum. Hæc est tunica talaris sancti Ioseph usque ad finem contingens. Hæc est tunica sacerdotalis usque ad pedes perueniens. Hæc est cauda hostia quam tenemur reddere Deo, & offerre. Hæc est calcaneum bonæ operationis quod contra serpentis morsum debemus observare. Hæc est virtus qua Deum ligat. Hæc est qua omne bonum informat. Hæc est perseverantia qua laureantur martyres, qua virgines coronantur, qua Sacerdotes sublimantur, & Confessores.*

Sic coherentè sanctus Bernardus, prorsus absque perseverantia, nec qui pugnat, victoriam; nec palmam victor consequitur; vigor virium, virtutum consummatio est, nutrix ad meritum, mediatrix ad premium. Soror est patientia, constantia filia, amica pacis, amicitiarum nodus, vnanimitatis vinculum, propugnaculum sanctitatis. Tolle perseverantiam, nec obsequium mercedem habet, nec beneficium gratia, nec laudem fortitudo; Denique non qui caperit, sed qui perseveraverit usque in finem, hic saluus erit.

III. PUNCTVM.

SIC ergo ceteræ pugnant virtutes, sola vincit perseverantia.

Quod iisdem pene verbis, eodemque plane sensu retulit Petrus Blesensis, pius & gravis author; *Omnes quidem virtutes currunt ad brauium, sed una perseverantia coronatur.* Epist. 22.

Quo de argumento cum pleni sint sacri Codices & sanctorum Patrum monimenta, tum illud ex eodem sermone S. Augustini supra relato, consideratione dignissimum: *Bonum inchoare & malo* Serm. 8. ad

270 FERIA 5. infra Hebd. 3. Quadrag. Prophetisa Chrifte, &c.

Fr. in Ere-
mo.

fine concludere, quid aliud est quàm monstruosas res conficere. Illa enim actio quasi Chimera est, qua initium habet à ratione, sed finem à sensualitate: cum enim sic agitur, humano capiti cervicem pictor equinam iungit, & superimponit instructuosas plumas.

Ecclesi. 5.

Audi ergo Sapientem: Non ventiles te in omnem ventum, & non eas in omnem viam, sic enim omnis peccator probatur in duplici lingua. Esto firmus in via Domini, & in veritate sensus tui, & scientia: & prosequatur te verbum pacis & iustitia.

Quæ ut in praxim distinctius redigas, discce hæc à Christo tria. Primum, cum posset se liberare his omnibus malis, nulla usus potestate perinde tolerat omnia, sicut si nihil posset. Secundum, cum saltem queri aut deprecari posset tot iniurias, ne verbum quidem profert. Tertium, cum eos punire posset, adeo non malum pro malo reddit, ut è contra non cesset eos mouere ad cognitionem sui, unde dicuntur vel maxime velasse eius faciem, quod inde promicantes quosdam radios quibus illustrabantur, aduerterent; & forte postea quidam eorum conuersi sunt & saluati. Deus patientia & solatiij, ait Apostolus, det vobis id ipsum sapere in alterutrum, secundum Iesum Christum. O verè Deus patientiæ! sed non solatiij, nisi iis qui eius patientiam pro viribus imitentur!

Rom. 15.

PRO EADEM FERIA QVADRAGESIMALI.

Ad Euangelium, de Socru Petri febricitante, sanata à Christo Domino. Luc. 4.

Febris animi, animo longè periculosior, quàm febris corporis, corpori.

In 1. parte, FERIA 5. hebdomadae, 2. post Epiphaniam, Vbi Euangelica narratio refertur, & ex Dino Ambrosio, febris animi dicitur esse omnis Cupiditas, de qua proinde quotquot sparsim habentur Veritates Practicæ, possent huc, cum delectu tamen, transferri: Qualis hæc inter alias:

In leui quidem cupiditate, pars aliqua nostri cordis detrahitur: In graui vero, totum cor Deo perit.

In 4. parte, Dominica 17.

QVOD autem sanata mulier, continuo surgens, Christo ac Eius discipulis ministraret, veram indicat Gratitude[m], quæ accepta dona in Donantis vsum refert, quæ quàm rara sit, declarat hæc Veritas:

Vere paucorum est, vera Gratitude.

In 3. parte, Dominica 13.

DENIQUE quod à multis exirent Dæmonia quæ Christum confiterentur, quorum tamen confessionem Christus nollet: vetaretque de se loqui, non alienum foret quod de gravitate peccati docetur ex illius Viri sancti sensu:

Qui maluit liber peccato, possideri à Dæmone, quàm leui cum peccato, liberare possessos.

In hac 2. parte, Sabbato hebdomada 3. post Pascha.



FERIA SEXTA.
CHRISTVS NEGANTEM
SE PETRVM BENIGNE RESPICIT.

Conuersus Dominus respexit Petrum. Luc. 22.

VERITAS PRACTICA.

Læsi amoris ira, quò est suauior, eò est potentior.

RATIO EST, Quia potentior illa est læsi amoris ira, quæ lædentem verius læso subicit.

Sed quo est talis ira suauior, eo verius lædentem læso subicit.

Ergo læsi amoris ira quo est suauior, eò est potentior; ac proinde exemplo Christi exercenda.

I. PUNCTVM.

- D**E Petro iam dixerant Euangelistae quod captum à Iudæis Dominum, sequebatur à longe usque in atrium principis Sacerdotum, & modò sedebat cum ministris vt videret finem, modò cum illis stantibus stabat & calefaciebat se. Tum verò dum interrogaretur Dominus à Pontifice, aut à Iudæis irridere-
Matth. 26. retur, vt visum est, *accessit ad eum vna ancilla dicens, Et tu cum Iesu Galilaeo eras; At ille negauit coram omnibus, dicens, nescio quid dicis. Excunte autem illo ianuam, vidit eum alia ancilla, & ait iis qui erant ibi, & hic erat cum Iesu Nazareno; & iterum negauit cum iuramento, quia non noui hominem. Et post pusillum, accesserunt qui stabant, & dixerunt Petro, Verè & tu ex illis es, nam & loquela tua te manifestum facit; Addidit vnus ex seruis Pontificis, cognatus eius cuius Petrus abscidit auriculam, nonne te vidi in horto cum illo?*
Ioan. 18. *Iterum ergo Petrus negauit, & tunc capit detestari, anathematizare & iurare quia nescio hominem istum quem dicitis: & continuo, adhuc illo loquente cantauit gallus. Et conuersus Dominus respexit Petrum.*
Luc. 22. *Et recordatus est Petrus Verbi Domini, sicut dixerat, quia priusquam gallus cantet, ter me negabis. Et egressus foras Petrus flevit amarè.*

Hic est miserandus Petri lapsus! hæc est deploranda humanæ infirmitatis miseria! hoc pauendum, ad omnem sæculorum memoriam, inconstantis exemplum animi, de quò suprà est Veritas, *Qui se existimat stare, videat ne cadat.* Est vero etiam luculentum pœnitentis exemplum animi, siue quod statim vt est aspectus discipulus à Domino, resipuit: siue quod resipiscens flevit amare; seu denique quod nunquam flendi peccati modum & terminum posuerit, nisi cum vita.

Fer. 6. post
Domin. Se-
pentag.

In primis autem est admiranda summa illa Benignitas & Clementia, qua Iesus vsus est erga suum discipulum. Statim enim vt lapsus est, conuersus ad eum Dominus tam suavi & potenti suo illum aspectu prorsus erexit, vt à Petri peccato ad Christi gratiam, solum illud intercesserit moræ, quo Petrus peccauit.

O diuinam læsi amoris iram! O suauissimam iræ diuinæ potentiam! Non est dubium quin Christi amor in Petrum valde læsus fuerit Petri peccato, nec alienum à Christo fuerit, cogitare quantum inde Christus moueri & irasci potuerit: at vide etiam
 atque

atque etiam quàm suauis fuerit illa ira & quam potens in sua suauitate, simulque discere si quando lædaris ab amico, sic suauiter esse irascendum vt eum efficaciter tibi reconcilies. Sic enim vniuersim loquendo; *Læsi amoris ira quò est suauior, eò est potentior.* Quod certe mirum & ad praxim admodum vtile.

Vt autem facilius intelligatur, tria præsupponenda sunt. Primum hic agi de iusta & temperata ira iuxta illud Psalmi, *irascimini, & nolite peccare*: vt cum amans ab amato læsus irascitur. Secundū est, talem iram excitari & permitti ad remedium illato malo inferendum. Tertium denique, tunc potentiorē dici & esse iram, quando, citra culpā omnem, remedium efficacius afferretur. Quibus ita præsuppositis, iā facile est intelligi quod dicitur in prima propositione, illam esse potentiorē læsi amoris iram quæ lædentem læso subiciat: nam sic remedium læso amori si quod afferri potest, offertur: satis enim esse debet offenso, si se offendentem, sibi subiectum habeat: Neque enim ipsi Reges aut Duces quotquot sibi magnanimitatis nomen fecerunt, aliud expetiuerē quam vt hostem sibi substratum cernerent: quia & ipse Leo generositatis Symbolum nihil aliud in præda quærere dicitur, Vnde est illud Poëtæ, *Corpora magnanimo satis est prostrasse* Ouid. 1. de Trist. *Leoni. Pugna suum finem, cum iacet hostis, habet.* Quod itaque effrata gentes, & quod ipsæ feræ admittunt, possetne Christianus recusare?

II. PUNCTVM.

SED quò est talis ira suauior, eò verius lædentem læso subicit. Sic aperte Sapiens in Prouerbiis, & Apostolus in Epistola ad Romanos, postquam dixerunt cibandum inimicum si esurierit, & sitienti potum ministrandum, statim addunt, *hoc enim faciens, prunas seu carbones ignis congeres super caput eius*; id est, vt interpretantur quidam; sic facies eius ardebit eo sanguine quem pudor ad maxillas euocat, non secus atque si supra caput carbones congeris, qui faciem inflammarent. Quomodo enim ille non pudeat qui videt tam liberalem atque ingenuum animum à se fuisse offensus, à quo pro iniuria, tale recepit beneficium? Vel vt exponunt alij, Carbones ignis congeruntur à persona læsa in caput lædentis, quando illa ignescebat quidem aliquo ira.

De Catech.
ruid.

motu, sed caritate & beneuolentia sic temperauit iram, vt omnis asperitas in suauitatem versa sit, nec aliter se vindicarit quam nouis beneficiis se lædentem cumulando; tunc enim is mirum in modum inflammatur ad amandum; nam vt ait sanctus Augustinus, *Nimis durus est animus qui si amorem nescit impendere, nolit rependere.* Nonne emollesceres ad tantam suauitatem si tibi exhiberetur?

III. PUNCTVM.

Ps. 134.

Osce. ix.

Ezech. 16.

Luc. 10.

Rom. 12.

S. Bas. hom.
11. de pa-
tientia.

LÆSI amoris ira sic ergo quò est suauior eò est potentior: quod manifeste patuit in illa Christi Saluatoris ira, si fas est iram dicere, summam illam tristitiam quam habuit de lapsu Petri, quæ quidem ira vel tristitia quàm suauis fuit in eo respiciendo, tam potens fuit in eo reuocando. *Fulgura in pluuiam fecit.* Quo certe facto, nihil ira, nihil tristitia poterat prætereundum opportunius, cum sic læso amori reparata magis fuerit iniuria, & allatum malo remedium longe efficacius, quam si à lapsu peccati lapsus esset in infernum. Hi sunt videlicet funiculi Adam, hæc vincula Charitatis quibus nos ad se trahit! Nonne sic tecum sæpius egit cum toties in se peccantem sua te bonitate attraxit miserans tui? *Transiens per te, vidi te conculcari in sanguine tuo; & dixi tibi, cum esses in sanguine tuo, Viue, dixi inquam tibi, Viue.* O bonitatem! o patientiam! sed quid ei propterea reddes, *Vade & tu fac similiter.* Imitare hoc exemplum. *Noli vinci à malo, sed vince in bono malum:* Nec putes à te nimis peti, cum id pagani fecerint. Sic sanctus Basilius de quodam refert ad confusionem nostram: *Euclydi quidam mortem minatus est ac iurauit se eum occisurum: at ille contra iurauit se eum placaturum, ac ne animo in se hostili sit, esset eum.*

PRO EADEM FERIA QVADRAGESIMALI.

Ad Euangelium, de Samaritana. Ioan. 4.

TOTA in hoc est hebdomada vndecima tertiæ partis, vbi quæ possent etiam aliunde repeti, suis indicantur locis.

Qui ruinâ gaudet inimici, ruinam eius in se trahit. 275



S A B B A T O.
DE IVD A PRODITORE, MISER-
RIME PEREVNTE.
ET DE MIRO CHRISTI SILENTIO,
CIRCA HVIVS INTERITVM.

*Tunc videns Iudas qui eum tradidit, quod damna-
tus esset, pœnitentia ductus, retulit triginta ar-
genteos principibus sacerdotum, & senioribus,
dicens; peccavi tradens sanguinem iustum. At
illi dixerunt, quid ad nos, tu videris; & proie-
ctis argenteis in templo, recessit, & abiens laqueos
se suspendit. Matth. 27.*

VERITAS PRACTICA.

Qui ruinâ gaudet inimici, ruinam eius in se trahit.

*RATIO EST, Quia gaudium de ruina inimici, species est cu-
iusdam vindictæ.*

Sed hæc vindicta trahit in se pœnam & ruinam inimici.

*Ergo qui ruina gaudet inimici, ruinam eius in se trahit; quod certe
est præcauendum tum ratione culpæ, tum ratione pœnæ simul
iunctæ.*

P V N C T V M.

IAMETSI miser hic Traditor in desperationem & la-
queum se non proiecerit, nisi cum adductus ad Pilatum
Dominus, petitus ad mortem aut etiam condemnatus

Mm. ij

fuit; tamen hic aptius de funesto eius interitu videtur instituen-
da consideratio, ne sequentis hebdomadæ Myſteria, quæ alium
habent ab iſta finem, interrumpantur, & qui plerumque accidit
inordinatus cordis & linguæ motus in aduerſis contra inimicos,
exemplo Chriſti Domini, diſcatur reprimendus.

Sic ergo eſt, vt refert Euangelista: Miſerum proditorem con-
ſcientia patrati facinoris diu ferre non potuit; pœnitet eum ſui,
fatetur publicè crimen, ſed desperat veniam; cùmque ſe ab ipſa
luce conſpici confunderetur, tenebras quærit; atque in ipſis te-
nebris cùm nec à terra portari aut aërem ſpirare poſſet, *laqueo ſe
ſuſpenderit, & ſuſpenſus crepuit medius, & diſfuſa ſunt omnia viſcera
eius. Et notum factum eſt omnibus habitantibus Ieruſalem, vt eſt in
Actis Apoſtolorum.*

En quò recidunt tandem inordinati appetitus! nam licet om-
nium peccatorum finis non ſit ita funeſtus, eſt tamen iſti plerum-
que affinis in eo quod à minimis ſolent incipere, ſicque in peius
ſemper delabuntur, vt vix vñquam emergant. *A ſcintilla vna au-
getur ignis*, inquit Sapiens: & apte Propheta, *Va qui trahitis ini-
quitatem in funiculis vanitatis, & quaſi vinculum plauſtri, peccatum.*

Eſt vero quidam inordinatus animi motus quo ex morte ſeu
ruina inimicorum exultare ſolemus ſiue in vindictam, ſiue in in-
tegritatis aut iuris noſtri iactationem, ſiue ob alium denique
peruerſum finem, qui corrigendus eſt exemplo Chriſti Domini.
Cum enim optime ſciret horrendum hunc ſui proditoris interitum,
iamque per ciuitatem diuulgaretur, antequam cruci affi-
xus eſſet, nonne commode poterat inde teſtimonium ſuæ inno-
centiæ deriuare? Nonne ſimilem ſuis inimicis comminari mor-
tem? Nonne multum inde ſermonem habere? Poterat ſane, ſed
filere maluit vt nos in ſimili caſu doceret quod iam ante dixerat
Sapiens: *Cum ceciderit inimicus tuus, ne gaudeas: & in ruina eius ne
exultet cor tuum, ne forte videat Dominus & diſpliceat, & auferat ab
eo iram ſuam.* Quibus ex verbis hæc eruta Veritas valde eſt conſi-
deranda, *Quod quiſquis ruinâ gaudet inimici, ruinâ eius in ſe trahit.*

Nam certum eſt hæc gaudium ordinariè naſci ex appetitu
vindictæ. Poſſet forte aliquando in ſanctis proficiſci ex Zelo di-
uinæ gloriæ, vt appareat eius Iuſtitia, & vt impij terreantur; *La-
tabitur iuſtus*, inquit Pſalter, *cum viderit vindictam, manus ſuas la-
uabit in ſanguine peccatoris, & dicet homo, ſi utique eſt fructus iuſto.*

otique est Deus iudicans eos in terra. Sed quis sibi præsumat de tali Zelo? quis potius sibi de se non diffidat, & suspectum habeat tale gaudium? Lugendus esset & morte propria redimendus ille casus, & tu exultas? talis exultatio maligna est, vindictam sapit & odium cordis fouet, denique aduersatur Charitati, *que non querit qua sua sunt, nec gaudet super iniquitate.* Nam ut est alibi declaratum: **G A V D E R E** super iniquitate, plerumque est iniquius, quam ipsam iniquitatem admittere.

1. Cor. 3.

Feria 5.
hebd. 3. post
Pascha.

II. P V N C T V M.

SED hac vindicta trahit in se pœnam & ruinam inimici. Nam Deus ordinarie omnem vindictam sic vlciscitur ut pari aut simili pœna vindicantem se, vindicet. Sic enim aperte Sapiens: *Qui vindicari vult, à Domino inueniet vindictam, & peccata illius seruans seruabit.* Et cum toties sibi vindictam & ultionem referuandam testatur Deus in Scripturis, de omni vindictæ modo ac specie id intelligendum est, ne forte putes te indemnem quod tu ipse non vlciscaris; Nam gaudere de ruina & vindicta, grauius esse potest quam si tu ipse vindictam sumeres. Potest enim Iudex aut tu ipse per Iudicem legitime queri, & pœnas iniuriæ reposcere, sed in pœnis illatis non potest ipse iudex aut alius quispiam gaudere, quatenus pœnæ sunt & malum hominis qui condemnatur; unde patet istud gaudium ipsa vindicta peius esse.

Ecclesi. 28.

Quod si ex iustitia reddita Iudex gaudere potest, tali tamen gaudio iungendus esset moeror de malo proximi quod nunquam per se est amandum, nec de eo proinde exultandum. *Heu consolabor super hostibus meis, & vindicabor de inimicis meis:* ait 1s. 1. ipse Deus supremus iudex; Cum vindictam in hostes parat, illam dolentis vocem præmittit, *heu*, ut significet se dolere de vindicta sumenda; Tu vero non timebis exultare: aut exultans non timebis eius vindictam! Tam certa tamen est, quam certò constat eum qui se vindicat, sic à Domino vindicari. Te ipsum vindica de te ipso, qui quoties peccasti, te læsisti, *Nam qui faciunt peccatum & iniquitatem, hostes sunt anima sua.* Tob. 12.

TIL PUNCTVM.

QVIS QVIS igitur ruina gaudet inimici, ruinam eius in se trahit, id est, vindictam & perditionem: Nam si putas inimicum hic à Deo punitum esse propter iniuriam & offensam tibi illatam, cur non putabis te puniendum, cum non minus pecces in Deum & in proximum? In Deum quidem patet, quod assumas eius imperium, & contra ac expresse vetuit, vlcisci audeas, aut ultione illata gaudeas, quod æque vetat ac aliud. Deinde vero in proximum peccas, quod eius malis gaudeas, quod est directe contra charitatem & ab ea longissime charitate quæ reddit bonum pro malo. Vnde conclude quàm sis æque puniendus ac ille de cuius poena gaudes, ac proinde quam verè eius ruinam in te conuertas.

- Iob 31.* Sic se Iob puniendum fatebatur, *Si gaudis sum, inquit, ad ruinam eius qui me oderat, & exultavi quod inuenisset eum malum, non enim dedi ad peccandum guttur meum, ut expeterem maledicens animam eius.* Miserum te & miserandum omni modo, qui cum posses Deo, proximo, & tibi plurimum in hoc casu gratificari, *Ecclesi. 14.* Deum offendis, proximum lædis, & tibi valde nocet! *Qui sibi nequam est, cui alij bonus erit?* Aduerte anima & cum ex his tribus vel vnum sufficeret seorsim consideratū, ut te contineres, quanto *2. Reg. 1.* magis cum tria simul concurrunt ad hunc finem? *Montes Gelboe, nec ros, nec pluvia veniant super vos, quia ibi abiectus est clypeus fortium, clypeus Saul, quasi non esset unctus oleo!* Sic & pluribus, David de Inimici ruina non exultabat, sed dolebat.

PRO EADEM FERIA QVADRAGESIMALI.

Ad Euangelium, de Muliere adultera. Ioan. 8.

Videri debet in 4. parte, Feria 2. hebdomadæ 19.



DOMINICA IV. QVADRAGESIMÆ.

De quinque panibus multiplicatis, &c. Ioan. 6.

VERITATES PRACTICÆ.

Sequebatur eum multitudo magna.

Et quidem tanto affectu, vt omnes omnia sua desererent, nec repetere cogitarent, nec manducare, nec viuere, dùm soli Iesu quem sequebantur, adhererent. Sic plane:

Qui non renuntiat omnibus, non potest esse Christi discipulus.

In 1. parte, Feria 3. hebdom. 6. post Epiphaniam.

QVO & referri duæ istæ possunt.

Esse discipulum Christi, & iam non esse suum, vnum & idem est.

Numquam magis eris tuus, quàm cùm totus eris Christi.

In 4. parte, Feria 3. & 4. hebdomade 24.

ACCEPIT ergo Iesus panes, &c.

Si vis quod non habes, da quod habes.

In 1. parte, Dominica 2. post Epiphaniam.

PRO accessu ad Sacram mensam in hac panum multiplicatione figuratam:

280 Dominica 4. Quadrag. Iesus ne Rex fieret, &c.

Quod præsertim spectat Christus, non est quid ad se afferas, sed quid à te auferas.

In 3. parte, Feria 3. hebdomada 13. Plura vide in duabus primis hebdomadibus eiusdem partis.

DISTRIBUIT discumbentibus quantum volebant.

Non quod times, timendum est, ne tibi desit Deus: sed ne tu desis Deo.

In 3. parte, Dominica 6.

NUMQUAM homini magis aut melius prospicitur, quàm cum homo magis Deo quàm sibi prospicit.

In 1. parte, die 6. Decembris, licet aliis terminis exprimat Veritas, idem est sensus, eademque ratio.

IESVS ergo cum cognouisset quia venturi essent, ut raperent eum, & facerent Regem, fugit iterum in montem ipse solus.

Qui sectatur honores mundi quos fugit Christus, à Christo fugit ad mundum.

HÆC Veritas nullibi proposita sic videtur declaranda, & paulo attentius expendenda.

RATIO est, quia fugere à Christo ad mundum, nihil aliud est quàm se magis conformare mundo quàm Christo.

Sed qui sectatur honores mundi quos fugit Christus, magis se mundo conformat quàm Christo.

Ergo à Christo fugit ad mundum; Quod quàm sit turpe & damnosum, quis non videt?

I. PUNCTVM.



RATITVDO quidem exhibenda est Christo Domino, & Rex ille tuus agnoscendus, sed numquam melius agnosces, quàm si cum eo mundi gloriam & honores fugias. *Regnum enim* Ioan. 18. *eius non est de hoc mundo.* Quod si è contra, mundi honores consecraris quos fugit Christus, transfuga Christi factus, à Christo fugis ad mundum. O probrum, sed tamen necessariò ferendum si quod fugit Christus, insequeris.

Quid est enim fugere à Christo ad mundum, nisi desertis iis quæ sunt Christi, sectari ea quæ sunt mundi? Et licet in hac desertione sint varij gradus, atque alij aliis sint grauiore, satis tamen est & plusquam satis vt dicaris ab eo deficere, si tu eius discipulus, tu eius assecla, tu qui profiteris eum sequi & imitari, magis te affectu & effectu conformes mundo quam Christo. Cum enim mundus sit ei oppositus, quisquis se mundo conformat, à Christo necesse est vt se disiungat. Nam si ipse dixit, *qui non est* Luc. 17. *mecum contra me est, & qui non colligit mecum, dispergit,* certe qui Domin. 3. *est cum mundo, non est cum illo;* Quid restat igitur quàm vt Quadrage. *fit contra ipsum, vt supra visum est.* Si autem contra ipsum, nonne & Christi desertor, nonne & transfuga dicendus erit? *Vos de deorsum estis, ego de supernis sum; Vos de mundo hoc estis, ego non* Ioan. 8. *sum de hoc mundo.* Velleſne hoc ipsum tibi diceret quod Iudæis Christus?

II. PUNCTVM.

SED qui sectatur honores mundi, quos fugit Christus, magis se conformat mundo, quàm Christo.

Ne putes hic agi de honore regio quem fugit Christus, sed de omni vano & mundano qualis ab hominibus ordinariè exhibetur, & qualis à te inordinatè appetitur. In hoc autem præcipuè Christus Dominus se à mundo differre ostendit, vt contra ac mundi leges ferunt, ipse ac sui potius contenderent de inferiori loco quam de primo. Nonne iam id toties considerasti? nonne meministi cum facta esset contentio inter discipulos, *Quis*

282 Dominica 4. Quadragesima. Iesus ne Rex fieret, &c.

Luc. 22. eorum videretur esse maior, tūc dixit eis Iesus; Reges gentium dominantur eorum, & qui potestatem habent super eos, benefici vocantur; VOS AUTEM NON SIC, sed qui maior est in vobis fiat sicut iunior, & qui praeceptor est sicut ministrator. Nam quis maior est qui recumbit, an qui ministrat? Nonne qui recumbit? Ego autem in medio vestrum sum sicut qui ministrat. Quod & ipsum ante dixe-

Matth. 26. rat, ex alia occasione, pene iisdem verbis: scitis quia principes gentium dominantur eorum, & qui maiores sunt, potestatem exercent in eos. Non ita erit inter vos, sed quicumque voluerit inter vos maior fieri, sit vester minister: & qui voluerit inter vos primus esse, erit vester seruus: sicut filius hominis non venit ministrari sed ministrare.

Quid clarius & apertius? Vnde Apostolus tam saepe & potenter: si adhuc hominibus placerem, Christi seruus non essem. MIHI absit gloriari nisi in cruce Domini nostri Iesu Christi per quem mihi mundus crucifixus est, & ego mundo. NVNC incipio Christi esse discipulus, aiebat sanctus Martyr Ignatius, nihil de his qua videntur desiderans, ut Iesum Christum inueniam. Tibi ē contra dicendum: Nunc desino Christi esse discipulus, illa desiderans quæ videntur, ut mundum inueniam & mundanus fiam.

III. PUNCTVM.

QVIS QVIS ergo sectatur honores mundi, quos fugit Christus, à Christo fugit ad mundum, Quia per illos honores aut illorum appetitum, mundo se conformat in ea parte viuendi in qua præcipue se suosque à mundo discrepare, & verbo & exemplo tam clarè docuit Christus, ut nihil toto in Euangelio sit clarius, & qui aliud sentiat, dicatur *palpare in meridie*: ut declaratur in 4. parte, Feria 3. hebdomadæ decimæ nonæ.

Iam vero cogita quale sit illud; *transfugam & desertorem esse Christi?* melius esset si numquam eius fuisses, quam sic illum deferere. Si enim, ut ait sanctus Petrus, *refugientes coinquinationes mundi in cognitione Domini nostri & saluatoris Iesu Christi, his rursus implicati superantur: facta sunt eis posteriora deteriora prioribus: melius enim erat illis non cognoscere viam iustitiæ, quàm post agnitionē, retrorsum conuerti ab eo quod illis traditum est sancto mandato.*

Ioan. 6. NVN QVID & vos vultis abire, dicebat Christus suis, quando eorum quidam abierunt retro, & iam non cum illo ambulabant?

Qui sectatur homines mundi quos fugit Christus, &c. 283

At vero Petrus, Domine ad quem ibimus, verba vite aeterna habes, & nos credimus & cognouimus quia tu es Christus filius Dei. Hoc si credis & profiteris, credes quidquid Christus dixit, nec enim Filius Dei falsum potest dicere, hoc autem dixit, *Mundus me odit*. ^{Ibid. 7.} Credisne hoc? Velle ne vero Christum odisse? Aut te ergo mundo renuntiare oportet, aut Christo non credere, aut Christum habere odio, Quod vel audire nefas est. *Trium tibi datur 2. Reg. 24.* optio, *Elige vnum quod volueris.*



HAC HEBDOMADE, considerandum venit, quidquid Christus Dominus passus est, ex quo deductus fuit à Iudæis ad Pilatum, vsque ad eius condemnationem.

Veritatum finis præcipuus hic erit, vt discamus à Christo ferre constanter opprobria, in omni quidem occasione, sed in sex præsertim casibus, qui ab vnoquoque mysterio passionis eruuntur.

FERIA SECVNDA.

CHRISTVS PILATO A IVDÆIS PRÆSENTATVS, ET ACCVSATVS.

Caperunt illum accusare, dicentes, hunc inuenimus subuertentem gentem nostram, & prohibentem tributa dare Cesari, & dicentem se Christum Regem esse. Luc. 23.

VERITAS PRACTICA.

Qui sibi innocenti factam iniuriam nimis dolet, suæ ipse innocentiae iniuriam facit.

Na ij

284 FERIA 2. infra Hebd. 4. Quadrag. Hunc inuenimus, &c.

RATIO EST, Quia suæ innocentiae iniuriam facit, qui se eius fructu & meritis priuat.

Sed qui sibi innocenti factam iniuriam nimis dolet, se suæ innocentiae fructu & meritis priuat.

Ergo & is suæ ipse innocentiae iniuriam facit. Quod certe iniuriosum est & cauendum.

I. PUNCTVM.

Math. 27. **M**ANE facto, ait sanctus Euangelista, consilium inierunt omnes principes Sacerdotum & seniores populi aduersus Iesum, ut eum morti traderent. Quale consilium! Et vinctum adduxerunt eum, & tradiderunt Pontio Pilato Praefidi. Quale spectaculum propositum illi ciuitati in qua non ita pridem tam gloriose triumpharat! Quis concursus, quis sensus populi, cum maxime sic à principibus sacerdotum & senioribus Christus traderetur & accusaretur! Vide ut alij obstupescunt, audi ut alij fremunt, & ut omnes vnanimi consensu in eum insurgunt! Sic pia quædam ex singulis circumstantiis reflexio fieri posset. Legi verò debent quæ de hac apud Pilatum accusatione fusius referuntur ab Euangelistis, vnde illud primum ad praxim reuocandum est, quod spectat calumnias & iniurias famæ ac nomini nostro ab inimicis illatas, exemplo Christi Domini constanter ferendas. Et quia hoc maxime vnumquemque cruciat quod ficta & falsa imponantur, hoc imprimis etiam vnicuique sciendum & attente considerandum est, Quod qui sibi innocenti calumniam impositam aut iniuriam quouis modo factam nimis dolet & queritur, suæ ipse innocentiae iniuriam facit.

Ratio est euidentissima, quia qui se vltro priuat suæ innocentiae fructu & meritis non potest non dici, sibi suæque innocentiae magnam inferre iniuriam. Quid est enim iniuria, & quod est eius damnum, nisi quædam iniusta detractio & sublatio boni alicuius, quod vel honorem spectet vel corporis aut vitæ commoda? vnde tu si tibi bonum iniuste detrahis quod ab innocentia tua consequi poteras, nonne tu tibi perinde nocet & iniuriam facis ac si alius quouis bonum illud detraheret? Cur enim tibi putas iniuriam ab eo fieri, nisi quia, ut dictum est, tibi bonum tuum,

bonum nomen, bonam famam, bonam sanitatis vel rei domesticæ commoditatem contra ius fasque detrahit? At tu si eandem in te iniustitiam committis, quid est quod non tibi & innocentiae tuæ iniuriam ex æquo inferas? An forte quia tua res est, quia tua est innocentia: tu de illa detrahere, & te illius privare bonis & meritis tibi licitum credis? Erras, & erroris tui gravitatem quæ infra patebit clarius, sic damnauit Sapiens: *Fili, in Ecclesi. 10. mansuetudine serua animam tuam, & da illi honorem secundum meritum suum, Peccantem in animam suam quis iustificabit? quis honorabit ex honorantem animam suam?* Itemque paulo post: *Qui sibi* ^{ibid. 14.} *nequam est, cui alij bonus erit? & non iucundabitur in bonis suis, qui sibi inuidet nihil est illo nequius, & hac redditio malitiæ illius. Audisne nequitiam? Audis malitiam?*

II. PUNCTVM.

SED qui sibi innocenti, calumniam aut aliam illatam iniuriam nimis dolet & queritur, se sua innocentia fructu & meritis priuat.

Hic est enim innocentiae læsæ fructus, hoc eius meritum, ut gaudium afferat & honorem coram Deo & hominibus, ingentemque bonorum spiritualium & coelestium in omnem æternitatem, cumulum augeat; siue ex similitudine Christi patientis, siue ex conscientiae testimonio, siue ex patientiae solatio, siue ex ipsa Dei bonitate & prouidentia qui protector est & pater innocentium: quæ certe quanta sint bona & commoda quis non videret? *Hac est enim gratia si propter Dei conscientiam sustinet quis tribulationes, patiens iniuste. Quæ enim est gloria si peccantes & colaphisati suffertis? Sed si benefacientes patienter sustinetis, hac est gratia apud Deum: In hoc enim vocati estis quia & Christus passus est pro nobis.* ^{1. Pet. 2.}

At vero qui nimis dolet & queritur de illatis sibi iniuriis, se priuat iis bonis; quia non eam habet similitudinem cum Christo patiente, quæ gaudium affert & gloriam; non illud conscientiae testimonium quo innocentes recreantur, non illud denique in terris gratiæ aut in coelis gloriæ meritum quod soli virtuti redditur. Neque enim sufficit ad meritum si innocens patiaris, nisi patientiam iungas innocentiae, nam innocentia impatiens desinit esse innocentia quæ est expers totius vitij: & qui nolens inuitusque patitur, tam longe est à vera virtute, quàm verum est nul-

1. Pet. 5. lam esse virtutem ubi nulla voluntas, & nulla pietas. Non coacte
 Ecclesi. 2. sed spontanee secundum Deum. VAE dissolutis corde qui non credunt
 Jer. 46. Deo, & ideo non protegentur ab eo. CASTIGABO te in iudicio ne:
 quasi innocenti parcam tibi. Poteratne apertius tibi loqui?

III. PUNCTVM.

QVI sibi ergo innocenti factam iniuriam nimis dolet, sua ipse in-
 nocentiae iniuriam facit; Bonum enim subtrahit quod af-
 ferret innocentia si nimis non doleret innocens; Nam ubi est ni-
 mietas, Virtus deest quae in medio sistit; Vbi autem Virtus
 deest, quid gratiae & meriti colligas? At nonne hoc innocentiae
 probrum est & iniuria, si eam suo priuare fructu & merito? Cur non
 recogitas dicens, cui laboro & fraudo animam meam bonis? Cur te
 tui non miseret, dum gemendo factam iniuriam, grauiorem tibi
 facis? Miserere anima tua placens Deo, & contine: Congrega cor-
 tuum in sanctitate eius, & tristitiam longe repelle à te, multos enim
 occidit tristitia, & non est utilitas in illa.

Certe quando hac sola esset ratio quam affert Sapiens ad re-
 pellendam tristitiam, quod nulla sit eius utilitas, satis esset se-
 dando animo: sed cum praeterea tot sint incommoda & detri-
 menta quae à tali tristitia longè latequè dimanant, quis nisi
 vecors & propè insanus se ab illa non expediat? Et quia putas
 tanto id tibi magis licitum flere quanto magis innocens pateris,
 Vide quàm grauiter erres & pecces, non modo te priuando tuis
 bonis spiritualibus, quod per se graue est, & non ferendum; sed
 ipsam incusando Diuinam Prouidentiam, quod te innocentem
 permittat pati, quasi soli Rei & Nocentes paterentur in hoc
 mundo!

Duplex hic error: & quod putes te ita innocentem, vt non
 merito debeas aliquid pati; & quod licet esses innocens, non
 credas Deum permittere aliquando vt innocentes affligantur:
 Contra verò vtrumque sic Dominus apud Prophetam: *Ecce qui-
 bus non erat iudicium vt biberent calicem, bibentes bibent: & tu quasi
 innocens relinquèris; Non eris innocens, sed bibens bibes.*

1. Licet itaque sis innocens quâ parte iniuriam ab hominibus
 accipis, aliunde tamen cum sis peccator, sic vtrumque iunge ad
 patientiam vt & cum Dauide dicas, *perambulabam in innocentia*

Qui sibi innocenti factam iniuriam nimis dolet, &c. 287

*cordis mei, in medio domus meæ: Et cum Propheta: Iram Domini Mich. 7.
portabo, quia peccavi ei.*

PRO EADEM FERIA QVADRAGESIMALI.

*Ad Euangelium, de eiectione à Templo Vindicatoribus
& Nummulariis. Ioan. 2.*

VIDE quæ ad idem prope Euangelium superius produ-
cta sunt, Feria 3. hebdomadæ primæ Quadragesimæ, unde huc
etiam aptius propter flagellum quo hic expresse dicitur Domi-
nus eiecisse vendentes, transferri potest hæc Veritas, quæ habe-
tur in 1. parte, Feria 2. hebdomadæ sextæ post Epiphaniam:

Quantò minùs murmuramus, aut quanto magis tace-
mus flagellati à Deo, tantò altius altissimum eius
Dominium prædicamus.

Huic adiungi possunt sequentes.

Nisi te subdas Deo, Deum tibi subdis.

In 1. parte, Die 12. Ianuarij.


Nisi probè paratus sis ad aduersa, nec ad ipsa prospera
benè paratus es.

In 1. parte, Feria 6. hebdomadæ 5. post Epiphaniam.

Cui nimis adhuc durum videtur pati pro Christo, ni-
mis etiam durum videtur, amare Christum.

In 1. parte, Dominica 4. Adventus, Vbi & alia plures eiusmodi.

Huc porro tota spectat hebdomada 2. Quadragesimæ, & pro-
ximè sequens, quæ dicitur Passionis.



FERIA TERTIA.

CHRISTVS AB HERODE SPRETVS.

Spreuit autem illum Herodes cum exercitu suo, & illudit indutum veste alba. Luc. 23.

VERITAS PRACTICA.

Quem pro Christo sperni pudet, Christi pudet.


RATIO EST, Quia illum Christi pudet qui prae pudore rejicit quæ Christus docuit, quæ libens tulit, & quæ ferenda voluit suo exemplo.

Sed quem pro Christo sperni pudet, prae pudore rejicit quæ Christus libens tulit, & quæ ferenda voluit suo exemplo.

Ergo quem sperni pudet, Christi pudet: Quod certe est omni opprobrio probrosius.

I. PUNCTVM.

Luc. 23.



VM Iudæi accusantes Christum, mentionem fecissent de Galilæa quæ erat regio à Iudæa diuisa, Pilatus audito hoc nomine interrogauit si homo Galilæus esset, & ut cognouit quod de Herodis potestate esset, remisit eum ad Herodem qui & ipse Ierosolymis erat illis diebus.

Eò igitur adducitur Christus ligatus & stipatus satellitio publico, velut reus; Cogita quali cum ignominia, quali cum pudore & verecundia! Herodes autem viso Iesu gauisus est valde, erat enim cupiens ex multo tempore videre eum, eo quod audierat multa de eo, & sperabat signum aliquod videre ab eo fieri. Hæc curiositas nihil faulti portendit. Interrogabat autem eum multis sermonibus: At ipse nihil illi respondebat.

Quid

Quid non poterat hic dicere & facere Christus? quantam sui admirationem & venerationem conciliaffet, si vel vnum miraculum facere voluisset? *At ipse nihil illi respondebat! Stabant autem Principes Sacerdotum & Scribae constanter accusantes eum.* Accusationes istae quantumlibet acres & constantes sic insulsae & nullae visae sunt Herodi ut noluerit Christum tamquam reum condemnare; sed cum vidisset eum nec sibi nec accusatoribus ullo modo respondentem, condemnauit ut insanum & nihili hominem. *Spreuit autem eum Herodes cum exercitu suo, ait sacer textus, & illius indutum veste alba, & remisit ad Pilatum.*

Quanta fuerit haec illusio, quam stupendum illud, Sapientiam Dei velut stultitiam reputari, & quam excelso animo tale probum pertulerit Christus, ut si quando affine opprobrium in aliquo ingenij vel animi tui defectu esset ferendum, statueret exemplum constantiae & magnitudinis in eo perferendo, tu ipse fusius tecum perpende. Certe nisi hinc proficias, expauenda est Veritas quae inde elicitur, Aut enim te oportet cum Christo laetum & constantem simile probum pati, si casus ferat; aut si te sperni pudet, Christi pudet. Possesne hoc ferre probum! sed vide quam necessario tibi cadat.

Cum certum sit ex Euangelio nonnullos erubescere Christum & illius pudere, nihil aliud esse hoc intelligitur quam pra pudore quodam rejicere, seu nonnisi inuitos & renitentes admittere quae Christus libens tulit, & quae idecirco tulit ut nos induceret suo exemplo ad illa ferenda. Sic intelligendus Apostolus vel cum ait *se non erubescere Euangelium*, vel cum suo Timotheo praecipit, *ne erubescat testimonium Domini nostri neque se vinctum eius.* Idem enim est ac si diceret, si forte contingat te irrideri, & contemni ab hominibus quod de Christo crucifixo loquaris, vel quod Pauli vincti & captiui doctrinam & institutionem profitearis, patere libenter haec probra; ne te propterea Christi nec mei pudeat; aut certe si naturalis quidam pudor sentitur, sic eum constanter sustine ut ne propterea desistas Christum praedicare, & me eius Apostolum tuumque Institutorem profiteri. Sic sanctus Petrus: *Nemo vestrum patiatur ut homicida, si autem ut Christianus, non erubescat; glorificet autem Deum in isto nomine:* Sic denique Christus Dominus cum dixit, *qui me erubuerit & meos sermones, hunc filius hominis erubescet.* O qui tum sensus, quae suspiria!

II. PUNCTVM.

SED quem pro Christo sperni pudet, prae pudore rejicit quæ Christus libens tulit, & quæ ferenda voluit suo exemplo.

De illo enim agitur quem ita pudet irrisum & contemptum ut grauius inde doleat, & propterea vel à bono quod inchoare delistat, vel se miserum putet, & queratur. Nam si solus esset pudoris sensus, nec se propterea quis ab inceptis remoueret, sed constans in bono persisteret, tunc Virtus esset non vitium: At verò cum quis vincitur illo pudore, & ita cedit probris ut cedat exercendæ Charitati, Humilitati, Deotioni, aut alij quam colebat Virtuti, hic est propriè quem pro Christo sperni pudet, & tùm manifestè reiicit quæ Christus tulit & quæ ferenda voluit suo exemplo, nempe hoc virtutis exercitium cum probro iunctum, nempe hæc opprobria propter Christianæ cultum Virtutis illata, nempe humana iudicia & verba quibus nihili reputatur & illuditur.

Hoc est enim quod Christus Dominus tulit, & quod idcirco tulit ut nos suo animaret exemplo, suoque illo confirmaret documento quo dixit, *Non est discipulus super magistrum, nec seruus super Dominum suum, sufficit discipulo ut sic sicut Magister eius, & seruo sicut Dominus eius. Si patrem familias Beelzebuth vocauerunt, quanto magis domesticos eius?* Adde, quod si pater familias tam libenter probra tulit pro suis domesticis; quanto magis domestici pro suo patrefamilias? Tunc apparet qui sint eius.

Math. 10.
Ioan. 13.
& 16.

III. PUNCTVM.

SIC igitur quem pro Christo sperni pudet, Christi pudet; Quia videlicet eorum pudet quæ Christus fecit & docuit, quod est erubescere Christum & Euangelium, quod est ipsum contemnere Christum Dominum, quasi non recte fecerit & docuerit, quasi non sit rectum & gloriosum quod docuit, quasi non satis multa fecerit & passus sit, ut me hoc doceret vel moueret ad praxim. Quare à Domino cur tale probum sustinere voluit ab Herode, respondebit profecto se propterea sustinuisse ut te suo instrueret exemplo ad simile quidpiam tolerandum, si quod tibi

contingeret, seque ita iudicasse hoc tam potens esse motuum
ut licet alioquin difficile sit homini probum ferre, tamen pro-
pter istud exemplum quod edidit, difficultas omnis sit perum-
penda. Iam vero si te interroget Christus cur non utaris hoc
exemplo, cur non ad imitationem Domini tui, libentius patia-
ris te sperni; quid respondebis nisi quod non putas hoc sufficere
ad te permouendum, non sentis te inde satis excitari nec per-
suaderi; quidquid egerit quidquid passus sit contra appetitum
naturalem, plus tamen semper valere appetitum tuum, quam
quod fecit & passus est; & idcirco te non posse ipsum imitari.

Hoc certe vnum est quod respondere possis si verè velis re-
pondere, aut quidquid dicas, hoc vnum actio & vita tua lo-
quitur. Hoc autem ita Christo respondere & loqui quid est
aliud quam ipsum spernere? Nam vel reuera credis non esse suf-
ficiens hoc Christi exemplum, ad te permouendum: vel non cre-
dis quod dicis, & fateris esse sufficiens. Alterutrum è duobus fa-
tearis oportet: si primum, manifeste contempnis & condemnas
eius iudicium quo iudicauit satis se facere ad te excitandum; er-
rauit si non erras. Quod si alterum producis, te nempe non dif-
fiteri satis esse factum, & plusquam satis à Domino; Quæro abs
te, cur ergo non idem præstas, cur dicis te non inde satis esse
permotum, cur denique nihil apud te valet eius exemplum?
Quid respondere poteris nisi quod siue sit satis validum, siue
non; nihil cures & mouearis, quia sensus & mundus contrà re-
pugnant, quibus magis defers quam Christo? At porro quid est
Christum contemnere, nisi hoc sit? *Et vos inhonorastis me!*

Ioan. 8.

Et certe, si attentius considerare velis cur Herodes cum suo
exercitu, curque modo etiam mundus spernat Christum, videbis
te eadem prorsus de causa contemnere eius exemplum. Quid est
quod mouit Herodem contra Christum? Quid est quod munda-
nos excitat ad repudianda illa quæ sunt Christi, nisi apparen-
tia illa exterior quæ est contraria humanis sensibus & communi
ac vlitato modo agendi inter homines? At nonne illud est
vnde te pudet? si enim quod obicitur tibi probum, tantum
à pueris, ab infans, aut simili hominum genere objiceretur, nec
propterea desineres esse in existimatione & honore apud proba-
tos quosque viros, nonne iam cessaret & probum & pudor?
Quod ergo te illa commouent, inde est, quia honesti contrà

homines sentiunt; contra mundus repugnat, & sensus humanus; Ac proinde concludas necesse est, te non minus contemnere Christum hoc infami pudore quàm ipse mundus suis aliis contemnendi modis, licet apertiores forte sint & magis expressi.

Pf. 21.

Omnes videntes me, deriserunt me, locuti sunt labiis, & moverunt caput. Nemo de bona sui opinione velit quidquam derratum: de Christo malit potius ut male cogitetur, quàm de se.

1. Cor. 3.

O humanæ mentis peruerfitatem! Quàm recte monet Apostolus; Nemo se seducat, si quis videtur inter vos sapiens esse in hoc saeculo, stultus sit ut sit Sapiens: sapientia enim huius mundi stultitia est apud Deum: scriptum est enim, comprehendam sapientes in astutia eorum; & iterum, Dominus novit cogitationes sapientium quoniam vana sunt: nemo itaque gloriatur in hominibus.

PRO EADEM FERIA QVADRAGESIMALI.

Ad Euangelium, Iam die festo mediante ascendit Iesus in templum, & docebat. Ioan. 7.

VERITATES PRACTICÆ.

Mea doctrina non est mea.

Nulla re homo quantumvis gloriosa, gloriari potest.

In 1. parte, FERIA 3. hebdomada 2. in Aduentu: Vbi & alia similes.

Interrogatus quid primum in præceptis Christianæ religionis obseruandum, quid secundum, quid tertium? Responde, Humilitatem.

In 4. parte, FERIA 6. hebdomada 16.

SI quis voluerit voluntatem eius facere, cognoscet de doctrina.

Si non agis quod velit Deus, hoc vnum infame

Quem pro Christo sperni pudet, Christi pudet. 293

habes quod respondeas: Nolo, non placet.

In 4. parte, Feria 5. hebdomadae 18.

Quod intellectus confert actioni, hoc actio refert intellectui.

In 2. parte, Feria 2. Pentecostes, Vbi quàm aptè ad Christi verba de facienda Dei voluntate, ad cognoscendum & plenius intelligendum, hac Veritas referatur, patet explicatum.

NOLITE iudicare secundum faciem; sed iustum iudicium iudicate.

Apparet quàm sis ipse iudicandus, qui de rebus ut apparent, iudicas.

In 4. parte, Feria 6. hebdomadae 18.

Mendaces filij hominum in stateris, si res non pendunt Cœli pretio.

In 3. parte, Die 21. Iunij.



FERIA QVARTA. CHRISTVS BARRABÆ COMPA- RATIVS, ET POSTPOSITVS.

Congregatis illis dixit Pilatus, quem vultis dimit-
tam vobis, Barrabam, an Iesum qui dicitur
Christus?


Quem vultis vobis de duobus dimitti? At illi di-
xerunt, Barrabam. Matth. 27.

VERITAS PRACTICA.

Quò quis inferior est in ordine hominum, eò superior est in Christi ordine.

RATIO EST, Quia quò quis inferior est in ordine hominum, eò propius accedit ad Christum, qui est postremus illius ordinis. Sed quò quis propius accedit ad Christum, eò est superior seu maior in ordine, ubi Christus est primus, & qui Christi dicitur. Ergo quò quis inferior est in ordine hominum, eò superior & maior est in Christi ordine, qui quantò est præferendus alteri ordini, tantò expedit ex postremis huius esse, ut sis ex primis Christi Domini.

I. PUNCTVM.

 *Q*UOD singuli Euangelistæ referunt de hac ignominiosa Comparatione, sic in vnum contextum digeri potest, cui considerando conformes affectus applicentur. Pilatus autem conuocatis principibus sacerdotum & magistratibus, & plebe, dixit ad illos; Obtulistis mihi hunc hominem quasi auertentem populum, & ecce ego coram vobis interrogans, nullam causam inuenio in homine isto, ex his in quibus eum accusatis: sed neque Herodes, nam remisit vos ad illum, & ecce nihil dignum morte actum est ei: emendatum ergo illum dimittam.

Matth. 27.

Joan. 18.

Marc. 15.

Per diem autem solemnem consueuerat præses populo dimittere vnum vinctum quem voluissent, habebat autem tunc vinctum insignem qui dicebatur Barrabas; qui erat latro, & qui in seditione fecerat homicidium. Congregatis ergo illis dixit Pilatus; Quem vultis dimittam vobis? Barrabam, an Iesum qui dicitur Christus? Sciebat enim quod per inuidiam tradidissent eum. Principes autem sacerdotum & seniores persuaferunt populis ut peterent Barrabam, Iesum verò perderent. Respondens autem præses ait illis, Quem vultis vobis de duobus dimitti? At illi dixerunt, Barrabam. Dicit illis Pilatus, quid igitur faciam de Iesu qui dicitur Christus? Dicunt omnes, crucifigatur; Ait illis præses, quid enim mali fecit? at illi magis clamabant dicentes,

Quò quis inferior est in ordine hominum, eò superior, &c. 295

crucifigatur. Pilatus autem volens populo satisfacere, dimisit illis Marc. 15.
Barrabam.

Hæc ad verbum Euangelistæ, vbi expende quod quando sola fuisset comparatio cum tali viro qui erat insignissimus eorum qui tum victi erant, non poterat non esse ignominiosissima Christo; quantò magis autem cum illi postpotitus est & indignior iudicatus cui gratia præstaretur! ô humana Iudicia! ô quam longè *Math. 10.* à diuinis remota! *Erunt primi nouissimi, & nouissimi primi.* Vere hoc vsurpari potest, quando agitur de præferentia inter homines: nam qui secundum æstimationem humanam & mundanam sunt primi, secundum diuinam & æternam sunt nouissimi; vt è contra, qui sunt nouissimi secundum mundum, sunt primi secundum Deum.

Quod vt melius intelligas, & accuratius propositam hic Veritatem expendas, propone tibi ob oculos mentis, omnes homines sic vno singulatim ordine incedentes, vt qui eundo erunt primi, redeundo sint postremi. Sit vero ille hominum ordo ita confectus, vt eundo vnusquisque tantum præcedat aliis quantum habet ambitionis & mundanæ cupiditatis. Huius ordinis primus & veluti Moderator esto ille rebellis Angelus, *qui similis voluit esse Altissimo, & qui propterea, Rex super vniuersos filios superbia dicitur.* Postremus autem Ille erit, *qui cum in forma Dei esset non rapinam arbitratus est esse se aequalem Deo, sed semetipsum exinanivit, vt non tantum esset homo, sed & inter omnes abiectus, despectus, & nouissimus virorum.* Hic est igitur ordo secundum mundum, prout hic intelligitur in quo ne mireris poni Christum, cum supponamus omnes homines eo comprehendi.

Verùm iam, pro reditu, concipiamus hunc ipsum ordinem ita conuersum, vt qui postremi erant, fiant primi; sitque ordinis ductor Christus, ac proinde ordo Christi vocetur. Profecto hinc apertissimè patebit Veritas, vt quò quis inferior est in ordine hominum, eò sit superior seu maior in Christi ordine: Quia quod est primo expendendum, quò quis est inferior in ordine hominum, eò propius ad Christum accedat necesse est, quod Christus sit huius ordinis vltimus, ac proinde quo quis est posterior, eum contingat propius. Nonne est ita? quid clarius? Vnde ergo cæcitas illa qua nolumus ex postremis esse, cum nihil sit amabilius quam prope Christum esse, etiamsi nihil aliud

296 Feria 4. infra Hebd. 4. Quadrag. *Quem vultis vobis, &c.*
conciperemus quam istam propinquitatem? Responde & erubescere.

II. PUNCTVM.

SED quò quis propius accedit ad Christum, eò est maior & superior in ipsius Christi ordine.

Nam cum Christus sit sui ordinis primus, quis non videt eò quemque aliis priorem seu superiorem esse, quò prius illum sequitur? *Dic ut sedeat hi duo filij mei, vnus ad dexteram tuam, & vnus ad sinistram in regno tuo.* Nempe intelligebat illa Mater, quæ sic Christo Domino loquebatur, tum filios suos fore aliis superiores quò ei propius adhærerent. Hinc Christus Dominus: *Si quis mihi ministrat, me sequatur: & vbi sum ego, illic & minister meus erit. Si quis mihi ministrauerit, honorificabit eum Pater meus,* illo scilicet honore, vt quò mihi ministrat fidelius, mihi accedat propius; & qui mihi propius accedat, eò aliis gloriosius antecedit.

O auidum gloriæ pectus quò anhelas & fatigaris? Cur non ad Christum curris, vbi est vera gloria? Non dolet Christus, quod quæras gloriam; sed quod eam quæras, *quæ ab hominibus datur, non quæ à solo Deo est.*

III. PUNCTVM.

QUO quis igitur erit abiectior in hoc mundo, si suam abiectiōnem amet, & quo quis erit inferior in ordine hominum, si contemptum suum Christiane ferat, eò erit maior & gloriosior in Christi ordine; cùm sic ad Christum propius accedat, & in illo accessu sit tota gloria. Hoc egregie figuratum in antiquis illis Patribus quorum natu minores prælati sunt suis maioribus fratribus. Sic Isaac maior Ismaele factus est: sic Iacob maior fratre suo Esau; sic Ioseph maior Rubeno: & Ephraim maior Manasse: sic Dauid & alij in Scriptura memorantur ex inferioribus superiores euasisse, vt qui erant nouissimi, fuerint primi.

Hoc vero est quod apertissimè Christus Dominus in persona *parvulorum* docuit, quos ad se venire iussit, quos amplexus est, & miris modis sibi coniunctissimos declarauit, ac tandem edixit eum fore maiorem in regno & in ordine suo, qui esset virtute & animo,


animo, quod hi pueri erant ætate. Sic ipse Christus non aliter ascendisse dicitur quam quia descendit. *Quod ascendit*, inquit Apostolus, *quid est nisi quia & descendit, primum in inferiores partes* Eph. s. 4. *terra.* Itemque alibi: *Eum autem, qui modico quàm Angeli mi-* Hebr. 2. *noratus est, videmus Iesum propter passionem mortis, gloria & honore coronatum.* Sic beatissima Virgo prius se ancillam dixit quàm esset mater, vt esset prima post Christum quæ se postremam fecerat. Sic sanctus Ioannes Baptista, priusquàm diceretur maior inter homines, se infimum dixit, & indignum qui vilius exhiberet officium Christo; *Non sum dignus*, inquebat, *sol-* Luc. 3. *vere corrigiam calceamentorum eius.*

Sic à primo ad vltimum, aut potius ab vltimo ad primum, agnosces ordinem gloriæ & honoris, vt quò quis se sponte demiserit, aut se aliunde humiliatum voluerit, eo magis exaltatus & sublimatus fuerit. *Gloriam præcedit humilitas*, ait Sapiens. Tu *Pr.* 15. ergo qui quæris gloriam, quomodo non amas humilitatem, aut si humilitatem amas, quomodo fugis humiliationem, in qua vnà probatur vera humilitas? Non sic Christus, non sic; qui se omnium infimo posthabitu vidit! *Beatus qui ubique te ducem habet* *Serm.* 22. *Domine Iesu, non illum refugam spiritum qui statim ascendere voluit,* *de Asc.* *Dom.* *& tota Diuinitatis dextera percussus est.* Nos autem populus tuus & oues pascuæ tuæ, sequamur te, per te, ad te, quia tu es Via, Veritas, & Vita: *Via in exemplo, Veritas in promisso, Vita in premio.* Sic aprè. sanctus Bernardus.

PRO EADEM FERIA QVADRAGESIMALI.

Ad Euangelium, de Cæco nato. Ioan. 9.

VIDE in 4. parte, hebdomadam vicefimam, quæ tota de illo est per singulas Férias.



FERIA QVINTA. CHRISTVS FLAGELLATVS.

298 FERIA 5. infra Hebdomada 4. Quadragesima. Tunc apprehendit, &c.
Tunc apprehendit Pilatus Iesum, & flagellavit.
Ioan. 19.

VERITAS PRACTICA.

Quæ duo Infidelem à Christo auocant, dolor & ignominia; Fidelem ad Christum vocant.

SENSVS EST, Quod sicut Infideli nihil videtur miserius quàm ignominia simul & pœna, quæ in Christo præsertim apparent, & à quo proinde Ille auocatur: Sic fideli Christiano nihil est beatius quàm illa duo, propter quæ idcirco magis Christo adheret.

RATIO est, quia propterea infideli nihil his miserius videtur quòd de rebus indicet per rationes humanas, secundum quas ita indicatur.

Sed fidelis Christianus non ita de rebus indicat, sed potius per rationes æternas, secundum quas nihil est beatius quàm ignominia & pœna fortiter tolerata.

Ergo sicut Infideli nihil illis miserius, sic fideli Christiano nihil beatius; & sicut ille inde à Christo recedit longius, sic idcirco fidelis accedit propius.

I. PUNCTVM.

Luc. 23.



VM, vt ait sanctus Lucas, Iudæi instarent contra Christum, vocibus magnis postulantes vt crucifigeretur, & inualescerent voces eorum: Pilatus nondum quidem propterea contra conscientiam voluit innocentem damnare morte, sed contra omne ius damnauit virgis; Si enim est innocens, cur flagellabitur? Sic videlicet multi nollent eum lethaliter offendere, sed in leuioribus quas putant, culpis, non verentur. Tunc
Ioan. 19. ergo, inquit sanctus Ioannes, apprehendit Pilatus Iesum, & flagellavit. Id est, iussit flagellari, vel ipse primus flagellum impexit.

Cogita quàm crudele simul & ignominiosum supplicium! denudatur Agnus ille mansuetissimus & castissimus coram turba procacissima; columnæ alligatur, parantur flagella cuiuscunque modi; Liſtoribus spondentur præmia, hominem vt dilanient; certatim in tenerrimum corpus contenditur; sanguis vndique defluit, venæ diffecantur, arteriæ comprimuntur, nerui franguntur, caro tota dissoluitur, ossa ipsa conteruntur, *Iam non est species ei neque decor, vt prædixit Isaias, & vidimus cum* *& non erat aspectus, & desiderauimus eum, virum dolorum & scientem infirmitatem! & quasi absconditus vultus eius, & despectus, vnde nec reputauimus eum. Et nos putauimus eum quasi leprosum, & percussum à Deo & humiliatum.* Hæc putatur iuisse intentio Pilati vt in miserrimum, qui effici posset, statum conjiceretur quo satiari possent Iudæi, & retardari ne ultra pergerent ad petendam eius mortem. Sic ergo factum est vt iussit præses, quidquid humana & diabolica industria cogitari & fieri potuit ad dilacerandum corpus, cogita in id totum esse conflatum, & recogita quousque tandem crudelitatis deuentum sit!

Quis verò tum boni Iesu animus, quæ cogitationes, quæ patientia! quæ magnanimitas, quæ de te intentiones! Nempe te in mente tum habebat, tua peccata expiabat, tibi remedia & exemplum parabat, vt si quando incideret similis casus ignominia cum poena coniuncta, disceres quo animo sufferenda. Habeto illi gratiam & pete lumen ad hanc eminentissimam totius Christianæ perfectionis Veritatem, quæ tibi nunc proponitur clarius ac clarius cognoscendam: *Quæ duo scilicet, infidelem à Christo auocant, dolor & ignominia, quibus nihil miseriùs reputat infidelis: illa ipsa duo Fidelem ad Christum magis vocant, quibus nihil beatius & optabilius credit Christianus.*

Quid est enim cur Infidelis ita iudicet? nempe quia iudicat secundum faciem, secundum apparentiam externam, secundum sensum naturalem, secundum rationes humanas, secundum præsentem vitam, in qua consideratione non est dubium quin talis status sit omnium miserrimus, quia nihil est quod magis aduersetur carni & sanguini, quæ est regula iudicii quod infidelis & carnalis format de rebus huius mundi, sicut ait sanctus Augustinus: *In homine carnali tota regula intelligendi, est consuetudo cernendi.* Sed *va qui dicitis malum bonum, & bonum malum, ponentes*

Serm. 147.
de Temp.

1f. 5. tenebras lucem, & lucem tenebras: ponentes amarum in dulce, & dulce in amarum. Nonne tu sic in multis iudicas?

II. PUNCTVM.

SED fidelis Christianus de rebus non ita iudicat, sed potius per rationes Evangelicas & aternas à Christo Domino institutas, secundum quas nihil gratius quàm ita pati.

2. Cor. 4. Non contemplantibus nobis quæ videntur, inquit Apostolus, postquam dixit, in omnibus tribulationem patimur sed non angustiamur: aporiamur, sed non destituimur: persecutionem patimur, sed non derelinquimur; humiliamur sed non confundimur: deicimur, sed non perimus: semper mortificationem Iesu Christi in corpore nostro circumferentes, ut & vita Iesu manifestetur in corporibus nostris; Et post pauca: propter quod non desicimus, sed licet is qui foris est noster homo corrumpatur, tamen is qui intus est renouatur de die in diem. Id enim quod in presenti est momentaneum & leue tribulationis nostra, supra modum in sublimitate, æternum gloria pondus operatur in nobis; non contemplantibus nobis quæ videntur. Quæ enim videntur temporalia sunt, quæ autem non videntur, æterna sunt. Scimus enim quod si terrestris domus nostra huius habitationis dissoluatur, quod ædificationem ex Deo habemus, domum non manufactam, æternam in cælis

Ex quibus verbis, tria habes ad rem nostram valde accommoda; primum qualis esset Christianorum vita, de omnibus enim loquitur Christianis viuentibus. Secundum, qualis eorum animus in tam misero viuendi genere, quàm fortis, quàm constans & alacer. Tertium denique est, vnde peteretur tanta constantia, nempe ex consideratione æternorum, quibus promerendis sicut nihil propius & aptius quàm poena & ignominia, sic istis doloribus constanter perferendis nihil potentius quam æternorū consideratio. Quisquis enim ex hac Æternorum consideratione res metitur, sic ratiocinatur & iudicat; Media participant rationem finis, & eò magis participant quò certiora sunt media: Atqui finis noster est beatitudo æterna, media autem quæ propius & certius attingunt illam finem, sunt ignominia & poena; ergo ipsa sunt beata: ergo nihil beatius quam in ipsis constantem esse. Sic aperte Christus Dominus & verbo & exemplo;

Beati qui persecutionem patiuntur, Beati cum maledixerint vobis ho- *Vide in 1*
mines. Nulla est pagina Euangelij quæ non id sonet; nulla *parte, in*
Christi Domini actio quæ non id confirmet. Et in his adhuc *festo sancti*
nutas, adhuc dubitas, adhuc te miserum dicis, vbi Euangelium *Andree.*
te beatum clamat! vbi est fides tua?

III. PUNCTVM.

SICVT ergo Infideli, qui res ex sensu tantum humano metitur,
nihil apparet miserius quam ignominia simul ac pœna, & proinde
à Christo retrahitur: sic è contra, fideli Christiano qui de rebus aliter
iudicat, ex regula scilicet æternorum, & ex Euangelio Christi, nihil
credit illis beatius, Quia beatos faciunt seu disponunt proxime ad
veram beatitudinem, quâ dispositione & statu nihil beatius in
terris æstimari potest, ac proinde tanto magis ad Christum at-
trahitur qui totus in illis est. Vnde enim pecunia, commoditates,
honor, voluptas, & alia quæ naturali appetitu concupiscuntur,
putantur esse bona, nisi quia beatos faciunt in hac vita? *Beatum Ps. 144*
dixerant populum cui hæc sunt. Cur non igitur meliori iure igno-
minia & pœna in bonis censebuntur, cum tam verè beatos faciant
quam verè vna est beatitudo æterna quæ inde certius compara-
tur? Si vere beata posset esse hæc vita, seu si beatitudo vera hic
esset, vera essent bona quæ beatam hanc vitam facerent: sed cum
nulla sit talis beatitudo, restat sola hic esse vere bona, quæ solum
veram beatitudinem, id est æternam & cœlestem attingunt, do-
nec ea perfruamur.

Si in hac vita tantum, inquit Apostolus, *in Christo sperantes su-*
mus, miserabiliores sumus omnibus hominibus; sed in æterna spes *1. Cor. 15.*
nostra lita est, vnde & Beatiores sumus. *Gloriamur in spe gloriæ* *fi. Rom. 5.*
lorum Dei, ait idem, *non solum autem, sed & gloriamur in tribu-*
lationibus, scientes quod tribulatio patientiam operatur, patientia au-
tem probationem, probatio vero spem; Quasi diceret, vt explicat
sanctus Bernardus, gloriamur in tribulatione sicut in ipsa gloria, *Serm. 17.*
quia in tribulatione spes gloriæ, imo & ipsa gloria continetur, *in Ps. 90.*
sicut spes fructus in semine, sic & ipse fructus in semine est. *Se-*
minatur in ignobilitate, surget in gloria: Vel si seminatur in glo- *2. Cor. 15.*
ria, surget in ignobilitate. *Mutauerunt gloriam suam!* *Ps. 105.*

PRO EADEM FERIA QVADRAGESIMALI.

*Ad Euangelium, de Adolescente mortuo suscitato
in Ciuitate Naim. Luc. 7.*

VIDERI debet Dominica 15. post Pentecosten, quæ est
prima quartæ partis, vbi hoc idem Euangelium proponitur, at-
que inde sex Veritates Practicæ colliguntur.



FERIA SEXTA.

CHRISTVS PER LVDIBRIVM,
REX ET HOMO DICTVS.

Ecce homo.

Ecce Rex vester. Ioan. 19.

VERITAS PRACTICA.

Sic prudenter cauendum, ne vituperetur Ministerium
tuum; vt si nimis id caues, non satis caueas.

RATIO EST, Quia non satis caues si cum offensione caueas.

Sed si nimis caues, non nisi cum offensione caues.

Ergo ne quid nimis, ne quid simul non satis sit: Ac proinde sic
cauendum ne vituperetur ministerium tuum, vt si nimis ca-
ues non satis caueas; & tu ipse magis illud vituperes.

I. PVNCTVM.

Math. 27.



LAGELLATIONEM hæc proxime secuta sunt,
quæ narrantur ab Euangelistis, Tunc milites præsidis sus-
cipientes Iesum in prætorium, congregauerunt ad eum

Sic prudenter cauendum ne vituperetur ministerium, &c. 303

in uniuersam cohortem, & exuentes eum, clamydem coxineam circumdederunt ei: & plectentes coronam de spinis, posuerunt supra caput eius, & arundinem in dextera eius: & genuflexo ante eum, illudebant ei dicentes: Ave Rex Iudeorum: & expuentes in eum, acceperunt arundinem, & percutiebant caput eius. Quæ quidem peracta sunt à militibus in prætorio, siue in interiori quadam domus parte, vnde ad se Pilatus Christum euocauit; Et exiens iterum foras dicit Iudeis: Ecce adduco vobis eum foras, vt cognoscatis quia nullam in eo inuenio causam. Exiuit ergo Iesus portans coronam spineam & purpureum vestimentum, & dicit eis: ECCE HOMO. Ac post multos vltro citroque sermones, qui à sancto Ioanne referuntur, iterum dicit eis, ECCE REX VESTER: Illi autem clamabant, Tolle tolle, crucifige eum. Dicit eis Pilatus, Regem vestrum crucifigam? Responderunt Pontifices, non habemus Regem nisi Casarem.

Ex quibus vides quantam in sua potissimum regali Dignitate Christus Dominus sit passus, ignominiam; & quale nobis exemplum dederit in simili opprobrio, si quod vnumquam contingat tolerando. Dicitur autem simile opprobrium quod Conditionis nostræ statum, seu Vocationem aut Officium, & Ministerium particulare spectat, qualis esset Superioris domus, Sacerdotis, Concionatoris, Confessarij, Religiosi, aut Laici, & cuiusvis Magistratus siue Dignitatis. Tum præcipue sensibilis est ignominia, & eò minus ferenda videtur quò minus personam nostram tangit quàm Statum siue Officium, in quo scilicet honorificè conseruando, ad gloriam Dei, & proximi ædificationem nobis laborandum esse putamus, Atque hinc fit vt dum de illato probro dolemus & nimis satagimus, nobis palpemus, quasi simus tantum solliciti de honorificando ministerio, cum reuera de honore aut alio commodò nostro magis angamur. Quamobrem attente tibi hæc consideranda Veritas; *Quod sic prudenter cauendum est ne vituperetur ministerium tuum, vt si nimis id caueas non satis caueas.* Non enim satis caues si cum offensione caueas, ac propterea expresse dicitur ab Apostolo, *Nemini dantes ullam offensionem, vt non vituperetur ministerium nostrum,* ad quod ita obligaris ex officio, vt non liceat tibi te infamare cum scandalo. *Nam oportet esse Operarium inconfusibilem, & ita irreprehensibilem* ne quod offendiculum ponas Euangelio, vel Diuinæ prouidentiae quæ per te regit alios, nisi per te oblit quo minus regantur. Obesset au-

Ioan. 19.

2. Cor. 6.

2. Tim. 2.

tem offensio quam illis daret propter quam minus facile regeretur. *Math 18. tur. Va mundo à scandalis. Va homini illi per quem scandalum venit. 1. Tim. 4. nit. EXEMPLVM esto fidelium. IN omnibus praebe te exemplum bonorum operum. Tit. 2.*

II. P V N C T V M.

SED si nimis caueres ne vituperetur ministerium tuum, non nisi cum offensione caueres.

Illud enim *nimis* significat excessum aliquem, quo impatientiam, superbiam, æmulationem, inuidiam, aut alium similem inordinatum affectum indicas, quo non minus offenduntur subditi, vel quiuis sæculares, quàm alio deprauato motu vel aperto vitio. *Eccles. 10. Nam odibilis est coram Deo & hominibus superbia: præcipuè vero in Sacerdotibus, in Prælati, aut Superioribus cuiuscumque ordinis, quibus exprobratur, Cur eleuamini super populum Domini? Num. 16. multum exigimini filij Levi. G L O R I A M corum in ignominiam commutabo: TESTIMONIUM perhibeo illis, quod æmulationem Dei Osee 4. habent, sed non secundum scientiam. Ignorantes enim iustitiam Dei, & suam quærentes statuere, iustitie Dei non sunt subiecti. Quæ Apostoli verba in hunc sensum commodè trahi possunt, vt si ex nimio illo affectu honorificandi ministerij tui, non possis vllum probum aut iniuriam pati, recte dicaris ignorare Iustitiam Dei, id est, Diuinam Prouidentiam, qua factum est vt probum aliquod tibi inferretur, tum ad salutem & perfectionem tuam, si patienter illud feras: tum ad aliorum ædificationem, quæ ex patientia tua & humilitate tua relucebit. Vnde idem Apostolus: 2. Cor. 1. siue tribulamur pro vestra exhortatione & salute: Et postquam dixit, nemini dantes vllam offensionem vt non vituperetur ministerium nostrum, statim adiungit, sed in omnibus exhibeamus nosmetipsos sicut Dei ministros in multa patientia, in tribulationibus, in necessitatibus, in angustiis, in plagis, in carceribus &c. per arma iustitie, à dextris & à sinistris, per gloriam & ignobilitatem, per infamiam & bonam famam, ut seductores & veraces: sicut qui ignoti & cogniti: Quo quidem in statu, sicut illi plurimum ædificabant & promouebant suos ad cultum Dei, sic plane tu tuis vitiis oppositis scandalizas & offendis si quos habes subditos vel spectatores tuæ superbiæ. *1. Tim. 7. Noli cibo tuo, noli superbia, noli impatientia**

Sic prudenter cauendum ne vituperetur ministerium, &c. 305
tinentia tua, illum perdere pro quo Christus mortuus est. Noli propter
eseam destruere opus Dei.

III. PUNCTVM.

SIC prudenter ergo tibi cauendum est, ne vituperetur ministe-
rium tuum, ut si nimis id caueas non satis caueas; & tu ipse il-
lud magis vituperes & probrosum reddas per nimiam illam sol-
licitudinem quæ mera est superbia seu ambitio, quàm si aliam
dares offensionem. Hoc est quod præsertim in Pharizæis carpe-
bat Dominus, *Va vobis quia diligitis primas cathedras.* *SED* Luc. 11.
va nobis miseris, inquit sanctus Hieronymus, ad quos Pharizæorum
vitia transferunt. Præclare vero sanctus Gregorius: *Nullum puto* Hom. 17.
ab aliis maius præiudicium quàm à Sacerdotibus tolerat Deus, quando in 10. Luc.
*eos quos ad aliorum correctionem posuit, dare de se exempla prauita-
tis cernit, quando ipsi peccamus qui compescere peccata debuimus.*
Nulla animarum lucra quarimus, ad nostra quotidie studia vacamus,
terrena concupiscimus, humanam gloriam intenta mente captamus.
*Et quia eo ipso quo cateris prælati sumus, ad agenda qualibet maio-
rem licentiam habemus, suscepta benedictionis ministerium vertimus*
ad ambitionis argumentum.

Non sic Christus, non sic Apostoli quorum certè non minus
intererat quàm tuà refert, suam tueri authoritatem suumque
decus. *Sed tempus est acquirendi & tempus perdendi.* Ecc. 3. Quod vide-
tur aliquando pro Christo pèrdi, melius suo tempore per Chri-
stum inuenitur. Si quid pro suo munere respondendum: *Cum* 1. Pet. 3.
modestia & timore, inquit S. Petrus, *conscientiam habentes bo-
nam ut in eo quod detrahunt vobis, confundantur qui calumniantur*
*vestram bonam in Christo conuersationem: melius est enim benefacien-
tes si voluntas Dei velit, pati, quàm malefacientes, quia & Christus*
semel pro peccatis nostris mortuus est, iustus pro iniustis: de quo
propterea dictum est: *ECCE HOMO.* Id est, exemplar omnium
hominum, *ECCE REX VESTER,* cui scilicet subditi con-
formandi; Numquam certe excellentius Rex & Homo Christus
est dictus, quàm cum sic per ludibrium Rex & Homo dictus est,
quia sic ipse subditus Deo Patri, nos sibi subiciebat, nos illam
docendo subiectionem, in qua tota est excellentia hominis qui
alios regit.

Caue autem ne opere dicas quod Iudæi ore clamant : Tolle tolle, non habemus Regem nisi Cæsarem. Tu verò, nisi Mundum aut appetitum. Nos habemus legem, inquebant, & secundum legem nostram debet mori. Mentiebantur, sed mundus & appetitus habent legem, legem carnis, legem membrorum, secundum quam Christus debet in illo corde mori quod ex illa lege viuit & morietur. *O mors, quam amara est memoria tua homini pacem habenti in substantiis suis!*

PRO EADEM FERIA QVADRAGESIMALI.

Ad Euangelium, de Lazaro infirmo, mortuo, & suscitato. Ioan. 11.

DE his tribus Lazari statibus, proponuntur distinctæ Veritates, tribus primis Feriis hebdomadæ vicesimæ quintæ post Pentecosten, in quarta parte.



S A B B A T O.

C H R I S T V S A P I L A T O,

EX HVMANO RESPECTV CONDEMNATVS

A D M O R T E M.

Pilatus volens populo satisfacere, tradidit Iesum flagellis cæsum, ut crucifigeretur. Marc. 15.

VERITAS PRACTICA.

Humanus respectus, inhumanus Christi despectus.

R A T I O præsupponit duo per se satis nota : primum, quod respectus humanus sit, quando consideratione personarum quibus placere cupimus aut displicere timemus, omittimus vel

committimus aliquid contra conscientiam.

Alterum est, quod hic respectus, tùm inhumanus cenferi debeat esse Christi despectus, cùm ex communi omnium sensu tam iniqua est & iniusta personarum quibuscum Ipse Christus confertur & posthabetur, acceptio; vt nulla sit in humanis iniquior. Quibus præsuppositis vt aperte manifestis, superest declarandum quod in humano respectu talis reperiatur acceptio personarum. Sic autem declaratur:

PERSONARVM acceptio eò est iniquior, quò persona de quibus agitur magis inter se differunt, & quò indignior illa est quæ præfertur.

Sed in humanis non reperitur tanta differentia personarum seu talis indignitas eius persona quæ præfertur, quàm in humano quouis respectu.

Ergo non est iniquior personarum acceptio quàm respectus humanus; ac proinde vere inhumanus est Christi despectus, & plusquam caueri solet, cauendus.

I. PUNCTVM.

IAMETSI Iudæorum improbitati siue importunitati potest attribui, quòd Pilatus innocentem Dominum condemnarit; tamen oportuit in illa importunitate aliquid interuenisse quo permotus fuerit ad hanc decernendam cõdemnationem, cui tam cõstanter resisterat. Nihil autem aliud apparet accidisse quàm timorem seu respectum humanum, quando scilicet illi dictum est à Iudæis de Christo, quod Filium Dei se fecit & Regem; *Si hunc dimittis non es amicus Cesaris, omnis enim qui se Regem facit, contradicit Cesari.* Iohan. 19: Tunc enim auditis his sermonibus expresse refertur ab Euangelista, Pilatum magis timuisse, & statim sedisse pro tribunali, sententiam mortis laturum, ac tandem tradidisse Iudæis Iesum vt crucifigeretur. Timuit ergo ne si populo satisfaceret, accusaretur apud Cæsarem & male audiret apud omnes quasi homo timidus, vel ignarus, vel parum studiosus imperij; sicque partim cupiditate complacendi Iudæis, partim metu displicendi Romanis, miser ille contra suam conscientiam, adiudicauit fieri petitionem eorum, nec alia mortis sententia refertur quam *quod Iesum tradidit voluntati eorum.* Luc. 23:

Quæ certe fuit non modo iniquissima sed & crudelissima sen-

tentia, cum libertas relicta fuerit inimicis de Christo statuendi quod vellent. O dira cupiditas complacendi hominibus! O crudelis merus displicendi! ô humani respectus de illa cupiditate metuque conflati, quam potentes estis & ad omne facinus perpetrandum parati! Ecce hoc vnum potuit permouere hominem ad condemnandum Iesum! Quod neque Pharizæi suis calumniis, neque Pontifices aut Sacerdotum Principes suis prætentis legibus, neque populus vniuersus suis clamoribus extorquere potuit, vnus obtinet respectus humanus! Timuit Pilatus Cæsarem, voluit populo satisfacere, & statim Iesus permittitur crucifigi!

Marci 15.

Sed quid dicetur bone Iesu, quid de te sentietur cum auditum fuerit te sententia Iudicis condemnatum! hæc tamen innocentia tua licet multis calumniis appetita, tibi tamen seruata est; nec quicquam nisi maleuolus te accusauit aut condemnauit; Iam vero cum in Iudicio apud Præsidentem discussa fuerit tua causa, & recognita damnatus fueris, quis te innocentem credet? Nonne est magis quod timeas quam Pilatus? Audi quid Christus tibi respondeat, Audi quàm contemnat istos respectus humanos, & quàm velit eos à te contemni, hac tibi modo proposita Veritate: *Quod humanus respectus sit inhumanus Christi despectus.*

Neque vero id tantum intelligas de humano illo respectu quo Dominus à Pilato est iudicatus, sed de quouis alio qui frequentissimus est inter homines, & qui tam crudelis & inhumanus est Christi despectus, quàm est inter humanas illa iniquissima & iniustissima personarum acceptio, quibus in humano respectu comparatur & posthabetur Christus. Quomodo autem talis acceptio personarum reperiatur in humano respectu, vt in humanis non sit iniquior, hæc aperta demonstrat ratio; Quia ex communi sensu & omnium recte sentientium iudicio, eo est iniquior personarum acceptio quo personæ de quibus agitur sunt magis differentes, & quò earum vna quæ præfertur longe est indignior altera. Sic enim magis fit contra Charitatem, contra iustitiam particularem, & contra commune bonum totius ordinis, ciuitatis, Regni, vel Ecclesiæ: vnde in sacris scripturis mirum quantum hæc iniustitia proscribatur. *Nulla erit distantia personarum, ita paruorum audietis vt magnum. NON consideres personam pauperis, nec honores vultum potentis. SI personas accipitis, peccatum ope-*

Deu. 1.

Leuit. 19.

Iac. 2.

ramini, arguti à lege quasi transgressores. Nonne in hoc sæpe peccasti præferens ditiores pauperibus, & te ab aliis præferri volens? *De his sanctus Thomas 1. 2. q. 67. 2. Par. 19.*
 Videte quid faciatis, non enim hominis exercetis iudicium sed Domini, & quodcumque indicaueritis, in vos redundabit.

II. PUNCTVM.

SED in humanis, non reperitur tanta personarum distantia seu tanta earum indignitas quæ præferuntur, quàm in humana respectu.

Cum enim, vt iam præmissum est, respectus humanus nihil sit aliud quàm ex cupiditate placendi vel metu displicendi hominibus, aliquod Christianum opus omittere, vel oppositum malum committere; profecto hinc patet homines præferri Christo; hæ sunt videlicet personæ de quibus agitur, Christus ex vna parte qui præcipit bonum aut vetat malum; ex alia vero mundus siue homines quibus placendi cupiditas vel metus displicendi auertunt ab illo bono tenendo, vel impellunt ad malum. At nonne est tanta istarum personarum distantia quanta in humanis alia reperiri non potest? nonne si mundus præfertur Deo, præfertur persona tam indigna quam longe indigna esse potest præ altera quæ posthabetur? quæcumque enim alia fiat comparatio personarum, aut quæcumque earum sit distantia, vel vnus ad aliam proportio, tota tamen illa differentia finita est, & suis terminis circumscripta, cum fiat comparatio inter homines, inter creaturas quarum alia quantumcumque aliam dignitate excedat, excessus ille tamen est determinatus; at inter Deum & hominem nulla prorsus est proportio sed infinita quædam distantia quæ efficit vt cum per respectum humanum præferantur homines Christo & Deo, id præferatur alteri quod tam longe est indignum vt nihil longius, nihil indignius cogitari possit. Cui assimilastis me, aut adæquastis, & comparastis me, & fecistis similem? ait Dominus apud Prophetam. Responde, & erubescere. *Is. 46.*

Quando esset mundus vniuersus, quid ille est ad Deum nisi quod ait Sapiens, tamquam momentum statera sic est ante te orbis terrarum, & tamquam gutta roris antelucani quæ descendit in terram; Sic & Propheta: Ecce gentes quasi stilla situla, & quasi momentum statera reputata sunt. At certe non interuenit in illo res-

310 *Sabbato infra Hebd. 4. Quadrag. Pilatus volens, &c.*

pectu humano mundus vniuersus, non Angeli, non Beati, non ipsi etiam homines sanctiores, doctiores, sapientiores, non miliones hominum, non millia, non centum, vix decem, vix vnus aut alter; mera est plerumque Imaginatio, timor nocturnus; Et tamen hunc aut alterum præfers Christo! præfers Deo! O indignitatem! Quis vt Deus! Quid tibi videtur de Christo?

III. PUNCTVM.

NULLA est igitur in humanis iniquior personarum acceptio, quam respectus humanus, cum nulla sit personarum tanta distantia & tanta indignitas, quanta inter Christum & homines qui per humanum respectum præferuntur Christo; qua in præferentia, cum crudeliter & inhumane despiciatur Christus, quid est humanus respectus nisi inhumanus Christi despectus? *Tu repulisti & despexisti Christum tuum. SERUIERVNT creatura potius quam creatori! DEVM qui te genuit dereliquisti, & oblitus es Domini Creatoris tui!* an te illa creatura nutrit, an illa tuus finis est? an tua compensabit opera? an aderit in necessitate? an in extremo iudicio iudicabit? *Vbi sunt dii eorum in quibus habebant fiduciam? surgant, & opitulentur vobis, & in necessitate vos protegant. Videte quod ego sim solus, & non sit alius Deus præter me.*

Ibid. His & similibus cum Dei gratia te exacue, vt ne deinceps ex-
Ecclesi. 6. timescas faciem potentis, & ponas scandalum in equitate tua. *NE*
Ibid. 42. accipias personam vt delinquas. *HÆC locutus sum vobis vt non scandalizemini.*
Ioan. 16.

PRO EADEM FERIA QVADRAGESIMALI.

Ad Euangelium, Ego sum lux mundi, &c. Ioan. 8.

VERITAS PRACTICA.

Dum lucet, ambulandum: ne tenebræ fiant.

In 1. parte, Die 5. Ianuarij.



DOMINICA

PASSIONIS.

Vexilla Regis prodeunt.

SI qui horum Regis nostri vexillorum quæ modò apertius prodeunt, expressi colores pingi aut fingi animo possunt, Candor, & Rubor dicendi sunt, iuxta illud Canticorum, *Dilectus Cant. 5. meus candidus & rubicundus*: Id est, simul est Innocens & Patiens. *Talis enim nobis decebat*, inquit Apostolus, *ut esset Pontifex Hebr. 7. sanctus, immaculatus, impollutus, segregatus à peccatoribus, excelsior calis factus*. Neque nos aliter sua redemit passione, quam quia passus est Innocens seu innocenter, citra omnem culpam. Neque nobis aliter in Exemplar ad imitandum proponitur, quàm ut innocenter Patiens, & patienter Innocens; ut nos ita discamus pati.

Quamobrem hodie simul ac de illius Passione memoria celebrior excitatur, de illius etiam innocentia singularis habetur mentio, verbâque ipsa quibus olim ipse Dominus suam apud Iudæos vitæ probabat integritatem, nobis exhibentur: *Quis ex Ioan. 8. vobis arguet me de peccato*. Quasi nobis aperta voce diceretur, non est satis Christiano pati nisi patiatur innocens & innocenter: sicut nec illi sufficit esse innocentem nisi libenter pro Christo patiatür, & pro sua etiam facta tecta conseruanda vitæ innocentia. Quod saluberrimum documentum ut altius animis nostris infigatur, sic visa est ante alias, hæc Practica Veritas proponenda:

Nemo cum Christo candidus, nisi sit simul rubicundus.

Nemo effectus candidus nisi sit affectus rubicundus.

Nemo actu satis purus nisi actum puritatis suo sit paratus tueri sanguine, contra quoduis peccatum.

RATIO EST, Quia nemo est actu satis purus, nisi dum actus resistendum est occurrenti cuius peccato sic resistat, aut sic resistere sit paratus, quantum quidem cum Gratia potest & debet.

Sed nemo est sic paratus quantum potest & debet, nisi sit paratus ad effundendum propterea sanguinem, si sit opus.

Ergo nec actu est satis purus nisi actum puritatis suo sit paratus tueri sanguine contra quoduis peccatum, quod idem est ac, Nemo cum Christo candidus nisi sit simul rubicundus.

I. P V N C T V M.

DE singulari vitæ innocentia quam dicunt Impeccabilitatem, & quam omnes ita de Christo prædicant ut nullo prorsus modo peccare potuerit, fusius dici posset; Nec omittendum quantis vel aduersariorum omnium testimoniis comprobetur.

En proditor Iudas palàm se peccasse confitetur tradens sanguinem iustum. En omnes subornati testes conuincuntur falsi testimonij. Iudex nullam in eo prorsus inuenit mortis causam. Centurio & qui cum illo erant crucifigentes eum, reuertuntur percutientes pectora sua, & dicentes: Vere hic homo iustus erat. Quid certius ad Innocentiam quàm cum inimici sunt iudices? *Dan. 9.* Sic singulariter iustus & sanctus sanctorum à Prophetis dicebatur Christus, *Hoc est nomen quod vocabunt eum, Dominus, Iustus noster,* id est, qualem poteramus expetere ut esset nostra Redemptio, nostrumque Exemplar sanctitatis conseruanda. Quod ut propius imitemur, sic oportet cum illo esse candidos ut simul etiam cum illo simus rubicundi, neque enim aliter Candor sine rubore seruari potest, Nemo aliter candidus, id est, amans puritatis probari potest, nisi sit rubicundus, id est, nisi sit paratus ad effundendum potius sanguinem, quàm sui candorem animi vel

vel minima peccati labe coinquinari sinat.

Quod quia plurimum facit ad verius exprimendam in nobis Dominicæ Passionis Imaginem, idcirco paulo attentius in ea Veritate perpendenda nos immorari conuenit. Sic itaque declaratur: Nemo vere dici potest candidus nisi qui vere amat eam puritatem quæ omni peccato repugnat: nemo vero dici potest hanc verè amare puritatem nisi sit paratus illam tueri & peccato resistere quantum quidem cum gratia potest & debet; nam talis amor puritatis est voluntas firma, constans, & efficax non peccandi, aut nisi talis sit voluntas, non est talis amor puritatis qualis hic intelligitur. Quid est vero efficacem habere voluntatem non peccandi nisi sic esse paratum peccato resistere, ut nihil eorum prorsus quæ debes & quæ potes omittas ad talem resistantiam? *Facto perficite quod velle capitistis*, inquit Apostolus, *ut* 2. Cor. 8. *quemadmodum promptus est animus voluntatis, ita sit & perficiendi ex eo quod habetis*: Quasi diceret, facite quod potestis ut verè ostendatis vos vere velle; nam qui dicit se velle facere aliquid, quod tamen non facit quando potest & quando debet; vult & non vult, sicut piger qui vult quidem finem sed non media sine quibus Pr. 13. non potest ille finis attingi: sic autem velle non est simpliciter & absolute velle: non est vera voluntas sed velleitas, inquit sanctus Thomas, id est voluntatis simulatio & quædam veluti larua. 1. parte q. 19. a. 6. *Per rursus duplici corde & labiis scelestis*, quæ videlicet sibi fingunt Ecclesi. 24. & dicunt velle quod non volunt.

II. P V N C T V M.

SED nisi quis sit paratus peccato resistere usque ad sanguinem, non est paratus ei resistere quantum potest, & quantum debet. Hebr. 12.

Sic apertè Apostolus, *Recogitate eum qui talem sustinuit à peccatoribus aduersum semetipsum contradictionem, ut ne fatigemini animis vestris deficientes; nondum enim usque ad sanguinem restitistis, aduersus peccatum repugnantes*: quali id manifeste diceret, nondum tecistis quod debetis facere contra peccatum, nisi usque ad sanguinis effusionem, & ad ipsam usque mortem contra pugnetis. Hoc enim debetis facere pro Christo & pro animabus vestris quod ipse Christus propterea fecit, non quod mortem adire debeatis, sed si mortis subeundæ vel peccandi occasio se-

obtulerit : mors potius subeatur quam peccetur.

Atque hic est literalis & germanus sensus verborum Domini : *Qui non accipit crucem suam & sequitur me , non est me dignus :* *qui amat animam suam , perdet eam :* & similibus Christi dictorum quæ sic explicat sanctus Augustinus : *cum ergo causa articulus venerit ut hæc conditio proponatur , aut faciendum esse contra Dei præceptum , aut de hac vita emigrandum , quorum duorum homo si cogatur alterum eligere , comminante mortem persecutore : ibi eligat Deo dilecto emori , quam offenso vivere : Ibi oderit in hoc mundo animam suam ut in vitam æternam custodiat eam. Itane odisti ? itane odiendo custodis animam ? felices qui oderunt custodiendo , ne perdant amando.*

III. PUNCTVM.

NEMO igitur potest esse cum Christo candidus , nisi sit simul rubicundus , Quo sensu dictum est , neminem posse vere dici amare puritatem illam quæ omni peccato repugnet , nisi sit ita paratus contra omne pugnare peccatum , ut nec sanguini parcat nec vitæ ; quia hoc est solum verè velle si quod debes facias ; hoc autem tam vere debes quam vere Deum debes diligere super omnia , & ex toto corde tuo. *Qui diligitis Dominum odite malum.* *P R O iustitia agonizare pro anima tua : & usque ad mortem certa pro iustitia.* *M E L I V S est enim mihi absque opere incidere in manus vestras , quàm peccare in conspectu Domini.* Sic cum casta Susanna dicendū esset in quacumque peccandi occasione. Quàm vero pauci tales ! Sat quidem multi mortem quæ procul abest , videntur non timere , qui tamen aliquod malum sensibile sic reformidant , ut peccare malint quam se illis poenis exponere ! Nec dicāt quod si de fide ageretur non sibi parcerent ; nam ubi de peccato vitando agitur , perinde quodammodo censerī debet quantum ad fugam peccati , sicut si de fide res esset. Nam & reuera de fide est , subeunda potius quævis esse damna quàm peccato consentiendum : & cū propterea paratus ad mortem animus ab unoquoque petitur , petitur simul paratus ad alia quævis quæ sunt morte leuiora. Quam in rem reuocanda huc Veritas quæ in 1. parte , ubi de sanctis Martyribus , proponitur. Sicut ne pereat fides , perdenda est Martyrio vita natu-

Nullus cum Christo candidus, nisi sit simul rubicundus. 315
ralis: sic ne pereat fidelitas, perdenda est mortifica-
tione vita sensualis.

A Cruce autem velut vexillo militari, mirum quantum exci-
tari possis ad pugnandum contra repugnantes quosque naturæ
corruptæ motus. Sic enim Fides, Ratio, & ipse Sensus simul con-
currunt, vnde *triplex ille funiculus efficitur qui difficile rumpitur.* *Eccles. 4.*
Fides quidem in Christo passo ad exemplar nostrum; Ratio au-
tem, quod cum Rex noster sit qui nos præcedit in pugna, plane
congruum est ut eum propè sequamur; Sensus denique, cum
ipsa crux, & qui in ea pendet Christus, oculis vbique objicia-
tur, & vere possimus *esse aspicientes in authorem fidei & consum-* *Hebr. 12.*
matores Iesum: quem & possimus audire dicentem nobis quod *Iud. 7.*
Gedeon suis: *Quod me facere videritis, hoc facite: ingrediar partem*
castrorum, & quod fecero sectamini. Tu vero illi respondebis quod
Ethai ad Regem David, *Vivit Dominus, & vivit Dominus meus Rex,* *2. Reg. 15.*
quoniam in quocumque loco fueris, Domine mi Rex, siue in morte, siue
in vita, ibi erit servus tuus. Adde & quod Gerson. *En Rex noster* *L. 3. c. 56.*
ingreditur ante nos, qui pugnabit pro nobis, sequamur viriliter, ne-
mo metuat terrores, simus parati mori fortiter in bello, nec infera-
mus crimen gloria nostra, ut fugiamus à cruce.

Videnda etiam esset hæc Veritas:

Expediret nullo die velle viuere, quàm non omni die
velle cum Christo mori.

In 3. parte, Feria 5. hebdomada 2.

ALIÆ porrò Veritates quæ ab Euangelio peti possint, hæ-
sunt, cohærenter ad præcipuas Evangelicæ narrationis partes.

QUIS ex vobis arguet me de peccato?

Nulla, nisi primaria, satis esse potest cura de peccatis
evitandis.

In 4. parte, Dominica 18.

SI Veritatem dico vobis, quare non creditis mihi?

Si quid nos reuocat à doctrina Christi, vel ob id maxi-

Rr ij

316 *Dominica Passionis. Vexilla Regis prodeunt.*

mè recipienda est.

In 1. parte, Feria 6. hebdomada 2. post Epiphaniam.

QUI ex Deo est, verba Dei audit.

Non est prius intelligendum vt credas, sed primò credendum est vt pòst intelligas.

In hac 2. parte, Feria 2. hebdomada 4. post Pascha.

PROPTEREA vos non auditis, quia ex Deo non estis.

Qui non audit, non audietur.

In 3. parte, Dominica undecima.

EGO demonium non habeo, sed honorifico patrem meum.

Quò quis est mitior, eò & generosior.

In hac 2. parte, Feria 3. hebdomada 2. Quadragesima, vbi passim de contemptu sui, ac iniuriis sufferendis.

ET vos inhonorastis me.

Sicum nostris vitiis nostræ virtutes comparentur, plus nostris vitiis inhonoratur Dominus, quàm nostris virtutibus honoretur.

In 4. parte, Sabbato hebdomada 19.

EGO non quero gloriam meam; Est qui quærat & iudicet.

Hic erit vere maximus, qui vere est minimus.

In hac 2. parte. Die 2. Aprilis. Et passim de Humilitate.

SI quis sermonem meum seruauerit, vsque ad mortem scilicet, mortem non videbit in æternum.

Cæteræ pugnant Virtutes, sola vincit Perseuerantia,

In hac 2. parte, Feria 5. hebdomada 3. Quadragesima.

Nullus cum Christo candidus, nisi sit simul rubicundus. 317

SI ego glorifico meipsum, gloria mea nihil est.

Licet obtineres quod ambis, non esset contendendum:

At verò licet contendas, non obtinebis.

In hac 2. parte, Sabbato Septuagesimæ, Vbi de contentione ad gloriam agitur.



HAC HEDDOMADE, quæ dicitur Passionis, quidquid à prætorio Pilati, vsque ad Crucifixionem in Caluaria monte, & ipsam crucis erectionem, gestum est, ita consideratur; vt in vnaquaque consideratione aliquod fulgeat Crucis mysterium, id est, ex ipsa re nota & manifesta quæ geritur, alia quædam latens gerenda eruatur, & inde ad præxim Veritates formentur.

FERIA SECVNDA.

CHRISTVS OBLATAM A IVDÆIS CRUCEM ACCIPIT.

Iesum tradidit voluntati eorum. Luc. 23.

VERITAS PRACTICA.

Non quæsitæ Cruces, sunt magis exquisitæ.

RATIO EST, quia cruces quæ purius mortificant & alios crucis ferendæ fines melius inducunt, sunt magis exquisitæ.

Sed non quæsitæ cruces, crucis ferendæ fines melius inducunt.

Ergo sunt cruces magis exquisitæ: Ex qua conclusione nonnullæ alie Veritates Practicæ deducuntur.

I. P V N C T V M.



V M supplicium crucis non nisi Latronibus & Homicidis ex lege Iudæorum decerneretur, quid est quod Christo crucem parant qui horum neutro crimine ab eis vnquam fuit accusatus? Vix alia reddi causa potest nisi quia hoc supplicij genus erat crudele, ignominiosum & lentum, sicque sperabant infensi eius hostes, illum facilius posse proponere populo deridendum, cum maxime duo alij latrones simul essent crucifigendi: *Morte turpissima*, inquiebant, *condemnentus eum*. Ergo Dominus Iesus voluntati eorum traditus, non modo mortem non recusat, sed nec ipsum mortis genus, nec quantumlibet grauem & ponderosam Crucem quam eius imponunt humeris ad locum vsque supplicij baiulandam.

Sap. 2.

Hic hodie consistamus, & primum crucis mysterium euoluamus, quo erudimur ex multis crucibus quæ nobis in hac vita sunt ferendæ, eas esse demum meliores quæ Cruci Christo impositæ sunt similiore, seu quæ minus à nobis eliguntur. Hoc imprimis documentum est vtile & pernecessarium iis omnibus qui sese mortificationi dedunt; Facile quidem ferent quas sibi eligunt & imponunt cruces, sed quæ aliunde occurrunt ferendæ, siue ab officio, siue à Superioribus, seu alitercumque à Deo missis, minus libenter acceptant. Quamobrem, hæc attente Veritas expendenda: *Non quasita Cruces sunt magis exquisita*: Id est, sunt aliis præstantiores, sunt magis æstimandæ & libentius acceptandæ.

Sap. 2.

Cur enim acceptandæ cruces? Quis eorum finis & quod tandem bonum? Certe quaecumque illud sit, per quas cruces illud bonum melius inducetur, meliores dicendæ sunt præ aliis omnibus, & magis exquisitæ cruces. Nam hæc est bonitas instrumenti, & excellentia cuiuslibet medij ad aliquem finem, vt illum suum finem inducat; Vnde quò efficacius illum inducet, eò erit excellentius medium & aptius instrumentum: ac proindè cum crucis ferendæ sit aliquis finis, sitque ipsa mortificatio quoddam instrumentum & medium ad perfectionem potius quam sit perfectio: manifeste profecto patet quod quæ cruces quæue mortificationes finem hunc generalem aut particularem melius indu-

cent, sint cæteris præferendæ; *Si secundum carnem vixeritis, moric-* *Rom. 8.*
mini; si autem spiritu facta carnis mortificaueritis, uiuetis. O quanti
fructus in illa vita! ô quam pretiosæ cruces vnde illi fructus col-
ligentur!

II. P V N C T V M.

SED *Crucis ferenda finem melius inducunt non quæsite Cruces.*
Primo quidem cum per Crucem intelligatur quæuis afflic-
tio carnis aut spiritus, cumque hic vniuersalis sit afflictionum
finis vt carnem & spiritum hominis subdant Deo: nunquam
hæc subiectio fit purius quam per cruces non quæsitæ, dummo-
do liberè acceptentur; quia libera illa crucis & afflictionis acce-
ptatio quæ ex necessitate fit, est purior & Deo gravior, quàm
quæ ex mera nostra libertate & electione, quæ inuoluit semper
aliquid naturale & proprium, quod est *inquinamentum spiritus,* *2. Cor. 7.*
à quo nos Apostolus monet esse mundandos vt *perficiamus sancti-*
ficationem in timore Dei.

Deinde vero, si voluntas Dei pro fine spectari debet, vt certe
debet: aut si voluntas illa diuina requirit à nobis aliquid certi
per Cruces & mortificationes nostras, vt profecto requirit, nōne
per Cruces non quæsitæ, certiores esse possumus de omni volun-
tate Dei, quàm per nostras quæsitæ & à nobis solum electas?
Quis quæsiuit hæc de manibus vestris? hoc ipse Deus à nobis de no- *Isa. 1.*
stris operibus quærit. An vero æquè certo illi respondere posses
quod quidquid ex teipso facis, idcirco facias quia vult, quàm
quando ex regula tua facis, vel ex obedientia vel ex necessitate
patiendi, quæ est index & interpret Diuinæ voluntatis? *Ecce in* *ibid. 58.*
die ieiunij vestri inuenitur voluntas vestra, Numquid tale est iei-
unium quod elegi?

Denique, si ad satisfactionem pro peccatis, si ad augmentum
Gratiæ & Gloriæ, Cruces sunt institutæ, quis dubitet non quæsi-
tas cruces ad illos magis præstare fines, quàm quæsitæ: cum ne-
mo ignoret ieiunium aut aliquod simile bonum opus ex obe-
dientia susceptum, amplioris esse meriti, quàm aliud pure li-
berum & voluntarium? *Numquid vult Dominus holocausta & vi-* *1. Reg. 15.*
ctimas, & non potius vt obediatur voci Domini? Volebat, certe ho-
locausta, sed magis obedientiam.

III. PUNCTVM.

NON quæsitæ Cruces sunt igitur magis exquisitæ; Quia finem crucis ferendæ certius & excellentius inducunt, quàm quæsitæ; Atque hoc vnum est quod crucem vnâ exquilitam & excellentem præ alia facit, si excellentius finem suum inducat possitque veriùs quiuvis dici, *mortificatus quidem carne, viuificatus autem spiritu.*

1. Pet. 3.

Hinc porrò plures ad praxim deducuntur Veritates, quæ quidem eodem spectant omnes, vt pluris faciamus non quæsitas illas Cruces quam quæsitas; sed id variis exponunt modis, vt illa varietate permoti, quod quæritur facilius persuasum habeamus:

Qui quærit Crucem, nec oblatam accipit, non quærit veram Crucem.

Quia videlicet, vera Crux illa est quæ offertur.

Qui quærendo Crucem, se inuenit: se inueniendo perdit quod quærit.

Id est, qui proficitur studium mortificandi sui, nec tamen Cruces & mortificationes aliunde impositas & immisissas tam libenter capit quam quæsitas, seipsum in sua Cruce quærit & inuenit, sicque se inueniendo, perdit quod quærebat, nempe fructum & finem mortificandi sui: nam se quærere & inuenire tam oppositum est veræ mortificationi, quàm huius proprium est, numquam se quærere. Vnde illud aliud sequitur quod est prorsus pudendum & exprobrandum:

Qui se in sua Cruce quærit, præuaricatorem se constituit.

Id est, simul ædificat quod destruit. Quærendo enim crucem, peruersum sui amorem destruit, at se in sua Cruce quærendo, hunc ipsum sui amorem ædificat, quod est præuaricari, dicente Apostolo: *si quæ detruxi, iterum ædifico, præuaricatorem me constituo.*

Gal. 1.

Postremo, fixum ratumque illud maneat quod quæ minus voluntariæ hætenus & minus nostræ fuerant Cruces seu mortificationes,

cationes, magis deinceps voluntariæ sint oportet & nostræ; quia cum sint magis conformes Diuinæ voluntati & magis exquisitæ, nihil nobis debet esse tam voluntarium tamque nostrum quam quod ita diuinum est. *Origo & magnitudo patientiæ*, siue Crucis ferendæ, *Deo authore procedit*, inquit sanctus Cyprianus. *Tract. de bono Pat.*
Diligenda res homini quæ Deo cara est. Bonum quod amat Maiestas Diuina, commendat.

PRO EADEM FERIA QVADRAGESIMALI.

Ad Euangelium, Queretis me, & non inuenietis.

Ioan. 7.

VERITAS PRACTICA.

Verbum Dei non redit vacuum, aut profit necesse est recipienti, vel obsit.

In 3. parte, Feria 2. hebdomada 8.

Qui diuinam expellunt Sacramentorum gratiam, non minus fortè peccant quam qui olim manna repulerunt.

In 3. parte, Sabbato hebdomada 13. Et vniuersim de neglectis Gratiis, pene tota est hebdomada 27. quarta partis.

SI quis sitit, veniat ad me & bibat.

Qui vel vni Creaturæ nimis adhæret, duo mala facit, de quibus ipse Creator : Me dereliquerunt fontem *Ier. 2.* aquæ viuæ, & foderunt sibi cisternas, cisternas dissipatas quæ continere non valent aquas.

In 4. parte, Sabbato hebdomada 18. Vbi Euangelium exponitur.



FERIA TERTIA.

CHRISTVS IMPOSITAM TOLLIT
CRUCEM : ET DEPOSITAM SINIT SIMONI
POST SE TOLLENDAM.

*Et bajulans sibi Crucem exiit in eum qui dicitur
Caluarie locum. Ioan. 19.*

*Et cum ducerent eum, apprehenderunt Simonem
quendam Cyrenensem, & imposuerunt illi Cru-
cem portare post Iesum. Luc. 23.*


VERITAS PRACTICA.

Qui sibi suas, solus, aptat Cruces, vix vmquam aptas ef-
ficiet.

RATIO est, quia nulli aptæ Cruces dici possunt nisi quæ sunt inter
extrema temperatæ.

Sed qui sibi suas aptat Cruces, si solus aptat, vix erunt temperatæ.
Ergo vix vmquam aptas efficiet; Ac proinde in illis voluntariis
pœnitentiis & mortificationibus, alieno potius quam suo quis-
que fidat consilio.

I. PUNCTVM.

DMIRABILE prorsus est, Christum Dominum ne-
que sibi imposuisse Crucem, neque deposuisse; sed im-
positam à Iudæis sustinuit & baiulauit quantum quidem
per vires naturales potuit; Quando verò vltra nil potuit, tum

Qui sibi suas solus aptat Cruces, vix umquam aptas efficiet. 323

deficienti suffectus est Simon ille Cyrenæus, quem anguriauerunt Iudæi, ut tolleret Crucem eius.

Postquam itaque nonnihil affectui & pietati dederis, considerando deplorandum illum statum, quo Christus Dominus à Pilati prætorio per vniuersam urbem alligatus, suæ Cruci, tractus est & immanissime tractatus ab omnibus; Admirare Diuinum illud consilium quo sic imponi & deponi suam crucem Christus permisit, ut documentum hoc spirituale, & Practicam Veritatem tantopere necessariam suo exemplo stabiliret, *Ne soli nobis nostras imponeremus Cruces*, sed quidquid spectat ad illam, quæ vocatur externa mortificatio sensuum, alieno potius quam nostro temperaretur arbitrio. *Nam qui solus sibi suas aptat Cruces, vix umquam aptas efficiet.*

Ratio quæ affertur est aperta, quod scilicet illæ solæ sint aptæ Cruces quæ sunt in medio positæ, quæ sunt inter extrema temperatæ, quæ neque excedunt, neque deficient, in quibus neque plus, neque minus quàm expediat, quantum quidem temperari possunt, iuxta hæc Scripturæ monita: *Ne declines ad dexteram neque ad sinistram. NOLI esse iustus multum, neque plus sapias quàm necesse est, ne forte obstupescas.* Et postquam Apostolus obsecrauit ut exhibeamus corpora nostra hostiam viuentem, sanctam, Deo placentem, statim adiungit, *Rationabile obsequium vestrum, ut probetis quæ sit voluntas Dei.* Dico enim per gratiam quæ data est mihi, omnibus qui sunt inter vos, non plus sapere quàm oportet sapere, sed sapere ad sobrietatem. *NEC plus vel minus, inquit sanctus Hieronymus, sed omnia temperata: Et si à recta viâ paululum declinaueris, non interest utrum ad dexteram vadas, an ad sinistram: cum verum iter amiseris.* Denique refert Cassianus communem antiquorum deserti Patrum fuisse sententiam, *ni-* mietates ex utraque parte se tenentes, *aqualiter improbandas.* *Auderesne te his opponere; atque aliud à communi sensu sentire?*

II. PUNCTVM.

SED cum quis solus sibi suas aptat Cruces, vix erunt temperatæ. Vix se is continebit, quin aut in excessum aut in defectum sese projiciat. Cum enim ex vna parte, mortificatio sit instrumentum aptissimum perfectionis acquirendæ; ex alia vero, sit exer-

Sf. ij.

324 FERIA 3. Hebd. Passionis. Et baiulans sibi Crucem, exiuit, &c.

citium naturæ corruptæ valde odiosum & onerosum; quicumque suæ perfectionis cupidissimus est, cupiditate sua sæpe rapitur ultra quàm debeat; & quod in sanctis & perfectis viris legitur factum, sibi, ni caueat, faciendum credet. *Quidam incauti, ait*

1. 3. c. 7. *Kempensis, propter deuotionis gratiam seipsos destruxerunt, quia plus agere voluerunt quàm potuerunt, non pensantes suæ paruitatis mensuram, sed magis cordis affectum sequentes quàm rationis iudicium.*

Qui verò non ita feruent, aut qui etiam de suo profectu parum solliciti sunt, quorum numerus est amplior, in defectum cadent, & vix audebunt aliquid, ne videlicet, vt sibi fingunt, maiora bona impediunt, illud etiam in ore frequentissimum habentes, non esse sitam in mortificatione perfectionem, liberum vnicuique esse vt assumat quid velit, sibi non videri aliud imponendum, satis aliundè laborare. O probrum, ô ignauiam.

Canet 3. *Egredimini & videte filia Sion Regem Salomonem in diademate quo coronauit illum mater sua, in die desponsationis illius, & in die lætitiæ cordis eius. VOBIS dicimus, filia Sion, ait sanctus Bernardus, anima seculares, debiles, delicata, filia non filij, in quibus nihil est fortitudinis, nihil est virilis animi, egredimini filia Sion, egredimini de sensu carnis ad intellectum mentis, de seruitute carnalis concupiscentia ad libertatem spiritualis intelligentia.*

Serm. 2.
In Epiph.
Dom.

III. PUNCTVM.

QVI sibi ergo solus suas aptat Cruces, vix vñquam aptas efficiet, si sibi solus aptat: quia vix vñquam sic se temporabit quin excedat aut deficiat: Et tamen illæ solæ sunt aptæ Cruces quæ sunt inter excessum & defectum temperatæ. *Noli esse nimius ne forte offendas. NE dicas quid est mihi opus & quid erunt mihi ex hoc bona? ne dicas: sufficiens mihi sum, & quid ex hoc pesumabor?* Quæ cum sint tam expressa in Scripturis, audet Diuus Bernardus affirmare, quod qui non vult alterius potius quàm suo regi consilio, se sui magistrum facit, seque discipulum stulti constituit: & omnia illi defunt qui nihil sibi deesse putat.

Ecclesi. 31.
ibid. 11.

Iob. 30.
20. Mor.
30.

Egregiè vero sanctus Gregorius ad illa verba Iob, *Versa est in luctum cythara mea*: duo hæc simul iungens, docet in abstinentia seu qualibet alia mortificatione corporis, moderationem esse adhibendam, & non à se sed ab aliis esse petendam. *Pensandum*

Qui sibi suas solus aptat Cruces, vix vñquam aptas efficiet. 325

est, inquit, quod chorda in cythara, si minus tenditur, non sonat: si amplius, raucum sonat; quia nimirum virtus abstinentiæ, aut omnino nulla est, si tantum quisque corpus non edomat, quantum valet: aut valde inordinata est, si corpus atterit, plus quam valet. Per abstinentiam quippe, carnis vitia sunt extinguenda, non caro: & tanto quisque sibi met debet moderamine præesse, ut ad culpam caro non superbiat, & tamen ad affectum rectitudinis in operatione subsistat. Intueri inter hac, egregium predicatorem libet, quanta arte magisterij, fidelium animas velut in cythara chordas tensas, alias amplius tendendo extenuat, atque alias à tensione sua relaxando conseruat. Aliis etenim dicit, non in comessionibus & ebrietatibus, non in cubilibus & impudiciis: Et rursus ait, mortificate membra vestra quæ sunt super terram. Et tamen Predicatori carissimo scribit dicens: Noli adhuc aquam bibere, sed modico vino vtire propter stomachum tuum, & frequentes tuas infirmitates. Illas ergo chordas attenuando tendit, ne non tensa omni modo non sonent, hanc verò à tensione temperat, ne dum plus tenditur, minus sonet.

In quibus sancti Papæ verbis non modo vides quod vera mortificatio temperata esse debet, sed quod præcipuè videndum est, id aperte patet, quod sit nostra potius ab alio temperanda quàm à nobis, cum ipse sanctus Timotheus quantumcumque sanctus & peritus, accipere debuerit ab Apostolo, sui regulam victus & temperantiæ normam. Tu verò, tu à te solo præsumeres audiendam tuæ temperaturam vitæ! Tu quis es? numquid Timotheo sanctior aut sapientior? Audi rursus Scripturas: *Audiens sapiens sapientior erit, & intelligens gubernacula possidebit*, id est, sic inteliget quomodo se tutò & securè possit gubernare, ut vix alioquin id ex se intelligat: Vnde & ibidem paulò post: *Ne innitaris prudentia tuæ, ne sis sapiens apud te metipsum*. Et iterum, *vidisti hominem sapientem sibi videri? magis illo spem habebit inspiens*, qui se videlicet nouit, & se ab alio regendum sinit. Tunc enim inspiens qui sapienter ab alio regitur, sapientior est sapiente qui se insipienter regit.

Vide in 1. parte hebdomadam tertiam post Epiphaniam, & præcipue Feriam 4. & 5. Vbi hæc declaratur Veritas:

Grande malum propria voluntas, quæ se in bono bene faciendo non sinit dirigi.

PRO EADEM FERIA QVADRAGESIMALI.

*Ad Euangelium, Dixerunt ad Iesum fratres eius
transi hinc, & vade in Iudæam, &c. Ioan. 7.*

VERITAS PRACTICA.

Humana consilia eò sæpe peiora quò meliora.

In 3. parte, FERIA 5. hebdomada 14.

DIXIT eis Iesus: Tempus meum nondum aduenit.

Sic est omni negotio tempus & opportunitas, vt nisi
adsit tempus & opportunitas, vix vllum fiat ne-
gotium.

In 4. parte, FERIA 4. hebdomada 18. vbi hoc enarratur Euangelium.

Et murmur multum erat de eo in turba.

CONTRA LINGVÆ INTEMPERANTIAM.

Quæ est regula Temperantiæ in edendo, eadem est in
loquendo.

Vel sic.

Eadem est oris Temperantia in loquendo, quæ est in
edendo.

In 3. parte, FERIA 6. hebdomada 7.

AD SVMENDA, EX ÆQVO, DEXTRA VEL
SINISTRA DE NOBIS DICTA.

Humana de nobis iudicia sic sunt humanè audienda,
vt non humanitùs audiantur.

*Id est, non secundum humanum sensum quo in dextris nimis exul-
tamus, & in sinistris nimis abjicimur.*

Cruce interdum à corpore, sed numquam ab animo deponenda. 327

In 4. parte, Feria 2. hebdomada 15.

Et cùm alij de Christo dicerent quia bonus est, alij non, prout unusquisque sibi de illo fingeat; satis opportuna videtur etiam quæ ibidem sequitur Veritas:

Nisi se quisquis Christo conformet, Christum sibi conformabit.

Id est, sic de Christo iudicabit, quoad mores præcipuè, secundum suum sensum, & non secundum rei veritatem. Quod est valde damnosum.



FERIA QVARTA.
CHRISTVS AD SE SEQVENTES
ET SE PLANGENTES CONVERSVS,
FVTVRAS DENVNTIAT POENAS
NON POENITENTIBVS.

Filia Ierusalem, nolite flere super me, sed super vos ipsas flete.

Quia si in viridi ligno hac faciunt, in arido quid fiet? Luc. 23.

VERITAS PRACTICA.

Cruce interdum quidem à corpore, sed numquam ab animo deponenda.

SENSVS est de Cruce pœnitentiæ, sicut enim lignum aridum est omnis impœnitens; sic fructuosum lignum sunt vere pœnitentes. Est autem Crux pœnitentis seu pœnitentiæ duplex, interior, exterior altera. Illa est dolor animi de peccato, ista est dolor corporis propterea castigandi. Quando ita dicitur

328 FERIA 4. Hebd. Passionis. Quia si in viridi ligno, &c.

tur Crucem interdum posse deponi à corpore sed non ab animo, perinde est ac si dicas, dolorem corporis posse intermitteri, sed non dolorem animi.

RATIO est manifesta, quia semper displicere debet peccatum commissum.

Sed si dolor animi desineret aut intermitteretur, tum etiam desineret displicere peccatum.

Ergo numquam intermittendus ille dolor, nec ab animo Crux deponenda, sicut nec ipse Christus umquam deposuit.

I. PUNCTVM.

SEQVEBATUR autem illum multa turba populi & mulierum quæ plangebant & lamentabantur eum; Conuersus autem ad illas Iesus dixit: Filia Ierusalem, nolite flere super me, sed super vos ipsas flete, & super filios vestros, quoniam ecce venient dies in quibus dicent, Beata steriles & ventres qui non genuerunt, & vbera quæ non lactauerunt. Tunc incipient dicere montibus: cadite super nos: & collibus, operite nos; Quia si in viridi ligno hæc faciunt, in arido quid fiet?

Ex his verbis elici possunt tres affectus; primus, Compassionis in Christum, ad imitationem illius turbæ & mulierum quæ plangebant eum. Secundus, admirandæ & imitandæ pietatis ipsius Christi Domini qui magis deplorat & deplorandam suadet futuram illorum miseriam, quàm suam propriam. Tertius, peramandæ & nunquam deponendæ Crucis nisi amore ipsius Crucis, ad exemplum Christi qui non alio animo à Cruce ferenda destitit, quàm vt in ea grauius pateretur & moreretur. Quia si in viridi ligno hæc faciunt, in arido quid fiet? O numquam satis ponderata verba! Si Christus innocens ita passus est propter te, quid te conuenit non modo propter illum sed propter te ipsum pati? Quod si verò hîc pati recusas, quas non debes expectare poenas post mortem, tu qui nihil aliud es quam lignum aridum, cuius consummatio in combustionem?

Febr. 6.

Quamobrem seriò de amanda & colenda Crucé seu mortificatione continua cogitandum: quæ si tamen interdum quoad corpus

CruX interdum à corpore, sed numquam ab animo deponenda. 329

corpus remittitur, numquam vero est ex animo deponenda, numquam deponendus affectus sui corporis mortificandi, numquam deponendum studium sui animi reprimendi, numquam denique dolor ille deponendus qui semel conceptus est de peccato quondam admissio. Quo in triplici sensu proposita Veritas expendi posset, sed in postremo præcipue de Cruce ac dolore interiori vitæ præteritæ, considerabitur. *Peccatum meum contra me ps. 50. est semper*, inquit poenitens, id est coram me, in mente mea ut semper meminerim me peccasse, in corde meo ut semper oderim & detester quod peccaui, in sensu meo ut semper illud defleam, & amplius ab illo lauer.

Nam præter innumeras quæ inde proueniunt utilitates, certè illud certum & omnino necessarium, ut numquam placeat, imo ut semper displiceat quidquid peccatum est. *Reuertere ad Dominum*, inquit Scriptura, *& auertere ab iniustitia tua, & nimis edito execrationem.* Quid est nimis odisse execrationem nisi tam continuo & indefinente odio peccatū prosequi ut pene nimium videatur? Cur vero peccatum dicitur execratio, nisi quod semper sit ita execrandum ut non secus atque ipsa execratio semper displiceat? Quod denique additur, *Cognosce iustitias & iudicia Dei*, quid est aliud quàm indicare motuum potentissimum ad hoc perpetuandum execrationis præteritæ odium, nempe quod sic Deus illam semper excretur, sic execrandam iubet, & adeo tremenda sunt diuina illius iudicia ut de peccato dimisso non sit etiam tremor deponendus. Sic idem aperte Sapiens; *Ne dixeris, ibid. 5. peccaui, & quid mihi accidit triste? Altissimus enim est patiens redditor.* De propitiato peccato nolè esse sine metu, neque adiicias peccatum super peccatum. *Et ne dicas, miseratio Domini magna est, multitudinis peccatorum meorum miserebitur: Misericordia enim & ira ab illo cito proximant, & in peccatores respicit ira illius.*

II. PUNCTVM.

SED CruX interior, seu animi dolor de peccato si deponeretur aut intermitteretur, verendum esset ne & ipsum peccatum displicere desineret.

Intermitti quidem potest dolor sensibilis, sed non ille qui dicitur appetitiuius, & qui verus & proprius est dolor de pec-

cato super omnia deploranda. Dicitur vero non intermitteri cum poenitentis animus ita est affectus & dispositus, ut quoties excitatur peccati memoria, dolor renouetur: atque etiam ut crebro dolor ille renouetur, sæpe sæpius peccati memoria exciteretur.

Thren. 3. Memoria memor ero, & tabescet in me anima mea.

Hoc autem est omnino necessarium ne peccatum placere incipiat, aut displicere desinat. Nam cum sit tam naturale & proclive homini, amore & complacentia ferri in objecta quibus peccatum admissum inhærebat, ut nili diligenter cum diuina gratia prospicias, illuc rapiaris, & tibi placeat quod placere non potest sine peccato: certe non potest aliter diligentius nec tutius prospici quam per illum dolorem continuum qui directe opponitur tali complacentiæ, & voluntatem contra obfirmat.

Ps. 37. Ego tamquam surdus non audiebam, & sicut mutus non aperiens os suum: quoniam ego in flagella paratus sum, & dolor meus in conspectu meo semper: quoniam iniquitatem meam annuntiabo & cogitabo pro peccato meo. Quasi diceret, hoc est quod me insensibilem reddit ad omnia quæ me prouocant ad peccandum, quod videlicet tunc meminerim olim me peccasse, & ita doleam de peccato, ut peccare displiceat.

Sic sanctus Augustinus iam conuersus, cum à sodalibus *L. 1. de Ord. s. 10.* ad aliquid liberius acitandum forte moueretur, *Nolite*, inquit, *obsecro vos geminare mihi miseras: satis mihi sunt vulnera mea, nolite obsecro.* Et post nonnulla: *Hic ubi plura ne dicerem, lachrymæ mihi modum imposuerunt.* Videsne quam sit opportunus & necessarius ille dolor continuus quem tanti Viri renouant quoties periculum iustat ne in delictis veteribus sibi complacent? *Hoc est frenum in maxillis ponendum*, de quo passim Scripturæ, quoposito sicut facile retardamur à complacentia in peccatum: sic illo remoto facillimè in eandem prouocamur & ruimus. *Omnes conuersi sunt ad cursum suum*, inquit Ieremias, *quasi equus impetu vadens ad prælium*; Quia scilicet ut ante dixerat non dolent de peccato, aut dolorem semel conceptum non continuant.

III. PUNCTVM.

ET SI ergo à corpore Crux interdum deponi possit, numquam tamen ab animo. Ne si animus dolere desinat de peccato,

Crux interdum à corpore, sed numquam ab animo deponenda. 331

peccatum displicere desinat. Quod certe nefas est & omni modo cauendum. *Fili, peccasti: non adicias iterum, sed & de pri-* Ecclesi. 21.
stinis deprecare ut tibi dimittantur. Quasi romphæa bis acuta omnis iniquitas, plaga illius non est sanitas: Id est, non potest ita sanari, quia semper sanari possit perfectius, dolendo & gemendo propterea non tam timore poenæ quam amore Dei, sicut de se ait sanctus Augustinus, Amore amoris tui facio istud, recolens vias L. 2. Con-
meas nequissimas in amaritudine recogitationis meæ, ut dulcescat fess. 2.
mihi dulcedo non fallax, dulcedo fœlix & secura.

Atque ut id ipsum vnusquisque constanter obseruet, sic idem L. de vera
alibi: *Numquam credat sufficere, semper coram Domino ante quem* & falsa
peccauit, crubescat: dolorem cum vita finiat: ubi dolor finitur, defi- pœnit. c. 13.
cit pœnitentia: ubi deficit pœnitentia, & ibi venia. Vade & iam noli peccare: hoc est pœnitere: Hinc ergo semper doleat, & de dolore gau-
deat, & non semper doluisse doleat. O quale gaudium sic semper posse dolere; sic vere posse dicere cum Psalmista, Defecit in dolo- Ps. 30.
re vitæ meæ, & anni mei in gemitibus. Fœlices gemitus, in quibus anni deficiunt: fœlices anni qui nonnisi deficiunt in dolore & in gemitibus.

Vide in 1. parte, Feria 3. hebdomadæ 4. post Epiphaniam, de rationabili sollicitudine pro peccatis remissis.

PRO EADEM FERIA QVADRAGESIMALI.

AD EVANGELIVM, *Quousque animam nostram tollis? Si tu es Christus, dic nobis palam. Respondit eis Iesus, loquor vobis & non creditis. Ioan. 10.*

Qui cum affectu incomposito Deum consulit, non Deum, sed Deo consulit.

Quasi vellet Deum sibi solum placencia respondere. In hac 2. parte, Feria 4. Pentecostes.

Vos non creditis quia non estis ex ouibus meis.

Quæ causa est cur pauci salui sint, hæc in te causa est,

T. ij.

332 FERIA 5. Hebd. Passionis. Et venerunt in locum qui, &c.
cur ex illis forte non sis.

In hac 2. parte, Dominica Septuag. Vide & in 3. die 25. Iunij.

*O*VES mea vocem meam audiunt : & ego cognosco
eas, & sequuntur me.

Sicut discursum mentis statim sequi debet affectus, ita
& affectum effectus.

In 1. parte, die 29. Decembris.

Tantum abest quod qui sunt verè liberi non se subji-
ciant : ut non sint aliter verè liberi, nisi se subjiciant.

In 4. parte, Sabbato hebdomada 15.

Sicut Imaginem aut faciem Christi, sic eius vocem fi-
delis anima reueretur.

*In 4. parte, Sabbato hebdomada 21. qua pene tota est de hac simili-
tudine pastoris & ovium, ex eisdem Christi verbis.*



FERIA QUINTA.

QUATVOR DIMENSIONES CHRISTI CRVCIS ET NOSTRAE.

*Et venerunt in locum qui dicitur Golgotha, quod
est Calvariae locus. Matth. 27.*

*Huius rei gratia, flecto genua mea ad Patrem Do-
mini nostri Iesu Christi, ut possitis compren-
dere cum omnibus Sanctis, quae sit latitudo, &
longitudo, & sublimitas, & profundum. Ephes. 3.*

Qui à Cruce, suas tollit Dimensiones, tollit à se suam, &c. 333

VERITAS PRACTICA.

Qui à Cruce, suas tollit Dimensiones, tollit à se suam Crucem.

RATIO EST, Quia qui tollit à se Crucem quæ post Christum cuique ferenda est, tollit à se suam Crucem.

Sed qui à Cruce, suas tollit dimensiones, tollit à se Crucem quæ post Christum ferenda est.

Ergo tollit à se suam Crucem; Ac proinde illi maledicto subjicitur quod intentat Christus Dominus dicens: Qui non accipit ^{Matth. 10.} Crucem suam & sequitur me, non est me dignus.

I. PUNCTVM.

CONSCENSO monte Caluariæ, Crux in terram demittitur, locus eminentior montis deligitur ubi illa infigatur; Clavi, funes, malleus, cæteraque instrumenta supplicij educuntur; Quid vero interim bonus Iesus? Stabat videlicet cum illis duobus nequam qui simul ducti sunt ut interficerentur, stabat ligatus velut illi, apparebat nequam & Reus velut illi; parabatur Cruci affigendus vt illi: sed tamen quàm longe ab illis alius esset, tu tecum ipse recogita. Credibile autem est & cogitatu piissimum, oculos tunc in Crucem humi jacentem habuisse defixos, atque illi tum quòd postea discipulus Andreas, animo etiam lætiori dixisse, *ô bona Crux diu desiderata, & iam concupiscenti animo prapaparata, securus & gaudens ad te venio*; Tum considerando singulas eius dimensiones sic à Patre dispositas, *Etiam pater! quia sic placitum fuit ante te*; Illam accepto sua in latitudine, paratus pati quæcumque volueris; Illam amplector sua in longitudine, tamdiu passurus quàm permiseris; Illam suscipio, sua in sublimitate & profunditate, tam excelso & humili animo toleraturus omnia quàm cognosco te velle à filio, & quàm filius tibi potest exhibere!

Hæ sunt quatuor Crucis Christi dimensiones de quibus Apostolus, & in his refulgere dicitur Crucis mysterium, quia sic nostra

Luc. 9.

Serm. 9.
de Quadr.

Cruz suas etiam debet habere dimensiones; aut non erit illa Cruz quam iubemur quotidie ferre post Christum, & in qua cum ipso affigendi sumus. *Qua merito ferri unicuique suadetur*, ait S. Leo, *quia propriis modis atque mensuris ab unoquoque toleratur*. Hinc orta Veritas, *Quod qui à Cruce, suas tollit dimensiones, tollit à se suam Crucem*. Quia videlicet tollit illam Crucem quæ est ferenda post Christum, & quam qui non accipit non est Christo dignus, non potest dici Christum sequi neque Eius esse. Non enim omnes qui ferunt Crucem, Crucem ferunt post Christum, nec sequuntur illum. Sunt multæ Cruces inutiles, imo etiam sunt malæ Cruces & peruersæ quas quicumque portant, tam longe distant à Christo quàm à bonitate malitia, & à rectitudine peruersitas.

Eccle. 7.

Sup. 5.

Lib. 3. de
Consid. c. 1.

Cruces inutiles sunt labor ille inutilis & cassa sollicitudo mentis quâ laborat homo sub sole & quam ita deplorat Sapiens, vt penè totus sic Ecclesiastes in ea deploranda.

Malæ autem & peruersæ, sunt illæ viæ difficiles quas impij ambulauerunt, & est via iniquitatis in qua lassati sunt, vt ipsi clamant in inferno. Quantumcumque enim vitium placeat, suas tamen habet molestias, & ipsa est *ambitio Cruz ambientium*, vt ait sanctus Bernardus. Quis autem sanus putet ambitiosum ferre suam Crucem post Christum Dominum? Cur ita porro, nisi quia non est illa Cruz quam post se ferendam iussit Christus: non est illa Cruz qua sequimur Christum, non est illa Cruz quæ nos Christo similes facit. Ac proinde sicut ille solus vere dici potest ferre suam Crucem qui fert illam Crucem quam Christus ferendam voluit; sic plane, hanc qui non tollit, non tollit suam Crucem, seu quod idem est, tollit à se suam Crucem, non vult pati quantum necesse est ad salutem aut ad certum perfectionis gradum quò à Christo vocatur, licet alia quædam patiat. Non poena, sed causa, & modus patiendi martyrem facit.

III. P V N C T V M.

SED qui à Cruce, suas tollit dimensiones, tollit à se Crucem quæ post Christum ferenda est.

Tollit nempe similitudinem suæ Crucis cum Cruce Christi. Quæ vt manifestius pateant, expendendæ sunt accuratius. illæ

Crucis mysticæ dimensiones, & tibi applicandæ.

Latitudo Crucis est quidquid ex diuina ordinatione patendum est; O quæ & quanta Christus in toto Corpore, in bonis, in honore, & vniuersim in omnibus! Itane vero tu omnia? Si quid desit quod non patiaris, tantum de latitudine tuæ Crucis deest, & tantum de eius similitudine.

Longitudo Crucis est tamdiu constanter pati omnia quam durat occasio patiendi; sic Christus in Cruce per tres horas; sic ab horto ad Crucem: Imo sic à primo vitæ ortu vsque ad mortem semper constantissime passus. Tu verò quàm facile resilis, quàm parum duras patiendo, sicque non imples mensuram longitudinis! *Numquam deest tribulatio persecutionis si numquam deest* Serm. 9. de
Quadr. *observantia pietatis, Totius est temporis Crucem ferre, ait S. Leo.*

Sublimitas & profundum Crucis est Charitas & Humilitas simul iuncta in animo patientis; Sic Christus ex ea ipsa Charitate qua diligebat Patrem, diligebat Crucem, & in hac sublimi dilectione patiebatur. Tam profunda vero eius humilitas vt exinanitio iure dicatur, quo verbo nihil aptius est ad rem expri- Phil. 2. mendam.

Aduerte autem has duas Virtutes sic mutuò à se pendere, vt quò sublimior erit Charitas, eò sit profundior humilitas; & quò profundior humilitas, eo etiam crescere & apparere sublimiorem Charitatem; Vnde tu qui humilitate præsertim deficis, & numquam te satis dignum tuis te pœnis iudicas, quando aliunde quàm à te proueniunt, timere certe debes ne debita etiam Charitate defis; Nam si vt debes & vt potes cum Gratia, Deum diligeres, sic Eum doleres à te aliquando fuisse offensum, vt numquam satis humiliari & pati posse crederes ad aliquam Diuinæ Iustitiæ satisfactionem exhibendam: diceresque quod est in libro Iob, *peccaui, & vere deliqui, & vt erā dignus non recepi.* Iob. 33.

Ex quibus tandem patet quod qui à Cruce suas tollit dimensiones, tollit à se Crucem quæ post Christum est ferenda, quia non Eum imitatur, neque sicut ille passus est patitur; quia non quantum, nec ex quanto vult Deus, aut quamdiu illi ordinatur; quod est manifestè deficere ab Imitatione & exemplo Christi qui omnia plenissime consummauit. *Multi ambulant quos* Phil. 3. *sepe dicebam vobis, nunc autem & fletus dico, inimicos Crucis Christi.*

III. P V N C T V M.

HARVM ergo defectu dimensionum cum sua Crux vni-
 cuique deficiat, quid sequitur, nisi *Qui à Cruce suas illas
 tollit dimensiones, tollit à se Crucem suam; tollit à se decus suum,
 tollit à se salutis suæ tesseram, tollit à se omne bonum: nam in
 Cruce totum constat, & in moriendo totum iacet.* Vide illud Diui-
 num caput libri primi de regia via sanctæ Crucis. Et licet nullus
 Sanctorum tam perfecte passus sit sicut Christus, fatis tamen
 perfecte passi sunt, si suæ Crucis dimensiones cumulate comple-
 uerint; Satis autem cumulate compleuerunt, si omnia sibi pa-
 tienda, licet non quanta Christus, tolerarint; si tamdiu sustinue-
 rint quàm sustinendum illis fuit, licet non tam diuturno tempo-
 re quàm ipsi Christo patiendum fuit; si denique ex toto corde
 suo, licet cor eorum non fuerit tam sublime aut humile quàm
 Cor Christi. Sic Apostolus mensuram suæ Crucis impleuit cum
 illa passus est quæ Corinthiis commemorat: *Secundum mensu-
 ram, inquit, qua mensus est nobis Deus, sic nos vellet Imitatores sui
 esse, sicut ille est Christi.* Alioquin caue istud, *Tanta passi estis sine
 causa.* Itemque illud longe grauius, *Scio opera tua quia nomen ha-
 bes quod viuas, & mortuus es, Esto vigilans & confirma cetera que
 moritura erant. Non enim inuenio opera tua plena coram Deo meo. In
 mente ergo habe qualiter acceperis & audieris, & serua, & pœniten-
 tiam age.*

L. 1. de
 Imit. Chr.
 12.

2. Cor. 11.
 Ibid. 10.

Gal. 3.

Apoc. 3.

PRO EADEM FERIA QVADRAGESIMALI.

*Ad Euangelium, de muliere peccatrice, seu Mag-
 dalena pœnitente. Luc. 7.*

DE hac tam multæ suo loco producantur Veritates Practicæ,
 vt sit longius hîc eas referre.

In 3. parte, FERIA 4. hebdomada 7. & die 22. Iulij.

Adiungi vero possunt nonnullæ aliæ qua ad pœnitentiam &
 Conuersionem spectant.

Licet

Qui à Cruce suas tollit dimēfiones, tollit à fe fuam Crucem. 337

Licet omni peccatori fit neceffario pœnitendum, vix tamen vllus eft qui neceffariam agat pœnitentiam.

In 1. parte. Dominica 4. Aduentus.

Frufta te Chrifti miferet, nifi te tui prius miferet.

In hac 2. parte, Feria 4. hebdomada 1. Quadragefima.

Reuocanti hominem Deo ab errore viæ fuæ non obfequi peius eft, quàm primò vocantem ne erraret, non fequi.

In eadem 2. parte, in fine, vbi de ftatibus.

Fortioris eft animi non vinci à bonis blandientibus, quàm ipfa vincere mala terrentia.

In eadem 2. parte, Die 25. Aprilis.

Nifi Chrifto refifteres, fic te Chriftus in fe, ficut panem confecratum, conuerteret.

In 3. parte, Sabbato hebdomada 1.

Qui fibi palpat quod non longè erret, periculofius fæpe errat, quàm qui aberrat longiùs.

In 3. parte. Dominica 3.

Hanc ad cæteras impudentiam impudicus adjicit, vt Deum orando irrideat.

In 3. parte, Sabbato hebdomada 6. Videri & poteft in 1. parte, Feria 6. hebdomada 4. in Aduentu.

Sicut à peccato fic à peccati reliquiis, refurgendum.


In 4. parte, Dominica 15.

Nifi ab omni cupiditate voluntas, ficut ab omni errore intellectus verè conuertatur, vix vlla eft vera conuerfio.

In 4. parte, Feria 2. hebdomada 16.

2. Pars.

Vu



FERIA SEXTA.

CHRISTVS CRVCI AFFIGITVR.

Ibi Crucifixerunt eum. Luc. 23.

Hoc scientes quia vetus homo noster simul Crucifixus est. Rom. 6.

VERITAS PRACTICA.

Quod petenti Christo iuxta Crucem non negasses; hoc à te semper petit, hoc illi semper debes, hoc illi numquam negandum.

SENSVS est præsertim de veteri homine simul crucifigendo, quod præsertim petiisset Christus, & quod ibi præsens non negasses, unde concluditur numquam id illi negandum, & ad singulos veteris hominis actus reprimendos, tantum valere Christi considerationem, quantum valuisset illà ipsà horà quâ vidisses eum Cruci affixum.

RATIO est, quia idcirco non negasses quod Christus petiisset quia reuera sic merebatur, & sic debebas non negare quod petebat.

Sed Christus hoc idem semper petit, hoc idem semper meretur, hoc illi semper debes.

Ergo & semper debes non negare, seu quod idem est, ergo id numquam est negandum; quod certe potens est & efficax cum Divina Gratia ad continuam mortificationem exercendam.

I. P V N C T V M.

IB I Crucifixerunt eum, ait S. Euangelista, quo vno dicto omnia comprehenduntur quæ spectant ad hanc stupendam Crucifixionem. Expende singula cum affectu. Vide vt denudant Sacrum Christi Corpus, vt proiiciunt in supinam Crucem, vt extendunt eius membra in illum doloris lectum, vt manus & pedes summa vi protrahunt, donec attingant locum destinatum vbi affigantur. Audi malleorum ictus, in clauos: Cerne clauorum violentiam in nervos, nervorum scissuras ac venarum in manibus pedibusque, vnde quatuor illa sanguinis flumina quæ totam irrigant terram. Attende & vide si est dolor *Gen. 2.* sicut iste dolor. Quid tum bone Iesu! quid sentiebas? quid cogitabas? Fili, sic de te vno cogitabam quasi vnus fuisses pro quo sic paterer; & hoc præcipue cogitabam vt me totum tibi traderem quò amorem tuum mereri possem. Inscribebam te manibus meis per hos clauos qui tùm infigebantur Cruci, & per sanguinem qui inde profluebat, vt verum fieret quod dixit Propheta, *Non obliuiscar tui; In manibus meis descripsi te.* Veni sequere me, *Is. 49.* Inspice exemplar quod tibi monstro, sic veterem hominem crucifige.

Ad hoc anime quid respondes? non est dubium quòd si tùm præsens adfuisses & hæc audiuiisses, nullum est mortificationis genus aut actus particularis quin libentissime subjisses, si se eius occasio obtulisset: nonne est ita? Responde. At quæso memineris, quando & quoties veteris hominis reprimendi seu naturalis appetitus coercendi occasio sese dabit. Scito te æque obligatum modò & semper id reddere Christo, ac tùm credidisses illi non negandum. Perinde modo debet valere eius Exemplum & Consideratio, atque tùm valuisset, si vidisses eum pendentem, & audisses à te postulantem talem mortificationis actum qui modo occurrit exercendus.

Quid est enim cur illo tempore non illi denegasses, nisi quia iudicasses id illum à te promereri quod postulat: id ita exigere sanguinem profluentem, id ita vel ab inuito extorquere Crucem & tot Cruciatu quos tui gratia libenter suffert, vt si denegares, impietatis & crudelitatis notam non effugeres: nonne hæc

una fuisset Ratio? Nam licet præsentia obiecti multum potuisset ad commouendum sensum & animum, tamen negare non potes quin Ratio id persuasisset. Fatere ex animo, & id effice quod sanctus Ioannes Euangelista, *In conspectu eius suadebimus corda nostra.*

II. P V N C T V M.

Rom. 6. **S**ED Christus hoc idem semper petit: hoc idem semper meretur; hoc illi semper debes. Hoc est enim quod ait Apostolus, *hoc scientes quia vetus homo noster simul crucifixus est: Ut destruatur corpus peccati, ut ultra non seruiamus peccato*; Et alibi, *qui sunt Christi, carnem suam crucifixerunt cum vitiis & concupiscentiis*; Rursumque de seipso, *Christo confixus sum Cruci*. Quorum omnium verborum duplex est sensus, primus quod sicut Christus corpus suum dedit affigendum Cruci, ita nos carnem siue eius appetitum inordinatum qui dicitur vetus homo, tradamus spiritui Gratiae, ita continendum, ut non magis se mouere possit secundum suos motus naturales peruersos, quam corpus Cruci affixum. Hoc est facere secundum exemplar quod tibi in monte monstratum est, quando scilicet quod factum est in carne Christi, hoc in carnali appetitu fiet. Hic est primus sensus.

Secundus vero est, quod quia Christus sic fecit, ideo nos idem etiam præstare oportet, id omnino meretur cum præcipue idcirco sic voluerit crucifigi, ut disceremus sic crucifigendam & continendam carnem, siue id timore culpæ & poenæ ut dicebat *Pf. 118.* Dauid: *Confige timore tuo carnes meas*, siue id solo amore, ut *Gal. 2.* Apostolus, *Christo confixus sum Cruci, vino ego iam non ego, viuit vero in me Christus.*

AT quæso te quandònam id Christus à nobis fieri postulat & quandònam meretur ut quod postulat, exequamur? An pro eo tantum tempore quo patiebatur, aut quo vidisses illum dum pateretur? Nonne id ridiculum cogitatu, & impium dictu? nonne id modò & semper id postulat, id meretur, & id debemus cum adest occasio carnis reprimendæ? Nonne ad has occasiones confertur nobis gratia quam patièdo promeruit, si sicut de præsentipateretur? Et nonne nos etiam oportet illi gratiæ obsecundare, ne illud incurramus quod seuerè & grauiter ait Apostolus, *qui*

Filium Dei conculcauerit & sanguinem testamenti pollutum duxerit ^{Hebr. 10:}
in quo sanctificatus est, & spiritui gratia contumeliam fecerit! Hoc
est videlicet conculcare filium Dei ac eius sanguinem, cum eius
presentes Gratiarum quæ non minoris valent quam eius sanguis,
reijcimus: ne carnem affligamus, ne vel eius appetitui resistamus!
ô probrum, ô ignominiam, *Quæ utilitas in sanguine meo?* ^{Ps. 29:} *Quæ*
utilitas in exemplo meo?

III. PUNCTVM.

QUOD ergo petenti Christo iuxta Crucem non negasses, hoc à te
semper petit, hoc illi semper debes, hoc illi numquam negan-
dum est: Quia id semper meretur sicut tunc merebatur: unde ad
singulos veteris hominis actus reprimendos ita semper valere
debet Exemplum Christi crucifixi, sicut si modo Cruci affige-
retur, ac si præsens adesses huic spectaculo. *IESVS CHRISTVS* ^{Hebr. 13:}
heri & hodie: Ipse & in secula. Nam cum certum sit, te tunc illi
non negaturum fuisse hunc mortificationis actum qui occurrit,
quia iudicasses illum mereri; profecto neque etiam modo, ne-
que quocumque petat tempore, negare unquam debes, quia sic
iudicare, sic credere, & sentire debes illum tam iuste modò me-
reri quam quando passus est. Aut enim tunc nihil meritis est
quod faceres, aut illud meruit quod modo faciendum est. Ex-
pende hoc: quid enim meruit ut faceres, nisi quod potes & de-
bes facere? at quid est illud nisi quod occurrit faciendum? Hoc
est scilicet quod ex Cruce vidit, hoc est cui præstando Gratiam
destinavit, & salutem affixit: sicut enim te non vidit nisi in ea
differentia temporis qua modò viuis, sic neque actum mortifi-
cationis quem redderes nisi quo tempore esset reddendus.
Quamobrem si hunc negas, negas quod debes, aut negas te illi
hoc debere, quæ est horrenda blasphemia, & quæ te aliquando
eò deducet ut neges te quidquam illi debere, aut fatearis te
nolle quidquam reddere. Nam si non reddis quod petit, quid
reddes? Quidquid sit aliud quod non petit, recusabit, & nihil
reddes. *Munus non suscipiam de manu vestra.* ^{Mal. 2.}

Et si vero alia tibi videantur præstanda, nihil est magis neces-
sarium nihilque certius quod à te exigatur, quam ille mortifi-
cationis actus qui ad euitandam cordis inordinationem adhi-

bendus est: sicut enim hanc inordinationem numquam potest probare Christus, ita non potest non petere quod à te necesse est ut cum Gratia coerceatur. *Nemini mandavit impiè agere, & nemini dedit spatium peccandi.* Non ita de positiuis aliis bonis operibus certus esse potes; & vere illud mortificationi continuè applicari potest quod de præputiis Philistinorum dicebat Dauid. *1. Reg. 17. uidi Saul: Non habet Rex sponsalia necesse, nisi tantum centum præputia Philistinorum, ut fiat ultio de inimicis Regis.* Te sponsabat in Cruce Christus, & hæc à te quæ dicta sunt sponsalia postulabat, quæ si negas, vide Cui neges.

PRO EADEM FERIA QUADRAGESIMALI.

Ad Euangelium, de Iudeorum Concilio contra Dominum. Ioan. 11.

Quid nequius quàm quod excogitauit caro & sanguis? *Ecclesi. 17.*

Nempe de Iesu perdendo, ut supra explicatur in hac 2. parte, Feria 2. hebdomada infra Septuagesimam.

EXPEDIT vobis ut vnus moriatur homo pro populo.

Non minùs expedit ad salutem ut vetus homo moriatur in nobis, quàm ut nouus Homo moreretur pro nobis.

In 4. parte, Feria 5. hebdomada 25.

Sicut à veteri lege, sic à veteri homine, unicuique Christiano est abstinendum.

In 1. parte, Sabbato hebdomada 5. post Epiphaniam. Vide & Dominicam infra Octauam Natiuitatis Domini: & diem Circumcisionis.

Mortificatione potius tibi sunt omnia subtrahenda, quàm quid mortificationi detrahendum.

Quod petenti Christo iuxta Crucem non negasses, &c. 343

In 3. parte. 24. Augusti.

Quæ hac denique & sequenti die proponuntur Veritates, satis patet quàm sint conformes superioribus, necnon quæ in parascæue seu Feria 6. hebdomadæ sanctæ.



S A B B A T O.

CHRISTVS IN CRUCE ILLVSVS.

Tunc Crucifixi sunt cum eo, duo latrones, unus à dextris, & unus à sinistris; praterentes autem blasphemabant eum. Matth. 27.

Rursum Crucifigentes sibimetipsis Filium Dei, & ostentui habentes. Hebr. 6.

VERITAS PRACTICA.

Quod nouo negatur Homini contra veterem; hoc veteri indulgetur contra nouum.

RATIO EST, Quia quod nouo negatur homini contra veterem, est aliquod mortificationis exercitium.

Atqui hoc negatum mortificationis exercitium, hoc ipsum est quod contra nouum hominem veteri indulgetur.

Ergo quod nouo negatur homini contra veterem, hoc veteri indulgetur contra nouum. Quod certe ignominiosissimum est Christo Domino, qui rursum crucifigitur & illuditur in cordibus nostris, nisi vetus ipse homo sit in nobis plene Crucifixus. Alteruter necessario crucifigendus.

I. PUNCTVM.

CH RISTO Cruci affixo, Crux erecta fuit in eminenti loco, vt spectaretur ab omnibus, & qui in ea pende-
 bat, spectaculum fieret ac portentum ludibriis omnium &
 opprobriis expositum, sicut prædixerat Dauid; *Omnes videntes me deriserunt me, locuti sunt labiis & mouerunt caput, & sicut refe-*
 runt Euangelistæ; *Prætereuntes autem blasphemabant eum, mouen-*
tes capita sua & dicentes: vah qui destruis templum Dei, & in tri-
duo illud readificas, salua temetipsum: si filius Dei es, descende de
Cruce. Similiter & principes sacerdotum illudentes eum scribis & se-
nioribus, dicebant, Alios saluos fecit, seipsum non potest saluum fa-
cere: si Rex Israel est, descendat nunc de Cruce, & credemus ei: con-
fidit in Deo, liberet nunc eum si vult, dixit enim quia filius Dei sum.
Id ipsvm autem & latrones qui crucifixi erant cum eo, improp-
erabant, & conuiciabantur ei. Illvdebant autem ei & milites
accedentes & acetum offerentes ei, & dicentes; Si tu es Rex Iudæo-
rum, saluum te fac.

Hæc prorsus stupenda omnia & cum affectu reuoluenda, sed
 quod etiam nunc sic illudatur Christus in cordibus nostris, nisi
 vetus homo sit plane crucifixus, non minus accurate perpenden-
 dum. Hoc autem redditur manifestum discursu tam aperto, vt
 vix vno aut altero sit opus verbo ad ampliorem eius declaratio-
 nem: sicque fiet vt dum breuior erit propositæ Veritatis expo-
 sitio, grauissimum illud probum de illuso in cordibus nostris
 Christo, quod inde sequitur, attentius consideretur. Sic ergo
 habe: *Quod nouo negatur homini contra veterem, hoc veteri indul-*
getur contra nouum. Quid est enim contra veterem hominem
 nisi quod illi displicet & repugnat? quid est autem quod illi dis-
 plicet nisi quod vocamus mortificationis exercitium? *si oculus*
tuus dexter scandalizat te, erue eum: si pes, si manus; abscinde, am-
puta.

Hoc est quod nouus homo petit contra veterem, hoc est
 quod illi negatur cum scandalum pedis vel oculi non aufertur.
 Ah quoties id petitur! ah quoties id negatum! quoties voluit
 & noluit!

II. PUNCTVM.

ATQVI hoc ipsum est quod contra nouum hominem veteri indulgetur. Hoc ipsum scilicet quod oculus scandalizans non eruitur, quod pes offensionis non abscinditur, quod imperatus denique mortificationis actus non exercetur; hinc solum est quod se contra opponit homo vetus, contrarium appetit, oppositum postulat, & hoc illi indulgetur, *Dilexerunt* Ioan. 12. enim *gloriam hominum magis quam gloriam Dei.* *Voluptatum amatores magis quam Dei.* 2. Tim. 3.

III. PUNCTVM.

QVO D nouo igitur negatur homini contra veterem, hoc veteri indulgetur contra nouum. *NOVVS* homo, inquit S. Gregorius, *vita nostra veteri in vitiis enutrita contrarietatem opposuit nouitatis suae.* Quid enim vetus, quid carnalis homo nouerat nisi sua retinere, aliena rapere si posset, concupiscere si non posset? sed celestis Medicus singulis quibusque vitiis obuiantia adhibet medicamenta. Nam sicut arte medicina calida frigidis, frigida calidis curantur: ita Dominus noster contraria opposuit medicamenta peccatis, ut lubricis continentiam, tenacibus largitatem, iracundis mansuetudinem, elatis praeceperet humilitatem. Hier. 32. in Evang.

At verò contra semper vetus reluctatur: fit pugna de nobis in nobis inter vtrumque hominem, vter alteri cedat aut imperet. Alterutri prorsus obsequendum. Illi sunt duo Domini quibus nemo seruire potest, *Aut enim vnum odio habebit, & alterum diliget: aut vnum sustinebit, & alterum contemnet.* Matth. 6. Sicut itaque quando mortificatione constringitur vetus homo, is dicitur crucifigi, quia sic comprimuntur eius actus ut nihil agat, perinde ac Crucifixus: sic plane nisi sic constringatur & crucifigatur, quid sequitur nisi oppositum? quid sequitur nisi quod nouus ipse homo cum actibus suis comprimatur, compressus nihil agat, nihil agens sit velut Cruci affixus? *Si affiget homo Deum, quia vos configitis me: me vos configitis gens tota,* dicit Dominus per Prophetam. Mal. 3.

Atque hoc ipsum est quod alia similitudine dicitur exspoliari Ephes. 4. Coloss. 3.

veterem hominem & indui nouum : Vnde quemadmodum hoc ipso quòd vnus exspoliatur , alter induitur : ita prorsus si vnus laxetur & liber agat in nobis , alter crucifigatur necesse est.

Iam vero quàm sit graue & iniuriosum Christo Domino sic in te constringi & crucifigi , vt nihil spirituale agat , cogaturque per tuam libertatem , cui sese accommodat , cedere æmulo , atque illum intueri dominantem tui , dominantem animo & corpori tuo , tuos mouentem affectus , excitantem actus , & omnia sensualis vitæ opera tecum operantem , poterisne id cogitare , & pati ? Nonne tu ipse es qui quotidiana precatione sic illum aduocas ; *Dirigere & sanctificare , regere & gubernare , dignare Domine Deus Rex cæli & terra , hodie corda & corpora nostra , sensus , sermones & actus nostros in lege tua , & in operibus mandatorum tuorum* : Dum vero præsens adest te directurus , dum tibi dicit , *Ecce*

Is. 58.

adsum quoniam inuocasti me , veni , sequere me ; Tu contrà quasi diceret , quis es tu vt sequar te ! Sequar cogitationes cordis mei , & ibo in aduentionibus meis . Quid est irridere , quid est illudere

Ier. 20.

nisi hoc sit ? *Factus sum in derisum tota die , omnes subsannant me.*

Prou. 3.

Ibid. 9.

Itane semper illudes & non illuderis ? *Ipse deludet illusores. Si fueris illusor , solus portabis malum.* Attende diligentius & cum D. Bernardo sic exardescere in teipsum : *Exurgat Deus & cadat armatus iste , cadat & conteratur inimicus homo , contemptor Dei , cultor sui , amator mundi , seruus Diaboli. Quid tibi videtur ? Si recte sentis , mecum dices , reus est mortis , crucifigatur. Noli ergo dissimulare , noli differre , noli parcere : sed festinanter , audacter , instanter crucifige hominem istum , sed cruce Christi , in qua est salus & vita.*

In Meditationibus. Medic. vlt. simi.

Euangelium Feriæ Ioannis 12. solennem ingressum Domini Iesu in Ciuitatem Ierusalem repræsentat , de quo iam supra , semel & iterum ; cras vero plenius & opportunius.



HAC SANCTA HEBDOMADA , de septem
Verbis Domini in Cruce prolatis agitur , vnde disca-
mus perfectam in omni genere Renuntiationem, quæ
plurimum facit, ad veram sanctitatem , his præsertim
sacris diebus , comparandam.

DOMINICA PALMARVM.

DE ILLVSTRI PALMA
ET TRIUMPHO QVEM CHRISTVS DOMINVS
REFERT EX INIMICIS, ET QVI EXPRI-
MITVR PRIMO VERBO IN
CRUCE PROLATO.

Pater, dimitte illis, non enim sciunt quid faciunt.

Luc. 23.

*Cùm audissent quia venit Iesus Ierosolymam, ac-
ceperunt Ramos Palmarum, & processerunt ob-
uiam ei, & clamabant: Hosanna, benediçtus qui
venit in nomine Domini, Rex Israel.* Ioan. 12.

VERITAS PRACTICA.

Illustrior de Inimicis Palma est, mori pro eis ne mo-
riantur; quàm ipsis perditis triumphare.

348 *Dominica Palmarum. Acceperunt ramos Palmarum, &c.*

RATIO EST, Quia Charitatis illustrior est triumphus quàm vindictæ vel fortitudinis.

Sed moriendo pro Inimicis ne moriantur, Charitatis est triumphus: De ipsis vero perditis, vel vindictæ vel fortitudinis triumphus est.

Ergo Illustrior de Inimicis Palma & triumphus est, mori pro eis ne moriantur, quàm ipsis perditis triumphare.

I. P V N C T V M.

DE celeberrimo ingressu Domini in Ciuitatem Ierusalem habetur in 4. parte, hebdomada integra quæ est 26. seligenturque nonnulla pòst ad ampliores discursus. Hic modo sufficiat pauca hæc breuiter capita, mente percurrere, quibus ad primæ Veritatis propositæ Considerationem fiat progressus. Primum, quòd inter alias causas cur sic magnifice Dominus voluerit ingredi Ciuitatem, hæc vna fuit, vt indicaret se de inimicis triumphare.

Secundum, quod de ipsis triumphat non solum resurgendo post mortem, sed moriendo & orando pro ipsis in Cruce, ne pereant.

Tertium, quàm luculentè hunc pietatis affectum expresse- rit in primo quod protulit verbo, *PATER dimitte illis, non enim sciunt quid faciunt.*

Quartum, quanta in hoc Verbo seu in pietatis affectu per verbum expresso, quàmque perfecta reluceat Renuntiatio Iuris illius quod habebat Christus, reposcendi vindictam de Inimicis, necnon de ipsis vindicatis & perditis triumphandi.

Quintum denique, vt ad similem tam generosæ Renuntiationis Imitationem & praxim excitemur, quam sit verum, quod *Illustrior de Inimicis Palma sit mori vel pati pro ipsis ne moriantur & pereant, quàm de ipsis perditis triũphare; aut alio quouis vlciisci modo.*

Ratio quæ à Charitate petitur est insignis ad affectum permouendum, & ad intellectum illustrandum. Quid enim nobilius, quid generosius, & quid sublimius Charitate triumphante?

Vndecumque enim aliter de inimicis triumphes, siue à prudentia, siue à Iustitia, siue à fortitudine, eò semper erit inferior triumphus quò hæ virtutes sunt Charitate inferiores. Et quidem si nuda & simplici Charitate nihil est excellentius, quantò magis ipsa est excellentissima, dum triumphat? Sic enim seipsam quodammodo altius euehit, si quid sit altius quò euehi possit: Vnde Apostolus cum de Charitate ad cætera dona & gratias comparata differeret, *Adhuc excellentiorem*, inquit, *viam vobis demonstro.* Dicite quidlibet; adhuc aliquid excellentius dicam. I. Cor. 12.

IL. P V N C T V M.

ATQVI sic pati sic orare & mori pro inimicis ne percant, est actus & triumphus Charitatis.

Quod sit actus, patet euidenter: Quod vero ille actus Charitatis, sit eiusdem triumphus, intelligi potest pluribus modis: Primò, quod damnosiores nostri inimici nempe Caro, Mundus & Dæmon sic superentur & triumphentur; sicut enim valde naturale est, valde conforme mundo & valde gratum Dæmoni vindicare se de inimicis, & ad vindictam reposcendam maxime inuitemur ab his tribus nostræ salutis hostibus: sic cùm resistimus tentationi, cùm non obstante naturali inclinatione, *non maledictum pro maledicto, sed è contra benedictionem*, ex Charitate reddimus, profecto victoria est & triumphus Charitatis de illis hostibus. Secundò potest intelligi de illis ipsis Inimicis quos Charitate nobis vincimus, quos nobis deuincimus, eos emollientes & inflectentes; Vel quos vincimus Deo, eis gratias obtinentes quibus resipiscant & saluentur; sic dicitur, *lucratus es fratri tuo: SALVABIS animam eius à morte, & operies multitudinem peccatorum.* Math. 18.
Iac. 1. Vel denique vincimus inimicos ipso actu Charitatis quem pro eis exercemus, & singularis obedientiæ quam reddimus præceptis vel Consiliis Christi Domini, vnde est illud celebre Sapientis dictum; *Vir obediens loquetur victoriam*; Qua enim ratione hic Charitatis actus est superior meritis & dignitate, illa Inimicorum potentia seu violentia quam in nos exercent; eadem nos superiores & victores eorum sumus; ac proinde de eis triumphamus. Prov. 21.

Sed prius anime, de te triumphes necesse est; vincendus ille

350 *Dominica Palmarum. Acceperant ramos palmarum, &c.*

Apo. 6. affectus qui te ad vindictam inclinât, atque ut vincatur certius, constanter est impugnandus. *Sic exit vincens ut vinceret.* Vindica me Domine, non de meis Inimicis, sed de meipso.

III. PUNCTVM.

*Coloss. 3.
L. 3. de nat.
& gr. c. 42* **S**IC ergo patet, illustriorem illam esse palmam & triumphum qui de inimicis agi possit, quando pro eis potius patimur & oramus, exemplo Christi, quàm si eos ultione accepta perderemus, ne quid inulti ab eis patiamur. Quia Charitas longè semper excellentius Bonum est quocumque alio, quod ex vindicta vel ex prætento Iure reposcendæ reparationis læsi honoris vel iniuriæ acceptæ provenire possit. *Super omnia, Charitatem habete:* Vnde apte S. Augustinus, *Charitas est verissima, plenissima, perfectissimaque Iustitia.* Et hæc certe consideratio plurimum valere debet ad illam Charitatem exercendam; nam quid quærimus in vindicta reposcenda? hoc vnum nempe ut malum auertamus, vel bonum aliquod procuremus; sed nullum est tam graue malum quam si Charitatem perdas, aut nullum tale bonum quam eius actus & exercitium: ac proinde cedant illi omnia necesse est, aut negandum, Charitate nihil esse maius & excellentius, quod tuta fide & Conscientia cogitari non potest.

Prov. 20. O quàm verè & sapienter Sapiens, *Honor est homini qui separat se à Contentionibus.* Non dixit pax est homini, gratia est homini, salus, benedictio aut alia singula bona quæ referre poterat, sed honor est homini, quia de honore magis dubitant homines nùm sit in illa Charitate seruata, & idcirco nos certos & securos esse voluit, ut si honorem quærimus, Charitatem potius quàm vindictam cogitemus. Non potest enim non esse valde honorificum coram Deo & coram hominibus recte sentientibus, cum maius bonum minori præferimus, aut dum prospicimus ne minus malum maiore malo redimatur. Etenim quis non eum stultum iudicet & derideat qui propter calceum breuiorem, sibi pedem refecaret? Sic plane ille insanit, & merito est deridendus qui propter temporale aliquod bonum, Caritatem violet quæ tale est bonum ut *Charitas Deus sit, & Deus Charitas.* O bonum super omne bonum. Dic ergo ex corde cum Christo, *Pater, Ignosce Illis;* & mihi simul cum illis, si quid contra hanc Veritatem peccaui.

1. Ioan. 4.

Illustrior de Inimicis Palma est, mori pro eis ne moriatur, &c. 351

Huic affines videri possunt quæ sequuntur.

Iniuriam infert Gratiæ maximam, qui pro ferenda iniuria non certat fortiter.

In 1. parte. In die S. Stephani.

Iniuriosum est Christo, si nulli quidem velis inferre iniuriam, nolis autem illatam ferre.

In 1. parte. Die 16. Iannarij.

Læsi amoris ira quò est suauior, eò potentior.

Qui ruina gaudet inimici, ruinam eius in se trahit.

In 2. parte, Feria 6. & Sabbato hebdomada 3. Quadragesimæ.

Quidquid acquiras æmulando, plus perdis quàm acquiras.

In 2. parte, Feria 5. hebdomada 1. post Octauam Paschæ.

Beati pãifici. Beati qui persecutionem patiuntur propter Iustitiam.

In 3. parte, Feria 2. & 3. hebdomada 4.

Si semel sunt condonandæ iniuriæ, sunt semper condonandæ.

In 4. parte, Feria 5. hebdomada 18.

Quidquid profers ne parcas aliis, contra te profers ne parcat tibi Deus.

In 4. parte, Dominica 21.

QVÆ de hodierno Ingressu & Triumpho Domini possent alia memorari, atque inde Veritates ad praxim educi, hæc sunt in primis, ex Euangelica narratione.

INVENIETIS asinam alligatam, & pullum cum ea: soluite, & adducite mihi. Matth. 21. videndus textus.

Quod magis confert ad faciendam ritè Confessionem minus efficitur, nisi cum Sacerdote priùs conferatur.

352 *Dominica Palmarum. Acceperunt ramos Palmarum, &c.*

In 1. parte, Feria 3. hebdomada 3. post Epiphaniam.

DICITE quia Dominus his opus habet. Ibidem.

Sic nempe dicendum in quibus omnibus nos velit Deus, nam
Aut nullam vitæ partem, aut totam Deo debemus.

In 1. parte. Die 4. Ianuarij.

Ecce Rex tuus venit tibi mansuetus. Ibidem.

Non nisi subiectis Christo concupiscentiis, Rex Christus re agnoscitur.

Non à magno regno, Rex magnus, Christus ita est
prædicandus, quàm à Magno Rege, magnum eius
regnum.

In 1. parte. Die 6. Ianuarij.

Quam in se attrahit Gratiâ qui se Deo libens offert,
eandem sibi detrahit qui quod offert non reddit.

*In 1. parte, Feria 3. hebdomada 1. Aduentus, ad stabiliendam
veram virtutis firmitatem.*

*PLURIMA autem turba strauerunt vestimenta
sua in via: Alij autem cadebant ramos de ar-
boribus.*

*Turba autem quæ præcedebant, & quæ sequeban-
tur clamabant dicentes: Hosanna Filio David.*

&c. Matth. 21.

Tria simul hæ turbae coniungunt quæ sunt ad veram Deuo-
tionem valde obseruanda; Nempe affectum, voces & opera,
quæ ad tres corporis partes spectant, Cor, linguam & manus;
Vnde hæc manat Veritas:

Nisi Cor, lingua, & manus, ad Deuotionem simul con-
spirent, ipsa expirabit Deuotio.

*Ratio fundatur in natura vera Deuotionis quæ nos totos ita Deo
ut*

Illustrior de Inimicis Palma est, mori pro eis ne moriantur, &c. 353
reddat, ut nisi totos reddat, non sit vera; non reddit autem totos, nisi
tres illæ conspirent partes, ut explicatur fusius in 4. parte, Feria 5.
hebdomada 26.

*Et ut appropinquavit, videns Civitatem flevit super
illam, dicens: Quia si cognovisses & tu. Luc. 19.*

Nisi Cor tuum moueatur ad verba Christi lachryman-
tis, Cor illud est de quo Sapiens, Cor durum habebit
male in novissimo. Ecclesi. 3.

In 3. parte, Dominica 9. Vbi hæc alia subiungitur.

Si te cognosces, hoc in te flendum nosces quod deflet
Christus.

ET verò ad conciliandas hoc sacro tempore, vel quando-
cumque Diuino placuerit Spiritui, salutare lachrymas, pluri-
mum valere potest hæc Diui Augustini, de Lachrymis senten- *Serm. 11. ad*
tia, meritòque debet inter Veritates Practicas, sic recenseri & *Fr. in Ev.*
expendi, ut authoritati dicentis, accedat dicti ratio.

Lachryma Passionis Christi Vicaria.

ID. EST,

Vices quodammodo gerit Passionis Christi, dum in
animis nostris id operatur quod est præcipuum Pas-
sionis Christi opus.

*Ratio est, quia præcipuum Passionis Christi opus, est remissio pec-
catorum, ipso dicente Domino: Quoniam sic scriptum est, & sic Luc. 24.*
oportebat Christum pati & resurgere à mortuis, & prædicari in
nomine eius poenitentiam & remissionem peccatorum, in om-
nes gentes. *Tamquam scilicet hoc sit eius proximum, & præcipuum*
opus.

*Sed Lachryma, sic Domino cooperante, hanc in animis nostris re-
missionem peccatorum operatur.*

Ita omnes Patres, variis quidem loquendi modis, sed idem
prorsus significantibus.

Sunt qui Lachrymam comparent cum herba illa fullonum
quæ miram habet vim ad eluendas quascumque sordes; & de

Mal. 3. qua est mentio apud Prophetam Malachiam. Sic sanctus Augustinus, *hæc*, inquit, *lachryma*, est herba cælestis illius fullonis quæ vestes servorum suorum deturpatas, à sorde quotidie purgat. Sunt qui dicant esse velut Spongiam qua literatura quævis deletur. *In codice*, inquit sanctus Ioannes Chrysostomus, *scripta sunt peccata tua; Spongia peccatorum tuorum, Lachryma tua sunt. Effunde Lachrymas & poteris ea delere.* Rursumque alibi sub alia similitudine: *In secularibus*, inquit, *iudiciis, quantumlibet post acceptam sententiam lamente ris & lugeas, non tamen effugies flendo supplicium: Hic verò si toto corde ingemueris ad Deum, solvisti repente sententiam, veniamque consecutus es.*

L. de Pan. c. 12. Sunt qui dicant esse velut naufragium aut velut etiam illud diluvium quo totus est orbis expiatus. *Lachryma*, inquit Petrus Cellensis est naufragium vitiorum, portusque naufragatorum. Sanctus autem Hieronymus ad illum Psalmi Versum: *Verumtamen in diluvio aquarum multarum, &c.* *VIDE*, inquit, *quanta magnitudo sit fletuum ut diluvio comparentur*, Quod non tantum dicit propter abundantiam, sed etiam propter efficaciam. Quo in sensu iidem dicunt Lachrymis nostris Dæmonem magis vi quam suis flammis, & ipsum inferorum ignem nostris extinguere fletibus.

Serm. 9. de Pass. Quid quod sanctus Leo non dubitat affirmare lachrymas à Diuo Petro fufas esse velut baptismum? *Felices*, inquit, *lachryma tua*, quæ ad diluendam culpam negationis, Virtutem sacri habuerunt baptismatis. Et quidem, *iterabilis*, ait sanctus Bernardus, ut non semel tantum sicut Sacramentum Baptismi, sed sæpius hoc Sacro lachrymarum Baptismate possimus abluì. Poteratne dici expressius aliquid ad propositæ Veritatis fidem illustrandam? Quid enim Baptismo efficacius ad omnes peccatorum maculas eluendas? Et quia Martyrium, Baptismus Sanguinis est qui hoc commune habet cum aquarum Baptismo ut nihil in peccato relinquat non plenè ablutum & deterfum, idcirco etiam audet Divus Chrysostomus cum ipso martyrio conferre lachrymas. *In Psal. 50.* *Dicam*, inquit, *tibi quid valeant lachryme, attende diligentius. Quid martyribus majus qui animam suam ponunt pro amico suo? Grandis gloria Martyrum: Martyres effundunt sanguinem: peccatores effundunt lachrymas. Meretrix illa non fudit sanguinem, sed fontes lachrymarum profudit, & deleuit peccata sua.* Tum de Diuo Petro

Numquid sanguinem fudit? Nonne amare fudit lachrymas, & absterfit peccatum suum, & recepit pristinam dignitatem?

Ex quibus & aliis Sanctorum Patrum dictis sicut aperte pater in veris lachrymis, remissionem peccatorum contineri, sic plane liquet quam verè lachryma sit Passionis Christi Vicaria, cum id operetur in nobis quod est præcipuum Passionis Christi opus.

Quamobrem cum nihil modo sit opportunius quàm & reco-
lendo simul salutis nostræ mysterio, & remittendis vacare pec-
catis, sic vtrumque simul iungendum est, vt & sacræ memoria
Passionis, lachrymas excitet; & excitata lachrymæ memoriam
passi Domini renouent & virtutem eius communicent. Sic Chri-
stus ipse Dominus vtrumque iunxit, vt manifeste ait Apostolus,
*qui in diebus carnis suæ preces supplicationesque ad eum qui possit il- Hebr. 5.
lum saluum facere à morte, cum clamore valido & lachrymis offerens, Sermon. 6.
exauditus est pro sua reuerentia. Possent alia quæcumque peteres, de Cæna
denegari, sed petentibus veniam lachrymis numquam negatur. Dom.*
*Non superuacua mendicant lachryma veniam, ait S. Cyprianus, nec
umquam patitur contritæ cordis holocaustum repulsam. Quoties te in
conspetu Domini video suspirantem, spiritum sanctum non dubito aspi-
rantem; Cum intueor flentem, sentio ignoscentem.*

Quod quidem tam proprium est & singulare lachrymis, vt *Serm. 46.
etiam si expressam non peterent peccatorum veniam, veniam ta- de penit.
men obtinerent: vt egregie profequitur sanctus Ambrosius. Petri.*
*Lachryma, inquit, tacita quodammodo preces sunt. Veniam non po-
stulant & merentur. Causam non dicunt & misericordiam consequun-
tur. Vtiliores lachrymarum preces sunt quàm Sermonum. Sermo enim
interdum non totum profert negotium; lachryma semper totum prodit
affectum.*

Vide in 3. parte, Feria 4. hebdomadæ 3. *Beati qui lugent.*

AD VERBA porrò supradicta, *Ecce Rex tuus venit tibi
mansuetus.*

Vel ad ista: *Quia sic cognouisses & tu, & quidem in hac die tua
quæ ad pacem tibi: & quæ sequuntur Lucæ 19.*

Possset adiungi vel conjunctim cum superioribus, vel separa-
tim, hæc Veritas, ad perfectæ praxim Emendationis, plurimum
efficax cum Diuina Gratia.

356 *Dominica Palmarum. Quia si cognouisses & tu, &c.*

Hoc Sacrum tempus Crisis est æternitatis.

Vel sic expressius.

Hi Sacri dies non minus diligenter sunt obseruandi
pro salute animæ, quàm dies Critici pro
sanitate corporis.

SIC Ecclesia suo in officio, dum Passionis tempus inchoat.
Isti sunt dies quos obseruare debetis, temporib. suis.

*RATIO EST, Quia idcirco pro sanitate corporis obseruantur
quidam dies, dicti Critici, quòd ex illis iudicium plerumque
fiat, vel iudicium capiatur de statu sanitatis.*

*Sed hi sacri dies, hi sunt ex quibus capi possit iudicium pro sa-
lute animæ, id est, prout modò se quisque geret, inde sperandum
vel timendum erit pro æterno salutis animæ statu.*

*Ergo hi sacri dies non minus diligenter sunt obseruandi pro salute
animæ, quàm dies Critici pro sanitate corporis, imo tanto id
diligentius, quanto corporis sanitati salus animæ præstat.*

I. P V N C T V M.

PRIMA propositio posset explicari paulo latius ex ipsa
quæ in morbis præsertim febrilibus apparet, experien-
tia; dum certis quibusdam diebus, nempe septimo, de-
cimo quarto, vicesimo primo & similibus, Natura morbi seu
status morbidus, se apertius prodit: fit pugna quædam in corpo-
re, vires inter naturales, & morbi malignitatem; Contendit
Corpus in seipsum pro seipso, dum latentes in se morbi causas
expellere nititur, & se domestico liberare hoste. Quod si qui-
dem foeliciter ei succedat; si exudet, si copiosè, si toto corpore,
si vi naturali non arte exquisita; tùm prosperæ valetudinis certa
spes capitur. Aut si è contra, corpus rigeat, vel in sudatiuncu-
lam, vt vocant, laboriosè dissoluatur; tunc metuendum est cor-

pori, tunc periculosa vis morbi est & damnosa perniciēs; Inde videlicet indicia capiuntur, inde formantur iudicia, siue prognostica & præiudicia; Vnde ista naturalis pugna dicitur *Crisis*, quasi iudicium, & dies quibus illa solet accidere, *dies Critici*, quasi decisiui, decretorii, aut velut *arbitri & indices disceptationum naturæ & morbi*; Sic illi loquuntur qui de his scribunt. O si tam periti essemus in animæ morbis vel cognoscendis vel sanandis! *Omne caput languidum & omne cor mærens, à planta pedis usque ad verticem, non est in eo sanitas.* Hæc primo dicuntur de morbis nostris, tum de Christi vulneribus, quæ sunt morborum remedia, si vellemus ea nobis apponere. *Nec minorem febrem amoris esse dixerim quàm caloris*, ait sanctus Ambrosius, *febris nostra avaritia est, febris nostra libido est, febris nostra luxuria est, ambitio, iracundia*, & quotquot insunt vitia, tot sunt ægitudines animi; suntque animæ certa perniciēs, nisi prospiciat; qua de re fusius, multis in locis.

In Lucam.

II. PUNCTVM.

SED hi sacri dies, hi sunt ex quibus, suo quodam modo, capi possint indicia pro salute animæ, sicut dictum est pro sanitate corporis.

Nempe his diebus, talis pugna fit inter synderesim & libidinem, inter Diuinam Bonitatem & humanam peruersitatem, inter Christi Gratiam & nostra vitia, vt prout cuique pugna successerit, de futuro salutis statu, præiudicari possit. Cùm enim hoc præsertim tempore repræsentetur nobis Christus velut spirans in tormentis, & expirans in Cruce. Cùm sit ex præcepto læra celebranda Communio, cùm paranda Confessio, cùm alia Religionis instituta, modo sint accuratius excolenda; quis dubitet tùm munificentissimum Dominum sua largius effusurum dona? suas abundantius communicaturum gratias? Quis nisi plane perditus & desperatus non sentiat singulares animi motus in amorem pietatis & in peccati odium? Quis non deploret suam intemperantiam, suam ferocitatem, suam libidinem, ac reliqua sua vitia.

Et horum quidem motuum communis sensus est, at longè dispar effectus: nam qui vocantis Dei Gratiæ respondet, neque tan-

osee. 6.

tum à peccato, sed etiam ab amore peruerso qui peccati radix est, penitus discedit; magnam sanè spem consequendæ salutis præbet, meritòque in eorum est numero de quibus dicitur à Propheta: *In tribulatione sua manè consurgent ad me: Venite & reuertamur ad Dominum, quia ipse capit, & sanabit nos, percutiet & curabit nos, Viuificabit nos post duos dies, in die tertia suscitabit nos; & viuemus in conspectu eius.* Sic ille, sic Spiritus ipse Sanctus prædicens & denuntians futuram ex his motibus quorundam animæ prosperam valetudinem, & perpetuam beatitatem.

ibid.

A T contrà: Si solis in animi motibus hæreat cuiusquam pietas, si non ultra in tale peccati odium se protendat ut iam omnino nolit peccare, si sacris feriis absolutis, ad pristinum redire cogitet genium, nec de arctiori deliberet disciplina, qua se deinceps contineat; tunc plane oppositum formatur iudicium, tunc cauendusei denuntiatur interitus, & certa impendens perniciēs. Audi enim quid sequitur in eodem Prophetæ loco: *Quid faciam tibi Ephraim? quid faciam tibi Iuda? misericordia vestra quasi nubes matutina, & quasi ros manè pertransiens. Propter hoc dolauit in Prophetis; occidi eos in verbis oris mei: & iudicia tua, quasi lux egredientur;* Id est; Ex his tuis gestis tam clare iudicari potest quid de te futurum sit quàm est ipsa lux clara & aperta. Cur porro? quia quo tempore formare debebas solidam pietatem quæ te ab omni deinceps peccato auocaret, tu contentus nonnullis quibusdam piis motibus non ultra processisti, sicque tua deuotio transactis festis transiit, & velut nubes aut ros matutinus de repente soluta est; Hoc est ad æternam salutem valdè sinistrum & infaustum. Quid enim tibi saluando potentius, quam quod suggeritur his diebus? Quid validius ad compungendam quantumuis duram Conscientiam, quàm *uiuus ille sermo Dei & efficax, & penetrabilior omni gladio ancipiti, & pertingens vsque ad diuisionem animæ ac spiritus?* Quandònam vero sermo ille diuinus subministratur abundantius, quam hoc tempore, uel efficacius quàm cum de Christo patiente differitur? At nonne hoc est quod modò exhibetur? Nonne ad hoc idcirco singulariter à Domino, Concionatores quique excitantur, acuantur, dolantur, & pene occiduntur, ut per Christi patientis & morientis viscera, te à peccato reuocent, & in stabilem salutis viam te adducant? Nonne tu ipse vides quam sit id æquum & debitum? Et tamen paulo post

iibr. 4.

perinde ac si ludicra & ficta essent hæc omnia, tam facili pro-
pensione liberiores reperis viuendi licentiam! Actum est de te,
periisti, aut certe tam certo periclitaris quam verè apta & op-
portuna erant omnia quibus in veritate, à mundanis tenebris ad
Lucem Euangelicam & verè Christianā virtutem conuertereris.

Hoc nempe velut quoddam extremum remedium, extremis
nostris malis diuina prouidit Sapiencia, vt per Christi vitam &
mortem resipisceremus, *Verebuntur*, inquebat, *filium meum*; Nil *Manh 21*
ultra superest, hoc si non sanaris remedio, *Insanabilis fractura tua*, *Ier. 30.*
pestima plaga tua, curationum utilitas non est tibi. IMMUNDITIA *Ezech. 24.*
tua execrabilis, quia mundare te volui, & non es mundata à sordi-
bust tuis, sed nec mundaberis. Quibus enim opportunius modis?
Quid tibi faciam, ait Deus, quid tibi ultra conferam, quid à me
expectes aliud quam vt te nouis illustrem luminibus, ad cernen-
dum apertius quid sit peccatum, quid peccatrix anima, quid
peccatis inuoluta qualis est tua; vel te nouis accendam ardori-
bus ad audendum melioris vitæ propositum? En quod intendo
his diebus, en quod præsto, quod satago: *Probate me super hoc*, *Mal. 3.*
dicit Dominus, si non aperuero vobis cataractas cæli, & effudero vobis
benedictionem vsque ad abundantiam. Tu propterea tamen nihilo
factus melior, in eadem perduras mente: *& in omnibus his*, ait *Ier. 21*
Dominus, non est reuersa in toto corde suo, sed in mendacio! nec pu-
tares inde capi damnationis tuæ tremenda præiudicia! O te in-
sensatum si non id sentis! Audi rursus quid de te Iudex tuus
pronuntiet: *VAE eis quoniam recesserunt à me, vastabuntur quia* *osee 7.*
præuicati sunt in me; & ego redemi eos, & ipsi locuti sunt contra
me mendacia. Ego erudiui eos & confortavi brachia eorum, & in me
cogitauerunt malitiam. *Reuersi sunt vt essent absque iugo, facti sunt*
quasi arcus dolosus; Id est, arcus qui non recte dimittit sagittam
in scopum, vel cuius sagitta retorquetur in ipsum sagittarium:
quasi diceretur, se ad necem ipsi designant, sua in se tela conuer-
tunt & arma, suis se bonis deteriores faciunt. *Hoc est iudicium,* *Ioan. 3.*
quia lux venit in mundum, & dilexerunt homines magis tenebras
quam lucem. Hæc recta & probata iudicandi ratio, de periculo
animæ, cum lucem perinde habet ac tenebras; cum diem illum
in qua lucebant ei Veritates saluberrimæ, quibus sanari poterat,
sic elabi finit, vt perinde post in tenebris ambulet, ac si lumen
non vidisset.

III. PUNCTVM.

H*I sunt igitur dies quos observare debemus. Hi sunt dies non minus diligenter observandi pro salute animæ quàm dies Critici pro sanitate corporis. Quia non minus ex his de animæ, quam ex aliis de corporis periculoso statu iudicari potest, si salutem non operetur, detestando ut oportet non solum omne peccatum, sed rem ipsam quæ est causa peccati, ut sæpe dictum est.*

Luc. 37. Dies tribulationis, & correptionis & blasphemia, dies hæc; quia venerunt filij usque ad partum, & virtus non est parienti. Non est partus, nisi verè id efficias quod concipis & promittis te facturum. Quo verò die id promittis, manifesta dies est tribulationis ac correptionis; & quia non promittis serìo aut non satis fideliter exequeris, recte dies etiam blasphemix dicitur, & dies decretorius, dies Criticus quo iudicari potest, te in summo versari periculo; tibi valde à te timendum.

Luc. 19. Nonne hoc ipsum est quod in Iudæis plorabat Dominus, quia si cognouisses & tu, & quidem in hac die tua, qua ad pacem tibi! dies nempe ista qua sic gloriose Christus ingressus est Civitatem, qua sic commoti sunt Ciues ut eum quasi Regem agnoscerent, dies eorum erat Criticus, si nempe perstitissent in illo pio affectu, si eius sequi consilia, si parere mandatis voluissent, si peccata deponere sicut laudatus ille Zachæus: hanc ipsam Domini vocem audissent & benedictionem accepissent, Salus huic domui, salus huic Civitati, salus unicuique conuerso: sed quia mox à seipsis defecerunt, quia nihil de peccatis deponendis cogitarunt, idcirco mutata in maledictionem benedictione, nihil aliud audiunt quam futuras impendentes poenas, eo quod non cognoveris tempus visitationis tuæ!

Notanda hæc singulariter verba quibus confirmat Dominus, quod iam à nobis dictum est, esse certum tempus quo inter alia de salutis negotio præsertim agitur, in quo agnoscendo & observando tempore nisi simus sagaces & seduli, peribit temporis Gratia quæ nullo umquam alio forsan occurret. Vnde & ipse Dominus: *Venient dies quando desideretis videre unum diem filij hominis, & non videbitis.* Et rursus: *Cum videritis nubem ab occasu, statim dicitis, nimbis venit, & ita fit: Et cum austrum flantem, dicitis*

dicitis quia estus erit, & fit. Hypocrita faciem cæli & terræ nostis probare; hoc autem tempus quomodo non probatis? Quid autem & à vobis ipsis non iudicatis quod iustum est?

Quod & multo ante per Prophetam illis exprobrarat, adducta similitudine volucrum: *Miluus, inquit, in cælo cognouit tempus suum, turtur & hirundo, & ciconia custodierunt tempus aduentus sui: populus autem meus non cognouit iudicium Domini!* Iudicium scilicet quo Dominus de anima iudicat; Iudicium quod ipsa debet anima de Domino iudicare, sed alio plane diuerso sensu, nempe agnoscendo tempus quo sibi ab illo Gratia conferuntur, agnoscendo suam in his accipiendis & vsurpandis fidelitatem, agnoscendo suum periculum nisi fideliter obsequatur, vnde idcirco tam sæpe & grauiter Apostolus: *Adiuuantes exhortamur ne in vacuum Dei gratiam recipiatis, ait enim, tempore accepto exaudiui te, & in die salutis adiunxi te, ecce nunc tempus acceptabile, ecce nunc dies salutis.*

2. Cor. 6.
1. s. 49.

Ecce nunc vere dies in quibus ad salutem operandam non minus Gratia singularis nos adiuuat, quam natura corpus ægroti statis illis diebus vt dictum est, ad sanitatem comparandam. Sic itaque cum Gratia singulariter operemur, atque hoc in primis penitus animo persualum habeamus, totam illam operam nostram in hoc præcipue positam esse, vt peccatum deponamus, & certum quoddam peccatum quod vniuscuiusque morbus est grauior, & mortis æternæ futura est causa, nisi serio deponatur.

Hoc intelligendum, hoc inculcandū, hoc importune & opportune repetendum, non in ieiuniis, non in precibus, non in peregrinationibus aut aliis quibuscumque operibus ita positam esse operam quæ à nobis exigitur, ad sanitatem animæ cum præsentī gratia recuperandam, sicut in peccato expellendo. Non est noster morbus, non orare his diebus, aut etiam non confiteri: sed hæc est tota mali labes non mutare vitam aut non auocare animum ab illis rebus & obiectis quæ nos in peccatum solent inducere. Hoc est quod spectat parata Gratia, hoc est quod nos trahit, hoc est quod nos illam sequi possimus. Ieiunauerunt Niniuitæ, saccis operati sunt, & multis se dederunt lamentis; at nullo tamen istorum operum placatus dicitur Deus, sed tantum mutatione vitæ. *Vidit Deus opera eorum,* inquit Sacer textus, *at quænam opera,* quærit sanctus Chrysostomus, *quod ieiunauerunt? quod saccum induerunt? nihil*

Iona 3.

Hom. 3.
ad Pop.


362 Dominica Palmarum. Quia si cognouisses & tu, &c.

horum, sed hæc omnia tacens intulit, Quoniam conuersus est quisque à viis suis malis. Cernis quod non ieiunium periculo eripuit, sed vitæ mutatio.

Hoc est firmum quod dicunt propositum, quo sic muniri debet nostra Confessio, vt tam salubris sit futura, quàm firmum fuerit & solidum hoc emendandæ vitæ propositum.

Angeretur fortasse animus, laborabit in dissoluendis vinculis quibus mundo tenetur, timebit famæ, pœnas metuet, & anxia futuri sollicitudine retardabitur, sed nihil horum vereatur, *Act. 20.* nec faciat animam suam, id est, animalem illam partem quæ rationi & gratiæ se opponit, non faciat inquam pretiosiorẽ quam se. Hæc est Chrisis, hæc est pugna, hæc agonia quam ipse Dominus subire voluit vt nobis esset exemplo sic pugnandi & vincendi. Nonne sic Dominus in horto timere voluit, nonne inde agonia & sudor fluxit sanguineus? Sed timorem vicit nostræ salutis amor. Nos tùm sibi præsentis fecit, & nostri gratia nihil *Hebr. 12.* duri, nil asperi recusauit. Sic deponentes omne pondus & circumstans nos peccatum, per patientiam curramus ad propositum nobis certamen, aspicientes in Authorem & Consummatorem Iesum; vt fulius Feria sequenti sexta. Concludat vero, aut alio quo voles loco, discursum hunc illustret & accendat Diui Bernardi suauis ac potens adhortatio: Redite ergo prauaricatores ad cor, & in toto corde quarite Dominum, & odite malum: pœnitentes non verbo tantùm & lingua, sed spiritu & veritate. Quia vero non satis cecidisse piget hominem, vt videtur, qui adhuc manere disponit in lubrico: aut crasse qui ducem non quarit, SIT VERAE COMPVNCTIONIS INDICIUM, OPPORTVNITATIS FUGA, SUBTRACTIO OCCASIONIS. Alioquin timendum valde ne dies ista, si quidem & ipsa posita est in ruinam & resurrectionem multorum in Israel, reprobet vos, vel tamquam manifeste alienos à Christo, Christo non communicantes, vel tamquam socios Iuda in quem intravit Satanas post buccellam.

Serm. I.
de Resurr.
Dom.



FERIA SECVNDA.

DE SECVNDO CHRISTI DOMINI
VERBO.

Amen, dico tibi, Hodie mecum eris in Paradyso.
Luc. 23.

ET DE EA RENVNTIATIONIS SPECIE QUÆ
SPECTAT VSVM SVÆ POTESTATIS.

VERITAS PRACTICA.


Impietatis genus est pietatis Cultoribus nimis commune: plura quàm possint, velle facere: & quæ possint, non facere.

RATIO cur hoc sit impietatis genus, hæc est inter alias quod velle aliud quàm velit Deus, sub prætectu quodam pietatis, impietatis est quoddam genus.

Sed hoc volunt qui plura quàm possunt volunt, & quæ possunt non faciunt.

Ergo id impietatis genus est; Quod quàm sit nimis commune pietatis Cultoribus, tu ipse ex teipso intelliges si te attente prospexeris.

I. P V N C T V M.

 V A M diuersus vtriusque latronis simul cum Christo pendentis status! Quàm longe alia mens, alia verba & alius eorum vitæ exitus, qui forte eadem vitæ principia seu idem viuendi genus sectati fuerant! ô Diuina Iudicia! Ac

primo quidem videtur vterque simul blasphemasse in Christum cum Iudæis, sic enim aperte sanctus Matthæus: *Idipsum autem & latrones qui crucifixi erant cum eo, improperebant ei.* Itemque sanctus Marcus, *& qui cum eo crucifixi erant conuiciabantur ei.* Cum vero vnus eorum insolentius blasphemaret dicens: *Si tu es Christus, saluum fac teipsum & nos;* Tum factum est quod Sanctus Lucas refert, *Respondens autem alter, increpabat eum dicens, neque tu times Deum, quod in eadem damnatione es; & nos quidem iusti, nam digna factis recipimus, hic verò nihil mali gessit. Et dicebat ad Iesum, Domine memento mei, cum veneris in regnum tuum. Et dixit illi Iesus; Amen dico tibi, hodie mecum eris in Paradyso.*

Quæ omnia longiori consideratione dignissima, sed & illud in primis quod non est ita forte obuium & vulgare Considera, quàm rectum agendi modum seruet Christus, circa hos duos latrones, quàm iustum & temperatum suæ potestatis vsum exerceat. Ecce enim qui tam profusus est erga vnum, vt statim atque locutus est, paradysum promittat; Alteri tam parum liberalis videtur, vt vix ad eius Conuersionem aliquid possit, aut velit.

Si tantum potest erga vnum, vt de latrone Confessorem & Beatum repente faciat, cur non illam potentiam in alium æque exercet? Ne plura curiosius anime perscruteris; Illud vnum admirare quod supposito vtriusque diuerso statu, sic Christus vtrique potestatem suam accommodat, vt quod videret in vno se debite posse, liberalissime faciat; quod autem spectaret in alio se non æque posse, non appetat vltra facere quam quod potest; vellet quidem vtrumque conuerti, si Deus ita vellet, sed quia Deus non ita vult de vtroque absolute; neque etiam ipse vult aliter quam quod Deus.

O perfectum Renuntiationis exemplar, contra quod tam multi peccant, quàm multi sunt pietatis Cultores qui plura quàm possint velint facere: & quæ tamen possunt non faciunt. Non est hæc pietas, non est hic pietatis cultus sed impietatis quoddam genus valde execrandum.

Ratio est obuia & familiaris; Quid est enim impietas nisi aliter de Deo sentire, aut aliter ei velle seruire quam ipse velit & ordinet? *Vidi, inquit Sapiens, sub sole, loco iudicij, impietatem, & loco Iustitiæ Iniquitatem;* Id est vidi res aliter geri ab hominibus quàm æquitas & iustitiâ postularent, quod est impium & ini-

Impietatis genus est plura quàm possis velle facere, &c. 365

quum, seu contra Deum, & homines. Atque hoc quidem magis contra Deum est & magis impium, quando fit sub prætextu pietatis & æquitatis: neque enim ut ait sanctus Augustinus, simulata æquitas est æquitas, sed duplex iniquitas, quia & iniquitas est, & simulatio. *Va impio in malum, retributio enim manuum eius is. 3. fiet ei.*

II. PUNCTVM.

SED qui plura quàm possint, volunt, circa cultum Dei; & quæ possunt non faciunt, volunt aliter Deo servire quàm ipse velit.

Nam cum potestas bene agendi sit à Deo, sicut potestas Regendi, certe quando datur aut negatur alicui potestas, datur index & interpret quædam Diuinæ voluntatis circa illud agendum, cuius est data vel negata potestas; sicut enim quando quis debet & potest agere, signum est Deum velle ut agat; sic quando non potest, manifestum est indicium quod Deus nolit. *Fidelis Rom. 13. Deus, inquit Apostolus, qui non patietur vos tentari supra id quod potestis. Itemque alibi, Quemadmodum promptus est animus voluntatis, ita sit & perficiendi, ex eo quod habetis. Si enim voluntas prompta est, secundum id quod habet accepta est, non secundum id quod non habet; id est hoc tantum ab vnoquoque requiritur quod ipse potest, non quod non potest, unicuique sicut Dominus dedit, ait expresse Idem.*

Quamobrem liquide patet quod qui plura quam possint, volunt pro Deo facere, volunt quod non vult Deus, qui nihil ab vnoquoque vult nisi quod quisque possit. Et cum non faciunt quod possunt & debent, nolunt quod vult ab eis Deus qui dedit posse quæ præcepit. Ac proinde quis non videt eos aliter atque aliter velle servire Deo quam ipse velit? Et quidem tam obfirmate volunt, ut non semel duntaxat Diuinæ repugnent voluntati, negando quæ ipse vult; sed rursus eidem repugnant, cum illud etiam velint quod non vult Deus; quasi melius norint quid sit acceptum & gloriosum Deo quàm ipse Deus norit, *Numquid Deus indiget vestro mendacio, ut pro illo loquamini dolos! Numquid faciem eius accipitis, & pro Deo iudicare nitimini? aut placebit ei quem celare nihil potest? aut decipietur ut homo vestris fraudulentis?* Sic apte Iob.

III. PUNCTVM.

IMPIETATIS ergo genus est, pietatis cultoribus valde cauendum, cum plura volunt quàm possint facere; & quæ possunt non faciunt. Sic enim aliter Deo seruire volunt quam ipse velit, quod est omnino impium. Numquid vult Dominus holocausta & victimas, & non potius ut obediatur voci Domini? Saltem si illi quod possunt facerent, forte desiderium illud plura faciendi quàm possunt, non esset malum: sed cum non faciant quod possunt, & quod sciunt se debere facere: profecto quidquid appetunt plus quam possunt, non propter Deum appetunt, cui si seruire & magis placere vellent ex animo, non illud negligenter omitterent quod possunt. *Quid vocatis me, Domine, Domine, & non facitis quæ dico?* quasi diceret, quid à me plura petitis, cum non ea faciatis quæ scitis?

1. Reg. 15.

Luc. 6.

Ebd. 14.

2. Tim. 2.

Vide hinc in quo deficias: quàm multa possis cum Gratia quæ non facis! quàm falso & fraudulente sub quadam specie pietatis plura desideres quæ non habes! Renuntia his vanis desideriis, Accepta tam libenter priuationem negatæ potestatis, quàm libenter datæ vsum exercebis: paratus esto ad maiora per fidelem minorum curam, & diligentem officij tui administrationem; Sic *omni habenti dabitur & abundabit.* Denique labora sicut bonus miles Christi Iesu. Bonus miles non sibi locum dat pugnæ, sed datum seruat, & dum in illo seruando pugnat & laborat, meretur palmam & locum insigniorem.

PRO EADEM FERIA QVADRAGESIMALI.

Ad Euangelium, de Cæna in Bethania, ante sex dies Paschæ. Ioan. 12.


De hac Cæna, & de odoriferis Magdalenæ vnguentis, In 4. parte, Feria 3. hebdomadæ 26.

Verùm si quid aliud à Domini Verbis hinc expositis considerandum aut dicendum velles, hac sancta hebdomada, consultius foret illud ex internis Christi doloribus supra declaratis, vel ex ali,

Qui nimis suos diligit, non satis diligit.

367

quo passionis morali mysterio desumere; semper id spectando
ut cum tibi tum aliis, emendatiorem vitam persuadeas.



FERIA TERTIA.

DE TERTIO CHRISTI VERBO.

Mulier, ecce Filius tuus.

Ecce mater tua.

ET DE PERFECTA RENUNTIATIONE
INORDINATI AFFECTVS ERGA PARENTES,
AVT ALIAS PERSONAS CARAS.

VERITAS PRACTICA.

Qui nimis suos diligit, non satis diligit.

RATIO EST, quia qui nimis suos diligit, naturali tantum
affectu eos diligit.

Sed qui naturali tantum affectu suos diligit, non satis diligit.

*Ergo qui nimis suos diligit non satis diligere dicendus est, & fa-
cit iniuriam Deo, sibi & suis.*

I. PUNCTVM.

STABANT autem, inquit sanctus Ioannes, iuxta Crucem
Iesu, Mater eius & soror matris eius, Maria Cleopha, & Ioan. 19.
Maria Magdalene. Cum vidisset ergo Iesus Matrem & Disci-
pulum stantem quem diligebat, dicit Matri suae; MULIER, ECCE
FILIVS TVVS. Deinde dicit Discipulo, ECCE MATER TVA.
Et ex illa hora, accepit eam Discipulus in sua.

Quali cum sensu pietatis, compassionis, ceterorumque affe-
ctuum tum dolentissimæ Matris, & carissimi Discipuli erga pen-

dentem Iesum; tum pendentis Iesu erga suos dilectissimos, hæc gesta dictaque fuerint, fusè habetur in Meditatione vernacula, tuncque ipse facile contemplari potes. Expendendum vero illud ad praxim, quàm perfectam Renuntiationis affectuum formam proposuerit Dominus, circa parentes aut alias personas nobis caras. Cum enim ex alterutro æque peccari possit, ut non satis vel nimis eos diligamus; sic ille temperauit affectum suum, seu affectus sui effectum, ut nec defuerit pietati, neque nimis affectui indulserit. Certe nisi temperasset naturalem suum affectum, non permisisset matrem illic adesse præsentem, & tantum pati quantum talis Mater in tali morte Unigeniti pati potest. Verum quia sic illi & nobis expediebat ut quos dolores fugerat pariens Filium, eos sustineret parturiens illic quodammodo genus humanum: idcirco permisit eam interesse suæ morti & sese mutuis compatiens animi vulneribus simul exulcerare.

Neque verò se ita continuit aut humano affectui renuntiavit quin eam benignè intuitus, & solando allocutus, & omni pietatis officio fuerit profectus. En ut fidelissime suo Discipulo illam commendat, Itemque Discipulū matri! *Ecce filius tuus, Ecce mater tua.* O tela pietatis ardentissima! Perge aliquādiu in his affectibus; ac deinde ad propositam Veritatem delabere: Est enim Consideratione dignissima & ad praxim opportunissima; Nam ita simul extrema iungit & temperat ut quod in illis est vitiosum extirpet; & quod est officij seu perfectionis, persuadeat.

Sic ergo habet, *quod si nimis tuos diligis non satis diligis*; Etenim nimia illa dilectio non nisi naturalis est & humana, nam si esset supernaturalis & diuina non esset inordinata nec nimia, cum Diuina Charitas sit ordinata aut non sit Diuina; superest igitur quod sit tantum humana & naturalis affectio quæ ordinariè nimis sensibilis est, & in excessum vergens.

1. Reg. 2.

Talis erat amor illius patris cui Deus exprobrauit; *magis honorasti filios tuos quam me.* Num tibi idem exprobrare posset? & num tibi hac exprobratio satis dura videtur?

II. PUNCTVM.

SED qui naturali tantum affectu suos diligit, non satis diligit. Nam cum supernaturalis affectus sit multo præstantior naturali,

naturali, siue eius originem, siue finem & terminum, seu modum diligendi spectes; Certe qui non diligit suos illo affectu supernaturali, non satis diligit; quandoquidem illis negat amorem præcipuum & excellentiorem; At vero qui suos colit naturali tantum affectu, eò minus illos supernaturali diligit quod naturalis est nimius: nam sua illa nimietate tantum detrahit de supernaturali, quantum excedit rationabilem & Christianum diligendi modum. Si naturalis esset temperatus & subditus supernaturali, se quidem mutuo compaterentur, seseque inuicem confouerent: sed cum naturalis est nimius, sibi ordinarie subiicit supernaturalem, eiusque actus & operationes ita impedit ut non supernaturali sed naturali tantum affectu suos diligit qui nimis diligit: ac proinde non satis diligit. Hinc apte S. Petrus Chrysologus: *Amarat nimietas quod poterat condire mensura.* Et aperte Christus Dominus. *Nonne & publicani, nonne & Ethnici Maub. 5. hoc faciunt?* O impiam pietatem quæ diuina commutat humanis, & supernaturalia naturalibus! dumque suis minora effundit, negat maiora.

III. PUNCTVM.

QUI nimis igitur suos diligit non satis diligit; Quia non eos diligit præstantiori dilectione, quæ ipsa Charitas est, ubi nec pius nec minus reperitur dicente sponsa de sponso in Canticis, *Ordinauit in me Charitatem*: vnde sanctus Augustinus, *Amor* Cant. 2. L. 13. de c. 14. *ipse ordinate amandus est, quod bene amamus, quod amandum est, ut sit in nobis virtus qua viuatur bene.* Atque hinc liquet quod alij sancti Patres dicunt de odio quo iubemur à Christo parentes prosequi, nempe ex illo odio procreari verum amorem; cum enim odium idcirco tantum præcipiatur ut rececet nimietatem affectus naturalis, eaque temperata sinatur agere Charitas: profecto eò maior erit amor quo maius odium, id est eo magis operabitur Diuina Charitas quò minus affectus naturalis eam impediet, & sic ex odio amor, sicut ex amore odium; ut præclare inter alios sanctus Gregorius; *Quia sic propinquos sicut nosmetipsos odio habere præcipimur, discamus temperata eos discretionis arte, & conuenienter diligere, & salubriter odio habere; quatenus sic sciat per amorem odium surgere, ut valeamus eos verius per odium amare.*

Alioquin certe qui non ita per odium suos amat, non leuem facit iniuriam Deo, sibi, & suis. Deo quidem, quod Deum minus amat qui aliquid præter eum amat. quod non propter eum amat. Ille autem affectus naturalis qui est nimius non est secundum Deum neque propter Deum, cum ut resecetur, præcipiat Deus odium. Sibi autem etiam nocet, cum ex illa inordinatione præcipui affectus qui est amor, cæteræ affectiones deprauentur, & virtutes, Deuotio, Caritas, Castitas, Paupertas, aliæque innumera non leue detrimentum accipiant. Suis denique etiam male prouidet, cum supernaturalem eis amorem denegat & Diuinos inde effluentes effectus; Etenim quid affini, quid amico, parenti aut cuiusque personæ comparare possis utilius quam si diuina illis impetres beneficia? Quandònam vero efficacius impetrabis, nisi cum ex vera & Diuina Charitate rogabis? Putasne valituras illius preces qui suos inordinate diligit, apud Eum qui toties dixit; *Si quis venit ad me & non odit patrem suum & matrem, & uxorem, & filios & fratres, & sorores, adhuc autem & animam suam, non potest meus esse Discipulus?* Et hoc illis subtracto beneficio quod maximum à te sperare possent, nonne illis iniuriam facis? Et nonne minus eos amas quantò nimis amas? Aduerte igitur diligenter, & disce à Christo tuos diligere qui è Cruce nos docuit perfectam hanc Renuntiationis formam: *tamquam lignum illud ubi erant fixa membra morientis, etiam cathedra fuerit Magistri docentis*, ait sanctus Augustinus, ubi agit de hoc tertio Christi verbo.

Luc. 14.
Matth. 10.

S. August.
Tr. 129. in
Ioannem.

Vide in 3. parte, FERIA 3. hebdomadæ 5. ubi hæc declaratur Veritas: *Solum pietatis genus est in re salutis aduersa, suis esse crudelem.*



FERIA QVARTA.

DE QVARTO CHRISTI VERBO.

Deus meus, Deus meus: Vt quid dereliquisti me?
Matth. 27.

Beatius est, carere omni sensibili de' consolatione, quàm ea abund. 371

ET DE VOLUNTARIA RENUNTIATIONE
CVIVSLIBET SENSIBILIS CONSOLATIONIS.

VERITAS PRACTICA.

Beatius est carere omni sensibili Consolatione , quàm
ea abundare.

*RATIO est, quia beatius est magis dare Deo quam accipere.
Sed qui caret omni sensibili consolatione dat Deo, quantum homo
dici potest illi dare.*

Ergo beatius est magis eâ carere quàm abundare.

I P V N C T V M.

VT melius intelligatur quomodo Christus potuit esse de-
relictus à Patre, considerandi sunt quinque modi quibus
illi erat vnitus. Primus, per Vnionem hypostaticam; Se-
cundus per Visionem beatificam; Tertius per Gratiam Sanctifi-
cantem; Quartus per Charitatem actualem seu perfectam vo-
luntatum conformitatem; Quintus denique, per assistentiam
quâ cum iustis præcipue Deus adest eos protegendo, confortan-
do sensibiliter, aut aliis modis consolando; Sic ipse toties pro-
mittit in scripturis; *Cum transieris per aquam tecum ero, & flumina is. 43
non operient te; cum ambulaueris in igne, non combureris, & flamma
non ardebit in te, Noli timere, quia ego tecum sum.*

Atque hoc quinto solùm modo derelinqui potuit à Patre
Christus & à seipso, non autem primis quatuor modis; Sic au-
tem derelictus est, vt nulla prorsus consolatione sensibili aut
alia deùm ratione, tum extremos quos patiebatur dolores
voluerit mitigare; sed pure & plene suerit suum corpus atque
inferiorem etiam animæ partem pati, quantum naturaliter ex vi
tormentorum & omnibus aliis circumstantiis dolorem augenti-
bus dolere & pati poterat. *Intrauerunt aqua vsque ad animam Ps. 68.
meam, infixus sum in limo profundi & non est substantia, dicebat
Dauid in eius persona. Sed & nobilis est Psalmus ordine vigesi-
mus primus ac totus de passione Christi, qui ab hoc versu incipit
quem Christus Dominus clara voce pronuntiauit: Deus Deus*

372 FERIA 4. Hebd. Sancta. Deus meus, Deus meus, vt, &c.

meus, respice in me, quare me dereliquisti; Et vt quidam existimant, continuauit, ibi loquendo de delictis suis. quasi nos ipsi per eum loqueremur. Quod si tantum prima illa verba protulit quæ videntur querimoniam continere: Vox ista non querela sed doctrina est, inquit sanctus Leo, expressio scilicet doloris maximi & vehementissimi cruciatus: vt intelligeremus quò vsque peccati poena deuenerit; atque ad eam patientiam eius exemplo vehementius excitaremur, nulla vt prorsus consolatione sensibili, dolores nostros leniri vellemus.

L. 2. c. 9.

Non est graue humanum contemnere solatium cum adest diuinum, ait optime Author libri de Imit. Christi, Magnum est & valde magnum tam humano quam Diuino posse carere solatio, & pro honore Dei libenter exilium cordis velle sustinere, & in nullo seipsum querere. Hoc est scilicet totum esse Dei, quo quidem statu nihil præstantius; & hac consideratione nihil efficacius ad illum statum vel desiderandum vel libenter recipiendum, quando sic Deus ordinari.

Act. 20.

Sic ergo attente considera quod habet Veritas; Beatius esse magis carere omni consolatione sensibili quam ea abundare; Nam, vt ait Apostolus, oportet meminisse verbi Domini Iesu, quoniam ipse dixit, Beatius est magis dare quam accipere. Quod vniuersim & absolute dictum de omni genere doni, magis adhuc videtur verum de donis quæ Deo fiunt; nam vt optimè & fusissime ait S. Ioannes Chrysostomus, beatius est debitorem habere Deum quam nouis nos debitis apud eum constringere; Cum iam enim tam multa illi debeamus, cumque ex tot capitibus seu nominibus mereatur à nobis coli, certe nihil amanti Deum accidere potest beatius, quam si eum qualicumque beneficio demereri aut si fieri possit debitorem habere valeat. Hoc Beatissimæ Virginis tamquam singulare aliquod priuilegium à sancto quodam Patre prædicatur, Euge quæ debitorem habes Eum cui nos debemus vniuersi. Nonne ergo tibi, Anima, gloriosum & beatum erit si quid simile tibi dici potest! Euge quæ debitorem eum habes cui tam multa debes! Da quantum dare potes Deo, & hac beatitudine potièris.

Methodius
Serm. de
Purif.

II PUNCTVM.

SED qui caret omni sensibili consolatione dat Deo quantum homo dici potest illi dare.

Supponi duo debent ad declarationem huius propositionis; Primum est, sermonem esse de homine qui se profiteatur Dei & virtutis Cultorem. Alterum, quod libenter talis in obsequio Dei, carere velit omni prorsus sensibili consolatione; Quibus præsuppositis, aperte patet tum illum hominem dare Deo, quantum illi à nobis dari potest; Nā quid vltra cogitari potest quod à seruo detur, si postquam Domino suo quàm potuit cumulate ministrarit, nihil prorsus pretij, nihil mercedis, ne quidem cibum reposcat, imo se beatum putet si gratis illi seruiat, vel si etiam male tractetur à Domino, nihil de seruitio suo remittat, imo eo magis augeat vsque ad mortem quo peius tractatur.

Certe si seruus aliquis inuitus & nolens eo miseriarum redigeretur, vix esset vlla inferior seruitus, vt patet in Israelitis sic Pharaoni seruientibus in Ægypto; sed si seruus aut filius sic Domino vel patri libens volentique seruiret, profecto non esset quod seruitus seu quod donum inferioris ad superiorem extendi posset vltcrius aut altius promoueri. *Die noctuque astu urebar & gelu.* Gen. 31. Vide quæ plura de se dicebat Iacob in hanc sententiam. Cum ergo hic Dei cultor sit ita liberalis in Deum, vt post omnia rite persoluta, nihil prorsus nisi angores & tædia velit recipere, quid superest quod dare possit Deo? Neque enim tantum illi reddit obsequia debita, verum & illud maxime tradit quod maxime desiderare posset, nempe vt se gratum esse Deo suo sentiret; quo quidem sensu & desiderio dum se libenter priuat, & se seruū inutilem in veritate pronuntiat, se ita omnibus & seipso priuat, vt vere is sit qui pauper & nudus spiritu dicatur, & qui cum Propheta dicat, *Quia vnicus & pauper sum ego.* NEMO tamen isto ditior, nemo potentior, nemo liberior qui se & omnia relinquere scit, & ad infimum se ponere. Vide libri secundi caput vndecimum: & in 3. parte, in fine, vbi de voto paupertatis: ac in 4. Feria 6. & Sabbato hebdomadæ 17.

Gen. 31.

Pf. 24.

L. 2. de
Imit. Chr.
c. 11.

III. PUNCTVM.

BEATIVS est igitur magis carere omni sensibili consolatione quam ea abundare; cum sit dare Deo beatius quàm recipere, per illam autem carentiam humani solatij, Deo detur quàm liberalissimè dari potest.

Exigua quidem res est, & in quibuslibet donis nostris sentien-
i. Par. 29. dum cum Dauide, & dicendum Deo, *Tua est Domine magnificen-
 tia & potentia, tua sunt omnia, & quæ de manu tua accepimus de-
 bemus tibi. Omnis hæc copia quam parauimus, de manu tua est, & tua
 sunt omnia.*

Serm. de Sed, vt optime etiam ait sanctus Bernardus, *cum id totum
 Quad. de- dedit homo quod potest, certe liberalior esse non potest, & ipsius est
 bito. Diuina magnificentiæ, sua id acceptatione magnum facere quod suo
 alioquin pretio nullum aut valde modicum esset.*

Iam verò vide accuratius quæ tuæ sint partes circa hanc Ve-
 ritatem, quis animus, quis vitæ status? Si quid desit solatij, tene
 beatum putas? tene beatiorẽ aliis qui redundant bonis? Et
 vnde ergo illa murmura, illi languores, illæ inuidiæ, quando
 te miserum præ aliis & infortunatiorẽ putas? Non aliunde est
 quàm quod mala pateris quæ non illi patiuntur, vel bona non
 habes quæ ipsi possident; At ecce, beatius est mala omnia per-
 peti & bonis carere omnibus, quam abundare: Quomodo ergo
Job. 45. te miserum dicis? *Dixisti, va misero mihi! & tu quaris tibi gran-
 Tob. 10.* dia! *Noli querere. NOLI turbari. NOLI emulari in eo qui pro-
 Ef. 3.6* speratur.



FERIA QUINTA.

DE QUINTO CHRISTI VERBO.

Sitio. Ioan. 19.

ET DE INTERNA RENUNTIATIONE
DESIDERII CUIUSLIBET INORDINATI,
ETIAM SPIRITUALIS.

VERITAS PRACTICA.

Sic pia etiam desideria debent esse ardentia & temperata, ut qua ratione sunt ardentia, eadem sint & temperata.

RATIO cur desiderium naturale debeat esse temperatum satis patet; Cur autem & quomodo ipsa etiam pia desideria quae debent esse ardentissima, possint & debeant esse temperata.

RATIO EST, quod idcirco vehementia & ardentia esse debent, quia res quae desideratur, sic merito suo exigit desiderari.

Atqui eadem ipsa res postulat ut temperatè desideretur.

Ergo quæ ratione debent esse ardentia; debent esse & temperata.

I. PUNCTVM.

TRIPLEX hinc Christi Domini sitis considerari potest, Corporalis, Spiritualis, & Sacramentalis. Corporalis quæ reuera corpus multum laborat: Spiritualis qua Christi animus ardentè sitiebat salutem animarum; Sacramentalis quæ modò existens in sanctissimo Sacramento, quod hac sacra instituit die, vehementer desiderat sibi vniri animam.

In hac triplici autem siti, perfectæ Renuntiationis speciem nobis exhibuit, quæ non modo appetitus naturalis cohibeatur, sed & ipsa meliora & maxime pia desideria ita temperentur ut non desinant esse ardentia, & ita semper ardeant ut simul sint temperata. Vide enim primò ut nullus ei sitienti aquam subministrat, imo eum felle & aceto potant, quod certe est crudelitatis genus acerbissimum. Deinde considera quàm pauci saluantur cū tamen omnes saluari desideret; & in illa paucitate saluandorum, nec plurium nec aliorum quàm reipsa salui fiant salutem obtineat: Vnde mirum, quantopere desiderio suo renuntiet. De-

nique quàm multo etiam pauciores vehementissimè eius desiderium expleant, quo sibi omnes in Communione sui Corporis & Sanguinis vniri vellet, quàmque patienter & temperate ferat illam sitim seu rei desideratæ priuationem. Sic discere renuntiare non modo appetitui naturali, in iis quæ spectant necessitates corporis, sed in ipsis etiam spiritualibus desideriis, quæ sic debent esse ardentia vt sint simul temperata.

Ratio cur ardere & feruere debeant, hæc refertur, quòd res spirituales quæ desiderantur id merito suo exigant, vt non quolibet desiderio sed vehementi & excitato concupiscantur: sicut enim *Matth. 5.* ipse Christus Dominus beatos dicit qui *esuriunt & sitiunt Iustitiam, quia ipsi saturabuntur*, quasi diceret, nisi sic esuriant & sistant non saturabuntur; quia re ipsa perfectio & quæcumque ad eam conferunt, sunt ita supernaturalia, sublimia, & excelsa vt nisi eorum sit vehemens desiderium, vix attingantur. Adde quod cum exquisita sint & pretiosissima Dei dona, ad quæ ipse nos disponit suis antecedentibus gratiis; ordinaria hæc dispositio fit per illa desideria, quæ quo sunt acriora, eo capacior recipiendorum Dei munerum redditur animus; vnde sanctus Bernardus, *Serm. 1. in Festo sancti omn.* *qui esurit, esuriat amplius; qui desiderat, abundantius adhuc desideret, quoniam quantumcumque desiderare potuerit, tantum est accepturus.* Sanctus item Augustinus, *In Ps. 83.* *desiderium eorum differtur vt crescat, crescit vt capiat: Non enim parum aliquid daturus est Deus desideranti, aut parum exercendus est ad capacitatem tanti boni.*

II. P V N C T V M.

ATQVI eadem ipsa res postulat vt temperate desideretur, seu vt desideria illa temperentur.

Non ita quidem vt non sint semper ardentia & vehementia sed vt ardor sit temperatus, hoc sensu, quod quidquid spirituale & Diuinum desideratur, non aliter desideretur quàm vt pure Deus videt nobis expedire ad suam Gloriam, & Voluntatis suæ Beneplacitum adimplendum. *1. p. ph.* *Secundum propositum voluntatis suæ, inquit Apostolus, in laudem gloria gratia suæ, in qua gratificauit nos in dilecto filio suo.* Atque ita, vt vides, ardor & vehementia desiderij non tollitur, quia semper Dei voluntas eiusque gloria, nec non nostra perfectio, vehementissime desideranda sunt; sed.

sed modus adhibetur & in modo temperamentum includitur, quatenus scilicet Deo ipsi videbitur, cum reuera nulla sit cuiusquam perfectio, nec vlla Dei gloria, nisi sic temperate & conformiter ad Diuinam eius voluntatem ordinentur, quæ ponit mensuras & gradus vniuscuiusq; statui & perfectioni. *Secundum 2. Cor. 10. mensuram regula quamensus est nobis Deus. SECUNDVM opera- tionem, in mensuram cuiusque membri.* Ephes. 4.

Vnde manifeste patet, rem ipsam quæ postulat vt desideria ferueant, exigere etiam vt temperentur; quia ipsa est Diuina voluntas in omnibus desideriis proposita, & ardentem quidem desideranda vt fiat: sed temperate simul desideranda, vt ne aliter fiat quam ipse Deus ordinet. *Deus autem pacis qui eduxit de mor- tuis pastorem magnum ouium in sanguine testamenti æterni, Dominum nostrum Iesum Christum, aptet vos in omni bono, vt faciatis eius voluntatem, faciens in vobis quod placeat coram se, per Iesum Christum.* Hebr. 13.
Hoc est scilicet desiderium temperate ardens, & ardentem temperatum.

III. PUNCTVM.

APPARET ergo euidenter quàm necessario duo illa quæ videntur *repugnare, sint simul coniungenda*; & quàm adeò non vnum. deservat aliud, vt potius sese mutuo stabiliant, & velut duo rui ex eodem fonte scaturientes, qui simul coeant & irrigent vberius terram cordis arentem & sitientem: *sicut rui aquarum in siti*, ait 1^a; 2^a. Propheta. Horum vero duorum defectum in nostris desideriis manifestè arguit sanctus Iacobus: *Concupiscitis & non habetis: & non habetis propter quod non postulatis. Petitis & non accipitis, eo quod male petatis, vt in concupiscentiis vestris insumatis.* Luc. 4.
Quod enim ait, *non postulatis*, defectus ardoris est; quod vero addit *male peti vt quod petitur in concupiscentiis insumatur*, ardoris excessus est, & defectus temperamentum quod Sapiens sapienter suggerit, primo inquirens, *Anima vestra sitiunt vehementer?* tum subiiciens: *suscipiat anima vestra disciplinam*: id est addiscat & seruet modum formandi sui desiderij. Vide propterea librum tertium de Imitatione Christi capite vndecimo, tricesimo octauo & tricesimo nono: vbi de his copiosè. Expènde hæc inter alia; *Desideria te saepe accendunt & vehementer impellunt, sed considera an propter ho-* Ecclesi. 57.

378 FERIA 6. quæ Parascene dicitur. Consummatum est.

norem meum, an propter tuum commodum magis mouearis. Si ego sum in causa, bene consentus eris quomodocumque ordinauero; si autem de proprio quæsitum aliquid latet, ecce hoc est quod te impedit & grauat. Committe mihi semper causam tuam, ego bene disponam in tempore suo. Expecta ordinationem meam, & senties inde profectum. Non est minimum in minimis seipsum relinquere. Verus profectus hominis est abnegatio sui ipsius, & homo abnegatus valdè liber est & securus.

Plura de desiderijs vide in 1. parte, Feria 5. hebdomadæ 1. Aduentus. In 2. parte, tota hebdomada Ascensionis Domini, & Sabbato vigilia Pentecostes. In 3. parte, Feria 5. hebdomadæ 3. In 4. parte, hebdomada 26. & alibi passim.

De Cæna vero Domini, & de Sanctissimo Sacramento, seu etiam de Communione, Vide in 1. parte Dominica 4. Aduentus & Sabbato hebdomadæ 3. post Epiphaniam. In 2. parte, Feria 5. Septuagesimæ, & Feria 6. hebdomadæ 4. post Pascha. In 3. parte, totis duabus primis hebdomadis: necnon Feria 5. 6. & Sabbato hebdomadæ 13.



FERIA SEXTA QUÆ PARASCEVE DICITVR.

DE SEXTO CHRISTI VERBO.

Consummatum est. Ioan. 19.

ET DE ABSOLVTA RENVTIATIONE
OMNIVM QUÆ SVPERSVNT IN HAC VITA,
VT CONSVMMEMVR CVM CHRISTO.

VERITAS PRACTICA.

Aut nihil hodie ages, aut sic semper ages.

RATIO est, quia nisi eorum omnium quæ aguntur hodie, finem
assequaris, nihil à te actum existimari prudenter potest.

Aut nihil hodie ages, aut sic semper ages.

379

Sed eorum finem non assequeris nisi sic semper perseueres.

Ergo aut nihil hodie ages, aut sic semper ages.

I. P V N C T V M.

SI C piis affectibus indulgendum, ut quod est præcipuum ad absolutam Renuntiationem non omittatur. Ad utrumque autem plurimum valet attenta Consideratio expirantis in Cruce Christi, & sic omnia consummantis. *CONSUMMATVM EST*, inquit, & *inclinato capite, tradidit spiritum.* Ioan. 19.
Hebr. 4. O verbum penetrabilius omni gladio ancipiti, & pertingens usque ad diuisionem animæ ac spiritus! *Consummatum est!* nempe illud omne quod in mandatis à Patre habebat, nihil plane omis- sum; *Opus consummaui quod dedisti mihi Pater.* O vere *Consumma-* Ioan 19.
Hebr. 11. *torem Iesum!* Sed quo tandem modo, quo labore, quo pretio? Audi anima, hoc iterum audi, *Consummatum est*, id omne scilicet quo erat homo Christus, in totum Corpus lacerum, totus præfusus Sanguis, totum exhaustum robur, totæ diffuxere vires, totus vitalis humor exaruit; En Cor exsiccum, en vita deficit, en totius hominis dissolutio, dum inclinato capite tradidit spiritum!

Obstupefcite cæli super hoc & porta eius desolamini vehementer, Ier. 22. quàm merito sol obscuratur, terra mouetur, petra scinduntur, & monumenta aperiuntur! Proh Deus immortalis! tantine valet salus vnius animæ ut pro mea salute Anima Christi, tam crudeli morte separanda fuerit à suo corpore! Quid hic satis dignum cogitem! aut potius quid nimis indignum cogito dum contemplor non me minori valere pretio quam valet Sanguis & Vita Christi! Nonne satius erat me perire quàm talem visam? aut certe si aliter visum Christo, si maluit se perire quàm me; egone me post tot impensas perdam! Certe Consummatum est: quantum ex parte Christi quidquid ad salutem spectat, sed mea etiam ex parte quod superest consummandum est. *Vna enim obla-* Hebr. 10.
2. Cor. 5. *tione consummauit in sempiternum sanctificatos*, inquit Apostolus. Quid porro est illud quod superest, nisi quod ait Idem; *Ut qui viuunt iam non sibi uiuant, sed ei qui pro ipsis mortuus est?* Hæc est Christi morientis intentio, hic finis eorum omnium quæ in eius memoriam hodie tanto aguntur apparatu. Vnde ex omnibus ad

proxim hodie considerandis, hæc vna potissimum perpendi debet Veritas, *Aut nihil hodie ages, aut sic semper ages.*

Expende illud Apostoli *iam* id est deinceps, semper, cōtinuo, & ita constanter, vt si non ita semper, nihil fiat. Cum enim in omni negotio ita semper spectetur Finis, vt omnia ad eum dirigantur, & nihil actum putetur nisi finis propositus attingatur; certe id multo magis in eo quod agimus negotio, spectandus est ille finis qui nobis hodie proponitur in recolenda morte Christi Iesu, & qui non potest non esse excellentissimus pro quo tam multa impenduntur. *Tanta passi estis sine causa, si tamen sine causa*, inquit Apostolus, quasi diceret, quidquid passi fueritis nisi illud propter quod passi estis, retineatis, frustra passi estis. Itemque paulo post in hunc eundem sensum: *Timeo de vobis, ne sine causa laborauerim in vobis*: Si scilicet illud propter quod laboraui, vobis depereat, sine causa laboraui; nec tantum mihi dolori est laborasse, quantum mihi erit, nihil meo labore profuisse. Sic tibi à Christo moriente dictum puta.

II. P V N C T V M.

SED finem tibi propositum non assequeris, nisi sic semper perseueres. Iam dictum est ex Apostolo, hunc finem esse, *vt qui viuunt, iam non sibi viuunt, sed ei qui pro ipsis mortuus est*. Et quidem hodie sic Christo viuere non recusas; Quanti de illo sensus, quam crebri & frequentes in eum animi tui motus! quam libenter propter ipsū te priuas multis, & omnia tua in eum vnum refers! Velleſne hodie permittere aliquid sensualitati? Velleſne vel leue peccatum admittere? Velleſne illum vel leuiter offendere quem vides pro te morientem? Certe nolles, nonne id affirmares? Hoc est videlicet illi viuere & tibi mori, hoc est quod ait Apostolus: *Vt qui viuunt, iam non sibi viuunt*, id est, nullos vitæ actus propter se, propter commoditatem, propter delectationem & honorem producant: sed omnia cogitata, omnia verba, omnia facta, omne illud tandem quod viuunt, ad illum referant qui pro ipsis mortuus est, vt sic sibi mori discant & ipsi viuere. Nonne id æquum? Certe sic iudicas hodie, sic hodie profiteris. At quamdiu sic viuendum putabis? quamdiu sic tibi nihil, & illi omnia? An tantum hodie, vt fieri solet, vel aliquot

pōst diebus? Hoc est quod tibi modo dicitur, hoc est quod serio expendendum, nisi sic semper perseueres in illa puritate vitæ propter Christum degendæ, sicut hodie viuendum nosti, non assequeris finem tibi propositum, quia sic semper Christo viuendum, & numquam tibi. *Non estis vestri: Empti enim estis* 1. Cor. 6. pretio magno.

Non est quidem semper ieiunandum aut orandum sicut hodie, sed quantum spectat ad eam vitæ puritatem & innocentiam quæ omne prorsus peccatum & sensualem motum ablegat, tanta est obligatio sic in singulos dies viuendi, quanta est hodie. Ac proinde nisi sic deinceps viuere constitutum habeas, finem hodiernum non attingis. Quasi verò in vnum duntaxat diem tale Christi promeritum contringatur! Mors non est diuisibilis: Quisquis est mortuus, aut omnino & in omne tempus est mortuus, aut nullo modo est mortuus; sicque cùm finis intentus sit plane mori nobis, nisi sic semper mortui simus, finis non obtinetur. *Semper mortificationem Iesu in corpore nostro circumferentes, ut & vita Iesu manifestetur in corporibus nostris.* 2. Cor. 4. O votis omnibus optanda mors quæ in talem vitam, qualis est vita Iesu, commutatur!

III. P V N C T V M.

E R G O *aut nihil hodie ages, aut sic semper ages.*

Nisi enim assequaris finem, vidisti quod nihil agas; & niti perseueres, aut certe deliberatum omnino habeas cum Dei Gratia perseuerare in illa vitæ puritate, quæ non sua sed Christum quærit, non assequeris finem propositum. Quid ergo superest nisi alterutrum ex his duobus, aut te nihil hodie agere, aut si quid bene agis, sic semper agendum? Licet enim ieiunes quantumuis strictissimè, licet plores & mediteris tota die, cùm tamen ista omnia non sint finis propositus, nihil agis. Quod si priori quidem & sanctiori vitæ simul studeas, nec tamen hoc studium continues, nihil item agis: quia in continuando per totam vitam studio, totum est positum. *Vt qui viuunt, inquit, iam non sibi viuunt*, hoc est quamdiu deinceps viuent vita naturali, non viuant vita sensuali. Non aliis finitur terminis hæc mors vitæ sensualis quam ipsius vitæ naturalis; & potius optandum non

382 ⁷ FERIA 6. quæ PARASCENE dicitur. Vt qui viuunt, &c.

Phil. 1.

viuere vita naturali quam non mori vita sensuali; dicendumque cum Apostolo: *Mihi viuere Christus est, & mori lucrum.*

Coloss. 3.

Non est nostrum statuere de vitæ naturalis diuturnitate: sed plane nostrum est cum Diuina Gratia, quod quam diuturna hæc erit vita, tamdiu mors illa duret qua debes hodie mori, aut illa pretiosa in conspectu Domini morte non morieris, sicque nihil ages, quia hoc maxime est agendum, vt sis de illis, quibus dicitur, *Mortui estis & vita vestra est abscondita cum Christo in Deo.* Itane vero nihil ages hodie pro tuo Christo? Nihil ex eius morte referes? Nihil ex hac Meditatione? nihil ex audita passione, nihil ex tot lamentis, tot planctibus & ceremoniis? Plane nihil, nisi hodie tibi moriaris, & nisi quod hodie inchoaris sic vsque ad mortem compleas & consummes cum Christo Iesu. *Aspicientes in Authorem fidei & consummatorem Iesum.* Vide in 3. parte, FERIA 5. hebdomadæ 2. Vbi hæc habetur Veritas:

Hebr. 12.

Satius esset: nullo die velle viuere, quàm non omni die velle cum Christo mori.

IN EADEM DIE PARASCEVES.

AD ILLVD IDEM APOSTOLI:

Qui viuunt iam non sibi viuant. 2. Cor. 5.

VEL IN ILLVD EIVSDEM,

Non estis vestri, empti enim estis pretio magno. 2. Cor. 6.

VERITAS PRACTICA.

Nihil est in vitæ nostræ vsu minus nostrum, quàm ipse vitæ vsus.

SENSVS & Ratio est, quod nihil minus est vsurpandum tamquam suum, quam quod magis est alterius; nihilque magis alterius, quam quod alter vel potiori iure postulat, vel equiori.

Nihil est in vita nostræ usu minus nostrum quàm, &c. 38;

negat se inuito vsurpari.

Sed nihil est quod sit magis alterius quàm vitæ nostræ usus: nihil est quod magis sit Christi, nihil quod equiori iure acquiri possit quam quo vitam nostram acquisiuit; nihil denique quod equius negari possit quam quod negat se inuito vitam nostram à nobis vsurpari.

Ergo nihil est in toto vitæ nostræ usu minus nostrum, quàm ipse vitæ nostræ usus. Unde euidentius apparebit quàm sit verè dictum ab Apostolo: vt qui viuunt iam non sibi uiuant, sed Ei qui pro ipsis mortuus est.

I. P V N C T V M.

EVM cuiuslibet rei atque operis sit maximè spectandus finis, tanto id verius est quantò vel opus est magis extremum, vel finis est sublimior: *Prima causarum omnium*, inquit sanctus Thomas, *est finalis quæ si subtrahatur, necesse est alias subtrahi.* Atque vt nullum est opus excellentius Redemptione nostrâ, nullusque finis eo sublimior quem Redemptor noster sibi nobisque proposuit, certe in his nostris exercitiis diligentius inspectandus est ille finis. Et cum sine dubio quantum ad profectum nostrum spectat, non sit alius conuenientior, quam vt nobis plane mortui, Christo soli viuamus: in hoc insistamus necesse est, hoc premamus, hoc vrgeamus, siue potius, vt cum Apostolo loquar, sinamus nos à Charitate vrgeri & premi: *astimantes hoc quoniam si vnus pro omnibus mortuus est, ergo omnes mortui sunt, & pro omnibus mortuus est Christus, vt qui viuunt iam non sibi uiuant, sed ei qui pro ipsis mortuus est.* Quod & alibi iisdem pene verbis dixit; *Nemo nostrum sibi viuit, & nemo sibi moritur, siue enim viuimus, Domino viuimus: siue morimur, Domino morimur. Siue ergo viuimus, siue morimur, Domini sumus. In hoc enim Christus mortuus est & resurrexit, vt & mortuorum, & viuorum dominetur.*

1. 2. q. 1. a. 2.

2. Cor. 5.

Rom. 14.

Videsne tamquam finem mortis Domini, & designari dominatum Christi, & talem dominatum in viuos qualem habet in mortuos, id est perinde ac si ipsi viuentes essent mortui, vel

perinde ac alij mortui, planè ac perfectè Christo subiacent, nullo modo reluctantes. Illud autem quod ait Apostolus, *urgeri & aestimari*, illud ipsum est quod sanctus Ioannes ait: *In conspectu eius suadebimus corda nostra*, id est conuincemus tam firmâ solidâque ratione, vt si quid forte humanum Diuinæ Charitati & gratiæ quâ nobis Christo viuendum est, sese opponat, ratione illa reuincatur, *in promptu habentes vlcersi omnem inobedientiam*, sicut ait Apostolus.

2. Cor. 10.

Talis est autem Veritas quæ iam nobis expendenda proponitur; persuadet plane & conuincit intellectum quantumcumque repugnantem, vt non modo speculatiuè, quod dicitur, agnoscamus nos non esse nostros, nostram non esse viuendi rationem, nostram non esse vitam, nobis non esse viuendum, sed re ipsa & practicè, nostri non simus; nobis non viuamus. Quis enim nostrum vel vnum vitæ actum velit vsurpare, si intelligat nihil minus esse nostrum, nihil minus vsurpandum quam illum vitæ actum? Sic autem omnino est, sic vniuersim de vno quolibet vitæ actu intelligendus Apostolus: *Non estis vestri*, sic proposita Veritas hoc euidenter in ipsis exhibet terminis: aut si quid forte est minus euidens, sic apertè declaratur.

Nihil est minus vsurpandum tanquam suum, quam quod magis est alterius, nihilque magis alterius, quam quod alter vel potiori iure possidet, vel æquiori negat se inuito vsurpari.

Tria dicuntur in hac propositione, quorum primum nullam prorsus habet difficultatem. Quid enim clarius quam illud non esse nostrum quod est alterius, qui nolit esse nostrum. *Non quæ sua sunt singuli considerantes, sed ea quæ aliorum*, ait Apostolus, vbi ea quæ sunt aliorum manifeste opponit iis quæ vnicuique propria sunt. Secundum est, nihil tam spectare ad alterum, quam quod potiori iure suum fecit. Sunt enim varia possidendæ rei iura, & ex his alia sunt aliis potiora seu strictiora. Captiuus magis est Domini sui quam spontaneus seruus, & filius magis est Patris, quam captiuus Domini sui. Possunt captiui se omni captiuitatis debito soluere, at non sic omnino filij quin semper filius debeat Patri quod est & viuit. Vnde apte Sapiens: *In toto corde tuo honora patrem tuum, & gemitus matris non obliuiscaris, memento quod nisi per illos natus non fuisses, & retribue illis quomodo & illi tibi.*

Eccli. 7.

Tertium

Nihil est in vitæ nostræ vsu minus nostrū, quàm ipse vitæ vsus. 38;

Tertium denique additur : *Quod æquiori iure rem suam se inuito nolit usurpari.* Nam sic etiam varia potest considerari iuris æquitas, quæ tã diuersa est, vt in quo peccarent aliqui, si vellent sua sibi subtrahi, peccarent alij si nollent. Peccaret fortè pauper pater-familias, si familiæ suæ damno, non repugnaret diuiti rapienti sua : peccaret vero diues si pauperi summa in egestate constituto, sua sibi eripienti non consentiret. *Panis est famelici quem tu tenes, inquit sanctus Basilus, nudi tunica quam tu in con-*
clauis conseruas; O si hoc attenderent diuites, quàm vere plorarent
vlulantes in miseriis quæ ipsis aduenient quod hæc nolint attendere.
O foelices religiosi quibus ne quid deesset quod darent, sua omnia reliquerunt.

II. PUNCTVM.

SED nihil est magis alterius quam vitæ nostræ vsus, nihil est quod magis sit Christi, nihil est quod potiori iure acquiri possit, quam quo vitam nostram acquisiuit, nihil denique quod æquiori negari possit, quàm quod negat se inuito vitam nostram usurpari posse.

Tria hic etiam distinctè nobis & fusius quam alia sunt explananda. Primum est quod multa quidem sunt iura quibus Deus sumus. Ius est Creationis, Conseruationis, & Finis vltimi, quæ nos totos sic addicunt Deo, vt vnicuique nostrum iure merito possit dicere quod Israeli: *Meus es tu.* Sed apte sanctus Bernar-
duſ: Pro his ita sum amans te quantum possum, sed est quod me plus
mouet, plus urget, plus accendit. Super omnia, inquam, reddit ama-
bilem te mihi, Iesu bone, calix quem bibisti, opus nostræ redemptionis,
sic omnino amorem nostrum facile vindicat totum sibi; hoc inquam
est quod nostram deuotionem, & blandius allicit, & iustius exigit, &
arctius stringit, & afficit vehementius: Quali diceret, tam naturali,
tam claro & aperto iure emptionis id tibi vindicat, vt quantum-
cumque velle videremur illi iuri resistere, vel contra quidquam
opponere; vix possemus, vix vellemus; sic enim anima propter
hoc redemptionis beneficium, suis tribus facultatibus, intellectu,
voluntate & memoria, constringitur quodammodo, & suavi-
quadam violentia trahitur ad cedendum illi emptionis iuri, & ad
se totam propterea concedendam, vt quod in aliis titulis & be-
neficiis cogitari poterat, nullas à Deo, propterea, factas expen-

386 FERIA 6. quæ Parasceue dicitur. Ut qui uiuunt iam, &c.

fas. In hoc plurimum valeat, quia certe multum de suo Redemptor noster expendit & effudit.

Ibid.

Sic pergens sanctus Bernardus. Multum quippe, inquit, in eo laborauit Saluator, nec in omni mundi fabrica, tantum fatigationis Author assumpsit. Ille denique dixit & facta sunt, mandauit & creata sunt; At verò in hoc, & in dictis suis sustinuit contradicentes & in factis observatores, & in tormentis illusores, & in morte exprobratores.

Serm. II.
in Cant.

Et alibi: Quis dignè penset quanta fuerit humilitatis, Mansuetudinis, Dignationis, Dominum Majestatis carne indui, mulctari morte, turpari cruce? Sed dicet aliquis: Non valuit opus suum reparare Creator absque ista difficultate? Valuit, sed maluit cum iniuria sui, ne pessimum atque odiosissimum vitium ingratitudinis, occasionem ultra reperiret in homine. Sanè multum fatigationis assumpsit quo multa dilectionis hominem debitorem teneret commoneretque gratiarum actionis difficultas redemptionis, quem minus deuotum esse fecerat conditionis facilitas. Quid enim dicebat homo creatus & ingratus? Gratis quidem conditus sum, sed nullo Authoris grauamine vel labore. Si quidem dixit, & factus sum, quemadmodum & vniuersa. Quid magnū est, quā nlibet magna, si verbi facilitate donaueris? Sic beneficium Creationis attenuans humana impietas, ingratitudinis materiam inde sumebat unde amoris causam habere debuerat, idque ad excusandas excusationes in peccatis. Sed obstructum est os loquentium iniqua. Luce clarius patet, quantum modo pro te, o homo, dispendium fecit: de Domino seruus, de diuite pauper, caro de Verbo, & de Dei filio, hominis filius fieri non despexit. Memento iam te etsi de nihilo factum, non tamen de nihilo redemptum. Sex diebus condidit omnia, & te inter omnia: at vero per totos triginta annos operatus est salutem tuam in medio terræ. O quantum laborauit sustinens!

Tract. de
dilig. Deo.

Et rursus alio in loco: Quod si totum, inquit, me debeo pro me facto, quid addā iam pro me refecto, & refecto, tali modo? Nec enim tam facile refectus quā factus: nam qui me semel & tantum dicendo fecit, in reficiendo profecto & dixit multa, & gessit mira, & pertulit dura; nec tantum dura sed & indigna. Quid ergo retribuam Domino pro omnibus quæ retribuit mihi? In primo opere me mihi dedit: in secundo se; & ubi se dedit, me mihi reddidit. Datus ergo & redditus, me pro me debeo, & bis debeo. Quid Deo retribuam pro se?

In quibus Sancti Patris verbis, aliud est quod secundo hic

Nihil est in Vita nostra vsu m'ius nostrum, quàm, &c. 387

loco attentius est nobis expendendum, ad illius iuris potentiam apertius declarandam. Non enim me tantum sibi emit, quod multum est, sed vt me sibi emeret, vt me totum sibi compararet se Ipse totum dedit, quod certè in hac materia, vbi de nobis totis tradendis agitur, vel maxime considerandum est. *Nam*, vt aiebat S. Bernardus, inde apparet, me *bis illi debere meipsum*; nempe & quod me mihi reddiderit, & quod se propterea dederit; In quo postremo dato, si attente perpendatur, tantò est aliquid amplius altero, quanto Ipse qui se totum dedit Christus maior me est. Sicut enim Nolanus ille quem captiuum sanctus Paulinus Episcopus, se donando, redemit, longe illi deuinctior fuit quam alij quos Idem Sanctus sua pecunia redemerat: sic plane nos Christo Domino, qui nos Se Ipso toto dato, redemit. Nam in tota Christi Passione, hoc est potissimum quod attendamus & ponderemus, *Christum* scilicet *se se totum dedisse*, nihil prorsus sibi seruasse, nihil bonorum temporalium, nihil honoris terreni, nihil sanguinis, nihil vitæ: sed omnia prorsus omnia consûmata: vnde si quid Iudæi contra ipsum perpetrarunt; non aliunde est quam quod se illis permisit, quam quod se nobis dedit. *Hac est*, in *Luc. 22*; quiebat, *hora vestra, & potestas tenebrarum*: qua quidem potestate sibi facta si ad grauiora infligenda tormenta voluissent abuti, passus illa fuisset Christus, quia se totum illis tradiderat, vt se mihi totum hoc iure donationis vendicaret.

Atque vt magis etiam appareat quanta sit illa donatio, præter dignitatem Personæ se donantis, quod in donatione præcipuū & maxime considerandum venit, *vt ex animo fiat*, hoc certe habet insigniter hæc donatio, Nam nulla vnquam Charitas par eius Charitati extitit, nullum vnquam donum tam voluntarium, tam liberum, tam liberale, tam internum, & tam ex omni parte absolutum. *Oblatus est, quia Ipse voluit.*

15. 53.

Adde quod si ad beneficij magnitudinem spectari solet vel malum à quo quis eripitur, vel bonum quod confertur, vel numerus & multitudo beneficiorum disparium, vel eiusdem multoties repetita collatio, quando vel etiam minus is meretur, cui gratia toties redonatur; Quid horum non reperitur in hoc beneficio Redemptionis, & in quouis gradu tam sublimi, vt vltra quò procedatur, cogitari non possit? Quale enim istud est malū, dira Inferorum aternitas vnde sunt eruti qui sunt redempti? Quale

588 *Feria 6. quæ Parasceue dicitur. Ut qui viuunt iam, &c.*

illud bonum, sempiterna beatitudo quò sunt iidem vocati? Quàm crebrò & frequenter verò beneficium immerenti renouatur? Quoties videlicet se homo mortali culpa coinquinat! Tùm enim peccator iterum reuocandus ab inferis, tùm rursus aperiendi sunt illi coeli quos noxa lethalis clauferat: tùm quasi etiam fundendus Christo sanguis; tùm Christo quasi est moriendum, quia mortis eius meritum ita est necessarium ad resipiscientiam peccatoris, vt nisi meritum esset inexhaustum, oporteret toties Christum pati, quoties venia remittitur peccatori.

Qua quidem in multiplicitate beneficij, non solum apparet Bonitas Benefactoris, sed & malitia & indignitas peccatoris, qui post acceptum etiam beneficium suo Benefactori tam ingratum se præbet, vt illum rursus crucifigat, sicut in sequenti discursu patebit clarius: Quòd enim modo hæc commemorentur, eò tantum spectant vt demonstretur quale sit inde ius Christi Redemptoris in nos, quod tam multis, & tam strictis simul conflatis constat nominibus.

Ioan. 13. Et ne in contentionem aut dubium aliquod cuipiam tale ius vocari possit, hoc tertium est exponendum quod sic à Patre ius illud est confirmatum, & à Filio acceptatum, vt Pater in Filij manus nos omnes posuerit, & Filius nullos tamquam suos agnoscat, quin solenni Sacramento se ita illi addicant, vt sibi plane mortui velint esse, sicut ipse pro ipsis est mortuus. Hæc nempe vera est baptismi significatio, hæc nota Sacramenti virtus & institutio, hæc germana ratio cur baptizati corpus immergatur in aquam. *Rom. 6.* *An ignoratis*, inquit Apostolus, *quod quicumque baptizati sumus, in morte ipsius baptizati sumus, consepulti enim sumus cum ipso per baptismum in mortem.* Id est, sicut ille mortuus, & sepultus fuit, vt nos sibi redimeret, ita nos redempti profitemur nos omnibus mori vt ipsi soli viuamus. At vero licet postea baptisati nihil cogitantes de tali iure, & debito, prorsus sibi, non Christo viuant, non soluuntur tamen propterea suo debito, sed semper eo manent obstricti. Neque vlla vis hominum, nulla ætas temporum, aut nulla potestas etiam Dæmonum, characterem in baptismo impressum quo tale debitum designatur, obliterare poterit.

Quin addo, nec ipsum posse Christum se hoc tam debito iure abdicare, sicut non potest non esse Christus: Hoc est enim illi

Nihil est in vita nostra vsu minus nostrum, quàm, &c. 389

tam proprium, & vt vocant, essentialia, vt quamdiu erit Christus, erit in illo iure, atque in illa iuris exigendi voluntate. Quamobrem plagas in suo seruauit corpore, quasi suæ testes potestatis, & juris: quasi signaculum & sigillum quo ratum fixum in omnem æternitatem sibi ius illud retineat: quasi agat ex syngrapha cum hominibus; Vos mihi has intulistis plagas, & eas libens accepi, vt vos redimerem; mei estis, meos vos repeto, ius negare meum non potestis, ecce vestrum debitum: en tabula oblignata, en monimenta authentica, en omni testimonio maiora signa. Quid contra potest obiici? O quam iuste in cælo illi canitur: *Dignus est agnus qui occisus est accipere virtutem, & Diui. Apoc. 5. nitatem, & sapientiam, & fortitudinem, & honorem, & gloriam, & benedictionem.*

III. PUNCTVM.

Nihil est igitur in vita nostra vsu minus nostrum, quam ipse *vita vsus*, quia nihil est quod sit magis aliterius, nempe Christi, qui iure Emptionis nos ita totos sibi vendicat, vt nullus possit nec velit Christianus de illo iure contendere; non enim humano tantum intellectui lux aperta infunditur vt tale ius videatur, sed voluntati simul flamma injicitur, vt se velit illi subicere. Quid enim ad omnem animorum inflexionem potentius; *quid misericordius intelligi valet*, inquit sanctus Anselmus, *quàm* L. 2. cur *peccatori æternis tormentis deputato, & vnde se redimat non habenti,* Deus homi *Deus pater dicat, accipe vnigenitum meum, & da pro te; Ipse filius,* c. 20. *solle me, & redime te.* Quali hoc dicunt, quando nos ad Christianam fidem vocant & trahunt.

Sanctus vero Bernardus, descendens ad ipsam Veritatis Praxim: *Seruite*, inquit, *Domino in timore, vt sine timore quandoque* Ep. 143. *de manu inimicorum vestrorum liberati, seruiamus illi. Seruite in spe, quoniam fidelis est in promissis. Seruite ex merito, quia multus in meritis est. Nam etsi cætera taceam, hoc solo certe non immerito vitam sibi vendicat nostram, quod pro ea prauit suam. Nemo igitur sibi viuatur, sed ei qui pro se mortuus est. Cui enim iustius viuam, quam ei qui si non moreretur, ego non viucrem? Cui commodius quam promittenti vitam æternam! Cui magis ex necessitate, quàm flammæ perpetuas minitanti; sed seruo voluntariè quia Charitas*

390 FERIA 6. quæ Parasceue dicitur. Vt qui viuunt iam, &c.

libertatem donat, Charitas scilicet vel qua me diligit, vel qua ipsum diligo. O quam pauci sic illi seruiunt, sic illum diligunt, cum si tamen omnes illum diligere teneantur.

Non recordaris, inquis, non venit in mentem talis Christi memoria. Res occurrentes nos aliò inde abripiunt, & sibi nos conglutinant. Verè ita est, hæc est ingratitudo nostra. Hæc insensibilitas animi circa Liberatorem nostrum. Hoc est quod animæ in primis exprobat: *Oblita es Dei saluatoris tui, & fortis adiutoris tui non es recordata.* Quasi diceret, ne te in res externas excuses, quidquid sit quod occurrat, si mei velles recordari, satis potens sum ad peruincenda omnia; tantum mei recordare, recordare mei juris, recordare tui debiti.

Hoc est quod modò versandum est in animo, & tot modis reuoluendum quibus insigi queat memoriæ, ad omnem vitæ actum & vsum, vt deinceps nullum nobis vsurpemus; vel in substantia, nihil aliud facientes quàm quod velit Deus; vel in modo vel in fine, non aliter nec alio fine, quàm vt ipsi placeamus.

Sic cogitemus de vnoquoque vitæ nostræ actu, sicut de re aliena quam nobis vsurpare nollemus, ne furti, ne sacrilegij nos reos redderemus. Nihil iniquius quam defraudare operarium mercede sua, quod eò iniquius est quò quis operarius maiorem operam, maiore sue expensas tum pecuniæ, tum corporis, tum animi & si quas alias, ad opus collocarit; talis tum defraudatio recensetur inter ea peccata quæ clamant apud Deum vt expresse habet sanctus Iacobus: *Ecce merces operariorum qua fraudata est à vobis, clamat, & clamor eorum in aures Domini Sabaoth introiuit.* Sicut enim nihil erat debitum iustius, sic nihil est negatum iniustius.

Hæc est scilicet defraudatio, hæc est iniquitas, quæ contra Christum committitur, quando actus vitæ, contra eius voluntatem vsurpatur; nam defraudatur sua mercede, priuatur suo debito, pro quo emendo tot expensas dedit, quot fluxerunt ab eius corpore, sanguinis guttæ; *Vt quid perditio hac? REDDE vxorem meam Michol quam despondi mihi centum proputiis Philistinorum.* Hoc scilicet Dauidi nomine, cara erat in primis ista vxor, quod tanto illam pretio sibi emisset. Sic quando est allata ei aqua de cisterna Bethemitica, quam valde sitiebat; vt audiuit tres illos milites à quibus allata est, manifestum vitæ pericu-

Iam adiisse: *Noluit bibere*, inquit Scriptura, *sed libavit eam Domino*, dicens: *propitius mihi sit Dominus ne faciam hoc: num sanguinem hominum istorum qui profecti sunt, & animarum periculum bibam?* Singularis ille vitæ tuæ actus quem exerces, & particularis gratia quæ præsens adest ut illam exerceas, est velut illa aqua, non hominum vitæ periculo, sed ipsius Dei vitæ pretio tibi comparata: Et tu illam bibes! tu illam exhaustis! tu illam tibi libabis non Domino! Caue id etiam atque etiam.

Hoc unum hodie pietatis & religiosi cultus ostenderunt Iudei, quod cum Iudas retulisset argenteos ad Sacerdotes: *Non licet*, inquiunt, *eos mittere in corbonam, quia pretium sanguinis est.* Sic plane tibi dicendum de vnoquoque vitæ actu: non licet mittere in profanum, in naturalem, in humanum aut alium quemvis usum, præterquam Spiritualem & Diuinum, *quia pretium sanguinis est*, & illius ipsius Sanguinis pretium, cuius erant illi argentei. An tu minoris illum facies sanguinem, quàm tùm Iudei sic loquentes? An tu minus iudicabis, quidquid illo est emptum pretio, non esse profanandum, non esse in alios assumendum vsus, quàm pietatis, & Charitatis? *quia pretium sanguinis est.*

O qualis ille Sanguis! ô quale illum pretium! ô quale hinc motuum vitæ totius in Christum referendæ, cùm nulla sit pars vitæ nullusque eius vsus, de quo non possit dici, *pretium sanguinis est, & pretium Diuini sanguinis.* Hoc nisi Sanguine, hoc nisi pretio Sanguinis, hoc nisi motu moueatis ad totam Christo fundendam vitam, Sanguis ille dicetur à te contemni, à te contemneri, & pollui. De te dicetur quod ait Sapiens de audace; *quoniam quasi nihil est ante illum Sanguis*, id est, tam parum mouetur effuso proximi sanguine, quali nihil illi esset vita proximi. Non sic velles esse audax circa humanum sanguinem: cur non vereberis id audere circa Diuinum?

E O D E M D I E,
AD HÆC SANCTI PETRI VERBA:

Iesum Nazarenum, virum approbatum à Deo in vobis, affigentes interemistis. Act. 2.

VEL AD ISTA SANCTI PAVLI:

Rursum crucifigentes simimetipsis filium Dei, & ostentui habentes. Hebr. 6.

VERITAS PRACTICA.

Grauius est Christo pati à peccato, quàm pro peccato.

RATIO inter alias & quæ ceteras omnes complectitur, hæc est, quod quidquid graue fuit Christo, cùm pro peccato pateretur, reducitur ad hæc tria, contemptum, pœnam & mortem.

Sed hæc tria Christus à peccato grauius patitur.

Ergo & grauius est Christo pati à peccato, quam pro peccato. Quod præsertim hodie intelligendum est à peccatore.

I. PUNCTVM.

Act. 2.

P RIMVS Euangelicus Concionator, Sanctus Petrus, in prima Concione quam habuit ad Iudæos, cùm quædam de Christo Domino ad intellectus instructionem præmisisset, tùm ad permouendas ipsorum voluntates dixisse narratur in Actis Apostolorum: *Viri Israelita, audite verba hæc: Iesum Nazarenum, virum approbatum à Deo in vobis, virtutibus & prodigiis & signis per manus iniquorum affigentes interemistis. Et nonnullis interiectis concludens, Certissime sciat ergo omnis domus Israel, quia & Dominum Eum, & Christum fecit Deus, hunc Iesum quem vos crucifixistis. His autem audiis, inquit Sacer Historicus, compuncti sunt corde, & dixerunt ad Petrum, & ad reliquos Apostolos, quid faciemus, viri fratres? Petrus vero ad illos, pœnitentiam inquit, agite, & baptisetur unusquisque vestrum in nomine Iesu Christi: & aliis verbis plurimis exhortabatur eos dicens: Saluamini à generatione ista praua.*

1p. 27.

Hoc est videlicet concionari, sic de Christo Crucifixo dicere vt audientes compungantur corde, & dicant, quid faciemus? Ille est omnis fructus, vt auferatur peccatum: & illud est aptissimum producendi talis fructus medium, si quis se peccato suo Christum.

Hum interemisse agnoscat. Hoc est quod sanctus Paulus ad eosdem Iudæos, in peccata post baptismum lapsos, scribens agreditur, cum eos docet nihil minus per peccatum suum effecisse quàm quando Christum crucifixerant, imo & aliquid gravius; *Rursum*, inquit, *crucifigentes sibi metipsis Filium Dei, & oscentui habentes*. Magna vis in illa voce *rursum*, quasi diceret, Graue quidem illud fuit cum primo Filium Dei crucifixistis, sed longe gravius cum eundem Dei filium per peccata vestra cruci rursum affixistis. Quod quidem pater quam sit gravius, ex eo quod difficilius remittitur: Sic namque præmiserat; *Impossibile est enim*, id est, valde difficile post multos in peccatum lapsus, *rursum renouari ad pœnitentiam*. O quis intelligat hanc peccati gravitatem! ô quis eam intelligens non compungatur de præteritis! & futuri diligenter non præcaueat!

Eò directe spectat proposita Veritas, quæ est tota sancti Augustini, ut iam supra monuimus: sic enim in quodam sermone Christum peccatori loquentem inducit his verbis, *Cur me graviori* *serm. 181.* *tuorum criminum cruci quàm illa, in qua quondam pependeram, affixisti? Gravior enim apud me peccatorum tuorum Crux est, in qua inuitus pendeo, quàm illa in quam tui misertus, mortem tuam occisurus, ascendi*. Quod de sola Cruce non tantum est intelligendum, sed de vniuersa passione, quæ nomine Crucis, & Crucifixionis, frequentius exprimitur, quia pars est passionis Christi præcipua.

Cum autem multæ reddi possent rationes cur sic dicatur gravius esse Christo pati, rursum à peccato, quàm cum passus est primum pro peccato; tum ista inter alias modò refertur quæ vniuersam passionis seriem breui compendio complectitur, nempe omnia reuocando ad triplex caput, *CONTEMPTVM CHRISTI, POENAM, & MORTEM*. Quæ quidem tria distincte Dominus designauit cum de passione sua differens dixit, *Ecce ascendimus Ierosolymam, & consummabuntur omnia quæ scripta sunt per Prophetas de Filio hominis. Tradetur enim gentibus, & illudetur, & flagellabitur, & conspuetur, & postquam flagellauerint occident eum*. *Luc. 18.* Sicut enim illusiones & sputa contemptum, sic flagellatio pœnam, & occisio mortem manifeste designant.

Tribus porrò modis tota Declaratio potest institui; Primus, quo narretur vno veluti puncto & vna discursus continuatione, quàm graue fuerit Christo Domino in his tribus pati.

394 FERIA 6. quæ PARASCENE dicitur. Rursum crucifigentes, &c.

Deinde ad secundum punctum quàm grauius illi modo sit hæc eadem tria pati à peccato quoties peccatur. Alius est quo à singulari qualibet parte narrationis historice sit moralis reflexio ad eandem cōtemptus vel pœnæ sp̄ciem, quæ reperitur in peccato. Tertius deniq; cæteris præferendus, quo singillatim de contemptu, de pœna, & de morte sic tribus punctis differitur, vt primo simul videatur quam grauis fuerit ille contemptus quem pro peccato passus est Christus; tum deinde quàm grauior ille sit quem modo à peccato patitur. Sicque consequenti secundo puncto ac tertio de pœnâ, & de morte.

In quibus enarrandis illud etiam aduertendum quod quæ hîc breuitatis causa leuiter attinguntur, videri possunt in antecedentibus supra hebdomadis, vbi de singulis vnoquoque die, mysteriis. Interferendi sunt etiam nonnulli affectus in ipso historice narrationis decursu, antequam ad moralem de peccato expositionem deueniatur.

Quibus ita præmonitis: Primum quod è tribus vniuersæ passionis suæ capitibus Christus commemorat, est Contemptus; *Tradetur*, inquit, *gentibus & illudetur*. Cum autem variæ fuerint huius contemptus species, tum septem potissimæ seliguntur, ad quas aliæ referri possunt.

Prima est illa Traditio de qua loquebatur Dominus, quæ triplex consideranda est, & vnaquæque multùm probrosa. Prima est Iudæ proditoris, *Quid vultis mihi dare, & ego vobis eum tradam!* Christum vendi tamquam mancipium! vendi ab vno è suis præcipuis discipulis, & vendi suis inimicis, quo solebant mancipia vendi pretio! Tam graue id Christo fuit vt cùm de hac traditione primùm suis Apostolis mentionem faceret, totus inhorruerit, *turbatus est spiritu*, ait Euangelista, *& protestatus est, & dixit: amen amen dico vobis, quia vnus ex vobis tradet me*. Alia vero traditio est cum illum Iudæi tradiderunt Pilato, qui propterea Christo dicebat, *Gens tua & Pontifices tradiderunt te mihi*. Quod certe ad augendum Christo probum excogitarunt, quia Iudæi tam inuisi erant Gentibus vt quos à Iudæis Gentiles in suapote-
state haberent, miris illusionum modis diuexarent, quæ in religionis contemptum redundabant, blasphemantes contra verum Deum qui à Iudæis colebatur; Hinc regius Psalter, & in eius persona Dominus, *Improperia impropertium tibi ceciderunt super*

Ps. 68.
Rom. 15.

me. Cum autem Pilatus adiudicauit fieri petitionem Iudæorum, *Luc. 23.*
& Iesum tradidit voluntati eorum, tertia quædam est traditio
quæ probris omnibus viam aperuit, hinc nempe ortum crucis
opprobrium; neque enim ex vlla lege sua, poterant Iudæi Do-
minum cruci affigere. Crux latronum erat supplicium, at num-
quam Christus latrocinij fuit accusatus, cur ergo fuit crucifixus
vna cum latronibus? quia scilicet hoc genus mortis erat probro-
sius, & quia *traditus illis erat Iesus*, vt pro sua voluntate probris
illum afficerent. *Factus sum in derisum omni populo, canticum eorum* *Thren. 31*
tota die.

Secunda Contemptus species, cum tamquam latro captus est
& constrictus vinculis ac catenis, vnde ipse Dominus: *Tamquam*
ad latronem existis comprehendere me. O quali tum impetu omnes
in eum inuolarunt quos pudebat ab eo se in terram paulò ante
prostratos! *Quasi rupto muro & aperta ianua, irruerunt super me.* *Iob 30.*

Tertia species, Petri negatio. Primo is negat se omnino nosse
Christum. Deinde id iuramento affirmat. Ac denique tandem
anathematizat, id est, cum dira quadam imprecatione Christum
execratur & negat se nosse. O quis tùm Christo animus! *Abomi-* *Iob 16.*
nati sunt me consiliarij mei, & quem maxime diligebam, auersatus
est me!

Quarta, cum apud varios Iudices variis est accusatus calum-
niis; *Surgentes testes iniqui quæ ignorabam, interrogabant me.* *Os Ps. 34.*
peccatoris & os dolosi super me apertum est, locuti sunt aduersum me *Ps. 108.*
lingua dolosa. EGO redemi eos, & ipsi locuti sunt contra me *Osie 7.*
mendacia.

Quinta, cum præcipuè apud Herodem velut fatuus est habi-
tus, & alba veste indutus, Tum verè *astiterunt reges terræ & prin-* *Ps. 21.*
cipes conuenerunt in vnum, aduersus Dominum & aduersus Christum
eius.

Sexta, quando Barrabæ comparatus est & post habitus, ac
tàm abiectus vt diceret, *Ego autem sum vermis & non homo, op-* *Ps. 21.*
probrium hominum & abiectio plebis.

Septima, quando exhibuit Eum Pilatus toti populo corona-
tum spinis, indutum purpureo vestimento, & arundine tam-
quam ludicro sceptro decoratum. O quæ tum sannæ! quæ pro-
bra! quæ conuitia quæ ad deficientem & extremum vsque spi-
ritum eius perseverarunt. *Abiectionem posuisti me in medio* *Thm. 2*

396 FERIA 6. quæ PARASCENE dicitur. Rursum crucifigentes, &c

2id. 2. populi mei, plauserunt super me manibus omnes transeuntes viam, sibilauerunt & mouerunt caput. Quæ quam fuerint graua & acerbâ Christo Domino facile est cogitare.

Sed tamen audeo dicere, longe illa grauiora sunt quæ nunc quotidie per peccata patitur à peccatoribus. Rursum crucifigentes sibi metipsis filium Dei, & ostentui habentes.

AC quidem vniuersim quod Christus à peccatore contemnatur, nihil est clarius. Et vos inhonorastis me? Quomodo vero particulatim in septem illis speciebus, suo quodam modo, concurrentibus ad quodlibet mortale peccatum: paulo attentius est indagandum.

Primò aperte venditur Christus in peccato, & traditur Inimicis. Quid est enim vendi aut vendere? Nempe alienare à se rem vnâ pro alia, rem possessam pro alia possidenda. Hoc autem ita fit in peccato; Nam ante peccatum habebas Christum, habebas eius merita, eius gratias, eius amicitiam, eius regnum: 2. Cor. 13. An non cognoscitis vosmetipsos quia Christus Iesus in vobis est? inquit Apostolus: post admissum verò peccatum euanescent illa omnia. Gal. 5. Christus vobis nihil proderit, ait idem Apostolus, euacuati estis à Christo. A gratia excidistis. Fundus ipse in quo erat Christus, venditur, nempe anima: de cuius venditione per peccatum, sic præclare sanctus Augustinus; Vnusquisque peccando, Diabolo animam suam vendit, accepta tamquam pretio, dulcedine temporalis voluptatis. Vnde patet non modo vendi & tradi Christum, sed & istam venditionem esse illi magis probrosam & grauiorem quàm quando à Iuda est venditus; Nam tum facile poterat Christus se manibus Iudæorum eripere: & inuito venditore Iuda, poterat se sibi suisque reddere: at quando à te venditur, non potest te inuito redire, non potest inquam, stante lege quam statuit de non cogenda tua libertate, quam ille legem non infringet. Deinde nondum nos emerat quando primò à Iuda est venditus, nunc vero postquam suo nos redemit Sanguine, sic à nobis vendi, & vendi tam vili pretio quale est sensualis voluptas! certe minus est pretium quàm triginta argentei quibus est venditus, & proinde maior contemptus.

Secundo, stringitur quibusdam quasi vinculis quando per affectus nostros inordinatos sic impeditur eius operatio vt quas

vellet conferre gratias non conferat; & sicut dicitur in Evangelio de quibuldam locis aut personis quod ibi non posset virtutes vllas aut paucas facere, propter incredulitatem eorū: ita parum operatur cum his qui suo affectu deprauati, non quid velit Deus, sed quid suadeat cupiditas, potius spectant. *Servire me fecisti in peccatis tuis*, quasi diceret, Ego te gratiis meis præveniebam, vt membra tua Mihi & Iustitiæ servire exhiberes: sed tu contra resistendo gratiis, me servire tibi fecisti, me cedere cupiditati tuæ coegisti; Non quod illi tecum consenserit, sed quod à te impeditus & quasi captiuatus non illam coercuerit vt coercere potuisset & voluisset, nisi obstetisses. Nam si Apostolus dicebat se *ita captiuatum esse lege membrorum, vt quod bonum vellet non faceret*; cur non potiori iure id dicetur de Christo qui quod vellet bonum in peccatore non facit, quòd ipsa eadem lege membrorum impediatur, ne faciat: quod perinde est ac captiuari & constringi: sed longe probrosius & indignius, quam captiuaretur Apostolus, primo illo naturæ corruptæ motu quem sentiebat, nam in peccatore lex illa qua Christus captiuatur, est voluntaria & libera. *Gratis absconderunt mihi interitum laquei sui.*

Tertio, sic negatur manifeste Christus in peccato, non ore non verbo, sicut Petrus negavit, sed factis & operibus, sicut sanctus Paulus ait: *confitentur se nosse Deum, factis autem negant*; Tum verò etiam ille ipse qui à peccato resipuit Petrus: *Eum*, inquit, *qui redemit eos, Dominum negant*. Nempe cum Dominus pro suo in peccatorem iure & imperio vetet peccatum, *Non mentieris, non concupisces, Ego Dominus*: Contra vero peccator concupiscat; quid aliud sua illa concupiscentia facit quàm illum negare Dominum, cuius imperium sic negligit, quasi diceret, vt est apud Iobum, *Quis est omnipotens vt seruiamus ei?* Sic enim Dominus reputat factum quasi dictum, sic ipse loquitur, *Confregisti iugum meum, rupisti vincula mea, & dixisti, non seruiam*. Et sicut si ageretur de Fide, qui se infidelem potius quàm Christianum vellet profiteri, nonne is negaret Christum? sic vbi agitur de fidelitate in seruandis præceptis, apostatiæ quoddam genus est & infidelitatis species, peccatum perpetrare. Sic disertis & expressis verbis sanctus Cyprianus: *Cum Tyrannus dicit, abnega Christum, & immola tui, sæpe lingua negat, corde reclamante; quamquam hoc grauissimum crimen, tamen aliquam impietatis culpam eleuat humana natu-*

Marci 6.

Is. 43.

Rom. 6.

Rom. 7.

Pf. 34.

Tit. 1.

2. Pet. 2.

Iob. 21.

Ier. 2.

Tract. de duplici Martyrio.

ra imbecillitas. Ibi Satanas tibi loquitur voce tyranni, per tuam concupiscentiam: abnega Christum & esto Dives. Sacrifica mammonæ & Christo nuntium remittito. Nec dicit, morere, sed potius oblecta oculos. Et tamen hîc sponte submittis genua Satana, & ABNEGATO CHRISTO, te totum illi mancipas. Quasi diceret, non modo negas Christum sicut si negaret apostata; sed fieri potest ut grauius etiam Christum offendas quam qui negaret fidem. Nam nullius tibi supplicij denuntiatur metus, nullæ iacturæ, nulli terrores; solo cupiditatis æstu permoueris, non de vitæ periculo agitur, sicut cum de fide agitur. Vnde ex hac parte potest dici peccatum minus excusandum: Quod cum in Petro locum habeat, ut qui Christum negauerit ore potius quam corde, & terrore mortis abreptus potius quam vlllo prauo animo: certe illud Christo grauius sic à peccatore gratis negari quam à Petro. Quia, inquit, odio habuerunt me gratis, id est ex mero contemptu, sine vlla nec prætenta causa.

Ioan. 15.

Quartò, contemptus est Christus cum accusaretur à Iudæis; Sed quantis peccator illum accusat, & quàm longe grauius cum se excusat. Vix vllus est qui peccando non excuset suam naturæ procliuatatem, aut repugnantiam, quasi aliter à se non posset fieri. Quid porro est sic se excusare, nisi Christum accusare & condemnare, quod sit austerior, quod suprâ quàm possint homines exigat, & quod grauius illos premat? Numquid irritum facies iudicium meum, & condemnabis me, ut tu iustificeris?

Iob 40.

2. Cor. 1.

Quintò, ut fatuus coram Herode est habitus Christus; mirum certe; sed quam magis mirum apud te Christianum, quæcumque Christi sunt dicta & facta nobiliora, velut stulta & à vero rectæ rationis sensu aliena reputari? Nonne quod stultius est Dei, sapientius est hominibus? & nonne id. stultius est hominibus quod est Dei sapientius & sanctius? Quid Christo magis probatum quàm paupertas? quid à mundo magis reprobatur? Quis mundanus non eum iudicet fatuum qui ex Christi consilio sua quædam rapienti non repetat, imo etiam quod ipsi superest, largiatur? An verò fatuus iudicari potest ille qui Christi sequitur Consilium, & non simul iudicari stultus Christus qui tale dedit consilium? O humana Iudicia!

Neque Christi minor iniuria, in quouis peccato reperitur, quàm quæ sexto loco notata est in comparatione facta cum Ba-

Tabba; quin potius si attente consideretur quod in omni peccato comparatur Christus cum illa re quæ ad peccandum impellit, tanto maiorem Christi reperiemus contemptum, quanto res illa quæ Christo præfertur, minus est aliquid quam homo ille cui se Christus posthaberi voluit. *Quem vultis de duobus?* aut amorem *Math. 27.* Christi, aut amorem voluptatis? Ah pudenda contentio! ah probrosa comparatio! sed tamen ita fit, ita proponitur, ita quæritur in omni peccandi casu: & quisquis peccat, tùm amorem voluptatis, amori Christi præfert. *Et eligent magis mortem quàm* *1er. 8.* *vitam.*

RESTAT illud opprobrium cui Christum Pilatus obiecit quando eum velut Regem Iudæorum Iudæis illudendum exhibuit. At quam longe est ignominiosius illud probrum cui peccatores Christum obiciunt, quando ipsorum intuitu Dæmon sic Christo exprobrat quod habent sancti Cyprianus & Basilius: *Ego pro istis quos mecum vides nec alapas accepi, nec flagella sustinui, L. de Opere & eleemos.* *nec crucem pertuli, nec sanguinem fudi, nec familiam meam pretio passionis & cruoris redemi, sed nec regnum cæleste illis promitto: & munera mihi quàm pretiosa, quàm grandia, quàm nimio & longo labore quasita sumptuosissimis apparatibus comparant. Tuos tales numerarios Christe demonstra præceptis tuis monitos, & pro terrenis cælestia recepturos.* Et quæ plura prosequitur. Certe sanctus Basilius istam quam vocat aduersus Dominum, *gloriationem hostis,* *In regulis fustius diff. inter. 2.* non tantum ipsi Domino, sed & peccatori cuius causa fit, tam grauem putat aliquando futuram, vt ipsa gehennæ supplicia non putet grauiora.

Videsne peccator quo in statu & pretio Christum tuum habeas? Nulla est in tota eius passione contemptus species, qua non illum despicias, abneges, conculces, & traducas. Nec dicas tibi aliam esse mentem, te longe alia de Christo sentire, & loqui. Nam & ipsi Dæmones mira de Christo sentiunt & loquuntur: Facta dictis debent conuenire in colendo Christo: aut si hæc forte inter se pugnant, tantum abest vt à nobis colatur Christus, quin potius quanto erit in peccatore major Christi cognitio, meliôrque sensus de eius Dignitate & merito, tanto eum peccando contemnet grauius, quia major est audacia contemnentis eum quem omni dignum cultu nouit. *Filios enutriti & exaltaui, is. 1.* *ipsi autem spreuerunt me!* Nesciebant Gentiles Deum sicut Iudæi,

400 FERIA 6. quæ PARASCÆVE dicitur. Rursum Crucifigentes, &c.

2. Per. 2. atque ita non se querebatur Deus contemptum ab illis, sicut ab istis: Sic plane nesciebant Iudæi Christum sicut eum Christiani modò norunt. Sicque iam à Christianis dum peccato contemnitur, magis contemnitur. *Melius erat illis non cognoscere viam Iustitiæ, quàm post agnitionem, retrorsum conuertere ab eo quod illis traditum est, sancto mandato. Contigit enim eis illud veri prouerbij Canis reuersus ad suum vomitum: & Sus lota in volutabro luti. Quæ quàm sint odiosa & probrosa non modo peccatori, sed & ipsi Christo, fusius infra demonstratur.*

II. P V N C T V M.

De pœna Christi patientis.

Pr. 30. **C**OGITANTI attentius de Christi Domini pœnis, prout à nobis sunt explicandæ, Tria occurrunt, vt olim Sapienti, difficultia; & quartum quod penitus ignoro.

Ps. 34. Primum est, cùm Christus ita esset passibilis & tam multa reuera sit passus pro peccato, dicitur tamen ignorasse seu non sensisse pœnas, *Congregata sunt super me flagella, & ignorauit.* Manifeste de Christo est Psalmus, cum illum sibi Christus applicet in Ioan. 15. Euangelio.

Secundum est, quomodo Christus, qui est modo impassibilis, dicatur pati à peccato. *Rursum crucifigentes sibi metipsis filium Dei.*

Tertium, licet aliquo sensu dici possit pati, quomodo eadem quæ passus est patitur, & grauiora etiam quam quæ est passus, vt iam audiuius ex sancto Augustino: *Gravior est illa Crux in qua innuitus pendeo.*

Quartum denique, quod penitus ignoro est, quomodo, si ita est, audet Christianus peccare: quomodo audet Christianus toties suum Christum cruci affigere, quoties peccat mortaliter? *Regem vestrum crucifigam?* Dicebat ille? Tu vero Regem tuum, Redemptorem tuum, qui iam pro te est crucifixus, tu rursum crucifigas! Vix credi potest te hoc velle posse, si hoc ita esse crederes; Et vix tantillum audieris aut cogitaueris quomodo id ita sit, quin facile credas. Audi, & quid propositis dubiis responderi possit.

De primo, Diuidendæ sunt primum, omnes Christi pœnæ in internas

in internas & externas: tum utræque in septem subdividendæ species, ad quas cæteræ quæ cum illis similitudinem quandam habent, referuntur.

Pro internis, videnda est prima hebdomada Quadragesimæ, ubi sex earum species productæ sunt & declaratæ quibus ex sancto Bonaventura septimam hîc adiungimus, qua Christus mi- *In Phave-
ra div.
amoris.*
rum in modum affectus est cùm valedixit Matri. Et quia tem-
pore præcessit alias quæ in horto concipiuntur mentem Chri-
sti gravius affecisse, sic prima pœnarum animi potest dici quam
Dominus pati voluit hoc sacra passionis die. Cû enim prope iam
iturus esset Ierosolymam, Agnum Paschalem cum discipulis co-
mesturus, & inde statim in hortum, ubi à Iuda Iudæis prodere-
tur, Matrem prius adiisse, & quæ sibi sub proximam immine-
bant noctem singillatim declarasse fertur, his aut similibus ver-
bis: M A T E R colendissima: Scio te non ignorare, quid sit quâ-
obrem è Cœlo in terras venerim. Scio tibi iam ex ipso Præsen- *Luc. 24.*
tationis meæ die denuntiaturum esse, me positum velut in signum
cui contradiceretur, & tuam ipsius animam pertransiturum gla-
dium. Non te latet quod sæpe indicaui Discipulis meis, me tem-
pore definito tradendum Gentibus, & illudendum & flagellan-
dum & occidendum. En tempus illud definitum! En instat hora
consummandorum omnium quæ de me Scripta sunt. Iam con-
uentio facta est inter Iudæos & vnum ex selectis meis Aposto-
lis de me prodendo. Iam numerata est pecunia; Vendor triginta
denariis tamquam vile mancipium. Constringar funibus velut
latro. Accusabor vt blasphemus coram Gentili præside. Deri-
debor vt fatuus coram Herode Rege. Flagellabor vt reus ad co-
lumnæ. Condemnabor Cruci, crucifigar & moriar. Cras hac
hora non viuam. Vale mi plurimum colenda mater. Sic est adim-
plenda Patris voluntas, sic peccatum expiandum, sic procu-
randa salus hominum. His cogitandis te domi contine, vel si te
pietas excitauerit ad hoc visendum spectaculum, specta mecum
in omnibus diuinum Beneplacitum. Cogitemus simul Deum
esse dignum cui placando & reconciliando hominibus diuina
vita consecratur.

Tum Mater paucis: F I L I carissime, non ignoravi quidem te
esse Redemptorem hominum, & his redimendis non modicum
à te persolvendum pretium. Sed quale tandem illud esset, non

402 FERIA 6. quæ PARASCENE dicitur. Rursum crucifigentes, &c.

ita singulatim audiueram. O certe peccatum, malum! ô certe in peccato est aliquid grauius quàm humana mens possit exquirere, cum Diuinam propterea dari vitam, & tali morte commutari oporteat. Te Adoro Diuina Iustitia, & quidquid materni sensus repugnat in morte Filij, totum tibi subijcio. Sic me Matrem semper cogitaui, vt æterno Patri Mater filij, non minus quam ipse Filius, tota deberetur. Vnam hanc à te Fili mi postulo gratiam, fac tecum moriar vt tecum viuam. Si mea morte possem tuam redimere, sola vellem mori; sed cum sit tibi motiendum, fac ne sola viuam te mortuo. Fac vt animam meam sic pertranseat doloris gladius, vt anima mea dolore gladij cum tua transeat, cum tua corpus suum deferat, cum tua viuat.

Ne plura dicerent, ora interclusit dolor, & diuulsus à Matre Filius didicit ex his quæ tunc perpeffus est, quantus esset in amore dolor. Tum vero cæna cum Discipulis facta, & consensu monte oliuarum, sex internis alijs doloribus habenas ita laxauit, *Math. 26.* vt quod dixit Discipulis suis: *Tristis est anima mea usque ad mortem,* perinde est ac si dixisset, Tantus me animi tenet dolor vt iam his internis doloribus morerer nisi me ad plures externos reseruarem. Vide suprà quid aptius excerpti possit ad grauitatem vniuscuiusque doloris exprimendam, hic est enim proximus finis quò eorum consideratio spectare debet. Tum facto transitu ad externos dolores, quibus se per interiores parauit, septem hæ species recenseri debent.

Joan. 13. Prima est, osculum proditoris Iudæ, in quem cum introisset Satanæ vt expresse refert sanctus Ioannes, vix potest concipi quomodo Christus Dominus, infame os illud attrectauerit quin simul cogitetur toto exhorruisse corpore, vt supra memoratur.

Iud. 16.
Pf. 21. Secunda, cum totam egit noctem in illis tormentis quæ sustinuit apud Pontificem, ibi alapis eum cædunt, conculcant pedibus, sputis illinunt, vinclis stringunt, & sicut Philisthæi quondam Samsonem, quaquà versum rotant & agitant. *Circumdederunt me vituli multi, & tauri pingues obsederunt me, aperuerunt super me os suum, sicut leo rapiens & rugiens.*

Is. 5. Tertia fuit, horrenda illa flagellatio, quo tormento sol non vidit crudelius. *A planta pedis usque ad verticem, non est in eo sanitas.*

Quarta, dum spinis coronatur & arundine percutitur, mirum quantum inde pateretur, & quanta inde in vultu sanies, liuor, & plagæ. *Quasi absconditus vultus eius & despectus, unde nec reputauimus eum. Vere languores nostros ipse tulit & dolores nostros ipse portauit, & nos putauimus eum quasi leprosum, & percussum à Deo & humiliatum.* Quæ non modo ad contemptum, sed ad dolorem indicandum à Propheta memorantur. Ibid. 53.

Quinta est Crucis bajulatio, quod certe tale tormentum fuit, vt illi ferendo par non esset Christus, & tum maxime plangeretur à circumfusa turba: *Et plangent eum planctu quasi supra vnigenum; & dolebunt super eum, vt doleri solet in morte primogeniti.* Zacch. 13.

Sexta est Crucifixio, dolor plane sensibilis. *Foderunt manus meas & pedes meos: dinumerauerunt omnia ossa mea.* *QVARE rubrum est indumentum tuum, & vestimenta tua sicut calcantium in torculari? Torcular calcavi solus,* Id est, sanguine vnde quaque profuente sic aspersus erat, vt nihil nisi sanguineum in eo appareret. Ps. 111. 15. 63.

Septima potest recte dici, sitis, & illa derelictio de qua in Cruce verba fecit vt intelligeremus sic Eum purè pati, quâ omni parte corporis erat passibilis, vt nec animo se solari tantisper vellet, nec dolorem vllò plane modo mitigare, sed calicem vt est in scriptura, *vsque ad fæces epotaret.* O verè consummatum est opus redemptionis nostræ! O verè consummatorem Iesum! Exech. 23. Hebr. 11.

Nunc vero exponamus quomodo cum tanta passus sit, dicatur tamen ignorasse & quasi nesciuisse. *Congregata sunt, inquit, super me flagella, & ignoravi.* Tam certum omnino est Christum Dominum nihil prorsus ignorasse quàm plane est indubitatum illum fuisse plenum Gratia & Veritatis; quid est ergo quod dicatur ignorasse quod & scientia sua Diuina, infusa & creata nouerat, ac suo præterea sensu ita sentiebat vt tamen alia ignorasset, hoc tamen nescire non potuisset?

Duplex est interpretatio & vtræque valde opportuna in nostris tolerandis miseriis. Prima est, *ignoravi unde tot in me congregantur flagella,* Id est, causam in me non vidi cur ita flagellarer & tractarer à meis inimicis. Non deerant quidem causæ ex parte peccati nostri, & ex parte Diuinæ Iustitiæ: sed quantum spectat ad Eum qui patitur, tam longe est ab omni culpa & omni causa cûr patiatur, vt ipse proditor agnoscat peccatum suum, quod tradiderit sanguinem iustum: Ipse Iudex pronuntiet, nullam in eo.

404 *Peria 6. quæ Parascene dicitur. Rrsuum crucifigentes, &c.*

causam mortis inuenire; Ipse latro clamet, nos quidem iuste, hic autem nihil mali fecit: & audito terræ motu, redeant turbæ percutientes pectora sua & dicentes, verè hic homo iustus erat; Sic est patiendum innocenter, aut si non sumus innocentes, hæc Innocentis nostri Saluatoris reuocanda est nobis in mentem innocentia,
Luc. 23. vt nobis ipsis dicamus quod dicebat latro ad socium, nos quidem iuste, hic autem nihil mali fecit.

Secundò verò, quod non minus est intelligendum; tanta patientia & mansuetudine patiebatur Christus, vt quantumcumque sentiret congregari super se flagella, tamen diceret se ignorare, quia ita se gerebat patiendò quasi id diceret, quasi hoc ignoraret quod pateretur. Hæc est Metaphorica, figurata & interpretatiua ignorantia: Non excandescebat omnino, non agitabatur corpore, non lingua, non oculis, nulla denique parte indicabat se tam dira pati. Hoc est quasi nescire, quasi non sentire, quasi non cogitare: vt doceret nos se rã libenter omnia pati quasi nihil pateretur, sicque eius exemplo Charitatem & patientiam adiungeremus nostris pressuris, cum alioquin velimus nolimus, patiendum est; Sed longe satius patiendum est in Cruce Chrilli, vel boni saltem latronis, quam in cruce mali. *Itaque & hi qui patiuntur secundum voluntatem Dei, fideli Creatori commendent animas suas in beneficiis.* Extendi fufius posset hæc moralis instructio.

I. Pet. 4.

Atque hinc quod secundum sequitur difficile intellectu explanari facillime poterit, quomodo videlicet iam dicatur Christus passibilis à peccato, cum sit reuera impassibilis. Quo nempe modo dicitur ignorare quod re tamen vera sciebat: sic planè dici potest pati quod reuera tamen non patitur. Neque enim magis repugnant Christo pati & non pati, diuerso sensu, quàm scire & nescire. Neque minus vtrumque Scriptura refert. Nam in eodem Psalmo tricesimo quarto vnde sunt illa verba iam explanata, expresse ait Deo Psaltes, *apprehende arcum & scutum,* quasi diceret, nisi te ipsum tuearis, qui me & te impugnant hostes, te offendent & ab eis patieris: scuto tibi est opus vt inimica tela retorqueas. Nonne hoc est aperte dicere, Deum esse passibilem? Est autem eadem plane ratio Dei & Christi sedentis ad dexteram Patris. Nam sicut Deus reuera est impassibilis, ita & modo Christus: & sicut dicitur tamen Deus passibilis, ita & Christus dicendus est.

Quomodo autem id dicatur, duplex est sensus. Primus ille ipse est qui iam de interpretatiua Christi productus est ignorantia, quod ita se Deus gerit erga peccatores, ita se Christus habet circa peccatum quasi pateretur, & quasi sentiret malum eius. Non se vindicabat Christus de inimicis cum ab eis malo poenæ perebatur, & sic dicebatur malum illud ignorare vel non sentire. At contrà cum à peccatore impetitur malo culpæ, malum illud non finit impunitum, punieris peccator ocys serius, sicque puniendo malum culpæ siue peccatum, diceretur malum hoc sentire & à peccato pati. Sic expresse Scriptura de Deo in peccatores, *tactus dolore cordis intrinsecus, delebo, inquit, hominem quem creavi.* Et manifeste Apostolus: *Nolite contristare spiritum sanctum Dei: ubi sanctus Anselmus, In sua, inquit, substantia, Spiritus Sanctus contristari non potest, cum ipse sit aterna & incommutabilis beatitudo; sed ad similitudinem hominis contristati dictum est qui domum illius qui cum contristauit egreditur.* Gen. 6. Ephes. 4.

Theophylactus autem & alij, in eundem Scripturæ locum sic alio sensu declarant, quomodo Deus dicatur pati à peccatore, licet peccatum non puniret, quia videlicet *peccato Deus offenditur, tamquam opposito suæ bonitati, suæ legi aeternæ, suo Dominio, ceterisque perfectionibus suis*, quas licet non potest non amare, sic non potest non odisse, non detestari, non grauiter ferre peccatum. Atque ita si esset passibilis, tantum ex vnoquoque peccato dolorem sentiret, quantum ex re quauis molesta & graui sentire possint homines. Vnde illud semper manet vt quantum est ex parte peccati, tam verè dicatur affligi & pati Deus quam si reuera pateretur, quia nisi hoc haberet à se vt esset impassibilis, haberet à peccato vt pateretur. Quod perinde est ad offensionem atque iniuriam inferendam ac si re ipsa sensibili motu grauitatem iniuriæ persentiret. Sicut si quis lorica indutus ita percuteretur ab aduersario vt nullum sentiret dolorem, non diceretur minus percussus, sed tantum minus læsus; Nec defectus læsionis esset à percutiente, sed à percusso; vnde perinde semper maneret iniuria percussione ac si læsus esset. Sic passim Scripturæ de Deo vt iam videbitur in explanando Tertio quod est propositum de Christo Domino similes quasdam & grauiore patiente poenas à peccato quam pro peccato.

Prima internarum fuit separatio filij à matre, grauis certe do-

lor, sed quam longe est grauior quando per peccatum separatur ab anima quam vnice diligebat; separatur enim inuitus, eiicitur ab anima, expellitur, & in eius locum introducit inimicus: non ad duos aut tres dies, sed ad menses aut annos integros, aut ad ipsam etiam æternitatem: neque enim redibit in animam quantumcumque foris pulset, clamet & expectet, nisi quando libuerit animæ cuius voluntati se ita Christus subijcit, vt mors & vita quam in ipsa habet sit in eius voluntate. O stupendam Christi bonitatem! O execrandam peccati malitiam! *Iniquitates vestra diuiserunt inter vos & Deum vestrum!*

Is. 59.

De internis aliis doloribus cum toti fuerint excitati propter peccatum & miseras inde consequentes, vt explicatum est suo loco, quis non facile capiat toties Christo renouari dolorem, quoties renouatur obiectum & doloris materia? Nonne sic iisdem pene verbis vtrumque dolorem Scriptura exprimit, & quem in terra passibilis sentit, & quem in coelo impassibilis patitur. *Capit Dominus, & cadere super Israel. FACTA sunt mihi molestia, laboravi sustinens. VIDIT Dominus & malum apparuit in oculis eius, & APORIATVS est.* Quo vno verbo quidquid tristitiæ, timoris, anxietatis & similis cuiuscumque molestiæ Christus in horto pertulit tam apte exprimitur, vt Apostolus indicare volens se in grauiore qualque incidisse miseras tum animi, tum corporis, non alio vtatur verbo quam *aporiatur*, id est, omni re prorsus atque ipso etiam rei agendæ consilio priuati sumus. Quis crederet eò reduci Deum! aut quis pius non crederet sic affirmante Scriptura?

4. Reg. 10.
Is. 1.

Is. 59.

2. Cor. 4.

Sic de septem illis externis pœnarum speciebus quas Christus passus est, nulla prorsus relata est cui non aliquid simile Scriptura vel Patres referant, quod à peccatore inferatur Deo. Proditoris osculo Iudæ inhorruit! *Sic abominatio Domini est omnis illusor: sic simulatores & callidi prouocant iram Dei.*

Pro. 3.
Job 36.

Job 15.

In c. 15.
Luc.

Alapis, calce, sputis & aliis probris per totam noctem proculcatus est Christus. At ecce noctu diuque peccator, *tendit aduersus Deum manum suam & contra omnipotentem roboratur.* Neque minus peccato quam sputis foedatur Christus. *Vnde tu qui accepisti imaginem Dei, ait sanctus Ambrosius, noli eam irrationabili fœditate consumere.*

Flagellatus est semel aut iterum Christus; At vero indefin-

Gravius est Christo pati à peccato quàm pro peccato. 407

ter ingeminantur flagella Christo, ait sanctus Augustinus, quia fla-
gellatur sermo eius: & afferens illud supra memoratum, Congre-
gata sunt super me flagella, sic pergit, flagellatus est flagellis Iudae-
rum: flagellatur blasphemis falsorum Christianorum: multiplicant fla-
gella Domino Deo suo, & nesciunt. Quid clarius, & quid aptius ad
rem nostrâ? Aut si forte dubites quomodo blasphemii flagellent
Dominû, & quinam sint illi blasphemii, audi sanctum Bernardum
de vnoquoque peccato loquentem sub propria voluntatis no-
mine: In ipsum, horribile dictu, desavit authorem. Omnino enim vel-
let Deum peccata sua aut vindicare non posse, aut nolle, aut ea nescire.
Vult ergo eum non esse Deum, quæ quantum in ipsa est, vult eum aut
impotentem, aut iniustum esse, aut insipientem. Crudelis plane & om-
nino execranda malitia quæ Dei potentiam, iustitiam, sapientiam pe-
rire desiderat. Hoc est scilicet blasphemare, sic de Deo peruerse
sentire: & hoc est flagellare Dominum Deum, sic omnia eius at-
tributa proterere, sicut si omnia corporis membra flagellatione
contererentur. O verè dictum: *Crudelis plane malitia!*

Quod præterea Christus coronatus est spinis, quod crucem
baiulavit, quod cruci affixus est, & in cruce sitim ac cæteros
corporis cruciatus sine vilo solatio toleravit, totidem respondet
à peccato pœnæ, Christo grauiore. Nam dum peccator munda-
nas suas sollicitudines quæ spinis in Euangelio comparantur, præ-
fert Christi consiliis & præceptis quibus regi deberet, quid aliud
quam spinis coronat Christi caput? An agnoscis Christiane Chri-
stum esse Regē tuum? Agnosco, inquis. An te illius regimine regi
velles? velles certe, sed simul velles illius regimen non esse aliud
quam quod mente voluis, quàm quod sollicitè desideras, & auide
cupis. Hæc est corona quam illius imponis capiti, tua scilicet
depravata voluntas qua te vna vis regi, nec in Christi regno
aut diuino sensu, velles aliud esse quod tuo repugnaret; vt ille
quidem te regeret sed peccato tuo te regeret, & non in te Chri-
stus sed peccatum à Christo quodammodo approbatum aut dis-
simulatum regnaret cum concupiscentiis. *Va filij desertores, di-*
cit Dominus, vt faceretis consilium & non ex me, & ordiremini te-
lam, & non per spiritum meum, vt adderetis peccatum super peccatum.
Nempe hanc prauam mentem quam peccator suis peccatis ad-
dit, vt illa velit Christo probari, & à Christo per illa regi: *Vt*
in concupiscentiis vestris insumatis.

*Tract. 20.
in Ioan.*

*Serm. 3.
In Resurre.
Dom.*

Luc. 8.

di. 15. 301

Vt lac. 4.

1f. 63. Quid porro est quod inter extremos suos dolores numeret,
 quia torcular calcavit solus, nisi quod peccato fiat ut solus crucem
 baiulet. Suam nempe peccator crucem abiicit, & quod illi præ-
 cipue ferendum erat ad salutem, in solum Christum reiecit.
 Quasi sit peccatori satis quod Christus patiat! ô peccati saui-
 tiam! Hoc est quod Ipse in alio Scripturæ loco plangit acerbissi-
 2f. 118. me: *supra dorsum meum fabricauerunt peccatores, prolongauerunt
 iniquitatem suam.* Quasi diceret, quidquid sibi peccatores indul-
 gent, quidquid ad liberiores vitam sibi laxandam comminiscun-
 tur, quidquid sibi fingunt de omni timore deponendo & de se-
 curitate suæ salutis, totum hoc in me conjiciunt, totum id ita sibi
 promittunt, quia pro illis passus sum; quod certe non potest non
 esse mihi grauissimum, ut quo motiuo deberent uti ad concupis-
 centiam reprimendam, eodem abutantur ad illam relaxandam.
 Quid diutius cuius Patri quàm videre filium tanto effusius sibi
 bona parta prodigentem, quanto ipse filius vidit Patrem in illis
 bonis acquirendis laborasse? Suntne vero hæ parentum expecta-
 tiones? Suntne hi Crucis fructus?

Sed quod præcipuum est in hac tota materia, *Crucifixio*, præ-
 cipuum illud est quod disertis Apostolus verbis expressit, *rur-*
 1Mal. 3. *sum crucifigentes sibi in ipsis filium Dei. SI AFFIGET homo Deum,
 quia vos configitis me. Me vos configitis gens tota.*

Hoc quærebat aliquando Deus à populo suo, Vtrum fieri pos-
 set ut Deus cruci affigeretur. Et certe si de cruce lignea vel quam
 vocant materiali cruce sit quæstio, satis aperte constat quod non
 possit Deus, ut Deus, crucifigi; & idcirco factus est homo ut
 tamquam homo crucifigeretur. Sed si quæstio sit de alio quo-
 dā genere crucis quo Deus in nobis affigitur velut corpus in cru-
 ce, respondet ipse Deus id non modo esse possibile, sed id ita fieri
 à populo suo. *In decimis*, inquit, *& in primitiis*; id est, per pec-
 catum quod committebant in negandis aut diminuendis quas
 Templo & Sacerdotibus debebant, decimis; hoc peccato quod
 memorat inter alia constringebatur quodammodo Deus & cui-
 dam veluti cruci affigebatur. Cur porro? quia ut puniret illud
 peccatum poena proportionata; cogeatur quodammodo Deus
 restringere, recusare aut diminuere bona temporalia quæ plena
 manu solebat illis effundere. *In penuria vos maledicti estis, & vos me
 configitis.* Sic se restringi & impediri quo minus beneficiat, hoc
 vocat

vocat Deus crucifigi. Sicut enim cruci affixus non habet liberum manus vsum, ac proinde nihil potest dare: sic sibi videtur Deus affigi manu quando per peccati & per iustitiæ leges quibus puniri debet peccatum, ita detinetur vt non beneficiat.

In quo certe est maxima Dei bonitas qui magis dolet se non dare hominibus, quam vel ipsi homines gaudeant se ab eo accipere. Sed & quanta sit peccati malitia & quanta etiam Diuina iustitia licet inde colligere, quod tamen si Deus ex se sit propensissimus ad donandum, sic tamen per peccata detinetur, vt velut manu cruci affixa restringatur & retineatur à gratiis, & à quibuscumque donis siue spiritualibus siue temporalibus elargiendis. Atque hic est primus modus quo intelligi potest quomodo per peccatum Christus iterum crucifigatur, quatenus scilicet impeditur ne in nobis agat & ne nobis beneficiat. Sicut enim tunc dicitur, *vetus homo crucifigi cum actibus suis*, quando impeditur ne in nobis agat & operetur, sic plane dicendus est nouus homo qui est Christus crucifigi cum actibus suis, quando detinetur ne in nobis agat sicut ageret, nisi detineretur, vt supra declaratum est fusius. Rom. 6.

Deinde vero rursus crucifigi à peccatore dicitur Christus quia suo peccato, causam renouat crucis Christi. Hoc enim facit propter quod remittendum, oportuit Christum crucifigi, & propter quod toties oporteret illum crucifigi quoties peccat, nisi meritum Christi tam efficax esset, vt ad delenda peccata omnia; sese extendat. At vero quia peccatori per vnumquodque suum peccatum perit istud Christi meritum, nisi denuo per Sacramenta renouetur & applicetur, sicut ista meriti renouatio & applicatio est noua quædam crucifixio, quia de nouo gratia inde hauritur; ita peccare, quod est causa huius renouatæ applicationis, est rursus quodammodo crucifigere filium Dei, & tantò ei grauiorem plagam infligere, quantò magis vellet rursus pati sensibilem crucem, quam peccatum vllum de nouo fieri. *Cur addimus afflictionem afflicto*, dicebat sanctus Bernardus, *magis aggrauant Christum vulnera peccati nostri quàm vulnera corporis sui*. Et de Iudæis agens, *In hoc*, inquit, *forte minus reprehensibiles quàm* Rom. 22. *noni Crucifixores qui manibus & verbis mortem illi accersunt, immor-* Pasche. *talem mortificant, in crucifigibilem crucifigunt*. Sic sanctus Augustinus supra relatus, cuius verba hic pensulatiùs expendi pos-

210. FERIA 6. quæ PARASCENE dicitur. Rursum crucifigentes, &c.

Scilicet .44.
In Domi-
nica de
Pass.

sent. Sanctus quoque Ambrosius, ad hæc Ioannis verba: *Tuleris ergo lapides Iudai ut jacerent in eum: FORTE*, inquit, dicitis malum fecerunt Iudai, qui eum lapidare voluerunt, & qui eum crucifixerunt. Scitote & firmiter credite, quia hoc faciunt Christiani hodie, male viuentes, eò quod tunc Christum vitis persequuntur. O quam pauci sunt in tanta multitudine Christianorum qui Iesum non persequuntur, & lapident, & occidant.

Ioan. 14.

Denique quod, siti ardentissima torqueretur in cruce, quod felle & aceto potaretur, quod omni prorsus solario destitutus vires omnes in extremis exhauriret tormentis: Dira profecto sunt & horrenda; Sed si comparentur cum peccato, si cum desiderio salutis nostræ, si cum ea Charitate qua & gloriam Patris & animarum salutem ac perfectionem sitit, tanto minus ei dura & graua videbuntur, quanto minus aestimat quæ sua sunt quam quæ sunt Dei. *Pater major me est*, inquebat, ut homo, Christus: at per peccatum, Pater id est Deus offenditur, per Crucis vero tormenta solus homo torquetur, vnde quantum Christus plaris facit illum qui peccatis offenditur quam illum qui tormentis cruciabatur, tanto grauius sentit peccatum quod est malum Dei, quam tormentum Crucis quod est malum solius hominis prout est malum sensibile. Erat quidem Christus Deus, & Christo patiente dici potest Deus passus; sed tamen cum re ipsa solum pateretur ut homo, quidquid tum patiebatur, dicitur malum esse hominis patientis & non Dei, ut humana discernatur natura secundum quam erat passibilis. At peccatum offensa Dei est, iniuria Dei est, Crux Dei est, irrisio Dei est, & verbo vno, quantum esse aut dici potest, malum esse Dei, peccatum est Dei malum, & quantumcumque in suo genere sit leue & minimum, quia tamen malum est Dei, malum est in suo genere grauius malo quouis grauiissimo in genere inferiori quale est malum poenæ.

Iob 6.

Vtinam, dicebat Iob, *appenderentur peccata mea quibus iram merui, & calamitas quam patior in statera. Quasi arena maris hæc grauior appareret.* Hoc plane Christus vehementer sitit, hoc est quod exoptat ardentius, ut appendatur vel vnum peccatum & quidquid patitur in statera; sed contra prorsus ac Iob sentiebat, contra exclamaret, quasi arena maris vel vnum peccatum grauius appareret quam quidquid patitur. *Non afferamus stateras dolosas*, inquit sanctus Augustinus, *vbi appendamus quod volumus, pro ar-*

Contra
Donat.

Gravius est Christo pati à peccato, quam pro peccato. 411

bitrio nostro dicentes hoc graue est; sed afferamus Diuinam stateram de scripturis sanctis & illà quid sit grauius appendamus: imo non appendamus, sed à Domino appensa recognoscamus.

Statera dolosa sunt rationes petitz à carne, à mundo, à visibilibus & transitoriis rebus quarum aspectu & affectu aliter de malo culpæ ac poenæ iudicamus quàm Christus iudicet, & ex illo iudicio refellimus quidquid ab Euangelio, seu quidquid à Christo perfectionis proponitur, quasi illud esset alienum à receptis mundi huius institutis, quasi esset difficilius, quasi esset alterius quam nostri status, quasi solis id esset Religiosis aut Nouitiis proprium. Hoc est illi fel & acetum porrigere, *hoc est super Ps. 68. dolorem vulnerum eius addere*, hoc est ad calculos nostros & ad humanam stateram res diuinas reuocare, quod certe Christo est grauius quam ipsa Crux in qua sic est appensus vt in ea etiam velut in statera malum culpæ & poenæ appenderit, & quandoquidem malum poenæ sustinuit ne malum esset culpæ, malum hoc culpæ grauius alio tam aperte declarauit quàm apertum est unicuique, virum sapientem minus æstimare media quæ impendit ad aliquem finem obtinendum, quàm ipsum finem; & vt ait sanctus Thomas, *Gravior est semper finis priuatio quam eorum quæ ducunt ad finem.* Hæc sunt quæ in Cruce à Domino per tres horas continuas vsque ad mortem appensa sunt, & hæc sunt quæ dicebat sanctus Augustinus, *vt quemadmodum appensa sunt, recognosceremus.*

III. P V N C T V M.

De Morte Christi Domini.

EXPIRANDVM tandem fuit, consummatis Scripturis restabat ista quæ cæterarum esset consummatio Scripturarum; *Et post hebdomades sexaginta duas occidetur Christus.* AB. Dan. 9.
SCISSVS est de terra viuentium. DEDI dilectam animam meam in Is. 53.
manu inimicorum eius. Expirauit & inclinato capite tradidit spiritum. lev. 17. Matth. 27.

Hoc exigebat peccati grauitas vt non tantum pateretur & Ioan. 19.
quidquid haberet in vita Christus daret, sed, vt ipsa etiam Christi vita daretur, quo salutis humanæ pretio nihil esse potuit pretiosius. O vita Christi! ô mors Christi! quàm suauis illa, quam

¶ 12 Feria 6. quæ Parascene dicitur. Rursum crucifigentes, &c.

dura ista! Quàm præclare simul conueniebant corpus & anima, tam suavis erat vita Christi: vnde & tam duram ac amaram oportuit esse mortem quæ illius fuit corporis & animæ violenta separatio. *Siccine separat amara mors?*

¶ Reg. 15. Possent & septem alia capita recenferi vnde hæc mors Christo valde grauis esset. Primum est, genus mortis infame. Secundum est, causa preterita mortis. Tertium, societas latronum. Quartum, multitudo persequentium. Quintum, Iudæorum inde sequens interitus. Sextum, Gentilium inde futura contradictiones. Septimum, futura ex illis contradictionibus dura sanctorum supplicia. O quæ tùm bonus Iesus sentiebat qui aliquando in suis tot rursum esset passurus mortes, quot essent futuri Martyres.

Sed quàm grauiori quotidie morte moritur Christus, & in singula pene momenta quibus peccatur! ô peccatum! ô peccatorem! ô quàm vere dictum, *septem nequitia sunt in corde illius.* Et quàm verè comparatur peccatum bestię illi quam vidit sanctus Ioannes cum septem capitibus & aliis partibus monstruosis.

¶ Apoc. 13. Septem sunt capita vnde peti potest peccati grauitas, seu quàm graue Christo fuerit etiam supra eius mortem.

Primum est, quòd cum Christus quatuor vitas haberet, vnam tantum perdidit per mortem suam: at cum easdem etiam quatuor aut affines vitas in anima possideat, totas simul per peccatum amittit. Quatuor vitæ Christi erant Diuina, Beata, Spiritualis, & Naturalis, ex quibus sola naturali priuatus est, remanentibus aliis integris. Nam vt suprà dictum est, nulla vmquam fuit separatio Diuinitatis à Christo, nec Beatitudinis, nec Diuinæ Gratiæ seu Charitatis in qua consistit vita spiritualis, vnde restat sola naturalis vita quæ dissoluta est decedente à Corpore Anima.

Quatuor vero his quodammodo respondentes vitæ quas Christus habet in anima cuiuscumque fidelis, hæ sunt, Prima quæ est illi communis cum Patre & Spiritu sancto, & diuina dici potest, ea est quæ per Gratiā & Charitatem habitualement formatur, de qua ipse Dominus dicit, *Et ad eum veniemus & mansionem apud eum faciemus.* Secunda est, quæ item posset dici communis tribus illis personis, sed tamen magis est particularis Christo Domino, Beata quædam vita est quam vult in nobis viuere & ratione

Enius dicit, *delicia mea esse cum filiis hominum*, cum illis conuer-
sari, illos regere, illos protegere, illos docere, & hoc eius regnum ^{Proph. 8.}
de quo ipse, *Regnum Dei intra vos est*; *Et si quis aperuerit mihi* ^{Luc. 17.}
ianuam, intrabo ad illum, & cenabo cum illo, & ipse mecum. Tertia ^{Apoc. 3.}
quæ est etiam particularis ipsi Christo, est Sacramentalis per Sa-
cro-sanctum illud Sacramentum quod est panis vitæ de qua ipse
dicit, *qui manducat meam carnem, & bibit meum sanguinem, in* ^{Ioan. 6.}
me manet, & ego in illo. Id est, singulari quodam modo simul ha-
bitamus. Quarta denique est de qua ipse ait ad alios quosdam
effectus; *Manete in me, & ego in vobis. Sicut palmes non potest ferre* ^{Ibid. 15.}
fructum à semetipso nisi manserit in vite, sic nec vos nisi in me man-
seritis. Ego sum vitis vos palmites. Qui manet in me, & ego in
eo, hic fert fructum multum, quia sine me nihil potestis facere: Nihil
scilicet quod sit vitale supernaturali vita, & quod sit fructuosum
in vitam æternam. Sicut autem palmes vivit in vite, ita & vitis
in palmitate. Sic & nos in Christo vivimus, & ille in nobis ad feren-
dum fructum conformem nostræ vocationi.

Verum, quod in peccato est gravissimum, quatuor istæ vitæ simul
eodem instanti pereunt quo lethalis culpa committitur. Mors
est Christi secundum has quatuor vitas; Perit prima vita, pereun-
te Gratia & Charitate: Perit secunda, pereunte amicitia quæ
intererat inter Christum & animam mediante Gratia: Perit ter-
tia, pereunte principio vitæ quod reddebat capacem animam nu-
trimenti spiritualis, sicut in corpore mortuo nullus est cibi usus:
quidquid sumptum est alimenti perit, & redditur corpus inca-
pax nutritionis. Quarta etiam perit vita, pereunte vnione &
communicatione quam habebat anima cum principali Agente,
sine quo nihil potest meritorium vnde omnia eius opera sunt
mortificata & mortua; mortificata quidem quæ ante facta sunt
in statu vitæ: mortua vero quæ fiunt in statu mortis seu in statu
peccati. O quam vere dictum: *Va eis, quoniam recesserunt à me,* ^{Osee 7.}
vasabuntur. Sed & Va eis, cum recessero ab eis. Quam vere etiam ^{Ibid. 9.}
sanctus Ambrosius postquam dixit, *Verbum Dei maxime in nobis* ^{L. de fuga}
vivere. SANE, inquit, moritur nobis, si à nostra anima separatur ^{seculi c. 2.}
non quò morte corrumpatur, sed quò dissolvatur atque exuatur mens
nostra ab eius conjunctione. MORS ENIM VERA EST, VERBI
ET ANIMAE SEPARATIO.

Atque hoc primum caput, vnde est Christo gravius sic rursus

¶ 14 Feria 6. quæ Parasceue dicitur. Rursum crucifigentes, &c.

mori per peccatum, quam quando pro eodem mortuus est; quia quadruplex illi perit vita quarum vnaquæque cum sit spiritualis & supernaturalis, pluris eam facit quàm suam naturalem si præcise tantum, vt erat naturalis, spectetur.

Secundum, est quod etsi omnia essent paria, si vna vtroque vita tantum periret, grauiori tamen morte, morte peccati nostri periret quam morte suæ Crucis, quia volens lubensque moriebatur in cruce; At non nisi repugnans & inuitus in nobis moritur. *Fecerunt malum in oculis meis, & quæ nolui elegerunt.*

Tertium est, quod ad paucos dies Christus est mortuus, breui resurget, & resurget in gloria, nihilque prorsus illius obstabit animæ, quin corpus jacens in sepulchro resumat quando volet, Non lapis superpositus, non custodes oppositi, non ipsa mors quæ interuenit, non quiuis hostes qui mortem illam procurarunt.

Ps. 3. Non timebo, inquit, *millia populi circumdantis me.* At vero quandònam in animam vnde expulsus est, reuertetur? quanta obstacula! quanti obices! quantæ repulsæ! quanto ad januam stabit tempore & pulsabit, & clamabit, *aperi mihi soror mea, & repelle-*

Cant. 5. tur. Numquid hoc graue est & odiosum!
Quartò, in morte Crucis, quanta bona insunt! quanta Dei est gloria! quot hominum salus! *Si posuerit pro peccato animam suam, videbit semen longeuum, & voluntas Domini, in manu eius dirigetur. Pro eo quod laborauit anima eius, videbit & saturabitur. In scientia sua iustificabit ipse iustus seruus meus multos.* Hæc certe tolerabilem illam reddebant mortem & valde acceptam. At in peccato nihil prorsus boni, nihil plane nisi mali; malum est Dei, malum est Christi, malum animæ, malum corporis, malum huius & alterius vitæ. *Scito & vide, quia malum & amarum est, reliquisse te Dominum Deum tuum, & non solum tibi amarum, sed & ipsi Domino, quem sic reliquisti.*

Col. 2. Quinto, Mors Christi mors erat peccati: Morte sua Christus meruit vt deleteretur omne peccatum, Delens, inquit Apostolus, quod aduersus nos erat chirographum decreti, quod erat contrarium nobis, & ipsum tulit de medio, affigens illud cruci.

At quid est peccatum? Mors ipsius meriti mortis Christi, totum illud euacuat quantum in se est & exhaurit quod Christus nobis est meritis. Videte, quid grauius Christo esse possit, an se peccatum interficere, vel se à peccato reuiuiscente rursus inter-

fici? An delere suis meritis peccatum nostrum: vel peccato nostro sua deleri merita! Hoc est *filium Dei conculcare, & sanguinem testamenti pollutum ducere.* Hebr. 10.

Sexto, per mortem suam Christus Dæmones vicit, *per mortem suam destruxit eum qui habebat mortis imperium, id est, Diabolum* Ibid. 1. *& liberauit eos qui timore mortis per totam vitam obnoxij erant seruituti, vt ait Apostolus.*

At peccator inuertit hanc gloriam & victoriam Christi, Dæmonem facit vincere & triumphare de Christo; vterque de te decertabant in occasione peccati; vicisset Christus, si peccatum euitasses; vicit Diabolus dum consensisti peccato, redit in domum suam, *& fiunt nouissima hominis illius peiora prioribus.* Luc. 11. Hoc ita referebat Dominus indicans quam sibi esset graue sic à fugato fugari hoste.

Septimo denique, Christo gratissimum fuit præbere mundo exemplar obedientiæ quæ Deo reddenda est vsque ad mortem, sicque omnes reducit homines ad subiectionis statum vnde exciderant peccatum. At ecce peccator contra sese opponit, *non seruiam*, inquit, non obediam, non me Deo magis subdam quàm si nihil ad me spectaret Christus, aut perinde ac si nihil illud esset quod edidit tam stupendum subiectionis exemplum! Potest hoc videre Christus, & non grauius ferre quàm obedire Patri!

Vnde vt tandem concludamus, videris quam vera sit vniuersim proposita Veritas de grauiori malo Christi patientis à peccato quàm pro peccato. Cum totum illud quod pro peccato passus est malum, reuocetur ad hæc tria, *contemptum, pœnam, & mortem*; Neque in his tribus aliquid tam graue reperiatur toleratum, quin aliquid grauius illi tolerandum in peccato viderimus. Quid restat quam acquiescere huic Veritati, & ex illa referre fructum quem proposuimus referendum, qui est discere quid sit peccatum, quid sit vel semel peccasse!

Mihi pro certo est quod si, qua par esset, attentione cogitaretur illa Veritas, aut nullus esset Christianus, aut nullus esset qui tam libere peccatum admitteret sicut admittit. Quid! Christianum credere quod credit de Christo Domino, & velle tantam illi, quoties peccat, inferre iniuriam, quantam est passus à Iudæis! non est hoc credibile, talem esse posse Christianum,

Quis nisi Iudæus non detestatur vel minimam partem, cogitatæ vel minimam eorum partem, quæ hodie contra Christum perpetrata sunt, seu verbo seu facto seu signo? Si tam perfractæ frontis esset aliquis qui non erubesceret profiteri se dolere quod ibi tum non adfuerit ut de suo conferret cum Iudæis ad Christum illudendum: censereturne Christianus qui hoc auderet? nonne ut blasphemus, ut Iudæus, ut Iudas cum diris & execrationibus ablegaretur? Et tamen ô Christiane peccator, si attendis quid sit peccatum, videbis te illic fuisse, & te illic quoties peccas, adesse, qui non partem aliquam eorum quæ gesta sunt gerat, sed totum ipse vnus omnino præstet & simul coniunctim perpetret, quod alij non nisi partim & diuifim commiserunt.

Adeamus Ierosolymam, ascendamus Caluariam, conueniamus vnum ex his aliquem qui suam Christo crucifigendo locauit operam. Inquiramus ab eo an sit ille qui Christum vendiderit, qui negarit, qui accusarit, qui condemnauerit, qui flagellauerit, qui fel & acetum porrexerit: nullus reperietur qui horum omnium fuerit reus. Alius est qui prodidit: alius qui emit, alius qui accusauit, alius qui condemnauit. At tu peccator, tu vnus omnium crimen simul & eodem quo peccas momento, sic in te colligis, ut quod à variis vario tempore passus est Christus, à te vno totum patiat. Tu illum vendis, tu illum negas, tu illum accusas, flagellas, crucifigis & occidis.

Et licet è Iudæis aut Gentibus aliquis plura in Christum perpetrasset: quis qualisue Christus esset, nesciebat. An tu Iudæ noueras illum esse filium Dei, illum esse promissum Messiam qui redempturus esset Israel? plane ignorabat. *Si enim cognouissent, numquam Dominum gloria crucifixissent?* At tu Christiane, nonne credis illum esse quem fides Christiana proponit? Et hunc non vereris negare, non pudet illum crucifigere!

Sed esto fuerit miles qui de Christo mira audierit vel viderit: at quod fecit, iussus fecit, & tum Christus in tam miserandum deuenerat statum ut qualis ante fuisset iam non cogitaretur. Te vero peccatorem quis coëgit, quis locauit, quis induxit, quis te contra Christum inflammauit, nisi tua propria concupiscentia? quonam verò in statu credis illum esse qui gloriosus in cœlis sedet ad dexteram patris? Et tu illum ultro appetis, tu illum ad necem vocas!

Dic

Dic nobis vero miles impie, quoties impietatem tuam in virum illum innocentem exercuisti? quoties illum flagellasti? quoties illum crucifixisti? semel tantum respondebit. At tu peccator, quoties? numera si numerari potest quoties peccaueris, agnosce te toties id ausum esse, quod semel tantum hodie factum est à Iudæis omnibus, & agnosce tandem quid sit peccatū.

Neque id objicias aut cogites quod iam supra dilutum est, Christum modo esse impassibilem & longe à malo poenæ positum. Quæro enim abste quando miles latus eius aperuit, senseritne Christus illud vulnus, cum iam expirasset? negabis prorsus quia mortui corporis nullus est sensus. An vero negabis vulnus illud tam illi fuisse iniuriosum & lethiferum quam alia omnia? Nonne inter omnia vulnera, plagæ quinque nobiliores recensentur, & inter illas plagas, quæ est media Lateris seu Cordis nonne nobilissimum habet locum & cultum? Nonne de quinque illis plagis, iisdem prorsus verbis loquimur, & eadem ratione sentimus sine vlla distinctione aut differentia modi quo accepit illas plagas? Et tamen scimus, quod cum accepit plagas pedum & manum erat passibilis, cum vero latus eius apertum est, erat impassibilis. Sed scimus etiam quod nihil refert ad rationem contemptus, poenæ & mortis quod sit in statu passibili vel impassibili. Cur igitur mihi differentiam istam objicies quando agitur de peccato in quo non minus offenditur quam in Cruce? an si quis pugione fodisset sacram Hostiam minus iniuriæ diceretur intulisse Christo, quod ibi est impassibilis, quam si reuera pateretur?

An putas sentiebat persecutionem Christus cum diceret Saulo, *Saule Saule, quid me persequeris?* Et tamen perinde ac si ipse Act. 9. lapidatus esset in Stephano & coniectus in carcerem cum suis discipulis, ecce è coelo perinde clamat, *Ego sum Iesus quem tu persequeris*, Ego ille sum, quem tu quæris ad necem. Sic plane o peccator tibi modo è Cruce loquitur Saluator tuus, Ego sum Iesus quem tu persequeris. Ego Iesus ille qui semel pro te à Iudæis sum crucifixus, & à te rursus crucifigor quoties peccas.

Popule meus quid feci tibi, aut quid molestus fui tibi? responde mihi? Mich. 6.
Ego pro te sum venditus, vt te liberarem à seruitute Dæmonis, & tu me rursus vendis tuo peccato! Ego pro te tristitiam & agoniam passus dirissimam, vt tibi gaudium compararem æter-

num; & tu me grauius quotidie peccato tuo contristas! Ego pro te glorificando, Gentilibus illudendus & conspuendus vt vides, fui traditus; & tu me peccato tuo, Dæmoni tradis illudendum! Ego pro te expiando & pro auerrendis à te Dei flagellis fui flagellatus: & tu me peccatis tuis flagellas & conculcas! Ego in cruce affixus clauis, vt tamquam stylo sculpsam in corpore meo, quantum te diligo: Et tu me grauiori peccatorum tuorum cruci affigis, vt mihi manifestes quantum me oderis! Ego pro te in Cruce mortuus ne morereris in æternum, & tu mihi mortem affers ne viuam in te.

Deut. 32. *Hæcine reddis Domino, popule stulte & insipiens? Numquid non ipse est qui te fecit & refecit tali modo? Numquid hoc credis?*

Credisne Christum, credisne esse filium Dei, credisne esse Saluatorem, credisne semel fuisse mortuum? Vnde habes nisi ex Scripturis, nisi ex Ecclesia, nisi ex Prædicatoribus tibi dicentibus? At ecce nunc eadem Scripturæ, eadem Ecclesia, & iidem prædicatores tibi pronuntiant, *rursum crucifigentes sibi metipsos filium Dei*. Credis Apostolo dicenti primum à ludæis fuisse crucifixum: & non credes dicenti rursum à te crucifigi! Neque dicas te id nolle, te id non cogitare & intendere. Non est necesse id cogitare & ita expresse velle vt ita fiat, satis est velle peccatum, vt quod est in peccato malum totum fiat; Nolles dum peccas offendere Deum, nolles priuari eius gratia, nolles coelo excidere, nolles damnari: & tamen ista omnia ex peccato sequuntur. Sic plane Christi mors, siue de illa cogites siue non cogites. Quantum quantum est crimen occisi Christi, tantum est peccati malum in quo totum illud continetur: ac proinde si vis scire quo affectu, quo dolore, quonam odio sit detestandum peccatum, disce à teipso quo affectu crimen occisi Christi detestaris: neque vnum vmquam disiungas ab alio. Iam supra dictum est quod huc etiam referri potest: vt fugiamus homicidam siue vt detestemur homicidium, Scriptura hoc proponit moti-
uum; quasi nihil est ante eum sanguis: quasi nihil esset humanum sanguinem fundere sic homicida nihili ducit homicidam esse. Sic de quouis peccatore, sic de te cogita si non caues deinceps à peccato attentius, quasi nihil tibi esset diuinum fundere Sanguinem, quasi nihil tibi esset quod Christum perimas tuis manibus tua lingua, tuo corde. Hoccine nihil putas? Deicida! Christi-

Ecclesi. 8.

Gravius est Christo pati à peccato quàm pro peccato. 419
cida! quid fecisti? quid deinceps facturus es in occurſu peccati!
En anima eius in manibus tuis ſemper.

Vrgeri poteſt peccator vehementius: aut certe in tam horrenda peccati ſæuitia, defixo & cogitabundo dimittatur animo, nec relaxandi ſpatium detur.

E O D E M D I E,
AD HÆC AVT SIMILIA VERBA:

Curramus ad propoſitum nobis certamen, aſpicientes in Authorem fidei, & Conſummatorem Ieſum. Hebr. 12.

VERITAS PRACTICA.


Sic eſt propoſitum nobis certamen in ſeptem Chriſti patientis ſtationibus, vt qui vel vnam deferat, totius militiæ ſit deſertor.

RATIO EST, *Quia ſic eſt propoſitum nobis certamen contra ſeptem capitalia vitia vt qui vel contra vnum non certet, totius militiæ ſit deſertor.*

Sed in ſeptem Chriſti patientis ſtationibus ſic propoſitum eſt nobis certamen contra ſeptem illa capitalia vitia, vt qui vel vnam deferat ſtationem, non certet contra vnum vitium.

Ergo ſic eſt propoſitum nobis certamen in ſeptem Chriſti patientis ſtationibus, vt qui vel vnam deferat totius militiæ ſit deſertor. Quod concife hîc quidem & breuiter enarratur, ſed longe ſuſius ex antè dictis dilatari poteſt.

I. PUNCTVM.

 *EXILLA REGIS PRODEVNT, vt prodeamus ſcilicet ad pugnam & noſtrum ſequamur Ducem.*

PANGE lingua glorioſi, laurcam certaminis: Et ſuper
Ggg. ij

420 FERIA 6. quæ Parasceue dicitur. Curramus ad propositū, &c.

Crucis trophæo, dic triumphum nobilem, qualiter Redemptor orbis immolatus vicerit.

Non est dubium quin Christus Dominus patiēdo certarit, vicerit & triumpharit; sed dubitare forsan quis poterit an sit nobis ita certandum: quamquam quid dubij esse potest volentibus aliquando coronari, & audientibus ac credentibus neminem fore coronandum nisi legitime certauerit? Eò vocamur omnes quotquot militanti Ecclesiæ ascripti sumus: nec cunctandum sed *currendum ad propositum nobis certamen*. Sic est autem *propositum nobis certamen in septem Christi patientis stationibus, ut qui vel vnam deserat, stationem suam deserat, & totius militia Christiana sit desertor*. Quæ profecto Veritas & toti enarrandæ Passioni Dominicæ: & præcipuo ex illa referendo fructui perquam opportuna & apta est.

Ratio quæ affertur est vulgaris sed tantò commodior. Sic est propositum nobis certamen contra septem capitalia vitia ut qui vel contra vnum non certet, totius militiae sit desertor. Septem sunt illæ Gentes quæ ab Israelitis erant expugnandæ & quas nisi omnino expugnent, sint ipsi expugnandi. *Percuties eas*, inquit Moyses, *vsque ad internecionem. Non inibis cum eis fœdus, nec misereberis earum, neque sociabis cum eis conjugia, filiam tuam non dabis filio eius, nec filiam illius accipies filio tuo, quia seducet filium tuum, ne sequatur me, & ut magis seruiat diis alienis, irasceturque furor Domini, & delebit te cito. Quin potius hac facietis eis: aras eorum subuertite, & confringite statuas, lucosque succidite, & sculptilia comburite.*

De his autem septem vitiis atque de eorum filiabus fuse sanctus Gregorius in Moralibus: & alij passim. Quod sit vero certandum contra omnia, tam aperte patet quam contra vnum. Nam qui ab vno superatus est, *huius & seruus est*, inquit sanctus Petrus, seruus autem peccati, seruus corruptionis, seruus Dæmonis, nonne est desertor sacrae militiae, & ipsius Christi transfuga perfidus?

O quam præclare Apostolus vel de vno vitio! *Non ergo regnet peccatum in vestro mortali corpore ut obediatis concupiscentiis eius. Sed neque exhibeatis membra vestra, arma iniquitatis peccato, sed exhibete vos Deo, Et post pauca. Nescitis quoniam cui exhibetis vos seruos ad obediendum, serui estis eius cui obeditis, siue peccati ad mor-*

Sic est propositum nobis certamen in septem Christi, &c. 421
tem, siue obeditionis ad Iustitiam?

II. PUNCTVM.

SED in septem Christi patientis stationibus sic propositum nobis est certamen contra illa septem vitia, ut qui vnā deserat stationem non certet contra vnum vitium.

Nam vnā stationem deferere nihil est aliud quam non certare contra illud speciale vitium cuius certamen in ea statione quæ deserta est, propositum erat à Duce nostro.

Præclara porro septem harum figura stationum præcessit in ipso primo introitu promissæ terræ, atque in ipsa prima ciuitate Iericho quam euerterunt Israelitæ. *Septies, inquit, circuibitis ciuitatem, & Sacerdotes clangent buccinis. Cumque insonuerit vox tubæ longior atque concisior & in auribus vestris increpauerit, conclamabit omnis populus vociferatione maxima, & muri funditus corruent ciuitatis.* *Quid enim septem sunt circuitiones nisi septem stationes? quid buccinarum clangor, nisi rotidem Verba quæ Christus in Cruce protulit, & quæ vnicuique stationi conueniunt ad idem vitium expugnandum? Quid denique vociferationes illæ nisi septem prodigia quæ simul etiam in eundem finem sunt edita? Quæ quidem tria videtur Psaltes complexus hoc versiculo: Mementote mirabilium eius quæ fecit, prodigia eius, & Iudicia oris eius.* *Iosue 6. ps. 104.*

Mirabilia quæ fecit Dominus sunt mirabiles septem virtutum actus quos edidit ad formam quandam certaminis contra septem illa capitalia vitia cum quibus nobis est decertandum. Non quod essent in eo vitia contra quæ decertaret, nulla plane, sed erant tantum humanæ passiones quæ dicuntur ab Apostolo, *similitudo carnis peccati*, non peccatum sed similitudo quædam, *Rom. 8.* quod circa eandem materiam versentur seu commoueantur atque ipsa vitia nostra. Naturales erant quidam animi motus concitati ex apprehensione boni vel mali sensibilis, sicut in nobis: *3. p. 9. 15.* vnde fiebat timor, ira, tristitia & similes quædam passiones, sed *4. 4.* non præueniebant rationem sicut in nobis, nec inordinate eum ferebant quò nollet, sicut nos rapiunt. Quid ergo erat quod certaret & expugnaret, si nihil erat inordinatum, si nihil erat contra voluntatem & contra rationem? Hoc est quod dicimus esse

mirabile, cū nihil esset contra rationem quod facere poterat in illis passionibus, tamen se continuit in motu naturali quem sentiebat, non id fecit quod licite poterat facere; aut id sustinuit quod poterat non sustinere: & quia quod tunc fecit, ita fecit contra naturalem inclinationem quam retinuit, idcirco certasse dicitur: & agonia quam sustinuit nihil aliud est quam certamen & lucta sui ipsius cum seipso, vt esset nobis exemplo sic esse decertandum in simili casu, vbi nos defectu certaminis in vitium incurrimus. Non fuisset illi vitium si non certasset contra se, quia vt dictū est, nihil inordinatum fecisset: sed nobis ordinarie est vitium & peccatum, quod vt disceremus euitare sic certando cum illo, idcirco decertauit; & sic contra vitia decertasse dicitur, intelligendo duntaxat motum naturalem in eo, circa eandem materiam & obiectum quod in nobis solet vitium excitare. Quibus ita præsuppositis, iam ingrediamur cum illo locum certaminis.

PRIMA statio est in oliuari monte, & primum ibi certamen initum fuit contra illud capitale vitium quod dicitur Acedia, pigritia, negligentia, tædium in rebus diuinis & spectantibus ad salutem. Distinguamus hic quod est pure naturale, seu naturalis passio sine vlla inordinatione; & quod est in nobis vitiosum. Naturale est omni homini tristari, tædere, & angī ad repræsentationem mali sensibilis; Sic est tristatus Dominus, sic capit tædere & pauere sibi repræsentando tormenta quæ imminebant, & damna inde consequentia, vt supra dictum est. Cum autem tanto premeretur angore vt si naturalem sequutus fuisset sensum, tunc mortem fugisset; noluit illum sequi sensum, sed contrā se opposuit, contrā certauit, & tam fortiter se obiecit morti

Matth. 26. vt & Patri diceret, *Non mea sed tua fiat voluntas*: Et Apostolis: *Ecce appropinquauit hora, & filius hominis tradetur in manus peccatorum. Surgite, eamus, ecce appropinquauit qui me tradet.* Ac tandem ipsis inimicis se ad necem quærentibus. *Ego sum, inquit, sicut me queritis, sinite hos abire.*

Sic est porro nobis certandum contra illud tædium quod aliquando sentitur in rebus Diuinis aut spiritualibus. Sic nihil eorum quæ tunc fieri debent, omittendum est: sic nihil eorum quæ non debent fieri, committendum: sed quasi nihil sentiretur, vnum spectetur quod agendum est, vna spectetur Diuina volun-

Sic est propositum nobis certamen in septem Christi, &c. 423

tas, ad quam sicut dulcedo nos non impellit, sed vera fides & Charitas; sic nec asperitas ab illa nos non dimoueat. *Quoniam oportet semper orare & non deficere. BONVM autem facientes non deficiamus: tempore enim suo metemus non deficientes. RECOGITATE enim eum qui talem sustinuit à peccatoribus aduersus semetipsum contradictionem, ut ne fatigemini animis vestris deficientes: Nondum enim usque ad sanguinem restitistis, aduersus peccatum repugnantes.* Quæ verba rursum infra recurrent attentius expendenda. Luc. 18. Gal. 6. Hebr. 12.

Quod conformi verbo in Cruce prolato valde confirmauit Dominus dicens *Consummatum est*, quasi diceret, nihil prorsus eorum quæ mihi agenda & patienda fuerunt, omisi. Sic moriendum, expletis & consummatis omnibus: sic omnia perfecte sunt consummanda, si velis securè mori. O qui hæc attente cogitaret, quàm longe à se expelleret omnem acediam. Ioan. 19.

Tunc autem *Terra mota est*, ut hoc prodigio mouerentur homines ad aliquem pietatis sensum cùm viderent immobile illud elementum moueri. Erisne tu terra grauior, ut non mouearis? erisne tu illis Gentilibus durior, qui viso terra motu & his quæ fiebant, timuerunt valde, dicentes: *Verè filius Dei erat iste.* Perge in his te vrgerè affectibus. Matth. 27. Ibid.

SECVNDA statio est apud Caypham, neq; enim apud Annam diu substitit, cùm alter esset summus Sacerdos, & omne Concilium ad se conuocasset. Ibi Iesus interrogatus de doctrina & de discipulis respondet se palam docuisse, & multos illic praesentes esse qui quod dixit audierint & qui de auditis testari possint. Tunc *unus assistens ministrorum dedit alapam Iesu*, & alij omnes quæ verbo quæ pugnīs, quæ sputis quæ calcibus & aliis indignis modis per totam noctem illum diuexarunt. Ioan. 18.

At vero tùm nonne irascendi Christo causæ occurrebant? nonne concitari motus iracundiæ poterant sicut de illo ante scriptum erat, *Circumspiciens eos cum ira, contristatus super cecitate cordis eorum?* Poterat certe Christus commoueri, poterat & irasci sine vllō vitio: sed maluit contra omnem iracundiæ certare motum, ut nos qui ab aliis agitati semper irascimur, neque vix vñquam sine vitio irascimur, disceremus contra decertare, disceremus iram reprimere, domare impetum. *Non te superet ira* Marc. 3. Iob 36.

424 FERIA 6. quæ PARASCENE dicitur. CURRAMUS AD, &c.

ut aliquem opprimas. Cane ne declines ad iniquitatem.

LUC. 23.

Conforme Christi verbum est. *Pater, dimitte illis, non enim sciunt quid faciunt.* O quanta vis in illo verbo!

IBID.

Tunc vero *tenebra facta sunt in vniuersam terram: & obscuratus est sol*, contemplare attentius, & concludere quòd sic propter Christum quæcumque apparent irarum causæ regi & obscurari

ECCLES. 28.

debent. *Si sufflaueris quasi ignis exardebit: & si expueris super illam, extinguetur.* Qua de re supra fulius, & infra in FERIA tertia hebdomadæ tertiæ post Pascha.

LUC. 23.

TERTIA statio est apud Herodem, licet enim Pilato Præsidi primū oblatu fuerit Dominus, tamen ut audiuit quod Galilæus esset, statim illum misit ad Herodem à quo remissus ad Pilatum, tum ibi stetit diutius, ut quarto post loco videbitur. *Interrogabat autem Herodes Christum multis sermonibus. Stabantque Principes Sacerdotum, & Scriba constanter accusantes eum.*

Tum verò ibi loqui, tum patrare miracula, tum se mirabilem exhibere, nonne Christo fuisset gloriosum? Nonne multa erant quæ dictabat Ratio refundenda in aduersarios, & innocentia patrocínio non reticenda? Nonne his poterat moueri Dominus ad loquendum? Poterat certe, nec dubium quin ex legitima ratione esset loquutus nisi maluisset ex alia superiori ratione silere & certare contra illam quæ ad loquendum impellebat. Volebat enim potius nostram ibi superbiam retundere quam inimicorum calumnias. Volebat nostris potius quam suis consultum commodis. Nouerat ille Dux noster quàm acres simus & erecti ad omnem vanæ gloriæ captandam auram; quàm porro imbecilles & infirmi ad calumnias tolerandas: quàm parum denique exercitati ad certamen contra illam geminam superbiæ aciem ineundum; quamobrem ipse hanc nactus occasionem in qua erat vel eminere gloriosissimum, vel contemni perquam ignobile: sic plane siluit ne captaret gloriam: & albam illam qua indutus est non recusauit vestem, qua contemneretur tamquam ridiculi candidatus imperij: sicque nos erudiret ad simile subeundum certamen, quoties in simili casu, simulata quædam ratio nostram excitaret superbiam ad plura effutienda quàm recta exigeret ratio.

O quanti refert decertare contra hunc hostem, cum tanti constiterit

stiterit Duci nostro statuere nobis exemplum quo tale ad certamen moueremur.

DEVS meus, Deus meus, ut quid dereliquisti me? Verbum est humilitatis extremæ quo ex Cruce sua Christus confirmat & corroborat certamen inchoatum contra oppositum vitium. Sicut enim nihil magis timet & cauet superbus quam sua propalare & confiteri peccata, ita nihil magis expugnat humilitas quam istum prauum pudorem. Cum autem Christus nulla in se haberet peccata quæ confiteretur, assumit nostra, & perinde ac si esset reus omnium quæ patrata sunt, peccatorum, se propterea confitetur & puniri à Deo, & ea poena puniri quæ omnium apud Iudæos censebatur grauissima, nempe à Deo deferri & relinqui. Neque enim credebant alium quam extremum peccatorem, sic in extremis à Deo deferri. Hoc est igitur quod ait Christus recitando & sibi applicando Psalmum illum vigesimum primum cuius est initiū, *Deus Deus meus respice in me, quare me dereliquisti: longe à salute mea verba delictorum meorum.* Quasi diceret, video quid sit cur ita derelinquar, delicta sunt pro quibus patior tamquam si essent mea. Poenam hanc meretur peccator ut deferatur à Deo: peccatoris ego poenam in me transtuli, ac proinde quo possum modo deferri, deferor, & accepto libenter hanc poenam tamquam fideiussor & redemptor peccatorum. Hæc suprà fusi.

Ad hanc humilitatis tam expressam vocem non modo sol obtenebratus est, sed simul etiam luna quæ tunc erat plena & splendida; splendorem suum omnem texit, & in densas sese obuoluit tenebras quasi nos admoneret nihil esse adeo splendendum & lucens in hoc sublunari mundo, quod non obscurari aut temperari debeat exemplo tantæ Christi humilitatis. Multa his apta referuntur alibi ex sancto Gregorio, in hæc Iobi verba: *Si* Iob 31.
vidi solem cum fulgeret, & lunam incedentem clarè. L. 22. Mor. c. 7. & seq.

QVARTA statio est apud Pilatum, ubi post multa, comparatur & posthabetur Christus Barabbæ virorum omnium sceleratissimo, & inuidiæ vitium expugnatur: Non poterat certe non esse odiosa, & rationabili sensu, repugnans Christo talis comparatio, atque ex illo sensu poterat eam Dominus auertere, & impedire non modo ne homini tam perduto posthabetur,

426 FERIA 6. quæ PARASCENE dicitur. Curramus ad propositū, &c.

sed ne ipsi compararetur. At contra maluit aduersus illum quantumvis rationabilem naturæ motum decertare, ut nos armarer in similem motum quo in nobis inuidiæ conflatur vitium, ut non modo pares sed etiam, si sic contingat, inferiores nobis præferri patiamur: nec simus illi similes de quo refertur, *non re-*

1. Reg. 18. *ctis ergo oculis aspiciebat Saul David, à die illa, & deinceps.*

Luc. 23. Sic quando vnus latronum ab illo petiit, ut in regno suo, sui meminisset, id est ut se in regnum suum introduceret, nonne tanta latronis à Christo disparitas longe à regno Christi latronem arcere poterat? Sed contra Christus: *Amen dico tibi: Hodie mecum eris in Paradyso.* Quasi pares essent, sic pari gressu in regnum ingrediuntur.

Sic dum resurgunt resurgente Christo mortui, ut expresse habetur: *Quod multa corpora Sanctorum qui dormierant, surrexerunt,* junguntur animæ suis corporibus & eos docent qui forte inter se dissiderent, ut in mutuam redeant amicitiam, nec odij, nec inuidiæ, nec vllius deinceps dissensionis flamma excitetur: vnde illa sunt præclara & vere Apostolica Sancti Petri: *Deponentes omnem malitiam, & omnem dolum, & simulationes, & inuidias, & omnes detractiones, sicut modo geniti infantes, rationabile sine dolo lac concupiscite, ut in eo crescatis ad salutem, si tamen gustatis quoniam dulcis est Dominus. Ad quem accedentes lapidem vinum, AB HOMINIBVS QUIDEM REPROBATVM, à Deo autem electum & honorificatum: & ipsi tamquam lapides vini superadificamini.* Quasi diceret, si deuicta inuidia libenter cum Christo suffertis posthaberi aliis minùs forte dignis, tunc Deus vos aliis præferet & præliget.

QVINTA statio est in Columna, vbi flagellatur Dominus. Qualis carnificina in tam tenero corpore! qualis pudor in tam pura mente! quale certamen animi, sic nolle apparere nudum, & sic tamen velle! non poterat aliter decertare contra vitium quod nominari vetat Apostolus nisi sustinendo pudorem illum nuditatis quem sustinuit, quia nihil aliud habebat in se contrarium. Quod itaque potuit; hoc plane fecit & passus est, ut nos doceret nulli parcendum labori, nulli dolori, nulli certamini, ut puritatem mentis & corporis, omni ex parte, intactam atq; il-
labatam seruaremus. *Amoue malitiam à carne tua. IN carne ambu-*

Ephes. 5.

Ecc. 11.

lantes, non secundū carnem militemus. REMEMORAMINI pristinos ^{2. Cor. 10.}
dies, in quibus illuminati magnum certamen sustinuistis passionum. ^{Hebr. 10.}

Opportune verò Verbum Crucis, verbum virtutis, verbum virginitatis & perfectæ castimonix commendandæ. *Cum vidisset enim Iesus matrem & discipulum stantem quem diligebat, dicit matri suæ: MULIER, ECCE FILIVS TVVS.* Deinde dicit ^{Ioan. 19.} Discipulo: *ECCE MATER TVA.* Quasi diceret: Hoc est Virginitatis seu caste viuentium singulare priuilegium, vt ad Virginitatem Matrem singulariter spectent. O castitatis dignitatem! O ^{Sap. 4.} quam pulchra est casta generatio cum claritate! immortalis est enim memoria illius, quoniam & apud Deum nota est, & apud homines. Cum præsens est imitantur illam: & desiderant eam cum se eduxerit, & in perpetuum coronata triumphat, incoinquinatorum certaminum premium vincens. Sic aptè Sapiens.

Et quia caro semper concupiscit aduersus spiritum, paulo attentius considerandum esset quid sit caro, vt perspecta eius vilitate magis te pudeat ab illa vinci.

Sic porro egregie sanctus Gregorius in illud Iobi: *Dulcedo illius vermis.* *POTEST*, inquit, *apertius vermis nomine, caro designari: unde & superius dicitur, Homo putredo, & filius hominis vermis.* ^{Iob 14.} ^{L. 16. Mor.} ^{c. 31.} *Luxuriosi igitur cuiuslibet atque carnis voluptatibus dediti, quanta sit cecitas demonstratur, cum dicitur, Dulcedo illius vermis. Quid namque caro nisi putredo ac vermis est? Et quisquis carnalibus desideriis anhelat, quid aliud quam vermem amat? qua enim sit carnis substantia, testantur sepulchra: Et quæ plura in hunc sensum habet, quæ supra relata sunt, Feria 4. Cinerum. Quibus illud Petri Damiani dictum præclare quadrat: Non est libidini diuersorium, in qua mente versatur sepulchrum.* ^{Ep. 114.}

Quamobrem his apte iungas quod, inter cætera, prodigium euenisse refertur. *Et monumenta aperta sunt,* Id est, inuerſi sunt ^{Matth. 27.} lapides, sepulchra diruta, defossa terra, & quidquid cadauera mortuorum operiebat, totum expansum est, vt ipsa sola spectarentur corpora, quo in horrendo statu præberentur spectanda, vt quid esset caro, tūm ipsis pateret oculis.

Et vero etiam aperiuntur monumenta mortuorum quando ex consideratione patientis & morientis Christi tanguntur illæ Conscientiæ quæ diuturnum prauæ libidinis fouere solent peccatum, & illud tandem integra confessione aperiunt, ac feria

428 FERIA 6. quæ PARASCUE dicitur. Curramus ad propositū, &c.

Isaiah. 37. diluunt poenitentia. *Ecce ego aperiam tumulos vestros. Venite, & reuertamur ad Dominum, quoniam ipse capit & saluabit nos.*

SEXTA statio est in monte Caluaria, quò cum peruenisset, *Marci 15.* dabant ei bibere myrrhatum vinum, ait sanctus Marcus, & non accepit. Putatur à nonnullis vinum illud fuisse exquisitum & sopiendis sensibus aptissimum, quod amici reorum illis porrigebant ad solatium aliquod supplicij mox in cruce tolerandi. Dicebatur autem myrrhatum quod in myrrhinis esset vasis. Hoc itaque vinum cum ex commiseratione, quidam Domino fatiscienti obtulissent, numquid extrema videbatur exigere necessitas vt illud acciperet, & sitim qua laborabat ardentissimam quoquo modo solaretur? Sed tamen contra certare maluit, & delicto illo potu plane abstinuit, tum vt gulæ nostræ delicias suæ expiaret temperantia, tum vt certandi contra hoc etiam vitiorum genus, daret exemplum. *Ecclesi. 37.* Propter crapulam multi perierunt, qui autem abstinens est, adjiciet vitam.

Atque vt Temperantiæ luculentius esset exemplum, pateretque magis quàm fortiter contra naturalem appetitum potus, potu abstinuisset, dixit, *Sitio*, quo audito Verbo quidam ad cæteros cruciatus hunc etiam addiderunt vt fel & acetum ei porrigerent. Sic nempe virtus opposita vitio perficitur, vt non modo delicatis abstinenceat, sed gustet etiam aspera. Recte autem *L. 9. ep. 4.* Sidonius Apollinaris non modo de asperitate ciborum sed de quauis aduersitate: *Quantumlibet, inquit, nobis anxietatum pateras vitæ præsentis propinet afflictio, parua toleramus si recordamur quid biberit ad patibulum qui inuitat ad cælum.*

Non erit vero inutile tantisper in ea immorari Iudæorum crudelitate perpendenda qui sitienti Christo, fel & acetū obtulerūt. *Luc. 16.* Certe illi Epuloni ex inferis guttam aquæ inclamanti, licet negata sit aqua, non est tamen fel iniectum: At Christo Domino non modo denegantur solatia, sed multiplicantur tormenta. *Pf. 80.* Non sic ille olim sitientem deseruit populū, *Pf. 113.* quando de petra melle saturauit eos, quando conuertit petram in stagna aquarum, & rupem in fontes aquarum, vnde hæ merito in Ecclesia Conquerentis audiuntur voces: *popule meus, quid feci tibi? Ego potavi te aqua saluari, & tu me potasti felle & aceto!*

Nec dubium quin propterea prodigium illud acciderit: *Et*

Sic est propositum nobis certamen in septem Christi, &c. 429

Petra scissa sunt : quasi Christo sitienti compaterentur , & quos in se aquarum continebant fontes effunderent : vel quasi se minus duras indicarent quàm ille populus qui ad tantum Christi sitientis cruciatum, magis induruit.

Et vero, anima, vide ne modò tuorum amaritudo peccatorum plus eum vexet quam fel & acetum quo potatus est: lic enim dicitur de peccatoribus: *Vua eorum, vua fellis & botri amarissimi.* *Dent. 32.* *Fel Draconum vinum eorum, & venenum aspidum insanabile. Mea est ultio, & ego retribuam in tempore.*

SEPTIMA & postrema statio est in ipsa Cruce, vbi Christus pendens nudus & exutus omni prorsus subsidio, sic contra rerum omnium indigentiam certat vsque ad mortem, vt quàm fieri potuit efficaciter nos doceret contra illud vitium quo temporalia nimis auide quærimus, ita esse decertandum, vt ne ipsius vitæ nimio teneamur affectu, nec propterea desistamus magis esse solliciti de sancta quam de sana vita. Quænam vita nobilior virâ Christi? Et tamen ecce in egestate & penuria deficit, neque aliud quidquam præter spiritum habet quod dicat suum vel suis discessurus commendet. Paucas habebat ex piorum elemosynis pecunias quibus dum viueret vna cum suis sustentabatur, sed eas secum omnes Iudas proditor abstulit. Vestem habebat, sed illam sibi sortiti sunt milites. Discipulos quosdam collegerat, sed omnes dispersi sunt præter Ioannem. Atque hunc etiam Matri suæ donat, sicut & Matrem Discipulo. Quid restat nisi Corpus? ex quo tamen quid restat cum totus inde sanguis effluerit, & totum sibi vsurparint inimici?

Hoc vnum scilicet est quod postremo loquutus ait, *Pater, in manus tuas commendo spiritum meum*, quasi diceret: hoc vnum mihi superest de quo tamquam de re mea possim loqui & testari.

Quod cum diceret *statim emisit spiritum*, *Et velum templi scissum* *Math. 27.* *est in duas partes*; velum illud videlicet quo sancta sanctorum tegebantur. Quæ cum essent figura bonorum cælestium, sic illa veli scissura significabat iam de aliis bonis cogitandum quàm de humanis & temporalibus. Erant videlicet coeli clausi, nec ante hunc hodiernum diem quisquam verè beatus fuit, sed morte Christi referantur, nostrum est cælum si terram vincimus; vincimus si contra terrenos affectus constanter certamus: Et cer-

430 FERIA 6. qua PARASCENE dicitur. CURRAMUS AD PROPOSITUM, &c.

tamus constanter si nihil nobis deperire cogitemus, cum pro terra cœlum datur: pro tempore, vita æterna: pro mundo, Deus.

2. Cor. 8. Scitis enim gratiam Domini nostri Iesu Christi, ait Apostolus, quoniam propter vos egenus factus est cum esset diues, ut illius inopia vos diuites effecit.

III. PUNCTVM.

SIC ergo est propositum nobis certamen in septem Christi patientis stationibus, ut qui vnā ex his deserat, totius militia Christiana sit desertor. NAM qui totam legem seruauerit, offendat autem in vno, factus est omnium reus, quasi diceret, vniuersa lex est, ut omnia euitentur peccata, ac proinde contra omnia decerneretur, vnde si quis contra sex tantum in totidem Christi stationibus certet & non vniuersim in omnibus, perinde reus est desertæ militiæ, & violatæ legis, ac si in aliis non certasset, quia lex iubebat in omnibus dimicare. Sic aperte Apostolus: Deponentes omne pondus & circumstans nos peccatum, per patientiam curramus ad propositum nobis certamen: Aspicientes in Authorem fidei & Consummatorem Iesum qui proposito sibi gaudio sustinuit Crucem confusione contempta, atque in dextera sedis Dei sedet. Recogitate eum qui talem sustinuit à peccatoribus aduersus semetipsum contradictionem, ut ne fatigemini animis vestris deficientes, nondum enim vsque ad sanguinem restitis, **ADVERSVS PECCATVM REPVGNANTES.**


Iac. 2.

Hebr. 12.

Expende omnia singulatim. Vide ut generatim dicit repugnandum aduersus peccatum, ne ab vlla statione discedas. Vide ut affirmat vsque ad sanguinem esse resistendum. Vide ut proponit exemplar Christi quod non est semel tantum cogitandum sed recogitandum multoties, & vnum atque idem eius factum dictumue sibi sæpius inculcandum. Vide ut sibi & omnibus idem ait, Curramus ad propositum nobis certamen, quia scilicet non cunctandum in hoc certamine, non cessandum, non lento & molli gradu incedendum, sed serio & constanter iam ab illis primis annis quibus nos impetunt vitia, neque cessant vsque ad senectam & senium. Vnde & idem Apostolus paulo ante dixerat,

Ib. c. 4. Timeamus ergo ne forte relictâ pollicitatione introeundi in requiem eius, existimetur aliquis ex vobis deesse. Et post nonnulla de Iudæis incredulis: Festinemus ergo ingredi in illam requiem, ut ne in idipsū

Sic est propositum nobis certamen in septem Christi, &c. 431
quis incidat incredulitatis exemplum. Vide locum ubi & valde per-
pendi hæc possunt, Habentes ergo Pontificem magnum qui penetra-
uit cælos Iesum filium Dei, teneamus Confessionem. Penetrauit cæ-
los, id est, quali vi & violentia facta, irrupit in cælos, quia certe
non aliter eò peruenit quam pugnando; Vnde & facile est con-
cludere, neque nos aliter peruenturos. Atque idcirco, teneamus
Confessionem, id est, quod scimus, exequamur. Pugnemus sicut
scimus esse pugnandum. Quod proponitur faciendum, sic reue-
ra fiat. Tene quod habes, ut nemo accipiat coronam tuam. Qui vicerit, Apoc. 3.
faciam illum columnam in templo Dei mei. Sic æterna firmatur salus.



SABBATO SANCTO. DE SEPTIMO CHRISTI VERBO.

Pater, in manus tuas, commendo spiritum meum.

Luc. 23.

DE DESCENSU AD INFEROS: DE CORPORIS
 SEPULTURA: AC DE POSTREMA RENUNTIA-
 TIONE, QUÆ EST LIBERTATIS.

*Factus sum sicut homo sine adiutorio, inter mor-
 tuos liber. Ps. 87.*

VERITAS PRACTICA.

Nemo liberior quàm qui minus est liber.

*SENSVS & Ratio est, quod is minus liber esse dicitur qui
 sic renuntiat suæ libertati ut sibi non putet esse liberum ea re-
 uocare quibus cum Christo renuntiavit.*

*Sed nemo liberior qua libertate Christus nos liberauit, quàm qui
 sic renuntiat suæ libertati.*

432 *Sabbato Sancto. Pater, in manus tuas, commendo, &c.*

Ergo nemo liberior quàm qui minùs est liber; ac proinde addenda est aliis hæc Renuntiatio nostræ libertatis, vt illa libertate Christi, simus perfecte liberi.

I. P V N C T V M.

SIC nobis hodie Christus Dominus proponitur mortuus, vt tamen morientis postremum Verbum audiamus, & videamus quàm præclare iam antè factas Abnegationes, hac postrema Renuntiatione, quæ tali verbo continetur, confirmet; Cum enim dicit se in manus Patris spiritum suum commendare, perinde est ac si diceret, se illi animam suam ita committere & abdicare vt quidquid de illa velit statuere, statuat; Si ad cœlos vocare velit, aut ad Inferos, liberandis inde Iustis dimittere, se perinde paratum. Si separatam à corpore velit abesse diutius, aut ad corpus quamprimum remigrare; præsto est ad vtrumque. Si cum resurrexerit, pauci an multi credant; hoc fiat, Pater, quod fuerit placitum ante te. Quod certe est Abnegationis genus excellentissimum, & quo antè factæ Renuntiationes tam aperte confirmantur quàm manifeste apparet se Christum exuere sua quodammodo libertate reuocandi illud, & resumendi quod exiit, nisi quantum Deo Patri placuerit.

Tiii 2. Et reipsa sic præstitit quod verbo dixit, nam statim vt anima de corpore exiit, descendit, volente Patre, ad eam Inferorum partem vbi Iustorum animæ detinebantur, *expectantes beatam illam spem & aduentum gloria magni Dei & Saluatoris nostri Iesu Christi.* O quale Iustis gaudium! quale Dæmonibus & damnatis supplicium! Expende vehementius. Sic suum etiam Corpus Diuinæ reliquit prouidentia: aut vt remaneret in Cruce diutius, aut vt quantocyus inde extraheretur, ac Sepulturæ mandaretur. At vero contemplare vt Deus prouidit homines qui hoc tam debito pietatis officio defungantur. Perpende omnia singillatim, vt deponunt Sacrum Corpus, vt depositum tradunt dolentissimæ Matri, vt ille dilectus Discipulus cæterique circumstantes defigunt in plagas oculos, admirantur, lamentantur, & aliis mouentur affectibus qui facilius cogitari possunt quàm exprimî;

primi; ac tandem vt sepelitur & in monumento nouo reponitur, in quo nondum quisquam positus fuerat.

Quibus ita pro deuotione recogitatis, eò considerationem deuolues vt intelligas sic spiritum tuum in manus Dei commendandum, sic vniuersam illi libertatem offerendam & consecrandam; quasi iam non esses liber vt aliter facias quàm statuisi in Domino, nec re ipsa magis tua libertate vtaris quàm si penitus, vt non posses. Sic enim omnia rectè statuta eo firmitus confirmabis, quò te ab illis reuocandis longius dimouebis; vt è contra etiam, nisi te quodammodo astringas & obliges ad illam firmitatem, citissime omnia euanescant. Neque vero quidquid grauius timeas ab illa obligatione, *Nam numquam eris liberior & solutior, quàm cum eris minus liber.*

Hoc attentius expendendum. Et Ratio iam satis manifesta ex dictis, patebit adhuc clarius si distinguas duplicem libertatem: vna est naturalis de qua hoc primo puncto agitur, qua si velis, potes reuocare sanctas illas Renuntiationes quas antè actis proximè diebus cum Christo sanctè formasti: quod nefas ne accadat longè satius est huic damnosæ libertati sic renuntiare quasi deinceps non sit tibi liberum & integrum aliter agere, quàm quod in Domino statuisi: perinde ac si fidem dedisses qua te obstrictum putares, vt suprà dictum est de virtute in necessitatem commutanda. Et vero iam si serio & constanter hanc tuæ libertatis renuntiationem profitearis, certe fatendum erit te minus esse liberum, quàm si tua te non abdicasses libertate, atque adeo etiam quantò verius & plenius prauæ huius libertatis vsum à te abieceris, tantò minus eris liber. Nonne id clarum & apertum? At nonne id statuis? nonne cum Dauide dices, *Iuravi & statui custodire iudicia iustitia tua?*

Sabb. Hebdom. 2.
Quadrages.

II. PUNCTVM.

SED nemo liberior quàm libertate Christus nos liberauit quàm qui sic renuntiat suæ libertati.

Altera ex duabus propositis illa est libertas quàm per Christi gratiam & per constantem naturalis illius libertatis renuntiationem, de qua dictum est, sic liberi sumus à seruitute peccati & prouorum affectuum, vt quod ait S. Leo, *Castigatis colluctationibus*

Serm. 4.
in Quadrages.

434 *Sabbato Sancto. Pater in manus tuas commendo, &c.*

Serm. I. *qua sunt inter utramque substantiam, Animus quem sub Dei gubernaculis constitutum, corporis sui decet esse rectorem, Dominationis suae obtineat dignitatem. Idemque alibi: si mens rectori suo subdita terrena voluptatis incitamenta calcauerit, ordinatissimum tenebit ratio principatum: quia tunc est vera pax, & vera libertas hominis, quando & caro animo iudice regitur, & animus Deo praeside gubernatur. Et rursum, Cum caro, inquit, concupiscens aduersus spiritum spirituali cupiditate superatur, tunc libera obtinetur sanitas, & sana libertas; ut & caro mentis iudicio, & mens Dei regatur auxilio.*

Serm. 4. de
Leiu. Penit.

V. l. 2. de
Imis Chr.
c. II.

Prou. 12.

Hac itaque sancta libertate, ut vides, liber est qui suae alteri libertati, quae poterat seruire vitiiis, renuntiavit: nam non modo suis se prauis affectibus exiit, sed neque hos umquam resumendos proposuit: quo quidem proposito nihil opportunius ad illam Christianam libertatem stabiliendam. Nec verò solum liber est; sed nemo illo liberioresse dicitur, quia cum illa sit verior & sanctior libertas, in qua se constanter permanfurum cum Diuina gratia statuit, nemo verè liberior quam qui sic liber est veriori & constantiori libertate. O quam verè Sapiens: *Os iustum liberabit eos*, nempe ore fit Renuntiatio falsae libertatis, & inde nascitur vera libertas.

III. PUNCTVM.

NEMO est igitur illo liberior quam qui minus est liber qua libertate dictum est: Ac proinde si pergis imitari Christum in hac etiā Renuntiatione voluntatis & libertatis tuae, Renuntia libens volensque; nec timeas ne quid decadat de pace & libertate tua. Eris quidem minus liber falsa & damnosa libertate: sed tanto eris liberior verā & sanctā quam Christus attulit, libertate, quò minus alia liber. Si vos, inquit, manseritis in sermone meo, vere discipuli mei eritis, & cognoscetis veritatem, & veritas liberabit vos. Omnis qui facit peccatum, seruus est peccati. Seruus autem non manet in domo in aeternum, filius autem manet in aeternum. Si ergo vos filius liberauerit, vere liberi eritis.

Ioan. 8.

Accedet & alia similitudo cum Christo, qui cum esset mortuus & inter mortuos ageret, dicitur tamen inter eos liber, quatenus non sicut illi necessario mortis vinculis tenebatur, ut qui proxime resurrecturus erat; ita tu mortuus quidem es humanis affectibus, sed in illa es morte liber, quatenus libere & li-

benter sic mori velis & sic morientē vitam agere. Quasi morientes & ecce vivimus.

2. Cor. 6.

HÆC est præterea ad Sacram Communionem & Paschalem solemnitatem aptissima dispositio, sicut enim Pascha talis transitus dicitur vt non fiat remeatio ad locum vnde transitur, sic plane Anima si sic transit à vitiis & ab affectiouibus inordinatis vt illò non redeat, verè Sacrum Pascha peregrisse dicenda est, & non aliter. Sic sanctus Augustinus: *Agimus saluberrimum transitum cum à Diabolo transimus ad Christum, & ab isto instabili saculo ad eius fundatissimum regnum. Ideo quippe ad Deum permanentem transimus ne cum mundo transeunte transeamus.* Sic & S. Ambrosius: *Pascha transitus est à passionibus ad exercitia virtutis.* Itemque alibi: *Pascha Domini quotannis celebratur, hoc est animarum transitus à vitiis ad virtutem, à passionibus carnis ad gratiam sobrietatis mentis, à malitie nequitiaque fermento ad veritatem & sinceritatem regenerationis.* Sanctus denique Bernardus: *In hac tam præcipua solennitate quid commendetur nobis sedula cogitatione persemus. Nempe Resurrectio, transitus & transmigratio. Christus enim fratres, non recidit hodie sed resurrexit; non rediit sed transit, transmigravit non remeavit. Denique & ipsum quod celebramus Pascha, transitus non reditus interpretatur: & Galilæa ubi videndus nobis promittitur qui resurrexit, non remeationem sonat sed transmigrationem. Si post consummationem Crucis, in nostram hanc mortalitatem, & vite præsentis arumnas Christus Dominus reuixisset, ego cum fratres non transisse dicerem sed rediisse: non transmigrasse in sublimius aliquid, sed ad statum remeasse priorem. Nunc autem quia transit in nouitatem vite, nos quoque inuitat ad transitum, vocat in Galilæam. Quæ plura ibi sequuntur, in sequentem differuntur diem.*

Tract. 55.
in Ioan.

L. 1. de Cain
c. 8.

L. 1. Hex.
c. 18.

Serm. 1. de
Res. Dom.

Tu vero interim vt ab vna libertate transeas in aliam, sicque constans permaneas vt numquam resiliās & immuteris, dic cum sancto Ignatio Fundatore Societatis Iesu: *Suscipe Domine vniuersam meam libertatem: Accipe memoriam, intellectum, atque voluntatem omnem. Quidquid habeo, vel possideo, mihi largitus es, id tibi totum restituo, ac tua prorsus voluntati trado gubernandum. Amorem tui solum cum Gratia tua mihi dones, & dines sum satis, nec aliud quidquam ultra posco.*

In Exerc.
Spiris. 4.
hebd.

Vide in 4. parte, Sabbato hebdomadæ 15. & tota hebdomada 24.



DIES SANCTVS PASCHÆ

SEV

DOMINICA RESVRRECTIONIS

ET

DIES QVAM FECIT DOMINVS.

Surrexit, non est hic. Marci 16.

Surrexit Dominus verè. Luc. 24.

Fidelis sermo : Nam si mortui sumus, & conuiuemus. 2. Tim. 2.

VERITAS PRACTICA.

Nemo cum Christo mortuus, qui cū ipso non resurgat :
Nemo cum Christo resurgit, nisi qui cum ipso sit mortuus.

RATIO vtriusque partis est, quod cum Christo resurgere sit hoc
vnum & idem ac nouam cum illo vitam agere.

Sed nemo est cum Christo mortuus qui hanc nouam cum illo non
agat vitam : & nemo hanc nouam agit vitam nisi qui cum ipso
sit mortuus.

Ergo & vtrumque verum quod proponitur, & de vtroque dici
potest : Fidelis sermo, nam si mortui sumus, & conuiuemus. Quod certe est consolationis non modica : Si vero
etiam non sumus mortui, nec conuiuemus, nec resurgemus,

Nemo cum Christo resurgit nisi qui cum ipso sit mortuus. 437

Quod profecto pauendum est, cum præcipue tam pauci sunt qui vere sunt mortui. Quid sequitur nisi quod etiam tam pauci sunt qui vere cum Christo resurgant? Quid porro magis cauendum; & Quid magis opportunum quod consideretur, quàm ex quibus sumus?

I. P V N C T V M.



QUOD sanctus ait Apostolus; Christum Domi- 1. Cor. 15.
num resurrexisse tertia die secundum Scripturas,
Sanctus Anselmus fidelis eius Interpres; refert
ad illum locum Osee, vbi Propheta sic loqui-
tur: *Viuisficabit nos post duos dies, in die tertia sus-* osee 6.
citabit nos. Quali locus hic esset insignior inter
omnes Scripturas quæ de Christo resurgente prænuntiarunt. Mi-
rum certe, cum aliæ non deessent Scripturæ quæ clarius & ex-
pressius de Christo Domino loquebantur. Iob dixerat, *Scio quod* Iob 19.
Redemptor meus viuit. Dauid in persona ipsius Christi cecinerat:
Ego dormiui & saporatus sum, & exurrexi. Quod & confirma- Ps. 3.
rat Isaias, aliique multi; *Nunc consurgam, dicit Dominus, nunc* Is. 33.
exaltabor, & nunc sublimabor. Nonne hæc de Christo sunt aper-
ta? nonne & sunt etiam apertiora quam quæ Propheta dixit
Oseas, cum expressè de Christo non videatur loqui, sed tantum
de nobis? Non enim dicit sicut alij, *viuisficabitur, suscitabitur,*
sed *viuisficabit nos, & suscitabit nos;* de nostra potius quàm de
Christi resurrectione videtur agere. Cur sic Propheta loquitur?
Cur sic Apostolus ad illum præcipue spectauit locum? aut cur
eius Interpres sic illius declarat mentem?

Opportune profecto & sapienter omnes. Sic erat Propheta
loquendum: Sic erat Apostolo referendum; Sic erat Interpreti
declarandum. Non est modus loquendi aptior de mysterio Re-
surrectionis Domini quàm his Prophetæ Verbis, *Viuisficabit nos,*
& suscitabit nos. Hoc est totum simul plenè & perfecte myste-
rium enarrare. Pars quædam est tantum mysterij quam alij at-
tingunt cum dicunt, *viuet aut resurget;* Restat pars altera quàm
omittunt, & quæ tamen totum magis spectat & complet myste-
rium, nempe vt resurgamus cum Christo, *vt ipse nos secum viui-*

ficet & suscitetur. Primam qui dicit partem de Christo suscitato, non secundam exprimit de nobis suscitatis: Sed qui secundam hanc dicit, dicit simul & primam, dicit simul totum mysterium, & illo præcipuè dicit modo, quo præsertim nobis est intelligendum.

Coloss. 1. Nam cum audimus nos suscitatos à Christo vel cum ipso, si mul facile capimus ipsum esse suscitatum, ipsum esse *primogenitum ex mortuis*, ipsum sibi primo vitam dedisse quam communicaret aliis. Et cum præterea sic audimus Scripturas de nobis potius quam de Christo loquentes, hinc aperte cognoscimus non aliter de Mysterio resurgentis Christi cogitandum aut loquendum, quam ut simul de nostra Resurrectione cogitemus & differamus; & hanc esse præcipuam Festi partem, ut de nobis sic Christo conformandis meditemur, quia hic est omnium quæ Christus egit, finis, qui cum sine nobis non possit perfici & compleri, nobis est proponendus, nobis est declarandus, ut quod de suo cuique est conferendum ad salutem, non omittat, ne si forte Christo desit, Christus nihil illi proficit.

Coloss. 2. Hoc est quod arguere videbatur idem Apostolus in Colossensibus, quod ex parte tantum dies solemniores facerent, & nihil facerent. *Nemo vos*, inquit, *iudicet in parte diei festi*, quasi diceret ut quidam interpretantur: Ne putetis vos expleisse munus vestrum in celebrando festo, si tantum mente aut sermone pertractaueritis partem illam quæ ad Christum spectat, & quæ iam sine nobis peracta est; pars est festi diei, non totus dies, nisi alteram simul adjunxeritis quæ à vobis exigitur ut quod vestrum est cum Christo conferatis, & de illa parte attentius cogitetis.

Hebr. 3. *Participes enim Christi effecti sumus*, ait Idem, *si tamen initium substantia eius usque ad finem firmum retineamus*, id est, quod incepit in suo corpore, & non nili nobiscum perficit, vel quod iam in nobis, ex mutua nostri parte est inchoatum, oportet ut simul totum compleamus; nempe sicut cum illo iam nati sumus, cum illo baptisati, cum illo mortui, sic cum illo resurgamus, sic cum illo ascendamus. Sic participes eius effecti sumus & non aliter. Nec enim satis est inchoasse cum illo, nisi usque ad finem cum illo persistamus.

Quamobrem recte Apostolus, cum Timotheum suum instrueret de tractando Resurrectionis mysterio: *Fidelis*, inquit,

Sermo, si mortui sumus, conuiuemus, Quasi diceret, hic est fructuosus, hic est feligendus, hic est habendus præ cæteris sermo; sic te fidelem exhibebis Verbi Diuini ministrum, cum salutem tuam spectans, & eorum qui te audiunt, sic de Christo resurgente sermonem habueris, vt omnes intelligant, non quod tantum aut quomodo Christus resurrexerit, sed quomodo nos simul cum eo verè resurgamus; si videlicet simus cum eo mortui, *Nam sic conuiuemus*, inquit, *si sustinebimus, & conregnabimus: si negauerimus, & ille negabit nos*, id est, si sustinemus quod est terendum vt nobis moriamur, tum ille nobis dabit vt cum ipso surgamus, viuamus, & regnemus. Quod si vero illud negauerimus, & ille nobis gratiam resurgendi negabit. Ac tandem concludit: *Hæc commune, testificans coram Domino*: Hæc declara testimoniis & rationibus quæ fidem faciant & persuaдеant fidelibus coram Domino, id est verè & perfecte vt qui te audierint, vere etiam moriantur, & vere resurgant, non fictè & simulate.

Quod certè est valde obseruandum, vbi de Resurrectione agitur, atq; idcirco expresse de Christo resurgente dicitur. *Surrexit Dominus verè*, Nam possunt esse quædam Resurrectiones non veræ. Resurrexit olim Samuel vt est in primo Regum libro, Resurrexit Moses & apparuit in monte Thabor cum Christo se Transfigurante: sed non vera fuit Resurrectio, sicut Christi; non illi suo in corpore resurrexerunt sicut Christus, sed in aëreo aut phantastico & apparenti. Sic multi aparent hodie Resurgentes, sed verendum valde ne tantum apparenter, & non vere resurgant sicut Christus. Datur autem nobis ab Apostolo nota certissima qua id dignoscamus; si quis videlicet cum ipso fuerit mortuus. *Si mortui sumus cum Christo, credimus quia simul etiam uiuemus cum Christo*. Appareat nos esse verè mortuos, & apparebit nos vere esse viuos. Sicut illi qui dicuntur in Euangelio resurrexisse cum Christo & apparuisse multis in ciuitate, dicuntur illi esse quorum monumenta sunt aperta, qua die quaque hora Christus est mortuus: Ita illi profecto resurgent spiritu & animo quorum Conscientiæ sic fuerunt apertæ, nihil vt lateret quod non confiterentur, quod non dolerent, quod non expiarent, quod non manifeste testarentur se detestari. Hoc est esse mortuum, mortuum peccato, mortuum mundo, mortuum suis prauis affectibus, mortuum iis quibuscumque quæ ad peccan-

1. Reg. 28

Math. 27

Rom. 6:

Math. 27

dum possent impellere. Qui sic est mortuus, bene speret, & lætetur se cum Christo resurrexisse: *Fidelis sermo*, sermo indubitatus; Sicut è contra qui non ita est mortuus, plane non resurrexit, neque unquam resurget nisi prius moriatur.

Rom. 6.

Hæc est Veritas modo expédenda, cuius allata Ratio quidquid de ipso Domino resurgente magnificentius & gloriosius dici potest, dicendum suggerit & subministrat. Quid enim gloriosius de Christo dici potest, quam quod ait noster Apostolus, *vi quomodo Christus surrexit à mortuis per gloriam Patris, ita & nos in nouitate vitæ ambulemus*? Hæc nempe est maxima Filij gloria quod per gloriam Patris surrexerit, & quod simul effecerit ut in nouitate vitæ cum Ipso ambulemus. At vero hæc est germana Ratio qua proposita Veritas stabilitur, hoc est quo directè demonstratur neminem posse cum Christo resurgere nisi cum ipso sit mortuus; Quia nemo videlicet cum Christo resurgere dicendus est nisi qui cum illo nouam agit vitam; vnde quantum necesse est explicare quid sit nouam cum Christo vitam agere, tantum oportet necessario contemplari quænam sit noua Christi resurgentis vita, quid sit illum per gloriam Patris resurrexisse, & quidquid demum eò spectat.

Omissis autem pluribus interpretandi modis, gloria Patris non alia hic intelligenda est quàm ipsa Diuinitatis gloria seu gloriosa vita; Sensusque est, Christum sic corpus suum quod iacebat in sepulchro resumpsisse, ut in illo corpore iam viueret, non sicut ante vixerat, vitam mortalem, vitam corruptibilem, vitam nostræ similem quantum ad poenas & ærumnas: sed Vitam gloriosam, Vitam immortalem, Vitam diuinam, Vitam similem Deo, quantum quidem per Dotes corporis resurgentis talis vita potest geri.

Ps. 3.

Rom. 6.

Sic enim primo per illam Dotem quæ dicitur *Impassibilitas*, ab omni prorsus illæsum & intactum malo sensibili, Corpus eius exemptum est, *Non timebo*, inquit, *millia populi circumdantis me*. Iam non læditur, *iam non moritur*, mors illi *ultrà non dominabitur*.

Iud. 24.

Per Dotem *Agilitatis*, nullo pondere retardabatur quin posset in instanti se de loco ad locum tanta facilitate inferre, quanta cum euauit ex oculis discipulorum quibuscum accumbebat mensæ in Castello Emaus, & tum eodem instanti, vel Petro vel Iacobo apparuit longe distantibus.

Per

¶ *Nemo cum Christo resurgit nisi qui sit cum ipso mortuus.* 441

¶ Per Dotem *Subtilitatis*, ita corpus opacitatem exuit vt perinde ac spiritus obserato egrederetur sepulchro ac clausis ingrederetur ianuis.

Per Dotem denique *Claritatis*, sic cum vellet, totus refulgebat, vt quemadmodum in Transfiguratione resplenduit facies eius sicut sol, ita toto poterat resplendere corpore, & totum suo splendore mundum illustrare. Hæc est propterea *dies quam fecit Dominus*, quia nouo suo fulgentis splendore corporis magis Diem illustrauit quàm sua sol claritate radiorum; vel quia Christus resurgens vt Sol Iustitiæ nouo bono fecit eum diem: seu noua hominibus hac die communicauit bona sicut Propheta prædixerat: *Orietur vobis sol Iustitiæ, & sanitas in pennis eius.* Vel *Mal. 4.* quod hanc diem sibi ob nouum hoc Mysterium singulariter consecrarit, & consecratam voluerit à nobis obseruari; Vel hæc est denique dies quam fecit Dominus ad hunc finem, *vt exultemus & latemur in ea*, propter nouam illam & gloriosam Vitam quam Christus in terra cepit viuere. Nam si dum nasceretur mortalis & passibilis *Euangelizatum est nobis gaudium magnum*, quantò maius oportet esse gaudium cum ex illa mortali vita transit in immortalem & incorruptam. Quæ certe noua viuendi ratio non minus noua Christi vita & noua eius natiuitas dicitur quam vita temporalis, cum non minus propter illam dicatur ei à Patre, *Filius meus es tu: Ego hodie genui te.* Non quod noua *Pf. 21.* *Ab. 13.* noui corporis fuerit generatio, sed quod nouus fuerit viuendi modus, sicut cælum dicitur nouum quando in regeneratione sæculi non eo subsistet modo quo iam voluitur & reuoluitur in sua temporum spatia.

HÆC est altera illa in mundum eius introductio de qua sanctus Apostolus: *& cum iterum introducit primogenitum in orbem terræ, dicit, & adorent eum omnes Angeli Dei.* Primo est introductus dum nasceretur; Iterum vero dum resurgit. Et sicut in prima noua vita, singulari cultu ab Angelis & hominibus fuit adorandus, ita in secunda noua vita, debet ab illis coli & adorari. *Venite exultemus Domino, iubilemus Deo salutari nostro.* *DIGNVS* *Pf. 94.* *es Domine Deus noster accipere gloriam, & honorem, & virtutem.* *Apoc. 4.* *DIGNVS* est Agnus qui occisus est accipere virtutem & Diuinitatem, & sapientiam & fortitudinem, & honorem, & gloriam & benedictionem. *& 5.*

Quæ quidem Sanctorum verba duplicem habent sensum, primus est vt Christus dicatur dignus accipere gloriam & alia quæ
Luc. 24. prædicantur, quantum ad corpus, sicut ipse de se dicebat, *oportuit pati Christum & ita intrare in gloriam suam.* Dignus est vt communicetur corpori vita gloriosa, vita diuina. Secundus sensus est vt quam inde nouam viuit vitam, agnoscant omnes & prædicent, sicque accipiat virtutem & diuinitatem, accipiendo laudes & præconia quæ à nobis propterea celebrantur. Atque hoc est Pascha quod modo supra dies omnes festos celeberrimum agimus, id est, transitus Christi à morte ad vitam seu à vita mortali ad immortalem quam sua morte promeruit.

Certe quando non fuisset passus; & quando id solum in Christi fuisset Corpore quod *diuinitatis plenitudo in eo habitaret*, merebatur Christus æque esse illa sui parte corporali gloriosus, ac parte alia spiritali animæ quæ semper fuit beatus; sed tamen tanti facit quod sit passus & mortuus, vt hoc singulari nomine & titulo velit intrare in gloriam suam, & hanc suam gloriam velit à nobis propterea coli & celebrari gloriosius quam vllam aliam.
Hebr. 2. Vnde Apostolus: *Eum qui modico quàm Angeli minoratus est, videmus Iesum propter ignominiam mortis, gloria & honore coronatum.* Sicut Noe post diluuium, Ioseph post carcerem, Moses & Dauid post ouium curam, & Daniel post leonum lacum, ac Mardocheus post sibi paratam Crucem, gloriosiores extitere omnes; Sic plane Christus Dominus à cruce & sepulchro gloriam splendidiorem refert. *Occisus est agnus, & vicit Leo.* Videte quanta differentia inter agnum & leonem, tanta inter Christum mortalem & immortalem. Non erat agnus nisi vt esset leo; sed non est leo nisi quia fuit agnus. Atque vt perenne monimentum statueret suæ mortalitatis in immortalitatem commutata; suas illas plagas quas in latere, in manibus ac pedibus accipere voluit, deponere noluit, vt sic illustriora fierent æterni gaudij & gloriæ nunquam desitura decora, quæ aliquando fuerant doloris & ignominie notiora signa.

Hæc est itaque Patris Gloria per quam Christum resurrexisse ait Apostolus, vt quomodo vitam è sepulchro nouam retulit, sic nos si verè cum illo resurgere volumus, in quadam nouitate vitæ nobis propria, & conformi ambulemus. Sic præclare sanctus Augustinus: *Quidquid gestum est in Christi cruce, in sepultura &*

Nemo cum Christo resurgit nisi qui eum ipso sit mortuus. 443

in resurrectione, ita gestum est, ut his rebus consignaretur vita Christiana quæ in terris agitur. Propter Christi crucem, dictum est, Qui sunt Gal. 5. Christi, carnem suam crucifixerunt cum vitiis. Propter Sepultu- Rom. 6. ram: Consepulsi sumus cum Christo per baptismum in mortem. Propter Resurrectionem, quemadmodum Christus surrexit à mor- Ibid. tuis per gloriam Patris, ita & nos in nouitate vitæ ambulemus; Qua scilicet nouitate vitæ similitudinem quandam cum ipso resurgente possimus exhibere, ut omnis vita eius manifestetur in car- 2. Cor. 4. ne nostra mortali; Sic enim quatuor illæ quas in Christo fuisse doctes audiuius, nobis certo quodam modo conferuntur, quibus quantum quidem mortali fas est viuere, vitam viuamus cum Christo quàm simillimam, ut fusè tota hac demonstratur hebdomada, breuiter vero in sequenti puncto.

Nunc illud tantum firmiter hæreat, nostram non esse aliam cum Christo resurrectionem, quam quæ cum Christo similitudinem illam habet quæ vitæ nouitas dicitur, & in qua totum salutis ac perfectionis nostræ versatur opus. Sic enim rursum idem Apostolus de Christo Domino, Qui traditus est propter delicta Rom. 4. nostra, & resurrexit propter iustificationem nostram; id est, ut iuste, ut sanctè viuamus: non ut solent homines viuere, sed nouo quodam modo quo pauci viuunt qui sunt in arcta illa via quæ ad vitam ducit. Propter hoc autem resurrexisse Christus dicitur, quia sic similitudine nouæ vitæ nos acuit & excitat ad nouum viuendi genus: sic exemplari suæ vitæ gloriolæ proposito, nos valde instruit & informat quomodo sic cum illo possimus viuere; sic denique dum ipse viuit à mortuis, in nobis viuat, in nobis nouam illam vitam instituat, sicut ipse suis dicebat Apostolis, Quia ego vivo, & vos. vinetis. Et vos in me, & ego in vobis. Ioan. 14.

O vita Iesu cordium! cor nouum crea in me quod sit capax tuæ vitæ recipiendæ. Fili, satis est capax tuum, si mihi totum dederis.

III. PUNCTVM.

SEd nouitas ista vita sic tota est in morte veteris hominis, ut sicut qui verè mortuus fuerit, vere cum illo nouam agat vitam: sic nisi quis ita fuerit mortuus, non omnino viuat.

Prænam propositionis partem sic Diuinus Apostolus quo nemo.

KKK. ij

Rom. 6.

2. Pet. 3.

Phil. 3.

pressius & vberius de hoc egit mysterio, sic consequenter ad illa verba de nouitate vitæ, pergit declarare mirifico sane loquendi modo, *Si enim*, inquit, *complantati facti sumus similitudini mortis eius, simul & resurrectionis erimus*, Metaphora seu ratio loquendi desumpta est à furculis siue ramusculis qui naturam & proprietates plantæ cui forte inseruntur, ita solent constanter sequi, vt cum per hyemem arescit & pene moritur planta, sic illi arescant & moriantur: cum autem vere nouo, & æstate reuirescit ac fructificat planta, sic illi simul virescant & fructificent. Ita nos ait Apostolus, si ij sumus qui esse debemus, sumus velut quidam furculi per fidem, per gratiam, & per Charitatem Christo inserti & complantati; atque ita Christo morienti similes esse debemus, sic simul cum illo morientes peccatis & prauis quibuscumque affectibus; quam Christi mortem si morte nostra sic fideliter per primas communicatas gratias imitamus, sequetur illud aliud quod est summe optandum, vt per ampliores gratias nobis dandas, Christi etiam resurgentis similitudinem quandam exprimamus, dum nouo viuentes viuendi genere, toto supernaturali, toto spiritali, toto cœlesti & Diuino, non iam quales ante fuimus, sed quales oportet esse vere Christianos *in sanctis conuersationibus & pietatibus* euadamus. Sic ipse de se Apostolus quid inde ageret quidue experiretur; *Configuratus*, inquit, *mortis eius, si quo modo occurram ad resurrectionem qua est ex mortuis, non quod iam acceperim aut quod perfectus sim, sequor autem si quomodo comprehendam in quo & comprehensus sum à Christo Iesu*. Quasi diceret, sic in dies conor proficere, non enim perfectionis metam attingi, & semper restat quo vterius pergam, sic autem pergo vt quantum Christo morienti similis fio mortificatione corporis & animi, tantum illi resurgenti euadam similis per veras solidasque virtutes quibus eò tandem perfectionis perueniam quò me vocat Christus.

Vt verò planius intelligatur, quomodo hæc ita fiant, sic paucis habe quod fusius alibi. Quatuor in nobis sunt præcipuè quæ internæ mortificationi subjiuntur, nempe in inferiori parte animæ, sunt duo appetitus, Concupiscibilis & Irascibilis: In superiore vero, Voluntas, & Intellectus. His quatuor abnegandis & mortificandis partibus studeat omnino necesse est qui cum Christo mori appetat; Studium autem & exercitatio mortifica-

tionis eiusmodi per quatuor illas quas vocant Cardinales virtutes sic peragitur, vt Temperantia contineat appetitum Concupiscibilem: Fortitudo moderetur irascibilem; Iustitia regat voluntatem; & Prudentia Christiana dirigat intellectum. Quadriga illa est qua per vias quas vocant purgatiuam & illuminatiuam dicuntur vehi Incipientes & Proficientes. Habet enim vnaquaque Virtus duos distinctos actus quorum vno vitium in purgatiua fugiat, & alio virtutem in illuminatiua sectetur.

Iam verò his virtutibus studiosè colendis & constanter exercendis qui se addixerint, sicut complantantur similitudini mortis Christi, sic etiam similitudini Resurrectionis eius conformabuntur, quia quanta fuerit eorum virtus, tanta mox vnicuique virtuti Dos quædam supernaturalis respondens, illis infunditur, quæ sic eorum animos supra se prouehit, & nobilitat, vt supernaturalem plane & diuinam vitam agant, quæ est vita verè Christiana & religiosa quam Christus sibi & nobis promeruit & nobiscum communicat.

Temperantia illa quæ appetitum concupiscibilem temperabat, sic solidatur, & perficitur, vt fiat quædam Impassibilitas, & iam animus nullis lædatur appetitionum obiectis, nihil terrenum appetat & caducum, *quæ sursum sunt sapiat non quæ super terram.* Fortitudo quæ irascibilem continebat fit Subtilitas quædam interior, quæ difficilia quæque & ardua tam generose penetrabit, quàm audacter dicebat illa Mulier de corpore sui Dilecti: *Domine si tu sustulisti eum, dicito mihi, ubi posuisti eum, & ego eum tollam.* Ioan. 20.

Iustitia quæ voluntatem regebat, transit in agilitatem illam *quæ assumit pennas vt aquila*, quibus semper volabit anima, nec vquam deficiet. Prudentia denique quæ intellectum dirigebat, euadet in Claritatem qua non solum animus sibi magis splendet, sed & aliis præluceat ad omnes virtutum actus de quibus aiebat Apostolus, *inter quos lucetis sicut luminaria in mundo.* Phil. 4.

Nonne hæc tibi videtur vita noua, vita gloriosa, vita Christo resurgenti quàm similis? Quamobrem hoc illud est quod dicebat Apostolus, *Si complantati facti sumus similitudini mortis eius, simul & resurrectionis erimus, Si mortui sumus, & conuiuemus.* Hoc est quod prima propositionis parte docebatur, certo id futurum vt qui essent cum Christo mortui, nouam cum illo vitam

agerent. Nunc quæ restat pars altera, quod non aliter noua hæc vita possit institui quam si mortui simus morte illa spiritali vitiorum de qua suis congaudebat Apostolus, *mortui estis, & vita vestra abscondita est cum Christo in gloria*, tribus his probatur modis.

Primo, quia cum vita illa supernaturalis, sit excellentissimum donum cui recipiendo debet cum gratia disponi animus, non aliter congruentius disponitur quam perfecta illa mortificatione de qua Dominus, *Qui non accipit crucem suam & sequitur me, non est me dignus.*

Secundo, res ipsa sic videtur exigere, vt non nisi mortuo veteri homine, nouus uiuat. Cum enim tibi inuicem, sicut Caro & Spiritus, aduersentur, certe non potest vnus subsistere, nisi alio deficiente. *Nisi granum frumenti cadens in terram mortuum fuerit, ipsum solum manet*; Quod de sua naturali, & nostra morali morte dicebat Dominus. Quod ita planum est & euident, vt qui aliter sentiat & sapiat plane desipiat, inquit Apostolus; *Inspiciens! tu quod seminas, non viuificatur nisi prius moriatur!* Et putares te posse noua vita viuificari, nisi prius moriaris?

Tertio denique, sic est diuinitus institutum & decretum, vt quemadmodum non est ingressus ad immortalem & beatam vitam nisi per mortem naturalem, sic plane nullus sit aditus ad vitam spiritualem & perfectam nisi per illam moralem mortem dum spiritu facta carnis mortificantur. Quis adeo demens præsumeret te nisi morte obita posse illò pertingere, quò nullus vquam mortalium, nec ipsa Virgo Deipara, nec ipse Christus Dominus, *nisi gustata*, vt ait Apostolus, *morte*, peruenerunt? Et tamen facilius cum aliquo dispensaret Deus vt naturali vita viuus in ipsam beatitudinis gloriam transferretur, quam vt animali vita spirans in spiritualem reciperetur; non enim contumetur, *nec est participatio iustitiæ cum iniquitate, nec societas luci ad tenebras.* CARO & sanguis regnum Dei possidere non possunt, neque corruptio incorruptelam possidebit. Ratum fixumque est, *Vinamus vitam Euangelicam, moriendo mortem Euangelicam*, inquit sanctus Augustinus. Vide in 1. parte, Sabbato hebdomadæ 3. post Epiphaniam.

III. PUNCTVM.

SIC igitur vtrumque patet quod est propositum.

Nemo cum Christo mortuus, qui cum ipso non resurgit. Nemo cum Christo resurgit nisi qui cum ipso sit mortuus. Quia tota resurrectionis nostræ Ratio sita est in Nouitate vitæ quam qui non viuunt tam certo non resurgunt, quàm de aliis dubitandi locum non relinquit Apostolus, qui & seipsum explicans & à se dicta confirmans, atque ad Veritatis Praxim nos prouocans, sic apte concludebat, *Igitur si consurrexistis cum Christo, quæ sursum* Coloss. 3.
sunt querite, ubi Christus est in dextera Dei sedens, quæ sursum sunt sapite, non quæ super terram; Id est, in hoc agnoscetis vos consurrexisse cum Christo, si non iam terrena, sed cœlestia; non præsentia sed futura; non caduca sed æterna quæratis & sapiatis. *Quid queritis viuentem cum mortuis?* dicebant Angeli ad mulieres, *non est hic, sed surrexi. Venite, & videte locum ubi positus erat Dominus.* Quasi dicerent; si non surrexisset Christus, hic esset ubi sepultus est; & si reuera hic esset, non diceretur surrexisse; Cum autem manifestum vobis fiat, hic non esse, quid sequitur nisi quod surrexit?

*Luc. 24.
Matth. 28.*

Ita planè de vnoquoque nostrum discurrendum est vt agnoscatur an vere possit dici surrexisse. Habent enim singula vitia suum quendam locum internum & externum, in quo qui erat vitiosus, si forte quæritur, & de hoc dici possit, non est hic, dici poterit etiam quod surrexit. Aut certe si quod ait Scriptura, *suas* 1s. 56.
in vias vnusquisque redeat, & quam videbatur deposuisse prauam consuetudinem, hanc resumat, ibidemque semper sui similis in suo viuat genio, quis illum surrexisse cum Christo dicat?

Esto sit confessus, & rite etiam communicarit, ac viuentem Christum suscepit, nec ausit hodie, quod post biduum aut triduum libere & impune audebit; non dicerem tamen illum cum Christo, neque Christum in ipso verè, vt dici debet, surrexisse; Nam cum Christo resurgere, non est simpliciter resurgere, sed quomodo Christus surrexit ad immortalem & nouam vitam, sic in nouitate vitæ ambulare, hoc est cum Christo resurgere, nec aliter; aut nos fallit Apostolus. Non est autem in

nouitate vitæ ambulare si per triduum aut quatrimum te à solito viuendi genere temperes, quasi hoc tuæ tantum vitæ Is mereatur, qui totam suam vitam tibi libens impertiit: Sed quod vitæ est reliquum ita velle modo renouare, sicut nouæ Christus exemplar vitæ nobis est factus, vt in ea quam modò tibi proponis vitæ integritate, sic semper velis viuere, Hæc est vitæ nouitas & non alia quæ te Christo resurgenti conformet.

Rom. 6.

Dixi etiam, quod non leuiter dictum putes, nec ipsum Christum Dominum posse aliter in te vere dici resurgens; Quod tamen si videatur idem esse ac te cum Christo resurgere, potest tamen seorsim considerari, atque ex vno probari aliud. Ratio autem cur id propriè non possit de Christo dici, hæc est, quod propriè non dicitur Christus *resurgens à mortuis*, nisi simul dicatur, *Iam non moritur, mors illi ultra non dominabitur*. Hoc autem postremum in te non diceretur de Christo, nisi talem vitæ constituas nouitatem quam, Diuina fauente Gratia, perpetuare velis in annos consequentes. Nam defectu huius constantissimæ voluntatis, cito deficies, cito peccabis, & peccato tuo mortem inferes Christo, Christus in te tam verè per peccatū morietur, quàm vere in te viuebat ante peccatum. Iamne vero poteritne dici, quod dicendum erat vt resurrexisset diceretur, Iam non moritur, mors illi ultra non dominabitur? O peccatum, ô Christicidium!

Serm. 1. de
Resurr.

Sic præclare sanctus Bernardus, *Si post consummationem Crucis in hac nostra mortalitate Christus renixisset, Ego cum non transisse dicerem sed redisse*. Alludit ad voces Paschæ & Galilææ quæ significant transitum & transmigrationem, & perinde est ac si diceret: si Christus resurrexisset mortalis, non ego eum dicerem resurrexisse quo Scripturæ modo significabant eum resurrecturum, quia significabant sic à morte surrecturum vt iam ultra non moreretur. Quod autem primò dicitur de illius corporali Resurrectione, Idem dici deinde debet de spiritali qua in nobis resurgit: ac proinde pari modo siue in suo corpore, siue in tuo pectore dici non potest resurrexisse nisi resurgat immortalis, siue iam non moriturus, quantum quidem cum Gratia per te stabit. Hoc est quod omnino deliberes, quod planè stauas, & sanctè firmiterque concludas.

Et certè, quæ duo plurimum valent ad concitandos nostros
animos,

animos, summum bonum; aut summum malum, hæc ambo simul concurrunt, ad illam firmam statuendam voluntatem. Quid enim melius, quid optabilius, quàm nos in Christo, vel in nobis Christum resurgere? Quid detestandum magis, quàm si quidem Christum viventem recipias, post illi verò mortem inferre ausis! Tu Christo mortem! perpende verba, rem metire; para responsum interrogati Deo quod olim à fratricida Caino: **VBI EST ABEL FRATER TVVS?** Dic peccator, eloque, ubi est Christus tuus? Quid dices? Quid respondebis? *Num custos fratris mei sum?* sic reuera custos eras fratris tui, sic tibi datur hodie custodiendus vt vita eius in manu tua sit. O Bonitatem Creatoris! ô malitiam Creaturæ! en humanam Creator assumit vitam quam pro Creatura profundat, & aliam insuper induit Sacramentalem quam illi ipsi Creaturæ totam communiceat & bona fide credat: Quid vero Creatura? Quid vero peccatrix anima? Quasi parum illi esset quod iam humana sui Redemptoris vita sit effusa, illam etiam Sacramentalem vitam ipsa ipsa, sua sponte, peccatrix anima illam etiam Sacramentalem vitam de medio cordis sui tollit! Illū Dei conculcat Filium quem pauent Angeli & Sanguinem testamēti pollutum ducit, tot repetitis vicibus, tot renouatis mortibus quot peccata perpetrare placet! Quamobrem verò placet, & quibus tyrannis, quibus tormentis ad tale scelus agitur? Sola voluptate, sola licentia vitæ liberioris, solo sui amore mota, quo animalem suam vitam Diuinæ præfert; & mauult in se Christum mori, quam se cum Christo viuere! Potestne sceleratius aliquid in humanis cogitari? Potest certe peccatum vnum maius & grauius esse alio: sed non potest aliud esse quoduis malum, malo peccati grauius.

Vrgeri debet hic affectus quàm vehementer poterit: Et propterea, Vide Sabbato & Dominica præcedenti, verba sancti Bernardi, quibus adde quæ opportune admodum ex eodem sermone sequuntur. *Quid nos dicimus qui sacram Domini resurrectionem Pascha priuamus nomine, vt sit nobis inreditum magis quam in transitum? luximus his diebus, compunctioni & orationi, grauitati & abstinentiæ dediti: ceterorum negligentias temporum, sacro hoc quadragenario redimere & diluere cupientes. Communicamus passionibus Christi: complantati ei denuo sumus per baptismum quen- dam lacrymarum, penitentia, confessionis. Si ergo mortui sumus pec-*

rato, quomodo viuemus adhuc in illo? Si negligentias planximus, quid causa est ut recidamus nunc in easdem? Inueniemur nunc iterum curiosi ut ante, verbosi ut antè, pigri & negligentes ut antè: vani, suspiciosi, detractores, iracundi, ceterisque impliciti vitiis quæ tam anxie deplorauimus his diebus? Laui pedes meos: quomodo iterum inquinabo eos? Exui me tunicam meam: quomodo induam eam? Non est transmigratio hæc fratres: non sic videbitur Christus, non hoc iter quo ostendat nobis Deus salutare suum. Denique qui retro respicit, indignus est regno Dei.

Sic amatores sæculi, inimici crucis Christi, cuius in vanum accepto nomine dicuntur Christiani: toto hoc tempore quadragesimali ad instantes inhiant dies resurrectionis: heu, ut liberius indulgeant voluptati. Obnubilat, fratres, solemnitatis lætitiæ materia tristior: sed ipsius plangimus solemnitatis iniuriam, quam dissimulare non possumus, nec in ipsa, imo minus in ipsa. Proh dolor, peccandi tempus, terminus recidendi, facta est resurrectio Saluatoris! Ex hoc nempe comessationes & ebrietates redeunt, cubilia & impudicitia repetuntur, & laxantur concupiscentiis frena: quasi ad hoc surrexerit Christus, & non magis propter iustificationem nostram! Sic honoratis miseri Christum, quem suscepistis? venturo parastis hospitium, confitentes peccata cum gemitu: castigantes corpora, elemosynas impendentes; & ecce, susceptum proditis inimicis, imo exire compellit, priores nequitias admittendo. Neque enim cohabitatio esse potest luci ad tenebras, Christi cum superbia, cum avaritia, cum ambitione, cum fraterno odio, cum luxuria, cum fornicatione. Quid enim minus presenti debetur quam venturo? Quid minus reuerentia, resurrectionis tempus exigit quam passionis? Sed vos, ut manifestum est neutrum honoratis. Nam si compateremini, & coregnaretis: si commoreremini & conresurgeretis. Nunc autem ex sola consuetudine temporis & simulatione quadam, humiliatio illa processit, quam non sequitur exultatio spiritualis. Propter hoc, ut ait Apostolus, multi infirmi & imbecilles, & dormiunt multi. Propter hoc crebra in diuersis regionibus hominum mortalitas, specialiter his diebus. Quid enim? deprehensi estis inter angustias, prauaricatores, non qui prauaricati estis, sed qui persistitis in peccato, addentes prauaricationem aut penitus impænitentes, aut tepide pænitentes: nec pericula fugientes, vel post miseram experientiam, incontinentia peccati.

1. Cor. II.

Si prælibari posset aut prælegi tota sequens hebdomada,

Nemo cum Christo resurgit nisi qui cum ipse sit mortuus. 451
consultum foret, ad pleniorē huius Veritatis intelligentiam;
Cui & deferuire potest illa quæ habetur in 4. parte, Domini-
ca 15.

Sicut à peccato, sic à peccati reliquiis resurgendum.



HAC HEBDOMADE, Dotes Corporis, seu Vitæ
gloriosæ Christi, atque Animæ nostræ simul cum eo
resurgentis Qualitates proponuntur; indeque Veritates
Practicæ, paradoxæque omnes eruntur.

FERIA SECUNDA. DE IMMORTALITATE GLORIOSÆ VITÆ CHRISTI.

ATQUE ANIMÆ CVM EO RESURGENTIS.

*Christus resurgens ex mortuis, iam non moritur,
Mors illi ultrà non dominabitur. Rom. 6.*

VERITAS PRACTICA.

In Morte Immortalitas.

SENSVS est, quòd quamdiu illa quæ simul cum Christo mor-
tua est & resurrexit Anima, in morte vitæ sensualis permane-
bit, permanebit etiam in quadam Immortalitate morali, quam
participat ex Gratia Domini resurgentis.


RATIO est, quia illa immortalitas consistit in Sanctificatione
animæ, quæ est peccati grauioris exclusio.

Sed quamdiu anima permanebit in morte vitæ sensualis, exclude-
tur peccatum, & remanebit semper sanctificata.

452 FERIA 2. Pascha. Christus resurgens ex mortuis, &c.

Ergo & simul Immortalis erit, illa morali immortalitate quâ à Christo resurgente participat. Atque ita in morte Immortalitas, & vitæ beatæ quædam similitudo pro qua mors illa millies optenda esset.

I. PUNCTVM.

 VANDOQVIDEM Mysteria seu Apparitiones Christi Domini resurgentis referuantur in totum Paschale tempus, nihil aptius & conuenientius huic triumphanti hebdomadæ considerari posse videtur, quàm Representatio Gloriosæ Vitæ, seu quæ in Christo Domino fuit, seu quæ est in vnoquoque nostrum qui verè cum eo resurrexit.

Rom. 6.
1. Cor. 15.

1. Tim. 1.

Apoc. 4.

Prima autem Qualitas huius Gloriosæ Vitæ est IMMORTALITAS seu immutabilitas status quæ talis erat in Christo Domino, vt anima non posset separari à corpore, sicut poterat ante mortem & Resurrectionem: *Mors illi ultra non dominabitur; ABSORPTA est mors in victoria*, inquit Apostolus. Congaude illi, contemplare sacrum illud Corpus, admirare Gloriosam illam Vitam quam degebat in terris; exopta vt omnes Illum agnoscant, diligant, venerentur. *Regi seculorum immortalis honor & gloria in secula seculorum.* Dignus es, Domine Deus noster, accipere gloriam & honorem & virtutem.

Ps. 83.

Ex hac autem Immortalitate Christi, emanat quædam Immortalitas animæ quæ dicitur Moralis, vt discernatur à naturali & supernaturali. Naturalis illa est qua, moriente corpore, nunquam moritur anima, quocumque sit in statu post mortem. Supernaturalis & Beata dicitur, quando anima fruitur æterna Beatitudine. Moralis denique, quando non moritur anima morte illa exitiosa peccati: sed semper sancta, semper Deo placens, & accepta, *de virtute in virtutem quotidie proficit, donec videat Deum Deorum in Sion.*

Hanc Immortalitatem sicut & alias Qualitates vitæ gloriøsæ dicitur communicare Christus Animæ cum Ipso resurgenti, quatenus reipsa gratiam confert hoc tempore quâ fortiùs anima roboretur contra peccatum, siue id in honorem suæ Resurrectionis præster, siue id precibus Ecclesiæ donet, quæ multæ in eum

finem his diebus diriguntur, siue in compensationem laborum quadragesimæ, siue quia verno accedente tempore, humores corporis & passionēs animæ magis commouentur, & ideo plus Gratia desideretur; siue ob aliam denique causam, id certo experiuntur Fideles quique, se longe robustiores quàm antea contra peccatum illud, *quod generat mortem*, vnde Immortalitas illa *Iac. 1.* moralis sequitur, si modo fideliter illi gratia cooperentur. Quid sit verò fideliter illi Gratia cooperari patet ex veritate proposita. *In morte Immortalitas*, Nempe si in morte vitæ sensualis constanter perduremus: Cum enim, vt dictum est, Immortalitas hæc consistat in exclusionē peccati mortalis, certe quantò anima longiùs ab eo refugiet, aut eius admittendi minùs erit idonea, tantò dicetur fidelius Gratia cooperari, quàm peccato resistitur; Vnde est egregium illud Sapientis Monitum, licet subobscurum: *Eccl. 10.* *Si spiritus potestatem habentis, vel vt habet Chaldaa, Si spiritus concupiscentia mala ascenderit super te, locum tuum ne dimiseris, quia curatio faciet cessat peccata maxima.* Id est, si forte aliquando vehementius solliciteris in peccatum contrà ac velles; Ne propterea perturberis, tantum ita firmiter & fideliter in bono proposito non peccandi: & quæcumque tandem occurrant committenda peccata, nullum prorsus committetur, sed cessabunt & euitabuntur omnia per Diuinam Gratiam, & hanc fidelem curam.

Sic ad illa Psalmi Verba: *qui diligitis Dominum, odite malum: Ps. 96.* apte sanctus Augustinus: *Hinc apparet te diligere quod bonum est, si inuentus fueris odisse quod malum est.* O peccatum quod occidit Christum meum, quis te non oderit, quis te non abhorreat! Et tamen, quot quantiq; peccatores! vndenam hoc? quia peccatum scilicet se odisse putant, & rem peccati diligunt. Aduerte, *ad 1. 38.* *dissoluendas omnes colligationes impietatis.*

II. PUNCTVM.

SED quamdiu anima permanebit in morte illa vitæ sensualis, longe aptior & paratior erit ad excludendum omne peccatum.

Quid est enim mors illa vitæ sensualis nisi refrænatio concupiscentia, vnde est omne peccatum? Sicut enim malorum omnium *1. Tim. 6.* atque adeo mortalitatis animæ, de qua hic agitur, radix est

Sap. 15.

cupiditas non refrænata; sic etiam eius Refrænatio potest dici bonorum omnium atque adeo Immortalitatis animæ radix: sic enim ait Deo Sapiens: *Nosse te consummata Iustitia est: & scire in-*
stitiam & virtutem tuam, RADIX EST IMMORTALI-

TATIS.
 Non potest quidem ita refrænari Concupiscentia quin aliquæ veniales culpæ, siue ex fragilitate, siue ex inaduertentia committantur, sed non inde procedit peccatum ad mortem sicut ab iis venialibus quæ fiunt ex libidine, siue ex appetitu indomito. Tanta est differentia vtriusque status peccantium, vt qui non ex libidine seu immortificatione, sed ex inaduertentia tantum peccant, peccare non dicantur. *Et scitis*, inquit dilectus Discipulus,

1. Ioan. 3.

quia ille apparuit vt peccata nostra tolleret, & peccatum in eo non est.

Omnis qui in eo manet, non peccat. Omnis qui natus est ex Deo, peccatum non facit; Id est, adeo leuiter & venialiter peccat vt præ aliis

Rom. 6.

peccare non videatur, neque ex illis leuibus culpis tale sit periculum in mortales incidere sicut ex aliis. Quem eundem in sensum dixit Apostolus, *Nihil damnationis est iis qui sunt in Christo Iesu, qui non secundum carnem ambulant. Lex enim spiritus vita in Christo Iesu liberauit me, à lege peccati & mortis.* O qualis libertas! qualis Liberator! qualis in Eum animæ liberatæ sensus!

III. PUNCTVM.

Serm. 1. in
vlt. Pasce.

PATET igitur euidenter quàm vere sit posita in morte Immortalitas. Cum hæc immortalitas sit in exclusionem peccati, & hæc peccati exclusio sit in morte vitæ sensualis: Ac proinde etiã pater quantopere sit incumbendum, vt quod ait S. Augustinus, *relaxatione corporum, puritas non obfuscetur, sed potius abstinentes ab omni luxu, ebrietate, lasciuia, demus operam sobria remissioni, ac sanctæ sinceritati, vt quidquid modo, corporali abstinentia non acquirimus, mentium puritate quæramus.*

Rom. 6.

Totus est in eo Apostolus: vt sicut Christus resurgens ex mortuis iam non moritur, ita & nos Immortalitatem eius participant, conemur eam omni modo conseruare, conseruantes nos diligentissimè in morte vitæ sensualis, à qua est omne peccatum. Audi enim vt aptissimè ad rem nostram! sed ita audi, vt rem attingas: *Quod enim mortuum est peccato*, inquit, *mortuum est*

semel, quod autem vinit, vinit Deo. Ita & vos existimate, vos mortuos quidem esse peccato, viuentes autem Deo, in Christo Iesu. Non ergo regnet peccatum in vestro mortali corpore vt obediatis concupiscentiis eius, sed neque exhibeatis membra vestra, arma iniquitatis peccato, sed exhibete vos Deo, tamquam EX MORTVIS VIVENTES, & membra vestra, arma Iustitiae Deo. Peccatum enim vobis non dominabitur; Et post pauca: sicut enim exhibuistis membra vestra seruire Immunditiae & iniquitati ad iniquitatem, ita nunc exhibete membra vestra seruire Iustitiae in sanctificationem: Quali dicat, vt ait Origenes, Currebant prius pedes vestri ad effundendum, nunc autem ad liberandum sanguinem currant. Protendebantur manus prius vt aliena diriperent, nunc protendantur vt propria largiantur. Circumspiciebant prius oculi alienum ad concupiscendum, nunc circumspiciant pauperes ad miserandum. Et vniuscuiusque membri ministerium quod exhibuit vitiis, aptet virtutibus, & actum quem exhibuit immunditiae, ad Castitatem nunc sanctitatemque conuertat.

Ad Euangelium Ferie, De duobus Peregrinis euntibus in Castellum Emmaus. Luc. 24.

TOTA de his est hebdomada secunda post Octauam Paschæ.



FERIA TERTIA.

DE IMPASSIBILITATE CORPORIS

CHRISTI DOMINI,

ET ANIMAE NOSTRAE, SIMVL

CVM EO RESVRGENTIS.

Seminatur in Corruptione, surget in Incorruptione. I. Cor. 15.

VERITAS PRACTICA.


In Patientia Impassibilitas.

SENSVS & Ratio est, quia Impassibilitas animæ resurgentis, est eius Incorruptio.

Sed animæ Incorruptio est in patientia.

Ergo & in patientia Impassibilitas, quæ quanti est pretij, tam pretiosa debet esse patientia.

I. PUNCTVM.

 D-Immortalitatem Corporis gloriosi hoc addit IMPASSIBILITAS, vt non tantum à morte corpus sit liberum, sed etiam à vulnere, à morbo, & ab omni prorsus inuoluntatis specie, adeo vt perpetuo constantique vtatur valetudinis commodo. Tale igitur erat Corpus gloriosissimum Christi Domini resurgentis qui proinde in Psalmo dicebat: *Ego dormiui & soporatus sum, & exurrexi, quia Dominus suscepit me; non timebo millia populi circumdantis me.* Vocat mortem suam, somnum, inquit Bellarminus; quia tam facile illi erat, resurgere à mortuis, quàm aliis euigilare à somno. Quod dicit vero se resurrexisse quia Dominus suscepit ipsum, perinde est ac si diceret, non id humano fretum auxilio effecisse, sed innixum potentia infinita Diuinitatis, qua & ipsum corpus suscitatu, illæsum deinceps reddet, ab omni prorsus offensione. Sicut enim in Sanctissimo Sacramento, licet in mille partes rumpatur hostia, nulla vmquam tamen fiet corporis læsio; sic prorsus in Corpore resuscitato ad gloriam. O quam iure debebatur tali Corpori quod extrema omnia perpeffum fuerat, talis Impassibilitas, vt iam nullo modo pati posset!

Pf. 3.

1. Ioan. 3.
2. Cor. 15.

Sic nos aliquando resurgemus, sic similes ei erimus. Vnusquisque in ordine suo; ô quando illa luceſcet dies? Interea vero nunc quandoquidem, animâ, cum illo resurgimus, hanc etiam Impassibilitatem, quodammodo participamus. Sed mirum quod in patientia sit illa Impassibilitas. Ita tamen omnino est, & hac ratione demonstratur.

Impassi-

Impassibilitas animæ resurgens est eius Incorruptio, quæ duo denotat valde consideranda, ut discernatur à falsa & simulata Stoicorum apathia seu corporis insensibilitate & animi luctantis in aduersis. Primum est negatiuum non quo anima nihil sentiat, aut quo non tristetur vel latetur: sed quo in omnibus siue prosperis siue aduersis, sic se cum Dei gratia contineat, ut nullo prauo corrumpatur affectu. *Non est pondus vera virtutis*, inquit sanctus Gregorius, *insensibilitas cordis, quia & valde insana per stuporem membra sunt quæ & incisa sentire dolorem nequaquam possunt*. Sic sanctus Augustinus explicans illud quod de Christo Domino dicitur *turbauit seipsum: PEREANT*, inquit, *argumenta philosophorum qui negant in sapientem cadere perturbationes animorum*. Turbetur plane animus Christianus non miseria sed misericordia: timeat, ne sibi pereat & Christo: contristetur peregrinari se à Christo: concupiscat regnare cum Christo: latetur dum sperat se regnaturum esse cum Christo. Addi vero debet quod licet etiam turbaretur miseria aut aliquo motu humano & naturali, tendente in obiectum non ita honestum & licitum, quale est illud quod commemoratum est, non propterea corrumpereetur animus si non consentiret & obediret illi motui. Nunc quandiu, inquit idem sanctus Augustinus, *concupiscit caro aduersus spiritum, & spiritus aduersus carnem; sat est nobis non consentire malis quæ sentimus in nobis*.

2. Mor. 16.

Ioan. vi.
Tract. 60.
in Ioan.L. de Con-
tin. c. 1.

Aliud autem positium, quo Incorruptio quæ nostram impassibilitatem facit, à profanis distinguitur, in bono fine & erecta in Deum intentione positum est. Satis erat Stoico se continere, ut sibi vel mundo placeret in illa sua continentia, & factum vnum alio calcabat, ut Diogeni Plato exprobrauit, fallu. At Christianus nec sibi nec mundo viuit aut moritur, sed suo Christo; Propter te, inquit, *mortificamur tota die*. Hæc est Incorruptio quæ facit esse proximum Deo. Hæc est Incorruptibilitas quieti sap. 6. & modesti spiritus qui est ante conspectum Dei locuples. Hoc est aurum ignitum, probatum, quod suaderis emere, ut locuples fias. Nonne te fines persuaderi?

Ps. 43.

Sap. 6.

1. Pet. 3.

Apoc. 3.

II. PUNCTVM.

SED hæc anima incorruptio est in Patientia.

Primo quidem quantum ad illud negatiuum quo anima

2. Pars.

Mmm.

non consentit prauis suis motibus, totum hoc Patientiæ tam
 certò referri potest quàm certum est quod habet Tertullianus de
Lib. de par. Impatientia, cui omne peccatum esse adscribendum sic docet; Malum,
 impatientia est boni; nemo impudicus non impatiens pudicitia, & im-
Lib. de bo- probus probitatis, & impius pietatis, & inquietus quietis. Sic pror-
uo par. sus ad patientiam refert sanctus Cyprianus quod omnes illi vi-
 tiosi motus quibus anima potest corrumpi, reprimantur; Ipsa est,
 inquit, quæ iram temperat, quæ linguam frangat, quæ libidinis impe-
 tum frangit, tumoris violentiam comprimit, incendium simultatis ex-
 tinguit, & quæ plura prosequitur, quæ vno verbo expressit Do-
Lib. 21. minus dicens: In patientia vestra possidebitis animas vestras. O
 diues & tuta possessio.

Deinde vero quoad aliud positivum, Incorruptioni Christia-
 næ proprium, ut Diuina spectet non humana, ut æternis mouea-
 tur non temporalibus; quis nescit eò tendere tam rectè & dire-
 ctè Patientiam de qua hic agitur, quàm ipse Deus se vnum quæ-
 rit & spectat? Nam præter naturalem & acquisitam Patientiam,
 Alia est supernaturalis infusa, quæ Dots quædam est animæ re-
 surgentis, donum & compensatio fidelitatis quam suis contra se
1. Apoc. 3. certaminibus exhibuit; vnde illud Christi Domini: qui vicerit,
 faciam illum columnam in templo Dei mei, Id est, tam firmum &
 constantem ut nulla vi aduersa corrumpatur, tam erectum &
 sublimem ut vni Deo seruiat. Hæc est Charitas patiens, hæc pa-
 tientia dilectrix Dei & proximi, quæ tam Diuina est, ut & Dei
Rom. 15. dicatur, & Deus illius esse: Deus, inquit, patientia & solatij, det
2. Thess. 3. vobis idipsum sapere in alterutrum. Et rursum; Dominus autem di-
 rigat corda vestra, in charitate Dei, & patientia Christi. Hæc est de-
Iac. 1. nique patientia quæ opus perfectum habet, ut sitis perfecti & integri,
 in nullo deficientes. Tunc ex illis es?

III. PUNCTVM.

SIC ergo est in Patientia Impassibilitas, quantum quidem im-
 passibilitas animæ potest esse in corpore; nam & eam pati
 oportet necesse est, quia corpus quod corrumpitur, aggrauat animam:
Sap. 9. sed si patienter patiatur non corrumpetur anima, licet aggrauetur,
 & incorrupta manente anima, sit illa mentis impassibilitas
 quæ tam pretiosa est, ut ab Apostolo Thesaurus nominetur, &

quanta in se suisque esset sic luculenter describit; *habemus thesaurum istum in vasis fictilibus, ut sublimitas sit virtutis Dei, & non ex nobis. In omnibus tribulationem patimur, sed non angustiamur: aporiamur, sed non destituimur: persecutionem patimur, sed non derelinquimur: deicimur sed non perimus.* Et paulo post: *Ut in nullo detrimentum patiamini.*

Hoc est esse incorruptum & impassibilem, sic esse illa sum & invulnerabilem in mediis hostibus, non ut minimè patiaris, sed libenter: non ut minimè sentias mala poenæ vel culpæ, sed ut illa patienter feras, & hæc religiosè fugias. Hæc est vera Philosophia quæ nec insensibilem in malis reddit, neque nimis sensibilem. Sic præclare S. Gregorius de constanti lobo; *Quia, inquit, vera Philosophia regulam tenuit, contra utraque, mira se equitatis arte servavit, ut nec quasi dolorem non sentiens flagella sperneret: nec rursum, ultra modum, dolorem sentiens, contra iudicium flagellantis insaniret. Cunctis enim rebus perditis, cunctis liberis amissis surrexit, scidit vestimenta sua, & tonso capite corruens in terram, adoravit. Quod vestimenta scidit, quod tonso capite in terram corruit, monstrat nimirum quia flagelli dolorem sensit: Quod vero additur, adoravit, aperte ostenditur quia in dolore positus contra flagellantis iudicium non excessit. Nec omnino ergo non motus est, ne Deum ipsa insensibilitate contemneret: nec rursum omnino motus est, ne nimis dolendo peccaret.*

Tu quidem fatis esse velles impassibilis, nihil patiendo, nihil sentiendo: sed erras toto coelo, nam non est impassibilitas, nolle pati sed potius velle. Nemo magis aut minus est passibilis quam qui magis aut minus velit pati. Sic velis pati libenter ut patienti non pecces, & impassibilis ac beatus existeres. Sic egregiè Saluianus; *Nulli ut opinor beatiores sunt quam qui ex scientia sua atque voto agunt. Humiles sunt Religiosi, hoc volunt: pauperes sunt, paupertate delectantur: inhonorati sunt, honorem respuunt. Itaque quidquid acciderit iis qui verè religiosi sunt, beati esse dicendi sunt, quia inter quantumlibet aspera, nulli latiores sunt quàm qui hoc sunt quod volunt. Nonne id ita iudicas? cur ergo non ita gaudes in asperis?*

*L. r. de vero
Ind. &
Prou. Dist.*

*Ad Euangelium Feriæ, de Discipulis congregatis
in cœnaculo, quibus apparuit Christus, ianuis clau-
sis. Luc. 24.*

HABETVR eius Consideratio Feria 2. hebdomadæ 3.
post Pascha.

Viderietiam debet Dominica prima quæ in Albis dicitur.

Ac denique Christo ingredienti domum ianuis clausis, op-
portuna esse possent quæ proponuntur proxime sequenti Feria.



FERIA QVARTA.
DE SVBTILITATE CORPORIS
CHRISTI,
ET ANIMÆ NOSTRÆ SIMVL
CVM EO RESVRGENTIS.

*Seminatur Corpus Animale, surget Corpus spiri-
tale. 1. Cor. 15.*

VERITAS PRACTICA.

In Infirmitate Virtus : In Impotentia Potentia.

*RATIO est, quia vbi maius est Diuinum auxilium, ibi magis
vere & propriè Virtus est, & potentia ad agendum.*

*Sed in infirmitate & impotentia, si humiliter agnoscantur, & Deo
perfectè subiiciantur, maius est Diuinum auxilium.*

*Ergo & in infirmitate virtus, & in impotentia potentia. Qua
certè Consideratio multum valere debet ad rectum infirmitatis
nostre usum.*

I. PUNCTVM.

MAC Subtilitatis Dote potissimum cognoscitur Corpus resurgens, esse spiritale; nam hoc est maxime proprium spiritibus quales sunt Angeli & animæ, penetrare omnia, nec ullis obstaculis quantumcunque duris & opacis detineri. Tale igitur erat gloriosum Corpus Christi Domini resurgentis; Et hoc primum suæ gloriæ seu gloriôsæ vitæ Resurgens, dedit argumentum quod è clauso signatoque sepulchro prodiit, sicut postea januis clausis se medium inter suos discipulos statuens: *Non per incorpoream naturam, sed per Resurrectionis corporeæ qualitatem, imperuia vsu claustra penetravit*, inquit S. Ambrosius. L. 10. Cōm. in Lucam.

Adora hoc gloriosum Corpus: Ama in eo hanc spiritalem qualitatem; admirare quàm modicum & quam pie illa vtatur; non penetrat totius orbis partes, vt poterat: non ciuitatum mœnia, non Iudæorum domos; sed suos duntaxat inuifit & tamquam bonus pastor dispersos colligit. O penetra pectus meum Amator cordis mei! quid foris itas? cur tamdiu pulsas? cur clamas, *aperi*, cum ipse possis obstantia quæque referare? Cant. 5.

Sic porro Animæ nostræ cum Christo resurgentes, quoddam Subtilitatis & Fortitudinis heroicæ donum participant, quo difficilia quæque peruincere & ita quodammodo penetrare sint paratæ, nihil vt sit tam durum & inuium quod non aggrediantur & superent. Vnde illud generosissimæ Magdalenæ, *Domine si tu sustulisti eum, dicito mihi ubi posuisti eum, & ego eum tollam*, sic nonnullis libet contemplando dilatare: Etiam si fuerit apud Herodem, aut apud Pilatum; etiam si fuerit à militibus custoditus; etiam si ego infirmus sim sexus: etiam si sola, & loci longa sit intercapedo: nil me remorabitur, nil me terrebit, nihil me detinebit. Et quod de Dauide dicitur; *Cum leonibus lusit quasi cum agnis, & in vrsis similiter fecit sicut in agnis ouium*; Sic proportionem quadam de illis qui hoc Dono donati sunt: Sunt autem ij omnes qui verè cū Christo resurrexerunt, & quotquot sibi mortui, Christo soli viuunt. Cum enim ipsi agnoscant quam sint ex se infirmi & impotentes, hinc fit vt quo id magis agnoscunt, id verius dicatur quod modo considerandum proponitur: *In infirmitate virtus, &*

in impotentia potentia.

Et Ratio certe est euidens & perfacilis. Quis enim dubitet vbi maius est Dei virtus & potentia, vbi maius sentitur Diuinum auxilium, tùm ibi etiam magis verè & proprie dici esse virtutem & potentiam, vel ad agendum vel ad patiendum? Nam

Rom. 8. *si Deus pro nobis quis contra nos? DOMINVS meus, auxiliator meus,*
 Is. 50. *inquit Propheta, ideo non sum confusus, ideo posui faciem meam ut petram durissimam, & scio quod non confundar. Iuxta est qui iustificat me, quis contradicet mihi? Stemus simul: Quis est aduersarius meus? accedat ad me. Ecce Dominus Deus auxiliator meus, quis est qui condemnet me? Denique quidquid se contra opponat, vel mundus vniuersus, vel infernus totus, vel omnes simul iunctæ Creaturæ, quamdiu nobiscum erit Dominus, semper illud erit*
 1. Ioan. 4. *verum, quod dilectus ait Discipulus; Maior est qui in vobis est, quam qui in mundo. Nonne hoc credis?*

II. P V N C T V M.

SED in infirmitate & impotentia si humiliter agnoscantur & perfectè Deo subiciantur, maius adest Diuinum auxilium, maior Dei virtus & potentia.

Tres sunt potissimæ rationes ad quas aliæ referri possent. Prima petitur ab ipsa Dei bonitate & misericordia, quæ quo egentiorem videt hominem, primò quidem illustrat & monet ut se videat, & agnoscat quàm sit pauper & nudus & miser; tùm si talem se agnoscat, aut si saltem de se nihil præsumat & arroget, benignitatis suæ fontem aperit, & abyssus miseriarum inuocante misericordiarum abyssum, vbi abundauerat delictum ibi superabundat gratia.

Apoc. 3. *Ps. 41. Rom. 5.*

Deindè vero, quæ secunda est Ratio, si miser ille sic præuentus à Domino non modo non indè se efferat, sed magis se ac magis humiliet, paupertatis suæ semper memor, & infirmitatis prædicatur assiduus, sibi totus diffidat ut se totum in Diuinam projiciat Bonitatem; tùm mirum quantum hac delectatus confidentia Dominus, sperantium in se corda roborat, confortat animos, & ad omnia vires subministrat. Dominus firmamentum meum, & refugium meum, & liberator meus, Deus meus adiutor meus & sperabo in eum. Tum verò Dominus; quoniam in me spe-

Ps. 17. *Ps. 50.*

rauit, liberabo eum, protegam eum, quoniam cognouit nomen meum.
Hinc præclare sanctus Augustinus: *fortitudo nostra est infirmitas in veritate cognitio, & in humilitate confessio.* Tertiò denique maiorem id spectat Dei gloriam, ut quo infirmiore vitur instrumento, & apertius cognoscatur Deus esse qui facit quidquid est admirabile, & quàm sit admirabile quidquid facit. *Tu venis ad me cum gladio & hasta & clypeo,* dicebat pusillus Dauid Gynganti: *Ego autem venio ad te, in nomine Domini, & dabit te Dominus in manu mea, ut sciat omnis terra quia est Deus in Israel, & nouerit vniuersa Ecclesia hæc, quia non in gladio nec in hasta saluat Dominus.* Sic humilis & generosa Iudith; *Erit hoc memoriale nominis tui cum manus femina deiecerit eum.* Non enim in multitudine est virtus tua Domine, neque in equorum viribus voluntas tua est, nec superbi ab initio placuerunt tibi, sed humilium & mansuetorum semper tibi placuit deprecatio.

Sic ipse Dominus infirmitatem carnis nostræ assumpsit ut gloriosius in ea de Diabolo triumpharet: vnde illa sunt præclara sancti Augustini: *Fortitudo Christi te creauit, infirmitas Christi te recreauit: fortitudo Christi fecit ut quod non erat esset: infirmitas Christi fecit, ut quod erat, non periret:* O quantum debemus Infirmitati! Quantum est scilicet Redemptionis beneficium. Iam non miror quàm multus sit & quam facundus Apostolus in hoc Diuino consilio deprædicando, quo ad maiorem sui notitiam, quæ stulta sunt mundi elegit Deus, ut confundat sapientes, & infirma mundi, ut confundat fortia, & ignobilia mundi, & contemptibilia, & ea quæ non sunt, ut ea quæ sunt destrueret: ut non gloriaretur omnis caro in conspectu eius. Sed quod miror est, adhuc superesse carnem quæ contra ipsum vanè gloriatur. *At maledictus homo qui confidit in homine, & ponit carnem, brachium suum; & à Domino recedit cor eius.* Vide locum Prophetæ integrum.

III. PUNCTVM.

SIC est igitur in infirmitate Virtus, & in impotentia Potentia, ut quàm verum est ibi maxime Diuinum adesse auxilium, tam sit certum & indubitatum, illic omnem præcipuè reperiri virtutem & potentiam, quæ est unicuique necessaria ad perfecte simul agendum & patiendum suo in gradu & ordine. Quod præclare

figuratum in illis Machabæis de quibus dicitur post implora-
 2. Mac. 1. tam Diuinam opem, quod conualuerunt animis, non solum homi-
 nes, sed & bestias ferocissimas, & muros ferreos parati penetrare. Ibant
 igitur prompti, de cælo habentes adiutorem & miserantem Dominum.

Isa. 3. Nonne hoc ipsum est quod Propheta commendabat, *Infirmus
 dicat, quia fortis ego sum*: Et quod dicebat Apostolus: *Cum infir-
 mor, tunc potens sum*. Nempe hoc didicerat à Domino dicenti
 sibi, *sufficit tibi gratia mea, nam virtus in infirmitate perficitur*.
 Cor. 12. Atque illud reipsa expertus est, cum ut ipse scribit, *in mea pri-
 2. Tim. 4. ma defensione nemo mihi adfuit, sed omnes me dereliquerunt*: Do-
 minus autem mihi astitit, & confortauit me, ut per me predicatio im-
 pleatur, & audiant omnes gentes: & liberatus sum de ore leonis:
 liberauit me Dominus ab omni opere malo. Videlicet quod diceba-
 tur, tanto maius adfuisse Christi auxilium, quanto magis hu-
 manum deerat? & quanto magis infirmus erat Apostolus tanto
 magis firmus fuit?

Hæc est differentia Gratia quæ data est Angelis, & quæ nunc
 1. p. q. 62. datur hominibus: Nam, ut ait sanctus Thomas, data est Ange-
 4. 6. lis gratia secundum vniuscuiusque naturalem perfectionem: con-
 trā verò datur hominibus secundum eorum infirmitatem & in-
 digentiam, quia medicinalis est gratia, quam quisque maiorem
 recipit qui se magis infirmum nouit & confitetur. *Miserere mei
 Domine, quoniam infirmus sum: sana me Domine, quoniam contur-
 bata sunt ossa mea.* OPTANDA infirmitas, inquit sanctus Ber-
 nardus, quæ Christi virtute compensatur. Quis mihi dabit non so-
 lum infirmari, sed & destitui ac deficere penitus à meipso? Domini
 virtutū virtute stabiliat, nam virtus in infirmitate perficitur. Quæ
 non sic intelligenda sunt quasi vltro velimus esse infirmi, aut
 quasi ipsa infirmitas & impotentia naturalis, sint ex se optandæ,
 2. Reg. 2. Dominus est qui mortificat & viuificat, qui pauperem facit & ditat:
 humiliat & subleuat. Nostrium vero est nostra infirmitate non
 tantum non infirmari nec desperare: sed eò magis confidere
 quò infirmiores sumus; cum inuocatus non desit Dominus qui
 nos confortet: aut si etiam non adesset sicut vellemus, velitque
 nos in nostra imbecillitate relinquere, neque tunc etiam deji-
 ciamur, nec fortiores esse velimus quam velit Deus. Satis enim
 fortes sumus si nostram infirmitatem libenter portamus: &
 suam impotentiam generosè ferre; magna Potentia. Vide in-
 fra

frà Feria 3. hebdom. 4. & Feria 5. Pentecostes : Nec non in 3. parte, Feria 5. & 6. hebdomadæ decimæ.

*Ad Euangelium Ferie , de Septem Discipulis
Piscantibus , &c. Ioan. 21.*

VIDE Feriam 4. hebdomadæ 3. post Pascha. Tum in 1. parte, Sabbato hebdomadæ 2. post Epiphaniam.



FERIA QVINT A.
DE AGILITATE CORPORIS
CHRISTI DOMINI,
ET ANIMÆ NOSTRÆ CVM EO
RESVRGENTIS.

*Omniibus mobilibus mobilior est Sapientia : attingit
autem ubiq; propter suam munditiam. Sap. 7.*

VERITAS PRACTICA.

In Tarditate Agilitas.

SENSVS & RATIO est, quia quæ hic intelligitur Agilitas non est precipitata voluntas qua in stadio curritur, sed matura & consulta diligentia, quæ opportunè tenditur & peruenitur ad metam.

Sed illa matura & consulta diligentia non aliter quàm in Tarditate peragitur.

Ergo in Tarditate Agilitas : Et quenam sit illa Tarditas, diligenter attendendum.

I. PUNCTVM.

S. Aug. 122.
Civ. c. 20.
S. Bernard.



Cant. 2.

AGILITATIS resuscitati & gloriosi Corporis Dotem non aliter sancti Patres nobis commodius repræsentant quàm dicendo posse illa beata Corpora si velint, *cogitationum nostrarum sequi velocitatem*. Quid velocius cogitatione nostra, quæ in instanti Romam se transtert, ac eodem inde momento Ierosolymam, & quouis aliò? Talis erat Agilitas gloriosissimi Corporis Christi Domini, qua se suis in momento, in ictu oculi sistebat videndum, & ex eorum oculis evanescens, mox se spectandum præbebat aliis. *Vox dilecti mei: Ecce iste venit saliens in montibus, transiliens colles, similis est dilectus meus caprea hinnuloque cernuorum. En dilectus meus loquitur mihi, surge prope amica mea, columba mea, formosa mea & veni. Quibus sponsæ verbis non modo Agilitas corporis Sponsi dum in terris degeret, sed & eius Spiritus cum in Cælum remeasset, ad nos velocissimè visitandos exprimitur, simulque nostra declaratur quam ab eo participamus, vt quòd iubet quantocyus exequamur. O veni Dilecte mi, aut trahe me ad te, vt possim currere in odorem vnguentorum tuorum.*

In Serm.
de Obed.

Non est dubium quin Animæ cum Eo verè resuscitatæ hanc participant suo modo Dotem sicut & alias, nam vt ait S. Bernardus, *velociter currit sermo eius, & velocem habere desiderat sequentem*. Sed quid ea sit velocitas spiritualis & quomodo per tarditatem explicetur nunc attentè considerandum.

Pr. 19.

Sic autem paucis declaratur, si dixeris Agilitatem non esse præcipationem aut inconsultam pernicitatem animi quâ quis derepentè fertur quò tendit. Est enim hoc vitium contra quod sæpe auditus Sapiens; *Vbi est scientia anima, non est bonum, & qui festinus est pedibus, offendet*. Per scientiam autem animæ intelligit Considerationem quæ si omittatur in agendo, erit actio præceps & plena periculi: si vero adhibeatur, erit consulta & deliberata prudenter actio, vnde sequitur, quod Agilitas in suo actu non potest melius exprimi quam si dicatur esse matura & consulta diligentia, qua opportunè tenditur & peruenitur admetam aut terminum quem sibi quisque proponit. *Sit timor Domini, 19. mini vobiscum*, inquit Rex Iosaphat suis, *& cum diligentia cuncta*

facite : non est enim apud Dominum Deum nostrum iniquitas : quasi diceret, nihil temere & inconsulto Deo : nihil tiam negligenter agatur. Vtrumque enim vitiosum est & iniquum quod numquam Deus probat : sic verò extrema temperentur, vt sit consulta diligentia. Nonne id æquum & rationabile?

II. PUNCTVM.

SED illa matura & consulta diligentia non aliter quam in Tarditate peragitur.

Sicut enim diligentiae Consideratio, sic Considerationi Tarditas & maturitas quædam necessaria est, de qua possunt intelligi hæc verba Iob, *Qui fecit ventis pondus & aquas appendit in mensura.* Sic enim præclare Diuus Gregorius ad illa verba: *Dum superna sapientia replet animas, eas maturitate indita graues reddit, non illa maturitate qua dicitur, filij hominum, vsquequò graui corde? Aliud namque est, Grauem esse per consilium, aliud per peccatum: aliud est grauem esse per constantiam, aliud per culpam. Ista enim grauitas pondus habet oneris, Illa virtutis.*

De Consideratione verò, quàm sit omnibus opportuna negotiis, sic apte & accommodatè S. Bernardus: *Quid tam ad omnia valens quàm qua ipsius quoque actionis partes benigna quadam præsumptione suas facit, præagendo quodammodo & præordinando quæ agenda sunt? Necessario sane, ne forte qua & prauisa & præmeditata poterant esse proficuo, præcipitata magis periculo fiant. Et primum quidem, ipsum fontem suum, id est, mentem de qua oritur, purificat Consideratio: deinde regit affectus, dirigit actus, corrigit excessus, componit mores, vitam honestat & ordinat. Hac est qua confusa determinat, hiantia cogit, sparsa colligit, secreta rimatur, vera vestigat, verisimilia examinat, ficta & fucata explorat. Hac est qua agenda præordinat, acta recogitat vt nihil in mente resideat aut incorrectum, aut correctione egens. Hac est qua in prosperis aduersa præsentit, in aduersis quasi non sentit, quorum alterum fortitudinis, alterum prudentia est. Quæ & alia Considerationi maxime propria, quis non videat aliter peragi minimè posse, quam cū aliqua diuturnitate temporis quæ Tarditas dici potest, quantū opponitur inconsultæ præcipationi, & quantum requiritur vt quod toties commendat Sapiens, *nihil sine consilio facias, & post factum non pæni-**

Pr. 28.

tebit. Nonne te sæpe poenituit, inconsultum fuisse? O quàm Sapienter dictum: *Qui confidit in corde suo, stultus est: qui autem graditur sapienter, ipse saluabitur.*

III. PUNCTVM.

Sap. 17.

Ibid. 8.

Ecol. 8.

Ecclesi. 2.

3. Reg. 1.

Is. 6.

Ex. 1.

Ibid.

Pr. 7.

IN tarditate est igitur illa spiritualis Agilitas, quam à Christo Domino participamus, cum ipsamet Sapientia, quæ omnibus mobilibus mobilior est, attingat à fine usque ad finem fortiter, & disponat omnia suauiter. Et quidem satis patet suauitatis esse, nihil præcipitare, nihil periclitari; sed vide etiam atque etiam quàm verum sit non minus id esse fortitudinis; seu quia sic concitatus & præceps ad agendum animi imperus retardatur; seu quia negotium facilius & foelicius conficitur, cum singulas eius conficiendi partes & circumstantias attente prius reuolueris. Cum enim, ut ait Sapiens, *omni negotio sit tempus & opportunitas*; non minus sæpe negotium perdes si tempus opportunum præuertis, quàm si non sequare. Tutius semper est & securius quod alius monet Sapiens, *Inclina aurem tuam, & suscipe verba intellectus, & ne festines in tempore obductionis*, id est, quo tempore non apertè liquebit quàm possint agi omnia sapienter. Hoc denique postremum fuit quod Dauid moriens Salamoni filio commendaret: *Confortare, & esto vir, & observa custodias Domini Dei tui, ut ambules in viis eius, ut intelligas vniuersa quæ facis, & quocumque te verteris.* Hoc est esse Virum & Virum spiritualem cum ita custodiæ Domini obseruantur, ut simul atque parent, pareatur. Neque aliter volant quantumcumque sint alati Seraphim, quàm ad cognitam Dei voluntatem. Manus hominis sub pennis aspicitur in illo mystico Prophetæ currit, nihil ut fiat nisi non consultum. Trahunt currû Bos seu Vitulus & Aquila, ut velocitatem aquilæ bos temperet, & tarditatem bouis aquila concitet. Volubiles denique rotæ sunt oculatæ & plenæ spiritu vitæ, sicque procedunt vel subsistunt ad motum quo mouentur. Qui se aliter mouet, & agit, *velut si quis festinet ad laqueum, & nescit quod de periculo anima illius agitur.* Expende verba, *Periculum animæ, Periculum Beatitudinis, Periculum aternitatis.*

*Ad Euangelium Feria, de Maria Magdalena
quarente Dominum in sepulchro. Ioan. 20.*

VIDE Feriam 3. hebdomadæ 1. post Pascha.



FERIA SEXTA.
DE CLARITATE GLORIOSI
CORPORIS CHRISTI DOMINI.
ET ANIMAE NOSTRAE CVM EO
RESURGENTIS.

Seminatur in ignobilitate, surget in Gloria. 1. Cor. 15.

VERITAS PRACTICA.

In Tenebris Claritas.

SENSVS & RATIO est, quod Claritas quæ à Christo nobis
communicatur præsupponit multos & insignes Fidei actus atq;
abnegationis proprii Iudicii.

Sed illi actus fidei, & abnegationis sunt tenebræ.

*Ergo in tenebris Claritas, quæ non modo sibi, sed & aliis lucent
Viri spirituales & perfecti.*

I. PUNCTVM.

AD alias Corporis gloriosi Dotes accedit Claritas de qua
speciatim Apostolus: alia Claritas Solis, alia Claritas Luna, 1. Cor. 15.
& alia Claritas Stellarum. Stella enim à stella differt in Cla-
ritate, sic & resurrectio mortuorum. Non est autem dubium quin
Christus Dominus velut sol & longe supra solem claruerit, cum

Luc. 9.

in ipsa sua Transfiguratione talem se spectandum dederit Discipulis suis, simulque cum Eo visi sint Moyses & Elias in maiestate seu claritate. Et quidem sic ab ipsa natiuitate semper splendere poterat nisi splendorem illum continuisset, ut corpus suum redderet passibile & mortale; post mortem vero ac Resurrectionem raro quidem, quod sciatur, hominibus gloriosus & resplendens apparuit, sed Angelis ac beatis illis Animabus quas secum comites & socias semper habebat, non nisi in hoc gloriosissimo & splendidissimo statu videbatur.

Psi. 44.
2. Reg. 6.
Cant. 2.

O quam tum vere *speciosus forma præ filiis hominum!* *QUAM gloriosus fuit hodie Rex Israel!* *Quam dulcis vox tua: & facies tua quam decora,* dilecte mi Iesu! ô quando te in ea videbo gloria, quando fiet illud quod orasti patrem: *Pater, quos dedisti mihi, volo ut ubi sum ego, & illi sint mecum, ut videant Claritatem meam quam dedisti mihi!*

Ioan. 17.

Phil. 3.

Interim verò sicut Se hîc nobis communicat, ita & Claritatem suam, quantum in hac mortalitate capaces sumus, non quidem corporibus nostris, sed Animis, & illis præsertim qui *configurati morti eius, hoc modo occurrunt ad Resurrectionem quæ est ex mortuis*, ut loquitur Apostolus. Verùm quod multa eget consideratione; *Non nisi in tenebris est illa Claritas.* Cùm enim sit donum Dei eximium, præsupponit multos & insignes Fidei atque abnegati Iudicii actus. Sic inter alios passim & fusè S. Augustinus. *Priusquam mens nostra purgetur, debemus credere quod intelligere nondum valemus, quoniam verisimè dictum est per Prophetam:*

1. de Agone
Chr.

NISI CREDIDERITIS NON INTELLIGETIS. Itemque alibi. *Dicis, quomodo creditur si non capitur? imo ideo bene creditur quia non citò capitur: nam si cito caperetur non opus erat ut crederetur: sed credendo sis idoneus. ut capias, nam si non credideris, numquam capies, quia minus idoneus remanebis.* Et rursum; *Tantò quisque facilius aliquid proficiendo cognoscit quantò religiosius antequam cognosceret, Dea credidit.* Quod & planius explicans; *Credibulum, inquit, tria sunt genera: alia sunt quæ semper creduntur, & numquam intelliguntur, sicut historia temporalis: alia quæ mox ut creduntur, intelliguntur, sicut omnes rationes humana: tertium, quæ primo creduntur, & postea intelliguntur, qualia sunt ea quæ de diuinis rebus non possunt intelligi nisi ab his qui sunt mundo corde, quod sit præceptis seruatis quæ de bene viuendo accipiuntur.*

Tract. in
Ioan.
Contra ad-
uers. legis
& Proph.
In libro
ostoginta
primi quæst.

In quibus sancti Patris verbis tria sunt notanda. Primum, quod dicit, *capere, cognoscere, intelligere*, idem nobis esse debet ac Claritatis donum habere, quandoquidem hoc præcipue dono, Veritates Euangelicæ perfectius capiuntur, unde illustratur animus, vita, conuersatio, & quidquid inde ad alios manat. Secundum est, cum huius intelligentiæ & Claritatis plures sint gradus & alij aliis longè perfectiores; ab vno semper fit progressus ad alium, & hos perfectioris intelligentiæ gradus sic præcedit Fides, vt quo præcedens fides fuerit insignior in actibus suis, eò etiam donum intelligentiæ seu Claritatis erit insignius. Tertium denique obseruandum est, quod quantò magis per Fidem abnegatur & subiicitur intellectus, eò maior est fides: & quanto difficiliora creditu firmitus & absque vlla hæsitacione creduntur, tanto etiam magis abnegatur intellectus, vt pater in Abrahamo cuius fides præcipue commendatur quod *contra spem in spem credidit, & in re promissione Dei non hesitant diffidentia*, vt ait Apostolus. Rom. 4. Itane credis? Itane intellectum abnegas & in seruitutem Christi redigis? *Visio dura nuntiata est mihi*, ait Propheta: *qui incredulus est, infideliter agit.* Is. 21.

I L P V N C T V M.

SED illi actus fidei & abnegati intellectus non nisi in tenebris sunt. Id est, nec videntur ea quæ creduntur: nec videtur nec apparet humana ratio cur ita sint vt creduntur. Imo sæpe contrariæ & plane oppositæ sese offerunt rationes cur non ita sit vt Fides dicat. Ista autem rationis humanæ oppositio, cæcitas quædam est mentis & meræ tenebræ sunt, sicut si lumine solis aut vsu oculorum priuaretis. Sic ne videret Abrahamus quod sibi dictum fuerat de futura prole, occurrebant Rationes ab ætate centum annorum & à sterilitate coniugis, quæ miras in eius animo creabant tenebras. Nec propterea minor erat eius fides, imo & maior vt dictum est, cum sic eò magis intellectum captiuaret & Deo loquenti subiceret, quò minus videret id humano modo possibile & futurum quod credebat.

Sie plane nobiscum agitur, quamdiu peregrinamur à Domino, sic omnis nostra est fides in tenebris, in obscuritate mentis, *in captiuitate intellectus, in speculo, & in enigmate*, vt ait Apostolus. 1. Cor. 13.

stolus: & quotquot de fide scribunt Patres sic sentiunt, *Habet,*
 8. de Tri- inquit sanctus Hilarius, *non tam veniam quam meritum, ignorare*
 nitate. *quod credas.* Et sanctus Gregorius; *Diuina operatio, si ratione*
 Hom. 26. *comprehenditur non est admirabilis: nec fides habet meritum cui hu-*
 in Euang. *mana ratio prabet experimentum.* Et idcirco tam rara est fides,
 quia nolunt pati tenebras sine quibus nulla est fides quæ Deo
 placet. *O generatio incredula,* dicebat Christus Dominus, *quam-*
 Marci 9. *diu apud vos vero, quamdiu vos patiar?*

III. PUNCTVM.

ERGO in tenebris Claritas; Quia Claritas in Fide est, & fides
 2. Pet. 1. in tenebris, *Quasi lucerna lucens in caliginoso loco; donec dies*
elucescat. & lucifer oriatur in cordibus nostris, ut ait sanctus Pe-
 trus. Et certe, si ut vidimus, Claritas in præmium detur, neque
 præmium à Deo conferatur nisi merito proportionato & con-
 uenienti cum ipso præmio: quid conuenientius lumini, in
 ratione oppositionis, quàm tenebræ? quid magis debitum tene-
 bris, si tenebræ merentur aliquid, quam quod eis opponitur,
 lumen? sicut enim repulsa gratiarum lumina non aptius & fre-
 quentius puniuntur quàm damnosis illis tenebris de quibus dici-
 tur, *fiat via illorum tenebræ & lubricum:* sic prorsus fideles & pro-
 2. Ps. 34. batar tenebræ non alio conuenientiori modo compensari pos-
 2. Ps. 138. sunt quam spirituali Claritate & lumine, quo fit ut *sicut tenebræ*
eius, ita & lumen eius. Hoc fortasse denotatum & expressum fuit
 in illis duobus Prophetis qui resplendentes apparuerunt in mon-
 2. Marb. 17. te cum Transfigurato Domino: nempe illi duo præ aliis cum de-
 siderassent ardentius videre faciem Dei, dum viuerent: nec ali-
 2. Exodi 33. ter tamen vidissent quam in latebra, in caligine & in tenebris:
 3. Reg. 19. tùm vero viderunt Eum in tanta Claritate, quanta numquam se
 aliis videndum præbuit: ut sic eorum tenebras aperto lumine
 compensaret.

O quantum falleris, curiose perscrutator Diuinæ prouidentiae,
 cum causas quæris cur res aliter atq; aliter quàm putares aut vel-
 les, tibi eueniunt? Si tu altiora quæsieris & plura nosse appetas,
 2. Prom. 25. quàm permittat Deus, oppriméris à gloria, & in miserandam
 2. Ps. 17. obtenebresces cæcitatem: si vero diuinas illas tenebras quas in-
 habitare dicitur Deus, adoraueris & in quolibet aduerso casu
 libenter

libenter eas toleraris; tunc erumpet quasi mane lumen tuum, orietur in tenebris lux tua, & tenebrae tuae erunt sicut meridies: & requiem tibi dabit Dominus semper, & implebit splendoribus animam tuam. Sic cum Propheta & Apostolo quique fideles profitentur, quoniam Deus qui dixit de tenebris lucem splendescere, Ipse illi sit in 2. Cor. 4. cordibus nostris ad illuminationem scientiae Claritatis Dei in facie Christi Iesu.

Salubris porro est & his opportuna dictis Admonitio eiusdem Apostoli: Eratis aliquando tenebrae, nunc autem lux in Domino: ut filij lucis ambulate: Fructus enim lucis est in omni bonitate, & iustitia & veritate, probantes quid sit beneplacitum Deo. Ephes. 5.

Vide Verbo Fides sparium in singulis partibus: nominatim vero in 4. parte, Feria 2. 3. & 4. hebdomadae vicefimae; ubi de bonis tenebris.

*Ad Euangelium Feria, De nobilissima omnium
Apparitione Domini, facta in monte Galilaeae.
Matth. 28.*

VIDE Feriam 2. hebdomadae 4. post Pascha.



SABBATO.

DE PLAGIS IN CORPORE CHRISTI

RESERVATIS.

AD PERPETUAM MEMORIAM.

Quid sunt Plagae istae in medio manuum tuarum?

Zacch. 13.

Memoria memor ero, & tabescet in me Anima mea.

Thren. 3.

VERITAS PRACTICA.

In obliuione memoria.

SENSVS & RATIO est, quod Christi Redemptoris nostri memoria debet esse tam frequens & tam grata, quàm ipsum exigit Redemptionis beneficium.

Sed talem memoriam hoc beneficium exigit quæ sit in obliuione cæterarum mundi rerum, quibus occupari posset & impediri.

Ergo in obliuione memoria: siue à memoria Christi sequatur aliarum obliuio: seu potius ab illa obliuione perficiatur Christi memoria.

I. PUNCTVM.

Hebr. 2.



UAM verè Apostolus dixerit, Videmus Iesum propter passionem mortis, Gloria & honore coronatum; & quàm verè id præcipue dici possit de Plagis in eius glorioso Corpore reseruatis, iam supra visum est. Nunc vero has Sacratissimas Plagas repræsenta tibi acrius, & singulas intueri attentius; adora, venerare, & inquire humiliter quamobrem eas sibi Dominus reseruare voluerit. Quid sunt plagæ istæ in medio manuum tuarum?

Ps. 136.

Multæ quidem cogitari possent causæ, sed hæc in primis expendenda, quod sic indicare voluerit quàm studiosè vellet perpetuam Redemptionis nostræ memoriam à nobis recoli, cum & Ipse notas eius indelebiles in omnem æternitatem spectandas conseruaret. Dicamus ergo cum Propheta; Si oblitus fuero tui, Ierusalem! si oblitus fuero tui, Caluaria! si oblitus fuero tui, CHRISTE IESV, si tuæ Crucis, si tui pectoris, si tui pretij, & meæ per te Redemptionis: obliuioni detur dextera mea. Adhereat lingua mea faucibus meis, si non meminero tui, si non proposuero te in principio latitiæ meæ, in principio meditationis meæ, in principio conuersationis meæ, in principio cunctæ actionis meæ.

Verùm ut frequentior & gratior esse possit talis memoria, sic

necessaria est cæterarum rerum obliuio, vt in hac rerum obliuione, dici possit esse nostra Christi memoria: Et hanc quidem Veritatem allata Ratio ita probat, vt & illam rerum obliuionem simul persuadeat. Quid enim non persuadeat Redemptionis nostræ Beneficium in quo illa fundatur Ratio? Quis verò non videat talem ei recolendo deberi memoriam, qualem potest à nobis suo exigere merito, & sua conficere gratia? Nam si *Pater proprio Filio non pepercit, sed pro nobis omnibus tradidit illum & cum illo donauit omnia*: si Filius ipse pro nobis effusus est sicut aqua, nihil prorsus reseruans sanguinis: si denique Spiritus sanctus abundè nobis est datus vt possimus quod debemus, si *velimus*; quis tam impius qui nollet reddere quam tanto beneficio debet & potest memoriam? *Memoria memor ero, & tabescet in me anima mea*, Id est, totum me exhauriam, totum me dabo in illa memoria quam debeo, conseruanda. *Memento verbi.*

II. PUNCTVM.

ATQVI hoc Beneficium talem memoriam exigit qua sit in obliuione cæterarum mundi rerum, quibus occupari & impediri posset.

Primo enim exigit vt nobis & mundo mortui, sicut ipse Christus pro nobis mortuus, soli Deo viuamus; vt qui viuunt, *inquit, iam non sibi viuunt sed ei qui pro ipsis mortuus est, & resurrexit*. Talis autem mors; nonne rerum omnium obliuionem inducit & includit? Deinde vero talem exigit memoriam quæ sit ita frequens & grata, vt gratitudinem omnem Christo Redemptori testetur & proferat, quo Ipsè loco & tempore, potissimum velit à nobis proferri; *Mementote sermonis mei*. At nisi deponamus ex animo, cæterarum rerum memoriam, occurrent & occupabunt mentem, quo illo tempore, sui nos meminisse vellet Christus: *Quia oblita es Dei Saluatoris tui*. Denique tam ardentem simul cum memoria voluntatem à nobis exigit, vt non modò Eius recordemur, sed affectu moueamur, in recordatione tantæ Charitatis quam exhibuit, nos redimendo, & quam continuat, redemptionis nostræ diuersos effectus per singula vitæ momenta conferendo. *Fili, tu semper mecum es, & omnia mea tua sunt*. Nisi vero cætera obliuiscamur, affectum nostrum sic diuident & secum rapient, vt vix vllus restet sensus recolendo

H. 12.

& diligendo Christo. *Coangustatum est enim stratum, ita ut alter decidat: & pallium breue virumque operire non potest.*

Ah Domine Iesu, quomodo possum tui obliuisci, qui mei dignaris sic continuò recordari? aut quomodo possum sic tui meminisse, ut cætera quæque obliuiscar? Quomodo sic obliuisci omnium, ut tui solius meminerim?

Fili, *diligis me plus his?* Nolo aliam mei memoriam quàm quæ est ex vera dilectione. Qui verè diligit, sic Dilecti meminit, nullis ut aliis rebus memoria retardetur. Cuius vero memoria nullis aliis rebus retardatur, quin Dilecti meminerit, satis superque dicendus est aliorum obliuisci. Sic Scriptum de Leuitis, *qui dixit patri suo & matri suæ: nescio vos; & fratribus suis, & nescierunt filios suos; hi custodierunt eloquium tuum, & pactum tuum seruauerunt.* Si dictum sponsæ: *obliuiscere populum tuum, & domum patris tui.* Sic denique Apostolus: *qua retro sunt obliuiscens*, quantum scilicet ei obuiabant & eum impediabant ne se ad priora extenderet. Nonne tu sic posses obliuisci?

Deut. 33.

2f. 44.

Phil. 3.

III. PUNCTVM.

SIC ergo est in obliuione Memoria, quam de Christo conseruare debemus; ut si quid obstat quò minus frequentissimè, & studiosum de illo cogitemus & loquamur, totum illud plane abiciamus, & perinde reputemus atque illa quæ obliuioni mandamus; Sicut de se ait Deus: *Obliuione obliuiscar eorum.* Nullius rei memoriam potest Deus abiicere, dicitur tamen illa obliuisci, à quibus id retrahit quod contulisset. Sic dicuntur ingrati obliuisci Benefactorum, quando id non præstant quod gratitudo exigit, licet meminerint personæ & nominis cui se debere fatentur; sic de his Sapiens; *Repromissorem fugit peccator & immundus: Bona Repromissoris sibi adscribit peccator, & ingratus sensu derelinquit liberantem se.*

osce L

Ecclesi. 19.

Sicut itaque sufficiens erit rerum obliuio, si nulla res à recogitando sæpe & opportunè Christo te auocet; sic prorsus si quid impedit, si quid magis mentem tuam occupat quàm Christus tuus; tunc non rerum sed Christi obliuisceris. Alterutrius necessario capienda est obliuio, vel rei quæ memoriam Christi exturbat; vel Christi, cuius memoria cedit illi obiecto quod præualeat. Itane

vero Christi obliuiscaris, & magis memores nescio quid, quod vel est malum vel bonum? si malum, qualem Christo facis iniuriam, cui quod est malum anteponis? Quod si est bonum: à quo tandem est illud bonum, nisi à Christo? Quam verò reddit gratiam si beneficium Benefactori praefers? Ex omnibus vero datis bonis, seu collatis beneficiis, cum illud sit excellentius quo nos redemit suo Sanguine, velitque crebrius illud à nobis frequentari; cedant cætera quantum necesse est, ne quæ insignior est gratia cedat aliis.

Gratiam fideiussoris ne obliuiscaris: dedit enim pro te animam suam. Ibid.
O quale donum! ô qualem exigit memoriam, si dono deber respondere memoria! Estne aliquid Animâ Christi pro te datâ melius & pretiosius? *Memento mei cum bene tibi fuerit, dicebat Gen. 40.* Ioseph Concaptiuo suo liberando, & in pristinum gradum reuocando. Et tamen *succedentibus prosperis oblitus est Interpretis sui.* Nonne sic mundi prospera te à Christo auertunt? At saltem illum imitare Ægyptium qui demum Iosephi reminiscens ait, *Confiteor peccatum meum.* Sic confitere nimiam ingratitudinem *Ibid. 41.* tuam; & expauesce ad id quod de belluis scribit S. Ambrosius: *illa impertita alimonia seruant memoriam; tu non seruas salutis L. 6. He- accepta. nam. c. 4.*

Vide in 3. parte, Dominicam 13. de vera Gratitude.

Ad Euangelium FERIA, De Petro & Ioanne currentibus ad sepulchrum. Ioan. 20.

DE his agitur FERIA 6. hebdomadæ 1. post Pascha.



DOMINICA IN ALBIS

QVÆ EST

PRIMA POST PASCHA.

DE IISDEM CHRISTI DOMINI
PLAGIS.

AD REMEDIUM INFIRMITATVM
NOSTRARVM RESERVATIS.

*Infer digitum tuum huc, & vide manus meas; &
affer manum tuam, & mitte in latus meum;
& noli esse incredulus, sed fidelis. Ioan. 20.*

VERITAS PRACTICA.

In Plagis sanitas.


*SENSVS est, quod presentissimum cuiuscunque tentationis &
infirmi- tatis remedium, sit in Plagis Christi.*

*RATIO est, quia Remedium tentationis & cuiuslibet infirmitatis
spiritualis eò est efficacius quò Imaginationem & appetitum
seu affectum nostrum cohibere suavius & fortius simul potest.*

Sed talis est Consideratio seu Representatio Plagarum Christi.

*Ergo & est remedium presentissimum seu efficacissimum; atque
illius usurpandi facilitas est comparanda.*

I. P V N C T V M.



VÆ de Apparitione Christi Domini facta coram Apostolis, præsentè Thoma, ex hodierno Evangelio considerari possent, habentur infra, Feriâ tertiâ Dominicæ tertiæ; quibus tantisper consideratis, referendæ sunt Christo gratiæ, quod præsentissimum malis nostris remedium prouiderit in plagis suis; Sic enim sapientissimè prouisum est, vt ad eum tantò libentius & frequentius recurreremus, illique vniremur, quo periculosiùs tentatione vel perturbatione aliqua premeremur. O quàm prouide dixerat, *Venite ad me omnes qui laboratis & onerati estis, & ego reficiam vos!* Matth. ii. Quomodò vero id fiat, expende diligenter.

Ac primò quidem paucis, quid sit laborare, onerari, seu tentari, & turbari. Deinde quàm sit obnoxia vita humana miseriis & tentationibus; Tertiò vel in hoc maxime, tentationis esse malum quod per Imaginationem & appetitum, voluntatem illicitat ad peccatum, nisi remedium quantocyus afferatur. Quartò denique quod expendas accuratius, illud remedium esse efficacius quod imaginationem seu appetitum nostrum cohibere suauius ac fortius simul possit. Cum enim, vt dictum est, potissima vis tentationis in imaginatione & appetitu naturali consistat, illud certe remedium erit opportunius quod tali malo directius opponetur & occurret. Et vero simul forte sit & suaue remedium necesse est, nam cum imaginatio sit tenacissima specierum seu imaginum quæ sunt instrumenta tentationis, sic fortiter auertenda est ab illis speciebus, vt tamen suauiter auertatur, nec vllò modo lædatur, vt contingit sæpius quando nimis constringitur. Rectè enim Sapiens, *Fili, in mansuetudine serua animam tuam.* Ecclesi. 10. Rursumque Idem; *Vir peritus, anima sua suavis est.* Ibid. 37. Atque ad 1. Cor. 9. hæc Apostoli verba: *castigo corpus meum & in seruitutem redigo,* sic aptè sanctus Chrysostomus, *Non dixit, perdo & punio, non enim inimica caro est, sed castigo & redigo in seruitutem, quod Domini est non hostis, magistri non inimici, Exercitatoris non aduersarij.* O SAPIENTIA quæ attingis à fine vsque ad finem fortiter Sap. 8. & disponis omnia suauiter, veni ad docendum nos viam prudentiæ, & hanc Diuinam salutis scientiam.

II. PUNCTVM.

SED talis est Consideratio plagarum Christi, ut fortiter & suauiter Imaginationem auertat à nefandis speciebus.

Nihil est enim quod Imaginatio concipiat facilius quam plagas seu vulnera, quæ quam sui reddunt imaginem & repræsentationem, eò reddunt faciliorem quò Persona vulnerata, magis dilecta est, & quò vulnus est patentiùs & acerbius; quæ cum omnia reperiantur in Christo Domino, certè Imaginatio minimè laborabit in eius Imagine sibi formanda. *Asspiciunt ad me quem confixerunt.* Adde quòd Gratia tùm opportune concurrir; nam si Dæmon in insidiis est, ut dum occurrit obiectum aliquod quo concupiscentia excitari possit, ipse *halitu suo prunas ardere faciat*, ut est in libro Iob; quantò magis id sperandum de Gratia seu bonitate Dei, qui expressè ait. *In tempore accepto exaudi te, & in die salutis adiuni te?*

Hanc certe inter alias causam cur Deus humanam carnem assumpserit, reddunt Sancti Patres: ut sic facilius conciperetur animo Deus & aliqua eius Imago formaretur, cùm alioquin si semper Inuisibilis & incorporeus permāisset, vix de Illo cogitare homines potuissent. *Cogitationi hominis non est Diuinum simile.* Fuit itque humanitas Christi velut nubes obumbrans Diuinitatis solem, quo sol ille commodius cerneretur; *Dominus dixit ut inhabitaret in nebula;* Fuit velut plumbum quod crystallo speculari subijcitur, ut speculum reddat Imaginem quam alioquin non posset reddere: *Speculum sine macula Dei maiestatis, & Imago bonitatis illius.*

Cùm verò etiam plagarum species ad ipsam humanam Christi carnem aliquid addat, quod facilius concipi possit, quis non videt quod talis sit earum consideratio seu Repræsentatio qualis desideratur ad remedium cohibendæ Imaginationis & appetitus naturalis: ut quod ait sanctus Bernardus, *carnis exturbet vitia, fuget illecebras, desideria sedet.* Sicut enim clauus clauo pellitur, Ita plane Imago seu imaginatio peruersa depellitur, alia succurrente & animum occupante. Et sicut aspectu serpentis ænei quem Moyses idcirco iubente Domino exaltauit, sanabantur illi qui à serpentibus igneis correpti fuerant, sic planè speranda

randa est salus salutari Eius aspectu qui dixit, *sicut exaltauit* ^{Ioan. 3.}
Moyfes serpentem ita exaltari oportet filium hominis ut omnis qui
credit in ipsum non pereat, sed habeat vitam aeternam. Credo ^{Marci 9.}
Domine, adiuna incredulitatem meam.

III. PUNCTVM.

IN plagis ergo sanitas, in quibus concurrunt ea omnia quæ ad
 infirmitatum quarumlibet spiritualium remedia, non minus ^{Osce 6:}
 luauia quam efficacia valere possunt. *Quia ipse capit, & sana-* ^{In Mari}
bit nos. Sic Sancti Patres quos inter sanctus Augustinus, *In* ^{c. 32.}
omnibus rebus non inueni tam efficax remedium quàm vulnera Chri-
sti: in illis dormio securus, & reuiuisco intrepidus. Sanctus item
 Ambrosius: *vulnus est quod Christus excepit, sed videntur est quod*
effudit. Sanctus quoque Bernardus ad hæc Canonicorum verba:
Surge amica mea & veni Columba mea in foraminibus petra: ET ^{Cant. 2:}
reuera, inquit, *ubi tuta firmaque infirmis securitas & requies nisi* ^{Serm. 61.}
in vulneribus Saluatoris? Fremit mundus, Premit corpus, Diabolus
insidiatur: non cado, firmatus enim sunt supra firmam petram. Quid
tam ad mortem quod non Christi morte saluetur? Si ergo in mentem
venerit tam potens tamque efficax medicamentum, nulla iam pos-
sum morbi malignitate terreri. Foderunt manus eius & pedes, latif-
que lancea forauerunt, & per has rimas licet mihi sugere mel de
petra, oleumque de saxo durissimo.

His adiunge Diuinum authorem libri de Imitatione Christi.
Requiesce in passione Christi, & in Sacris vulneribus eius libenter ha- ^{L. 2. c. 11.}
bita. Si enim ad vulnera & pretiosa stigmata Iesu deuotè confugis,
magnam in tribulatione confortationem senties, nec multum curabis
hominum despectiones faciliusque verba detrahentia perferes. Si se-
mel perfectè introisses in interiora Iesu, & modicum de ardenti
amore eius sapuisses, tunc de proprio commodo vel incommodo nihil
curares, sed magis de opprobrio illato gauderes, quia amor Iesu facit
hominem seipsum contemnere. O quàm pauci amant Iesum, cùm
pauci seipsum contemnant.

DE IISDEM RVRSVS PLAGIS.

AD HÆC PROPHETÆ VERBA.

2. Pars.

PPP

482 Dominica in Albis, quæ est 1. post Pascha. Haurietis, &c.

Haurietis aquas in gaudio de fontibus Saluatoris.

If. 12.

ID EST, de quinque Christi plagis, quæ sunt veluti quinque fontes qui è terrestri paradyso quondam erumpebant, *in universam terram faciem*; Erant enim quatuor memorata in Genesi flumina, & *fons ascendens è terra*, ut ibidem describitur.

Gen. 2.

Non est autem dubium quin sanctus Thomas Apostolus attactu plagarum Domini, mysticas illas hauserit aquas in gaudio de sacris fontibus Saluatoris: Sed cum simul etiam de peccato suo perfecte contritus fuerit, mirum forte videri posset, quomodo tantus dolor qualis est eius qui perfecte contritus est, convenire possit cum tali gaudio, quod ex illis haustis aquis percipitur.

Verum tam præclare simul conveniunt duo illi affectus gaudij & doloris, ut quod est dolor vehementior, eò sit majus gaudium. Atque ut prouocemur ad illum dolorem cum Diuina Gratia tam libenter suscipiendum quàm ipsum gaudium, hæc opportune potest proponi Veritas quæ diligenter expendatur:

Quanto est de peccato major tristitia, tanto est Peccatoris majus gaudium de fontibus Saluatoris.

RATIO est, quia quanto profusius hauriuntur illæ aquæ, tanto majus est gaudium. Clara est propositio.

Sed quanto major est de peccato tristitia, tanto profusius hauriuntur illæ aquæ. Satis euidenter erit Conclusio, si vera est hæc propositio: Vnde hoc vnum superest declarare quam sit vera. Sic autem breuiter indicatur, aperiendo quinos fontes seu quinque præcipua capita, vnde ex consideratione plagarum Christi, tanto profusius hauriuntur aquæ in gaudio, quanto maior est de peccato dolor.

L. 3. de
Imis. Chr.
c. 10.

P R I M V S fons est Bonitatis qua sic Christus nos diligit, ut quas semel amore nostri plagas accepit, semper conseruare velit. *O fons amoris perpetui, quid dicam de te?* Quas vero aquas effundat ille fons, affectus sunt amoris reciproci, quis enim non eum diligat à quo se videt sic diligi? & tanto certe profusius hauriuntur illæ aquæ, quanto quis vehementius se sentit diligi & diligere.

Iam verò quis hoc vtrumque apertius sentire potest quàm qui vehementius de peccato dolet? Sic enim hic dolor ex amore

Quanto est peccato maior tristitia, tanto est maius, &c. 483

nascitur vt ex dolore etiam amor crescat, & sicut quanto quis magis amat, tanto magis dolet, sic vicissim quanto magis dolet, tanto amat etiam vehementius. *Dilexit multum*, inquit Dominus *Luc. 7.* de illa quæ multum doluit, & de qua illud Sapientis dici potest: *in aqua quæ omnia extinguit, plus ignis valuit*: At quid inde retulit *Sap. 7.* nisi pacem & gaudium? *Vade*, inquit, *in pace*, fruiere gaudio, tanto maiori, quanto profusus amoris aquas hauris, vnde est illud gaudium. Sic dicebat Apostolus, *sicut abundant passionibus Christi* *1. Cor. 1.* *in nobis, ita & per Christum abundat consolatio nostra*. Vide in 3. parte, Feriam 4. hebdomadæ 7.

SECUNDVS fons est Misericordiæ & Redemptionis, cum ex aspectu plagarum Christi, velut ex percussa petra defluunt illæ aquæ quibus indurati mollescant ad bene sperandum animi. Quis enim non bene speret vbi tale est patrocinium? Et quanto quis magis sperat de tali misericordia, tanto certe profusus illas haurit aquas. *Bona spei fecisti filios tuos*, aiebat Sapiens. *Sap. 12.*

At quis est qui magis speret quam qui magis dolet? Cum enim vera spes requirat ex parte nostra dolorem illum, quid potest ad spem desiderari amplius quando ille adest dolor? Vnde ex consequenti quis magis gaudeat, quis in maiori gaudio de fontibus Saluatoris aquas hauriat, quam qui magis de peccato dolet? *Spe gaudentes* ait Apostolus, primo quidem illa spe quæ *Rom. 7.* speratur peccati remissi gratia, tum quæ speratur gloria.

TERTIVS fons est Largitatis, ex quo additur ad præcedentem, vt non solum peccata Saluator dimittat, sed & nouas impertiat gratias, quibus peccator surgat velocius & ambulet firmitus in diuinis mandatis: Quæ quidem Largitas apparet in plagatis manibus non tantum quia sic apertæ indicant se nihil donorum retinere posse, se nihil continere quod non effundant, sicque *tornatiles* dictæ sunt quod nihil supra possit residere: sed *Cant. 9.* multo magis id apparet, quod in illis retentis plagis manifeste aperiat quàm sit profusus & munificus, cū longe plura fecerit ad salutem nostram quàm possent exigi. Satis erat Misericordiæ dum corpus viueret, aut dum in cruce staret mortuum, plagas accepisse: sed non est satis Largitati Saluatoris: Nam Sacras illas Plagas etiam dum resurgit & quamdiu viuet, vult reseruare; vt numquam non constet quàm sit bene animatus in omnes qui se sibi addixerint.

O profusam largitatem, quis non tali obsequatur Domino; quis non tali gaudeat in obsequio, & tanto magis gaudeat, quanto eum in se liberaliorem sentiat!

Rom. 5.

At quis id verius sentiat quàm qui acerbius de peccato dolet? cùm enim sit donorum optimum sic de peccato dolere, cumque hoc dono se tanto indignum peccator videat quanto acerbius dolet se peccasse, profecto non potest sic dolere quin simul sentiat quantum debeat tantæ Beneficiæ, & quin ex æquo gaudeat se talem habere Dominum, qui non modo non punit delinquentem, sed *ubi abundavit delictum, super abundare facit & gratiâ.*

Q V A R T V S fons est Pietatis, vnde Deuotionis hauriuntur aquæ. Mirum enim quantum hîc acquiescat Deuotio considerantis tantam Bonitatem, tantam Misericordiam, tantamque Largitatem & Benignitatem quæ apparet ex illis plagis.

2. Reg. 24.

Et quantum quidem crescit Deuotio, tanto profusius dici possunt illæ hauriri aquæ, quæ nihil aliud verè sunt quam isti deuotionis & pietatis affectus. At quæso te, quinam sunt pietatis solidiores affectus nisi qui conjunctum habent de peccatis dolorem? nonne alij omnes suspecti sunt? nonne alij ex amore proprio, vel Dæmone illudente formari possunt? Solius autem Christi gratiâ verus de peccatis dolor haberi possit? *Ego sum qui peccaui, ego inique egi. Vertatur obsecro manus tua contra me.*

Hæc est vera Deuotio Sacras intuentis plagas, hæc est vera profusio sacras inde haurientis aquas. Ac proinde hoc est verius & majus gaudium quo de fontibus Saluatoris salutare aquæ potentur.

Q V I N T V S fons est potentiæ seu firmitatis vnde illæ hauriuntur aquæ quibus additur menti vigor & robur contra omnes hostes, vt supra dictum est. Et tanto manifestè profusius illæ aquæ hauriuntur, quanto sentitur firmitus illud robur, atque animus imperturbatus in quouis casu. Sicut autem peccatori seu peccatum fouenti suum, parùm prodesset se in Christi plagas abdere cùm per peccatum hosti ansam præberet; sic plane si quis deponat peccatum, sicut verè is deponit qui de peccato dolet, ita se fortem & robustum sentit dum in Christi vulneribus delitescit, vt si totus eò Infernus erumperet, toti vnus Inferno resisteret. Ac proinde si quod de protectione Christi sentitur gaudium, vt certe sentitur magnum, tanto illud erit majus, quanto

Quanto est de peccato maior tristitia, tanto est maior, &c. 485

erit maior de peccato tristitia, quia eo deleto nil restat quod protectionem diuinam possit infirmare. Huc enim aptè referri potest quod dicebat Achior Holoferni, de Iudæis, *quotiescumque Iudæi. 5. penituerunt se recessisse à cultura Dei sui, dedit eis Deus cæli, Virtutem resistendi.*

Quantum itaque participare volueris de illo gaudio, quo de fontibus Saluatoris, salutes hauriuntur aquæ, tantò te cuiusvis peccati magis poeniteat, & reddetur tibi lætitia salutaris Dei, & Ps. 50. *spiritu principali confirmaberis.*

Vide in 1. parte, die 21. Decembris, vbi plura de sancto Thoma, & de Euangelio hodierno, quæ huc commodè referri possunt; sicut & quæ passim de Fide & de pace, ac in primis, occasione pacis à Christo datæ, cum acceptas monstraret plagas, hæc satis opportuna videtur.

Pax in pugna.

In 3. parte, Feria 4. hebdomada decima.

AD verba vero Epistolæ, quæ hoc ipso Die legitur:

Hæc est Victoria qua vincit mundum, fides nostra. 1. Ioan. 5.

Considerari potest hæc

VERITAS PRACTICA.

Quanta olim erat fidelium gloria, mundum vincere; tanta modò est Ignominia, vinci à mundo.

RATIO petitur à fortitudine vel debilitate mundi de quo si dici potest quod quàm olim fortis erat, tam modo est debilis, verè etiam dici potest, quod quanta olim erat fidelium gloria, mundum vincere: tanta est modo ignominia, vinci à mundo.

Sed verum est dicere quod quàm olim mundus erat fortis, tam modo est debilis.

Ergo & verè sequitur quod quanta olim erat fidelium gloria mundum vincere: tanta modo est ignominia, vinci à mundo. Quod certe diligenter esset aduertendum & cauendum.

AD primam propositionem, explanari primo debet quid sit mundum vincere, vel ab eo vinci. Nempe in negotio fidei, religionis, castitatis, aut alicuius virtutis, à mundo expugnatae, si non obstante quavis expugnatione, virtus seruetur, vincitur mundus: si vero virtus cedat vitio, tunc mundus vincit. Deinde vero exponendum esset, quod ille ipse mundus qui olim fidem & religionem expugnabat, modo etiam illam impugnet, & nobis modò cum ipso sic est decertandum quòtidie, vt vincamus vel vincamur: vel virtuti vitium, vel virtus cedat vitio. Denique quàm verum illud sit, quod si modo mundus tam est debilis, quàm olim erat fortis, tanta est ignominia nunc ab eo vinci, quanta olim erat eum vincere, gloria; Nam oppositorum eadem est ratio, si gloria victori est quod fortiozem vincat, ignominia victi est quod à debiliore vincatur: Et quanta est illius gloria, tanta est istius ignominia, si præcipue quanta est hostis deuicti fortitudo, tanta fuerit vincētis debilitas? Si Daudi puero gloriosum fuit in funda & lapide Gygantem illum prosternere, qui omni ex parte videbatur eo superior, nonne huic tam ignominiosum fuit sic prosterni? Quid Samsonis victorias illustriores reddidit nisi quod ille vnus vna mandibula asini, mille viros interfecit? Quid verò ad eius ignominiam turpius quam quod ille ipse Samson ab vna Dalila vinceretur? Hoc sensit ille Abimelech qui cum multos gloriosè contriuisset, tum ab vna percussus muliere, suo se exposuit occidendum armigero, *Ne dicatur, inquit, quod à fœmina interfectus sum.* O si à carne sic vinci timeremus?

Ad secundam vero propositionem, late pateret dicendū campus de antiquis Persecutoribus fidei, quàm varij fuerint, quàm crudeles, quàm omni modo fortes ad expugnandos quosque fideles, qui tamen ex omni sexu, & ætate fideles sæuientem in se totum mundum deuicerunt, vt præclare sanctus Cyprianus ad ipsos Martyres & Confessores sermonem dirigens: *Tolerastis usque ad consummationem gloria durissimam questionem: nec cessistis suppliciis, sed vobis potius supplicia cesserunt. Finem doloribus quem tormenta non dabant, corona dederunt. Laniena grauior ad hoc diu perseuerauit, non vt stantem fidem dejiceret, sed vt homines Dei ad Deum velocius mitteret: Vidit admirans præsentium multitudo cæleste certamen, certamen Dei, certamen spiritale, prælium Christi;*

stetisse seruos eius voce libera, mente incorrupta, virtute diuina, telis secularibus nudos sed armis fidei ardentis armatos. Steterunt tori torquentibus fortiores, & pulsantes ac laniantes ungulas pulsata ac laniata membra vicerunt. Inexpugnabilem fidem superare non potuit sauiens diu plaga repetita, quamuis rupta compage viscerum, torquerentur in seruis Dei iam non membra sed vulnera.

Sic alij passim Patres & Sacri Hystorici ex quibus satis patet quàm olim esset fortis mundus qui fidem & fideles expugnabat. Quod Christus Dominus vno verbo manifestè declarauit cum dixit suis, *tamquam oues in medio luporum à se mitti*. Videſne, Matth. 10. quantis partibus si de pugnando agitur, lupo oue sit fortior? sic erat mundus supra fideles; sic fideles à mundo velut oues à lupis discerpebantur.

N V N C vero quàm sit debilis ille ipse mundus, qui vel fidem subſannat, vel pietatem irridet, vel quocumq; modo te ad se allicit, vt te ſuis potius conformet dictis & factis, quàm Euangelicis conſiliis; tam facile est agnoſcere, quàm in promptu eſt experiri nihil aliud prorsus eſſe quàm vnus aut alterius ridiculum verbum in te prolatum. Nullæ hic carniſicinæ, nullæ tormentorum comminationes, nulla hic exilia, nulli carceres, nulla ne quidem bonorum publicatio, vel iactura. Dic quid times à mundo qui times mundum? Quid tandem in te ſauiet, quid minatur, quid nocebit? Minus, inquis, bene de te ſentiet & loquetur; Hoc vnum ſcilicet in te poteſt, hoc te vno tecum pugnat, hoc te vno terret, hoc te vno vincit. Hic eſt iam mundus cum quo pugnamus, nempe Illud *minus bene ſentiri & dici de nobis*. Itane vero hoc ſolum? Itane vero ſolum hoc quàm ſit debile, quàm ſit infirmum, quàm ſit nullum, non videas?

Primò enim forte falſum eſt quod tibi fingis, falſum eſt quod de te homines minus bene ſentiāt, mera eſt animi tui ſictio & ſuſpicio, nocturnus eſt timor, & vana mētis conturbatio. Sed eſto, vt dicis, minus benè de te ſentient; quid tandem illud *minus bene?* quid graue admodum & truculentum in illo minus bono de te ſenſu? An forte infamiam contrahis? an de honore decedit aliquid apud quos ſuis bene ſentientes! an de aliquo dignitatis gradu deſiceris? an tibi peribit aliquid? nihil plane. Quid tandem igitur mali aut quid minus boni in illo minus bono de te ſenſu?

Et demus sanè aliquid esse incommodi quandoquidem ita sentis: Sed quale illud tandem, quam exiguum & quam nullum præ tormentis illis quæ Fideles olim premebant & diuexabant. Confer illud incommodum tuum cum sævientibus belluis, cum catastis, cum rotis aculeatis, cum ignitis cratibus, & sexentis tormentorum generibus quibus fides Christianorum tentabatur; nonne erubescas in illa tui damni si quod sit, temporalis contentione facta cum illis tam variis & tam diris suppliciis? Nonne agnosces tam debilem nunc esse mundum ut tibi verè noceat, quam olim erat potens ad omnem inferendam iniuriam? Et tamen illi mundo cedis! illi tam debili, tam infirmo te subjicis quem pueri & puellæ tam robustum & potentem deuicerunt! Tu à prima ætate imbutus præceptis Christianis, tu tot præuentus Gratiis, tot Sacramentis roboratus, tot munitus consiliis, tot instructus armis, expauescis ad metum vnius verbuli! O pudorem! ô probrum! ô vecordiam!

HINC ergo euidenter patet quod quanta olim erat fidelium gloria, mundum vincere: tanta modo est ignominia, vinci à mundo; quia quàm olim erat mundus fortis ad pugnam & victoriam, tam modo est fractus & debilis, à quo certe sic vinci non minus est ignominiosum, quàm olim esset gloriosum contra eius potentiam pugnare & vincere. *Gloriosi mei ad ignominiam!* Quæ in vulgatis legimus, *filij hominum vsquequo graui corde, ut quid diligitis vanitatem, & quaritis mendacium?* sic Hebræa reddunt, *Filij viri, vsquequò gloriosi mei ad ignominiam, diligentes vanitatem quaritis mendacium?* quasi dicerent, vos qui estis eorum filij & posterij qui tam præclare & gloriose se gesserunt in expugnanda & vincenda mundi potentia, quomodo nunc eius vanitati tam ignominiosè ceditis, ut cum pro Veritate quam profitemini, perdenda essent terrena omnia, vos cœlestia potius omnia perditis pro vanitate & mendacio quod consecramini. Hæc est certe tanta ignominia, quanta fuisset gloria si quales viros decet, generosius pugnassetis.

Ser. I. de
Martyr.

Et ne forte pures maiorem olim fuisse gratiam quâ fideles certarent & vincerent, audi sanctum Chrysostomum: *Habes Christiane competentia arma quibus hostem expugnes: habes fortissima tela quibus inimicum debelles. Quantam illi patientiam in perituris corporibus*

Quanta olim erat fidelium gloria, mundum vincere, &c. 489

corporibus ostenderunt, tantam nos in passionibus irrationabilibus continentiam demonstramus. Potens autem est Deus ut præstet vos omnes per eandem fidem, ad parem gloriam peruenire. Hom. 44.
de 7. Alach.

Paulo expressius verò contra hanc ignauiam quæ mundo cedit sanctus Ambrosius differens: Equidem doleo, inquit, tantam esse in mendacio obseruantiam, in veritate negligentiam, ut confundantur plerique attentiores ad Sacro-sanctam religionem videri, non considerantes vocem dicentis, qui me confusus fuerit, coram hominibus, confundam & ego eum coram Patre meo qui in cælis est. Et quæ plura prosequitur. Ep. 30. ad
Sabin.

Egregius vero est in hoc argumento Picus Mirandulanus, Epistola secunda ad Nepotē, unde excerpta hæc nonnulla sunt, contra mundum siue mundanos qui bonos à bono auocant. A quibus, inquit, si petas quò tendant, quò sua studia, opera, curas referant, quem deniq; finem sibi præstituerint, in cuius ademptione fœlices futuri sint; aut nihil omnino habebunt quod respondeāt, aut pugnantia secum, controuersaque sibi ipsis verba, velut phanaticorum deliramenta loquentur. Neque enim sciunt ipsimet quid agant: sed more eorum qui fluminibus innatant malè importata consuetudinis vi, quasi torrentis impetu feruntur, & hinc cacante eos nequitia, inde ad malum Satana excitulante, ruunt præcipites in omne facinus, caci duces cecorum, donec improuisa eos occupet mors, & dicatur eis: Amice, hac nocte repetunt animam tuam à te. Hæc autem quæ parasti, cuius erunt? Tunc his inuident quos despexerunt, laudant quos deriserunt, & imitari eos velent cum non possunt, quos dum poterant sequi, persequi maluerunt.

Obde igitur, fili carissime, auribus ceras, & quidquid dixerint, quidquid senserint homines de te, pro nihilo habens, solum iudicium Dei specta qui reddet unicuique secundum opera sua. Scriptum est, nolite timere qui corpus possunt occidere, sed qui animam potest mittere in gehennam: Quanto minus hi tibi timendi sunt qui nec corpori tuo possunt nocere, nec animæ. qui si nunc tibi detrahunt ex ratione viuendi, nihil detrahent minus, si relicta virtute, vitiis obruaris, non quia illis vitium displicet, sed quia detrahendi vitium illis semper placet. Si insanos eos esse non dubitas qui virtuti detrahunt tuæ, & Christianam vitam, hoc est sapientiam, insaniam vocant, cogita quanta tua esset insania, de insanorum iudicio à recto vitæ instituto dimoueri, cum error omnis, emendatione tollendus, non imitatione

490 *Dominica in Albis, 1. post Pascha. Hæc est Victoria, &c.*

augendus est. De illorum nequitia atque miseria quantum ipse debens Deo, perpende qui sedentem in umbra mortis illuminavit, & de illorum catu translatus qui in densissimis tenebris denique, huc illuc sine luce bacchantur, filiis lucis associavit. Sonet vox illa Domini suavissima in auribus tuis semper; huc mortuos sepelire mortuos suos, tu me sequere. Si bene viventem te homines laudent, porro hæc virtus tua, quatenus quidem virtus est, similem te Christo facit, sed quatenus laudata est, facit dissimilem, qui premium suæ virtutis ab hominibus mortem crucis accepit.

15. 50.

Hæc Ille & multò plura, quibus hoc vnum ad praxim pugnæ inferendæ, & referendæ victoriæ, potest addi ex Propheta, quod sæpe iam aliàs est propositum: *Dominus Deus auxiliator meus, ideo non sum confusus: ideo posui faciem meam ut Petram durissimam, & scio quoniam non confundar: Iuxta est qui iustificat me quis contradicet mihi? Stemus simul, quis est adversarius meus? accedat ad me. Ecce Dominus meus auxiliator meus, quis est qui condemnet me? Quasi diceret, quisquis ille sit, contemnendus est, nec audiendus: Et quidquid tandem producat ad me impugnandum, hoc vno retundetur quod mecum est Christus, siue ad exemplum quod sequar, siue ad auxilium quod me præueniat & sequatur.*

Vide in 1. parte Dominicam secundam Aduentus, & Feriam 4. infra hebdomadam sextam post Epiphaniam: In 2. parte Feriam sextam infra hebdomadam primam Quadragesimæ: & Sabbatum infra eiusdem hebdomadam quartam. In 3. parte Feriam sextam infra hebdomadam secundam post octauam Pentecostes. Ibidemque totam hebdomadam duodecimam, ac præcipuè in postremis Feriis.

E O D E M D I E.

AD HÆC VERBA QUÆ EX SANCTO PETRO
VSURPAT ECCLESIA.

*Quasi modo geniti infantes, rationabiles sine dolo, lac
concupiscite. 1. Pet. 2.*

VERITAS PRACTICA.

Infantes esse oportet, vel bonâ vel malâ infantia.

*RATIO est quia Temperantes esse oportet, vel Intemperantes.
Sed bona vel mala Infantia sumus Infantes, prout temperantes
vel intemperantes erimus.*

*Ergo infantes esse oportet vel bona vel mala infantia : seu potius
ne infantes simus mala infantia, oportet esse bonâ infantes.*

RÆMITTI posset quamobrem in hac Dominica fiat Infantium mentio, propter Neophytos scilicet, siue recter baptisatos, qui acceptam in baptismo vestem albam hac die commutabant, ita tamen vt candor qui de habitu deponebatur, semper in corde teneretur. Ex hac autem occasione inuitamur omnes ad spiritualem infantiam, hoc vel maxime tempore procurandam; Quo nomine ne quis forte offenda-
tur, quasi à viri grauitate degeneret: Veritate proposita edocemur tam necessariam esse spiritualem illam infantiam vt qui sic infans esse nolit, infans esse velit infanda quadam & probrosa infantia, quæ quam timenda est, tam alia est appetenda.

Ratio quæ affertur plana est, ex illa potissimum parte, quæ primo dicitur Temperantes nos esse oportere vel Intemperantes; quo nomine non ea solum pars vitij aut virtutis intelligitur quæ circa cibum & potum temperandum occupatur, sed tota vniuersum nominis significatio depromitur, & quidquid ad concupiscibilem appetitum refrænandum spectat, attenditur: Atque ita etiam euidentius prima illa patet propositio. Nam aut refrænare oportet appetitum, quod est esse temperantem, aut non refrænare, quod est intemperantem esse. Quæ cum sint duo contradictoria, necesse omnino est, alterutrum in nobis esse, cum præcipue nisi refrænatur appetitus, tam infrænis ipse & proiectus in malum sit, vt sese abripiat, *sicut equus impetu vadens* 1er. 8.
ad prælium. Quod cum id semper nimis experiamur quàm verum sit, tum verno potissimum tempore quo ad solem redeuntem sanguis in venis ebullit ardentius, & florescentia quæque obie-

Etia sensus pelliciunt acrius ac suauius, unde totus hic appetitus commouetur, & nili arctiori cohibeatur temperatia, certe laxiori efferetur intemperantia, *Decolorauit me sol.* **CONTEM-
Nahum.2. PLARE** viam, conforta lumbos, robora virtutem valde. **DEMVS**
operam sobria remissioni, ac sancta sinceritati, ut quidquid modo
S. Aug. ser. corporali abstinentia non acquirimus, mentium puritate quaramus.
157. de tēp. Sic Sponsa, sic Prophetæ, sic Doctores.

AD alteram vero propositionem, non potest melius declarari Conuenientia, siue vnio spiritualis Infantia cum Temperantia, quàm iisdem rationibus quibus ipsa definitur & explicatur Infantia spiritualis. Tres sunt præcipuæ; Prima propter Innocentiam vitæ & morum: sicut enim Infans non peccat, ita nobis commendatur vt tam alieno simus affectu ab omni prauitate, nullam vt voluntariè admittamus: quem in statum qui deueniunt, tum Infantes seu Pueri secundum Christum, quæ bona est Infantia, nuncupantur in Scripturis, id habentes per Grati-
In effectis. **tiam & industriam** quod Infantes per ætatem. *In hoc tamen,* inquit sanctus Ambrosius, *melior Christi infantia quam natura, quòd ista per infirmitatem innoxia est, illa per virtutem: atque ideo laudi magis scribendum est; non tam male facere posse, quam nolle.*

Hoc est autem vel maxime proprium Temperantiæ sic moderari affectus circa quæuis delectabilia quæ sunt præcipua peccatorum incentiua, nulla vt voluptate, nulla libidine, nulla vanitate aut boni temporalis cupiditate mouearis; quam triplicem concupiscentiam qui retinere possit, nonne is innocentiam tibi seruare videbitur? Sicut enim radix malorum omnium Concupiscentia, sic quicumque hanc excindit radicem, mala propul-
Ecclesi. 26. **sat omnia.** Hæc est continens anima de qua Sapiens, *omnis ponderatio non est digna continentis anima.*

SECUNDA ratio cur dicatur & commendetur Infantia Christiana, petitur à simplicitate quæ in eo consistit vt sicut infans non discurret, non ratiocinatur, non discernit nec de rebus iudicat, sed alieno ductu regitur; ita nos in materia fidei, religionis, & obedientiæ, nos ita subiciamus Deo, Ecclesiæ, ac Superioribus, nullo vt discursu opposito resistamus, *In captiuitatem redigentes omnem intellectum, in obsequium Christi.* **OMNIA**
2. Cor. 20. Phil. 2. **facite sine murmurationibus & hasitationibus, vt sitis sine querela,**

& simplices filij Dei.

Hanc porro simplicitatem sic promouet Temperantia, vt quantum quisque temperans fuerit; tantum credulitatis, & simplicis obedientiæ præstabit cunctis; obsequio: nam nihil est quod frequentius & pertinacius intellectum moueat ad fingendas & opponendas rationes obedientiæ, quàm inordinata mentis affectio, quæ dum per temperantiam reprimitur, sic omnis contradictio cohibetur. Quamobrem sanctus Ambrosius hanc puerilem simplicitatem expressis & disertis verbis affirmat esse quandam *Morum temperantiam, mentisque sobrietatem*, in qua fratrem suum Satyrum sic excelluisse scribit, vt conuersus in puerum, simplicitate illius ætatis innoxia, perfecta virtutis effigie, & quodam innocentium morum speculo reluceret.

*Orat de
Obitu Sa-
tyri.*

TERTIA denique ratio quæ constituit & commendat Infantiam spiritualem hæc est, vt perpetuum quendam feruoris & propensæ in Deum voluntatis statum retineamus, ne quid per ætatem decedat illius religiositatis & bonæ mentis qua primo illo tempore quo vacare Deo cæpimus, ferebamur vtrò, ad omnes virtutum actus; aut si quid forte interdum intepescat, quàm primùm refarciatur & restauretur in integrum; quasi modo geniti infantes, quasi modo inciperemus, quasi nihil hætenus à nobis gestum esset, crebro illud Dauidicū ore & corde præferremus, *Dixi, nunc capi. RENOVABITVR vt aquila iuuentus mea.* Vel sicut Iob: *Quis mihi tribuat vt sim iuxta menses pristinos, secundum dies quibus Deus custodiebat me: sicut fui in diebus adolescentia mea? Gloria mea semper innouabitur, & arcus meus in manu mea instaurabitur.* Quem in sensum dicebat suis Dominus: *Nisi conuersi fueritis & efficiamini sicut paruuli, non intrabitis in regnum cælorum:* Hæc forma scilicet veræ conuersionis & veri status in quo vel oportet esse semper, vel ad quem identidem reuocandi sumus, vt apti regno cælorum reddamur.

Ps. 76.

Ps. 102.

Iob. 29.

Matth. 18.

Ad hunc autem statum in primis confert Temperantia, primo quidem conseruando religiosam mentem ne inueterescat; nam *inconstantia concupiscentia est quæ transuertit sensum*, cui dum concupiscentiæ continenda vacat Temperans, se ab illius inconstantia tutum reddit. Deinde verò, si quid humani patitur; dum se ad maiorem continendi appetitus cautionem reuocauerit, tunc se id effecisse intelligetur, quod ad spiritus renoua-

Sap. 4.

L. 27. Mor
9. 13.

tionem magis requiritur, vt ante ex sancto Gregorio didicimus, qui totum eò refert negotium: *Vetusta*, inquit, *vita*, protinus *usus mutatur*, vt anima superno spiritu afflata, & in summis appetat quæ contemnebat; & contemnat in infimis quæ appetebat.

2. 2. q. 142.
4. 2.

1. Cor. 14.

Ex quibus manifestè apparet, quam recte inter se cohæreant Temperantia & Infantia spiritalis: Vnde & de Intemperantia & alia mala infantia, facillimum est idem concludere, sicut expresse ait Diuus Thomas quærens his ipsis terminis: *utrum Intemperantia sit puerile peccatum*; & affirmat cum ex autoritate Philosophi, tum ex tribus rationibus quas profert, & quas referre nunc esset longius. Paucis poeta: *Inuenile vitium est, regere non posse impetum*. Aptè vero Apostolus. *Nolite pueri effici sensibus, sed malitia paruuli estote: sensibus autem perfecti estote*. Quali diceret, alterutrum vobis proponitur; aut quali concluderet quod proposita continet Veritas: *Ergo Infantes esse oportet vel bona, vel mala infantia*, non certe mala: ergo bona. Nam sicut inde probatur alterutram esse tibi eligendam infantiam, quod temperantia vel intemperantia quibuscum illæ infantia singularem habent communionem, necessitate quadam contradictionis vnicuique nostrum insint: sic bonam, vt præligas infantiam, facit ipsa Virtus opposita vitio; aut si forte Virtutis excellentiam non perspiceres, attende vitij deformitatem: ama Virtutem ex odio vitij, si nondum potes odisse vitium ex amore Virtutis. *Contra malum, bonum est, & contra mortem vita*, inquit Sapiens: *Et sic inuenire in omnia opera Altissimi. Duo & duo, & unum contra unum*. Quali diceret; cum opposita iuxta se posita magis luceant, sic simul considerata sunt, vt quod est bonum, melius appareat ex opposito sibi malo, & facilius acceptetur. Aut certe si quid duri & asperi in bono appareat, non propterea repudietur, quia si velis attentius intueri malum oppositum, longe tibi duriora inde & deteriora inuenies; ac proinde bono inhærendum.

Ecclesi. 33.

Times forte aliquid à Temperantia vel Infantia spiritali? At quanto magis plura pertimescenda sunt ab Intemperantia vel Infantia sensuali? Nullum esse vitium probrosius, aut peccatum magis exprobabile quàm Intemperantiam docet expresse sanctus Thomas, & manifestè probat quod ex omnibus vitiis istud magis repugnet excellentiæ & honori hominis, cum versetur circa sensuality quæ sunt nobis cum brutis communia, & in

2. 1. q. 142.
4. 4.

quibus tractandis minus insit humani luminis & rationis. Quis vero non sentiat quanti sit probri quantæque infamiæ, si vt Infans vel vt puer appelletur? Tale est certe probum vt qui hac iniuria temerè Virum sapientem notaret, non modo in virum graui-ter, sed & in Deum peccaret.

At citra noxam omnem sic vocari potest Intemperans, qui seipsum suo puerili vitio probri exponit. Quin & ipse Deus sic illum derideri permittit, vt hac saltem sui nominis cura mouea- tur; aut certe nisi resipiscat, grauius Ipse recordem puerum casti- gabit. Sic aperte & opportunè Sapiens: *Infantium insensatorum more viuentes: propter hoc tamquam pueris insensatis iudicium in de- risum dedisti*, Deus, *Qui autem ludibriis & increpationibus non sunt correcti, dignum Dei iudicium experti sunt.* Sap. 12.

Videndus est Clemens Alexandrinus l. 7. Pædag. c. 5. Vbi egregiè de hac vtraque Infantia. Vide & Feriam 2. infra heb- domadam 16. post Pentecosten, in qua hæ proponuntur expref- sâ Veritates:

Aut baptismalis seruanda est Innocentia, aut per In- fantiam spiritualemente reuocanda.

Non est ætas maturior Infantia Christiana.



AD SEQUENTES QVATVOR HEBDOMADAS.

MATERIAM Considerationum seu Veritatum submini- strabunt Mysteria Resurrectionis Christi Domini, quæ notiori vocabulo dicuntur Apparitiones. Et quia his Mysteriis respon- det Via Vnitiva, quæ est Perfectorum, seu, quæ est in perfe- ctiori Charitatis gradu: idcirco Charitatis proprietates quæ ab Apostolo referuntur, *Charitas patiens est, benigna est*, & quas fusè prosequitur, primæ Corinthiorum decimo tertio, ad vnum- quodque Mysterium ita reuocabimus, vt his certissimis notis, quænam sit vera Charitas, discerni possit ab Amore proprio seu Zelo falso & adumbrato. Sic enim sanctus Bernardus, vbi de his agit Mysteriis, *facile est*, inquit, *nosse quàm sint aliena à propria voluntate, quæ propria sunt Charitatis, cui illa, rectâ fronte, contra-* Serm. 2. de Resurr. Dom. *riam se constituit. Nam Charitas benigna est, &c.*

FERIA SECUNDA.

APPARET CHRISTVS D. BEATISS.
VIRGINI MATRI.

IN QVA ITEM APPARET PRIMA CHARI-
TATIS PROPRIETAS :

Charitas patiens est.

*Secundum multitudinem dolorum meorum in corde
meo, consolationes tue latificauerunt animam
meam. Ps. 93.*

VERITAS PRACTICA.

Quàm verè Charitas includit in se patientiam, tam
verè Impatiens excludit à se Charitatem.

RATIO est, quia idcirco verè Charitas includit in se patientiam,
sive quod idem est, idcirco verè dicitur patiens, quòd qui agit
ex Charitate, tam libenter omnem pro Deo poenam patitur, ut
qui non omnem poenam sic patitur, excludat à se Charitatem
illam actualem seu actu patientem.

Sed Impatiens non libenter omnem pro Deo poenam patitur.

Ergo, quàm verè Charitas est patiens, aut quàm verè includit
in se patientiam, tam verè Impatiens excludit à se Charitatem.
Quod cum diligenti Deum sit valdè cauendum, cauendum est
ut discat, ne sit impatiens.

I. PUNCTVM.

QUANTA Charitate diligebat Christum suum, Beatissima Virgo Mater, tanto eius quidem videndi desiderio tenebatur; sed illa suum ita desiderium continebat, vt quantum in illa esset veræ Charitatis, tantum esset & patientiæ. Sic ergo patienter expectat, donec Ipse resurgens, appareat & suâ gloriosissimâ præsentia incoerentem consoletur: Tum verò quando apparuit; ô qualis vtrique animus! quales amplexus! quale colloquium! Sed quamdiu durabit iste congressus? Quamdiu sic simul seipsis perfruentur? Equidem nisi vera eis fuisset Charitas, aut nisi vera Charitas esset patiens, numquam à se diuulli essent; sed si volet Filius, statim discedat, inuisat pias illas Mulieres quæ ipsum quærunt mortuum; Magdalena seorsim appareat, seorsim Petro, tum aliis simul Apostolis; nec ad Beatissimam Matrem nisi cum Filius voluerit, reuertatur; certe posset dolere Mater absentiam Filij, sed tamen patienter dolebit, Illaque ipsa Charitas quæ dolorem ex absentia concitabit, dolori patientiam sic coniunget vt ex æquo sit eius animus dolens & patiens.

Sic quando Filius relictâ inter homines Matre, in cœlum remigrabit; quanto putas Eum dolore Mater separatam lugebit? Lugebit tamen patienter, & separationem, & luctum feret æquanimis, quia Charitas patiens est: & tam constanter omnem huius vitæ molestiam feret, nullum vt vlllo tempore impatientis animi signum edat, sicut nullo tempore extra Charitatem fuit. Vnum ex alio sequitur, vt qui in Charitate semper viuit, numquam sit impatiens: aut si quando est impatiens, iam in Charitate illa quæ patiens est, non viuat. Quod cum sit ad perfectæ Charitatis praxim valde opportunum, sic expendendum modo proponitur, vt quâ ratione monstratur Charitas esse patiens, eadem demonstretur esse extra Charitatem qui est impatiens. *Iam non, Rom. 14. secundum Charitatem ambulat.* Quænam autem est illa Ratio, cur dicatur esse Charitas patiens? Nempe hæc manifesta, quod qui ex Charitate vitam agit, libenter omnem pœnam pro Deo subeat: aut qui non omnem pœnam sic subeat, non possit dici vitam agere ex illa charitate, ac toties illam à se excludere di-

498 FERIA 2. Hebd. I. post Octauam Pasche. Christus apparet, &c.

cendus sit, quoties pœnam aliquam non libenter aut non pro Deo feret.

Nam hoc habet Charitas patiens supra virtutem patientiæ, vt non modò quædam aduersa toleret, sed omnia prorsus & libenter, & pro Deo. Tota enim diuina est, tota quod est, Deum amat, totum quod amat, Deus est; totum quod Deus amat, & ipsa sic amat vt nullam differentiam inter res amandas ponat quam quæ ab ipso Deo ponitur, à quo est ordo Charitatis, & à quo sponsa profitetur, *ordinatam in se Charitatem*. Iam verò cùm omnes indifferenter & ex æquo aduersitates, pœnæ, & molestiæ à Deo immittantur & amentur, sic ex æquo Charitas ad vnā omnes amplectitur, vt si vnā excluderet, iam non esset Charitas, quia Deum non intueretur, qui in illa exclusa pœna perinde spectandus erat, atque in aliis: qui autem actus Deum non intuetur, non est Charitatis actus qui Deo totus adhærēt.

Rom. 8.

Sic præclare Apostolus: *Quis ergo nos separabit à Charitate Christi? tribulatio? an angustia?* Et expositis quibuslibet patientis sic concludit; *In his omnibus superamus, propter Eum qui dilexit nos*. Hæc est Charitas patiens, à qua qui vel vnā excludit pœnam quam nolit pati, se ab illa Charitate, aut illam à se excludit.

II. P V N C T V M.

SED Impatiens non libenter omnem pro Deo subit molestiam.

Hoc ipso enim quò est impatiens satis indicat se nolle pœnam illam cuius est impatiens: nec aliunde impatientia concitatur quàm ex repugnantia voluntatis cum re aduersa quam nolle sustinere.

Si sola esset sensitiuæ partis contradictio cui voluntas non consentiret, posses quidem simul velle pati, non obstante illa sensus contradictione: sed quando contradictio transit in impatientiam, signum est consentientis voluntatis, signum est dissoluti cordis, & animi à patiēdo alieni; nam illa corporis inquieta iactatio, verba illa aspera, frons obducta, & totus in acerbiteriam conuersus vultus non aliunde procedunt quàm à libera voluntate quæ sic indicat se nolle, aut non libenter ferre quod occurrat ferendum. *Va dissolutis corde! Va his qui perdiderunt sustinentiam!* quid est dissolui corde, & quid perdere sustinentiam, nisi

Ecclesi. 2.

se impatientem præbere in sustinendo? Quomodo vero impatiens sic diceretur dissoluti cordis & perditæ sustinentiæ, nisi voluntatem haberet alienā à ferendis aduersis? nam si contra repugnantiam naturalem non desisteret à bona voluntate patiendi, iam non perdidisset sed conseruasse sustinentiam dicendus esset: neque illi duplex infauftum *uæ* intentaretur, sed potius foelix & beatus prædicaretur; sicut insignis ille inter suos Eleazarus senex qui *cum plagis perimeretur, ingemuit, & dixit: Domine qui habes sanctam scientiam, manifeste tu scis, quia cum à morte possem liberari, duros corporis sustineo dolores: secundum animam vero propter timorem tuum, libenter hæc patior.* 2. Macc. 6.

Hoc est scilicet patientem esse, sic libenter pati ut nullum contra edatur signum quod à libera voluntate pendeat: Vnde à contrario ille impatiens esse agnoscitur qui signo aliquo motuue corporis indicat se nolle pati. *Qui Impatiens est,* inquit Salomon, *exaltat stultitiam suam:* id est, manifeste indicat se nolle pati, quod stultitiæ quoddam genus est, cum non propterea desinat pati quod nolit, imo tanto magis patiatur, quo minus nolit. O quantus horum stultorum numerus!

III. PUNCTVM.

ERGO, *quàm verè Charitas includit in se patientiam, tam verè Impatiens excludit à se Charitatem:* seu, quâ ratione monstratur Charitas esse patiens, eadem demonstratur extra Charitatem actualem eum esse qui est Impatiens: Quia sic Charitas dicitur esse patiens, quod omnem pro Deo libenter subeat pœnam: Impatiens verò non illam libenter subeat, propter quam esse impatiens agnoscitur, vnde sicut à se excludit voluntatem patiendi quam includit Charitas, sic à se excludit charitatem illam actualem, seu actu patientem; & quamdiu est impatiens, tamdiu erit extra charitatem quæ patiens est: tanta denique est impatientiæ & charitatis patientis disiunctio, quanta est inter impatientiam & patientiam.

Væ filij desertores dicit Dominus, FILII subtractionis in perditionem, de quibus Apostolus. Hi sunt videlicet filij desertores qui charitatem & animum filialem deserunt, quo præcipue tempore talis animus esset exhibendus. Hi sunt qui se subtrahunt à

Rr ij

500 FERIA 2. Hebd. 1. post Octauam Paschæ. Christus apparet, &c.

paterna Dei gubernatione, dum quas immittit plagas, aut pœnas, ipsi refugiant. Hi sunt qui se vtrò ipsos subtrahunt; Non enim tribulatio, non angustia, non fames, non nuditas, non quælibet alia volentes pati separant à Charitate Christi; sed vt sapienter obseruat S. Bernardus, *Sola est propria hominis voluntas quæ hanc separationem efficere potest.*

Serm. de
dupl. bapt.
& de re-
linq. propr.
voluntate.

Quamobrem aduerte diligentius: Memento te filium illius Diuini Patris qui non minus se patrem ostendit in aduersis, quàm in prosperis: sic te in vtrîsq; filium præbe, vt monet Sapiens, *Disciplinam Domini, fili mi, ne abiicias, nec deficias cum ab eo corripis: quem enim diligit Dominus, corripit: & quasi pater in filio cõplacet sibi.* Hanc verò Sapientis admonitionem hic vrget & extendit Apostolus: *Et oblitus es consolationis quæ vobis tamquã filiis loquitur, dicens: fili mi noli negligere Disciplinam Domini, neque fatigeris, dum ab eo argueris. Quem enim diligit Dominus, castigat: flagellat autem omnem filium quem recipit. In Disciplina perseuerare: Tamquam filiis vobis offert se Deus: quis enim filius quem non corripit pater? quod si extra disciplinam estis, cuius participes facti sunt omnes: ergo adulteri, & non filij.* Expende hanc postremam sententiam qua dicit Impatientem esse extra disciplinam & non esse filium, Nonne hoc idem est quod esse extra charitatem! Et nonne hoc satis potens motiuum est, ne sis impatiens! Adeone tibi vilis est charitas vt pro ea conseruanda nolis illud exiguum pati quod te impatientem facit? *Sustine sustentationes Dei: Contingere Deo, & sustine.*

Eccli. 2.

Vide suprà, Fer. 5. Sexagesimæ.



FERIA TERTIA.

APPARET CHRISTVS MARIÆ

MAGDALENÆ:

VBI ET APPARET SECVNDA CHARITATIS

PROPRIETAS: Charitas benigna est.

Mulier quid ploras?

Si quid Charitas negat, tam benigna negando est, &c. 301
Quia tulerunt Dominum meum, & nescio ubi posuerunt eum. Ioan. 20.

VERITAS PRACTICA.

Si quid Charitas negat, tam benigna negando est, quàm concedendo.

RATIO est, quia Charitas negando aliquid tam vera est Charitas, quam concedendo.

Sed quamdiu vera est Charitas, semper benigna est.

Ergo & negando tam benigna est quam concedendo: Qua in praxi tamen saepe peccant & qui negant quod petitur, & qui petunt quod negatur.

I. PUNCTVM.

NIC recolenda sunt cum affectu quæ omnes Euangelistæ *Matth. 28.*
referunt de pietate Mulierum cum vnguentis ad sepulchrum, ipso summo mane Diei quo resurrexit Dominus, *Marci 16.*
Lucæ 24.
Ioan. 20.
properantium: dumque iam ad monumentum accessissent, viderunt reuolutum lapidem, & Angelum sibi nuntiantem, quem quærunt mortuum Christum, resurrexisse. Quod cum eiusdem Angeli iussu, Discipulis retulissent, non eis Discipuli crediderunt; Petrus tamen & Ioannes ad sepulchrum, sequentibus eos mulieribus, excurrunt. Sed non inuento Domini corpore, Ierosolymam regrediuntur. Discipulis itaque & postmodum Mulieribus à sepulchro abeuntibus, sola Maria Magdalena vehementer lugens illic persistit, & dum accedit propius ad monumentum, dum se inclinat & prospicit omnia diligenter, vidit duos Angelos in albis sedentes qui dicunt ei: *Mulier quid ploras?*
Dicit eis, quia tulerunt Dominum meum, & nescio ubi posuerunt eum.
Hæc cum dixisset reuersa est retrorsum, & vidit Iesum stantem, & non sciebat quia Iesus est. Dicit illi Iesus, Mulier quid ploras; Illa existimans quia hortulanus esset, dicit ei, Domine si tu sustulisti eum, dicito mihi ubi posuisti eum, & ego eum tollam. Dicit ei Iesus, Maria,

Conuersa illa dicit ei, Rabboni, quod dicitur magister; Dicit illi Iesus, noli me tangere, nondum enim ascendi ad patrem meum; vade autem ad fratres meos & dic eis; ascendo ad patrem meum & patrem vestrum, Deum meum & Deum vestrum. Id est, nondum quidem ascendo, necdum discedo ut me quasi valedictura complectaris: discedam tamen breui, & ante mihi sunt videndi fratres mei, mei Discipuli.

In qua quidem apparitione cum multa ad affectum & profectum considerari possint, tum verò summa Benignitas Domini Iesu sic mulierem alloquentis, & suo gloriosissimo conspectu ante ipsos etiam Discipulos gratificantis. Quod verò non patitur se ab ea tangi, prout illa vehementer optabat, præter alias rationes, disce & reuolue attentius quod Veritate proposita continetur, tam benignam esse Charitatem negando quod petitur, quàm concedendo.

Et Ratio est euident, quia Charitas negando quod petitur tam vera est Charitas, quàm dum concedit aut etiam dum sapius ultro offert quod impartitur. Cur enim est Charitas dum concedit quod petitur, nisi quia proximo benefacit propter Deum? At nonne sic exigunt aliquando rationes proximi, ut quod petit negetur potius, quàm concedatur? Et nonne Charitas hoc proximi bonum respiciens tam vera est Charitas quàm dum illud respicit concedendo quod postulatur? Nam cur desineret esse quod est, si non desinit facere quod suum est? semper enim est ordinata Charitas, & si ordo & Ratio exigunt ut non concedatur quod petitur, adeo non perit propterea

Prou. 29. Charitas, ut potius periret si non illud negaret. Virga atque correctio tribuunt sapientiam: puer autem qui dimittitur voluntati suae

2. Cor. 12. confundit matrem suam. An putas quod non vera fuerit Charitas

Ps. 98. Domini cum recusauit Apostolo, quod ter à se postularat? Nonne potius hoc singularis beneuolentiae signum notatur, cum Psaltes Deo dicit: Deus tu propitius fuisti eis, & ulciscens in omnes adinventiones eorum: Aut cum ipse Deus Dauidi de filio: Ego ero ei in

2. Reg. 7. patrem, & ipse erit mihi in filium, qui si iniquè aliquid gesserit, arguam eum in virga virorum, & in plagis filiorum hominum: misericordiam autem meam non auferam ab eo. Velle sine tibi concedi quod

Eccl. 23. à Deo vel à Sapiente viro sciretur tibi obfuturum? Huic animae irreuerenti & infrunita non tradas me Domine. Hoc est enim Da-

II. PUNCTVM.

SED *quandiu vera est Charitas, semper benigna est.*

In eo enim vel maxime ab amore proprio distinguitur quod hic sit leuissimus & inconstantissimus, Illa autem sui semper similis & tam constans vt numquam excidat; peribit potius tota & potius desinet esse vera, & nulla erit, quam si vera est Charitas, desinat esse quod est, seu quod esse debet vt sit vera. Esse autem benignam, tam illi est proprium & congenitum quā spiritu Dei agi. Cum enim *benignus sit spiritus sapientiae*, siue vt *Sap. 1.* alibi dicitur, *super mel dulcis, & hereditas eius super mel & fauum;* *Eccles. 24* cumque aliud nihil sit vera Charitas quam ipse Spiritus Dei, aut quā ipse Deus, vt ait dilectus Discipulus; quomodo posset esse Vera & Diuina Charitas nisi esset benigna? *1. Ioan. 4.*

Nescitis, cuius spiritus estis, dicebat Christus illis Discipulis qui se parum benignos ostenderant in Samaritanos, *Filius hominis non venit animas perdere sed saluare;* *Lu. 9.* Quasi diceret, non est hic spiritus meus, non est illa Charitas quam vobis communicare volo, quā ita benigna est, vt dum etiam male tractatur, non desinat esse benigna.

Itane sentis? Itane semper benignus, itane possis dici *filius altissimi*, quia ipse *benignus est super ingratos & malos*, id est super teipsum? *Luc. 6.*

III. PUNCTVM.

SI quid ergo Charitas negat, tam benigna negando est quā concedendo: Quia tam vera est Charitas cū illud negat quam dum concedit: quandiu autem est vera Charitas semper benigna est: hoc est illi tam proprium & quod vocant, essentialē, sicut bonum proximi respicere propter Deum. Nam hoc vnum est esse benignum, sic proximo benefacere in substantia & in modo, sicut Deus iubet. *Vnusquisque vestrum*, inquit Apostolus, *proximo suo placeat in bonum, ad adificationem.* *Rom. 153* Sic & quoties de Charitate vel misericordia differit, semper benignitatem adiungit, quasi sit vnum & idem: aut quasi vnum ab alio decla-

504 FERIA 3. Hebd. 1. post Oct. Pas. Christus apparet M. Magdal.

2 pphes 4. Coloss. 3. retur, *Estote inuicem benigni, misericordes, donantes inuicem. Et rursum: Induite vos sicut electi Dei, sancti & dilecti, viscera misericordia, benignitatem.*

Prou. 7. Quod quidem non est semper positiuè largiri quod petitur, ut dictum est, in quo multi errant quibus negatur quod petunt, aut qui delinquentes arguuntur. Quia enim dolent se argui, aut sibi quod volunt denegari; idcirco sibi fingunt Charitatem quæ benigna est, lædi. *Sed vulnera illa sunt diligentis quæ longè sunt meliora quàm fraudulenta oscula odientis aut etiam blandientis.*

Ecclesi. 6. Et vero, tu qui aliquid negas, aut aliquem arguis, tu in primis hoc refer monitum, quòd si modum in negando & arguendo non seruares, sane benignitatem offenderes, quæ hîc vel maxime regnare debet, ut quod molestum esse potest in repulsa & correptione, mitigetur & dulcescat. Hoc est *verbum dulce*, quod ut ait Sapiens, *multiplicat amicos & mitigat inimicos: hac est lingua Eucharis quæ in bono homine abundat.* Hoc est denique quod te paucis sed efficacibus monet S. Augustinus: *Supplicem nullum spernas: si potes dare, da: si non potes, affabilem te presta.* Coronat Deus *intus bonitatem, ubi non inuenit facultatem.* Nemo dicat, *non habeo, Charitas non de sacculo erogatur.*

1a Ps. 103. Vide suprà Fer. 4. hebdomadæ 3. Quadragesimæ, de Illo qui audacius loquitur Inferiori.



FERIA QVARTA. APPARET CHRISTVS ALIIS MV LIERIBVS.

ET ALIVM SVÆ BENIGNÆ CHARITATIS
EFFECTVM ILLIS CONFERT.

Et ecce Iesus occurrit illis, dicens, Auete. Matth. 28.

VERITAS

Sæpe videtur esse Charitas, & est magis Carnalitas. 505

VERITAS PRACTICA.

Sæpe videtur esse Charitas, & est magis Carnalitas.

RATIO affertur ab eodem Authore cuius est hæc sententia, libro primo de Imitatione Christi, capite decimo quinto; quia, inquit, naturalis inclinatio, propria voluntas, spes retributionis, affectus commoditatis raro abesse volunt.

Atqui hæc quoties adsunt, & preualent, magis est Carnalitas, quàm Charitas.

Ergo verissima est sententia, Quòd sæpe ubi videbitur esse Charitas, magis est Carnalitas; Ac proinde diligenter aduertendum est in Exercitio & in positiua praxi huius benignæ Charitatis de qua hic agitur.

I. PUNCTVM.

MULIERES illæ quæ cum Maria Magdalena semel atque iterum venerant ad Sepulchrum, simulque audierant Angelos sibi nuntiantes resurrexisse Christum Dominum, discipulis Petro & Ioanne abeuntibus, seorsim & ipsæ aliâ viâ reuertebantur, cum *Ecce Iesus occurrit illis, dicens, Aue. Ille autem accesserunt & tenuerunt pedes eius, & adorauerunt eum. Tunc ait illis Iesus, nolite timere, Ite, nuntiate fratribus meis ut eant in Galilaam, ibi me videbunt.* Math. 28.

Ex quibus satis apparet quàm Benigna fuerit Charitas Domini Iesu qui non solum se videndum dedit his mulieribus, sed quod etiam negauerat Magdalenæ, suos illis Pedes contingendos & adorandos præbuit. Et hic est alius Benignæ Charitatis effectus cum id conceditur quod postulatur, qui certe erat vñtissimus Christo Domino, qui pertransiit benefaciendo & sanando Aet. 10. omnes: qui & nobis ut dictum est valde commendatur. *Estote inuicem benigni, misericordes, donantes inuicem, sicut Deus in Christo donauit vobis.* Ephes. 4. De quo item benignitatis genere sic apte S. Ambrosius: *Popularis & grata est omnibus Bonitas, nihilque quod tam* 2. off. 7.

506 Feria 4. Hebd. I. post Oet. Paschæ. Christus apparet mulierib.

facile illabatur humanis sensibus. Ea si mansuetudine morum ac facilitate animi, moderatione præcepti, & affabilitate sermonis, verborumque honore, patienti quoque sermonis vice, modestiaque adiungetur gratia, incredibile quantum procedat ad cumulum dilectionis.

Verum in istis mutuis donationibus, atque usu familiari sese colentium animorum, cauendum vel maxime quod proposita Veritate monemur, *ne sit potius Carnalitas quam Charitas*. Hoc est enim valde naturale, diligere diligentem, vel præuenire amore eum à quo aliquid speres, vel denique in mutua illa animorum coniunctione, communique vitæ usu, quæcunque humanitatis & beneficentiæ præstare officia, quia sic placet, quia sic honorificum, sic delectabile & utile; Vnde Sapiens; *Omne animal, inquit, diligit simile sibi, sic & omnis homo proximum sibi, omnis caro ad similem sibi coniungetur, & omnis homo simile sui sociabitur*; Quasi diceret, hoc ab ipsa natura prouenit nec magnæ virtutis est talem exercere benignitatem: Nonne & Ethnici faciunt? Nonne & ipsi mundani & peccatores in istis excellent? Nonne & tu sic sapius afficeris, & quod pejus est, nonne hunc affectum, Charitatem putas!

II. PUNCTVM.

AT QVI quod tale est, *Carnalitas magis est quàm Charitas*.
Nam Charitas ex corde puro prouenit, nec alio motiuo mouetur quam supernaturali & Diuino. Non condemnat quidem naturalem affectum, quasi malus semper esset, sed non in eo solo sistit; neque id tantum, quia ipse naturalis affectus vix se vmquam continet in humanæ & rationalis beneuolentiæ terminis, sed quia licet nihil aliud vitiosum accederet, non satis sibi esse putat Diuina Charitas diligere ex illo affectu naturali, nisi hunc ita purificet & emundet, vt sit potius supernaturalis & spiritalis, quàm naturalis; adeo vt possit dicere cum Apostolo, *Neminem noui secundum carnem*: nihil à quoquam expecto quod carni est delectabile, quod vitæ est utile, aut mundo gloriosum. Et hoc est nouum præceptum Charitatis quod se dare Christus pronuntiat, nempe *vt sic nos ipsos diligamus sicut ipse dilexit nos*. Hanc præcipuè particulam *sicut* expendunt omnes Patres, asseruntque in ea Vna nouum Charitatis præceptum consistere; Vt

Sæpe videtur esse Charitas, & est magis Carnalitas. 507

à carnali dilectione distingeretur, inquit sanctus Augustinus, *ad-Tratt. 63: didit SICVT DILEXI VOS.* in Ioanne.

Quod & fufius prosequens S. Gregorius: *Sunt nonnulli, ait, qui diligunt proximos sed per affectum cognationis & carnis, quibus tamen in hac dilectione, sacra eloquia non contradicunt: sed aliud est quod sponte impenditur natura, aliud quod præceptis Dominicis ex Cha-Hom. 27: ritate debetur obedientiæ. Hi nimirum & proximum diligunt, & in Euang. tamen illa sublimia dilectionis præmia non assequuntur, quia amorem suum non spiritualiter sed carnaliter impendunt, proinde cum Dominus diceret, hoc est præceptum meum, vt diligatis inuicem, protinus addidit, SICVT DILEXI VOS, ac si aperte dicat, ad hoc amate, ad quod amaui vos.*

Itane puri sunt affectus tui? nonne species decipit te, & Concu. Dan. 13: pifcentia subuertit cor tuum?

III. P V N C T V M.

SÆP E igitur ubi videtur esse Charitas, magis est Carnalitas. Quia cum sint iidem effectus externi, eadem pene Verba & signa benignitatis, imo & idem animus qui primò quidem, adeo nihil vitiosum aut sensuale cogitat, vt potius vnicum spirituale bonum prætendat, plane videretur esse Charitas; sed tamen cum multa permisceantur merè naturalia, cum fufiora sint colloquia, verba blandiora, teneriores affectus, frequentiora munuscula, & similes blanditiæ, Carnalitas magis est quàm Charitas. *Sic stulti estis vt cum spiritu caperitis, nunc carne consumme. Gal. 3: mini! Quod aperte sanctus Hieronymus, Crebra munuscula, & Ep. 2. ad sudariola & fasciolas, & vestes ori applicitas, ac degustatos cibos, Nepotia. blandasque & dulces literulas sanctus amor non habet. Mel meum, lumen meum, meum desiderium, omnes delicias & lepores, & risu dignas urbanitates, & ceteras ineptias amatorum, in comadiis erubescimus, in sæculi hominibus detestamur, quanto magis in Monachis & Clericis.*

Neque verò putes hæc quæ commemorat sanctus Doctor ita requiri ad internoscendam Carnalitatem à Charitate, Vt qui non ea præstet, nihil sibi timeat, cum malum sit ex quouis defectu, bonum autem ex integra causa, id est, vnum eorum sufficit vt carnalis dilectio censeatur: nec vera vñquam Charitas.

308 FERIA 5. Hebd. 1. post Oct. Paschæ. Apparet in Discip. &c.

existimanda est, nisi modus & finis diligendi, quales ex Euangelio præscribuntur, simul conueniant. Sic præclare sanctus Gregorius: *Nemo cum quemlibet diligit, habere se protinus Charitatem putet, nisi prius ipsam vim suæ dilectionis examinet. Nam si quis quemlibet amat, sed propter Deum non amat, Charitatem non habet, sed habere se putat: Charitas autem vera est cum & in Deo diligitur amicus, & propter Deum diligitur inimicus.*

Vide quantum in hoc pecces; vel per excessum, vel per defectum. Hinc enim fit ut rara sit admodum Vera Charitas, nam quos naturaliter diligimus, nimis diligimus: alij autem vel sunt odiosi: vel, ut vocât, indifferentes, nec satis eos diligimus. Quamobrem illud etiam atque etiam crebrò versandum, quod ait S. Petrus: *Animas vestras castigantes in obedientia Charitatis; & quæ plura inde alibi relata sunt. Vide in 1. parte, FERIA 6. hebd. 4. post Epiphaniam: & Sabbato hebdomadæ 6. In hac 2. parte, Dominica 4. post Pascha. In 3. parte, FERIA 2. 3. 4. & 5. hebd. 5.*

L. 1. de
Imit. Chr.
c. 15. *O qui scintillam haberet veræ Charitatis, profecto omnia terrena sentiret esse plena vanitatis, nec propterea sineret his cor suum occupari & infici.*



FERIA QUINTA.

ANTEQUAM CHRISTVS APPAREAT OMNIBVS DISCIPVLIS SVIS, IN HIS APPARET QVOD CHARITAS non æmulatur.

Non in contentione & emulatione. Rom. 13.

VERITAS PRACTICA.

Quidquid acquiras æmulando, plus perdis quàm acquiras.

RATIO EST, Quia plus perdis Charitatem perdendo, quàm quidquid acquiras æmulando.


Quidquid acquiras emulando, plus perdis quàm acquiras. 309

Sed Charitatem quæ non emulatur, emulando perdis.

Ergo quidquid acquiras emulando, plus perdis quam acquiras:

Quod emulantibus sane est considerandum.

I. P V N C T V M.

 VI considerarit Discipulos leui de causa sapius ante mortem & Resurrectionem Domini, inter se contendisse & emulatos esse, si quis eorum aliis videretur esse prælatus, mirari modò poterit quod nulla inter eos contentio aut emulatio audiatur, licet multæ prætendi possent causæ cur emularentur. Ac primo quidē quod Angeli appareant & loquantur de Christo, mulieribus potiùs quàm viris; durum eis videri poterat qui perinde ac mulieres Sepulchrum adierant, quorum tamen nulli loquutus legitur Angelus.

Deinde quod ipse Dominus prius iisdem mulieribus quàm ulli Discipulorum apparuerit, nec nisi per eas Apostolis Resurrectionem suam nuntiavit, certe hoc mirum, & hoc mirandum quod Apostoli non emulentur.

Tertiò cùm postea Dominus apparuit seorsim Petro redeunti è Sepulchro, ut videbitur, non emulatur Ioannes, qui cum ipso cucurrerat, & qui Petro negante, Christum sequutus erat usque ad Crucem.

Quartò denique, cæteri omnes Apostoli non emulantur quod duobus peregrinis qui erant tantum Discipuli & ipsis Inferiores priusquam sibi apparuerit, & tam multa de se familiariter loquutus fuerit.

Hæc est videlicet *Charitas quæ non emulatur*, & dùm omni modo Christus annuntietur & honoretur, hoc vnum curat. *Qui veram & perfectam Charitatem habet*, ait Kempensis; *in nulla re seipsum quarit, sed Dei solummodo gloriam in omnibus fieri desiderat. Nulli etiam invidet, quia nullum privatum gaudium amat, nec in seipso vult gaudere, sed in Deo super omnia bona optat beatificari.*

Itane tecum est? *Quidquid autem prætendas aut acquiras emulando, plus semper perdes quam acquiras.* Quid enim pretiosius Charitate quæ est Apostolo excellentior via quam nobis possit demonstrare?

Matth. 10.
Marci 10.
Luc. 24.

Phil. 1.

L. 1. de
Imit. Chr.
c. 15.

I. Cor. 12.
Tract. de
Pat.

quæ est Tertulliano, *summum fidei sacramentum, & Christiani thesaurus nominis*; quæ est Clementi Alexandrino, *precipuum hominis Christiani munus*: Sancto Gregorio Nazianzeno, *doctrina nostra caput*: sancto Hieronymo, *cunctarum virtutum mater*: Gregorio denique magno, *mater & custos bonorum omnium*.

Nonne qui hoc perdat, plus perdat quàm acquirat? Quid est enim quod possit acquirere; nisi aliquid temporale quod spectet ad hanc vitam? *At quid est vita nostra nisi vapor ad modicum parens, & deinceps exterminabitur?* quid est omnis caro, quid omnis mundi gloria, quid omnis homo viuens, *nisi vniuersa vanitas*, nisi flos breui transiens, *nisi lanugo quæ à vento tollitur?* nisi spuma gracilis quæ à procella dispergitur? *nisi fumus qui à vento diffusus est?* Hæc sunt videlicet quæ acquiri forte possunt æmulando, & hæc ipsa sunt quæ tanto interuallo à Charitatis excellentia distinguuntur, quanto terrena distant à cœlestibus, temporalia seiunguntur ab æternis, & à Creatore creata omnia: quandoquidem, *Deus Charitas est, & qui manet in Charitate, in Deo manet, & Deus in eo*. O securam mansionem! ô foelicem possessionem!

II. PUNCTVM.

SED Charitatem quæ non æmulatur, æmulando perdis. Si quod commendat Apostolus, *Bonum amulareris in bono semper*, tunc sicut bona esset æmulatio, sic Charitas non perderetur, imo excresceret: vel ipsa esset Charitas quæ te faceret æmulari bonum, vel ipsa esset bonum quod æmulareris & de quo dicitur, *amulamini Charismata meliora*.

Sed alia est æmulatio, quæ Charitas non æmulatur, & qua quisquis æmulatur, Charitatem perdit: quando videlicet per inuidiam & contentionem desideratur & prætenditur bonum aliquod seu spirituale seu temporale, non ex amore boni spiritualis, non ex ordinato fine boni temporalis, sed ad complacentiam seu mundanam gloriam, ne minùs quàm alij honoremur, aut ne illi supra nos reputentur. *Faciamus*, inquiunt, *& ipsi nobis nomen*. Tunc & æmulatio mala est, & tali æmulatione Charitas tam verè perditur quàm verè non potest consistere cum inuidia, cum superbia, cum rixis, cum murmure & aliis comitantibus vitiis;

Quidquid acquiras emulando plus perdis quàm acquiras. 511


unde omnes passim Scripturæ: *Nequam est oculus lividi, & auer-* Ecclesi. 14
tens faciem suam, & despicies animam suam. CVM sit inter vos
Zelus & contentio, nonne carnales estis? VBI Zelus & contentio, Gal. 5:
ibi inconstantia, & omne opus prauum. Iac. 3. 1

III. PUNCTVM.

QUID QUID ergo acquiras emulando, plus perdis quàm acquiras. Nam Charitatem perdis quæ longè aliis rebus antecellit. Hinc apte Sapiens, *vir qui festinat ditari, & aliis inui-* Prov. 28.
det, ignorat quòd egestas superueniet ei: nempe id perdendo quod est diutius, quid nili egestas & miseria, tantò quidem maior quantò magis ignoratur? Certe nec ipsam gloriam quam æmulando præterendit superbus, vt supra visum est, obtinebit; sed quando eam obtineret, quid tandem illa gloria præ iactura Charitatis & aliarum virtutum, ac donorum cælestium, quibus priuatur. Sabbatho Septuag.

O quàm verè Sapiens: *melius est humiliari cum mitibus quàm di-* Prov. 16.
uidere spolia cum superbis. Melius est cedere cum Charitate, quàm contendere aut contendendo vincere contra Charitatem. *Est*
qui multa redimat modico pretio, & restituens ea in septuplum, inquit Ecclesi. 29;
Ecclesiasticus: hic est scilicet qui Charitatem conseruat quolibet aliquo pretio, quod qualecumque sit, semper erit modicum & septuplo minus quam Charitas.

Nec dicas te non tua quærere sed quæ aliorum, quæ familiæ tuæ sunt, quæ Ecclesiæ & quæ maioris Dei gloriæ: Nam hæc inuolucra sunt quibus æmulatio regitur; Et hoc Diotrophes, ille qui primatum amabat gerere in Ecclesia, contra sanctum Ioannem, obiebat; quæ tamen erant, *verba maligna quibus hic emu-* Ioan. 3:
lator garriebat in Diuinum Apostolum, vt in sua postrema monet Epistola. Caue hoc omni modo, sicut monet Apostolus: *Non*
in contentione, & emulatione, sed induimini D. Iesum Christum. Rom. 13.
Et rursus: *Non efficiamur inanis gloriæ cupidi, inuicem prouocantes, inuicem inuidentes.* Quod & symbolico suo more Sapiens: Gal. 5.
Perde pecuniam propter fratrem & amicum tuum; quasi diceret, pro Ecclesi. 29;
conseruanda Charitate nihil non perdendum est, cum alioquin plus perderes, Charitate perditâ, quàm si vt feruetur Charitas, cætera perirent omnia. Quid contra opponis? Vide supra, Sabbatho Septuagesimæ: & infra, FERIA 5. quæ est Octaua Ascensionis,



FERIA SEXTA.

DVO EX APOSTOLIS, PETRVS
ET IOANNES CVRRENTES AD SEPVLCHRV M,
OSTENDVNT CHARITATEM
quæ non agit perperam.

Currebant duo simul. Ioan. 20.

VERITAS PRACTICA.

Minima quævis inordinatio cordis immundi, maior est
maximâ quavis inordinatione huius Mundi.

RATIO EST, Quia quævis inordinatio cordis immundi est
inordinatio Rationis.

Sed inordinatio Rationis quantumvis minima, maior est maxima
quavis inordinatione totius mundi.

Ergo minima quævis inordinatio cordis immundi, maior est ma-
xima quavis inordinatione mundi. Quod pauci certe in praxi
norunt.

I. P V N C T V M.

REVOCA NDA in memoriam quæ obiter antè com-
memorata sunt de duobus Apostolis Petro & Ioanne,
currentibus ad Sepulchrum; & paulo attentius confide-
randa. Rem accuratè describit ipse sanctus Ioannes, & primò
agens de Maria Magdalena; Venit, inquit, ad Simonem Petrum,
& ad alium Discipulum quem amabat Iesus, & dicit illis: Tulerunt
Dominum de monumento, & nescimus ubi posuerunt eum. Exiit
ergo Petrus & ille alius Discipulus, & venerunt ad monumentum.
Currebant autem duo simul, & Ille alius Discipulus præcucurrit
citius

Minima quævis inordinatio cordis, maior est maxima, &c. 513

citius Petro, & venit primus ad monumentum. Et cum se inclinasset, vidit lintheamina posita, non tamen introiit. Venit ergo Simon Petrus sequens eum, & introiit in monumentum, & vidit lintheamina posita, & sudarium quod fuerat super caput eius, non cum lintheaminibus positum, sed separatim inuolutum in vnum locum. Tunc ergo introiit & ille Discipulus qui venerat prius ad monumentum, & vidit & credidit; Nondum enim sciebant scripturam, quia oportet eum à mortuis resurgere. Abierunt ergo iterum Discipuli ad semetipsos.

Quod singulariter de Petro narrans alius Euangelista: Et abiit, inquit, secum mirans quod factum fuerat. Sic ergo illi duo Apo- *Luc. 24.*
stoli, quam in Christum præ cæteris haberent Charitatem, suo illo cursu & intenta sollicitudine satis quidem manifeste declarant; sed quomodo sit illa Charitas quæ non agit perperam, sic paucis habe. Primò quidem ex variis interpretationibus, illa hîc tenetur quæ asserit perperam agere, idem esse ac nihil temerè agere, & vt habet Syriaca versio, nihil tumultuosè, nihil confusè, nihil intempestiuè, nihil & inordinatè; ac proinde omnia agere ex ratione & ordine: atque vt monebat Apostolus, omnia honestè & secundum ordinem.

1. Cor. 14.

Deinde verò, hoc est tam proprium Charitatì quàm ipsi Sapientix cui coniuncta est Charitas & de qua simul dicitur, quod attingit à fine vsque ad finem fortiter, & disponit omnia suauiter. Et Sap. 8. alibi, Cuncta fecit bona in tempore suo. Sicut enim de fatuo dicitur, quod non erit ei amicus, & non erit gratia bonis illius, Neq; enim *Eccles. 3.*
quod habendum est directo sensu distribuit, similiter & quod non erat habendum; Sic è contra de sapiente: Tempus & responsionem cor sa- *Eccles. 20.*
pientis intelligit, omni negotio tempus est & opportunitas. Hæc est *Eccles. 8.*
discreta & ordinata Charitas de qua fusè Patres, & iam supra dictum est.

Denique, quanta hæc fuerit in duobus Apostolis currentibus ad Sepulchrum, apparet ex his quatuor notis. Prima, non discre-
dunt, sicut alij Apostoli, mulieribus nuntiantibus Resurrectionem Christi, sed neque leuiter credunt; at prudenti consilio sus-
scepto, rem propius inspecturi, Sepulchrum ipsimet adeunt. Se-
cunda, monumentum ingressi cuncta diligenter discutiunt, at-
trectant linthea separatim, vnum ab alio seiunctum esse pruden-
ter notant, atque ita seorsim inuolutum vt aliquid inde certi
possint conicere. Tertia, de re tota simul inter se conferunt,

514 FERIA 6. Hebd. 1. post Octauam Pasche. Currebant duo simul.

sequeque mutuò corroborant in fide Resurrectionis, & confirmant. Quarta & postrema, soli apud semetipsos Mysterium contemplantur, suspiciunt, venerantur, recolunt audita quædam à Christo Domino de futura sua passione & resurrectione, sicque paulatim & ordinatè cum Diuina Gratia sese disponunt ad pleniorè fidem & Charitatem.

Hoc est agere ordinatè, hoc est agere ex Charitate quæ non agit perperam, non inconsultò, non præpropèrè & leuiter: sed omnia pensiculate & solerter. Quod vt fiat efficacius, cauenda est quæuis inordinatio cordis nostri seu quæuis affectus immunditia per quam inordinetur animus, & ipsa Charitas quæ est de corde puro, inficiatur. Nam præterquam quod ex immundo & inordinato corde vix aliquod ordinatum extrà procedat: ipsa per se sola cordis immundi inordinatio tam graue malum censi debet, vt quantumcumque sit minima talis in corde inordinatio, sit tamen maior maximâ quauis quæ extra hominem in vniuerso reperiri possit.

Ratio est euidentis quoad illam primam partem quâ dicitur, quamlibet inordinationem cordis, esse Rationis ipsius inordinationem; sic enim sumenda est propositio, vt sicut per cor immundum, omnis humani cordis deprauatio exprimitur; ita in illa deprauatione, inordinatio Rationis intelligatur. Tunc nempe dicitur inordinari Ratio, quando ex ordine suo deijcitur: deijcitur vero quando Cor nostrum aliquo deprauatur affectu: nam ordo erat vt Ratio semper præesset appetitui sensitui cordis, sic enim à Deo est ordinatum: *Sub te erit appetitus eius, & tu dominaberis illius.* At turbatur ille ordo quando Cor ita afficitur, vt sit illi affectus deprauatus: Tunc enim subest Ratio, tunc præest appetitus, *tunc in equis serui videntur, & principes ambulantes super terram quasi serui.* O deplorandam seruitutem.

II. P V N C T V M.

SED inordinatio Rationis quantumuis minima, maior est maximâ quauis inordinatione mundi.

Maximæ in mundo inordinationes sunt monstra, quando in belluis vel in hominibus aliter corpus efformatum est quàm ex natura comuni videmus ordinatum, quando aliter oculi,

Minima quævis inordinatio cordis maior est maxima, &c. 585

pedes, vel caput locatum est. Inordinatæ etiam dicuntur anni-
tempestates, quando hyeme calet aut æstate friget: inordinata
est temperies aëris vel aquarum, quando inde morbi hau-
riuntur. Inordinatus denique tūm vel plurimūm videretur mun-
dus, quando quod poëta finxit, accideret;

In caput alta suum labentur ab aquore retro

Flumina; conuersis solque recurret equis.

Terra feret stellas, cælum findetur aratro.

Vnda dabit flammæ, & dabit ignis aquas.

Ouid. l.
de Trist.

His tamen omnibus, & si quæ similes aut magis stupendæ ex-
cogitari possint inordinationes, minima quævis inordinatio Ra-
tionis, quale est vnum veniale peccatum, in quacumque mate-
ria, dicitur esse maior: Quia primò ille ordo moralis qui per-
turbatur in illa Rationis perturbatione, est in se dignior quàm
ordo totius vniuersi: vnde & eius Confusio ac Inuersio cenferi
debet grauior quàm cæteræ omnes quæ in natura, vel in arte pos-
sunt accidere perturbationes, quod quidem iam supra notatum
est ex S. Ambrosio, qui per vniuersale diluuium deletò homine
dicit cætera mundi fuisse obruta, *quod principali extincto, reliqua*
quæ inferiora erant & propter hominem facta sic simul debuerint in-
terire.

L. de Noë
& Arca
c. 4.

Deinde verò si ad mala seu damna quæ ex qualibet inordina-
tione prouenire possunt, animum applicemus; longe grauius est
malum minimæ cuiusvis inordinationis animi seu Rationis no-
stræ, quàm cæterarum omnium damna & detrimenta: quia il-
lud malum est culpæ, hoc tantum pœnæ; illud est malum Crea-
toris, hoc tantum creaturæ; illud est malum quo Deus offendi-
tur, hoc duntaxat quo natura infinitè distans læditur. Num-
quid Deo potest comparari homo?

Iob. 22.

Denique si minima quævis inordinatio Rationis, & offensa
venialis fingeretur esse necessaria ad totius vniuersi ordinem
conseruandum, satius esset totum funditus perire orbem, quàm
consentire in illam voluntariam offensionem; quia quantum-
cumque leuis esset offensio, de illa tamen verum esset quod vni-
uersum de peccato scripsisse dicitur sanctus Augustinus: *peccatum*
inhonorare Deum est, quod non debet facere homo, etiamsi totum pereat
quod Deus non est. Expende illud totum quod Deus non est: & ob-
stupesce quod tamen tam facile nulla de causa Deus offendatur!

Ttt. ij.

316 Feria 6. Hebd. 1. post Oct. Paschæ. Currebant duo simul.

Ex. 13. Et violabant me, inquit, propter pugillum hordei, & fragmen panis!
Nonne hoc stupendum!

III. PUNCTVM.

MINIMA quauis igitur inordinatio cordis immundi, maior est maximâ quauis inordinatione huius mundi: Quia cum sit inordinatio repugnans ordinationi Rationis; quanta est dignitas Rationis humanæ, vel ipsius Dei supra res alias vniuersi, tanta est in genere boni vel mali, vt dictum est, Rationis ordinatio vel inordinatio supra cæteras mundi totius ordinatas vel inordinatas formas. *Eccl. 26.* *Omnis ponderatio non est digna continentis animæ.* Quod Sapientis dictum si verum est de vna Virtute Continentiæ, quantò magis id certum de illa vniuersali Continentia, quâ se anima cum Dei gratia seruat innoxiam ab omni prorsus inordinatione affectus: & diuinum ita constanter sectatur ordinem, tum intra tum extra se, nihil vt perperam agat & perturbatè? *Prov. 31.* *Quæsiuit lanam & linum, & operata est consilio manuum suarum:* id est, in ordine & conditione sua se continens, quidquid domi vel foris egit, quidquid secum vel cum aliis gessit, sic prudenter & opportunè digesta sunt omnia, vt manus ipsæ rationem & consilium rebus agendis afferre viderentur. Sic Deus *Sap. 17.* amat ordinem & ordinatè cuncta disponit in mensura, in numero, & in pondere.

Quod certe in Christo Domino Resurgente, & suis apparente, apparet mirum in modum. Contemplare paulisper vt nihil confuse agit, nihil perturbatè, sed omnia ordinatè. Primò quidem, licet maximè desideraret suos consolari de morte sua mœstos, & in fide nutantes reuocare: expectat tamen tertium diem quo resurgat. Deinde, licet statim eos inuisere & alloqui potuisset, non tamen ita, sed pedetentim & progressu quodam facto, ab vno transit ad aliud, quo suauius & fortius omnia disponantur. Descendunt Angeli qui Resurrectionem annuntient mulieribus; Visionem Angelorum annuntiant mulieres Apostolis; Inquirunt duo primores Apostoli de re tota diligenter; Tum ipse Christus Dominus apparet Petro seorsim, ac Iacobo; Duobus postea Discipulis peregrinantibus; Postmodum vndecim simul congregatis; Ac tandem quingentis fratribus in Galilæa.

Minima quauis inordinatio cordis maior est maxima, &c. 517

Cur porro ita progressus est ! Quia *Charitas non agit perperam*, non tumultuariè, non confusè ; sed ordinate ; ab vno ad aliud ; Quod & ipsum quotidie seruat in conferendis suis donis. Nec enim insigne Castitatis, Deuotionis, Humilitatis, aut alterius perfectionis donum communicat, nisi prius ordinarios harum virtutum actus exerceas, fidelitatemque in exiguis quibusdam obiectis & casibus probaueris, vt *qui fidelis est in minimo super multa constituatur* ; Quod sapienter notauit S. Gregorius in moralibus vbi de appositis agit gradibus profectus nostri. *Apparet* ^{L. 22. Mor. c. 14.} *illis qui fidem habent in illum*, inquit Sapiens. Quibus vero non sic apparet, ij sunt qui vellent summa sine interiectis mediis : aut media sine infimis. Caue hanc inordinationem ; *subditus esto ps. Domino, & ora eum*. Vide Sabbatum hebdomadæ 3. post octauam Paschæ.



SABBATO.

APPARET CHRISTVS SEORSIM

PETRO ET IACOBO :

ET IN HIS DVOBVS APOSTOLIS APPARET

CHARITAS, Quæ non inflatur.

Surrexit Dominus verè, & apparuit Simoni.

LUC. 24.

Visus est Cepha ; deinde visus est Iacobo. I. Cor. 15.

VERITAS PRACTICA.

Humilitati tuendæ tutius est, vix de se quàm vel humiliter loqui.

RATIO est, quia id dicitur esse tutius & opportunius unicuique rei tuendæ ac conseruandæ, quod efficacius resistit eius contrario.

518 *Sabbato Hebd. 1. post Octauam Pasche. Christus apparet, &c.*

Sed contraria humilitatis efficacius resistitur, dum vix de se quis loquitur quàm si vel humiliter loqueretur.

Ergo humilitati tuenda tutius est, vix de se quàm vel humiliter loqui. Quod certe in praxi est rarum.

D. PUNCTVM.

CVM à sepulchro recessissent Petrus & Ioannes, vt vidimus, atque etiam cum à Ioanne Petrus, vt ex sancto Luca colligitur, abiisset secum mirans quod factum fuerat; tum putatur soli Petro apparuisse Christus Dominus, paulo antè quàm conueniret Discipulos euntes in Emmaus; quandoquidem ipsis reuertentibus dixerunt omnes Apostoli, Dominum verè resurrexisse, & apparuisse Simoni. O quæ colloquia! qui affectus vtriusque! Contemplare paulo attentius.

Luc. 24.

1. Cor. 15.

Quando verò apparuerit Iacobo qui dictus est minor, & qui fuit Ierosolymorum Episcopus, omnino non liquet; neque aliud de hac apparitione scitur quàm quod refert sanctus Paulus, *visum esse Iacobo Dominum.*

Sed quàm verè apparuerit in hoc utroque Apostolo Charitas quæ non inflatur, apertum est; Cum enim præ cæteris Apostolis singulari eos apparitione Christus Dominus honorasset, nihil inde præsumpserunt, nihil supra alios se extulerunt; vix de se loquuti sunt. Et quidem Iacobus ne verbum protulit quod sciat, nisi post Ascensionem Domini, ad ædificationem fidelium. Quod verò Petrus retulit, credibile est id habuisse in mandatis, quia Primus erat omnium à quo voluit Dominus alios rescire, sicut cæteros Christianos à summo Pontifice, quæ spectant res fidei; & sicut inferiores à suis Superioribus quæ spectant ipsorum regimen. Quando verò iucundum hunc congregatis Apostolis attulit nuntium, tam modestè & temperatè loquutus est, vt vel ex illa modestia & moderatione loquendi, facillimè intellexerint rem ita esse, nec dubitantes dixerint, *surrexit Dominus verè.* Si enim inflatus fuisset, forte alij æmulati essent, seseque opposuissent: at cum ei tanto consensu acquieuerint, nullus vt vnus resisterit: signum est longè eum abfuisse ab illo tumore animi, & Charitatem potius exercuisse quàm non inflatur.

Luc. 24.

Sic ergo discite eam exercendam & conseruandam, seruato potius de te tuisque silentio, aut verbis rarissimis & paucissimis, quàm vel humilibus & abiectis. Id enim carius Charitati se humiliant, quia sic melius conseruatur in sua humilitate: Quod semel dixisse, Sapienti non sufficit, sed postquam monuit: *loquere* ^{Eccles. 32} *in causa tua vix*, tùm addit; *Si bis interrogatus fueris, habeat caput responsum tuum*: Id est, summam & perpauca responde. Et Ratio cur sic melius conseruetur humilis Charitas, est euident; Nam vnaquæque res, vniuersim loquendo, eò melius conseruatur, quò à suo contrario melius protegitur, illique fortiùs resistitur. Percurre aliquas mente qualitates; calor, sanitas, scientia, sanctitas, robur & similia, nonne hoc vno conseruantur, quò à contrariis suis protegentur? *Intuere*, ait Sapiens, *in omnia opera* ^{Eccles. 33} *Altissimi, duo contra duo, & vnum contra vnum*; Quasi diceret, vnaquæque res habet suum contrarium à quo impugnetur, & à quo conseruanda est, vt seruetur. O quanti & numero & robore contra nos hostes, cùm *vita hominis super terram sit militia*, ^{Iob. 7.} & nihil aliud viuere sit quàm militare, & se ab hostibus conseruare! Quomodo pugnas? *Nec coronatur nisi qui legitime certauerit.* ^{2. Tim. 2.}

II. PUNCTVM.

SED contrario humilitatis efficacius resistitur, dum vix de se quis loquitur, quàm si vel humiliter loqueretur.

Quicumque tandem sit ille contrarius seu Dæmon, seu mundus, seu amor proprius, seu triplex simul ille hostis; aut vitium superbiæ, sic melius illi resistitur: Fit enim sapius vt verbis illis humilibus laudem potius & commendationem aucupemur, quàm humiliationem & contemptum cogitemus: nollemus enim credi quod dicimus, aut si ab alio nobis ferò diceretur quod de nobis ipsi proferimus, forte indignaremur; *natura enim* ^{L. 3 c. 54.} *callida est, & omnia ad se trahit*, vt nouerat optime Author libri de Imitatione Christi. Et aperte Sapiens: *Est qui nequiter humiliat se, & interiora eius plena sunt dolo*; vnde S. Ambrosius, *Multi ha* ^{Eccles. 19.} *bent humilitatis speciem, virtutem non habent; multi eam foris pra-* ^{Ep. 42. l. 7.} *tendunt, & intus impugnant, ad fucum praferunt, ad veritatem abiurant, ad gratiam negant, Est enim qui nequiter humiliat se.*

Nihil autem tale est in silentio seu seruata de se loquendi mo-

520 Sabbato Hebdom. 1. post Oct. Paschæ. Christus apparet, &c.

deratione, cum præcipue seruatur hoc animo, ne si de te quocumque modo loquaris, amor proprio satisfacias qui hos libenter sermones inducit, unde Idem iterum Sapiens: *Attende ne seductus in stultitiam humilieris, & ne humiliatus in stultitiam seducaris.* Recte monet attendendum, quia ibi deceptio & seductio; nam etsi primò esset humilitas, tamen loquendo euanescebat, & vanitas se ingerit, sicut edendo sensualitas, quod optimè notat S. Gregorius. Hinc vero ipsis perfectis viris angustia remanent animi, nùm blandius aut ampliùs de se loquuti fuerint quàm veritas aut necessitas postulabat. Quam breuem apte alius Sapiens: *qui custodit os suum & linguam suam, custodit ab angustiis animam suam.* Et Propheta, *In spe & silentio erit fortitudo tua.*

III. PVNCTVM.

SIC ergo humilitati tuenda tutius est, vix aut ne vix de se quidquam loqui, quàm vel humiliter loqui: Cum sic Charitas & humilitas melius silentio conseruentur quàm loquela, quæ vel est simulata humilitas, vel præsumpta Caritas in aliorum ædificatione, vel indiscretus Zelus ad alios coarguendos: vel quidquid tandem sit, vix potest esse quid tam tutum & efficax ad virtutis integritatem quàm silentium, quod, vt ait S. Gregorius Nazianzenus, semper præferendum est loquelæ nisi quando est necessarium loqui: raro est autem necessitas de se loquendi humiliter, nisi in Confessione, vel redditione Conscientiæ, vel simili quodam casu de quo non est hîc quæstio, cum de his tantum agatur personis quæ, vt sibi persuadent, non nisi humilitatis exercendæ gratia, humiliter & abiectè de se loquuntur, quod est suspectum, dubium, illusorium & simulationi proximum; ac proinde cauendum, sicut expresse S. Hieronymus monet; *Humilitatem sequere non quæ ostenditur & simulatur gestu corporis, aut fracta voce verborum; sed quæ puro cordis affectu exprimitur.* Multò deformior est illa superbia quæ sub quibusdam humilitatis signis latet: Nescio enim quomodo turpiora sunt vitia quæ virtutum specie colorantur. Quasi diceret, tantum abest vt sit humilitas, sic se exterius humiliare, quin potius mera est sæpe superbia, & eò quidem damnosior quò virtute humilitatis, magis obtegatur.

Agnoscant se illi cum ab aliis humiliantur, an ita libenter audiant

Ep. 14. ad
Celant.

Humilitati tuenda tutius est, vix de se loqui, &c. 521

diant de se abiectè loquentes, sicut illi loquuntur; hæc est enim vera veræ humilitatis nota, vt est in Cantico Iudith: *Apparuerunt humiles mei, dum compunxerunt eos.* Humiles mundi apparent dum se compungunt & humiliant, sed humiles Dei apparent dum ab aliis compunguntur. Quamobrem audiamus Apostolum: *Eandem Charitatem habentes, vnanimis, idipsum sentientes, Phil. 2: nihil per contentionem, neque per inanem gloriam, sed in humilitate superiores sibi inuicem arbitantes, non quæ sua sunt singuli considerantes, sed quæ aliorum, Hoc enim sentite in vobis, quod & in Christo Iesu.* Vide in 3. p. Fer. 6. hebdomadæ 7.





DOMINICA II. POST PASCHA.

Ego sum Pastor bonus.

DE his & præcedentibus ac sequentibus Christi Domini verbis quæ habentur decimo capite sancti Ioannis, tota est hebdomada vigesima prima, in 4. parte, ubi sex proponuntur Veritates, quibus hæc adjicitur quæ singulariter videtur recolenda, ex his boni nostri Pastoris verbis.

Et animam meam pono pro ouibus meis. Ioan. 10.

VERITAS PRACTICA.


Nihil æstimatione speculatiua pretiosius Animâ nostrâ: sed practicâ nihil vilius.

RATIO huius postremæ partis quæ præcipuè consideranda est, hæc inter alias afferri potest, quòd illud inter cetera reputatur vilius cuius perfectio aut detrimentum in nostra est potestate, minùs tamen curatur quàm reliqua.

Sed perfectio vel detrimentum animæ nostræ, in nostra positum est potestate, & minus tamen curatur quàm reliqua.

Ergo licet æstimatione speculatiua nihil sit pretiosius anima nostra; practica tamen nihil est vilius; quod est omnino pudendum & pauendum.

I. P V N C T V M.



V A M reuera Christus sit bonus Pastor, cum ex multis agnosci possit, tum ex hac præcipue nota, quod ponat animam suam pro ouibus suis. Expende verba, & rem verbis comprehensam. O Pastoris bonitatem, ô stoliditatem ouis, si illam non agnoscat & recolat!

Hinc certe patet nihil esse pretiosius animâ nostrâ; nam vnâquæque res æstimatur iudicio periti & intelligentis viri; Quis autem intelligentior Christo Domino? Ecce is verò pro redimenda vel vna anima dat animam suam, nonne igitur tanti valet quanta est Eius Anima, cum illam tanti ducat?

Certe si agatur de pretio domus aut alterius cuiusdam rei, quæritur quanti olim vendita vel empta fuerit; & si quidem emptor fuerit sapiens & intelligens, tum res tanti æstimatur, quanti est empta. Sic ergo cum anima nostra quæ perierat, empta sit ab Eo qui nec falli potest nec fallere, cum sit ipsa sapientia; tanti profectò valere dicenda est quanti eam emit; Quale autem quantumcumque est illud pretium? Audi anima mea, audi pretium tuum & obstupece: *Non corruptilibus auro vel argento redempti estis, sed pretioso sanguine quasi agni immaculati Christi.* Si vniuersus terrarum orbis, si quidquid est auri & argenti, si omnium hominum vitæ, si creata denique omnia pro anima tua essent data, quanti eam æstimares? at pretioso Christi sanguine quàm longe sunt inferiora omnia! vnde Apostolus, *Empti estis pretio magno, glorificate & portate Deum in corpore vestro:* quasi diceret, tantum portare vos putatote quātus est Deus. 1. Pet. 1. 1. Cor. 6.

Atque hæc quidem fusiùs tum discurrendo, tum considerando produci possent; verum in suprâ dictam hebdomadam reseruatum est hoc argumentum, atque vt proposita Veritate admonemur, satis id certum est & probatum, in speculatione, vt dicitur; *In praxi vero, vix est aliud quid, quod æstimemus vilius quàm illa ipsa anima,* cuius nunc pretium demiramur. Quamobrem hoc est potissimum expendendum & prospiciendum. Sic autem primò declaratur, exponendo quid sit in praxi & effectiue rem aliquam plus vel minus æstimare. Nempe si eius perfectio aut de-

324 Dominica 2. post Pascha. Et animam meam pono pro, &c.

trimentum sit in nostra potestate, tanti censebimur rem facere, quantum caueamus ne quid detrimenti accipiat: aut quantum curabimus vt crescat, proficiat & augeatur. *Per agrum hominis pigri transiui*, ait Sapiens, & *per vineam viri stulti*, & ecce totum repleuerant *urticae*. Certe hi ostendebant se parui facere suum agrum, suamque vineam. *In pigritiis humiliabitur contignatio*, ait Idem, in alio libro, & *in infirmitate manuum perstillabit domus*: Neque is etiam se domum suam satis curare indicat, cuius vider contignationem dissolui, nec prouidet. Sic igitur vniuersim de omnibus, tanta in praxi est cuiusque rei æstimatio, quanta est eius cura; & tanta est eius cura quantum quisque cauet ne deperat, aut quantum procurat vt proficiat. *Pro quo sollicita timuisti?* sic ait animæ tuæ Propheta; Dic quod porro sentis; & hinc infer illud esse quod magis in praxi æstimas.

II. PUNCTVM.

ATQVI præ cateris quæ sunt in nostra potestate, vix est aliud quid cuius detrimentum minus curemus aut perfectionem, quam anima nostra.

Percurre omnia, quantum tempus & animus ferent, & vide si quid sit quod habere velis malum, detritum, imperfectum, aut non æque bonum ac possis? Si de veste agitur, nonne commodiorem quam possis, tibi comparas? Si quid in illa fortè dissutum: si quid lutosum sit aut inuenustum; nonne statim manus adhibetur? Si domus, si cubiculum, si sedile, si liber, si calamus, si atramentum, si charta aut quid demum eligatur, nonne pro facultate seu possibilitate rei comparandæ, conquires tibi decentiorem & commodiorem? Nonne sic diligenter conquistam non minore diligentia conseruabis, ac solcite prouidebis ne qua in parte deteratur vel pereat? Itane vero de Anima? Nonne scis, vno vel veniali peccato plus illi accidere detrimenti, quam si vel vestis luto infecta esset, vel corpus vlcere, atque ipsa facies deformi macula notaretur? Nonne audiuisti toties quid animæ in peccato dicatur; *maculat a es in iniquitate tua, coram me, dicit Dominus Deus: Quam vilis facta es nimis, iterans vias tuas!* An verò ita prouides mundandæ animæ tuæ sicut corpori, vel sicut vesti? Si sanitas corporis in tua esset potestate sicut est sanctitas

Animæ cum Gratia : si facilitas bene loquendi, sicut bene viuendi ; si apud homines gratia, sicut apud Deum ; si quid denique est in humanis quod magis desideres, si æquè posses perficere, atque illud quod à te desideratur pro perfectione Animæ tuæ : nonne illud quamprimum assequeris ? Nonne te diuitem, nonne sanum ? nonne eloquentem ? nonne potentem, aut ea dote animi vel corporis quam cuperes exornatum, sine mora præstares ? Iam verò cum, Diuina fretus ope, nihil sit ex omnibus quæ ad Animæ tuæ perfectionem vel salutem desiderantur quod non præstare possis, quousque tandem remoraris ? At verò illa tarditas, illa segnities, ille animi languor & mera incuria, circa perfectionem & animæ tuæ bonum, nonne id satis superque conuincunt, quod hîc erat demonstrandum, vix aliud esse in humanis, cuius detrimentum aut perfectionem magis possis, & minus cures ?

Quod cum sit tam perspicuum vt minime de eo dubitari possit, quia tamen ita est perspicuum & indubitatum, tanto minus credes, nisi ab amore proprio caueas qui multa iactitabit se facere pro salutē animæ, quæ non faceret pro quouis alio negotio ; nec tibi persuaderi patietur quod dictum est, si semel tibi persuaserit te id omne quod possis facere, nec plura posse quàm facias. Quamobrem audi quid contrà Dominus, audi quid contra præsumentem de suis operibus animam comminetur : *Ego* 1er. 48. *scio, ait Dominus, iactantiam eius, & quod non sit iuxta eam virtus eius, nec iuxta quod poterat, conata sit facere : Quasi diceret, Rem ego melius noui quam tu : satis te putas facere si quædam faciliora facias, & ne difficiliora simul aggrediaris, impossibilitatem excusas ; sed falsò, nam scio quid possis cum mea gratia, & certò scio te non adhibere conatum quem possis, & quem adhibes in aliis negotiis tuis. Quid respondes ?*

III. PUNCTVM.

PATET ergo quàn verum sit nihil quidem æstimatione speculatiua excellentius esse animâ, & salutē nostrâ ; sed practica & effectiua, nihil vilius & magis neglectum. Quam quidem Veritatem Serm. 22. in Matth. sanctus Augustinus sic aperte confirmat : *Quid est quod velis habere malum ? dic mihi : omnino nihil, non uxorem, non filium, non seruum, non tunicam, postremò non caligam : & tu vis habere malam*

526 Dominica 2. post Pascha. Et animam meam, &c.

vitam, rogo te prapone vitam tuam caligæ tuæ! Omnia tua tibi pulchra, & tu ipse fœdus es. Si tibi possent respondere bona tua, nonne clamarent, sicut tu nos bona vis, & te nos volumus habere bonum Dominum: tua voce interpellant contra te Dominum tuum, Ecce bona tanta dedisti huic, & ipse malus est.

Et certe, quando sola consideraretur dignitas animæ; quando sola eius immortalitas, & futuræ vitæ Conditio in alterutram æternitatem vel Cœli vel Inferni; nonne hæc consideratio sufficeret ut quod toties commendatur, *Custodias te metipsum & animam tuam sollicitè?* Verùm accedente ratione quæ à Christo Domino petitur de pretio animæ. quo ipse eam æstimavit, mirum quantum crescat obligatio augendæ nostræ sollicitudinis circa eius salutem. Vere enim dictum est à S. Ambrosio: *In teipso quod es, non ex te debes æstimare, sed ex Christo:* Quamobrem si Christus nos tanti fecit, quanti æstimanda est Anima eius & Vita quam pro nobis dedit, quid est quod in praxi & re ipsa nos aliter de salutis & animæ pretio decernamus? Nam præterquam quod iniuriam animæ facimus, redundat in Christum iniuria, de cuius Sapientia & Dignitate tantum detrahimus, quantum de animæ nostræ pretio seu practica salutis æstimatione. Aut enim censendum est non illum esse sapientem qui tale pretium dederit pro anima; aut certe pretium illud non esse tanti æstimandum, ut inde ad animæ ponderandum valorem accedat aliquid. Nam si Emptor est sapiens & intelligens, si pretium sanguinis quod datum est non ignoratur, quid restat quin res emptæ iudicetur cara & pretiosa? Aut si non ita iudicatur, nec talis in usu & praxi habetur, unde id fieri potest nisi quod de pretio rei emptæ. vel de Emptoris sapientiâ minus dignè sentiatur?

Itane vero Christo detrahere velles & in Deum blasphemare? *Custodite igitur solcite animas vestras! O ANIMA mea,* inquiebat sanctus Augustinus, *insignita Dei imagine, redempta Christi Sanguine, dilige illum à quo tantum dilecta es, intende illi qui intendit tibi, quare quarentem te, Esto sollicita cum sollicito, cum vacante vacans, &c.*

Et aptè sanctus Bernardus, *Quid ego infœlix quò me vertam, si tantum thesaurum, si pretiosum depositum istud quod sibi Christus Sanguine proprio pretiosius indicavit, contigerit negligentius custodire? Si stillantem in cruce Domini Sanguinem collegissem, essetque re-*

Nihil æstimatione speculatiua pretiosius anima nostra, &c. 527
positus penes me in vase vitreo, quod & portari sapius oporteret, quid animi habiturus essem in discrimine tanto? Et certe id seruandum accepi pro quo Mercator non inspiens, ipsa utique sapientia, sanguinem illum dedit: sed & habeo thesaurum istum in vasis fictilibus, & multo plura quàm vitreis immiscere pericula videantur. Expauescere ad hæc & prospicere cautiùs.

Vide suprà in hac parte, Feria 6. hebdomadæ Quinquagesimæ: Et in 3. parte, Feria 2. hebdom. 1. post Oct. Pentecostes.



HAC HEBDOMADA, dum apparet Christus duobus Discipulis peregrinantibus, apparet Charitas quæ non est ambitiosa; & cum huius Apparitionis multæ occurrant circumstantiæ valde considerandæ; multi etiam Ambitionis se offerunt actus, quibus vera Charitas sese opponit, & de quibus in singulos hebdomadæ dies.

FERIA SECVNDA.

CHRISTVS APPARENS PEREGRINIS

**IN HABITU PEREGRINI, OSTENDERE INCIPIT CHARITATEM MINIME
AMBITIOSAM.**

Ipse Iesus appropinquans ibat cum illis. Luc. 24.

VERITAS PRACTICA.

Sicut vinum nouum, sic nouus honor maxime temperandus.

RATIO est manifesta, quia idcirco vinum nouum maxime temperandum est, quod nouitate sua blandiùs excitet ad potum, & facilius inebriet.

528 Feriâ 4. Hebd. I. post Oct. Paschæ. Ipse Iesus appropinq. &c.
Sed nouus honor ita blanditur, & suo modo mentem inebriat.
Ergo maxime est temperandus; neque minus ac vinum nouum.

I. P V N C T V M.

ILLA ipsa die Resurrectionis Domini, vt ait sanctus Lucas, duo ex Discipulis ibant in Castellum quod erat in spatio stadiorum sexaginta ab Ierusalem, nomine Emaus: & ipsi loquebantur ad inuicem de his omnibus quæ acciderant. Et factum est dum fabularentur, & secum quærerent, & ipse Iesus appropinquans ibat cum illis: oculi autē eorum tenebantur ne eum agnoscerent.

Ex his paucis, primò intellige Christum Dominum his duobus peregrinis vt peregrinum apparuisse, sic enim postea peregrinum eum vocant, Tu solus, inquit, peregrinus es in Ierusalem, & non cognouisti quæ facta sunt in illa, his diebus; Sic & Diuus Gregorius, quia adhuc in eorum cordibus peregrinus erat à fide, talem se eis exhibuit in corpore, qualis apud illos erat in mente.

Hom. 23.
in Euang.

Deinde verò expende quanta Charitate, & quàm longè remota ab omni ambitione, se Dominus velut peregrinum peregrinis coniunxerit! Fuit ille quidem semper omni honore & gloria dignus, sed post Resurrectionem cū à statu vitæ mortalis & passibilis transisset in aliud vitæ genus longe sublimius & gloriosius; certe hic humilis peregrini status & habitus longe minùs ei conuenire videbatur; Et tamen quod ante mortem & Resurrectionem non legitur fecisse, ita se modo demisit & humiliavit, vt quo tempore in statum gloriosorem euectus fuerat, Ipse se in humiliorem demittat! ò Charitatem verè humilem & verè non ambitionem!

Quàm longè aliter homines sentiunt, qui dum ad nouos honores euehuntur, noua etiam omnia statim volunt; habitum, seruos, domos, supellectilem, & vniuersa quæque conformia suo nouo statui, adeo vt ipse eorum animus immutetur, & ita deprauetur, vt qui probatis ante erant moribus, insolescant, & velut ebrii à sana mente dimoti videantur: Turbati sunt & moti sunt sicut ebrius: & omnis Sapientia eorum deuorata est. Hinc ergo Veritas apte proponitur; Vt sicut vinum nouum, ita nouus honor, exemplo Christi Domini, temperetur. Hoc enim habet vinum nouum vt sua nouitate blandius excitet ad frequentiores potus, & quia nondum

Ps 106.

Sicut vinum nouum, sic nouus honor maxime temperandus. 529

nondum satis ematuruit & decoctum est, facilius etiam inebrietur nisi valde temperetur, vnde Sapiens de hoc præcipue: *Ne intuearis vinum quando flauescit, cum splenduerit in vitro color eius, ingreditur blandè, & in nouissimo mordebit vt coluber, & sicut regulus venena diffundet: oculi tui videbunt extraneas, & cor tuum loquetur perversa. Et eris sicut dormiens in medio mari, & quasi sopitus gubernator amisso clauo: & dices, verberauerunt me sed non dolui; traxerunt me & ego non sensi, quando cuigilabo & rursus vina reperiam?* Hæc est insensibilitas humani cordis in suis miseriis, valde deploranda!

II. PUNCTVM.

SED nouus honor ita blanditur, & mentem suo modo inebriat. Sic passim Scriptura loquitur, *Va corona superbia, ebriis Ephraim, & flori decidenti: pedibus conculcabitur corona superbia ebriorum.* Et post pauca: *nescierunt præ ebrietate, absorpti sunt à vino, errauerunt in ebrietate, nescierunt videntem, ignorauerunt iudicium,* Id est, sui omnino obliti velut ebrij, neque rationem, neque se admonentes audiunt. Et alibi: *Quomodo vinum potantem decipit, sic erit vir superbus & non decorabitur.* Quæ autè sequuntur aptè describunt hunc virum superbum & suo nouo statu insolentem, ac proinde se risui & contemptui exponentem; sic enim pergit Propheta: *Qui dilatauit quasi infernus animam suam, & ipse quasi mors, & non adimpletur, & congregauit ad se omnes gentes, & coacernauit ad se omnes populos. Numquid non omnes isti super eum parabolam sument, & loquelam anigmatum eius? Et dicetur; va ei qui multiplicat non sua; vsquequo & aggrauat contra se densum lutum? Numquid non repente consurgent qui mordeant te, & suscitabunt lacerantes te, & eris in rapinam eis?* Quasi diceret; sic se superbus effert vt vellet omnes homines in se vnum intentos; verum suâ illâ elatione ita se ridiculum præbet vt quotquot eum vident, despiciant; Nam, vt Sapiens refert, *sicut eructant præcordia fœtentium,* & sicut perdix inducitur in caueam, & vt caprea in laqueum, sic & cor superborum; Id est, cum superbus maxime displiceat aliis, non id aduertit, & falsò persuasus se honorari, sic misère inducitur in errorem, & eò magis se ridendum exhibet, quo se magnificentius effert. Nonne hoc est esse ebrium? nonne hoc sæpe vidisti in aliis? At nonne tu etiam talis es visus!

III. PUNCTVM.

- S**ICVT igitur ne vinum nouum inebriet, oportet vt maxime temperetur, ita honor nouus: Cùm non minus suo modo quàm vinum, mentem euertat, nisi temperetur. *In vestitu ne glorieris vmquam*, ait Sapiens, *nec in die honoris tui extollaris*. Idemque rursus, *Rectorem te posuerunt? Noli extolli, esto in illis, quasi vnus ex ipsis*. Certe hoc pauendum, vt qui ante susceptum munus digni munere videbantur, postea verò se indignos reddant,
- 1. Reg. 15.** *Numquid cùm paruulus esses in oculis tuis, caput in tribus Israel factus es?* ait Sauli Samuel, perinde quasi diceret, vnde ergo ista gloriatio postquàm electus es ad hanc dignitatem, cùm ante electionem non ita superbires? Ideone efferri debes contra Deum quia te Deus euexit altius? An non potius, quantò maior es tanto te in omnibus humiliare debes vt inuenias gratiam? An nescis quod sicut Deus humiles exaltat, sic exaltatos humiliat, nisi se in humilitate conseruent?
- Dan. 5.** Hoc admodum luculente Daniel Regi Balthazari, de ipsius Patre Nabuchodonozore declarauit. *Quando, inquit, eleuatum est cor eius, & spiritus illius obfirmatus est ad superbiam: depositus est de solio regni sui, & gloria eius ablata est, & à filiis hominum eiectus est*. Et post pauca: *Tu quoque filius eius Balthazar, non humiliasti cor tuum, cùm scires hac omnia; & quæ plura pergit ad temperandos animos valde vtilia*.
- Prou. 30.** Hoc est vnum ex tribus per quæ ait Sapiens moueri terram, nempe *seruus cum regnauerit*; & hoc idem est quartum quod affirmat *sustineri non posse, nempe ancilla, cum fuerit hæres Domina sua*.
- Ecclesi. 18.** *Memento paupertatis, inquit alius, in tempore abundantia, & necessitatum paupertatis, in die diuitiarum. A mane vsque ad vesperam immutabitur tempus, & hac omnia citata in oculis Dei*: Id est, facilis & pene subitaneus est transitus à bono statu in alium: & à foelici in miserum: quapropter viuendum temperatè in illa rerum omnium suspensione & vicissitudine; Nec nimis te abjicias & desperes humiliatus: Neque nimis exultes & præsumas exaltatus: sed in medio quodam consistens, & sicut Angelus Dei nec benedictione, nec maledictione mouearis, vt de Dauide dicitur.
- Vide in hac parte, Dominica 2. Quadragesimæ.



FERIA TERTIA.
DE FAMILIARI COLLOQVIO
CHRISTI DOMINI CVM PEREGRINIS.

Qui sunt hi sermones quos confertis ad inuicem ambulantes, & estis tristes? Luc. 24.

VERITAS PRACTICA.

Hic ascendit ad summos, qui descendit ad infimos.

SENSVS est quod quantò quis est maior, tantò magis reuera crescit, si se ad inferiores demittat.

RATIO est, quia tantò quis magis reuera crescit, quanto apud Deum & apud homines in maiori est pretio & aestimatione. Sed qui se ad inferiores lubens demittit, hic maiori est in pretio & aestimatione apud Deum & homines.

Ergo hic etiam eò magis reuera crescit, & meretur ascendere ad summos viros, qui sic descendit ad infimos.

I. PUNCTVM.

HIC pergit Dominus ostendere Charitatem non ambitiosam, cum statim atque sese adjungit duobus peregrinis, se ita familiarem illis exhibet, quasi vnus ex illis aut esset, aut esse vellet, nulla prorsus habita ratione suæ Dignitatis. Sic enim Euangelista; *Et ait ad illos: Qui sunt hi sermones quos confertis adinuicem ambulantes, & estis tristes? Et respondens vnus cui nomen Cleophas, dixit ei, Tu solus peregrinus es in Ierusalem, & non cognouisti qua facta sunt in illa, his diebus? Quibus ille dixit, Qua? Et dixerunt: de Iesu Nazareno, qui fuit Vir Propheta, po-*

532 FERIA 3. Hebd. 2. post Oſt. Paſchæ. *Qui ſunt hi ſermones, &c.*
tens in opere & ſermone, coram Deo & omni populo.

Hic ſilte, & primò illud expende, quantæ Charitat's fuerit
Chriſto Domino ſic conuenire mœrentes & de ſe ſolicitos diſci-
pulos; tùm quàm longe ab omni ambitione remota tuerit illa
Charitas, quæ ita familiariter eos interrogat, & audit colloquen-
tes, vt inter ſocios & æquales nihil familiarius cogitari poſſit.
Non ſic mundani, non ſic elati & ſuperbi, qui quò ditiores &
eminentiores ſunt, eo magis pauperes & infimos dedignantur,
Eccleſ. 13. vt præclare Sapiens; *Venatio, inquit, leonis, anager in eremo; ſic
& paſcua Diuitum, ſunt pauperes; Et ſicut abominatio eſt ſuperbo,
humilitas: ſic & execratio diuitis, pauper. Diues commotus confirma-
tur ab amicis ſuis, humilis autem cum ceciderit, expelletur & à notis.
Diuiti decepto multi recuperatores, locutus eſt ſuperba, & iuſtifica-
uerunt illum; humilis deceptus eſt, inſuper & arguitur: locutus eſt
ſenſatè, & non eſt datus ei locus: Diues locutus eſt, & omnes tacue-
runt, & verbum illius uſque ad nubes perducent; Pauper locutus eſt,
& dicunt, quis eſt hic, & ſi offenderit, ſubuertent illum.* Hæc eſt am-
bitionis humanæ iactantia & impietas, contra quam Chriſtus
Dominus nos docet hodie, quod poſtea dicebat Apoſtolus: *Gra-
tis & Barbaris, ſapientibus & inſipientibus debitor ſum.*
Rom. 1.

Quod vt facilius imiteris; diſce ex Veritate propoſita, nihil
tibi vîquam deperiturum ſi te ad inferiores demiſeris; Imo &
hinc vel maxime promouendum & reuera creſcendum, atque ad
ſummos viros aſcenſurum.

Quid eſt enim reuera creſcere niſi apud Deum & homines in
maiori eſſe exiſtimatione? Hoc vno conſtat omnis honor & glo-
ria, ſi apud alios præclare audias; & quò aliquis de ſe præcla-
riùs alios homines ſentire & loqui putat, eò ſe gloria & honore
auctum ac cumulatum credit. *Pſ. 61.* *Verumtamen vani filij hominum, men-
daces filij hominum in ſtateris, vt decipiant ipſi de vanitate in idip-
ſum.* Quàm fallant & fallantur homines, ſuis in iudiciis & opi-
nionibus, quis non videt? Apud Deum ſimul & homines creſcat
& magnus ſit oportet qui reuera creſcere dicendus ſit. Iudicium
2. Cor. 10. enim Dei nec falli nec fallere poteſt: vnde Apoſtolus: *Qui glo-
riatur, in Domino gloriatur: non enim qui ſeipſum commendat ille
probatuſ eſt, ſed quem Deus commendat.* Ac propterea quando
prædicatur futura magnitudo ſancti Ioannis Baptiſtæ, aut cu-
iuſcumque ſanctorum, expreſſe additur, *coram Deo, vel in conſpe-*
Luc. 1.

et Dei, quia, ut iam suprà ex S. Augustino relatum est; qui ab hominibus solum laudatur, vituperante vel non laudante Domino; non defendetur nec liberabitur ab hominibus, indicante & condemnante Domino.

II. PUNCTVM.

SED qui se ad Inferiores lubens demittit, maiori est in pretio & exsistimatione apud Deum & homines.

Apud Deum quidem, tam certò constat quàm indubitatum est à Deo talem humilitatis actum commendari; Quid autem crebrius & frequentius in scripturis? *Qui humiliatus fuerit, erit in gloria, & qui inclinauerit oculos, ipse saluabitur.* *QVANTO magis es, humilia te in omnibus, & coram Deo inuenies gratiam: quoniam magna potentia Dei solius, & ab humilibus honoratur; Quasi diceret Sapiens, quod sicut humilitate humilis Deum præcipuo quodam cultu honorat: ita & Deus humilem singulari quadam gratia & honore prosequitur.* *Iob. 22. Eccl. 3.*

Apud homines vero, ipsa patet experiëntiâ, ipsoque animi sensu quo vel mouemur contra ambitiosos, vel quo ad humiles inclinamur. Nam quantum odibilis est coram Deo & hominibus superbia, ut ait Sapiens: tam iucunda & accepta est omnibus vera humilitas & modestia; Vnde Dominus hoc etiam proponebat motiuum ad virtutis commendationem contra vitium oppositum: *Cum inuitatus fueris ad nuptias, non discumbas in primo loco, ne forte honoratior te sit inuitatus ab illo, & veniens is qui te & illum vocauit, dicat tibi: da huic locum, & tunc incipias cum rubore nouissimum locum tenere; Sed cum vocatus fueris, vade, recumbe in nouissimo loco, ut cum venerit qui te inuitauit, dicat tibi: Amice ascende superius; tunc erit tibi gloria coram omnibus discumbentibus: quia omnis qui se exaltat, humiliabitur; & qui se humiliat exaltabitur.* *Ibid. 10. Luc. 14.*

Quâ quidem parabola nihil ad rem nostram aptius poterat dici, quia simul comprehendit iudicium Dei & hominum circa humilitatis actus, quod tale est vniuersim ut quo se quis magis humiliat, eo magis æstimeretur & probetur. *Humilia respicit in celo & in terra.* Quid notius, quid crebrius inculcatum? Et tamen quid minus creditum?

III. PUNCTVM.

ERGO hic etiam magis reuera crescit qui se ita ad inferiores demittit: Cum sic apud Deum & homines in maiorem veniat exultationem & commendationem. Sic rursus Sapiens: *Superbum sequitur humilitas, & humilem spiritu suscipiet gloria.* Prover. 29. Nec non Apostolus: *Quod ascendit, quid est nisi quia & descendit? Qui descendit, Ipse est & qui ascendit.* Ephes. 4. Quæ primo dicuntur de Christo Domino, tum de cæteris omnibus qui ad eius imitationem se libenter demittunt, & ad infimos quosque descendunt. Sic præclare S. Bernardus; *Christus, inquit, cum per naturam Divinitatis non haberet quò cresceret vel ascenderet, quia ultra Deum nihil est; per descensum quomodo cresceret, invenit, veniens incarnari, pati, mori ne moreremur in æternum: propter quod Deus exaltavit illum, quia resurrexit, ascendit, sedet ad dexteram Dei. Vade & tu fac similiter; neque enim ascendere potes nisi descenderis.* Serm. 2. in Ascens. Dom.

Quæ cum generatim de omni humilitatis actu valeant, tum vero hic, praxim applica ad eam virtutis partem quæ à Christo imitanda proponitur; ut quoties inciderit occasio, libenter te demittas ad inferiores, si quos habes; vel ad ipsos qui occurrunt infimæ plebis homines. Caue hinc timeas, ne quid tibi honoris depereat, cum potius inde vel plurimum augeatur. Hoc & monabat Sapiens: *Congregationi pauperum affabilem te facito: Declina pauperi sine tristitia aurem tuam, & redde debitum tuum, & responde illi, pacifica in mansuetudine.* Eccles. 4. Quod & luculentè sanctus Iacobus; *Nolite, inquit, in personarum acceptione habere fidem Domini nostri Iesu Christi gloria,* quasi diceret, vos quibus hæc gloria collata est ut in Iesum credatis, nolite diuites præferre pauperibus, cum potius pauperes Christus diuitibus prætulit; Sic enim subdit sanctus Apostolus; *Nonne Deus elegit pauperes in hoc mundo, diuites in fide, & hæredes Regni, quod repromisit Deus diligentibus se? vos autem exhonorastis pauperem!* Tum post pauca; *sitamen legem perficitis regalem secundum scripturas: Diliges proximum tuum sicut teipsum, benefacitis: si autem personam accipitis, peccatum operamini redarguti à lege, quasi transgressores:* Hoc est, cum diligendi sint omnes ex præcepto Charitatis, ipsi etiam Diuites sunt amandi & colendi, sed non ratione diuitiarum seu

personæ diuitis in preiudicium & contemptum eorum qui non sunt diuites.

Nonne in hoc erras? An ita facile cum pauperibus atque diuitibus conuersaris? Cum his vero quando colloqueris, quæ sunt tua colloquia? Quid responderes Christo interroganti; *Qui sunt hi sermones quos confertis ambulantes?* An de Iesu, vel de Mundo? An de Cœlo vel de terra? *Qui est de terra, de terra est, & de terra* Ioan. 3: *loquitur. IPSI de mundo sunt, ideo de mundo loquuntur, & mundus eos audit: Nos ex Deo sumus. Loquela tua te manifestum faciet.* I. Ioan. 4: *Et ex verbis tuis iustificaberis aut condemnaberis.* In hoc diligenter Matth. 12: attende. Et vide in hac parte Feria 4. hebd. 3. Quadragesimæ.



FERIA QVARTA.
CHRISTVS DE OPPROBRIIS
SVÆ PASSIONIS LIBENTER AUDIT
ET LOQVITVR.

*Quomodo Eum tradiderunt summi Sacerdotes, &
& Principes nostri, in damnationem mortis, &
Crucifixerunt Eum. Luc. 24.*

VERITAS PRACTICA.

Quæ sunt Ambitioso detrimenta, hæc sunt Humili lucra.

RATIO EST, Quia quicumque habent diuersos & plane oppositos fines, opposita etiam sibi ducunt lucra & detrimenta.
Sed ambitiosus & humilis habent oppositos plane fines.
Ergo quæ sunt uni detrimenta, sunt alteri lucra.

I. PUNCTVM.

IN hoc etiam manifeste apparet Charitas Christi longissimè ab omni fastu & ambitione remota, quòd tam libenter audit de suis opprobriis sermocinantes peregrinos, simulque cum illis loquitur, quàm libenter Ambitiosus audiret & loqueretur de suis laudibus. Sic enim de Iesu Nazareno pergebant dicere: *Et quomodo Eum tradiderunt summi Sacerdotes & principes nostri in damnationem mortis, & crucifixerunt eum. Nos autem sperabamus quia ipse esset redempturus Israel, & nunc super hac omnia, tertia dies est hodie, quod hac facta sunt. Sed & mulieres quedam ex nostris terruerunt nos, quæ ante lucem fuerunt ad monumentum, & non inuento corpore eius, venerunt dicentes se etiam visionem Angelorum vidisse qui dicunt eum viuere. Et abierunt quidam ex nostris ad monumentum, & ita inuenerunt sicut mulieres dixerunt, Ipsum vero non inuenerunt. Et ipse dixit ad eos. O stulti & tardi corde ad credendum in omnibus quæ locuti sunt Propheta! nonne hac oportuit pati Christum, & ita intrare in gloriam suam?*

Hæc omnia singillatim expendi possent, sed illud in primis quod non modo patienter Christus Dominus illos de sua probrosa condemnatione colloquentes sustinuit, sed etiam grauius arguit quod nondum crederent, nec sibi persuadere vellent sic Christum fuisse condemnandū & probris afficiendum. Certe si quid ambitiosus vel tantillum opprobrij pateretur, numquam probare contenderet se illud oportere pati, neque ita procuraret ab aliis sciri & credi, sicut forte diuulgatur; quin potius de iniuriis sibi illata, de reparando honore, de vindicta sumenda, deq; amicis ad sui defensionem prouocandis totus differeret, nihilq; aliud mente & sermone agiraret; *Non est qui vicem meam doleat ex vobis*, dicebat Saul; Sic & superbus & opprobrij impatiens Aman: *Et cum hac omnia habeam, nihil me habere puto, quamdiu videro Mardocheum Iudeum sedentem ante fores regias*. Sic videlicet ambitio & humilitas longe aliter mouent & sollicitant animum, circa infamiam & illata probra.

Atque hinc Veritas vniuersim proposita & ad praxim singulariter commendata: *Vt quæ sunt ambitioso detrimenta, hæc sint hu-*

Quæ sunt ambitioso detrimenta, hæc sunt humili lucra. 537

humili lucra. Quia scilicet quicumque oppositos sibi statuunt fines, opposita etiam sibi ducunt lucra & detrimenta. Sint alij pecuniæ, & sint alij gloriæ appetentes; nonne quod illis esset detrimentum, illis erit lucrum? Quid magis illi cauerent, & quid magis illi appeterent quam profundere pecunias, & splendide vivere? ô quàm proinde iuvat rectos sibi fines proponere, & quàm sapienter Sapiens; *In fine hominis denudatio operum illius*; quod non *Eccles. 17.* modò de fine seu termino deficientis vitæ intelligas, sicut alibi dictum est: sed de fine seu intentione quàm quisque sibi præscribit, & de qua Dominus; *Si oculus tuus fuerit simplex, totum corpus tuum lucidum erit: si autem nequam fuerit, etiam corpus tuum tenebrosum erit.* *Luc. 11.* Vide ergo ne lumen quod in te est, tenebræ sint.

II. PUNCTVM.

SED ambitiosus & humilis habent oppositos sibi fines. Quid enim ille nisi apparere, extolli, magnificari, & præire cunctis? Quid iste contra, nisi latere, subjici, sese denigittere & subesse omnibus? Quæ quam diuersa sint quis non videt? Vnde Christus Dominus; *Reges gentium dominantur eorum, & qui potestatem habent super eos, benefici vocantur: vos autem non sic, sed qui maior est in vobis, fiat sicut minor: & qui præcessor est sicut ministrator.* *Luc. 22.* Quasi diceret, non est mirum Gentiles contendere de honore & primis gradibus, quia hunc sibi præfigunt finem; At vos longe ab ista contentione volo, quia vobis alius præfixus est finis. Audi ambitiosum: *In cælum conscendam, super astra Dei exaltabo solum meum, & sedebo in monte testamenti, in lateribus aquilonis: ascendam super altitudinem nubium, similis ero Altissimo.* *Is. 14.* Audi & humilem; *Ante Dominum qui elegit me potius quàm patrem tuum, & ludam & vilior fiam plus quàm factus sum, & ero humilis in oculis meis, & cum ancillis, de quibus locuta es, gloriosior apparebo.* *2. Reg. 6.* Vtri te horum similiorem agnoscis?

III. PUNCTVM.

QUAE sunt igitur ambitioso detrimenta, sunt humili lucra. Nam cum aliter non sint ambitioso detrimenta quàm quia repugnant eius fini; hæc ipsa ratione sunt lucra humili, quia

538 Feria 4. Hebd. 2. post Oct. Pascha. Quomodo Eum tradid. &c.

eius fini & intentioni respondent. Sic etiam contra dici potest, quæ sunt ambizioso lucra, hæc sunt humili detrimenta: Id est quæ ambiciosus appeteret & omni auiditate exciperet; hæc humilis refugit & non nisi renitens & inuitus acceptat; vnde Apostolus; *qua mihi fuerunt lucra, hæc arbitratus sum propter Christum detrimenta. Verumtamen existimo omnia detrimentum esse propter eminentem scientiam Iesu Christi Domini mei, propter quem omnia detrimentum feci & arbitror ut stercora, ut Christum lucrificium.*

Vnde hoc maximè discas, quòd quando in humiliatione vel iniuriis, te læsionem aut detrimentum aliquod accepisse putas, non aliunde putas quam quòd ambiciosus es, & finem ambitionis in mente habes; Nam si verè esses humilis, illud ipsum quod putas detrimentum tuum, tuum esset lucrum. *Superbia tantum est, quiesce,* inquit apud Prophetam. Hæc est eminens scientia Iesu Christi cui te tamdiu studere oportet, donec hoc ipsum in te sentias quod & in Christo Iesu, qui cum in forma Dei esset, non rapinam arbitratus est esse se aequalem Deo, sed semetipsum exinaniuit, formam serui accipiens: Et quæ plura iam sæpe audiuiti; Sed an ex auditis profeceris, vide, & hæc Diuina monita semper in mente habe, *Nolite in sublime tolli: NON altum sapere sed time. NON alta sapientes, sed humilibus consentientes. QUI amat primatum gerere, Diotrophes, non recipit nos,* ait humilis & dilectus Christi Discipulus. Vide quæ passim alibi de humilitate.

Luc. 12.
Rom. 11.
1^a 12.
Ioan. 3.



FERIA QUINTA.

CHRISTVS SCRIPTVRAS, QVÆ DE IP SO ERANT, PEREGRINIS INTERPRETATUR.

Et incipiens à Moyse & omnibus Prophetis, interpretabatur illis, in omnibus Scripturis quæ de ipso erant. Luc. 24.

VERITAS PRACTICA.

Quo gressu Charitas nobilem fugit suggestum, eodem
petit ignobilem.

SENSVS est præcipue de his quos illa Charitas, quæ non
est ambitiosa, mouet ad procurandam aliorum salutem, quæ
concionando, quæ exhortando, quæ instruendo, modis omni-
bus. Sic enim exemplum Christi Domini ad hoc pietatis offi-
cium, eos mouet, vt quo affectu fugiunt nobiles suggestus, id
est, celebriores ad docendum vel Concionandum cætus, & splen-
didiora sublellia: eodem petant villas, pagos, & similia minus
splendida minusque speciosa loca.

RATIO est quia quem monet vera Charitas ad aliena salutis cur-
ram, ita eum verè mouet, vt quo passu & affectu saluti suæ vacat, eo-
dem vacet aliena, neque alteri altera salutis cura, villo modo praiu-
dicet.

Atqui vt salus propria & aliena sine villo sui praiudicio procuren-
tur, oportet vt sicut nobilis fugietur suggestus, ita & petatur ignobilis.

Ergo, quo gressu Charitas nobilem fugit suggestum, eodem petit
ignobilem. Quæ sanè Charitas eò est pretiosior quò rarior.

I. PUNCTVM.

NOC certè mirum est, quod Christus Dominus duos
hosce Discipulos rudes adhuc & ignaros mysterij Resur-
rectionis, tam diligenter & particulatim ex scripturis
docere voluerit, vt quidquid Moyse, quidquid Psalmi & Pro-
phetæ de hoc fidei articulo scripserant, solis illis seorsim in via
retulerit & declararit: nihil vero Ierosolymis, vbi ad loquendum
& docendum præcipua & nobilissima erat celebritas, nihil ex
quo resurrexit apud Scribas & doctiores viros de sua Resurre-
ctione dixerit!

Hoc est scilicet quod ipse ante Dominus miratus erat: *Conf.* *Math. 13.*
teor tibi, Pater, Domine cæli & terra, quia abscondisti hæc à sapien-
tibus & prudentibus, & reuelasti ea paruulis: Ita pater, quoniam sic
placitum fuit ante te.

Hic est etiam maximè proprius illius Charitatis effectus quæ non est ambitiosa, hic eius motus & affectus; *Ut quo gressu nobilem fugit suggestum, eodem petat ignobilem*: Nec se minus libenter communicet paruulis & rudibus, quàm studiosè refugit alios; Quia videlicet illa est sincera Charitas qua qui mouetur, sic propriæ & alienæ saluti vacat, neutra ut alteri salutis cura præiudicet. Hæc enim Charitas à Deo est, *quæ autem sunt à Deo, sunt ordinata*; & quæ sunt à Deo ordinata, non sibi obstant, sed sese potius iuuant, sicut nec Deus sibi est vlllo modo contrarius. Non est enim Deus dissensionis, Id est, confusionis & perturbati ordinis sed pacis, ait Apostolus, qui & suo Timotheo vramque salutem ex æquo commendans: *Attende, inquit, lectioni, exhortationi & doctrine*. Noli negligere gratiam quæ in te est. Hæc meditare, in his esto, ut profectus tuus manifestus sit omnibus. Attende tibi & doctrinæ: *Insta in illis; hoc enim faciens, & te ipsum saluum facies, & eos qui te audiunt*. O verè ordinatum & instructum à Charitate hominem, qui sic alios instruit, ut se non destruat: & qui sic sibi attendit ut aliis æque intendat.

II. PUNCTVM.

AT QVI ut salus propria & aliena sine vlllo sui præiudicio procuretur, oportet ut sicut nobilis fugietur suggestus, ita & petatur ignobilis.

Sic enim dum fugitur nobilis, propria salus in tuto est: dum petitur vero ignobilis, aliena salus comparatur: quæ utraque salus & perfectio sane periret aut periclitaretur, si conuerso propositionis ordine, ignobilem fugeres suggestum, & nobilem peteres. Nam etsi apud nobiles & potentes aliquid cum Dei gratia, possis efficere, tamen id rarius & suspectum est, si maxime id ambias & appetas. *Non mittebam Prophetas, & ipsi currebant: non loquebar ad eos, & ipsi prophetabant*. Sic ipse Deus, & multò plura passim comminatur. Sicut enim prima Prædicantis conditio & commendatio est Missio, iuxta illud Apostoli, *quomodo predicabunt nisi mittantur*, & nisi ostendant se à Deo vocatos ad hoc ministerium; sic planè si desit talis missio & vocatio, prima est sese ingerentis condemnatio. *Va Prophetis insipientibus qui sequuntur spiritum suum*! At nonne is manifestè dicendus est sequi

Quo gressu Charitas nobilem fugit suggestum, eodem, &c. 541

spiritum suum qui ex ambitione nobilem sibi quærat locum?

In humili vero & ignobili loco nihil talis periculi, & latus ad animarum salutem aperitur campus. Verè enim de Euangelica veritate id dici potest quod Psaltes: *Audiuiamus eam in Ephrata*, ps. 137. *inuenimus eam in campis syluæ*; Auditur quidem Veritas in magnis ciuitatibus & cætibus, sed inuenitur in campis inter agrestes & pauperes. Hi sunt nempe *qui Euangelizantur*; & *ta-* Matth. 11.
Luc. 2.
lium est regnum cælorum. His prima, nato Christo, prædicatio Euangelij facta est ab Angelo; & his natus Saluator singulariter & quasi præ aliis nuntiatur; hi demum soli ad eum inuisendum inuitantur, & hi sunt qui primi aliis ipsum natum prædicant; sicut & resurgentem hi duo rudes Discipuli cæteris nuntiant quos ipse Dominus idcirco præ aliis docuit.

O quàm vere dictum ab Apostolo: *Videte vocationem vestram: quia non multi sapientes secundum carnem: non multi potentes, non* 1. Cor. 1.
multi nobiles: sed quæ stulta sunt mundi elegit Deus, vt confundat sapientes.

III. PUNCTVM.


QVO igitur gressu Charitas nobilem fugit suggestum, eodem pe-
tit ignobilem; quantum quidem ex se est, suæque in ele-
ctione & potestate: nam si iubeatur nobilem conscendere, pare-
bit & omnibus omnia fiet, vt omnes Christo lucrifaciat: si vero
sibi relinquatur nec aliter à Deo viderit ordinatum; quàm vere
ordinata & sincera erit Charitas, tam verè fugiet quæ saluti pro-
priæ nocent, quales sunt hi nobiles cætus & suggestus qui am-
biuntur; & tam verè peter ignobiles, vbi alienæ saluti fructuosius
ac sine vllò propriæ salutis damno, vacet. *Testor coram Deo, &*
Christo Iesu, & electis Angelis, vt hæc custodias sine præiudicio, nihil 1. Tim. 5.
faciens in alteram partem declinando: quasi diceret Apostolus; sic
vtrumque simul tempera vt neque vacando saluti alienæ, præiu-
dices tuæ; neque ita tuæ vaces vt delis alienæ. *Quis enim*, vt ait
Sapiens, miserebitur incantatri à serpente percusso, & omnibus qui Ecclesi. 12.
appropiant bestiis? At certe ij sunt qui non vocati & non iussi se
obtrudunt nobilibus illis suggestis, vbi apud Viros dicant prima-
rios: Ij sunt inquam qui se vltro l. thalibus exponunt periculis,
nec vlla miseratione digni censentur, meritòque suæ præsum-

542 FERIA 6. Hebd. 2. post Oct. Pasche. Nonne cor nostrum, &c.

Ezech. 2. ptionis pœnas luant. Nam si Ezechieli quantumvis vocato & iussu dicitur, *quoniam increduli & subuersores sunt tecum, & cum scorpionibus habitas*; quanto magis non vocatis & non missis? Licet enim futuri sint Auditores benigni & à quibus nihil videatur timendum: Ista tamen benignitas & popularis fauor, non minus sæpe obest, quàm inculta & agrestis nonnullorum austeritas.

Apo. 2. Quidquid sit autem de humana gratia, sane Christus iram & iustitiam, in illos potius quam misericordiam nisi relipsant, aperte denuntiat, cum in Apocalypsi, Viro alioquin Apostolico, imo & Angelico sic grauitè per Ioannem scribit: *scio opera tua, & laborem, & patientiam tuam*; Et post multa quibus insigniter commendatur; *Sed habeo, inquit, aduersum te, quod Charitatem tuam primam reliquisti*: primum videlicet illum feruorem quo suæ simul ac alienæ indiuisim saluti laborabat; vnde & pergit quod tibi applies: *Memor esto itaque vnde excideris, & age pœnitentiam, & prima opera fac: sin autem, venio tibi, & mouebo candelabrum tuum de loco suo, nisi pœnitentiam egeris*. Id est, nisi te reuocaueris ab infana illa mente quâ pretextu salutis alienæ, salutem tuam in discrimen vocas. *Ecce primum trabem de oculo tuo.*

Matth. 7. Vide in I. parte, Die 31. Decembris.



FERIA SEXTA.

CHRISTO LOQUENTE PEREGRINIS,

IN ARDESCUNT EORVM CORDA.

Nonne Cor nostrum ardens erat in nobis, dum loqueretur in via, & aperiret nobis Scripturas?

Luc. 24.

VERITAS PRACTICA.

Colloquendo de Diuinis, quanto magis luces quàm ardes: tantò minus in te Diuina lucet Charitas.

Colloquendo de diuinis, quanto magis luces quàm ardes, &c. 543

RATIO EST, Quia tantò minus Diuina lucet Charitas quanto minus purè Deum vnum spectas.

Sed loquendo de diuinis, quanto magis luces quàm ardes, minus purè Deum vnum spectas.

Ergo & tunc tanto minus in te lucet Diuina illa Charitas, quæ non est ambitiosa, & quæ magis corda pungit quàm vngit.

I. P V N C T V M.

QUÆ huc referuntur peregrinorum verba de ardenti ipsorum corde, licet prolata tantùm fuerint in castello vbi recumbebant, & postquàm ex eorum oculis Christus euauit, sicut in sequenti consideratione videbitur: quia tamen reipsa ille ardor Cordium excitatus fuit, dum loqueretur eis Christus, sic de ipso ardore vt aliquid mediteris, magis hic opportune videretur præmittendum quàm differendum.

Cùm itaque Dominus varias de se interpretaretur scripturas, non solum hoc agebat in peregrinorum animis vt eos de fide Resurrectionis plene instrueret; sed vt eorum affectum planè moueret, vel in Deum qui sic mūdum dilexerat vt Filium suum vni-genitum daret: vel in ipsum Filium qui se immolandum permiserat, per tot supplicia & opprobria: vel in Diuinam Iustitiam cui semel offensæ sic reparandum fuit; vel in sua ipsorum peccata quæ tali victimâ fuerunt expianda: vel in amorem patiendi, pro æternæ suæ salutis desiderio, cùm Christum oportuerit tanta pati vt intraret in gloriam suam: vel denique in similem pium animi motum, se ita permotos sentiebant duo isti Discipuli, vt quo tempore eum audirent loquentem, non modo intelligerent quid loqueretur, sed amarent quod intelligebant, & vellent exequi quod amabant. O vere *ignitum eloquium Domini vehementer. Ps. 118;*

Hæc est videlicet Charitas minime ambitiosa, quæ magis plaudum quàm plausum quærit, quæ plus prodesse quam placere desiderat, & quæ plus ardet quàm lucet. Quod quia plurimum ad quotidianam praxim valet, idcirco præcipua est consideratione dignum; & quàm longe errent à vera Charitate qui malunt in dicendo lucere quam ardere, non potuit euidentius demonstrari quàm Veritate proposita de diuinis & spiritualibus

544 Feria 6. Hebd. 2. post Oct. Pasche. Nonne cor nostrum, &c.

colloquiis, siue quæ ex plano, siue quæ ex superiore suggestu, siue in concionando siue in exhortando habentur, quocumque tandem modo de diuinis loquaris, *quanto magis loquendo lucere appetes, quàm ardere: tanto minus in te relucebit diuina Charitas.*

Ratio est aperta, quia cum sine dubio Charitas vnum purè Deum spectet in omnibus, & illud sibi Prophetæ singulariter applicet, *Mihi adharere Deo, bonum est*; profecto quanto minus apparebis ita Deum pure spectare, minus etiam relucebit Charitas, minus spectabitur & agnoscetur. Sic enim arbor ex fructu agnoscitur, sic ab effectu causa, vel à causis effectus. *Cognoui vos, quia dilectionem Dei non habetis in vobis.* Ipse loquitur quem nihil fallit; & ipsum nihil fallit, *in cuius conspectu non est vlla creatura inuisibilis: omnia autem nuda & aperta sunt oculis eius.*

II. PUNCTVM.

SED loquendo de diuinis, quanto magis lucet quàm ardes, tanto minus pure Deum spectas.

Non est malum lucere, si in bonum finem dirigatur, nec si plus nimio luceas: plus autem nimio lucere dicendus est, qui magis lucet quam ardet, id est qui magis docet quam mouet, qui magis intellectum illustrat quàm voluntatē accendat. Nam cum finis lucendi sit ardor, cum lucere debeat discursus vt ardeat, cum sit illustrandus intellectus vt voluntas accendatur: certè qui plus lucet quam ardet, perinde facit atque is qui plus in mediis quàm in fine poneret, plus in medicina, quàm in sanitate; plus in vtendo quàm fruendo; quod omni repugnat rationi & disciplinæ. *Non propter locum, gentem: sed propter gentem, locum Deus elegit:* Quasi diceretur, quæcumque sunt illius loci bona vel mala, non propter ipsum locum immissa sunt, sed propter gentem, cuius gratia locus electus est: quia sic omnia media sunt in finem suum referenda, vt nihil sit in mediis boni, nisi quantum ad finem referri potest illud bonum: ac proinde si bonum illud medij, impediret finem, iam non esset bonum sed malum.

Quibus ita præsuppositis, euidenter patet, quod si magis lucet quàm ardes, non purè spectas Deum; nisi enim pro fine Deum habeas, non spectas pure Deum: at quomodo dici poteris Deum pro fine te habere qui finem dicendi à Deo positum non habeas.

quis

Quis sit autem ille finis, iam dictum est esse ardorem non lucem; tu vero lucem non ardorem pro fine habes, si plus luces quam ardes: nam quorsum illud lucere maius quam ardere nisi quia magis id spectas & intendis? An vero id propter Deum spectes & intendas, longè minus credi potest quàm si de ardore magis cogitares; nam in lucendo quidquid naturæ corruptæ placet facilius reperitur, quam ardendo. Quid est quod naturæ placet nisi placere aliis, doctrinæ laudem aucupari, & vno verbo apud homines commendari, quæ omnia lucendo, id est docendo & orationem verbis aut figuris illustrando proueniunt, aut certe prætenduntur. Itane porro spectetur Deus! an quid magis contrarium Deo purè spectando quàm ista vanitas placendi auribus? *An quæro hominibus placere?* aiebat Diuinus Apostolus, *si adhuc hominibus placerem, Christi seruus non essem.* Ac proinde non in persuasibilibus humana Sapiëntia verbis, ne nimis forte luceret, sed in Virtute Dei vt magis ardere posset, loquebatur. *Quæ & loquimur, non in doctis humana sapiëntia verbis; sed in doctrina spiritus, spiritualibus spiritualia comparantes.* O quæ doctrina spiritus qui idcirco in linguis descendit igneis vt non splendida sed ardentia promerentur verba. *Qui habet sermonem meum, loquatur sermonem meum verè.* Quid paleis ad triticum, dicit Dominus? Numquid non verba mea sunt quasi ignis, dicit Dominus, & quasi malleus conterens petram? Responde, & te his sine conteri verbis, quod illa ignita non quæras verba.

III. PUNCTVM.

QUANDO itaque de diuinis sermo & colloquia conferuntur; quantò magis luces quàm ardes, tanto minus in te Diuina relucet Charitas; quæ cum vnum purè Deum spectet, tanto minus lucet & apparet, quanto minus Deum spectare agnoscitur: at tùm certe minus agnoscitur, cùm splendorem potius quam ardorem in animos vibrat. *Sic Deus noster, ignis consumens est.* Sic mons ille in quo legem & præcepta dedit, totus ardere videbatur. Sic lex ipsa dicitur ignea. *Et omnis sermo Dei ignitus.* Sic Elias quasi ignis, & verbum eius quasi facula ardebat. Sic S. Ioannes Baptista, erat lucerna ardens & lucens: NON ait lucens & ardens, inquit S. Bernardus, quia Ioannis ex feruore splendor, non

Ser. in Nat.
S. Ioan.
Baptist.

feruor prodiit ex splendore. Sunt enim qui non eò lucent quia feruent sed magis feruent ut luceant, at isti plane non feruent Charitatis spiritu, sed studio vanitatis.

Verum repetenda paulo altius quæ de hoc ipso argumento Idem habet in eodem sermone, quibus mirum quantum proposita Veritas confirmetur. Est enim, inquit, tantum lucere, vanum: tantum ardere, parum: ardere & lucere, perfectum. Audi quid dicat Scriptura: sapiens permanet ut sol: stultus autem ut luna mutatur. Quia enim splendet luna sine feruore, modo plena, modo exigua, modo nulla videtur: mutuatum siquidem lumen numquam in eodem permanet statu, sed crescit, deficit, extenuatur, annihilatur, & penitus non compareret. Sic sic qui conscientias suas in alienis labiis posuerunt, modo magni, modo parui sunt: modo nulli, secundum quod adulantium linguis vel vituperare placuerit vel laudare. At vero solis splendor igneus est, & cum feruet acrius, etiam oculis lucidior exhibetur. Sic sapientis ardor internus, foris lucet, & si non ei datur utrumque, curat semper ardere magis, ut pater suus qui videt in abscondito, reddat ei. Va nobis fratres, si luxerimus tantum. Nam lucemus quidem & magnificamur ab hominibus, sed mihi pro minimo est, ut ab humano iudice die: qui enim iudicat me Dominus est, qui feruorem ab omnibus exigit, splendorem vero non ita. Ignem, inquit, veni mittere in terram, & quid volo nisi ut accendatur.

Fer. 2.
Pasché.

Et post multa, concludens exemplo sancti Ioannis qui occubuit pro veritate foeliciter; ferueat, inquit, etiam in nobis zelus iste, Carissimi. Ferueat amor iustitie, odium iniquitatis. Nemo vitia palpet, peccata dissimulet nemo: Nemo quod in se est equanimiter ferat cum viderit ordinem deperire, minui Disciplinam. Est enim consentire, silere cum arguere possis: & scimus quia similis pena facientes maneat & consentientes. Addo hic quod idem Sanctus monet, aut quisquis est Author sermonis de duobus peregrinis qui habetur inter eius sermones: Quoties, inquit, in nobismetipsis marcescit anima nostra, & possident nos dies afflictionis, ad memoriam reuocemus quid aliquando in oratione senserimus, qualiter locutus nobis sit Dominus: Nonne cor nostrum ardens erat in nobis? Ardoris quidem sensus potest deficere, sed vigere debet semper effectus.

Vide in 3. parte, die 4. Augusti.



SABBATO.

CHRISTVS DOMINVS ROGAN-
TIBVS SE PEREGRINIS, VT SECVM
MANEAT, ACQVIESCIT.

Mane nobiscum, quoniam aduersperascit. Luc. 24.


VERITAS PRACTICA.

In dubio, certius est, & Rationi conformius, aliorum
Rationi te conformare quàm propriæ.

RATIO EST, Quia quod propius accedit & nos ducit ad
diuinam voluntatem, hoc est certius & rationi conformius.
Sed in dubio, se aliorum rationi potiùs conformare quàm pro-
pria, hoc est quod propius accedit & nos ducit ad diuinam
voluntatem.

Ergo id est etiam certius & rationi conformius, nec non exem-
plo Christi Domini, qui sic rationi peregrinorum & voluntati
se conformauit.

REPUNCTVM.

 T appropinquauerunt castello quò ibant, & ipse se finxit lon-
gius ire. Et coegerunt illum, dicentes, Mane nobiscum, quo-
niam aduersperascit, & inclinata est iam dies. Et intrauit cum
illis; Et factum est dum recumberet cum eis, accepit panem & be-
nedixit, ac fregit, & porrigebat illis. Et aperti sunt oculi eorum, &
cognouerunt eum, & ipse euannit ex oculis eorum.

Hæc Sacer Euangelista: ex quibus facillime intelligas quanta
facilitate Christus Dominus acquieuerit voluntati Discipulo-

rum, & rationi quam protulerunt ut eum dissuaderent à longiori via; quod scilicet inclinata iam esset dies. Patet etiam quantà cum humilitate & Charitate minime ambitiosa, ingressus fuerit exiguum illud domicilium, accubuerit mensæ, panem acceperit & porrexerit, ac denique se illis in omnibus parem aut inferiorem reddiderit Rex ille Gloriæ, Rex ille Regum & Dominus dominantium! Non sic humana solet ambitio & superbia cedere aliis, non sic alienæ se conformare rationi & voluntati: sed sibi potius omnes subicere & in suam attrahere dominationem. Vnde *inter superbos semper iurgia sunt*, ut ait Sapientius, & *ubi fuerit superbia, ibi erit & contumelia: ubi autem humilitas est, ibi & sapientia*; qua fit, *ut in quouis dubio indicetur certius & rationi conformius, aliorum rationi se conformare potius quam propria.*

Prou. 13.
Ibid. 11.

Coloss. 1.

Ibid. 4.

Rom. 12.

Mat. 1.

Quæ certe Veritas cum in quotidiano & frequenti sit usu, plurimum expendi debet, ne quid contrà peccetur. Sic autem facile declaratur, quia quod accedit propius, & quod rectius ac securius nos ducit ad diuinam voluntatem cognoscendam & faciendam, illud est sine controuersia semper certius & aliis omnibus præferendum. Quid enim quærimus, aut certe quid aliud à nobis quærendum est quàm quod ita commendat Apostolus, dum ait, *non cessamus, pro vobis orantes & postulantes ut impleamini agnitione voluntatis eius in omni sapientia & intellectu spirituali, ut ambuletis digne, Deo per omnia placentes, in omni opere bono fructificantes, & crescentes in scientia Dei.* Rursum ibidem; *Semper sollicitus pro vobis in orationibus, ut stetis perfecti, & pleni in omni voluntate Dei.* Expende illud *omni*, nempe ut sæpe dictum est, in substantia, in modo, & in fine rei cuiuslibet peragendæ, quæ est volūtas illa triplex, de qua idem Apostolus *ut probetis quæ sit voluntas Dei bona, & beneplacens & perfecta*; Neque enim aliter dici potest fieri omnis Dei volūtas, nisi fiat quod præcipit, & quo modo vult fieri, ac tandem quia sic illi placet. Si quod horum trium omittatur, licet alia duo permaneant, pauendum illud audietur; *Non est mihi voluntas in vobis*, id est, quandoquidem vobis non placeo, neque mihi placetis. Potestne aliquid audiri grauius?

In dubio certius est, & rationi conformius, aliorum, &c. 349

II. PUNCTVM.

SED in dubio, se aliorum rationi & voluntati conformare potius quam propria, hoc est, quod accedit proprias & quod nos ducit securius ad diuinam cognoscendam & faciendam voluntatem.

Primo quidem sic fieri potest ut alter de re præsentī melius sapiat & sentiat quam nos; unde eius consilio acquiescentes quod bonum est tenemus, & ab omni specie mala nos abstinemus, ut est apud Apostolum. Deinde vero quotiescumque minus est propriæ nostræ voluntatis in quouis nostro negotio, plus esse potest Diuinæ, cui nihil est adeo contrarium ac nostra voluntas, ut disertè sanctus Bernardus: *voluntatem, inquit, dico propriam qua non est communis cum Deo & hominibus, sed nostra tantum. Hac aduersus Deum inimicitias exercens est, & guerram crudelissimam: Quid enim odit aut punit Deus præter propriam voluntatem? Cesset voluntas propria, & infernus non erit.* 1. Thess. 5.

Denique, cum hoc sit proprium Diuinæ prouidentiae, vnumquemque nostrum regere potius per alium quam per nos ipsos, certe qui se regendum sinet, is propius semper accedit ad illam diuinam ordinationem & voluntatem, quàm si relicto aliorum consilio sibi consideret. Sic apte Sapiens: *Simplicitas iustorum dirigit eos, Et rursum: Iustitia simplicis dirigit viam eius.* Id est, sicut simplices se sinunt facile regi, sic etiam securius reguntur, & tutius diriguntur ad voluntatem Dei perficiendam quàm qui non sic se sinunt regi: Quando hæc sola esset simplicitas & humilitas qua qui se aliorum rationi summittit potius quam suo credat ingenio, sic Deo grata & accepta est, ut expresse dicatur, *voluntas eius in iis qui simpliciter ambulant.* Pr. 11.

Neque alia certitudo certior de Diuina voluntate in his ipsis operibus quæ de se bona dicuntur, haberi potest, quàm si non ex propria voluntate sed alieno potius fiant ductu: quia videlicet nihil est tutius ad voluntatem Dei perficiendam, quam sic regi & dirigi, ut sæpe alias dictum. Quanto id verius & certius in dubiis & incertis operibus: Nam si tam grande malum est voluntas propria, ut quæ sunt apertè bona, bona tamen non sint, quia sunt ex voluntate propria potius quam Diuina, quanto id magis timendum esset in aliis quæ non sunt tam manifestè bona? Ecce in die ieiunij vestri inuenitur voluntas vestra! numquid tale est ieiunium quodelegi? Quodnam vero est quod elegit? quodnam est si- Ibid.

*In 1. parte
hebd. 3. post
Epiphani.*

1s. 58.

550 *Sabbato Hebd. 2. post Oct. Pasche. Mane nobiscum, &c.*

gnum eius electionis? nempe, *dum non facis vias tuas, & non inuenitur voluntas tua.* Hoc est enim quod sequitur in propheta. Hoc est signum voluntatis Diuinæ; Hæc eius nota certior, & certitudo notior, si in re agenda non tuo sed alieno potius ducaris consilio. Velle ne reluctari tam apertæ Veritati?

III. P V N C T V M.

IN dubiis igitur & incertis hoc est certius & Rationi conformius; aliorum se potius conformare rationi quam propriæ; quia sic certius ad diuinam accedimus Voluntatem, in qua perfectè adimplenda, vt non semel audiisti, tota vitæ nostræ ratio & firmitas consistit; facientes voluntatem Dei ex animo, inquit Apostolus loquens de seruitio exhibendo Dominis carnalibus, in quorum voluntate ait voluntatem Dei contineri quam serui faciant, quoties Dominis suis obediunt. Sic proportionem quadam seruata, tenendum est quod quando in negotio vel quouis rei agendæ occurru, dubitatur de diuina voluntate, certius illa dignoscitur & adimpletur ex aliorum consilio & ductu quam nostro proprio. Licet enim alius in illo dubio æque possit errare atque nos; nos tamen eius potius voluntati quam nostræ obsequentes, minus errabimus quam si nobis solum credidissemus. Nihil ad pacem & veram libertatem securius, vt expresse habes in libro de Imitatione Christi, vbi sic Dominus: *Fili, nunc docebo te viam pacis & vera libertatis: stude fili, alterius potius facere voluntatem quam tuam.* A DOMINO egressus est sermo: non possumus extra placitum eius quidquam aliud loqui tecum. Sic parentes Rebeckæ, sic alij quibus probati viri de diuina voluntate sentiunt & fatentur se melius eam per alios quam per se nosse.

Quid quod ipse Dominus nihil ex se, nihil ex propria se voluntate tacere toties professus est. Et quod magis mirum, non modo ex Diuini Patris nutu totus pendeat, sed ex ipsis hominibus quos vitæ suæ Rectores habuit & quodammodo directores, vnde apte S. Bernardus, *Attende quid fecerit magni Consilij Angelus, quomodo consilium suum postposuerit consilio vel magis voluntati Mulieris vnius, beatam Virginem loquor, & fabri pauperis; Ipse est Ioseph.* Et nonnullis interiectis tandem concludit, *Quis iam non erubescat obstinatus esse in consilio suo, quando suum ipsa Sapientia deseruit?* Vide infra, Feria 5. quæ est Ascensionis Octaua.



DOMINICA III.

POST PASCHA.

DE TRISTITIA ET GAUDIO APOSTOLORVM
EX ABSENTIA ET PRÆSENTIA DOMINI.

EVANGELII hodierni tres distingui possunt & considerare partes, quæ tamen eodem tendunt vt confortemur in aduersis.

Prima his continetur verbis. *Modicum, & iam non videbitis me: & iterum modicum, & videbitis me, quia vado ad patrem: Et quæ sequuntur de dubio Apostolorum circa hæc verba.*

Secunda, cum Dominum interrogare vellent Apostoli, nec auderent, sic ipse sermonem continuauit, *Amen, amen dico vobis, quia plorabitis & flebitis vos, mundus autem gaudebit, vos verò contristabimini, sed tristitia vestra vertetur in gaudium.*

Tertia proponit similitudinem quæ ex tristitia gaudium nasci apparet. *Mulier cum parit, tristitiam habet, quia venit hora eius: cum autem peperit filium, iam non meminit pressuræ propter gaudium, quia natus est homo in mundum. Et vos igitur, nunc quidem tristitiam habetis: Iterum autem videbo vos, & gaudebit cor vestrum, & gaudium vestrum nemo tollet à vobis.*

Horum autem omnium literalis sensus duplex esse potest. Primus, vt modicum illud tempus quo Apostoli non essent visuri Christum, & inde tristes futuri, sit tempus passionis, nempe illud triduum quo passus, mortuus & sepultus iacuit in sepulchro. Tempus verò quo eum rursus visuri essent & gauisuri, tempus sit quo resurgens Dominus suâ illos præsentia recreauit.

Alter sensus est, vt tempus tristitiæ Apostolorum, & absentia Christi, sit totum illud tempus quo vixerunt Apostoli, multum-

552 Dominica 3. post Pasc. Modicum & iam non videbitis me.

que laborarunt in disseminando Euangelio, ac veluti parienda salute proximi: Tempus autem eorum gaudij & præsentia Domini sit beatitudo æterna qua perfruuntur. Ex quibus omnibus quæ sunt magis moralia & practica vt facilius eruantur, tres ex vnaquaque parte proponuntur Veritates.

Ex Prima Euangelij parte, de modico vitæ tempore.

I. VERITAS PRACTICA.

Nil tam modicè creditur quàm modicum vitæ tempus, cum nil tamen sit tam credibile.

RATIO postremæ partis, quæ magis declaranda videtur, hæc est, quòd nil sit tam credibile quàm quod sensu, ratione, & scripturarum autoritate quæ fidem diuinam faciat, percipitur, ac ipsis quodammodo cernitur oculis.

Sed tale est modicum vitæ tempus, vt sensu simul percipiatur & ratione & fide diuina quæ ex multa & plana scripturarum autoritate concipitur.

Ergo nil tam credibile, licet nihil minùs credatur.

L. PUNCTVM.

*Tract. 101.
in Ioan.*



2. Ma. ch. 6

Iac. 4.

MODICVM illud tempus de quo Dominus in Euangelio, sanctus Augustinus ad totum vitæ nostræ tempus, imò & ad totum præsentis sæculi spatium transferens; *Modicum, inquit, est hoc totum spatium quo præsens peruolet sæculum.* Sic inter suos intignis ille & grandæuus Eleazarus affirmabat se libenter moriturum, ne alioquin iuniores propter modicum corruptibilis vitæ tempus deciperentur. Sic apertè sanctus Iacobus; *quid est vita vestra? vapor est ad modicum parens.* Quamobrem hic opportunè de hoc modico vitæ tempore, quod tam modicè creditur, vt nihil minùs credatur, cum nihil tamen sit tam credibile.

Quòd non credatur, euidentius est quam vt probetur, & deplorandum

plorandum potius quàm enarretur : sicut enim si modicum illud tam breue & euanidum esse crederetur sicut Scripturæ referunt esse breue & citissimum , vix vllus esset hominum qui non sibi cautius de sua prouideret æternitate quæ ex illo pendet modico & momento : sic cùm apertè pateat vix vllum esse qui de sempiterno illo futuræ vitæ statu seridè cogitet & prospiciat , nonne hinc euident est , quòd non credatur tam breue quàm dicitur ? nonne hoc vnum respondent omnes , se aliquando prouisuros , nonne hoc apertè cogitant , satis esse longum vitæ tempus , satis superesse spatij quo sibi consulant , nunc se aliis distentos esse negotiis , & futuris anteferenda præsentia quæ magis vrgent ? O verè *nequam seculum* , quod sic nequiter suos fallit & dementat. Gal. 1.
Tenant tympanum & ciitharam & gaudent ad sonitum organi. Ducunt Iob. 21.
in bonis dies suos , & in puncto ad inferna descendunt. Qui dixerunt Deo , recede à nobis , & scientiam viarum tuarum nolumus. Id est scientiam illam quæ ad Deum ducit , scientiam illam sanctorum & salutis , quæ sita est in contemptu præsentium , ex cognitione vanitatis eorum & breuitatis. Hanc pene omnes reiiciunt , quia longe aliud de præsentī vitā sibi persuadent & promittunt. Vnde ibidem paucis interiectis ; *Interrogate* , inquit Iobus , *quemlibet de* ibid.
viatoribus , & hæc eadem illum intelligere cognoscetis.

Alterum itaque , quòd nil sit tam credibile , magis explicandum videtur. Neque verò videtur planius posse demonstrari , quàm si sensu simul & humana ratione ac Diuina autoritate conuincatur ita esse. Non quòd tria illa simul concurrant ad vnum fidei actum , cùm se potius impediant , iuxta illud Dini Gregorij , *non habet fides meritum cui humana ratio præbet experi-* Horn. 26.
mentum ; sed quòd vnumquodque ex his tribus seorsim possit ita rei cuius credendæ credibilitatem aduehere , vt si solū vnum esset , rem tamen credibilem faceret ; vnde illud accedit commodi , vt quando tria illa conueniunt ad vnā eandemque rem afirmandam , vix vllus dubitare , vix vllus eam negare possit ; nam si vno quis ad credendum non ducatur , ducetur alio , si humana ratione non persuadetur , diuinæ cedit authoritati ; aut si forte hanc non satis reueretur , humanis assentietur persuasionibus ; & ipso saltem sensu conuincetur ; atque ita rei fidem penitus abrogare non poterit.

Deinde verò , quod est valde obseruandum , cùm naturalis

554 Dominica 3. post Pasc. Modicum, & iam non videbitis me.

100n. 3. sensus & humana ratio plerumque obstant quo minus authoritati Diuinæ quam debemus fidem expeditè reddamus, si aliunde sensui sensus & humanæ rationi humana ratio se opponant, tunc quod obstabat diuinæ fidei, tollitur; sublatoque obstaculo, fides liberius & expeditius exercetur. *Quomodo vos potestis credere qui gloriam ab inuicem accipitis, & gloriam quæ à solo Deo est, non quaeritis?* Quasi diceret Dominus, si gloriam non acciperetis ab inuicem, possetis credere; si verò gloriam à Deo quaereretis, non acciperetis ab inuicem, sicque illud tolleretur quo sublato facile crederetis. Domine adauge nobis fidem, diminue & tolle quod fidem impedit, sic enim crescunt boni habitus, quando decrescunt mali oppositi.

Luc. 17.

II. PUNCTVM.

SED tale est modicum vitæ tempus ut sensu simul percipiatur & ratione, ac Fide Diuinà qua ex multa & plana Scripturarum auctoritate concipitur.

Primò quidem id sensu patere dicitur, quando ipsis intuemur oculis quàm variis & momentaneis humana vita sit obnoxia casibus & procellis; quàm facile lethalis hauritur aër; quàm citò prauus ac malignus humor in fauces decidit & viros alioquin sanos suffocat: quàm prompti ad iram animi: quàm velox ex ira cædes: quàm sunt perfidæ hominum mentes, quàm parùm tuta & secura sint loca & tēpora. Et licet ipsa trahatur ad aliquot annos vita, quantis illa succutitur periculis! quantis interciditur impendentium malorum pauoribus! ac tandem ubi finitur, quis non sentit quàm sit illud totum breue quod desinit, si præcipue considerat quam sit illud longum quod incipit? *Dies nostri quasi umbra & nulla est mora. VMBRAE transitus est tempus nostrum, & non est reuersio finis nostri.* Hoc probi simul & improbi, sensu communi testantur.

1. Par. 29.

Sap. 2.

DEINDE verò, ratio tantæ breuitatis tam multiplex afferi posset, quàm multis humana vita considerari posset modis: vel enim in se perspicitur ac in suis causis siue naturalibus siue moralibus, & sat apertam ibi suæ fragilitatis radicem inuenit. Nam quid est corpus humanum, nisi mortis officina & sepulchrum gestatile? *Quid enim aliud,* inquit sanctus Ambrosius,

Nil tam modicè creditur, quàm modicum vitæ tempus, &c. 555

nisi quasi in quodam feretro, hoc est, supremi funeris instrumento, Lib. 5. in
iacemus exanimis, cum vel ignis immodica cupiditatis exaestuât, vel ^{Lucam.}
frigidus humor exundat, vel pigra quadam terreni corporis habitudi-
ne vigor hebetatur animorum, vel concreta noster spiritus labe, puræ
lucis vacuus mentem alit? hi sunt nostri funeris portitores. Quæ san-
cti Doctoris verba naturali sensu de quatuor elementis seu pri-
mis qualitatibus, quæ mortalem ac pene in horas morientem fa-
ciunt vitam, possunt intelligi: vel morali dicto de prauis concu-
piscentiis, quæ non animæ tantum sed corpori vitam eripiunt.

Quod si vitæ nostræ foris adiacentes aduersarios & insidian-
tes hostes aduerterimus, tot pene rationes occurrent momenta-
nei nostri temporis, quot concurrunt & conspirant creaturæ iam
ab ipso Creatore armatæ & instructæ omnes in vltionem peruer- ^{Sup. 5.}
sitatis humanæ.

Quid quod tale est à natura desiderium perpetuandæ vitæ,
vt quantumcumque longa ducatur, brevis semper & modica sit
dicenda, quia desiderio non satisfacit, imò etiam tanto ma-
gis acuitur, quo est vita longior, & quæ plura sunt parta bona
temporalia quæ non nisi repugnanter deseruntur. O mors quàm ^{Ecclesi. 41.}
amaræ est memoria tua, homini pacem habenti in substantiis suis!

Adde quòd cum vix vllus sua sorte sit contentus, sed vltra
semper & vltra, nouas progrediendi vias sibi expandat, quibus
vel diuitiis vel honoribus vel quibuslibet vitæ commodis augea-
tur: ac mors interim derepente ingruat; Nonne tùm excessu-
rus, præcisas suas spes inclamabit, & tam breues queretur an-
nos, quàm longe sua prouehabat consilia? Nonne tùm cum Iobo ^{Iob. 7.}
dicet, dies mei velocius transierunt, quàm à texente tela succiditur,
& consumpti sunt absque vlla spe.

Deniq; quod est in hac materia præcipui ponderis, quia num-
quam delitura sequitur vita, dum ad æternos illos consequentes
annos præsens tempus referimus, planè liquet quàm vere dicat
Sapiens: Quid est homo, & quæ est gratia illius? & quid est bonum ^{Ecclesi. 18.}
aut quid nequam illius? numerus dierum hominum vt multum cen-
tum anni, quasi gutta aquæ maris deputati sunt; & sicut calculus sic
exigui anni in die aui.

IAM quantis abundet Scriptura similibus dictis, restat expromere,
vt si abessent cætera, quod est ad faciendam fidem poten-

356 Dominica 3. post Pas. Modicum & iam non videbitis me.

tius nobis non desit. Tam porro sunt in his effusa sacra pagina, ut quicquid est in vniuersa rerum mole deciduum & caducum, videantur à quatuor ipsis elementis excerptisse, notio- rem ut nobis faciant hanc humanæ vitæ caducitatem.

Primò quidem à terra sic comparisonem instituunt, *Homo sicut fanum dies eius, tamquam flos agit sic apparebit. TAM QVAM fanum velociter arescent, & quemadmodum olera herbarum cito decident. MANE sicut herba transeat, mane floreat & transeat: vespere decidat, induret & arescat. TAM QVAM memoria hospitii vnius diei pratereruntis. Tamquam umbra & tamquam nuntius percurrentis, DIES mei velociores cursore.*

2. Reg. 14. Secundò sic ab aquis. *Omnes morimur & quasi aquæ dilabimur, quæ non reuertuntur super terram. AD nihilum deuenient tamquam aqua decurrens. TAM QVAM nauis quæ pertransit fluctuantem aquam. QVASI naues poma portantes, quæ videlicet celerius properant, siue id à ventis proueniat, propter leuitatem oneris; siue ex industria nauigantium, ne corrumpatur fructus. TAM QVAM spuma gracilis quæ à procella dispergitur.*

Iob. 21. Tertiò ab aëre. *Sicut palca ante faciem venti, & sicut fauilla quam turbo dispergit. TAM QVAM lanugo quæ à vento tollitur. Tamquam avis quæ transuolat in aëre, aut tamquam sagitta emissa in locum destinatum. TRANSIBIT vita nostra tamquam vestigium nubis, & sicut nebula dissoluetur quæ fugata est à radiis solis, & à calore illius aggrauata.*

Nahum. 1. Quartò ab igne. *Quasi fulgura discurrentia. SICVT tonitruum magnum in pluuia personabunt. ET erit fortitudo vestra ut fauilla stупpa, & opus vestrum quasi scintilla: & succendetur utrumque simul, & non erit qui extinguat.*

Audisne ut loquuntur Scripturæ? Vidēsne quas exhibent ex rebus omnibus leuiore, celeriore, fugacior? Qui hoc non audiat, qui hoc non videat, nonne ex his erit, quibus Dominus per Prophetam; *Surdi audite, & caci intuemini ad videndum? quis cæcus nisi seruus meus? & surdus, nisi ad quem nuncios meos misi?* Nonne tot tibi sunt nuncij quot in inferno clamant: *Sic & nos nati continuo desuimus esse?* Sic videlicet quemadmodum illa omnia quæ ipsi commemorant celerrima, sic & nos, inquiunt, imo & nos celerius, nam *nati continuo desuimus, esse. Quasi nihil esset quod fuissent; Ita modicum & nullum est hic fuisse.*

III. PVNCTVM.

PATET igitur euidenter quod quantumcumque hic modicè modicum vita tempus credatur, nil tamen esse magis credibile, Cum in eo declarando tot scripturæ, tot rationes, tot quotidiana conspirent exempla, nostris tam apertè subiecta sensibus, vt mirum sit posse aliter sentire aliquem; & longe magis mirum, vix esse aliquem qui non aliter sentiat, & qui non sibi semper promittat crastinum, ac pene numquam delituros annos, quasi cum morte fædus percussisset, quasi cum inferno fecisset pactum.

Erant olim Epicurei qui hac tam aperta momentanea vitæ nostræ notitia prauè vti, seipsum inde magis acuebant ad suum laxandum genium, quasi hoc vno viuerent vt comederent, sic se mutuo prouocabant. *Edamus & bibamus, cras enim moriemur.* ^{Is. 22.} Contra quos postquam Propheta Isaias quid sibi à Domino reuelatum esset, intorsit; tum paulo post ad alios qui ex opposito nihil de morte & vita solliciti, vnum curabant vt sine cura viuerent: *Audite, inquit, verbum Domini viri illusores; dixistis enim* ^{Ibid. 28.} *percussimus fædus cum morte, & cum inferno fecimus pactum: flagellum inundans cum transierit, non veniet super nos, quia posuimus mendacium spem nostram, & mendacio protecti sumus.*

Non quod ita loquerentur, sed quod ita securè viuerent, quasi sic loquerentur; vnde & cohærenter illis denuntians quas ipsi pænas sibi accerferent, sic addit; *Delebitur fædus vestrum cum morte, & pactum vestrum cum inferno non stabit, flagellum inundans cum transierit, eritis ei in conculcationem: quodcumque pertransierit, tollet vos; quoniam mane diluculo pertransibit in die & in nocte, & tantummodo sola vexatio intellectum dabit auditui. Quali diceret, tunc id demum intelligunt quando vexabuntur: nam quamdiu suauiter viuunt, suauitate illa tantopere deliniuntur, vt vix aliud recogitent.*

Quod præclare sanctus Ioannes Damascenus atque ad rem ^{L. de Barl. & Iosaph.} nostram accommodè repræsentat, notâ illâ parabolâ, quam instituit de Iuene, qui dum horrendam fugeret belluam, forte incidit in abrupta terræ loca, vnde prodibat exigua quædam arbor qua se tantisper suspensum sustinebat. At ecce vndequaque succutitur ille arbusculus, hinc duo simul iuncti mures radicem

rodunt, illinc aspides quatuor pendentis pedes inuoluunt, atque ex imo fundo erumpit immanis Draco qui expansis faucibus iamiam cadentem prædam excipiat. Quid tum verò agat miser ille pendulus adolescens? Dum se circumuoluit obseruaturus exitum, aduertit in sublimi arboris ramo *modicum mellis*, quò statim manum infert, & eius suauitate sic se totum deliniri & occupari finit, vt nihil de periculo cogitans se satis tutum ac beatum putet.

Hæc est videlicet, hæc est imago vitæ præsentis, hic est omnium pene viuentium status. Mors vnumquemque insectatur, quam vt omnes fugiant, vitæ præsentis commodis quantum quidem possunt innituntur: sed quid vita præsens, nisi quædam velut arbuscula quam singuli dies ac noctes simul corrodunt, atque ipsa quatuor elementa dum inter se certant, de nostræ interitu vitæ decertant? Quònam verò incumbit? quònam petit nisi tetrum illum & feralem inferorum locum qui *dilatauit animam suam*, vt ait Propheta, quia non est in terra scientia. Denique fallax illa mellis gutta, quid aliud quàm naturalis vitæ cupiditas, quæ sic viuentem retinet, vt cæterorum oblitus, solum viuere cogiter, solumque hoc vnum appetat.

Sed tandem moriendum! quis tum mundani animus? quis tum
1. Reg. 14. est animi sensus? *Gustans, gustauit paululum mellis, & ecce morior!* Hæc Ionatæ verba ex animo fusa mirum quantos concitant motus. Horum autem omnium finis & fructus est, vt vitæ præsentis amor temperetur, prosperitas si quæ est, non magni fiat; si quæ occurrunt bona & gaudia, non in bonis ducantur, sicut mundus ea ventitat; de vita denique iudicetur, non vt agitur, sed vt quasi iam acta sit. Nam vt rectè concludit sanctus Augustinus, *hoc modicum, longum nobis videtur, quoniam adhuc agitur; cum finitum fuerit, tunc sentiemus quàm modicum fuerit. Non ergo sit gaudium nostrum quale habet mundus de quo dictum est, mundus autem gaudebit.*

*TraH. 102.
in Ioan.*

2. VERITAS PRACTICA.

Tale est pretium huius modicæ vitæ, vt quanto maioris vitam hanc æstimes, tanto minoris facias illius pretium.

Tale est pretium huius modice vitæ, ut quanto, &c. 559

Ratio est euident ex Apostolo, quia huius modice vitæ pretium 2. cor. 4.
est ipsa beata æternitas; Id enim quod in præsentī est,
inquit, momentaneum & leue tribulationis nostræ
supra modum in sublimitate, æternum gloriæ pon-
dus operatur in nobis.

Sed quanto maioris vitam hanc æstimes, tanto minoris beatam
æternitatem facis.

Nam quid est magni hanc vitam æstimare, nisi quæ sunt hu-
ius vitæ magna, ut diuitiæ, dignitates, delitiæ, cæteraque mundi
magnalia ex ipsius mundi sensu magnificare, & beatum dicere ps. 14.
populum cui hæc adsunt. Quid est autem beatæ magis aduersum
æternitati, quàm sic sentire & iudicare? unde idem ad prædicta
consequenter Apostolus, *Non contemplantibus nobis quæ videntur,*
sed quæ non videntur, quæ enim videntur temporalia sunt: quæ autem
non videntur, æterna sunt. Quasi diceret, idcirco momentaneum
vitæ huius gloriosam æternitatem operatur, quia quæ sunt hu-
ius vitæ gloriosa contemnimus, & quæ sunt dura & vilia, susti-
nemus: sic enim fit, ut laboribus quies, ignominia gloria, dolori
gaudium, paupertati diuitiæ, & miseriis beatitudo tribuantur.
Sicut è contra de his qui vitam hanc magni duxerunt, dicitur,
quantum glorificauit se & in deliciis fuit, tantum date illi tormen- Apoc. 18.
tum & luctum.

Hinc igitur euidenter patet, *Quòd quanto maioris vitam hanc*
æstimes, tanto minoris facias illius pretium, quod est æternum illud
gloriæ pondus, cui promerendo & assequendo nihil est aptius
quàm huius vitæ contemptus. Beati qui futura sapiunt, ait san-
ctus Bernardus, præ desiderio celestium, interno quodam sapore men- Sermon 2. de
tis præsentia respuentes. Utinam saperent & intelligerent ac nouissi- SS. Petro
ma prouiderent. Utinam sapiamus ad præsentis vitæ moderationem, & Paulo.
utinam intelligamus ad præterita correptionem; utinam deuota in
Deum fide prouideamus ut felicem habeamus ipso miserante consum-
mationem. Et cuidam in Epistolis particulatim, ô utinam sape- Ep. 29.
res quæ Dei sunt, intelligeres quæ mundi sunt, prouideres quæ infer-
ni sunt, profecto inferna horreres; superna appeteres; quæ sunt ad
malum, contemneres.

In quo mundi contemptu si quis est forte labor, cogita quàm

§ 60 Dominica 3. post Pasc. Modicum & iam non videbitis me.

fit modicus ad tale promerendum pramium qualis est æterna gloria. Digna est quidem emi labore perpetuo, inquit S. Augustinus, sed necesse est ut labore temporali ematur. Certe tantus debuit esse, id est, sempiternus labor pro requie sempiterna. Decies centena millia annorum in labore quid valent? Decies centena millia annorum habent finem; quod tibi dabo, dicit Dominus, non habebit finem. Qualis misericordia Dei? nec dicit, decies centena annorum millia labora, non dicit, vel mille annos labora, non dicit, quingentos annos labora; cum viuis, labora, in paucis annis, inde iam requies erit, & finem non habebit. Et paucos annos laboras, & in ipsis laboribus non deest consolatio, non desunt gaudia quotidiana: sed noli gaudere in sæculo, gaude in Christo, gaude in verbo eius, gaude in lege eius, ad ipsa gaudia pertinet quod loquimur & quod auditis. Quanta ergo sunt ista consolationes in tantis laboribus? Verum est ergo quod dixit Apostolus: Etenim quod ad præsens est, temporale est & leue tribulationis nostra, iuxta incredibilem modum & in incredibilem modum, æternum gloria pondus operatur in nobis. Ecce quantum pretium damus, quodammodo unam siliquam ad accipiendos thesauros sempiternos. Siliquam laboris ad requiem incredibilem secundum quod dictum est, iuxta incredibilem modum & in incredibilem modum, æterna gloria pondus operatur.

3. VERITAS PRACTICA.

Ex modico illo quo viuis tempore, plus etiam vitæ perdis quàm viuas.

RATIO est quia plus perdis quam viuas vitæ, si plus vanè quam fructuosè vitas.

Sed diligenter inquirenti de tuo vitæ statu sat euidenter patebit te plus vane quàm fructuosè viuere.

Ergo ex modico illo quo viuis tempore, plus etiam vitæ perdis quàm viuas, quod certe est deplorandum & corrigendum.

I. PUNCTVM.

SI de breuitate vitæ dolendum tibi forte videretur, quod non sit satis spatij, vel ad beatam illam promerendam æternitatem

nitatem quam speras, vel ad reddenda Christo quæ debes obsequia, vel ad dissoluenda quæ contraxisti debita, vel ob similem aliquam piam causam; dole quidem & deplora vehementer brevitatē vitæ, sed non propter illas quæ videntur piæ, causas. Satis enim est spatij à diuina providentia definiti, si solidè locaretur in illos sacros vsus. Verùm ex illo etiam spatio quod nimis modicum & breue dicimus, plus nostrâ culpâ nobis deperit quàm nostræ pietati supersit. Vnde si vel totum vitæ spatium dolebas esse angustius tuis persoluendis officiis, quanto magis dolere debes illas tibi etiam angustias contrahi & pene totas detrahi? Cumque à te solo tuâque solâ culpâ contrahantur, quanto id cauere debes studio, quanta sollicitudine peruestiganda illa tua culpa, vt serio & gnauiter tibi prospicias?

Hoc itaque persualum esto quod habet veritas: *Ex modico illo quo vivis tempore, plus à te perdi quàm viuas temporis seu vitæ.*

Hoc est enim vitam & tempus perdi, quando nullus eius vsus, nullus eius vsuræ fructus, nullum illius operæ pretium ponitur. *Non erit terra tua sterilis nec infacunda. NON erit apud te sterilis* Exodi 23.
utriusque sexus. Quæ sic à Domino commendabantur Iudæis, Dent. 7.
vt agnoscerent sub illis symbolis quod apertius postea docuit Sapiens, *Quodcumque facere potest manus tua, instanter operare:* Eccl. 9.
Tum euidentissime Christus Dominus; *Omnis arbor quæ non facit fructum bonum excidetur:* vnde & Apostolus, *Quem fructum* Math. 12.
habuistis in illis, in quibus nunc erubescitis? nam finis illorum mors est. Rom. 6.
Quali diceret, quantumcunque laboraueritis, nisi laboris vestri probatus aliquis fructus appareat, labore vano consumpti estis, tempus vestrum ac vitam profuditis, mors est non vita sic viuere. *Non quemquam propter canos aut rugas putes diu vixisse; non ille* L. debet
diu vixit, sed diu fuit. *Quid enim si illum multum putas nauigasse,* uit. vitæ.
si saua tempestas à portu exceptum huc & illuc tulit, ac viribus ventorum ex diuerso furentium per eadem vestigia in orbem egit? Non ille
multum nauigauit, sed multum iactatus est.

Rectè omnino Seneca, sed malim rationem à sanctis nostris audire Patribus, quam ab illo qui certè nimius est in suo solo sapiente commendando.

Sic itaque S. Basilii & Chrysostomi atque alij passim affirmant, non esse propriè viuere, quando homo fructuosè non laborat, quia videlicet *natus est homo ad laborē, & laborem probatum* Iob. 5.

362 Dominica 3. post Pasc. Modicum & iam non videbitis me.

& utilem, hic eius humanæ vitæ finis, non vt otiosè & torpidè viuat, non vt in deliciis aut diuitiis cumulandis: sed Deo, sed animæ, sed æternitati laboret; sic posuit Dominus hominem in Paradiso vt operaretur & custodiret illum. Quid est operaretur & custodiret? nonne terra vtrò sine vlla opera germinabat fructus suos? nonne satis erat tutus locus, vt custode non esset opus? Ita plane, sed ita tamen erat operandum hominì vt sibi custodiret paradysum, erat ei operandum quod & quo iubebatur modo; Quod quia non præstitit; deliit viuere quâ vivebat vitâ, & incepit mori quâ morte dictum est, *In quocumque die comederis, morte morieris.*

Zach. 13. Hinc illud Prophetæ, *homo agricola ego sum, quoniam Adam exemplum meum ab adolescentia mea.* Id est, iam inde à primo parente nostro didici me ad laborem natum, atque ad colendum ex diuinis præceptis animæ meæ statum, sicut si agrum colerem, vitæ humanæ sustentandæ.

Cum itaque sit ille finis hominìs, quem si ab homine remoueris, tollis eius moralem vitam, sicut si formam remoueres, tolles naturalem vitam; propterea verissime dicuntur tempus & vita perdi, cum sine labore fructuoso conteruntur. *Diem perdidì* dicebat ille qui diem indonatum transfegerat. O quâti sic dies vacant & inanes transiguntur! ô si saltem hoc sentiret & diceret!

II. PUNCTVM.

SED diligenter inquirenti de tuo vita statu, sat euidenter patebit, te potius vane quam fructuose viuere.

1. Cor. 3. Vnusquisque videat, inquit Apostolus, quomodo superadificet. Fundamentum enim aliud nemo potest ponere, præter id quod positum est, quod est Christus Iesus. Si quis autem superadificat super fundamentum hoc, aurum, argentum, lapides pretiosos, ligna, fœnum, stipulam, vniuscuiusque opus manifestum erit: dies enim Domini declarabit. Quasi diceret, vniuscuiusque est seipsum nosse ac diligenter inspicere, an Christiane viuat & fructuose operetur. Tanta est enim differentia inter nonnullorum hominum opera, quanta est inter aurum & lignum, inter argentum & fœnum, inter lapides pretiosos & stipulam. Et quemadmodum domus ædificata ex auro vel argento, vel ex lapidibus marmoreis, porphy-

reticis, & similibus non combureretur igne sicut domus ædificata ex ligno vel stipula, sic opera fructuosa illa sunt quæ manent in æternum, alia vero quæ euanescent vel quæ consumuntur in hac víta, vana dicenda sunt & omnino nulla.

Vt vero etiã certius possis discernere, quænam illa sint fructuosa vel vana, vide in quo vtraque fundamento superædicentur, & am si extra Christum Iesum aliquid opereris, extra fundamentum ædificas, & nullum erit tale opus. Quamobrem hoc vnum restat, probe intelligere quid sit extra vel supra fundamentum ædificare, & quam sit totum penè vanum quod viuís.

Ad faciliorem autem intelligentiam, quæ plura de hoc fundamento dici possent, distincte referuntur ad quatuor capita, quæ sunt velut quatuor illæ causæ quæ concurrunt ad vnumquodque opus peragendum, de quibus fusius in 3. parte Domin. 7.

Primo enim oportet vt quicquid facis, non sit malum, non sit vetitum, non sit ingratum & odiosum Christo, cum alioquin nullo modo dici posset ædificatum in ipso; Nonne id liquet? *Numquid iniquitas apud Deum? absit.* Neque vero etiam sufficit *Rom. 9.* id non esse malum, aut etiam esse aliquid bonum: nam non omne bonum ab omnibus ex æquo vult, *Numquid vult Dominus hoc locusta, & non potius vt obediatur voci Domini?* Atque hæc est velut materia, nempe id quod à te velit Dominus, & non aliud, *unicuique sicut diuísit Dominus: vnumquemque sicut vocauit Deus.* *I. Cor. 7.*

Secundo est debita operis forma, nempe vt id agas quo decet modo, ex virtute quæ competit operi, ad exemplar & similitudinem ipsius Christi, neque enim probare posset quod vitiose faceres, licet illud esset in materia vel substantia quod veller à te fieri, nam expressa vox eius est: *Estote vos perfecti sicut & pater vester cælestis perfectus est.* *Math. 5.*

Tertio quæ est efficiens causa, oportet te in illa esse gratia, quæ sanctificans dicitur, vt sis vnitus Christo, sintque ex hac vniõne, tua Deo grata opera, & fructuosa, cum alioquin mortua & nulla essent, *Charitatem autem non habuero, nihil mihi prodest,* ait *I. Cor. 13.* Apostolus de suo quouis opere.

Quartò denique, quod est in primis spectandum, sine recto, & pura intentione sic Christo superædificari opus nostrum necesse est, vt nisi recto fine fiat, non insit illi fundamento,

- Matth. 6. & nullum planè sit. Amen dico vobis, receperunt mercedem suam,
nempe illi qui aliis quam Deo placere volunt. Vnde apte san-
ctus Gregorius, ad illa Iobi verba, *super quo bases eius posita sunt,*
Iob. 38. *SICUT fabrica columnis,* inquit, *columna autem basibus innitun-*
tur, ita vita nostra in virtutibus, virtutes vero in intima intentione
subsistunt. Et quæ plura prosequitur, quæ vno verbo Aposto-
coloss. 3. lus comprehendit, cum ait : *omnia in nomine Domini Iesu Christi.*

I A M vero quod est propositæ quæstionis præcipuum caput,
vt certo cognoscas ; quam sint opera tua maiori ex parte potius
vana quam fructuosa , vide quantum deficiant ab illis quatuor
causis : nam vt sint fructuosa, totas simul oportet conuenire cau-
sas : vt sint vero vana , sufficit vel vnâ deesse causam. Ratum
enim, fixumque est illud Effatum , quod à magno Dionysio pro-
nuntiatum sanctus Thomas confirmat ; *Bonum ex integra causa :*
1. 2. q. 18. *malum ex quouis defectu.*
5. 4.

Si quid in peccato factum , quantumcumque tibi bonum , &
laudabile videretur , hoc ipso nullum est , quia deest effectrix
causa quæ est Gratia sanctificans. Si quid in illa gratia perperam
& segniter agatum , careatque sua congruenti forma : *Maledi-*
1. 4. q. 48. *ctum est illud opus quod est factum negligenter aut fraudulenter.* Si
quid denique non recto fine directum , tam illud vacuum & ina-
ne reputatur, quam si corpus esset exanime. Quibus ita necessa-
rio præsuppositis, dic sincerè, quid ex tota die refers fructuosum,
& beatæ capax æternitatis ? Metire singulos, per suas horas, dies:
Ex horis quatuor & viginti detrahe quæ somno dantur, supersint
decem & octo vel septem in quibus vigilas: quid tum porro boni ?
quid tum recte operaris ? Velenim otiaris, vel laboras : si otiaris,
vanum est : si laboras , cupiditati laboras , & labor inanis est ne
dicam prauus , non est enim ille laboris finis : quo in labore va-
cuo & inani cū totus dies absumatur, quid tandem supererit fru-
ctuosi ? Preces aliquot à te recitatas fortasse suggeres , sed quan-
tis illæ intercissæ nugamentis ! quantis exagitata curis alienis !
quantis infuscatæ diuersarum cogitationum maculis ! quàm il-
lud mancum & exile bonum quis non videt ! At esto tamen va-
leat , sed quantum est istud ad reliquas diei partes ? quot in oran-
do ponis horas ? confer cum cæteris quæ cassæ sunt & sine fructu
abunt, nonne satis euidenter patebit te magis vanæ quam fru-

Ex modico illo quo viuis tempore, plus etiam perdis, &c. 565

Stuose viuere? Sic proinde Propheta grauitur; *Ecce omnes iniusti; 1f. 41.*
& vana opera eorum, ventus & inane, simulachra eorum; Quasi diceret, sicut idolum nihil est nisi quid vanum & inane, sic eorum opera, sic eorum vita. Quod & paulo post clarius repetit: *Telas 1f. 59.*
aranea texuerunt: tela eorum non erunt in vestimentum, neque operientur operibus suis; opera eorum opera inutilia.

III. PUNCTVM.

QUAM OBREM aperte liquet, quod ex modico illo quo viuis tempore, plus vita perdas quam viuas, Neque enim viuere contentum est quod sine viuendi caret, caret autem illo fine, quidquid totum operaris ex terrena & temporali potius cupiditate quam coelesti & aeterna. Vnde in scripturis & decurtati dicuntur anni, & menses vacui, & dies dimidiati, & pueri centum annorum. *1f. 65.*

Quod & Homini pagano tam probe cognitum fuit, quam aperte testantur haec eius senfa, quae ex multis pauca, nostram ad verecundiam, legi possunt minutatim & expendi.

Persuade tibi hoc sic esse vt scribo, quadam tempora surripiuntur Senec. Ep. nobis, quadam subducuntur, quadam effluunt. Turpissima tamen est iactura qua per negligentiam venit: & si volueris attendere, magna vita pars elabitur male agentibus: maxima, nihil agentibus: tota aliud agentibus.

NON exiguum temporis habemus, sed multum perdimus. Satis ^{Lib de breuitate vitae} longa vita, & in maximarum rerum consummationem largè data est, sitota bene collocaretur: sed vbi per luxum & negligentiam nostram defuit, vbi nulli bonae rei impenditur: vltima demum necessitate cogente, quam ire non intelleximus, transisse sentimus.

Ita est, non accepimus breuem vitam, sed fecimus, nec inopes eius sed prodigi sumus.

Exigua pars est vita quam nos viuimus; ceterum quidem omne spatium, non vita, sed tempus est.

Omnia licet quae vniquam ingenia fulserunt in hoc vnum consentiant, numquam satis hanc humanarum mentium caliginem mirantur.

Nemo inuenitur qui pecuniam suam diuidere velit: vitam unusquisque suam multis distribuit! astricti sunt in continendo patrimonio:

566 Dominica 3. post Pasc. Modicum & iam non videbitis me.

simul ad temporis iacturam ventum est, profusissimi in eo cuius unius honesta auaritia est.

Libet ex seniorum turba comprehendere aliquem. Peruenisse te ad ultimum humane etatis videmus. Centesimus tibi vel supra premitur annus. Agedum ad computationem, etatem tuam reuoca, dic quantum ex isto tempore cliens abstulerit, &c. Videbis te pauciores annos habere quam numeras.

Maxima vita iactura dilatio est, maximum viuendi impedimentum expectatio quæ pendet ex crastino. Perdis hodiernum, quod in manu fortune positum est, disponis, quod in tua dimittis, quo spectas? quo te extendis? omnia quæ ventura sunt in incerto iacent, protinus viue &c.

Hæc vt dixi, pauca ex multis, quæ si tamē plura, quam deceret à profano deriuasse Authore, cuiquam viderentur, his certe legendis abstineat: sed quæ non probat non idcirco improbet, ne probatissimos condemnet viros, in primisque Ludouicum Granatensem, qui tam multus in illius Philosophi scriptis legendis, colligendis, & commendandis fuit, vt ex eis Collectanea, sacris profutura Concionatoribus ediderit: sui que rationem operis, cum ex sanctis Augustino, & Hieronymo reddat: tum ex ipso qui potest inde fructu colligi, fuisse narret. Ac ne longius abeamus; quis Christianus illis lectis, quæ de iactura temporis commemorata sunt, non magis sibi dolendum sentiat, quam isti Viro Ethnico, quod non tēporalem modo vitam sibi eripiat, sed diuinam in se manentem, sed æternam & beatam in qua mansurus est, & de qua tot demit gradus, quot consequi poterat, si rationem sui temporis duxisset cariores? Pauendum sane illud, quod narratur de Angelo quem Ioannes vidit stantem super mare, & super terram, qui leuauit manum suam ad cælum: & iurauit per Viuentem in sæcula sæculorum: *Quia tempus non erit amplius!*

Vide in 3. parte Dominicam 7. & in 4. totam hebdom. 18.

EX SECUNDA EVANGELII PARTE.

Amen dico vobis quia plorabitis & flebitis vos, Mundus autem gaudebit, &c.

Vt fur de furto, sic Mundus de mundo gaudet. 567

PRIMA VERITAS.

Qui de Christo dolente non dolet cum Apostolis, nec de illo gaudente gaudere potest cum ipsis.

Ratio fuse declaratur in hac 2. parte, Feria 2. hebdomadæ 1. Quadragesimæ.

SECUNDA VERITAS.

Vt Fur de furto, sic Mundus de mundo gaudet.

SENSVS & Ratio est, quod idcirco fur de furto male gaudet, quia de malo gaudet.

Sed Mundus de mundo gaudens sic de malo gaudet.

Ergo & male gaudet, & sicut fur de furto sic Mundus de mundo gaudet.

TOTA ratiocinatio est facilis. Primo quidem quàm prauè fur de furto gaudeat, quis non tam clarè videt quam malum esse, furari. Quod si quis non id videret, audiat Prophetam Isaiam, inquit S. Augustinus: *Non est gaudere impiis, dicit Dominus, gaudere quod vocant impij non est gaudere. Vtique videbat Isaias homines in potatione, in luxuria, in theatris, & in spectaculis, totum mundum luxuriari variis nugis, & tamen clamabat: Non est gaudere impiis dicit Dominus; si hoc non est gaudium, quale gaudium videbat, in cuius comparatione hoc non est gaudium?* Ser. 37. de verbis Domini. Is. 57.

Sic & sanctus Prosper: *Gaudere quidem bonum est, sed qui gaudet si non inde gaudeat unde debet, non potest bonum esse quod gaudet. Siquidem gaudet & raptor cum desiderata rapuerit: gaudet & ebriosus cum exoptata occasionem potationis inuenerit: gaudet & adulter, cum ad delectationem concupitam peruenerit. Sed cum sit gaudere bonum, de his atque huiusmodi gaudere, grande est malum: hac & his similia sunt unde gaudere nos vult mundus, cum suis amatoribus periturus. Hac sunt quæ repudiare debemus ut de bona conscientia, & sanctitate morum, de acquisitione virtutum, de dono Dei, & promissione futuri regni ineffabiliter gaudeamus.* L. 2. de vita cons. c. 13.

DEINDE vero quod secundo dicitur, Mundus de mundo gaudens sic de malo gaudet, tam facile potest intelligi, quàm

368 Dominica 3. post Pascha. *Mundus autem gaudebit.*

vox illa *Mundus*, quæ iam sapissime sic declarata est, ut significare diceretur eos, qui ex concupiscentia, res mundi diligunt, quæ posita declaratione nominis, tum aperte liquet quod quando de his rebus gaudent, de malo gaudent, non quidem in se, sed in modo rei possessæ cuius possessio parit gaudium. Non sunt quidem malæ diuitiæ, sed malum est diuitias ex praua concupiscentia diligere, & possidere; Vnde quod ex tali dilectione, & possessione procedit gaudium, tam vere de malo est quam mala est illa dilectio, *Va vobis diuitibus, quia habetis consolationem vestram. NVNC autem exultatis in superbiis vestris: Omnis talis exultatio maligna est.*

Luc. 6.
Iac. 4.

Qua de re, fuse in 4. parte, hebdomada 17.

P A T E T itaque Veritas, quod sicut fur de furto, sic de mundo *Mundus* gaudet, sic peruerse, sic prauè, sic falso & non ferendo gaudio: *Verumtamen in hoc nolite gaudere.* Velle sine gaudere de furto? Quamobrem vero, nisi quia malum est quod detestaris. At si gaudere de mundo non minus est malum & detestandum, cur non minus de illo gaudere nolis? Non est, inquit, tam grande malum quam furtum. Responderi posset, posse furtum tam paruum esse, ut *mundanum* esse, sit grauius; sed esto sit grauius furtum, non hic æqualitas mali quaeritur sed similitudo; satisque est bonæ menti malum quàm malum fugere, non quàm tale malum, sicque est satis ad veritatem similitudinis exprimendam, declarasse quod de rebus mundi gaudere sicut *Mundus* gaudet, tam sit malum, quam furem de furto gauderet, licet non sit tantum malum. Sic vniuersim sanctus Ambrosius: *ut corpus, inquit, agrotum nunc calidioribus fouetur, nunc frigidioribus temperatur. remediorumque mutatio, si iuxta præceptum fiat medici, salutaris est. si contra mandatum usurpetur, languoris augmentum est: ita medico nostro quidquid penditur Christo, remedium est: quicquid usurpatur, incommodum. Debet igitur bene consciæ mentis esse letitia, non in conditis comestationibus, non nuptialibus excitata symphonis. Ibi enim intuta verecundia, illecebra suspecta est, ubi comes deliciarum extrema est saltatio.*

E. 3. de
virginibus

Ser. 39 de
verbis Do-
mini.

Quò etiam spectat salubre hoc Diui Augustini monitum: *Sicut non potest homo duobus Dominis seruire, sic & nemo potest in hoc seculo gaudere, & in Domino. Multum inter se hac duo gaudia differunt, suntque omnino contraria. Quando gaudetur in seculo*
non

Ut fur de furto, sic Mundus de Mundo gaudet. §69

*non gaudetur in Domino. Vincat gaudium in Domino, donec finiat-
tur gaudium in seculo, gaudium in Domino semper augeatur, gau-
dium in seculo semper minuatur, donec finiatur. Non ideo ista dicun-
tur, quia in hoc seculo cum sumus, gaudere non debemus, sed etiam
in hoc seculo constituti iam in Domino gaudeamus.*

Vide in 4. parte, hebdomada 22.

3. VERITAS PRACTICA.

Non te contristes contristatus, & ipsa tua tristitia iam
vertetur in gaudium.

*RATIO est, quia iam tūc tristitia nostra in gaudium vertitur
quando in tristitia non malum sed bonum esse agnoscitur.*

*Sed si contristatus non te contristes, bonum in tristitia tua clare
agnosces.*

*Ergo & ipsa tua tristitia iam vertetur in gaudium; quod certe est
exoptandum.*

I. PUNCTVM.

LICET discursus sit satis planus & facilis, quia tamen est
admodum fructuosus, & ad praxim penē quotidianam
perutilis: idcirco paulō latius videtur explanandus. Atque hoc
in primis tamquam fundamentum stabiliendæ firmitatis animi,
nullo casu concutiendæ præmittatur, quod si quis in naturali vel
fortuita sua tristitia, non malum sed bonum inesse aliquod sibi
certō repræsentet & credat; tunc profecto gaudium tam facile
sentiet, quā facile perceperat tristitiam ex apprehenso malo
quo fuit excitata.

In hoc enim conueniunt hæ diuersæ duæ passionēs, quod non
nisi ex apprehensione boni vel mali præsentis concitentur: atque
ita sit vt sicut in vno & eodem obiecto, diuersa potest considerari
ratio boni vel mali: sic ex illo ipso diuersi motus sequentur vel
tristitiæ, vel gaudij vel vtriusque simul affectus, prout seorsim
bonum & malum, vel simul obuersionabuntur. Hinc illud Prophetæ:

Isa. 1.

Is. 5.

Confusum est gaudium à filiis hominum : Id est, homines gaudent iis rebus quibus moerendum esset : & iis moerent quibus gaudendum esset : quia in illis rebus apprehendunt bonum vel malum aliter atque apprehendi deberet : unde & alius Propheta : *va qui dicitis malum bonum : & bonum malum*. Hinc tota ratio gaudij vel tristitiæ : *ponentes amarum in dulce, & dulce in amarum*. O amarum mundi dulcedinem ! O dulcem contrā & suauem Christianæ religionis amaritudinem, si quod in illa est bonum consideraueris.

II. PUNCTVM.

SED si contristatus non te contristes, bonum in tristitia tua clare agnoscas.

Supponenda hic tria. Primum est, duplex esse genus tristitiæ ; vnum quod in nobis sine nobis est : alterum quod ita est à nobis vt sicut illud ponere, sic & possimus deponere. Secundum quod supponas est, fieri quidem ordinariè, vt duplex illud genus tristitiæ simul concurrat & sentiat : posse tamen & debere ab inuicem separari, adeo vt aduenienti nobis ex quocumque aduerso casu tristitiæ, non addamus aliam : neque nos iam contristatos, rursus contristemus. Tertium denique, vt melius intelligatur quomodo possimus nos iam contristatos non contristare, oportet prius scire quomodo nos contristemus ; Nempe ita fit, vt cum incipimus dolere corpore, vel animo ; dolemus nos dolere, Id est, reflexione facta super illum dolorem vel tristitiæ sensum quo tangimur, dolet animus quod ille dolor corporis aut animi nobis obuenerit ; Expendit Intellectus miseriam in qua jacemus seu malum illud quod in illo sentimus aduerso casu : Repugnat & contradicit Voluntas tali opposito malo ; Id est velle non adesse ; Memoria tota occupatur in huius cogitatione mali, vel in mediis excogitandis quibus eo liberari posses. Hoc est se contristare, se miserum reputare, se miserum cogitare, & dolere se miserum esse. *Quare contristatus incedo, dum affligit me inimicus?*

Psalm. 41.

Econtra verò, non se contristare est, non cogitare de sua tristitia, non inde angere & dolere ; Dolere quidem, si quid naturaliter contrarium cupiditati aduenerit, sed non duplicare dolorem, sicut fit cogitando de infausto illo euentu quasi de graui

malo ; vel dolendo de dolore inde primum proueniente ; vt dictum est : Abstrahitur quodammodo animus ab ista reflectione & cogitatione ; Toleratur patienter malum , vnde cumque obueniens : Si quod sit remedium , suauiter adhibetur ; aut si nullum appareat , obfirmatur animus & cum gratia Dei continetur , ex præscripto Sapientis : *Omne quod tibi applicitum fuerit , accipe : & in dolore sustine : & in humilitate tua patientiam* Ecclesi. 2. *habe.* Hoc est dicere , Non te contristes. Quod & expressius Idem ait : *Tristitiam non des animæ tuæ , & non affligas te metipsum in consilio tuo.* Audisne illum ipsum qui dixerat , accipe & sustine quidquid mali acciderit , iam dicere , non des tibi tristitiam ? Aliud est enim accipere , & aliud est dare sibi tristitiam. Accipitur quando nobis obuenit sine nobis , vt supra dicebatur : Datur vero à nobis , quando vel sine causa nos affligimus , vel cum causa iam afflictis afflictionem addimus ex consideratione mali accepti , quod à Sap. 11. scriptura dicitur *duplex radium & gemitus.*

Iam verò his ita suppositis & declaratis , Quod erat huius puncti præcipuum , *si contristatus non te contristes , bonum in tristitia tua clare agnoscas* , sic euidenter demonstratur : Nam cum pacatus & tranquillus sit animus , sit etiam capax veritatis agnoscendæ quam non cognosceret perturbatus : quando autem non se contristat , sit pacatus & tranquillus ; hoc enim vno perturbatur quod se contristet ; ac proinde hoc ipso quo se continet , redditur capax & aptus ad veritatem illam agnoscendam , quæ nos ex scripturis sacris aperte docet , in tristitia siue in qualibet contingenti aduersitate , bonum & bonæ esse innumera.

Nonne sæpe audiisti quanta inessent in his malis bona , quæ non nisi Deo permittente nobis eueniunt , ad emendationem , ad probationem , ad exercitationem , ad victoriam , ad coronam ? Hæ sunt videlicet Beatitudines Euangelicæ : Hæc est præcipua Euangelij gratia *sustinere tristitias* , pati tam libenter , quàm iniuste pati : *Vobis donatum est* , inquit Apostolus tamquam insigne donum & eximium munus , *vobis donatum est pro Christo , non solum* 1. Pet. 2. *vt in eum credatis , sed vt etiam pro illo patiamini.* Hæc sunt Apostolatus signa : *in omni patientia* , id est , hæc sunt signa certiora diuinæ vocationis ad magnam gratiam : Hæc sunt diuinæ argumenta Electionis ad ingentem gloriam , quibus donis & bonis an credis alia posse esse meliora ? 2. Cor. 12.

III. PUNCTVM.

NON te contristes igitur contristatus, & ipsa tua tristitia iam vertetur in gaudium: Sic enim fiet vt non perturberis aduersus, non perturbatus attente mediteris bona quæ in aduersis continentur; atque illa tandem meditatus bona & commoda gaudeas & exultes letitia inenarrabili & glorificata; SICVT exultant victores capta prada dum diuidunt spolia; & sicut excitari solet gaudium in apprehensione boni cuiuslibet. Omne gaudium, ait S. Iacobus, existimate, fratres mei, cum in tentationes varias incideritis; Nempe illud est omne gaudium quod est solum bonum & solidum; hoc autem solum tale est, quia est de vero bono, cum cætera mundi gaudia sint de vanis & falsis bonis: vnde ille qui plura hauserat mundi gaudia, risum reputauit errorem, & gaudio dixit, quid frustra deciperis. Est præterea gaudium illud supernaturale & diuinum; neque enim à carne vel dæmone potest excitari gaudium de tristitia & tribulatione; cætera verò mundi gaudia vel sunt carnalia, vel mundana, vel diabolica.

Denique gaudium est proprium & solidum quod non pendet ab incertis & fluxis creaturis, sed in solo Deo fixum, in eius colenda voluntate, in Christi Domini similitudine & imitatione, in spe futuræ Beatitudinis, in Charitatis & omnium virtutum praxi; in ea denique pace Christi quæ exuperat omnem sensum. COMMUNICANTES Christi passionibus gaudete, vt in reuelatione gloria eius gaudeatis exultantes. Sic Diuinus Apostolus non modo de se testatur quod superbundaret gaudio in omni tribulatione, sed & primis Christianis congaudet, quod sic exultarent in tristitia, quod sic rapinam bonorum suorum cum gaudio susciperent, cognoscentes se habere meliorem & manentem substantiam; Quasi diceret, in rapina bonorum non cogitantes malum & incommodum quod ex paupertate prouenire posset, sed potius bonum quod ex illa paupertate patienter accepta, deriuatur: Vnde sicut ex malo sensibili paupertatis, poterat esse aliquis etiam dolor & tristitia sensibilis; sic in illo dolore verum erat gaudium propter bonum quod in illa tristitia continebatur; sicque tandem tristitia vertebatur in gaudium: cum vel exhauriretur om-

nino per gaudium superabundans, vel tali misceretur gaudio, ut esset amabilis & suavis tristitia, longeque gratior omni humano gaudio.

Recte igitur Sapiens qui nos monuit accipiendam & non dandam nobis tristitiam: *Miserere*, inquit, *anima tua placens Deo* Ecc. 1. 30. & *contine; congrega cor tuum in sanctitate eius; & tristitiam longe repelle à te*; Quibus verbis tota pene veritatis declaratio continetur; nam quod dicit *miserere anima tua*, perinde est ac si diceret, satis sit te esse miserum tristitia illa quam ex aduerso casu accepisti: neque nouam addas quæ alia longe peior est, nam eius exhaurit meritum: Atque ut facile possis nouam hanc superuenientem tristitiam reprimere, *congrega cor tuum in sanctitate eius*, id est, recollige teipsum ad meditandum quid inest boni in illo aduerso casu: quod ut etiam commodius facias, repelle tristes quæ sese ingerunt cogitationes: sustine primum patienter, tum lætanter sustinebis.

Anna cur fles? & quomobrem affligitur cor tuum? Numquid non ego melior tibi sum quam decem filij? Sic Elcana coniugi de sua sterilitate se contristanti. Sic iuxta Tobias senior: *Tace & noli turbari, sanus est filius noster*: Salua sunt omnia si te non turbes & contristes. Sic & ipse sibi David: *Quare tristis es anima mea, & quare conturbas me? Spera in Deo, quoniam adhuc confitebor illi, salutare vultus mei, & Deus meus*. Id est, nisi me tristem ipse magis contristarem, adhuc possem gaudere, quia possem de Deo cogitare, possem illi confiteri meam in illo vno repositam esse salutem: atque hæc cogitatio me totum exhilararet. Numquid tu idem posses cum Gratia?

EX TERTIA EVANGELII PARTE.

Et vos igitur, nunc quidem tristitiam trabetis. Iterum autem videbo vos, & gaudebit cor vestrum: & gaudium vestrum nemo tollet à vobis.

I. VERITAS PRACTICA.

Quæ à Christo est tristitia, magis iucunda est, quam quæ à mundo iucunditas.

Ps. 118. RATIO est facilis, nec longiori declaranda discursu: Quia quidquid Christo volente fit, iucundius est quàm quod ipso nolente. Quis Christianus dubitet? *Narrauerunt mihi iniqui fabulationes, sed non ut lex tua. Quam dulcia faucibus meis eloquia tua: super mel ori meo!*

Sed quæ à Christo est tristitia, ipso volente fit: & quæ à mundo est iucunditas, ipso nolente est.

Prima pars ex ipsis patet terminis, nam si à Christo est tristitia, certe non aliter quàm ab ipso volente est; Sicut enim de sua dicebat anima. seu vita: *Nemo tollit eam à me, sed ego pono eam à me ipso*: sic de quauis eius operatione nemo ambigat dici posse, quòd nisi quam vult, operatur. Quænam sit autem ab illo tristitia, perinde est ac quærere quænam sit bona & probata; nempe quæ ex peccatis propriis vel alienis concipitur: quæ ex desiderio ipsius videndi in gloria, concitatur: quæ ex interiori lucta quam patimur contra rebellantem appetitum, perferuntur: quæ ab externis aduersariis, pietatem nostram insectantibus, commouetur.

1. Pet. 2. *Hæc est, inquit sanctus Petrus, Hæc est enim Gratia, si propter Dei conscientiam, sustinet quis tristitias, patiens iniussè.* Sicut autem nulla est Gratia nisi à Christo, siue per Christum; sic illarum nulla est tristitia nisi ab illo qui mortificat & viuificat, deducit ad inferos, & reducit.

Ioan. 16. Altera vero pars propositionis, quòd *qua à mundo est iucunditas, Christo nolente fiat*, tam certa est & aperta, quàm facile patet mundanam iucunditatem ipsum esse mundum, de quo tamquam de sibi suisque opposito, Dominus dicit; *Mundus gaudebit, vos autem contristabimini.* Hoc enim ipso vel maxime mundum sibi odiosum & infensum demonstrat Christus, quòd his mundus lætetur & gaudeat quæ Christus nolle; vnde si propter quod vnumquodque tale est, & illud maius, certe ipsa mundi iucunditas magis est inuisa Christo quàm mundus qui propter talem iucunditatem infensus est & graui maledicto feriat: *Va vobis qui ridetis nunc, quia lugebitis, & flebitis.*

Luc. 9. Quantum igitur homini Christiano longe est illud iucundius quod Christo volente & probante fit, quàm quod ipso nolente & reprobante procuratur: tantò certe tristitia quæ ab illo est magis iucunda est, quàm quæ à mundo iucunditas; vnde hoc

Dauidicum meritò possit vnusquisque Deo profiteri: *Quia melior est dies vna in atrijs tuis super millia: Elegi abiectus esse in domo Dei* Ps. 83. *mei, magis quàm habitare in tabernaculis peccatorum.* BONA vox, inquit sanctus Augustinus, gaudenda vox, eligenda vox: ipse elegit abjici in domo Domini, sed ille qui inuitauit ad conuiuium, eligentem inferiorem locum, vocat ad superiorem, & dicit illi, *Ascende.* Vide suprà in hac parte, Dominicam 1. post Pascha, vbi de fontibus Saluatoris, & aquis inde hauriendis in gaudio. Nec non infrà, de pijs lachrymis, Feria 4. quæ est vigilia Ascensionis Domini. Feria item 4. hebdomadæ tertiæ, partis 3. de Beatitudinibus Euangelicis quarum illa est iucundissima: *Beati qui lugent, quoniam ipsi consolabuntur.*

2. VERITAS PRACTICA.

De Christo nos vidente plus esse debet gaudij, quàm de nobis Christum videntibus.

Sic ipse Dominus: Iterum videbo vos, & gaudebit cor vestrum.

SENSVS autem & Ratio propositæ Veritatis est, quod circa Christum Dominum plus esse debet, quàm circa nos, sacrae illius dilectionis & Obseruantia quæ toti acquiescamus in eius Ordinationibus acceptandis, colendis, exequendis. Hoc iam est enim Christum nos videre, cum nobis prouideret, cum de nobis ordinat & statuit, prout ipse velit. Hanc autem eius voluntatem verus Amator & Cultor Christi, longe magis amat quàm seipsum seu quàm quid seipsum spectare videat: dicitque illi corde magno & animo volenti quod Ethai suo Regi Dauidi: *Viuit Dominus,* 2. Reg. 15. *& viuit Dominus meus Rex, quoniam in quocumque loco fueris Domine mi Rex, siue in morte, siue in vita, ibi erit seruus tuus.*

Sed vbicumque est plus dilectionis, plus inde est etiam gaudij; cum, vt supra dictum est, Gaudium sit Amoris proprietas quæ talis tantaque est, qualis est ipse amor vnde profluit. Quapropter Sapiens: *Gaudium,* inquit, *iustus est, facere iudicium:* quali diceret, *Prou. 21.* cum iustus in quantum iustus iudicium præcipue diligit, sic gaudium illi est, facere iudicium. Vnde ipse Dominus: *si diligeretis* Ioan. 14. *me, gauderetis vtique, quia vado ad patrem.* Sic indicaretis me diligere, quia de me gauderetis.

Pater igitur euidenter quod de Christo plusquam de nobis gaudendum est; Aut negandus illi Amor qui amorem nostri superet; Nam quanto superior fuerit horum alteruter amor, tantò & gaudium ceterique affectus præualebunt. *Ponderibus suis aguntur omnia. Pondus meum, amor meus, eò feror, quocumque feror.* Sic de se quisque, quod sanctus Augustinus.

Iam verò vellesne Christum minùs quam te diligere? vellesne Christo te præferre? Quid putas porrò vellet Christus, cum in *Matth. 10.* Euangelio toties odium nostri, ferendamque crucem ita præciperet, vt nullum alioquin se dignum esse, neque suum fore discipulum, affirmaret? Potesne pro Christo te odisse, nec amare Christum plus quàm te ipsum? Certe non potes, cum odium illud nihil sit aliud quam ordinatus tui amor, non sit autem ordinatus, nisi plus Deum siue Christum ames quàm te ipsum, vt expressè docet D. Thomas, cum nec te ipsum nec alium possis diligere nisi propter ipsum Deum, tamquam finem vltimum nostræ dilectionis & totius nostri, vnde ex toto est diligendus corde, tota mente, totaque vi, neque de illo toto quidquam demendum, quàm prout ille permiserit; vt fusè in 4. parte, Dominica 17. demonstratur.

Itane verò sic illum diligis? itane de illius voluntate gaudes, quando repugnat tuæ, sicut de tua, quando completur? hinc expauesce, hinc formida quod aiebat Dominus; *Cognoui vos quia dilectionem Dei non habetis in vobis.* Cognoui vos, & vos vobis cognoscendos statuo ex vestris gaudiis, quæ sunt amoris vestri certa signa. Rursumque hæc tremens expende; *Nemo mittens manum suam ad aratrum, & aspiciens retro, aptus est regno Dei.* Nemo addictus colendo Christo, quidquam aliud respicit quo magis afficiatur, siue gaudio siue tristitia; vel si quid aliud aspicit non est aptus Christo hic colendo, & Christo in cælis fruendo. Nam quod est valde notandum, amor cælestis siue amor Beatorum in cælo, talis est vt ipsi Deum plusquam se diligant, nec se omnino nisi propter ipsum ament, vnde fit vt de Deo magis quàm de se gaudeant. Audi sanctum Bernardum: *Quoniam Scriptura loquitur Deum omnia fecisse propter semetipsum, erit profecto vt factura sese quandoque conformet & concordet Auctori. Oportet proinde in eundem nos affectum quandocumque transire, vt quomodo Deus omnia esse voluit propter semetipsum, sic nos quoque nec nos ipsos*

ipſos nec aliud aliquid fuiſſe vel eſſe velimus niſi aequè propter ipſum,
 OB SOLAM VIDELICET ILLIVS VOLVNTATEM,
 NON NOSTRAM VOLVPTATEM. Delectabit ſane non tam
 noſtra vel ſopita neceſſitas, vel ſortita felicitas, quàm quod eius in
 nobis & de nobis voluntas adimpleta videbitur: quod & quotidie po-
 ſtulamur in oratione cum dicimus: fiat voluntas tua ſicut in cælo & in
 terra. O amor ſanctus & caſtus; ô dulcis & ſuavis affectio. O pura
 & defacata intentio voluntatis, cò certè defacatior & purior, quò in
 ea de proprio nil iam admixtum relinquitur; cò ſuanior & dulcior, quo
 totum diuinum eſt quod ſentitur. Sic affici, deificari eſt. Quomodo ſtilla
 aqua modica multo infuſa vino deficere à ſe tota videtur, dum & ſa-
 porem vini induit & colorem; Et quomodo ferrum ignitum & can-
 dens, igni ſimillimum fit, priſtina propriaque forma exutum; & quo-
 modo ſolis luce perſuſus aër in eandem transformatur luminis clari-
 tatem, adeo ut non tam illuminatus quam ipſum lumen eſſe videatur;
 ſic omnem tunc in ſanctis humanam affectionem quodam ineffabili modo
 neceſſe erit à ſemetipſa liqueſcere, atque in Dei penitus transfundi
 voluntatem. Alioquin quomodo omnia in omnibus erit Deus, ſi in ho-
 mine de homine quicquam ſupererit? manebit quidem ſubſtantia, ſed
 in alia forma, alia gloria, aliaque potentia. Quando hoc erit? quis
 hoc videbit? quis poſſidebit? quando veniam & apparebo ante faciem
 Dei? Domine Deus meus, tibi dixit cor meum, exquiſiuit te facies mea,
 faciem tuam Domine requiram. Putas videbo templum ſanctum tuum?

Certè non deſperandum, ſed tamen qui non conetur hic,
 quantum quidem cum gratia poterit, ſuam illi cæleſti tamquam
 ſuæ regulæ conformare amorem, tantum ſibi timere debet,
 quantum hæc portendunt Chriſti verba! non eſt aptus regno Dei,
 non eſt aptus diligendo Deo, non ſe propterea ſatis aptat cum
 Gratia, quæ idcirco illi offertur, dum ad proprium ſui contem-
 ptum excitatur.

TERTIA VERITAS.

Quantò foelicius eſt illud gaudium, quod nemo à te
 pòteſt tollere, tantò tu infelicior qui hoc à te tollis.

RATIO eſt quia tanto es infelicior, quanto magis poteras eſſe ſælix
 ſi voluiſſes.

578 Dominica 3. post Pascha. Et gaudium vestrum nemo, &c.

Sed quanto felicius est illud gaudium quod nemo à te potest tollere, & quod tamen à te tollis, tanto magis poteras esse felix si voluisses. Ergo & tanto es infelicior qui hoc à te tollis.

T O T A ratiocinatio satis per se perspicua, sic potest illustrari clarius.

Primò quidem ad primam propositionem, tua culpa est quòd id volueris unde infelix es: deinde culpa est grauior ob ingratitudinem maximi beneficii quod erat datum, *ut nemo posset à te tollere tuum gaudium.* Tertio pœna priuationis illius gaudij, & sensus oppositæ illi tristitiæ longe est acerbior, in recordatione boni quo te vltro priuasti, & quo si voluisses, iam fruereris. Denique nulla es commiseratione dignus, qui cum posses esse felix, si voluisses, maluisti esse infelix. *Quis miserebitur incantatori à serpente percusso? & omnibus qui appropiani bestiis? H O C est indicium tuum quod ipse decreuisti.*

*Ecc. 12.
3. Reg. 29.*

Quæ certe omnia cuius infoelici declarant manifestè, Quòd tanto est infoelicior, quanto magis poterat esse felix si voluisset. *In quantam tribulationem deueni & in quos fluctus tristitia in qua nunc sum, qui iucundus eram & dilectus in potestate mea. Nunc verò reminiscor malorum quæ feci. Cognoui ergo quia propterea inuenerunt me mala ista; & ecce pereō tristitia magna in terra aliena. Sic infoelix Antiochus, infoelicitatis voluntariæ propositum nobis exemplar.*

1. Mach. 6.

Q V Æ verò est altera propositio vix potest manifestius quàm suis ipsa terminis declarari: quid enim ad felicitàtem gaudij iam satis per se magni desiderari potest vterius, quàm illius certa perennitas? unde interrogatus quidam qui ad florentem fortunam ex abiecta fuerat gratosè promotus, quid sibi vltra vellet? *Clauum,* inquit, *quo mea sistat fortuna fixa.* Tibi autem o infoelix, tibi erat fixum firmumque gaudium, cum tale hoc esset ut à te nemo posset tollere, si voluisses. Erat enim solidum verumque de Deo gaudium, in quod nulla præter te, cuiquam magis facta potestas, quàm in ipsius Dei lucem quam vocat Apollolus, *inaccessibilem.*

1. Tim. 6.

Nonne ergo quanto felicius est illud gaudium, quod nemo à te potest tollere, tanto tu infoelicior qui hoc à te tollis? *Quid perdis animam tuam in furore tuo? NON contristabit iustum quic-*

Iob. 18.

Quanto facilius est illud gaudium, quod nemo potest, &c. 579

quid ei acciderit. Nam, ut ait S. Ioannes Chrysostomus, Deum Hom. 18. sicut oportet timens & in ipso confidens, voluptatis radicem lucratus est, & omnem habet latitiae fontem. Et sicut in mare immensum decedens exigua scintilla facile deletur, sic quantacunque Deum timenti illidantur, velut in vastum latitiae pelagus incidentia, extinguuntur atque perduntur. Vnde tu qui te ipsum misere crucias, timere profecto debes ne non satis Deum timeas, cum te illo praesertim magis excrucies tempore, quo magis gaudendum erat, nempe cum innocenter pateris, cum in Dei cultu graue aliquid quod auerti non potest, occurrit. Tunc erat indicanda fidelitas, quae Ecclesi. 35. Deo gratis seruit, & quae in omni dato, hilarem facit vultum. Quamobrem Deus inter causas seruitij à se despecti, hanc praesertim recenset & vrget acrius, Eò quod, inquit, non seruieris Do. Deut. 18. mino Deo tuo in gaudio cordisque latitia. Nam dolenter seruire Deo, non est ei seruire: sed tantum de diuina seruitute detrahare, quantum dolenter seruīs.

Hinc apertè Psalter Regius, exultabit lingua mea iustitiam tuam. Ps. 50. Id est, etiam si puniar, quia tamen iustè puniar; ego in illa tua gaudebo iustitia & exultanter eam laudabo. Et rursus, latati sumus pro diebus quibus nos humiliasti, annis quibus vidimus mala. Respice in seruos tuos, quasi diceret, hac praecipuè nota designantur fideles Dei serui; & hoc praesertim nomine singulariter ab illo proteguntur, quod tum praesertim latentur, cum humiliantur. Vide verbo tristitia, gaudium. Et nominatim in 1. p. die 10. Ian. In 4. parte, Feria 4. & 6. hebdomada 17.



FERIA SECVNDA

CHRISTO DOMINO APPARENTE

DISCIPVLIS SIMVL CONGREGATIS,

APPARET CHARITAS quae non
quærit quae sua sunt.

Stetit Iesus in medio Eorum, & dixit, pax vo-

D d d d ij.

580 FERIA 2. Hebd. 3. post Oct. Pasc. Stetit Iesus in medio, &c.
bis, Ego sum, nolite timere. Luc. 24.

VERITAS PRACTICA.

Charitas non quærendo sua, melius inuenit quàm si
quæreret: tantò ditior, quantò pauperior.

*RATIO EST, Quia Charitas non quærendo sua, fit paupe-
rior, & facta pauperior est purior.*

Sed Charitas purior melius inuenit quæ sua sunt, & fit ditior.

*Ergo Charitas non quærendo sua, melius inuenit quàm si quæreret:
& tanto est ditior quanto est pauperior.*

I. PUNCTVM.

DVO illi Discipuli quibuscum in itinere congressus erat
Dominus, & vsque in ipsum Castellum Emaüs introgres-
sus, surgentes eadem hora qua Christus euauit ex oculis
eorum, *regressi sunt in Ierusalem*, inquit sanctus Lucas, *& inue-
nerunt congregatos, undecim & eos qui cum illis erant dicentes, quod
surrexit Dominus verè & apparuit Simoni. Et ipsi narrabant quæ
gesta erant in via, & quomodo cognouerunt cum in fractione panis.
Dum autem hac loquuntur, stetit Iesus in medio eorum, & dixit, pax
vobis, ego sum, nolite timere; Conturbati vero & conterriti existi-
mabant se spiritum videre. Et dixit eis; quid turbati estis, & cogi-
tationes ascendunt in corda vestra? Videte manus meas & pedes, quia
ego ipse sum; palpate & videte, quia spiritus carnem & ossa non ha-
bet, sicut me videtis habere. Et cum hoc dixisset, ostendit eis manus
& pedes.*

Vide, admirare, ac velut si præsens adesses, afficere quantum
cum gratia potes, iisdem affectibus in Christum Dominum, eius-
que gloriolissimas plagas quibus illi Discipuli permoti sunt.

Tum vero expende quam manifeste hic appareat in Christo
Domino septima veræ Charitatis Proprietas *quæ non quærit quæ
sua sunt*; Quanta enim Christus poterat à Discipulis & à Iudæis
repetere, cum tamen nihil horum quærat? Certe quidquid damni
quidquid iniuriæ & infamiæ acceperat in passione & morte sua,

Charitas non quærendo sua, melius inuenit quam, &c. 381

tam iuste posset reposcere quàm quicquid offensus ab alio, siue in bonis siue in fama, vt licitè fieri solet, & sæpe ita expedit ad innocentia patrociniū, & veritatis ac iustitiæ munimentum.

At nihil plane horum, ne vnum quidem Iudæum adit, resposcendæ causæ iniuriæ, neque Discipulis exprobrat quod turpiter fugerint, quod se negauerint, quod se prodiderint & fidem in se perdididerint, ne verbum vllum. Et quod magis mirare, ne quidem de se aliter loquitur quàm vt eos de sua Resurrectione certos faciat, moerentes erigat, & turbatos consoletur! O verè Charitas quæ non quærit quæ sua sunt: Imo & impertitur quæ restant sua! *Accipite, inquit. spiritum sanctum, quorum remisistis peccata, Ioan. 20. remittuntur eis: & quorum retinueritis, retenta sunt.*

Denique vt nihil desit ad amplissimam sui communicationem, præbet se palandum omnibus, manducat cum illis, interpretatur scripturas, aperit sensum vt eas intelligant & alios doceant.

Sic ergo colenda est ex animo talis Charitas, quando etiam nobis præter illam deperirent cætera omnia: nam sola Charitas præualet omnibus, nec in eius comparisonem venire aliquid potest. Verum vt sæpe alias, nihil tibi deperibit, *fidelis Deus, negare seipsum non potest*; Nemo propter illum aliquid de suo *2. Tim. 2.* donet, quin centuplum recipiat. Sicque vere dici debeat, *Quod Charitas non quærendo sua, melius inuenit quàm si quæreret; & tanto fit diuor quàm pauperior.*

Quæ propolita Veritas vt melius expendatur, intelligenda est de omni bonorum genere, seu temporali seu spiritali; seu humano seu diuino: seu terreno seu coelesti: quidquid denique tamquam proprium possideri & quæri potest, hoc etiam dici potest Charitas non quærendo, atque hoc non quærendo, non quæret quod suum est, & tamen melius inueniet quàm si quæreret.

Ratio est expedita, quoad illam præcipuè partem quæ dicitur Charitas non quærendo sua, esse pauperior & purior Charitas. Quid est enim sua non quærendo nisi se bonis suis vltro spoliare, vel non resistere se spoliantibus, non pro iure suo reposcere, non sublatam repetere pecuniam, non illatum vindicare probum, non queri de iniuriis, non de iniquitate temporum vel hominum: non ipsam etiam bonorum mercedem ita in operando respicere, vt si Deus operantem, omni mercede priuare vellet,

Rom. 9.

Tract. de
dilig. Deo.

Apo. 3.

non desineret operans operari, diceretque cum sancto Thoma, nullam Domine aliam, præter te, mercedem posco: Imo & ipso Domino paratus esset priuari, optaretque cum Apostolo, *Anathema esse à Christo pro salute animarum*. Nonne hæc esset Charitas quæ sua non quæreret? Nonne hæc esset tanto pauperior seu affectu seu effectu, quanto minus sua quæreret? ac deniq; nonne hæc esset eo purior Charitas quo esset pauperior, cum puritas Charitatis in eo sit vt nihil eorum quæ non sunt purè Deus, admixtum habeat; ac proinde tanto magis aut minus pura sit, quanto minus aut magis cæteris omnibus expurgata, & vt ait S. Bernardus defecata fuerit; *Eo certe, inquit, defecatio & purior quo in ea de proprio nihil iam admixtum relinquitur*. Hoc est aurum ignitum probatum, quod Christus suadet à se emi. Vide quo pretio id ematur, Vide quibus modis id emi suadeat.

II. P V N C T V M.

Matth. 13.

Iob. 3.

SED Charitas purior melius inuenit quæ sua sunt, sicque fit ditior. Duo sunt modi quibus id expressit Dominus, duabus illis parabolis quas proposuit de thesauro abscondito in agro, & de pretiosa margarita: Vbi antè illud est obseruandum, quod vterque illorum qui inuenit thesaurum vel margaritam, vniuersa sua dedit vt emeret quod inuenit, sic enim apertius intelligitur adumbrari seu figurari Charitatem, suis se omnibus denudantem bonis. Primò itaque cum thesaurus sit aggregatio quædam summæ pecuniariæ ex multis partibus seu speciebus conflata, satis aptè significat innumera bona spiritualia, coelestia, diuina & æterna quibus tanto magis compensat Deus Charitatem quanto est purior. Cum enim Deus numquam patiatur se à quouam liberalitate vinci, licet iam pridem nos suis præuenerit donis, tamen ita etiam sibi data remunerat, & sua coronat dona, vt quò quis in eum est liberalior & effusior, ipse vicissim suas in eum profundat copiosius & abundantius gratias: nullus autem sit liberalior quam qui puriorem habet Charitatem: hinc certò fit, vt is tam multis & variis abundet bonis, vt non possint melius exprimi quam thesauro abscondito.

Quasi effodientes thesaurum, inquit Iob, gaudentque vehementer cum inuerint sepulchrum: Quia in sepulchris olim recondebantur

thesauri; sed mystice ad rem nostram, thesauri gratiarum effodiuntur & reperiuntur in illo spiritali sepulchro, cui pura Charitas comparatur cum dicitur, *fortis esse ut mors, & dura sicut infernus*, Id est, tam potens ad separanda terrena omnia ex anima diligente, quam mors & infernus qui pro sepulchro hic ponitur, potentes sunt ad separationem naturalem animæ & corporis, seu etiam ad ipsius sepulti corporis partium dissolutionem faciendam.

Hic est thesaurus infinitus & thesaurus sine defectione sanctitatis, de quo passim scripturæ. Imo supra thesaurum est aliquid nō modo quia plures memorantur thesauri, sed quod in dies singuli magis ac magis repleantur; *Vt ditem, inquit, diligentes me, & thesauros eorum repleam*. Ponens denique *in thesauris abyssos*, id est, inuestigabiles quasdam diuitias quæ recenseri non possunt. Atque hinc fit quod licet bona terrena & humana deficerent, licet bona sublata non redderentur, licet nulla illatis probris fieret reparatio: qui tamen his abundat donis spiritalibus & diuinis, ita sibi satisfactum & se contentum profitetur, nihil ut eorum cogitet & reposcat. Centuplum illud est Euangelicum quod authore sancto Hieronymo spiritalia dona significat, quæ comparatione facta cum terrenis bonis, & merito sui collato cum aliis, *Ita sunt, inquit, quasi si paruo numero centenarius com-
paretur*.

Can. 8.

Ecclesi. 30.

Pr. 8.

Pf. 32.

L. 3. in

Matth.

c. 19.

Pf. 44.

At verò, ut secundus explicetur modus, si Deus etiam pura Charitate dotatam animam, suis illis spiritalibus & diuinis priuaret bonis, ut certe aliquando sensibili priuat consolatione, atque in eum redigit statum ut se anima nudam & vacuam bonis omnibus sentiat, quid tūc meriti est ab illo puriori Charitate? quomodo Charitas tunc dicitur sua inuenire! *Audi filia, & vide, de, & inclina aurem tuam: & obliuiscere populum tuum, & domum patris tui. Et concupiscet rex decorem tuum: quoniam ipse est Dominus Deus tuus*. Hoc vnum quod Domino placeat anima; hoc vnum quod Dominus placeat animæ; hoc vnum quod Dominus Deus eius sit, hoc vnum inquam ita sufficit puriori Charitati, ut sicut pretiosa margarita vnum est aliquid quod multa in se bona continet, vnde & dicitur vnio; sic Deus vnus & solus in anima diligente Deum, instar est omnium. *Deus meus & omnia: si quis amat, nouit quid hac vox clamet. Magnus clamor in auribus Dei*

L. 3. de

Imit. Chr.

c. 52.

§ 84 FERIA 2. Hebd. 3. post Oct. Pascha. Stetit Iesus in, &c.

est ipse ardens affectus anima qua dicit, *Deus meus amor meus, tu totus meus, & ego tuus*, Expende hæc diuini Authoris verba, magnus clamor in auribus Dei, qualidiceret, verba sunt quæ maxime Deus audit, & quibus auditis maxime permouetur ad reciprocam dilectionem; quâ diuina dilectione quid diutius quid diuinius? Maior est Deus corde nostro, & nouit omnia, inquit dilectus discipulus: Id est, vt explanat Cornelius, liberalior, ditior, plenior, perfectior est Deus corde nostro, qui solus ipse cordis nostri desideria satiat & explet: imo exuberat in immensum, nec iis capi potest, sicut mare capi nequit cochleari.

III. PUNCTVM.

CHARITAS igitur non querendo sua, melius inuenit quàm si sua quæreretur: & tanto est ditior, quânto pauperior; Quia sic purior redditur, sic gratior & acceptior Deo, qui idcirco, bonus cum bonis & sanctus, cum sanctis dicitur, quia se tanto illis meliorem & liberaliorem ostendit, quânto se in ipsum impendunt liberaliùs, & de suo magis effundunt. Quoniam Dominus retribuens est, ait Sapiens, non dicit retribuit sed retribuens, quasi fons perpetuo manans, & quasi sol indefinenter lucens & ardens: *Angebir incrementa frugum iustitie vestrae, vt in omnibus locupletati, abundetis in omnem simplicitatem*, inquit Apostolus: quasi diceret, non propterea Deo seruiendum vt sic abundetis, sic enim Charitas sua quæreretur, sed retinenda semper simplicitas puri seruitij & amoris Dei, vt siue abundetis siue non, vos semper Deum pure colatis & ametis. Tantum hoc caute ne amore vestri, vestra queratis, & vestra querendo minus purè queratis Deum, quia sic duplici errore deciperemini; primo quidem quod putaretis aliquid perdi, dum seruitur Deo; deinde vero quod tametsi hoc esset, prospiciendum vobis esse crederetis cum præiudicio diuini cultus. Quod vtrumque falsum est, nam & Deus propter se est amandus & colendus; & amanti Deum nihil peribit.

Quo de argumento sæpe & fusè, Apostolo differendum fuit, quia ex vna quidem parte voluisset omnes sicut se seruire Christo, in simplicitate cordis, & sinceritate Dei, id est, pure propter ipsum Deum: ex alia vero videbat omnes quæ sua sunt querere, non quæ sunt Iesu Christi; Quid hic ageret, nisi vtrumque sic temperando.

ando doceret Charitatem sua non querere, & non querendo tamen sua melius inuenire, quam si audius quæreretur. Sic ipse Dominus; *Qui perdiderit animam suam propter me, id est vitam* *Math. 10.* *temporalem, inueniet eam, id est, inueniet aliam vitam longe meliorem, sicque sua non querendo, melius inueniet. In paucis* *Sap. 3.* *vexati, in multis bene disponentur, quoniam Deus tentauit eos, & inuenit illos dignos se. Qui confidunt in illo, intelligent veritatem, & fideles in dilectione acquiescent illi, quoniam donum & pax est electis eius.*

Vide in 4. parte, tota quidem hebdomada 17. sed præcipue Sabbato.



FERIA TERTIA.

APPARET ITERVM CHRISTVS

DISCIPVLIS SIMVL CONGREGATIS,

PRAESENTE THOMA.

SIMVL APPARET CHARITAS quæ non irritatur.

Et post dies octo, iterum erant Discipuli eius intus, & Thomas cum eis. Venit Iesus, ianuis clausis, & stetit in medio, & dixit eis, pax vobis; deinde dicit Thoma, infer digitum tuum huc, & vide manus meas; & affer manum tuam, & mitte in latus meum; & noli esse incredulus; sed fidelis. Ioan. 20.

VERITAS PRACTICA.

Esto appareant aliquæ irascendi causæ; multo tamen plures sunt & validiores ne irascaris.

586 FERIA Hebd. 3. post Oct. Pasche. Infer digitum, &c.

RATIO EST, Quia rationes aeternae, quæ petuntur à superiori parte animi, longe sunt plures & validiores iis quæ ab inferiori tantum proueniunt.

Sed tales sunt illæ rationes quæ vetant iram.

Ergo sunt plures & validiores, quibus propterea credendum est, nec irascendum.

I. PUNCTVM.

THOMAS autem, unus ex duodecim qui dicitur Didymus, non erat cum eis quando venit Iesus. Dixerunt ergo ei alij Discipuli: vidimus Dominum. Ille autem dixit eis, nisi videro in in manibus eius fixuram clauorum, & mittam digitum meum in locum clauorum, & mittam manum meam in latus eius, non credam. Et post dies octo, iterum erant discipuli eius intus, & Thomas cum eis. Vide textum: & ex multis quæ inde fructuosè possunt colligi, tum illa præcipue Charitas Christi quæ non irritatur, expendi debet. Offenderat Dominum Discipulus incredulus, ex his tribus præcipue capitibus. Primò, quod aliis omnibus referentibus se vidisse Dominum, minime acquieuerit; Secundò, quod nec vmquam crediturum se affirmarit nisi ipse videret in manibus eius fixuram clauorum, quasi ad id vellet astringere Dominum; Tertiò denique quod tamdiu obfirmatus permanserit, vt non nisi octauo die quo Christus illi apparuit, à sua peruicacitate resipuerit. Nonne ista poterant irritare Dominum qui duobus etiam peregrinis dubitantibus de iis quæ iam audierant, succensere visus est, cum eis dixit, *O stulti & tardi corde ad credendum?* At eius Charitas non irritatur. En vt apparet iterum omnibus, in vnus Discipuli gratiam! vt illum benignè aduocat! vt ostendit plagas, manus, pedes, ipsum latus! ô singularem bonitatem! ô verè Dominus & Deus noster! Quid est in aliis offensis Viris potentius ad iracundiam excitandam, quàm aspectus plagæ acceptæ? At non ita in Christo qui per plagas omnia placat, & pacificat, siue quæ in terris, siue quæ in cælis sunt.

Luc. 24.

Coloss. 1.

Sic discite nunquam irritari; Et quia interdum apparent aliquæ irascendi causæ, discite ex Veritate proposita, multo plures & validiores esse cur non irascaris; Sunt enim multo validiores illæ quæ

à supremis, ab æternis & semper permanentibus principiis petuntur, quàm quæ ab inferioribus; nam illa sunt principia quæ vocant vniuersalissima, principia fidei, principia in ipso Deo qui semper vnus & idem est, fixa & rata; Alia vero sunt potiùs rationum quadam apparentiæ siue species & simulachra vacua, quàm veræ rationes; Nihil quippe est aliud quam ipse appetitus naturalis corruptus & deprauatus qui non quidem praua & aperte mala concupiscit; sed qui non aliter mouetur & afficitur ad bonum suum quàm considerationibus terrenis, mundanis, & fines humanos spectantibus. *Reuertimini ad Iudicium*, dicebat Dan. 13. puer Daniel: & Christus Dominus, *Nolite iudicare secundum faciem, sed iustum iudicium iudicate.* 1. Cor. 7. Itemque Apostolus, *arma militiæ nostræ non carnalia sunt, sed potentiâ Deo, ad destructionem munitionum, consilia destruentes, & omnem altitudinem extollientem se aduersus scientiam Dei, & in captiuitatem redigentes omnem intellectum in obsequium Christi: & in promptu habentes vlcisci omnem inobedientiam.* 2. Cor. 10.

Distinctius verò & expressius de hac superiori Ratione sanctus 11. de Trin. Augustinus, à quo alij acceperunt. *Sublimioris, inquit, rationis* c. 2. *est iudicare de ipsis corporalibus secundum rationes incorporeales & sempiternas, quæ nisi supra mentem hominum essent, incommutabiles non essent.* Et paulò post explicans quænam sit illa Ratio superior; *Quæ scilicet intendit æternis conspiciendis, aut consulendis, & ex his accipit regulas agendorum.* Itemque alibi: *humana anima naturaliter Diuinis ex quibus pendet connexa rationibus, dum dicit,* L. 3. de Lib. arb. c. 3. *melius fieret hoc quàm illud, si verum dicit, & videt quod dicit, in illis supernis rationibus videt.*

Ex quibus satis euidentis est, quàm sint hæ Rationes aliis inferioris ordinis validiores: Quàm sint inde verò multiplices, seu multo plures, patebit ex sequenti puncto in materia proposita. Tu vide paululum, antequam eò deuoluaris, ex quali Rationum genere frequentius de humanis rebus iudices, loquaris, & sentias. Neque tibi iam dicas, oportere te esse omnino spiritualem & perfectum, vt sic de rebus iudices, cum potius sic iudicando de rebus, homo fiat spiritualis; sicut carnalis dicitur qui secundum carnis sensus iudicat, vnde idem S. Augustinus; *In homine carnali tota regula intelligendi, est consuetudo cernendi.* Serm. 147. de Temp. Ps. 118. Iudica Domine iudicium meum, & redime me, cunctosque homines

588 FERIA 3. Hebd. 3. post Oct. Pasc. Infer digitum tuum, &c.
ab illa praua iudicandi regula.

II. PUNCTVM.

SED rationes quæ suadent non irascendum, ab illis supremis, æternis, & diuinis petuntur principiis.

Nempe à Deo, & ab æterna eius lege; à Christo Domino & Euangelicis Veritatibus; à Spiritu sancto & spirituali eius regimine; à salute animæ & mediis ad eam ordinatis; à cœlesti beatitudine, & aliis similibus motiuis & considerationibus quæ nituntur Fide diuina, & supra naturam humanam nos euehunt; ex quibus singillatim tam multæ rationes peti possent ad iram dissuadendam, vt longius esset eas referre, satisque prostant apud sanctos Patres. Quamobrem hîc modò sufficiat, in vno ex his capitibus & principiis inhærere, vnde cætera colligantur: Nempe in Christo Domino, cui per iracundiam inordinatam, decem inferuntur iniuriæ, quarum vel vna cùm sit validissima ratio ne irascamur, sic poterunt dici decem rationes quæ inter alias, dissuadent iram.

Prima petitur ab authoritate Christi Domini tam expressè vetantis iram, vt primum sit quod in declaratione nouæ legis supra veterem afferat. *Ego autem dico vobis, quia omnis qui irascitur fratri suo, reus erit iudicio.* Cui conformiter Apostolus: *Omnia amaritudo & ira & indignatio tollatur à vobis.* Quod si alibi videatur iram permittere, proponens illud Dauidicum, *Irascimini & nolite peccare*, sensus est, quod si contingat irasci, sicut sæpe accidit ex naturali motu, tum statim ira sic comprimatur ne vlllo modo peccetur; Neque aliter dicimus iram vetari quàm vt peccatum est, vnde primus motus qui est tantum passio, aut motus vltior qui rationi semper subest, non est malus nec veritus: sed quia rarum est hos motus vel tantum esse primo-primos quos vocant, vel secundos & rationi obsequentes, idcirco satius est non irasci, sicque propterea præcipit Dominus: & præcipienti repugnat atque iniuriam facit iracundus, quasi diceret vt Pharaon, *Quis est Dominus vt audiam vocem eius: nescio Dominum.*

Secunda ratio seu secunda iniuria est, quæ infertur æquitati & iustitiæ Christi Domini. Cùm enim vt optimè obseruauit S. Augustinus, *nulli irascenti ira sua videatur iniusta*, semperque

iratus prætendat aliquam iustam causam, quâ irasci debuerit: Quoties proponitur illi præceptum Domini, toties ille opponit suam causam, quæ si æqua & iusta est, certe iniquus Dominus qui vetat & condemnat quod est iustum. At nonne hoc iniuriosum & blasphemum Christo? *Numquid condemnabis me ut tu iustificeris?* Iob. 40.

Tertia est quâ læditur Christi potentia, siue diuinæ Virtus Gratiæ quæ ab Eo nobis conferatur ad temperandam iram; si enim delit causa irascendi, dicer iratus non posse se continere, se non posse non irasci, sibi non esse satis virium. Itane vero non sit satis Christo gratiæ, aut non sit satis potens gratia ad id omne nobiscum efficiendum quod iubemur? Certe hoc iniquum & iniuriosum est Christo, longeque ante præmonitum à Sapiente, ut caueres: *Si dixeris, vires non suppetunt; qui inspector est cordis, Ipse intelligit, & Seruatorem animæ tuæ nihil fallit, reddetque homini iuxta opera sua.* Prou. 14.

Atque hinc quarta ratio, siue iniuria est, quæ fit Euangelio seu doctrinæ Christi, nec non religioni Christianæ, quasi minùs possit & valeat quàm sectæ Philosophorum quæ omnes condemnant iram, & de ira reprimenda dant præcepta, & de ira repressa reliquerunt exempla. Tu Christi discipulis negabis te posse aut debere quod Ethnicus proficitur? *Inimici nostri sũt iudices.* Deut. 32.

Accedit quinta ex his Christi Domini verbis: *Discite à me quia mitis sum, & humilis corde:* quasi diceret, hoc vnum præcipue doceo non tantum verbis sed & factis, hoc vnum præcipue velim in me obsetueris, hoc me vno præsertim imitemini; hoc de me referatis exemplum & placitum cui vos conformetis. At verò nihil est magis oppositum quam ira quæ directe pugnat cum mansuetudine & humilitate Christi, *qui sicut ovis ad occisionem ductus est, & tamquam agnus coram tondente se obmutuit, & non aperuit os suum.* Manh. 11. 17. 53.

Quid quod in sanctissimo Sacramento se velut agnum nobis comedendum reliquit, ut hanc eius mansuetudinem indueremus? Certe hinc sexta noscitur ab ira esse iniuria, si sanctum Ioannem Chrysostomum audiamus: *Audiamus, inquit, & sacerdotes & subditi, quali esca facti sumus digni, audiamus & horrea: sanctis carnibus suis nos dedit impleri, semetipsum apposuit immolatum: quenam igitur erit nobis excusatio cum talibus pasti, ta-* Hom. 60. ad pop. Ant.

lia peccemus? Cum lupi simus, agnum comedentes, cum tamquam oves pasti, more leonum diripiamus?

Nec levis alia inde iniuria cognoscitur, quæ ordine septima dici posset, cum se Pastorem Christus simul atque agnum fecit ut nos velut agnos pasceret & regeret, quanta cura & solitudine pastor gregem suum pascit. An vero luporum est pastor, an ouium? quomodo iracundus se finit ab eo regi? quomodo vocem eius audit? quomodo sequitur præcedentem? Nihil æque pugnat cum hac pastoris solitudine quàm iracundia quæ animum ita occupat, ita turbat & commouet ut nec audire possit loquentem, nec sequi præcedentem, nec retinere secum habitantem Christum, cum *locus eius sit in pace*, nulla vero pax sit iracundo.

Ioan. 10.

Ps. 75.

Ephes. 4.

Quid tandem fiat si nihil agit Christus in irato & perturbato homine, quid fiat nisi discessio & separatio, atque in eius locum, quæ octaua est iniuria, succedat Dæmon cui recipiendo nulla est aptior via, quàm per iram, ut facile intelligitur ex Apostolo, qui cum dixisset, *Sol non occidat super iracundiam vestram*, statim addit, *nolite locum dare Diabolo*, qui, ut interpretatur sanctus Hieronymus, *tamquam leo rugiens querit aditum, per quem possit irrumpere*.

1. Cor. 8.

Atque octo istæ iniuriæ personam quodammodo Christi attingunt, nunc quæ surper sunt duæ, ipsum offendunt in proximo & in nobis. In proximo quidem, quatenus ira semper aut sæpius defæuit in aliquem minis, probris, pugnis, & omni modo lædit. *Sic autem peccantes in fratres, in Christum peccatis*, inquit Apostolus.

Cant. 4.

In nobis denique sic per iram offenditur, ut præterquam quod vitium est & offensa Dei, specialis tamen offensa est Christi, quatenus animam nostram tanti facit Christus ut pro ea suam dederit, tanti decorem & pulchritudinem eius quotidie æmulatur ut in ea colenda, paranda, & spectanda immoretur, atque in castis suis ponat deliciis posse dicere, *quàm pulchra es, amica mea: quàm pulchra es*. At vero tota per iram defœdatur ista pulchritudo, quando vel sola esset ira, tum deicitur de sua sede Ratio, tum naturalis ipse ordo confunditur; quanto magis ille supernaturalis qui in pace & tranquillitate consistit? sic denique anima de-

Ecclesi. 10. decoratur ut propterea Sapiens dixerit, fili in mansuetudine, serua

animam tuam, & da illi honorem secundum meritum suum: peccantem in animam suam quis iustificabit? & quis honorificabit exhonorantem animam suam? Iam vero si sola numquam sit ira, si verum est quod ait sanctus Hieronymus: Ianua vitiorum omnium est, quâ ^{In Prou. 1. 3.c. 29.} *clausâ, virtutibus intrinsecus dabitur quies; apertâ vero ad omne facinus armabitur animus: Quâ tandem foeditate tûm infuscarî animam necesse est, & quâ iniuria sponsum offendi Christum?*

III. P V N C T V M.

ESTO igitur appareant aliqua irascendi causæ; multò tamen plures sunt ac validiores non irascendi: Cùm sint æternæ & supremae, cùm sint in ipso Christo fundatæ, qui est fundamentum totius ædificij, qui est caput totius corporis, qui est Ratio superior totius hominis; Quid contra opponat iracundus nisi quid stultum, quid imprudens, & aliquid inconsultum ac temerarium, quandoquidem, ut ait Sapiens, *Non est sapientia, non est prudentia, non est consilium contra Dominum?* ^{Prou. 21.} Ac proinde prorsus irasci desinat, nec prætendat aliquas iræ suæ causas; nam vel omnino nullæ sunt, vel si putet se habere causam irascendi, certe cogitet se habere plures & validiores cur non irascatur. Expendat causam cum causis, rationem cum rationibus, personas cum personis, damna cum damnis, offensam cum offensis; & quanto magis volet ratione se in iracundia tueri sua: tanto se minùs tuebitur, quia ratione potentiori reuincetur; & satiùs illi esset fateri suum vitium & cum Diuina gratia prospicere, quam dum illi causam prætexit, non desinit esse vitium, & desinit agnosci & curari.

Hinc forte dicitur *quod ira in sinu stulti requiescit*; quasi dicetur, ^{Ecclo. 7.} nonnisi stultum oportet esse illum hominem qui causas iræ prætendit, ut quiescat in illis suis prætentis causis; nam cùm sint multo plures & validiores ut non irascatur, stultum est veris relictis, falsas & apparentes pretendere. Et quanto magis inclamat quod illatæ sibi iniuriæ remedium velit irascendo adhibere: tanto se magis stultum & deridendum exhibet, ut qui maiorem sibi afferat iniuriam irascendo, quàm patiendo. Non est adhibere malo remedium, quando malum augetur: nec nisi stulti est minus malum grauiori velle curare malo; Vnde apte Sapiens, ut

Prou. 14.

Ibid. 19.

Ecclesi. 1.

Ibid. 28.

iam supra monuimus, *Impatiens operabitur stultitiam*, Et paulo post, *qui patiens est multa gubernatur prudentia, qui autem impatiens est exaltat stultitiam suam*: Rursumque expressius ad rem nostram: *Qui impatiens est sustinebit damnum: & cum rapuerit, aliud apponet*. Quod sic declarat Ecclesiasticus: *Iracundia animositatis illius, subuersio illius est: usque in tempus sustinebit patiens, & postea redditio incunditatis*. Denique rem concludit quod idem ait, *Homo iracundus incendit litem: si sufflaueris in scintillam quasi ignis exardebit: & si expueris super illam, extinguetur*: Quali diceret, quid faceres si quis forte scintillam ignis in vestem tuam iniecisset? an velles illam insufflando magis inflammare? an potius supra expuendo extinguere? Hoc ipsum de ira seu de causa iræ cogita: si illatæ iniuriæ irasceris, in scintillam ignis insufflas: si vero iram comprimis, tu in scintillam expuis, & extinguis. Nonne hoc satius? nonne hoc censultius? Nonne hoc statues in Domino, atque aliis procurabis?

Vide passim vbi de ira vel de mansuetudine: præsertim in Quadragesima, cùm de Christo patiente ageretur.



FERIA QVARTA.

APPARET CHRISTVS SEPTEM

DISCIPVLIS DE NOCTE PISCANTIBVS:

VBI ET APPARET CHARITAS

quæ non cogitat malum.

Mane autem facto, stetit Iesus in littore. Ioan. 21.

VERITAS PRACTICA.

Si Charitas cogitaret malum: malum de Charitate cogitari posset.

RATIO EST, Quia malum de Charitate cogitari posset, si Charitas

Si Charitas cogitaret malum, malum de Charitate, &c. 593

ritas Charitati pugnancia faceret.

Sed si Charitas cogitaret malum, secum pugnaret seu pugnancia Charitati faceret.

Ergo si Charitas cogitaret malum: malum de Charitate cogitari posset. Quod cum omnino nefas sit, nefas est & cogitare malum de aliis.

I. P V N C T V M.

HISTORIA rei gestæ quæ fufius à sancto Ioanne refertur, videri potest. Summa hæc est: Septem Discipuli Petro duce cum de nocte piscando, nihil predidissent: stetit Iesus summo mane in littore, tum primum quidem illis incognitus, suavitque ad dexteram nauigij, mitti rete; quo facto cæperunt multitudinem piscium copiosam. Agnouit illic Ioannes Dominum, dixitque Petro, *Dominus est*; at Petrus statim cæteri que ad Eum conuenerunt.

Quæ & alia postquam menti subieceris & tantisper reuolueris; Aduerte quod licet in hac piscatione non peccarint Discipuli, cum, vt ait sanctus Gregorius, *negotium quod ante conuersionem sine peccato extitit, hoc etiam post conuersionem repetere culpa non fuit*; ac proinde Christus Dominus non potuerit cogitare malum de illis, cum reuera nullum esset: Iudæi tamen, aut alij si vidissent Apostolos sic vnà simul piscantes, forte suspicari potuissent illos repetiisse seculum aut sæcularia negotia quæ videbantur abieciisse. Nonne illi ipsi sunt qui relictis omnibus sequuti sunt Dominum? quid ergo resumunt quod reliquerunt? Quod eò vel maximè in deteriore partem sumi poterat, cum diu multumque laborantes nihil magis cæperint, quàm dum primo ante conuersionem dixerunt, *per totā noctē laborantes, nihil capimus*. Nam si bene agunt, cur non illis adest Christus? Aut si non adest, cur non liceat saltem cogitare & suspicari minus forte prudenter & consultò ab illis agi?

Has humanas cogitationes cum suscipere possent homines, hoc saltem videbat Christus sic posse ab hominibus de hac discipulorum piscatione male cogitari, sicque illis poterat quod alias dicere, *Non scandalizemus eos*. At vero Christi Charitas, *Math. 17.*

Charitas eſt quæ nec cogitat, nec cuiquam imputat malum: Non modo nec ipſe Chriſtus cogitat malum: ſed nec ab aliis vel tantillum cogitari ſignificat. Contemplare attentius hanc ſingularitatem eius Charitatem, perpenſis omnibus circumſtantiis: Vide vt amanter ſubuenit laborantibus; vt ſuauiſſe cum illis loquitur; vt amicè monet qua parte nauigij mittant rete, ſœlicius piſcaturi: vt prouidet prunas & panem; vt denique familiariter cum illis prandet & conuerſatur; *Afferte, inquit, de piſcibus quos prœdidisti nunc: venite, prandete.* O Charitatem longè remotam à cogitando malo!

Hanc vt imiteris diligentius, proponitur Veritas expendenda, quâ id ita Charitati neceſſarium eſſe aſſeritur vt Charitas deſineret eſſe Charitas ſi malum cogitaret. Nam quod dicitur ſi Charitas cogitaret malum: malum de Charitate cogitari poſſet, hoc ipſum eſt dicere, Charitas non eſſet Charitas: cum ſi malum de Charitate cogitari poſſet, iam mala eſſet Charitas, ac proinde nulla eſſet, cum malam eſſe Charitatem non minus repugnet, quam bonum eſſe malum. Quomodo vero de Charitate malum cogitari poſſet, ſi Charitas malum cogitaret, ex eo euidenter probatur, quòd tunc ſibi repugnantia faceret: Quis autem dubitet quod ſi quæ Charitati repugnant, Charitas faceret, ſi ſecũ ipſa pugnaret, ſi ſe deſtrueret aut læderet, quis nõ videt quod mala eſſet Charitas, & quod malum de ea cogitari poſſet? Cur enim inuidia, cur rixæ, diſſenſiones, ſectæ, ſcandala, odia, & ſimiles animi motus ſunt mali & vetiti, niſi quia Charitati repugnant, Charitatem deſtruunt & peſſundant? ſi propter cibum frater tuus contriſtatur, iam non ſecundum Charitatem ambulas, inquit Apoſtolus; quo vno dicto ſatis ſibi viſus eſt demonſtraſſe, quod malum eſſet ſic contriſtare fratrem. Nonne & tibi idem videtur? Nonne oppoſitum bono, malum eſt? & oppoſitum optimo, peſſimum? Nonne hoc iam à ſapiente audiuiſti, *contra malum bonum, contra mortem, vitam?* Et ſic reciproce contra bonum, malum: & contra vitam, mortem? quaſi diceretur, quod eſt contra malum, illud eſt bonum; & quod eſt contra bonum, illud eſt malum. Sic expreſſe Dominus contra eos qui Charitatem læſerant: *Aut facite arborem bonam, & fructum eius bonum: aut facite arborem malam, & fructum eius malum, ſi quidem ex fructu arbor cognoscitur.* Id eſt, aut Charitas bonum aget & erit vera Charitas: aut ſi bono pu-

Rem. 14.

Eccleſt. 33.

Matth. 12.

gnantia & opposita quædam agat, non erit bona, non erit vera Charitas; *Nec enim potest arbor bona malos fructus facere; neque arbor mala fructus bonos facere.* Ibid. 7.

II. P V N C T V M.

SED si Charitas cogitaret malum, secum pugnantia faceret & se quodammodo destrueret.

Quando scilicet cogitatio ita esset voluntaria & diuturna ut iudicium ferretur de malo alterius, nec aliter de persona nisi ut mala temere cogitaretur; tunc plane non minus id opponeretur Charitati, quam si proximum læderet, cum tale iudicium, talisue cogitatio non possit subsistere sine aliqua proximi læsione & offensa. Sicut enim fieri potest ut reuera malum de quo cogitatur, insit in proximo: sic etiam fieri potest ut non reuera sit; atque in illa incertitudine, non potest non ei fieri iniuria si in deteriore partem trahas quod posset accipi in meliorem & suaviorem. Nam si accadat ut sæpe fit, quod falsò iudices, nonne est iniuria manifesta? Et cum id sæpius accidere possit, ut falsò quam verè iudices; nonne vel quando etiam verum iudicares, non desineres tamen ab inferenda aliqua iniuria, quia cum possis falli & errare in iudicio ac cogitatione tua, tu teipsum tamen mauis in periculum illud iniicere, cum præiudicio veritatis & Charitatis, quam salua Charitate & iustitia, te continere?

Sic apte diuus Hieronymus: *In hoc errore iudicij qua potest esse certa sententia?* Quod & Cassianus fuse prosequitur in institutionibus monasticis. Quod etiam confirmatur ex naturali lege Charitatis qua quidquid volumus ab aliis nobis fieri, hoc illis præstemus; & quod nolumus fieri, neque hoc illis faciamus. At certum est quod nollemus sic iudicari, & vellemus nobiscum mitius agi; unde egregiè S. Augustinus: *Maxima pars generis humani, indiscreto iudicio ad reprehendendum prompta & parata esse probatur, cum tamen non ita velit ab aliis indicari, quomodo vult alios iudicare.* Contra Iulianum, ferianos, & Epist. 39. Cass. l. 5. c. 30.

Atque hinc toties & tam grauiter in Scripturis vetamur omnino iudicare de aliis: *Nolite iudicare ut non indicemini, in quo enim iudicio iudicaueritis, indicabimini.* PROPTER quod inexcusabilis es, o homo omnis qui iudicas. *TV quis es qui iudicas alienum seruum?* Serm. 202. de Temp. Et in Ps. 147. Matth. 7. Rom. 2. Ibid. 14.

Ibid.

2ac. 4.

Domino suo stat aut cadit. Tu, quid iudicas fratrem tuum aut quid spernis fratrem tuum? omnes stabimus ante tribunal Christi. Vnusquisque nostrum, rationem pro se reddet Deo: non ergo amplius inuicem indicemus. Qui iudicat fratrem suum detrahit legi & iudicat legem: si autem iudicas legem, non es factor legis sed iudex. Vnus est legislator & iudex qui potest perdere & liberare. Tu autem quis es qui iudicas proximum?

Quisquis es, quaeso te, cur Scriptura id tam vehementer caueat, nisi sit certum periculum in illis incertis ferendis iudiciis? Quodnam autem periculum nisi violandæ Charitatis? Vnde si Charitas cogitat malum, nonne in hoc se periculum injicit, nonne secum pugnantia facit, nonne se destruit?

Serm. 4. in
Cant.

Adde, cum Charitatis sit excusare delinquentem quibus modis excusari potest, multi sint autem modi, multæque viæ quibus qui iudicantur, excusentur: quomodo Charitas non secum pugnabit si iudicet potius quam excuset! Sic præclare sanctus Bernardus: *Etiam si perperam actum quid deprehendas, nec sic iudices proximum; magis autem excusa. Excusa intentionem si opus non potes; puta ignorantiam, puta subreptionem, puta casum. Quod si omnem omnino dissimulationem rei certitudo recusat, suade nihilominus ipse tibi & dicito apud te ipsum, vehemens fuit nimis tentatio: quid de me illa fecisset, si in me accepisset similiter potestatem?*

Serm. 12. in
Cant.

1. Pet. 4.

Denique cum sint liberæ hominum cogitationes, ac proinde cum Charitas in homine tam possit continere cogitationem mali de aliquo, quam mouere: quare non eam retineat, si sit vera Charitas? aut quomodo vera esse possit Charitas si non eam retineat? Nonne id magis proprium & connaturale est Charitati ut id omne quod proximum tantisper lædat, auerfetur & auertat, quantum quidem auerti potest? Sic rursus sanctus Bernardus, ubi post multa de cohibendis iudiciis & cogitationibus à manifestis etiam aliorum delictis, sic concludit; *Memento quia Charitas operit multitudinem peccatorum*, applicans illud sancti Petri in hunc sensum, ut operire multitudinem peccatorum sit quasi non videre, non cogitare; quantumcumque multa & manifesta sint, tamen ingeniosa Charitas ita scit illa operire, ut quasi non sint, quasi non videat, omnino non cogitet. Quod cum ita sit proprium Charitati ut nemo dubitet; quis dubitare possit si è contra Charitas intueatur peccatum & cogitet malum

Si Charitas cogitaret malum, malum de Charitate, &c. 597
proximi, quod secum ipsa pugnet, seseque destruat?

III. PUNCTVM.

Si ergo Charitas cogitaret malum : malum de Charitate cogitari posset : Cum cogitari posset aliquid contrarium ipsi Charitati, quod non est nisi malum. Quod cum omnino fieri non possit, duo hæc sequantur necesse est, aut quod vera Charitas non cogitet malum ; aut si quis cogitet malum non sit in vera Charitate, sed falsa & simulata, qualis est tua sæpius quæ sub pretextu curæ & sollicitudinis de aliorum salute & protectu, nimis te angis & torques, si quid videlicet quod non placet in proximo videas, tum statim offenditur animus, exacerbatur, commouetur, suspicatur plura quam videat, atque illud etiam quod videt exaggerat. Incertum pro certo habet & apparens pro vero credit ; dumque sic mente versas aliena facta, putabis esse Zelum, putabis esse Charitatem ! ô mendaces in stateris homines. *ps. 61.*
Non sic non sic Charitas cogitat malum, aut si sic cogitat malum : malum hoc de illa veriùs cogitari potest, quod non sit Charitas sed Zelus ille amarus & contentiosus qui à Scriptura repro-
batur, & qui tam alienus est à vera Charitate, quam vitium *Iac. 3:*
à virtute. Recte omnino Sapiens : *multos supplantauit suspicio il-* *Ecclesi. 3.*
lorum, & in vanitate detinuit sensus illorum. Vbi illud in *vanita-*
te, non tantum significat superbiam aut complacentiam sui, sed inanitatem & falsitatem rei, quasi diceret, frustra suspican-
tur & commouentur ; nihil eorum est quod cogitant, aut non tam graue est quàm putant : suo ipsi sensu detinentur in suspi-
cione & cogitatione mali, non certo & solido iudicio. Interim
vero patitur iustus quando sic male & falso iudicatur.

Caue hanc in cogitando de aliis vanitatem & iniustitiam. *L. 1. de*
Ad te ipsum oculos referte, inquit pius author, *& aliorum facta ca-* *Imit. 6b.*
ueas iudicare. In iudicando alios homo frustra laborat, sæpius errat *c. 14.*
& leuiter peccat, se ipsum vero iudicando & discutiendo, semper
fructuosè laborat. Sicut res nobis cordi est, sic de ea frequenter iu-
dicamus, nam verum iudiciũ propter priuatum amorem facilius
perdimus.

Hoc ipsum grauiter sanctus Ambrosius : *Cum unusquisque sit* *In Ps. 118.*
suorum conscius peccatorum, quomodo potest de alterius iudicare pec- *Hom. 20.*

598 FERIA 5. Hebd. 3. post Oct. Pasche. Pasce agnos meos, &c.
cato? Iudicet de alterius errore qui non habet quod in seipso condem-
net. Iudicet ille qui ad pronuntiandum, nullo odio, nulla offensione,
nulla leuitate ducatur. An tu hoc de te iudicare præsumeres, quod
nulla in iudicando de aliis leuitate ducaris, nihilque habeas
quod in teipso condemnes?

Vide in 3. parte, FERIA 2. hebdomadæ 14.



FERIA QUINTA.

CHRISTVS DOMINVS PETRO

SVAS PASCENDAS OVES CONCREDIT; SIMVL-

QVE DEMONSTRAT CHARITATEM,

quæ non gaudet super iniquitate.

Pasce agnos meos, pasce oves meas. Ioan. 21.

VERITAS PRACTICA.

Gaudere super iniquitate, plerumque est iniquius
quam ipsam iniquitatem admittere.

RATIO EST, Quia quo magis voluntarium est malum eo
est maius seu iniquius.

Atqui gaudere super iniquitate, plerumque magis est volunta-
rium, quam ipsam iniquitatem admittere.

Ergo & est iniquius.

L. PUNCTVM.

QVM prandissent, inquit sanctus Ioannes Euangelista, di-
cit Simoni Petro Iesus, Simon Ioannis diligis me plus his; di-
cit ei, Etiam Domine, tu scis quia amo te; Dicit ei, pasce
agnos meos. Dicit ei iterum, Simon Ioannis, diligis me? Ait illi,

etiam Domine tu scis, quia amo te; Dicit ei, pasce agnos meos. Dicit ei tertio, Simon Ioannis amas me? Contristatus est Petrus quia dixit ei tertio, amas me; & dixit ei, Domine tu nosti omnia, tu scis quia amo te; Dicit ei, pasce oues meas.

Expende hic primo quàm præcipuè fundata sit Ecclesia & Religio Christiana in cognitione & amore Domini nostri Iesu Christi. Quando enim Dominus promisit clauēs regni cœlorum *Math. 16.* Petro, hanc exegit ab eo fidei confessionem, *Tu es Christus filius Dei viui*; Nunc vero cùm ei tradit quod promissit, amorem suū postulat; & *negationi trina trina confessio redditur, ne minus amoris lingua seruiat quam timori*; vt ait S. Augustinus.

Deinde considera quod si Petrus ostendit se amare Christum Dominum, acceptando curam ouium Christi, quanto magis ipse Dominus Petrum & oues suas diligere significauit, quando pastori prouidit omnia quæ ad pascendas & seruandas oues essent opportuna? Cumque in primis potestas remittendi peccata fuerit necessaria, Cogita quam amplam & integram primo quidem ipsi Petro tradiderit, dicens ei, *quodcumque ligaueris super terram, Math. 18. erit ligatum & in cœlis; & quodcumque solueris super terram, erit solutum & in cœlis*; Tum verò reliquis simul Apostolis: *Accipite 10. in. 20. spiritum sanctum, quorum remiseritis peccata, remittuntur eis.*

Tertio quod hic maxime est proprium, expende quàm verè de hac Christi Domini Charitate dici possit, *quod non gaudeat super iniquitate*. Cùm enim tùm iniquitas maxima in mundo abūdaret, & meritas à Diuina Iustitia prouocaret pœnas, En potius Diuina Clementia veniam, remissionem, relaxationem, & omnium peccatorum condonationem loquitur, & prædicat, sicut ante ex Propheta Christus ipse Dominus declararat: *Euange- Luc. 4. lizare pauperibus misit me, sanare contritos corde, prædicare captiuis 15. 61. remissionem, & cæcis visum, dimittere confractos in remissionem, prædicare annum Domini acceptum & diem retributionis.*

Hæc est vere Charitas quæ non gaudet super iniquitate, cùm ei potius condoleat & commiseretur, & remedium afferat. Huic Charitati debes salutem tuam, cùm ei debeas peccatorum tuorum remissionem sine qua nulla est salus.

Et vero hanc vt imiteris, caueasque diligenter ne aliquando gaudeas super iniquitate, Attende ex Veritate proposita, quàm illud iniquum & impium sit supra ipsam etiam iniquitatem de

qua gauderes. Nempe illud peccatum semper habetur iniquius quod à liberiori profectum est voluntate. Est enim libertas voluntatis, & aduertentia intellectus, principium & radix totius malitiæ & iniquitatis, vnde quò voluntas erit liberior siue quò iniquitas erit magis voluntaria, eo erit grauior, vt. expresse san-

1. 2. q. 77. *Stus Thomas: Actus, inquit, intantum est peccatum, inquantum est voluntarius, & in nobis existens: esse autem aliquid in nobis dicitur per rationem & voluntatem: vnde quanto ratio & voluntas ex se aliquid agunt, non ex impulsu passionis, magis est voluntarium & in nobis existens, & secundum hoc passio minuit peccatum, inquantum minuit voluntarium: passio autem consequens magis auget, vel potius est signum magnitudinis eius, inquantum demonstrat intentionem vo-*

q. 78. a. 4. *luntatis ad actum peccati. Idemque alibi: Cum peccatum principaliter in voluntate consistat, quanto motus peccati est magis proprius voluntati, tantò peccatum est grauius, ceteris paribus. Atque hinc Apostolus: voluntariè peccantibus nobis, iam non relinquitur pro peccatis hostia: Quasi diceret, cum alia aliis sint magis voluntaria peccata, si quæ sint magis voluntaria, sunt grauiora & difficilius remittuntur. O quanta voluntati humanæ debetur vigilantia, vnde tantum importatur detrimenti!*

II. P V N C T V M.

AT QVI gaudere super iniquitate plerumque magis est voluntarium, quam ipsam iniquitatem admittere.

Cum enim multa libertatem seu voluntarium in ipso peccati actu diminuere possint, vt inaduertentia, fragilitas, præcipitatio, acceptæ iniuriæ sensus, quælibet passio quæ dicitur antecedens, aut metus impendentis mali, vel quid simile de quo S. Thomas

1. 2. q. 77. & alij, tum nihil horum in gaudio quod sentitur super iniquitate, locum habere potest; valde enim libere & plene voluntariè concipitur tale gaudium, & est expressa quædam peccati approbatio, & supremus veluti gradus peccantium; vnde Sapiens, Qui

Pr. 2. *latantur cum malefecerint & exultant in rebus pessimis, & iterum, Eccles. 17. qui exultant in malis, consenescent in malo. Sanctus item Iacobus: nunc autem exultatis in superbiis vestris, omnis exultatio talis maligna est: quasi diceretur, hoc est quod præcipuè indicat malignitatem animi, sic exultare in peccato. Agnitio vultus eorum respondit eis, va anima eorum. Sic apte Propheta & grauiiter.*

III. P V N.

III. PUNCTVM.

SIC ergo gaudere super iniquitate, plerumque est iniquius quàm ipsam iniquitatem admittere: Quia maior est libertatis & voluntatis accessio, vnde maior exurgit iniquitas. Prodiit quasi ex *ps. 72* adipe iniquitas eorum: transferunt in affectum cordis: iniquitatem in excelsis locuti sunt. Quæ certe consideratio plurimum valere debet ad compescendum illud gaudium, cum forte nolles illud peccasse quod alium gaudes perpetrasse; & tamen gaudendo idem peccas & grauius, vt vidisti. Quod validè confirmatur ex ante dictis, vbi ostensum est, quod qui ruina gaudet inimici, ruinam eius in se trahit. Vide in hac parte, Sabbatum hebdomadæ 3. in Quadragesima.

Certe quàm verum est illud sancti Augustini, *Gaude bono meo & tuo est*, tam certum est istud: si gaudes malo meo, tuum est; hoc enim efficit gaudium in quamcumque se dedat partem, vt meritum vel demeritum participet eius operis cui congau-
det; Quoniam qui talia agunt digni sunt morte: non solum qui ea fa- *Rom. 1.*
ciunt sed etiam qui consentiunt facientibus. Adde quod cum istud gaudium sit manifestè contra Charitatem, tam longe grauius esse poterit iniquitate alterius, quàm virtus cui opponitur talis iniquitas, erit inferior Charitate. *Inuidia Diaboli mors intra-*
uit in orbem terrarum, imitantur autem eum qui sunt ex parte illius,
inquit Sapiens; Velleſne ex parte esse Diaboli? At illius plane *Sap. 2.*
sunt qui gaudent super iniquitate, quoniam hoc est vnum ipsius gaudium.



FERIA SEXTA.

CHRISTVS DOMINVS MITTENS

SVOS IN VNIVERSVM MVNDVM, ET PROMIT-

TENS SE MIRACVLIS CONFIRMATVRVM

QVÆ PRAEDICARENT, OSTENDIT

2. Pars.

Gggg

602 Feria 6. Hebd. 3. post Oct. Pasce. *Euntes in mundum, &c.*

CHARITATEM quæ con-
gaudet veritati.

*Euntes in mundum vniuersum, predicate Euange-
lium omni Creatura. Marci 16.*

VERITAS PRACTICA.

Aut amandus tui contemptus, & te contemnenti con-
gaudendum : aut non amanda Charitas quæ con-
gaudet veritati.

*RATIO EST, Quia vbiunque est Veritas, eam amat &
congaudet illi Charitas, aut ipsa Charitas non amatur & de-
ponetur.*

*Sed in tui contemptu, est Veritas, seu Veritas est te esse con-
temnendum.*

*Ergo ex illa Charitate aut amandus est tui contemptus, aut illa
Charitas non amanda & deponenda. Quod cum sit damno-
sissimum, assumenda hæc consideratio ad faciliorem contemptus
sui tolerantiam.*

I. P V N C T V M.

HVC referenda sunt quæ habentur Marci vltimo, vbi
Dominus apparens vndecim recumbentibus, exprobra-
uit incredulitatem eorum & duritiam cordis, quia his qui vi-
derant Eum resurrexisse, non crediderunt. Et dixit eis; *Euntes in
mundum vniuersum predicate Euangelium omni Creatura. Qui cre-
diderit & baptizatus fuerit, saluus erit: qui verò non crediderit, con-
demnabitur. Signa autem eos qui crediderint, hæc sequentur; in nomi-
ne meo damonia ejicient, linguis loquentur nouis, serpentes tollent;*
Et quæ plura habentur, ex quibus patet primo quidem Christi
Domini Charitas qui mundo vniuerso prouidet & constituit
Prædicatores qui eum veritatibus Euangelicis imbuant; tum

Aut amandus tui contemptus, & te contemnenti, &c. 603

vero etiam apparet ea Charitas *qua congaudet Veritati*, quando promittit se miraculis confirmaturum Veritates illas quæ prædicarentur & crederentur; Est enim miraculum approbatio quædam cælestis & Diuina illius doctrinæ, cuius causa tale patratum miraculum, vnde prædicantibus vbique Euangelium Apostolis cui Dominus cooperaretur & quorum sermonem confirmaret sequentibus signis, tam certò ipsa erat eius Charitas quæ tùm verè congaudebat Veritati, quàm certum erat sic comprobari Veritatem.

Hinc porro disce ad stabiliendum magis magisque tui Contemptum in quo tam sæpe laboras, quod si habes illam Charitatem, gaudebis te contemni, & congaudebis te contemnenti; aut si non ita gaudeas, verendū maximopere ne desit illa Charitas. Nam vbicumque est Veritas, illi congaudet Charitas, id est, gaudet de illa veritate quisquis habet illam Charitatem; Est enim proprietas Charitatis indiuidua, vt quamlibet veritatem amet, approbet & magnificiat. Nam cùm Veritas & Charitas sint à Deo, tam necesse est Veritatem à Charitate colī, quàm Charitatem à veritate prædicari: Vnde Apostolus tam sæpe vtramque coniungit vt vix vnā ab alia separet. *Veritatem, inquit, facientes in Charitate, crescimus in illo per omnia qui est Christus.* Ephes. 4. Et alibi, *in iis qui pereunt, eo quod Charitatem Veritatis non receperint* 2. Ti. 2. *vt salui fierent.* Audisne anima? aut pereundum, aut Charitas veritatis recipienda.

II. P V N C T V M.

SED ipsa est Veritas, Tui contemptus: Ipsa est veritas, te contemptibilem esse & contemnendum; Ipsa est veritas te dignum esse omni opprobrio & contemptu.

Licet enim is qui te contemnit, forte peccet; aut forte id falsum dicat vel cogitet quo te contemnat; aliunde tamen tam verum est te semper esse dignum omni opprobrio, vt quidquid dicant & sentiant homines, id semper verum sit; Nam reuera peccator es, & in veritate seu coram Deo, omnis peccator se omni contemptu dignum existimare debet, aut nescit quid sit esse peccatorem. Apte Propheta; *Contemptibilis tu es valde, superbia Abdiacordis tui extulit te.* Cui conformiter Author libri de Imitatione

Gggg ij

L. 3. c. 4. Iesu. Ego te docebo, ait veritas, qua recta sunt & placita coram me. Cogita peccata tua cum displicentia magna & merore, & numquam reputes te aliquid esse propter opera bona. Reuera peccator es, & multis passionibus obnoxius & implicatus. Ex te semper ad nihil tendis, & cito laberis, cito vinceris, cito turbaris, cito dissolueris. Non habes quicquam unde possis gloriari, sed multa, unde te debeas vilificare; quia multo infirmior es quam vales comprehendere. Nihil ergo magnum tibi videatur ex omnibus que agis: nil grande, nil pretiosum & admirabile, nil reputatione appareat dignum, nil alium, nil verè laudabile & desiderabile nisi quod aeternum est. Placeat tibi super omnia, aeterna veritas, displiceat tibi super omnia, semper maxima vilitas tua. Et in alio capite eiusdem libri, Quid habes homo inanis con-
 queri? Quid sordide peccator, potes contradicere exprobrantibus tibi, qui toties Deum offendisti & toties infernum meruisti? sed pepercit tibi oculus meus, quia pretiosa fuit anima tua in conspectu meo, ut cognosceres dilectionem meam, & gratus semper beneficiis meis existeres, & ad veram subiectionem & humilitatem te iugiter dares, **PATIENTER QVE PROPRIVM CONTEMPTVM FERRES.**

Digna certe consideratio quæ diligenter expendatur. Nonne poenas inferni & opprobrium illud sempiternum meruisti! At ecce commutavit illud Deus in leuem illum contemptum qui modo tibi accidit. Fecitne tibi Deus iniuriam? Cur autem non auderes dicere tibi ab eo factam iniuriam, nisi quia reus es & reuera dignus tali poena? An concedes te dignum quidem contemptu qui à Dæmonibus apud Inferos inferretur, & negabis te illo dignum qui ab hominibus hic in mundo ferendus est? hæc est peccati tui poena quam nisi fatearis te mereri, vix te peccatorem agnosces. *Cognovi Domine, quia æquitas iudicia tua: & in veritate tua humiliasti me.*
 Ps. 118.

III. PUNCTVM.

AUT ergo est amandus tui contemptus & te contemnenti congaudendum: aut non amanda Charitas qua congaudet omni veritati, qualis est illa qua de contemptu tui tam certa est quam te esse peccatorem. Quod egregie confirmatur ex his quæ passim habet sanctus Augustinus, duos nempe amores fecisse duas Ciuitates, vnam à contemptu sui vsque ad amorem Dei; alteram ab amore

L. 14. de
 Ciuit. c. 28.

fui usque ad contemptum Dei; ubi manifestè opponit Charitatem, & amorem nostri; & tam necessario infert contemptum tui ex Charitate Dei, quàm contemptum Dei ex inordinato amore tui.

O quale illud, *Deum à te contemni!* possetne id admittere? Ergo admittendus tui contemptus. Et nullus ita te potest deprimere & contemnere, quin tu ipse te ipsum magis infra ducas & spernas, quia te magis quam ullus alius debes agnoscere peccatorem & contemnendum. Et licet ista sensu non percipiantur, imo contraria sæpe sentiantur; tamen agendum est fide & ratione, tùm quidquid contradicat appetitus aut reluctetur sensus, dicendum cum Dauide; *Quid mihi & vobis est? Dimittite eum ut male-* 2. Reg. 16. *dicat, iuxta praeceptum Domini: Dominus enim praecepit ei, ut male-* *diceret, & quis est qui audeat dicere, quare sic fecerit?*

Itemque cum Diuino Kempensi, *Domine in cecitate sumus; &* L. 3. c. 41. *vanitate citò seducimur. Si rectè me inspicio, numquam mihi facta est iniuria ab aliqua creatura, unde nec iuste habeo conqueri aduersum te. Quia autem frequenter & grauiter peccaui tibi, merito armatur contra me omnis creatura. Mihi igitur iustè debetur confusio & contemptus, tibi autem laus & gloria.*

Vide in hac parte totam hebdomadam 4. Quadragesimæ. Et in 3. parte, Sabbatum hebdom. 8.



SABBATO.

DE MIRACVLIS SPIRITVALIBVS

QVAE CHARITAS DOMINI QVOTIDIE

OPERATUR, VT OSTENDAT SE

CONGAUDERE VERITATI.

In nomine meo Dæmonia ejicient, linguis loquentur nouis, serpentes tollent, & si mortiferum quid biberint, non eis nocebit: Super agros manus imponent, & bene habebunt. Marci 16.

VERITAS PRACTICA.

Sapienter Ille, qui maluit liber peccato possideri à Dæmone, quàm vel leui cum peccato liberare possessos.

Anonymus ille est, de quo sic Surius in vita sancti Seuerini Noticorum Apostoli, octauo Ianuarij. *Seuerus, inquit, Sulpitius refert ex relatione Posthumij, virum quemdam magnis virtutibus signisque mirabilem, ad expellendam de corde suo iactantia vanitatem quam incurrerat, exorasse ut permissa in se, mensibus quinque, Diaboli potestate, similis his fieret quos ipse curauerat. Et post pauca: Itaque correptus à Dæmone, tentus in vinculis, omnia quæ Energumeni ferre solent perpeffus, quinto demum mense curatus est, non tantum à Dæmone, sed quod illi erat vtilius atque optatius, ab elationis vanitate.*

Iam ergo quod Sapienter ille maluerit liber peccato possideri à Dæmone, quàm vel leui cum peccato liberare possessos:

RATIO est, quia Sapientis est ex duobus malis semper minus eligere, seu maius evitare.

Sed possideri à Dæmone, minus malum est quàm vel leue peccatum committere, quacunque de causa.

Ergo Sapienter Ille qui maluit liber peccato possideri à Dæmone, quàm vel leui cum peccato liberare possessos. Quod certe est consideratione dignissimum.

I. PUNCTVM.

ICET idem Euangelium eademque Veritas quæ olim ab Apostolis, etiam nunc prædicetur & obseruetur, non tamen eadem semper, seu non eodem modo facta sequuntur miracula; non iam ita frequenter Dæmones ejiciuntur è corporibus sicut olim; non linguæ audiuntur nouæ, non serpentes, non morbi omnes sic tolluntur, aut similia patrantur miracula, sicut initio nascentis Ecclesiæ; nec tamen propterea Charitas Domini deest quin semper appareat & congaudeat Veritati prædicatæ, creditæ & obseruatæ. Nam quod primis tem-

poribus, sensibili fiebat modo circa Corporum Sanitatem, id spiritali nunc & inuisibili gratia geritur circa Salutem & San-
ctitatem animarum. Vt fuse tractat Cassianus collatione duode-
cima, capite duodecimo.

Quid enim est peccatum expelli aut prauos ab anima motus
coerceri, nec non virtuosos exui habitus, quid aliud inquam est
quam Dæmonem pelli aut serpentes vel morbos tolli? Et cum
per Euangelicæ veritatis prædicationem & obseruantiam sic ani-
ma liberetur peccato, suisque prauis affectibus vt iā plane aliter
viuat & loquatur, nonne ea est Diuinæ Charitatis operatio quæ
se semper ostendit congruere Veritati? Sic apertè diuus Grego-
rius: *Habemus*, inquit, *de his signis atque virtutibus quæ adhuc subti-* Hom. 29.
in Euang.
lius considerare debcamus: Sancta quippe Ecclesia quotidie spiritaliter
facit quod tunc per Apostolos corporaliter faciebat. Quæ postquàm
futius declarauit, sic concludit: *quæ nimirum miracula tanto ma-*
iora sunt, quanto spiritalia: tanto maiora sunt quanto per hæc non
corpora sed anime suscitantur.

Quæ quidem poltrema verba sunt valde consideranda: neque
enim ita fert communis opinio & vulgaris sensus de miraculis.
Vide quanti fiat apud homines, Dæmonem expelli à corpore,
mortuum suscitari, aut aliud simile miraculum; Et certe est
quod colatur & celebretur Gratia quæ gratis data dicitur & cui
totus non æquiparetur mundus; verum si comparetur cum Gra-
tia sanctificante, cum Charitate aut aliis virtutum heroïcis &
meritoriis actibus, qui dicuntur miracula spiritalia: certissi-
mum est quod ait sanctus Gregorius, tanto hæc præstare mira-
culis corporalibus quanto animam Corpori, quanto sanitatem
corporis sanctitati animæ, & quanto vitam spiritualem ac æter-
nam temporali.

Nouerat hoc ille Sanctus qui cùm in Dæmones ex humanis
corporibus expellendos diuinum quoddam exerceret imperium,
timeretq; sibi à vana gloria; *Sapienter maluit liber peccato ab ipso*
dæmone quem expellebat possideri, quàm vel leui cum peccato liberare
possessos. Quæ sancti Viri sententia quia plurimum facit ad discre-
tionem veri boni, verique mali; idcirco Veritatis loco Practi-
cæ nobis esse debet, quæ sic aperte declaretur & attentius con-
sideretur.

Constanter illud tenendum est quod ex duobus malis grauius

semper est declinandum, & minus eligendum: quando videlicet utrumque simul euitari non potest, & necessitas quædam incumbit, aut manifestum periculum incurrendi in alterutrum è duobus; tunc perinde Ratio & Religio suadent maius malum esse vitandum, sicut omne malum esse fugiendum. Cùm sint autem duo præcipua malorum genera, quæ diuersas sub se species continent, nempe malum morale seu spirituale quod est malum culpæ: & malum naturale seu temporale quod est malum poenæ: sic Propositio debet intelligi, vt si necesse sit incidere in malum aliquod naturale vel morale; morale hoc fugiatur potius quam naturale; quia maius est malum, vt dicitur sequenti puncto. Si vero etiam duo concurrant moralia, in quorum alterum necesse sit cadere, tunc minus eligatur, sicut natura satis docet ex duobus naturalibus & sensibilibus malis, illud fugere quod est grauius, & eligere potius morbum quam mortem, medicinam quam morbum, venæ præcisionem quam brachij, aut certe iacturam brachij quam totius corporis. *Sic nemo vnquam carnem suam odio habuit, sed & nutrit & fouet eam, sicut Christus Ecclesiam.* inquit Apostolus, id est, si de carne seu de vita naturali conseruanda solum agatur, certe debet præferri bonis aliis naturalibus, nec pro pecunia vel prædiis & domibus vita est prodigenda: Sed si agatur de anima, tunc ait Idem, *debitores sumus non carni, vt secundum carnem viuamus.* Et præclare S. Bernardus: *sic amet anima carnem, vt non ipsa in carnem transisse putetur, dicaturque ei à Domino, non permanebit spiritus meus in homine quia caro est: Diligat anima carnem suam, sed multo magis suam ipsius animam seruet. Amet Adam Euam suam, sed non sic amet, vt voci eius plus obediat quàm Diuina. Denique ne ipsi quidem expedit sic amari, vt videlicet cui interim caues à flagello paterna correptionis, thesaurizes iram æterna damnationis.*

Ephes. 5.

Rom. 8.

Serm. 10. in Ps. qui habet.

II. PUNCTVM.

SE D possideri à Damone, minus malum est quàm vel leue peccatum committere, quacumque de causa.

Est enim illud malum ex eo genere quod diximus naturale, & poenæ, nempe quo corpus diuexetur; aliud vero malum est morale & culpæ, quo non tantùm anima læditur, sed & ipse Deus offenditur:

offenditur: unde quanta est distantia non solum animæ & corporis sed & ipsius Dei, & hominis ac totius vniuersi, tanta omnino est inter vtrumque illud malum; ac proinde minus est malum quidquid omnes patiantur homines, siue in terra, siue in purgatorio, seu etiam in Inferno, quam vel vnum veniale peccatum: quia quantumcumque grauis sit illa poena, poena est hominum, malum est creaturæ: At peccatum, malum est Creatoris, læsio est & iniuria Diuinæ maiestatis; quod malum etiam si leue sit in suo genere, in eo tamen genere mali est, vt minimum huius generis malum sit maius maximo & grauissimo alterius generis malo: atque illud quod communiter dicitur, maximè hic locum habeat: *Infimum supremi, maius est supremo infimi.*

Iobum intruere suis inuolutum poenis à planta pedis ad verticem, admirare quo mentis robore tantam malorum molem sustineat potius quam se mortali culpa inquinet: verum quæ est humana fragilitas, in venialem incidit, & vt ipse loquitur, *insipienter locutus est, & quæ ultra modum excederent scientiam ipsius:* Iob, 42. tanta verò eum poenitudo huius offensæ tenuit vt quasi nihil pateretur, nouas sibi poenas imposuerit quibus illam culpam expiaret, cuius malum sentiebat esse grauius quàm quidquid in corpore sustineret, quia scilicet Iobus se maiorem Deum norat, quem se vel leuiter offendisse videbat. *Idcirco*, inquit, *ipse me reprehendo, & ago poenitentiam in fauilla & cinere.*

Atque hoc est quod pro certo apud omnes & ex fide docetur, dolorem Contritionis seu Attritionis vel de vno peccato, super omnem esse dolorem, non quidem in sensu, sed in appretiatione: id est, si fieret optio sustinendi quoscumque mentis & corporis cruciatus, aut peccandi: eligerentur potius quæcumque mala poenæ, quàm vel minimum culpæ malum. *Melius est mihi absque opere incidere in manus vestras, quàm peccare in conspectu Domini.* Dan. 13. Sic pudica Susanna, sic fidelis quæque Anima; vel si quæ non ita sentiret & loqueretur, infidelis esset, impoenitens esset, peccatrix esset, atque si in eo statu moreretur, in peccato moreretur.

III. PUNCTVM.

SAPIENTER ille igitur qui maluit liber peccato possideri à Dæmone, quam vel leui cum peccato liberare possessos; quia Sapien-
tis & Christiani est ex duobus malis semper euitare grauius, &
eligere minus: possideri autem à Dæmone, minus malum est
quàm vel leue peccatum, quacumque de causa, pro damnatis
etiam omnibus liberandis, commissum, cum sit Dei offensa,
quæ quantumuis minima, purgatoriis tamen ignibus expiari
debet qui omnes huius vitæ acerbitates & cruciatus sua superant
grauitate poenæ. *Amen dico tibi*, ait ipse Christus, *non exies inde,*
donec reddas nouissimum quadrantem: donec etiam nouissimum minu-
tum reddas: id est nullum est minimum culpæ malum cuius non
debitæ soluantur poenæ, & cuius poenæ soluendæ non sint graui-
simæ, si cum huius vitæ poenis comparentur.

In obitu Illud scitote, inquit sanctus Bernardus, *quod post hanc vitam in*
Humberti. *purgabilibus locis, centupliciter quæ fuerint hic neglecta redduntur vs-*
Serm. 41. de *que ad nouissimum quadrantem.* Sanctus item Augustinus: *Ille pur-*
sanctis. *gatorius ignis durior erit quàm quid potest in hoc saculo poenarum vi-*
deri aut cogitari aut sentiri. Cur porro illic tam graues poenæ pro
minima culpa, nisi quia minima culpa grauius & maius est ma-
lum, malis his omnibus poenæ?

Sic Dæmon ipse acerrimus hominum hostis non tam curat
homines diuexare quàm in peccatum inducere; hoc vnum pro
fine habet; per poenas vel per illecebras, in malum culpæ prouo-
care: quia hoc scilicet nouit vnum esse malum.

Quin quod ipse Deus Diuini que homines vtuntur poenis cor-
poralibus, atque ipso etiam Dæmone, velut flagello, ad euitan-
das quascumque culpas. Quod non sic fieret nisi culpa maius
esset malum quàm poena, quàmue Dæmon possidens corpus aut
torquens hominem, vnde Apostolus tradidisse se ait, *hominem,*
Satana in interitum carnis, ut spiritus saluus sit in die Domini.

Denique poenarum omnium causa, peccatum est, poenam
vult Deus & statuit; at peccatum velle numquam potest. Tu è
contra, vis peccatum, nec vis poenam quæ esset necessaria ad
illud euitandum, & quam si velles, peccato abstineres. Cur au-
tem non vis poenam nisi quia maius putas malum? Caue id dein-

ceps credas; & illud sancti Anselmi adiunge ad sententiam huius
sancti Viri quam modo explanamus: *Si hinc peccati pudorem, &* L. de simi-
litudinibus
c. 190,
illinc gehennæ cernerem horrorem, & necessario uni eorum haberem
immergi; prius me in Infernum immergerem, quàm peccatum in me
immitterem. Mallem enim purus à peccato & innocens gehennam in-
trare, quàm peccati sorde pollutus, cælorum regna tenere; cùm constet
solos malos in inferno torqueri: & solos bonos in cælesti beatitudine
foveri. Tu idem fortè dixeris quando abest peccandi occasio:
sed quando hæc adest, tunc indicandum an verè dixeris.





DOMINICA IV.

POST PASCHA.

DE NECESSARIO CHRISTI DISCESSU,
ET IN EIVS VICEM VENTURO SPIRITU SANCTO,
QVI MVNDVM ARGVAT DE PECCATO. Ioan. 6.

VERITATES DIVERSÆ PRACTICÆ.

Vado ad eum qui misit me.

Sicut à Deo, sic ad Deum.

SENSVS est, quod sicut à Deo sumus, sic nos ad Eum nostraque omnia referamus. Tanta est necessitas vnius atque alterius. Differentia quidem est necessitatis, quandoquidem illa est Physica & extra nos posita, quâ sumus à Deo; altera verò quâ nos ad eum referamus, est Moralis, & à nobis cum diuina dependens gratia; sed tamen hæc tam vna tantaque est necessitas, vt verè dici possit, quòd sicut necessariò sumus à Deo, sic necessarium sit vt nos ad eum referamus. Liberum quidem nobis est, vt id actu fiat cum gratia; sed ne desimus gratiæ, nostroque debito, persuadeamur oportet id esse nobis tam necessarium quàm si non esset liberum.

RATIO hæc est inter alias, quòd non minus de fide sit, Deum esse necessariò Finem nostrum, ad quem nos nostraque omnia referre debeamus, quàm necessarium esse Principium nostrum à quo sumus.

Sed posita illa fide, si velimus debito nostro satisfacere, tam ne-

cessarium nobis est ut nos ad Deum nostraque omnia referamus, quam si non essemus liberi.

Ergo sicut à Deo, sic ad Deum. Sicut non dubitamus de vno, sic certi sumus de alio: sicque in praxi quod nostrum est cum gratia constanter peragamus.

De prima propositione passim omnes Theologi, quos inter accuratè Lessius tractatu de perfectionibus moribusque diuinis, libro 14. Satisque patent omnibus sacræ Scripturæ tam euidenter vtrumque simul proponentes, vt qui agnoscat Deum esse nostrum principium à quo sumus, agnoscat & esse finem cuius gratia sumus, & ad quem nos nostraque omnia referre teneamur. *Ego Dominus, primus & nouissimus ego sum.* EGO primus & ego nouissimus, & absque me non est Deus. PROPTER me, propter me faciam, vt non blasphemem, & gloriam meam alteri non dabo. Audi me Iacob & Israel, quem ego voco: Ego ipse, Ego primus & ego nouissimus; manus quoque mea fundauit terram, & dextera mea mensa est cælos, Ego vocabo eos & stabunt simul. Quasi diceret, hoc in primis attende quisquis es Dei cultor, sicut ego sum Primus & Princeps, à quo sunt omnes creaturæ, sic Ego ipse sum Nouissimus, & omnium Finis ad quem referri debent. Et quidem cæli ac terra statim atque iussero, sistent se vt famuli ad nutum heri sui; tu verò fili, liber es, sed vt me audias, vt ad me venias inuito, excito, moneo: si libertatem tuam spectas, quod voles facies; si tuum verò debitum, non minus venies quam cætera creata omnia.

Ne cui verò esset ambiguum, quin vox, *nouissimus*, æque significaret finem; ac *primus*, principium; sic alibi tria hæc simul vnà coniunguntur, vt nullus ambigendi super sit locus. *Ego sum* *α & ω*, *primus & nouissimus, principium & finis*. Quod quidem ita de fide est, vt cum vigeret Arianismus, Christiani morientes qui se volebant orthodoxos profiteri, suis in sepulchris incidere curabant *α & ω*, quasi dicerent, se in illa vixisse & mortuos esse fide quæ Iesum profiteretur æquè esse Deum ac Deum Patrem, & æquè de vtroque intelligi quod sit principium & finis noster; Qui, vt ait Sapiens, *vniversa propter semetipsum operatus est*: Et Apostolus, *ex ipso & per ipsum & in ipso sunt omnia*, græcè est *eis* *αὐτὸν* in ipsum, siue ad ipsum, vt ipsemet Apostolus alibi clare

1f. 42.

44.

42.

Apoc. 22.

Apud

Corn. Apr.

1. ex

Ambr.

Morales.

Prou. 16.

Rom. 11.

Hebr. 2. ait, *Propter quem omnia, & per quem omnia.*

Ibid. 2. Denique quantum indubitanter Deus dicitur & creditur Dominus noster, Dominus Cæli ac Terræ, Dominus omnium, tam certò affirmatur esse finis noster, ut non sit aliud esse Dominum, quàm de nobis posse statuere prout velit; nec sit aliud, esse finem nostrum, quàm ut sic prout velit de nobis statuatur; & quod statuerit, planè velimus. *Dominus est, quod bonum est in oculis suis, faciat.* Nonnè id credis & dicis?

1. Reg. 3.

SED, quæ est altera propositio, *sic certa fide hoc creditur, velimusque debito nostro satisfacere, tam necessarium nobis est, ut nos ad Deum nostraque omnia referamus, quàm si non essemus liberi*; Neque enim talis libertas nos à debitis nostris magis exoluit, quàm à cæteris omnibus Christianæ iustitiæ tum positivis, tum negativis officiis, ad quæ præstanda similiter liberi sumus. Sed quo sensu liberi? nempe ut possimus nolle, aut velle cum gratia: si autem volumus, libere ac voluntarie, id velimus quod debemus: atque hoc ipsum quod debemus & volumus, semper exequamur, non necessario sicut animantes belluæ, non coactè sicut serviles animæ. Quo in sensu etiam dixit Apostolus, *legem iusto non esse positam*, id est, non coerceri iustos legibus sicut iniustos, quia ultro illi & sponte legem observant: Sunt enim in qualibet lege tria consideranda, nempe *obligare, dirigere, & coercere siue punire*. Duo priora lex in iustos æque ut iniustos exercet, tertium verò in iniustos qui se duobus primis non subijciunt.

2. Tim. 1.

Hoc ipso itaque quo agnoscis Deum esse finem tuum, tanta necessitate, tanto iure, tantaque teneris obligatione, te ad illum totum referre, quanta est ipsa quodammodò necessitas quæ Deus est finis tuus. Expende verba, necessitatem pondera, vide etiam atque etiam qualis quantaque sit illa necessitas, *Deum esse finem tuum*, nempe ut aliter omnino non possit esse; Nec enim potest Deus non esse finis noster, tanta est huius perfectionis in Deo necessitas, quanta est eius absolutæ perfectionis, imò & existentia, quæ certe necessitate nihil maius dici potest. Sic ergo de te cogita: sic te obstrictum crede ad finem illum tuum prosequendum, ut aliter licitè non possis velle. Liberum tibi quidem est licite vel illicitè velle quod agas: sed posito quod velis tantum, sicut tantum velle debes, licitè agere; tam necessarium tibi

est ad illum finem tendere, quàm quod de Deo dicimus, illum esse necessariò finem nostrum.

O strictissimam simul & liberrimam, atque amantissimam necessitatem! Quis enim non libens volens sese illi subiiciat? quid illo Fine præstantius? quid delectabilius? aut quid vtilius? Et tamen quàm pauci se totos illò referunt? quàm multi contrà toti sunt in concupiscentiis tam studiosè complendis, quasi finem & scopum alium non haberent! Tu in quantis hic delinquas, attentè discute. Ne ita spectes quid bene agas quàm quid non bene, nam totum bene tali fini debetur. Expressa vox est in illo primo & maximo mandatorum mandato, *Diliges Dominum Deum tuum ex toto corde tuo*; Nam cùm Deus, inquit sanctus Thomas, *ut ultimus finis sit diligendus; ad quem omnia sunt referenda,* ^{2. p. q. 44. a. 4. & 5.} decuit nobis mandari ut eum ex toto corde diligeremus. Et paulo post, *& ideo totalitas quadam fuit designanda circa præceptum de dilectione.* Et tum sequenti articulo, *conuenienter nobis præcipitur, ut Deum diligamus ex toto corde, id est, ut tota nostra in Deum referatur intentio.*

Qua de re vide in 1. parte, die 3. & 4. Ianuarij. In 4. parte, Dominicam 17. Ibidemque præcipuè Sabbato hebdomadæ 15. vbi de libertate proponuntur hæ duæ Veritates suprà dictis multum accommodæ.

Quâ re vnâ potissimum à Dei, cultu auocamur, eâdem potius ad eum aduocandi sumus. *Nempe, libertate.*

Tantum abest quòd qui sunt verè liberi, non se subiiciant; ut non sint aliter verè liberi, nisi se subiciant.

Ad verba etiam proposita, *Vado ad eum qui misit me*, possent hæ referri.

Sicut à Deo quærendum est officium, ita in officio quærendus est Deus.

In 2. parte, vbi de statibus in fine, consideratione 3.

Ad Sacramentum vnde virtutes exeunt, reuertuntur, ut iterum fluant.

In 3. parte, Feria 2. hebdomada 2.

616 Dominica 4. post Pasc. Si non abiero, paracletus non, &c.

Qui non est semper paratus, numquam est paratus.

In 4. parte, Feria 3. hebdomada 28.

Qui supra mortem est, infra se videt omnia.

In 2. parte, hebdom. 2. Quadragesima.

ALIA DEINDE PROPONVNTVR EVANGELII
VERBA, QVIBVS PRACTICÆ SVBILCIAN-
TVR VERITATES.

*VERITATEM dico vobis, expedit vobis, ut ego
vadam.*

Non quid liceat, sed quid magis expediat.

In 1. parte, Die 8. Ianuarij.

Sic pia etiam desideria debent esse ardentia & tempera-
ta: vt quâ ratione sunt ardentia, sint eadem & tem-
perata.

In 2. parte, Feria 5. hebdomada Sancta.

Si enim non abiero, Paracletus non veniet ad vos.

Inordinata quævis affectio, licet parùm sit mala, non
est tamen paruum malum.

RATIO Verborum Domini, ac subiectæ Veritatis, quia non re-
fertur alibi, sic videtur paulo hæc fusius enarranda.

Non est paruum malum, quod impedit magnum bonum.

Sed inordinata quævis affectio, licet parùm sit mala, magnum
tamen impedit bonum.

Ergo non est paruum malum, nec parùm considerandum.

I. PUNCTVM.

ITANE sic expediebat Christum à suis discedere, ut nisi discessisset, numquam Paraclitus ad eos venisset? Sic plane, quandoquidem sic aperte Christus Dominus. Sed numquid si remansisset in terris poterat æque suum communicare spiritum? Poterat quidem sed illi non poterant capere spiritum, quamdiu secundum carnem, Christum nosse persistebant: sic sanctus Augustinus, ex quo & aliis mox referendis, hæc inter alias, stupenda colligitur ratio dictorum Domini, quod cum Apostoli diligerent ita Christum, ut eum à se separari non nisi ægrè & dolenter ferrent, ista dilectio non satis ordinata videbatur, & quamdiu sic minus ordinati essent, minus erant capaces sancti Spiritus recipiendi.

Diligeant, inquit sanctus Bernardus, & non diligebant: Diligebant dulciter sed minus prudenter: diligebant carnaliter sed non rationabiliter: Dilectio eorum contra salutem eorum. Sanctus quoque Gregorius: quia Discipuli in carne Dominum cernentes, corporeis hunc oculis semper videre sitiebant, recte eis dicitur, nisi abiero, paraclitus non veniet: ac si aperte diceretur, si corpus non subtrahere, quis sit amor spiritus non ostendo, & nisi me desideritis carnaliter cernere, numquam me discetis spiritualiter amare. Sanctus denique Augustinus paulò quam supra expressius: si carni carnaliter haeritis, capaces spiritus non eritis: non potestis capere spiritum, quamdiu secundum carnem persistitis nosse Christum: unde ille qui iam acceperat spiritum, & sinoueramus, inquit, secundum carnem, Christum, sed nunc iam non nouimus.

Sic sancti patres; Quod certe mirum & stupendum! Quid enim amabilius Christo Domino? Quid non modo dulcius sed & desiderabilius eius præsentia! quid iustius quàm timere ne discedat, quàm dolere si discedat? Et tamen isti affectus non erant satis ordinati, & ista inordinatio quantumuis modica poterat impedire tam magnum bonum qualis erat aduentus Spiritus sancti, ac ne illud impediret bonum, hinc discedendum Christo fuit.

O quàm vera quàm solida quæ inde nobis elicitur Veritas, Quod inordinata quævis affectio, licet parum sit mala, non est parum

Et 18 Dominica 4. post Pasc. Si non abiero, paraclitus non, &c.

malum, Quia videlicet non id debet censerī paruum malum quod magnum impedit bonum. Si enim malum in genere nihil est aliud quam priuatio boni, certe malum in particulari, tale erit malum, quale erat bonum cuius est priuatio; Vnde si bonum erat magnum, quid sequitur nisi quod etiam malum quod priuat illo bono sit magnum malum? Sic mater Tobia^{10.} malum absentia filij sui ex bono eiusdem presentia perpendebat: *Heu heu me, fili mi, ut quid te misimus peregrinari, lumen oculorum nostrorum, baculum senectutis nostra, solatium vite nostra, spem posteritatis nostra. Omnia simul in te vno habentes te non debuimus dimittere à nobis.* Sic Antiochus tristitiam suam non aliter quam ex Mach. 6. priuatione contrarij boni exaggerat: *Qui incundus eram & dilectus in potestate mea!*

Sic vniuersim non aliter metimur & sentimus malum quam ex priuatione boni quod impedit, cuius quidem veritatis exemplum non est aliud luculentius quam quod in proposita materia nunc obuersatur. Quid enim minù videbatur inordinatum quam hæc Apostolorum affectio quæ Christo Domino adherabant? aut si quid tantisper inordinata esset, quid magni mali erat in tam modica cordis inordinatione? & tamen quia spiritus sancti aduentum impediēbat, quis non eam dixisset magnum malum, quæ tanto priuabat bono? Quam parua est pupilla oculi! quam modicus puluis qui eam inficit; Et tamen hæc modica, quis putet parua mala quæ priuant tali bono, quale est lumen oculorum?

O veritas Deus meus, fac me verè de rebus sentire, fac me de his iudicare non secundum faciem, sed prout ipse sentis & iudicas.

II. PUNCTVM.

SED inordinata quæuis affectio licet parum sit mala, magnum tamen impedit bonum.

Triplex est bonum quod præcipue retardare solet aut impedire. Primum est, pax & quies animi; Nihil inquietius inordinato affectu, vnde est illud primi de Imitatione Christi, *quandoque homo aliquid inordinate appetit, statim in se inquietus fit.* Quod etiam referas illud sancti Iacobi: *Vnde bella & lites in vobis?*

nonne hinc, ex Concupiscentiis vestris quæ militant in membris vestris? ^{13. Conf. 10.}
 Illud item sancti Augustini; minus ordinata, inquieta sunt; ordi- ^{19. Cimit.}
 nantur, & quiescunt. Denique non is aliter definit pacem quam ^{13. fusc.}
 tranquillitatem ordinis.

Secundum est, vnio maior habitualis vel etiam actualis cum
 Deo; sicut enim certum est talem vnionem non esse nisi in Car-
 ritate, sic indubitatum est Caritatem eò minorem esse quò ani-
 mus alicui Creaturæ, inordinato amore adhæserit; quantum
 enim de toto corde deduxeris quo debes amare Deum, tantò
 minus illum amas; & quantum dilectionis in hac inferiora insumpse- ^{In Ps. 44.}
 ris, tantum necesse est ut demas de toto, inquit sanctus Basilius: &
 sanctus Chrysostomus; pro quanta parte plus aliquid amaueris, tan- <sup>Hom. 42.
in Matth.</sup>
 ta parte minus amas Deum.

Vnde & orationum ac Sacramentorum fructus non is est qui
 certe esset si nulla talis inordinatio impediret. Ego sum puritatis
 amator, inquit ille, ego cor purum quero, & ibi est locus requietionis
 mee. Si vis ut veniam ad te, & apud te maneam, expurga vetus fer- <sup>L. 4. de
Imit. Chr.
c. 12.</sup>
 mentum, & munda cordis tui habitaculum.

Tertium denique, est visio Dei quo saltem ad tempus post
 hanc vitam priuat inordinata quævis affectio, donec in purgato-
 rio igne plane expurgetur animus, ut expresse ait sanctus Augu-
 stinus, Tantum necesse est vrat dolor, quantum hæserit amor: à quo <sup>L. 21. Cimit.
c. 26.</sup>
 dolore, tanto est quisque securior, quanto ea vel minus amauerit, vel
 tanquam non habens habuerit.

Et quod de venialibus peccatis alibi dicit, hic etiam locum
 habet, quòd scilicet nostrum decus ita exterminant, ut ab illius sponsæ <sup>L. 50. Ista
miliarum
Hom. 50.</sup>
 speciosi forma præ filiis hominum castissimis amplexibus separent, nisi
 medicamento quotidiana penitentia dissecantur. At affectus inordi-
 nati non ita diluuntur nisi prorsus exuantur, vnde patet quod
 priuant illis bonis quamdiu subsistunt, & satis etiam aperte pa-
 tet, quam magna sint illa bona quibus priuant. O si scires donum
 Dei, & quid sit vniri Deo, aut illum in cœlo intueri!

III. PUNCTVM.

INORDINATA igitur quævis affectio licet parùm sit mala, non
 est paruum malum; quandoquidem tam magnis bonis priuat,
 quorum priuatio non minus censeri debet mala, quàm multum.

Ecd. 4.
L. 4. c. 15.

illa censentur bona. Cui laboro, & fraudo animam meam bonis? In hoc afflictio pessima est, inquit Sapiens. Et apte ad rem nostram Diuus Kempensis: Modicum quandoque est quod gratiam impedit & abscondit: si tamen modicum, & non potius grande dici debeat quod tantum bonum prohibet. Et si hoc ipsum grande vel modicum amoueris, & perfecte viceris, erit quod petisti.

Efficax certe motiuum cum gratia vt quod inordinatum in te sentis, ordines & componas. Nimis enim infame est, tantillum illud quod inordinate diligis sic æstimare & colere, vt præ illo, pacem, unionem cum Deo, visionem eius, & innumera inde consequentia bona, tam magna tam certa & tantopere desideranda contempnas! Hoc est enim contemnere non modo Diuina illa bona sed & ipsum bonorum Largitorem, cum vtrò ponis obicem bonis illis recipiendis: *Aut vnum sustinebit, & alterum contemnet*, dicit Dominus de duobus quæ simul non conueniunt. *At va qui spernis! Nonne & ipse sperneris?* cum fatigatus desieris contemnere, contemneris. Certe & si alia deessent omnia, vel hoc vno patebit malitia tui affectus, si postquam visum est quanto te bono priuet & quantum insit mali ac damni, adhuc retinetur. *Ephraim, quid mihi vltra Idola?* Nempe ille affectus, Idolum est Zeli de quo alius Propheta, & de quo Deus præcipue queritur, quasi sibi per affectus illos opponerentur æmuli ad prouocandum Zelum quo nos diligit, & quo dolet se non ita pure & vnice à nobis diligi. *Post Idola enim cor eorum gradiebatur!* **EMVNDATE** manus peccatores, & purificate corda, duplices animo. Vtinam in nobis fiat quod dicebat Dauid, *Auferes spiritum eorum & deficient, & in puluerem suum reuertentur. Emitteres spiritum tuum & creabuntur.* Non enim receptaculum spiritus sancti quisquam efficitur, nisi spiritu suo primitus euacuetur, ait S. Gregorius.

Osee 14.
Ezech. 8.

Ibid. 20.
Iac. 4.

Pf. 103.

Huic porro Veritati multæ passim quadrant.

Qui nimis suos diligit, non satis diligit.

In 2. parte, Feria 3. hebdomada sanctæ.

Minima quæuis inordinatio cordis immundi, maior est quâuis inordinatione huius mundi.

In 2. parte, Feria 6. hebdom. 1. post octauam Pascha.

Si nec in ipso cælesti gustu sistendum est, longe mi-

Inordinata quævis affectio, licet paruum mala, non, Ec. 621
nus in sensuali.

In 4. parte, Feria 5. hebd. 15.

Vide Verbo *affectio*.

Cum venerit ille, arguet mundum.

Si quis argui & corripì noluerit, hoc ipso magis est arguendus & corripiendus.

In 4. parte, Feria 4. hebd. 16.

Quod nos magis lætificat, hoc magis contristat Spiritum sanctum.

In 2. parte, in die Pentecostes.

Sanitas non erit tibi : tibi nil proderit Spiritus sanctus : quod grauius in te est malum, hoc est quod ille magis, hoc est quod minus velles sanari.

In 1. parte, Feria 5. hebdomada 6. post Epiphaniam.

ARGVET mundum de peccato, quia non crediderunt in me.

Nullus est Christianus qui non verè credat Christum esse filium Dei : Et vix vllus est Christianus qui hoc verè credat.

In 3. parte, in festo Transfigurationis Domini.

Si quid videtur difficile quod dixit Christus, hoc ipso redditur facile, quòd Christus dixit.

In 3. parte, Feria 5. hebd. 5. Pentec.

Vide sequentem Feriam, & alias passim de fide obuías.

ARGVET mundum de iustitia, quia ad Patrem vado, Et iam non videbitis me.

Id est, arguet mundum qui meam vitam & doctrinam arguit & condemnauit quasi fallacem & deceptricem, quasi ipse mundus me esset iustior & sanctior : quasi melius sentiret de pietate, de bonis moribus, & de his quæ hoc generali *Iustitia* nomine bo-

na solēt intelligi. In hoc enim vel maxime Mundus errauit, quod Christi Domini iustitiam, id est, sinceram vitam & doctrinam repudiarit, suamque falsam & oppositam supposuerit tamquam veriore. Qua de iustitia & veritate sanctitatis Spiritus sanctus arguet mundum per Apostolos, & conuincet erroris ac falsitatis; *Quia*, inquit Dominus, *ad Patrem vado*, quia cælos repeto recipiendus à Patre meo & cum eo regnaturus, hoc enim est certissimum meæ iustitiæ & iustificationis argumentum; hæc est euidentissima demonstratio sinceræ Vitæ ac Doctrinæ. Nam quos Deus in cælo recipit & remunerat, sunt iusti & sancti. Sed me Deus pater suscipiet, & quæcumque feci ac dixi, tum ipse in cælo probabit & remunerabit in æternum, tum Spiritus sanctus suis admirandis effectis confirmabit in terra. Ergo ipse sanctus & iustus sum: Ergo impius & iniustus mundus est, qui mea condemnata sanctitate & iustitia, suam falsam substituit. *Ire ad Patrem*, inquit sanctus Chrysostomus, *argumentum fuit, quod irreprehensibilem vitam egisset, ne possimus dicere, peccator est, & non est ex Deo.*

Hæc est huius loci faciliior interpretatio, cui possunt congruentes hæc Veritates aptari.

Nemo Christianus Christi iudicio condemnabitur, nisi qui prius suo Christum iudicio condemnauerit.

In 1. parte. Dominica 1. Aduentus.

Si quid nos reuocat à Doctrina Christi, vel ob id maxime recipienda est.

In 1. parte, Feria 6. hebdom. 2. post Epiphaniam.

Nemo sui boni vel mali bonus iudex.

In 3. parte, Feria 3. hebdom. 14.

ARGVET mundum de iudicio, quia Princeps huius mundi iam indicatus est.

Id est, ostendet & conuincet mundum, nisi respiscat, esse iudicandum & condemnandum, quia Diabolus qui tamquam Princeps mundi mundanis dominatur, iam condemnatus est, & pænis addictus æternis: sed mundus qui se illi conformat,

eiusque superbiam imitatur, mea humilitate contemptâ, pari pœna est dignus. Sic ergo etiam iudicabitur & condemnabitur. Sic apparebit euidenter mundum esse perituum & damnandam. Sic confirmant hæc Veritates.

Non minus formidandum mundano præsepe Christi nascentis, quàm Tribunal iudicantis.

In 1. parte. Dominica 1. Aduentus.

Qui nimis humana timet iudicia, non satis reueretur diuina.

In 1. parte, Feria 4. hebdomadae. 6. post Epiphaniam.

Qui se Christi exemplo non humiliat, exemplo dæmonis humiliabitur.

In 2. parte, Feria 4. post Septuagesimam.

Superbo maximè formidandum, Diuini Tribunal Iudicij.

In 3. parte, Feria 5. hebdomadae. 12.

Illud mundanis præcipuè tremendum est Christi verbum: In peccato vestro moriemini.

In 4. parte, Feria 5. hebdomadae. 15.

Ad illa quæ supersunt ex Euangelio, vide Dominicam quæ est infra octauam Ascensionis, & Diem Pentecostes.



HAC HEBDOMADA, quæ supersunt proprietates Charitatis, applicantur celeberrimæ illi Apparitioni quæ facta est in Galilæa, seu postremis verbis illic à Christo prolatis.

FERIA SECVNDA.

APPARET QVINGENTIS DOMINVS,

624 Feria 2. Hebd. 4. post Oct. Pasche. Videntes eum, adorant.

IN MONTE GALILAEAE:
VBI ET APPARET CHARITAS
quæ omnia credit.

*Abierunt in Galileam, in montem ubi constituerat
illis Iesus.*

Et videntes eum, adorauerunt. Matth. 28.

VERITAS PRACTICA.


Non est prius intelligendum vt credas, sed primò credendum est vt post intelligas.

RATIO est, quia premium non datur ante meritum.

*Sed intelligentia mysteriorum fidei seu rerum credendarum, est
premium ipsius fidei.*

*Ergo non est prior intelligentia quam fides: nec prius intelligendum
est vt credas, sed potius ante credendum est, vt post intelligas:
quod tamen paucis est vsitatum.*

I. PUNCTVM.

 **E**LEBERRIMA est hæc apparitio & singulariter à Christo Domino denuntiata priusquam fieret. *Eant, inquit, in Galileam, ibi me videbunt.* Eò igitur abierunt in montem ubi constituit illis Iesus; primò quidem vndecim Apostoli, vt ait sanctus Matthæus, tùm cæteri omnes Discipuli siue Credentes, qui numero plusquam quingenti conuenerunt, sic referente Apostolo, *visus est plusquam quingentis fratribus simul.* Ex his autem aliqui dubitasse dicuntur nùm qui scilicet in monte appareret, esset Christus; tùm vero cùm illum viderunt insolito quodam fulgore resplendentem, sibi que propius accedentem, & loquentem, non est dubium quàm omnes crediderint & Eum adorarint. Cum enim eorum testimonium producat Apostolus in confirmationem fidei, quomodo testes essent nisi credidissent?

Non est prius intelligendum ut credas, sed primo, &c. 625

differt? *Tunc manifestius*, inquit sanctus Hieronymus, *ostendit latus lancea vulneratum, & manus fixas clavis.*

Sic autem omnes affecti sunt aspectu & auditu loquentis Christi, ut credentes magis dilexerint, & diligentes magis crediderint. Præcessit fides dilectionem, sed dilectio multum auxit fidem; quando enim diligimus aliquem à quo vicissim nos putamus diligi, tum facilius ei credimus, nec ab eo nos decipi posse cogitamus. *Et nos cognouimus*, inquit dilectus Discipulus, *& credidimus Charitati quam habet Deus in nobis.* Itane diligis? Itane credis omnia? 1. Ioan. 4.

Hoc præcipue circa fidem tuam examinandum, an sit firma & integra, an sit vniuersim de omnibus; nam si vel vnus deesset articulus cui non æque crederes atque aliis, tum plane nulla esset fides. Hic enim vel maxime locum habet sancti Iacobi dictum, *qui offendit in vno, factus est omnium reus: Et quia*, ut ait Aposto- Iac. 2. lus, *multi languent circa questiones & pugnas verborum*, volentes 1. Tim. 6. prius intelligere quam credere; Idcirco contra proponitur Veritas modo expendenda, *Non prius intelligendum est ut credas, sed potius primò credendum, ut post intelligas.*

Ratio est multiplex, sed illa est certior quæ petitur à natura fidei, & ab ordinatione Diuina sic singula disponente, ut vel simpliciter credamus sine vlla clara intelligentia rerum creditarum: *in captiuitatem redigentes omnem intellectum in obsequium Christi*: vel si quid velit nos intelligere, non id nostra industria, non humano captu & labore putemus comparandum, sed à Deo expectemus tamquam singulare Dei donum, vel tamquam fidei nostræ præmium. Quæ quidem ratio ut esset euidentior, præmittendum fuit quod per se est satis clarum, non dari præmium ante meritum, non dari mercedem laborantibus in vinea, nisi cum sero factum est: non accipi brauium nisi post cursum in stadio: non denique quemquam coronari nisi qui legitime certaue- Matth. 20. rit: vnde Apostolus, *laborantem agricolam oportet primum de fru-* 1. Cor. 9. *tibus percipere*, id est, si vult fructus percipere, oportet prius laborare: quasi diceret, quod videmus in natura, hoc fit in gratia, ut sicut terra non dat fructum nisi post laborem, ita nec cælum aut ipse Deus non soleat ea impertiri dona quæ per modum præmij solet dare, nisi post meritum. Atque hinc à regio Psalte dictum est: *Vniuersa via Domini misericordia & veritas*, quod san- Ps. 24.

626 FERIA 2. Hebd. 4. post Oct. Pasc. Videntes eum, adorauerunt.

1. p. 7. 21.
2. 4.

Apo. 12.

Etus Thomas exponens ait, sic in omnibus Dei operibus reperiri bonitatem & iustitiam Dei, ut sicut præcedit Bonitas, sic sequatur Iustitia; præuenit hominem diuina bonitas suis gratiis, quibus, prout homo bene vel male utitur, tum Iustitia præmium vel poenam ordinat. *Ecce venio ad te, & merces mea mecum est, reddere unicuique secundum opera sua.* Nonne credis sic redditurum operibus Dominum quod merentur? At quomodo reddet nisi præcedant opera? sequuntur quidem morientes, sed non sequuntur nisi præcesserint in viuentibus cum Diuina gratia.

II. PUNCTVM.

SED intelligentia mysteriorum fidei seu rerum credendarum est præmium ipsius fidei, diu multumque exercita.

Feria sexta
post Pasc.
In Ps. 118.

Iam supra id fuisse probatum est ex sancto Augustino qui tam multus est in hac materia, ut hæc præterea subministret: *Si non intelligis, crede: Intellectus est enim merces fidei: ergo noli querere intelligere ut credas, sed crede ut intelligas.* Et rursum, in illud Isaïæ, *nisi credideritis non intelligetis; FIDES debet præcedere intellectum ut sit intellectus fidei præmium: fides enim illuc peruenit quod intelligentia naturalis non attingit.* Itemque alibi, quod de visione habet, idem de intelligentia intelligendum est: *Meritum, inquit, visionis, fides est: merces fidei visio est, quid quæris ante opus mercedem?*

De Publ.
& Phar.

Cui conformiter sanctus Gregorius: *Contemplatio Dei est merces fidei, cui mercedi recipienda, per fidem corda mundantur sicut scriptum est, fide mundans corda eorum.* Quibus adde pium Kempensem: *subdere Deo, & humilia sensum tuum fidei, & dabitur tibi scientia lumen, prout fuerit tibi utile ac necessarium; quasi diceret, non ad curiositatem & vanitatem sicut appeteres, sed ad utilitatem, ad pietatem & profectum.*

III. PUNCTVM.

NON est ergo prius intelligendum ut credas, sed primò credendum est ut post intelligas: Quia videlicet non est optanda merces ante meritum; & cum instar mercedis & præmij quod meretur fides, detur intelligentia; certe tam certo debet præcedere fides intelligentiam, quam præcedunt merita præmium. *Operamini*

Eccl. 1. 1.

Non est prius intelligendum ut credas, sed primo, &c. 627

opus vestrum ante tempus, & dabit vobis mercedem vestram in tempore suo, inquit Sapiens. Quod si quæras cum Iudæis, quid faciemus ut operemur opera Dei, respondebit tibi quod illis Dominus: Hoc est opus Dei ut credas in Eum quem misit Ille. Vix ipsi credis ^{Ioan. 6.} Christo; & toties monenti de te abnegando, de Cruce terenda quotidie, de puerili seruanda innocentia, de malo potius suffere-
rendo quàm inferendo, deque aliis similibus ad salutem & profectum tuum spectantibus, cum simpliciter deberes credere & credendo exequi quod præcipitur; tu mauis semper inquirere quomodo hæc & illa sint intelligenda, vnde fit ut neque credas neq; intelligas, neque te Christo conformes; atq; ita ipse aiebat, *verumtamen filius hominis veniens, putas inueniet fidem in terra?* ^{Luc. 18.}
Recte enim sanctus Gregorius: *fidei nostra veritatem in vita nostra consideratione debemus agnoscere*: Vnde si vita nostra tam longè à ^{Hom. 29.} Christi præceptis vel consiliis distat, quomodo dicemur eis credere, nisi quo ait modo Apostolus, *ore consentientur, factis autem negant*! CERTA bonum certamen fidei. Vide in quibus; vt, quod ^{Tit. 1.} idem ait, *milites in illis bonam militiam, habens fidem & bonam con-* ^{1. Tim. 3.} *scientiam, quam quidam repellentes circa fidem naufragauerunt.* ^{Ibid. 1.} Ah quale naufragium! quam multi iam in sæculo sic naufragantes! quale periculum, ne vel eos inde eripias, vel ab illis rapiaris; nec magis credas Christo pauperi, quàm diues huius sæculi!

Vide suprà in hac parte, Feria 6. post Pascha.



FERIA TERTIA.

DE POTESTATE QUAM SIBI

CHRISTVS DATAM DICIT, VNDE EST

ILLA CHARITAS quæ omnia sperat.

Data est mihi omnis potestas in cælo & in terra.

Matth. 28.

VERITAS PRACTICA.

Vera Fiducia Confidenti numquam infida.

RATIO EST, Quia numquam infida est fiducia, si quod confidit se obtenturam, semper obtineat.

Sed vera fiducia semper obtinet quod confidit se obtenturam.

Ergo numquam est infida: ac proinde quenam sit illa vera fiducia, diligenter indagandum, ut in praxi sic confidamus.

I. PUNCTVM.

CVM in illo monte Galilææ, quò quingenti Fideles conuenerant, conspiciendum se præbuit Dominus, primò quidem putatur sublimis fuisse in aëre, insolita quadam refulgens forma, ut sic liberius videretur & adoraretur ab omnibus. Tum vero factum est quod narrat Euangelista: *Et accedens Iesus locutus est eis*, id est, è sublimi descendens, & ex plano loquens, dixit: *Data est mihi omnis potestas in cælo, & in terra.* Quod idcirco dixit ut eos excitaret ad habendam in se fiduciam. Cum enim proximè discessurus esset ab eis, multaque passuri essent in mundo, à Iudæis & ab aliis, qui se prædicationi Euangelicæ opponerent: ne diffiderent animis neue turbarentur, confirmat illos, affirmans se omnem habere in cælo & in terra potestatem, ac proinde certo confiderent nihil ipsi euenturum quod non permetteret, neque quidquam permissurum quod non illis expediret: quo certe dicto minime dubium est, quin valde excitata in omnibus fuerit Charitas erga Eum, qui se ipsis tam beneuolum & tam bene affectum demonstrarat. Deinde vero cum tali beneuolentiæ viderent summam esse adiunctam potestatem, quid est quod non in eo vere sperarent, verè confiderent, & verè dicerent: *Dominus mihi adiutor, non timebo quid faciat mihi homo?*

Ps. 117.

Hebr. 13.

Hanc ut fiduciam verius discamus & exerceamus, sic formata est Veritas quæ modo expendatur, *Vera fiducia confidenti numquam infida*, seu quod idem est, Confidentem numquam confundit nec decipit. Et ratio est, quia sicut hoc esse infidum dicitur, quando quid decipit & quando aliter euenit ac speratur: sic à

contrario si quod fiducia confidit se obtenturam, illud obtinet, profecto non erit infida, sed fidelis. Hoc est enim quod præcipue in fiducia expetitur ut sit firma & certa, non inconstans & labilis: nam cum sit vitæ sustentaculum, seu animi firmamentum in aduersis, nisi firmitas & stabilitas quædam esset, non esset firmamentum aut sustentaculum. Vnde spes comparatur anchoræ; Atque ut etiam nullo modo spes nostra vacillaret, mirum quod ait Apostolus, Deum nobis promittentem aliquid non solo verbo, *Hebr. 6.* quod certe sufficebat ad certitudinem promissionis, sed & iureiurando interposito verbum suum confirmasse. *In quo abundantius,* inquit, *volens Deus ostendere pollicitationis hæc edibus, immobilitatem consilij sui, interposuit iusiurandum, ut per duas res immobiles quibus impossibile est mentiri Deum, fortissimum solatium habeamus, qui confugimus ad tenendam propositam spem, quam sicut anchoram habemus anima tutam ac firmam, & incedentem usque ad interiora velaminis, ubi præcursor pro nobis introiuit Iesus. O qualis animorum tranquillitas in tam firma fiducia! ô qualis stimulus ad hanc firmam fiduciam conquiendam, quod sic tranquillat animos!*

II. PVNCTVM.

SED vera fiducia semper obtinet quod se confidit obtenturam.

Quid est enim quod confidit se obtenturam? Non est hoc, aut illud aliquid in particulari: Nam licet aliquando sic confidat se habituram quod determinatè petit à Domino, ut sanitatem, incolumitatem & alia quædam; non id tamen certò semper obtinet, neque id necessarium est ad firmam & veram fiduciam ut illa particularia bona quæ petit, obtineat; neque in eo sita est fiducia ut confidat se illa obtenturam. Licet illa petat & postulet confidenter; neque enim sæpe expedit ut illa possideamus quæ possidenda optantur. Alia sunt Dei iudicia & consilia quæ nos sæpe latent. Vnde apte sanctus Augustinus: *Exauditur Diabolus, & non exauditur Apostolus: petierunt Damones se ire in porcos, & concessum est: petiit Diabolus Iob tentandum & accepit. Non est autem exauditus Apostolus, qui ter rogauit Dominum. Exaudiuit eum quem disponebat damnare, & non exaudiuit eum quem volebat sanare. Nam ager petit multa à Medico: non dat medicus,*

In Ps. 137.

2. Cor. 12.

630 FERIA 3. Hebd. 4. post Oct. Pasc. Data est mihi omnis, &c.

non exaudit ad voluntatem ut exaudiat ad sanitatem. Non deerat Apostolo fiducia; neque Apostoli fiduciæ defuit Dominus: sed Apostoli fiducia non erat, quod confideret se obtenturum quod determinate rogabat, nempe liberationem stimuli carnis. Quid ergo erat? quid sperabat? quid confidebat? & in quo tandem vera fiducia?

Nempe quod dixit Dominus: *sufficit tibi gratia mea, nam virtus in infirmitate perficitur*. Id est, sufficit tibi, te non deferi à me, sufficit tibi quidquid de te ordinauero, Ego scio quid sit tibi melius, Confide mihi, quia volo & possum tibi illud dare. Ecce fiduciam Christianam, ecce veram confidentiam; Nempe quod Christus ita sit bonus & potens ut quidquid viderit expedire ad maiorem Dei gloriam, & maius meum bonum, id mihi possit & velit prouidere, ac propterea quidquid post orationem meam acciderit, id putare melius & salubrius: *Deo pro nobis melius aliquid prouidente*, inquit Apostolus. Hoc est quod vera fiducia se confidit obtenturam, & hoc quod semper obtinet; tum quia
Hebr. II.
1. Tim. 2. numquam fallit Christus in quo confidimus; *Ille fidelis permanet, negare seipsum non potest*: tum quia, ut dictum est, non aliud fiducia confiderat se obtinere quàm quod Christus vellet, quàm quod permetteret, quàm quod reipsa eueniret; proindeque quæ ratione illud habet quod ipsi accidit, eadem plane habet & obtinet quod confidebat se habituram.

Hæc est fiducia quam habemus ad eum: quia quodcumque petierimus secundum voluntatem eius, audit nos, inquit dilectus Discipulus. Tum addit: *& scimus quia audit nos quidquid petierimus, quoniam habemus petitiones quas postulamus ab eo*. Quæ verba duplicem habent sensum, primo quasi diceret, idcirco scimus quod audit nos, quia id obtinemus quod petimus; vel secundo, idcirco id omne obtinemus quod optamus & petimus, quia nihil optamus & petimus quàm quod velit nos habere; hoc pro certo habentes id fore melius quam quod aliud petieramus. *Non quod ego volo, sed quod Tu*. Itane oras? Itane tantum oras!
3. Ioan. 5.
Matth. 14.

III. PUNCTVM.

VERA ergo fiducia Confidenti numquam infida; quia semper id obtinet quod confidit se obtenturam; & sicut in eo vera

esse discernitur à falsa quadam fiducia, quod nihil velit aut speret melius quam quod Deus prouiderit, *cuius prouidentia in sui dispositione non fallitur*: sic verè in omni euentu gaudet & lætatur, perinde ac si illud determinatè petiisset, quia non petiit nisi bonum suum, & hoc esse bonum suum reputat, & melius bonum quod Christus tale iudicavit & immiserit. *Vnus est bonus, Deus*: & *Math. 19.* vnum est bonum quod Deus tale iudicat, & nobis ordinat. *Fac cum seruo tuo secundum misericordiam tuam.* Hoc vnum mihi præstet: hoc vnum volo, dicebat ille qui in spe & fiducia ira excelsit ut propterea singulariter à Deo dilectus & protectus fuerit. Hæc est *spes qua sperantem non confundit, quia Charitas Dei diffusa est in cordibus nostris per spiritum sanctum qui datus est nobis*: *Rom. 15.* quasi diceret, ut interpretatur sanctus Augustinus, quomodo nos ille falleret cuius tale pignus accepimus: vel sic, Idcirco Spes non confundit, quia Charitas nos ea tantum desiderare & sperare facit quæ Deus nobis dare velit; atque in his sperandis non confundimur, quia non aliud expectamus quàm quod dare velit Deus; & quidquid dederit, hoc est quod expectamus; hoc semper habemus quod petimus, quia nō aliud petimus quàm quod habemus.

Hoc vnum itaque semper, nec aliud sentiamus, hoc loquamur, hoc profiteamur, & ut ait Apostolus, *hanc teneamus spei nostre Confessionem indeclinabilem: fidelis enim est qui repromisit.* Vnde sic egregie sanctus Augustinus: *plane cum patientia salutem expecta: quibus te medicamentis curet, ille nouit, quibus sectionibus, quibus vstonibus, ille nouit. Tu tibi agritudinem comparasti peccando, ille venit non solum fouere, sed & secare & vrere. Non vides quanta homines patiantur, sub medicorum manibus, spem incertam homini promittentium! Sanaberis, dicit medicus, sanaberis si secuero. Et homo dicit, & homini dicit: Nec qui dicit certus est, nec qui audit, quia ille dicit homini qui non fecit hominem, & non perfecte scit quid agatur in homine: & tamen ad verba hominis plus prescientis quid agatur in homine credit homo, subdit membra, ligari se patitur, aut plerumque etiam non ligatus secatur & vritur, & accipit forte salutem paucorum dierum, iam sanatus quando moriatur ignorans, & fortasse dum curatur moritur, & fortasse curari non poterit. Cui autem promisit Deus aliquid & sefellit?*

Qui confidunt in illo, intelligent veritatem.

Sap. 31

Vide in 3. parte, Fer. 3. hebdomadæ 7.



FERIA QVARTA.
DE INTEGRA OBSERVATIONE
MANDATORVM, QVAM CHRISTVS
SVIS COMMENDAT;
ET DE ILLA CHARITATE QVAE IDCIRCO
omnia suffert & omnia sustinet.

*Euntes ergo docete omnes gentes, baptizantes eos in
nomine Patris, & Filij, & Spiritus sancti, do-
centes eos seruare omnia quaecumque mandavi
vobis. Matth. 28.*


VERITAS PRACTICA.

*Aut nulla aut tota est Charitas in agendis, sicut Fides in
credendis.*

*RATIO est, quia idcirco nulla est fides aut tota est in credendis
omnibus, quod alioquin violaretur autoritas Christi reuelantis.
Sed nisi esset tota Charitas in agendis omnibus, aequè violaretur
Christi mandantis Autoritas, quæ non est minor quàm eius-
dem reuelantis.*

*Ergo aut nulla aut tota est Charitas in agendis, sicut fides in cre-
dendis. Quod certe mirum.*

I. P V N C T V M.

ONSIDERANDVM monent Interpretes præcla-
rum illum ordinem quem hic obseruat, & suis sequen-
dum præscribit Dominus, in conuertendis ad fidem ho-
minibus

Aut nulla, aut tota est Charitas in agendis, sicut fides, &c. 633

minibus. Primò quidem docendi sunt vniuersim de credendis & agendis. *Euntes, inquit, docete omnes gentes.* Deinde fidei sacramentis sunt imbuendi, *Baptizantes eos in nomine Patris & Filij & Spiritus sancti.* Denique sigillatim ad omnia obseruanda sunt instruendi; *docentes eos seruare omnia quaecumque mandati vobis.*

Sic ipse Christus Dominus habebat in mandatis facere & docere omnia quæ fecit & docuit; *opera enim, inquit, quæ dedit mihi* Ioan. 5.
Pater vt perficiam ea, ipsa opera quæ ego facio, testimonium perhibent
de me; Et rursus: *qui misit me pater, ipse mihi mandatum dedit quid* Ibid. 12.
dicam & quid loquar. Nec dubium quin etiam Apostoli non modo docuerint sic perfectè omnia obseruanda, sed etiam ipsi religiosissime obseruarint, & tam exemplo quàm verbo nobis præiuerint; *facti forma gregis ex animo,* vt ait sanctus Petrus; quo quidem in Apostolico munere quanta sint passi, paululum recale,
& conclude nùm æque nobis sit agendum & patiendum in nostra uocatione quod illi in sua; cùm idem sit nobis Dominus, eadem sint præcepta, eadem merces, & poena proposita; *Quod vobis dico, omnibus dico,* dicebat omnium Dominus. 1. Pet. 5. Marci 13.

Certe nemo Christianus dubitet quin æque teneatur omnia credere, atque ad credendum omnem sibi vim facere, sicut tenebantur Apostoli: cur autem non sic ad agendum & patiendum in nostro vitæ gradu ac genere, sicut in suo quouis alij? Non enim minùs vniuersim obligat vera Charitas, quam vera fides: nec minus certa Veritas quæ iam proponitur expendenda de Charitate, *Quod nulla est aut tota est in agendis & patiendis, quàm de fide in credendis.* Eadem plane est vtriusque ratio, idem motiuum, idem declarandi modus: Nempe alioquin violaretur Diuina Christi autoritas si ex multis quæ credenda proposuit, non omnia crederentur: violatâ vero Diuina autoritate, intereat fides necesse est, quæ illi velut motiuo proprio debet inniti: quia dixit, quia reuelauit, quia est Veritas prima quæ nec falli potest nec fallere. 2. 2. q. 1. c. 1.

Quantumcumque iuret hæreticus se fide Diuina credere Trinitatem, nec tamen credat Sacro-sanctam Eucharistiam, falsò iurat, nec verè credit sed opinatur: nam sicut nemo credit aliquid fide Diuina nisi propter Diuinam Autoritatem: sic quæcumque credenda sunt per illam autoritatem, omnino credit, quandoquidem idem est motiuum credendi: aut si quid creden-

dorum non credit, neque illud quod se putat credere, credet propter Deum, sed propter aliquid aliud; ac proinde omnino non credet Diuina fide, sed sensu quodam humano qui vel intellectus vel scientia vel opinio dicitur; at nullo modo fides Diuina. *Sicut si aliquis teneat mente aliquam conclusionem*, inquit sanctus Thomas, *non cognoscens medium illius demonstrationis, manifestum est quod non habet eius scientiam sed opinionem solum*. Ita plane de hæretico vel quouis Christiano qui vel vni articulo fidem abrogarit, nullum credit, quia recessit à motiuo credendi cui dum inhæretur, sicut creduntur omnia: sic dum ab eo disceditur, nihil prorsus creditur, perit omnino Fides. O qualis iactura! quàm communis! quàm pene vniuersalis! *Domine quis credidit auditui nostro!* vix iam Ecclesiæ, vix Euangelio creditur. *Vosmetipsos tentate si estis in fide, ipsi vos probate*. An credis purgatorium sicut infernum! an obedis Ecclesiæ, sicut scripturæ!

11. 53.
Rom. 19.

1. Cor. 13.

II. PUNCTVM.

SED nisi esset tota Charitas in agendis, aque violaretur Christi mandantis autoritas qua non est minor quam eiusdem reuelantis.

Multa hic distinctè & singillatim explananda. Primò, quænam sit illa Christi mandantis Autoritas, nempe illud Diuinum Dominium & ius absolutissimum quo potest nobis mandare seu præcipere aliquid faciendum vel non faciendum, ac punire delinquentes. *Vos vocatis me, Magister & Domine, & bene dicitis, sum etenim*.

Ioan. 13.

Secundo, quod illa Christi præcipientis autoritas non est minoris ponderis ad obligandam voluntatem, vt velit exequi quod mandatur, quàm eiusdem Christi autoritas reuelantis aliquid quod credatur, ad obligandum intellectum vt credat; *Vnus Dominus Iesus Christus per quem omnia*, inquit Apostolus: Et rursum, *Vnus Dominus, vna fides, vnum baptisma*: Quasi diceret, vnus & idem est in ordinandis articulis fidei, & in condendis Sacramentis & in aliis suis præceptis.

1. Cor. 8.

Ephes. 4.

Tertio, sicut est Fidei credere propter Christum aut Deum reuelantem, ita & Charitatis agere quæcumque mandata sunt propter ipsummet mandantem. *Si diligitis me, mandata mea seruate*. *Qui habet mandata mea & seruat ea, ille est qui diligit me*.

Ioan. 14.

Ibid.

'Aut nulla,' aut tota est Charitas in agendis, sicut fides, &c. 356

Quarto, Quod dicitur, *nisi sit tota Charitas in agendis*, perinde est ac si diceretur, nisi homo ex Charitate sit ita formatus & affectus ut velit omnia prorsus facere, dicatque cum minore Tobia, *omnia quaecumque praecepisti mihi faciam, pater.*

Tob. 4.

Quinto, quod est præcipuum in hac secunda propositione declarandum, eodem planè modo per vnum defectum Charitatis violatur Authoritas Dei mandantis, ac violatur eiusdem reuelantis authoritas, per vnum defectum fidei. Sicut enim idcirco Dei reuelantis authoritas violatur ab eo qui vnum negat articulum, quod propter illam ipsam authoritatem qua credebantur alij articuli, debebat & is qui negatur credi; sic plane authoritas Dei mandantis violatur ab eo qui vnum prætermittit præceptum, quia perinde apud ipsum, ut seruaretur tale præceptum quod prætermisum est, valere debebat hæc authoritas sicut valuit in aliis quæ seruauit præceptis; unde quod non ita vniuersim valuerit in agendo, tam verè læsa est & violata Christi authoritas ex illo defectu Charitatis, quàm læsam fuisse diximus ex vno defectu fidei.

Sic expressè sanctus Iacobus: *Quicumque totam legem seruauerit, offendat autem in vno, factus est omnium reus: id est, nihil illi prodest quod alia legis seruauerit cum per vnam offensam ita offenderit Deum, ut omnis eius authoritas offensa fuerit: sic nempe pergit sanctus Apostolus, qui enim dixit, non mæchaberis, dixit, & non occides. Quod si non mæchaberis, occides autem, factus es transgressor legis; Quali diceret, cum sit vna & eadem eius authoritas qui vnum vetuit, atque aliud; plane sequitur ut in quolibet eorum infracto quæ vetuit, tota eius infringatur authoritas.*

Iac. 2.

Hinc ipse Dominus non modo legem suam violari queritur per transgressores totius legis, sed seipsum Deum, seipsum Dominum violari affirmat, per vnum particulare delictum, quantumque forte hominibus exiguum videretur; *Et violabant me ad populum meum, propter pugillum hordei, & fragmen panis.* O si nosset Illum quem violas? sed tamen satis Eum noiti, ne villo modo violes.

Ezech. 132.

III. PUNCTVM.

AUT nulla est igitur aut tota est Charitas in agendis, sicut fides in credendis; quia non est minor obligatio voluntatis ad volendum ex Charitate quidquid Deus pro suo in homines iure mandat, quam intellectus ad credendum ex fide quidquid reuelat; unde si ab intellectu sic tota requiritur fides ad omnes vniuersim credendos articulos quando proponuntur, ut si desit vni non credendo, tota desit fides, & nulla plane sit: ita omnino à voluntate sic tota exigitur Charitas ad omnia integre obseruanda, ut si vni obseruando desit, tota desit Charitas, & nulla prorsus sit non modo in habitu sed in actu. *Cognoui vos*, dicit Dominus, *quia dilectionem Dei non habetis in vobis*. Apte etiam Saluianus: *si pro arbitrio suo serui Dominis obtemperant, ne in iis quidem in quibus obtemperauerint obsequuntur. Quando enim seruus ex Domini iussis ea facit tantummodo quæ vult facere, iam non Dominicam voluntatem implet, sed suam.*

Ioh. 5.

l. I. de Pro

15. 1.

2. Ioh. 2.

Et quidem quod vno solo mortali, tota intereat habitualis Caritas, nulli vmquam dubiū fuit: quod vero actualis etiam pereat, sic facile intelligi potest, ut quamdiu quis in mortali est, nihil ex Caritate faciat, nihil propter Deū operetur, nisi prius resipiscat, atque in gratiam cum ipso redeat. *Vade prius reconciliari. LAVAMINI, mundi estote, & venite.* Saluiani vero dictum quod est in praxi frequentius, sic expendi potest, & vrgeri; si qui nollent, qui certe multi sunt, si qui nollent inquam furari, mœchari, occidere, aut grauiora legis violare, ne scilicet Deū offendant quem colunt & diligunt, nec tamen vereretur detrahare, aut immūdis immorari cogitationibus, non illi Deū colunt, non illum diligunt vllō modo, non possunt dici propter Deum non furari aut non mœchari, nulla prorsus in eis Caritas, quæ tota periit vel in detractione, vel in immunda cogitatione, aut alio simili quouis peccato: *Si quis diligit mundum, non est Charitas Patris in eo*: Quod sæpe etiam in venialibus accidit, ut cum quis propter Deum ab omnibus culpis abstinere paratus est, præter vnā; à nullis ipse abstinet propter Deum, nulla est eius Charitas in euitandis culpis: non propter Deum vetantem, illas euitat; nam & hanc vnā quam excludit euitaret, cum perinde ac alias esse à Deo vetitam non ignoret.

Non propter Labanū socerum, Iacob diligebat Rachelē con- Gen. 29.
jugem, quia sic dilexisset Liam quæ erat Labani filia, sicut Ra-
chel. Nec propter Iacobum patrem, filij eius diligebant fratrem
suum Benjaminum, quia sic dilexissent fratrem suum Iosephum, Ibid. 44.
qui non minus erat patri carus quàm Benjaminus. Sic plane ne
tibi palpes, quod diligas aliquid propter Deum, si non id omne
diligis quod diligit; ne tibi persuadeas te amare iustitiam amore
Dei, quod nulli velles facere iniuriam, nisi sic ames veritatem
& castitatem ut nullum prorsus mentiri velis mendacium, nec
vllum contra puritatem cordis nūum admittere; nam si Deus
amat iustitiam, amat & veritatem, amat & Castimoniam; &
qui vetuit iniustitiam, vetuit mendacium & omnem immun-
ditiam. *Præteritis iudicium & Charitatem Dei. Hæc autem oportuit* Luc. 11.
facere, & illa non omittere. O quàm multis hæc dicta sunt! O
quàm pauci recogitant! O quale motuum perfectionis in om-
nibus, quod nulla sit Charitas nisi tota; nulla in singulis, nisi tota
in omnibus. *Vigilate, stete in fide, viriliter agite, & confortamini,* 1. Cor. 16.
omnia vestra in Charitate fiant. Vide in 1. parte, in festo Purifica-
tionis, ubi hæc expressa declaratur Veritas:

Qui à lege excludit aliquid, excludit à se totam legem.



FERIA QUINTA.
DE CHARITATE QUÆ NON
EXCIDIT:
ET QUÆ APPARET IN CHRISTO RE-
MANENTE NOBISCUM, SICUT PRO-
MISIT, HIS VERBIS:

*Ecce Ego vobiscum sum, omnibus diebus, usque
ad Consummationem sæculi. Matth. 28.*

VERITAS PRACTICA.

Meliùs erat viam iustitiæ non introisse, quàm retroisse.

RATIO hac est inter alias, quia ubi maior est Dei contemptus, ibi grauius est malum, & hoc melius est euitare quam quod est minus.

Sed maior est Dei contemptus, retroire quam non introire viam iustitiæ.

Ergo melius erat non introisse quàm retroisse. Quod non modo de Apostatis & Desertoribus fidei seu Religionis dicitur: sed de iis etiam qui à via perfectionis & Charitatis quam inierant, excidunt.

I. PUNCTVM.



UÆ postrema sunt Christi Domini ad Discipulos verba, postremam Charitatis proprietatem quàm dicitur non excidere, clare demonstrant. Quid est enim dum à nobis recedit, nobiscum semper esse, nisi eam habere & exercere Charitatem quæ nullo vmquam temporum aut locorum spatio deficiat, sed perinde ac si præsens esset, vt certe Diuinitate numquam aberat, sic Charitate & beneficiis numquam non prosequi, numquam non adesse?

Jeon. 14.

Escc 2.

Cùm autem multi sint modi, quibus vniuersim, Ecclesiam suam, seu in particulari quosque fideles, constantissimè comite-
tur & protegat, tùm vero hic præcipuè considera quàm id fidelissime præstet per Gratiâ seu habitualement & sanctificantem, seu actualement. Etenim vbi semel expulso lethali peccato, nobiscum adest per illam Gratiâ & Charitatem qua sanctificatur anima, & ius acquirit ad hæreditatem coelestem, ita perpetuam & constantem apud nos mansionem facit; vt numquam ex se numquam prorsus discedat, nisi prius à nobis per mortalem culpam expellatur. Sponsabo te mihi in aternũ, inquit Diuinus Sponsus. Ego vero, ait infidelis sponsa, pro tempore aut pro libito.

meo, te admittam aut repellam! obstupeſce ad tantam perfidiam!

Itane verò Sponſus expulſus excidet à Charitate quæ non excidit? *Ecce ego*, inquit ille perſeuerans per gratias ſuas actuales, *Ecce ego ad gentem quæ non inuocabat nomen meum.* Ex- 1ſ. 65. *pandi manus meas tota die ad populum incredulum qui graditur in via non bona, poſt cogitationes ſuas: populus qui ad iracundiam provocat me, ante faciem meam ſemper.* Et rurſum: *Hæc dicit Dominus,* 1er. 31. *invenit gratiam in deſerto populus, & in Charitate perpetua dilexi te, ideo attraxi te miſerans; Quæ de gratiis excitantibus ad Converſionem à peccato dicuntur, & ad feruorem à tepiditate mentis, unde ſatis patet quàm ſit eius firma conſtanſque dilectio. Si quid vero in hac materia potentiffimum requiras, ſive ad plenius cognoscendam hanc Chriſti Domini conſtantiffimam Charitatem, ſive ad noſtram excitandam, omnino vide caput ſecundum & tertium prophetiæ Ieremiæ.*

Atque illud quod refertur, ſic in dies experimur, vt potius cogitandum videatur de defectu & inconstantia noſtræ Charitatis, quæ vix aliquando perfectionis viam ingreditur, & quod peius eſt, ſi ſemel viam introierit, tam facile & turpiter inde reſilit, vt quod ſanctus Petrus de ſui temporis Apoſtatis & De- 2. Pet. 2. ſertoribus fidei, ſcripſit, nimis verè de nobis dictum appareat: *ſi reſugientes, inquit, coinquinationes mundi, in cognitione Domini noſtri & ſaluatoris Ieſu Chriſti, his rursus implicati ſuperantur, facta ſunt eis poſteriora, deteriora prioribus: Melius enim erat illis non cognoscere viam iuſtitia, quàm poſt agnitionem retrorſum conuerſi ab eo quod illis traditum eſt ſancto mandato. Contigit enim eis illud veri prouerbij: Canis reuerſus ad ſuum vomitum: & ſus lota in vo-* Prov. 28: *lutabro luti.*

Quæ quàm ſint grauia & damnofa quis non videt? At verò quàm ſint etiam odioſa Deo, & qualem eius inducant contemptum ac iniuriam, opportunè videtur expendendum, vt propoſita Veritas tanto magis eluceſcat, quanto apparebit clariùs cum illis detrimentis quæ ex tepiditate noſtra proueniunt, coniunctam eſſe ſummam, aut certe maiorem quàm putemus, Dei optimi maximi offenſionem. Hoc eſt enim quod *melius* aut *peius* reuera dicitur, quod eſt maius aut minus malum. Et hoc eſt quod maius aut minus malum dici debet, quod maiorem vel

minorem Dei contemptum & iniuriam parit. Nam cum vniuersim hæc sit præcipua peccati malignitas vt Deum offendar & contemnat: certe quò magis aliquod in particulari peccatum dicetur Deum offendere & contemnere, hoc dicetur etiam quod sit maior iniquitas & malignitas: vnde est illud Scripturæ, *si peccauerit vir in virum, placari ei poterit Deus: si autem in Dominum peccauerit vir, quis orabit pro eo?* Id est, si tantum in peccato esset offensa hominis, non ita graue malum esset peccatum, sed cum sit offensa Dei, hoc est quod illud graue facit, & eò quidem grauius quò maior in peccato inest Dei offensa & contemptus: *Abid.* Ac proinde ibidem Deus: *Quicumque, inquit, glorificauerit me, glorificabo eum: qui autem contemnunt me, erunt ignobiles.*

Quod & Prophetæ Ezechieli manifeste indicauit, cum ei varios peccantium gradus patefecit, inter quos illi semper grauioribus censentur, in quibus maior Dei apparet contemptus, *Ezech. 8.* *Fili hominis, putasne vides tu quid isti faciant, abominationes magnas? & adhuc conuersus videbis abominationes maiores. Ingredere & vide.* Ac rursus iteratis visionibus; *Adhuc conuersus, dixit, videbis abominationes maiores his.*

Ah qui seipsum nosset & videret sicut videtur à Deo, vix se ipse ferret. Et qui sciret quale sit monstrum vel vnum leue peccatum quo Deus spernitur, vix coram Deo stare posset!

II. PUNCTVM.

SED maior est Dei contemptus, retroire: quam non introire viam iustitiæ.

Nam vbi est maior gratia & facultas ad cognoscendum & amandum Deum, ibi est maior Dei contemptus, si nolis eum cognoscere, vel cognitum nolis amare. Cum enim cognitio & amor Dei sint tam pretiosa & Diuina dona, non possunt certe rejici quin magna fiat iniuria non modo donis sed & Donanti, quasi aliquid illo melius & pretiosius inueniri posset. At certe semel ingresso viam iustitiæ maior est data gratia cognoscendi & amandi Dei, quàm non ingresso; aut certe si satis nosset Deum quando aggressus est institutum colendi Dei: cur in ipsa progressu deficit? cur retro agitur? quid est quod illum à Diuino cultu reuocet? Aut aliquid contrà obstat, aut nihil prorsus.

sus. Si nihil obstat quo minus constanter in incepta via progredetur, nonne iniuria Dei est & contemptus, sic leuiter nulla de causa, sed merè gratis eum deferere? Quod si quid obstare dicis, si quid laboriosius, si quid minus iucundi & vtilis quàm putabatur, nonne hoc iniuriosum est Deo, & proximo valde noticiuum qui forsan inde auerteretur? *Quid inuenerunt in me iniquitas*. *Ter. 2.* ait Dominus, *quia elongauerunt à me, & ambulauerunt post vana & vani facti sunt?*

Sicut enim valde gloriosum fuit Salomoni cum Regina Saba *3. Reg. 10.* cognouit & professa est verum esse sermonem quem de illo audierat, & non mediam partem eorum quæ laudanda vidit, fuisse relata; sic plane Religioni & ipsi Deo ignominiosum, cum quis ab eo deficiens cogetur dicere se non inuenisse quietem aut illud bonum quod promittebant Scripturæ. Itane sentire de Deo velles? Sic nauseantes Israelitæ super manna, & Ægyptum recogitantes, Deum grauiter offenderunt: Sic Iudas proditurus Iudæis Christum, illos in maleuolentia & cogitato facinore de eo necando plurimum obfirmavit, cum viderent vnum ex familiaribus sic ab eo deficientem, sicque Domino grauem intulit ignominiam. Sic Paganis sapientibus tamquam grauissimum objicit Apostolus, *quod cum cognouissent Deum, non sicut Deum glorificauerunt aut etiam gratias egerunt*. Itemque Galatis, *Nunc autem, inquit, cum cognoueritis Deum, imò cogniti sitis à Deo, quomodo conuertimini iterum ad infirma & egena elementa, quibus denuo seruire vultis?* quasi diceret, hoc est grauius, sic retroire à Deo postquam illum cognouisti, quam si ante non cognouisses. *Rom. 1. Gal. 4.*

Vnde & idem alibi; *voluntarie peccantibus nobis post acceptam* *Hebr. 10.* *notitiam veritatis, iam non relinquitur pro peccatis hostia, terribilis autem quadam expectatio Iudicij, & ignis amulatio quæ consumptura est aduersarios.* Quod expressius paulo ante dixerat: *Impossibile est enim eos qui semel sunt illuminati, gustauerunt etiam donum cæleste, & participes facti sunt Spiritus sancti & prolapsi sunt, rursum renouari ad penitentiam, rursum crucifigentes sibi metipsis filium Dei, & ostentui habentes.* Terra enim sape venientem super se bibens imbrem & generans herbam opportunam illis à quibus colitur, accipit benedictionem à Deo: proferens autem spinas & tribulos, reproba est & maledictio proxima, cuius consummatio in combustionem. Ex quibus Apostoli verbis satis patet & quantus sit contemptus

Dei, in retrogressu à via iustitiæ seu veritatis: & quanta poena maneat talem retrogressum ac contemptum Dei. Nonne iam expauescis ad tale impietatis portentum?

III. PUNCTVM.

MELIUS ergo erat viam iustitiæ non introisse, quam retroire; Cùm melius sit ex duobus malis, euitare maius: maius autem malum sit retroire quam non introisse viam iustitiæ, quandoquidem in tali retrogressu talis est contemptus Dei, quem vix alibi reperias: & qua proportionem crescit hic Diuinus contemptus in peccatis, eadem prorsus in grauitate & malitia crescunt peccata, quia nihil est in deformitate peccati deformius quàm Deum contemnere cui honor & gloria tot debetur nominibus vt dissoluendo debito numquam pares simus.

Hoc primum est quod per Prophetas conqueritur & ad quod audiendum cœlum & terram inuitat vt testes sint quam iniuste conqueratur: *Audite cœli & auribus percipe terra quoniam Dominus locutus est. Filios enutriui, & exaltaui, ipsi autem spreuerunt me.* Expende singula: Deum sperni! sperni à filiis! à filiis enutritis & exaltatis! Hæc valde augent iniuriam! sicut autem hi filij desertores contemnunt Deum, ita & valde contemptibiles redduntur coram Deo & hominibus: Coram Deo quidem, qui propterea se illos à se ait euomere; vnde hæc plæclara sunt Cassiani; *Nec immeritò eos Dominus quos iam in visceribus receperat Charitatis, noxiè tepefactos, cum quadam conuulsione pectoris sui euomendos esse pronuntiat, qui cùm salutarem ei quodammodo potuissent præbere substantiam, auelli ab eius visceribus maluerunt, tanto deteriores effecti illis qui numquam ori Dominico illati sunt cibis, quàm id quod nausea compellente projecimus, odibilis detestamur. Quidquid enius frigidum est, etiam ore nostro susceptum vertitur in calorem, & salutifera suauitate percipitur; quod autem semel vitio perniciosi teporis abiectum est, non dicam labiis admouere, sed etiam eminus intueri sine ingenti horrore non possumus.* Rectissime ergo pronuntiat *esse deterior, &c.*

Coram hominibus vero quàm sint odibiles & horrendi, ex eadem similitudine vomitus, Scriptura satis iudicat cum eos comparat in vtroque testamento cani vomitum resorbenti, &

*Apo. 3.
Cass. 4.
Coll. 19.*

*Pro. 23.
2. Pet. 2.*

Melius erat viam iustitia non introisse quàm retroisse. 643

Immundo animali lutum repetenti, quibus quid est foedius quid horribilius? *Horribilis profecto res est, inquit S. Augustinus, propriū reſorbere vomitū, nec in summa quidem fame à quoquam uſurpatum.* In Ps. 30.

Caue itaque tepiditatem, caue negligentiam; paulatim irrepit casus & ruina. *Mons cadoens defluit, & saxum transfertur de loco suo.* Vide Iob decimo quarto, & tricesimo octauo, ubi quod quæritur, *de cuius utero egressa est glacies; & gelu de cælo quis genuit!* apte sanctus Gregorius tibi aptat, *Quod de utero Dei tamquam glacies egrederis, quando qui iam intus incalueras, ex virtutum dono frigesceſ, & inde exteriorem gloriam torpendo appetis, unde ad interna diligenda ardentius flagrare debueras.* Exardesce ad feruorem. Et Vide in 2. parte, Die 7. Ianuarij. In hac 2. parte Feriam 5. Sexagesimæ. In 3. Fer. 3. hebdomadæ 1. In 4. Fer. 3. hebdom. 18. Et Verbo *Feruor, Renouatio.*



FERIA SEXTA.

DE EADEM CHARITATE CHRISTI

DOMINI, QUÆ NOBISCUM SEMPER MANET
IN SANCTISSIMO SACRAMENTO.

Ecce ego vobiscum sum omnibus diebus, usque ad consummationem sæculi. Matth. 28.

VERITAS PRACTICA.

Quàm gloriosum est Sacramento, multa in nos posse, si velimus: tam ignominiosum est pauca posse, quod nolimus.


RATIO EST, quia quàm gloriosum Christo est diuitias bonitatis suæ nobis communicare, tam ignominiosum est eas à nobis negligi.

644 FERIA 6. Hebd. 4. post Oct. Pasc. Ecce ego vobiscum, &c.

Sed multa in nos posse, si velimus, est diuitias bonitatis communicare, & pauca posse quod nolimus, est illas à nobis negligi.

Ergo quàm gloriosum est Sacramento seu Christo Domino sic remanenti nobiscum, multa posse in nos si velimus; tam ignominiosum est pauca posse quod nolimus; Vnde excitanda est in Domino melior voluntas & dispositio ad illas gratias.

I. PUNCTVM.

 VANTA sit Charitas Christi seipsum relinquentis in Sanctissimo Sacramento, & quàm verè Charitas illa non excidat cum sic nobiscum maneat omnibus diebus vsque ad consummationem sæculi, & per se patet, & aperte demonstrant hæc Tridentini verba; *Saluator noster discessurus ex hoc mundo ad Patrem, Sacramentum hoc instituit in quo Diuitias Diuini sui erga homines amoris velut effudit.*

Ioan. 6.

Hom. 62.
ad popul.
Antioch.

Verè hic Christus Emmanuel, id est nobiscum Deus, longè etiam commodius & opportunius quàm cum inter homines olim versaretur; nam in vno duntaxat viuebat loco, in vna Palestina, solis Iudæis notus, nondum passus, nondum glorificatus, ac proinde nondum de Spiritu suo tam abunde communicans. At modo per hoc admirabile Sacramentum, vbique locorum est, vbique se totum intus in cor nostrum, in penitiora quæque animi nostri sese infundit; aut potius animum nostrum in se penitus trahit & immutat; *Qui manducat, inquit, meam carnem & bibit meum sanguinem, in me manet & ego in illo. VNVM corpus efficimur,* ait sanctus Chrysostomus, *non tantum per Charitatem, verùm & ipsa re: propterea semetipsum nobis immiscuit & corpus suum in nos contempnauit, ut vnum quid simus tamquam corpus capiti coaptatum; ardens enim amantium hoc est.*

Ioan. 13.

O quàm verè dictum, *Cum dilexisset suos qui erant in mundo, in finem dilexit eos!* sed quod magis mirum dictu, & suaue cogitatu: non modo sic seipsum reliquit in hoc diuinissimo Sacramento ut nobiscum esset; sed ut nobis beneficeret, & suis ita plene cumularet gratiis ut potius deessemus illis recipiendis quàm ille nobis conferendis. O rem supra communem hominum fidem & morem! quis crederet homines qui nulla rerum

Quàm gloriosum est Sacramento, multa in nos posse, &c. 645

habendarum cupiditate satiantur, ita tamen parùm moueri ad has spirituales & coelestes Diuitias, vt pene quanto magis velit Christus nobis eas elargiri, tanto minus velimus eas recipere! Et sicut si vellemus, nullum est boni genus quod non posset & vellet nobiscum communicare; sic plane si tam pauca communicet non aliunde est quam quod nolimus. Atque hinc fit quod ad stupiditatem nostram excitandam non parùm valere potest cum gratia, si cogitemus *Quod quàm gloriosum est Sacramento seu Christo, tam multa in nos posse si vellemus, tam certe est ignominiosum, tam pauca posse vel facere quod nolimus.*

Ratio iam ex dictis patet; Quid enim gloriosius Christo potest accidere, quàm cum magis agnoscitur? At quandonam magis agnoscitur nisi cum bonus & potens demonstratur? Vbinam vero clarius hæc demonstratio bonitatis & potentiae Christi aperitur, quàm in hoc Sacramento vbi diuitias bonitatis suae, id est, ipsam totam quanta est, bonitatem effundit? *Haurite ex me tamquam ex Nilo*, dicebat quondam Vespasianus Aegyptiis: sed quàm arcta esset & angusta illa gratia quis non videt, cum ipsius Nili liberalitas cui se comparat, non se multum effunderet. At vero Christus Dominus: *Haurite ex me tamquam ex Deo* qui fons est Bonitatis inexhaustus. Hoc certe Christo tam gloriosum est, vt quantumcumque gloriae iam in coelo possideat, magis ac magis ei desideretur & concinatur à Coelitibus Incolis; *Dignus es Domine Deus noster accipere gloriam & honorem, & virtutem.* Apoc. 4.

Verùm quod est alteum propositionis caput; quàm gloriosum est Christo sic se posse & velle nobis communicare, tam certe ignominiosum est si talis communicatio negligatur à nobis. Sicut enim gloria quæ illi datur in coelo vel in terra, nihil est aliud quàm testimonium excellentiae quæ in eo agnoscitur; sic neglectus communicatae bonitatis & gratiae non est aliud quàm signum modicae vel nullius aestimationis quæ habetur de tali gratia; nihil quippe negligitur nisi quod non aestimatur: non aestimare autem aliquid in Christo tam est indignum & probrosum quàm illud est gloriosum & aestimabile quod aestimatur. *Com. osu 4. mutauerunt gloriam eius in ignominiam.* O humanae portentum nequitiae? velle ne hoc tibi objici?

II. PUNCTVM.

SED quando dicitur Christum vel Sacramentum multa in nos posse si velimus, & pauca facere quod nolimus, perinde est ac dicere quas Christus Dominus diuitias suae bonitatis nobis communicat, à nobis negligi.

Cum enim ex sua parte Dominus ita sit paratus ad profusionem sui communicandam, ut quod est in Scriptura hoc vnum à te petat, *Affer mihi vas*, id est, puritatem animi, id est, voluntatem pronam & bene affectam ad recipiendas & conseruandas gratias; profecto si quid non faciat, defectus humanae voluntatis est, sicut non nisi deficientibus vasis stetit oleum à Propheta impetratum. *Et non vultis*, inquit, *venire ad me, ut vitam habeatis?*

Joan. 5.
Matth. 23.

QVOTIES volui, & nolui!

At vero nolle tale bonum quale est vita spiritualis, vita aeterna, vita Christi, vita Dei, nonne est illud negligere, cum praecipue nihil impediat ab eo recipiendo, non impensa, non labor, non dedecus: immo multa inuitent & compellant; Rei ipsius dignitas, Christi offerentis bonitas, donorum ampla utilitas, & sexcenta huiusmodi. *Mensa Domini contaminata est, & quod superponitur contemptibile est*, ait Propheta, aut potius ait impius per Prophetam, qui quas offert Sacramentum diuitias nolendo recipere negligit, & negligendo perinde facit ac qui reputaret vile & contemptibile quod offertur in mensa Domini. Vellesne hoc dicere; vellesne hoc de te diceretur? Et tamen is qui tam multa in te posset si velles, facitne quae posset omnia? facitne vel mediam eorum partem? At unde hoc nisi quia non vis, nisi quia negligis? nisi quia diuitias Bonitatis eius contemnis?

Rom. 2;

III. PUNCTVM.

QUA M gloriosum est igitur Sacramento, multa in nos posse si velimus, tam ignominiosum est pauca posse quod nolimus: quia quae illi gloria est à bonitate quae demonstrat, vertitur quodammodo in ignominiam, à prauitate nostra quae talem bonitatem recusat & negligit; quasi non esset tale bonum quod multum aestimeretur & magni fiat à nobis! *Anima nostra iam nauseat super*

Rom. 21.

cibo isto leuissimo, dicebant Israelitæ de manna: & hoc dicentes nonne ipsi mannae vel potius Deo tantum inferebant iniuriæ & ignominia, quantum illi gloriae debebatur quod sicut ait Sapiens: *Angelorum esca nutriret populum suum, & paratum panem Sap. 16. de cælo præstaret eis sine labore, omne delectamentum in se habentem, & omnis saporis suauitatem?* Hinc aptè sanctus Ioannes Chrysostomus: *Si Christus nos attenderet, & non infinitam suam bonitatem, Hom. 66. iam à nobis abstulisset diuina Sacramenta: dignos enim nos hac pœna efficiamus, & indignos ipsis Sacramentis, dum ea suscipientes minus dignè, & illa & Christum traducimus, & quantum in nobis est, fama & honore priuamus.*

Certe si vellet sua summa & absoluta uti potestate, posset in te quod vellet, quis est enim qui possit ei resistere? sed post oblatam primam gratiam, quâ si velis, potes quod à te Christus exigit, iam id à te non aliter exigit & reposcit quàm ut libenter velis quod potes. At verò tam multa sunt, ut ante dixi, quæ te mouere debent ad id libenter volendum, ut tamen si flagella, morbos, mortem & si quid est asperius tibi inferret, tu libenter acceptare deberes, quia Dominus est, quia bonus, quia iustus, quia Deus; & nisi absolutum quod in te habet Dominium libens agnosceres, tum forte cogereris illud nolens volensque venerari & dicere: *Iustum est, subditum esse Deo.* Quando autem nihil 2. Macch. 9. nisi delicias offert & diuitias, tu qui deliciis & diuitiis maxime permoueris, quid est quod asperneris & negligas quas tibi offert opes? quid est quod illi respondere possis, nisi quod alias habes delicias quæ tibi suauiores videntur, & alias cupis diuitias quæ tibi apparent commodiores? At quid est iniuriam & ignominiam Christo inferre nisi hoc sit? Quasi ille nesciret quales essent veræ deliciae & diuitiae, aut quati non posset aut noller tibi conferre quas sciret esse opportunas? *Cognouit bos possessorem Is. 1. suum, & asinus praesepe Domini sui; Israel autem me non cognouit, & populus meus non intellexit! Afficere magis ac magis in sanctissimum Sacramentum, desidera vehementius, suspira frequentius, & semper cum Iobo dicas; antequam comedam, suspiro.* Iob. 10.

Videri possunt in 3. parte, duæ primæ hebdomadæ; necnon postremæ tres Feriæ hebdomadæ 13.



SABBATO.
DE EADEM IPSA CHARITATE
CHRISTI QVA CONSTANTER NOBIS-
CVM MANET, PER SUPERIORES
ET DIRECTORES.

*Ecce ego vobiscum sum omnibus diebus, vsque ad
consummationem seculi. Matth. 28.*

VERITAS PRACTICA.

*Quasi peccatum ariolandi est, repugnare: & quasi sce-
lus idololatriæ, nolle acquiescere. 1. Reg. 15.*

*RATIO EST, Quia ariolari & idola consulere idcirco pec-
cata sunt, quod relicto vero Deo queratur Damon tamquam
director & Actor rerum agendarum.*

*Sed quando repugnamus aut nolumus acquiescere superioribus,
idem quodammodo prestamus.*

*Ergo quasi peccatum ariolandi est repugnare, & quasi scelus
idololatriæ nolle acquiescere. Quod per se patet quàm sit hor-
rendum.*

I. P V N C T V M.

ETIAM nobiscum adest Dominus constantissimè, vsque
ad consummationem sæculi per Pastores, Rectores, Su-
periores & Directores, per quos sic vniuersim regit Ec-
clesiam, & particulatim vnumquemque, vt verissime propte-
rea dicat Apostolus, *Iesus Christus heri & hodie, ipse & in secula.*
Sic nempe voluit homines per homines regere, primò vt suauior
&

& accommodatior eius esset gubernatio; Deinde ne si solis eius inspirationibus regeremur, nostras sæpius inclinationes naturales, aut falsas Dæmonis illusiones, pro diuina voluntate sequeremur; verè enim sanctus Gregorius, *alioquin fiet ut dum se quisque sancto Spiritu impletum præsumat, Discipulus hominis esse re-
nuat, & magister erroris fiat.* Denique sic plurimæ excellentes exerceri possunt virtutes, in primisque humilitas, abnegatio iudicii & voluntatis, obedientia, simplicitas & similes quibus exercendis non modo ingentem meritorum cumulum nobis comparamus, sed gubernationem Superiorum suauiore & efficaciore reddimus, sicut ait Apostolus, *Obedite præpositis vestris, ibid. & subiace* eis; ipsi enim peruigilant quasi rationem pro animabus vestris reddituri, ut cum gaudio hoc faciant, & non gementes; hoc enim non expedit vobis.

Quod quanti referat, quantumque ad id merito affici debeamus, ut apertius constet, certe plurimum valet attendenda Consideratio Veritatis propositæ, quæ tota est ex sacris Literis, sic Samuele ad Saûlem loquente: *Numquid vult Dominus holocausta & 1. Reg. 15. victimas, & non potius ut obediatur voci Domini? Melior est enim obedientia quam victima, & auscultare magis quam offerre adipem arctum.* Quoniam quasi peccatum ariolandi est repugnare: & quasi scelus idololatria, nolle acquiescere; pro eo ergo quod abiiecisti sermonem Domini, abiicit te Dominus ne sis Rex. Itaque non tam probanda est ista veritas quam breuiter declaranda & attente consideranda, in hunc finem ut discas quàm graue sit & horrendum non acquiescere superioribus: Nempe hoc, quasi peccatum ariolandi est, & quasi scelus idololatria: quo quidem dicto quid grauius, cum id præsertim fide diuina non minus tenendum sit quàm quiduis aliud ex credendis?

Et reuera quid est ariolari, aut quid est quod tam graue sit peccatum, quos diuinos vocant adire, & idola consulere, nisi quia sic Dæmon consulitur ad res nostras agendas, & ab eo expectatur quod à solo esset Deo expetendum & expectandum? quæ certe Dei est atrox iniuria, quasi non possit Deus aut nolit dicere quod nobis necesse sit scire; aut quasi nos attentemus id inuestigare & scire quod nobis ignotum esse vult, & quod expresse veruit, ne quæreremus. *Non inueniatur in te qui ariolos scisci-* Dant. 18.
tetur, & obseruet somnia: neque qui Pithones consulat, neque diui-
a. Pars. Nnnn.

650 Sabbato Hebd. 4. post Pasc. Ecce ego vobiscum suum, &c.

Ecclesi. 4. nos, & querat à mortuis veritatem. *ALTIORA* te ne quaesieris, & fortiora te ne scrutatus fueris, sed quae praecepit tibi Deus, illa cogita semper: & in pluribus operibus eius ne fueris curiosus.

II. PUNCTVM.

SED quando repugnamus aut nolumus acquiescere, quasi Damon consulitur, relicto Deo.

1. Reg. c. 15.

Sic expresse sanctus Gregorius, cuius etiam authoritas declarationi veritatis fidem conciliabit: Quasi peccatum ariolandi est repugnare, quia velut contempto Diuino altari ad aras Daemonum responsa percipiunt, dum cordis sui praestigiosis ac superbis adinventionibus credunt, & salubribus praelatorum consiliis contraria sentiendo refragantur. Nolle autem acquiescere, idololatria sceleri simile dicitur, quia nimirum in inobedientia sua obstinatione nemo persisteret, si propositi sui figmentum in corde quasi idolum non gestaret. Dum enim agenda in corde concipit, quasi idolum facit: Et dum conceptum mentis propositum se acturum deliberat, quasi ad adorandum simulacrum se inclinatur. Quasi ergo scelus idololatriæ est, nolle acquiescere, quia quisquis in propria deliberatione obstinatus est, idcirco foris in maiorem contemptum erigitur, quia intus eis quae fingendo statuit propositi sui simulachris incuruatur. Videri potest idem sanctus Doctor in eodem Commentario, capite 4. vbi de Samuelis obedientia. Et libro 35. Moralium, capite decimo.

Quæ sic declarata quomodo practicè & reipsa fiant à nobis, quando repugnamus, aut nolumus acquiescere, ex ipso Saulis facto cuius occasione prolata est à Samuele sententia, patebit euidenter. Ecce enim à Propheta tam apertè declaratur Sauli, Diuina voluntas circa vniuersum Amalecitarum interitum, vt de hac nullo modo dubitare possit: sed ille quasi contemneret, ait Sanctius, accuratus Interpres, quasi non probaret Diuina consulta, quasi aut iniqua essent aut Israeliticis commodis importuna, ad alias aras sese conuertit, alia petit oracula à sua suorumque prudentia. Iubet Deus vt pereat Amalec: at contrà humana prudentia iudicat durum esse & inhumanum; antiquum illud genus extinguere, perire Regem luculentum & nobilem: neque prudentis esse consilij pretiosas vestes quæ ornamento esse possent Israelitidi genti, aboleri flammis; neque præterea fas

Quasi peccatum ariolandi est repugnant, & quasi, &c. 651

esse illis carere exuviis milites quorum studia & labores non alio modo compensari poterant. Deinde non satis videri religiosum ac pium, ut oves pingues, & armenta crassa atque nitentia, ferro concisa coruos alant potius aut putrescant quàm sacrificiis deserviant, & sacerdotes alant.

Sic meditabantur humana iudicia contra Diuinum, ac tandem ex hac ratiocinatione quæ vocari *potest Idolorum responsio* concludunt isti impudentes arioli contra quàm esset à Domino constitutum, parcendum esse Regi & pretiosis ornamentis, & ex gregibus optima quæque seruanda, & satis videri præcepto satisfactum esse Diuino si quidquid esset reprobum ac vile, ferro ac flamma perderent. Sic nos plane discurremus, sic ratiocinamur in nostris repugnantibus concupiscentiis, sic prudentiam carnis quæ mors est spiritus, cœlesti & Diuinæ opponimus; sic vno verbo Diabolicis potius quam Diuinis suggestionibus nos regendos tradimus. O impietatem! ô scelus! *Populus meus mutauit gloriam* 1er. 23 *suam in Idolum!*

III. PUNCTVM.

SIC ergo quasi peccatum ariolandi est, repugnare: & quasi scelus Idololatriæ, nolle acquiescere.

Ac proinde patet quantopere id cauendum & dicendum quod Israelitæ: absit à nobis hoc scelus, ut recedamus à Domino, & eius vestigia relinquamus, extructo altari præter altare Domini Dei nostri. De hoc etiam fusè Cassianus tota collatione secunda, vbi hæc inter alia: *Nulla visio tam præcipitem Diabolus monachum pertrahit & perducit ad mortem, quàm cum neglectis consiliis seniorum suo iudicio persuaserit, definitionique confidere.* 1os. 23. c. 11.

Tum vniuersim de omnibus, Idem ibidem, *Impossibile est quemquam qui proprio fudit iudicio, Diaboli illusionem non decipi: ut è contra nullatenus fraudibus & insidiis inimici decipi potest qui non suo iudicio sed maiorum viuit exemplo.* Quod quidem eò periculosius est quo religiosior apparebit prætextus repugnantiae, siue apparentis oppositæ rationis: Vnde apte sanctus Bernardus: *Eant nunc qui se faciunt religiosiores aliis, qui non sunt sicut ceteri hominum; ecce Arioli & Idololatræ facti sunt, si tamen vel ei qui dixit hoc, plus quam sibi indicant esse credendum.* Serm. 7. de Resurre.

652. Sabbato Hebd. 4. post Oct. Pascha. Ecce ego vobiscum, &c.

Alia quidem & plurima sunt argumenta quibus ostendi pos-
sit quantum expediat sic se sinere regi & dirigi, vt tota hebdo-
mada tertia post Epiphaniam, ostensum est; sed hîc illud vnum
urgendum, quòd alioquin relicto Deo requiratur Dæmon; Hoc
enim quàm sit impium & sceleratum cum facilè concipiatur,
vnum sufficiet ad rem conficiendam. *Numquid non est Deus in*
Israel, vt eatis ad consulendum Beelzebuth, Deum Accaron? quam-
obrem hac dicit Dominus, de lectulo super quē ascendisti non descendes,
sed morte morieris. Hæc vni semel dicta, semper dicentur om-
nibus qui repugnant & non acquiescunt. Vide infra in hac par-
te, Feria 4. Octauæ Ascensionis, vbi hæc Veritas exponitur:
Qui rationes inquit obedientiæ, rationem quærit suæ
inobedientiæ.





DOMINICA V. POST PASCHA.

DE ORATIONIS EFFICACIA
FREQUENTIA, ET ALIIS PROPRIETATIBVS.

Si quid petieritis Patrem in nomine meo, dabit vobis.
Ioan. 16.

VERITAS PRACTICA:

Ne dicas te petere in nomine Domini ; aut ne dicas te nihil obtinere.

SENSVS est, quod quidquid petitur in nomine Domini, obtinetur ; aut si quid non obtinetur, non petitur in nomine Domini : ac proinde qui dicit se petere in nomine Domini non debet dicere se nihil obtinere, cum alioquin mentiretur & blasphemaret.

RATIO est, quia vel petes aliquid aliud quam quod velit Deus, vel hoc plane vnum.

Sed si petis aliquid aliud, non petes in nomine Domini : aut si hoc vnum petis, semper illud obtinebis.

Ergo ne dicas te petere in nomine Domini, aut ne dicas te nihil obtinere.

I. PUNCTVM.

SIC suis Christus Dominus, ne quid dubitarent de orationis suæ virtute ac efficacitate, asseueranter loquebatur; *Amen amen dico vobis, si quid petieritis Patrem in nomine meo, dabit vobis. Vsq̃ue modo non petistis quidquam in nomine meo: petite & accipietis, vt gaudium vestrum sit plenum.*

Hic primò contemplare tria illa potissima Dei attributa, Bonitatem, Potentiam & Sapientiam, vt in Christo relucet. Bonitas est in promissione facta nostris orationibus; Potentia in effectu quem consequuntur; Sapientia in docendo quem suggerit orandi modo.

Deinde verò vt melius promissionem Christi intelligas, ac ne dubites aliquando quin certissima sit, etiamsi tibi aliud videretur, Expende accurate quod habet Veritas atque eius declaratio; *Aut te non petere in nomine Domini, aut semper obtinere quod petis: ac proinde non aliter esse loquendum.* Quidquid enim petis vel conforme sit oportet Diuinæ voluntati, vel ab ea quouis modo alienum. Quid censes? horum alterutrum omnino negari non potest, neque in eo discutiendo longius tibi est immorandum; sed hoc vide tantum ex illis duobus vtrum tibi sit familiarius, vtrum Dei an tuam magis voluntatem exquiras? quanta sit vtriusque voluntatis differentia & distantia; Nempe vt ait sanctus Augustinus quantum Deus dignitate & merito distat à te, tantum eius voluntas, quæ Deus ipse est, distat à tua. Quanta porro est illa distantia? ô prodigium peruersitatis, cum se homo comparare Deo non veretur, & se etiam illi præfert! ô quam præclare Iob: *Verè scio quod ita sit, & quod non iustificetur homo compositus Deo.*

II. PUNCTVM.

SED si petis aliquid aliud quàm velit Deus, non petes in Nomine Domini; aut si hoc vnum petis, semper illud obtinebis.

Prima pars propositionis nihil habet dubij, nec enim vllō modo est cogitandum in nomine Domini posse peti à Deo, quod

Deo non sit acceptum; Nam, vt recte monet sanctus Augustinus, & iam supra retulimus, *non sonum literarum ac syllabarum*, Tract. 102 in Ioan. sed quod sonus ipse significat, & quod eo sono rectè ac veraciter intelligitur, hoc accipiendum est dicere cum dicit, IN NOMINE ME O. Quid porro est aliud quod rectè ac veraciter intelligi queat, nisi quod spectat ad Dei gloriam, nostramque salutem & perfectionem, prout singulatim de vnoquoque nostrum disposuit Deus?

Hoc est enim nomen Domini, nomen Iesus, nomen Saluatoris, & hæc est eius nominis ratio, vt quidquid ad salutem spectat, eo nomine contineatur, nihil vero praterea; Vnde idem apte sanctus Augustinus, *non petitur in nomine Saluatoris quidquid petitur contra rationem salutis*. Est autem ratio salutis non modo ipsa salus, sed modus, siue media vnicuique ordinata ad salutem, quæ cum in mera sint Dei prouidentia & voluntate, hinc manifestissime pater, non peti in nomine Saluatoris si quid petitur quod non velit Deus; nam sicut non potest esse ratio salutis siue medium ad salutem, quod non est conforme Diuinæ voluntati, ita nec continetur hoc nomine Saluatoris. O verè sanctum & ps. 118. verè terribile nomen, quo rationes illæ occultæ & pauendæ vniuscuiusque salutis hominum continentur!

ALIA vero pars propositionis quæ dicitur, semper obtineri quod petitur secundum voluntatem Dei, tam certa est, vt etiam si res ipsa quæ petitur negaretur, dicenda tamen sit obtineri æqualiter: Id est, quod negando conceditur, æquare id merito & pretio quod petebatur: Seu quod idem est, æquè in petentis verum bonum redundabit quando quid negabitur; ac si concederetur. Nam vt aiunt sancti Augustinus & Bernardus, *miseriordia est aliquando subtrahere misericordiam, quemadmodum* Tr 73 in Ioan. Serm. contra vitium in- *ira & indignationis misericordiam exhibere, vt cum data sunt car-* grat. *nes Hebræis, quas murmurando postulabant.* Qua de re futius in superiori hebdomada, Feria 3.

Quod autem ista rei petitiæ quæ dicitur æqualitas, siue æquivalentia, sit infallibilis, quatuor sunt quæ omnino persuadent. Primum est promissio Christi quæ vana esse non potest & de qua nos voluit esse tam certos, vt non semel sed iterum & pluries affirmarit quod quidquid recte peteretur, id fieret; confirmatque sanctus Ioannes, hanc esse habendam non modo spem sed

2. Ioan. 5. & fiduciam, quia quodcumque petierimus secundum voluntatem eius, audit nos. Secundum est, ipsius Christi meritum quo fit ut quidquid in ipsius nomine nec alienum à Divina voluntate petitur, obtineatur; sicut si ipse peteret: Ego sciebam, inquit ipse ad Patrem, quia semper me audis. Tertium est, Divina Bonitas quæ cum ex se satis sit propensa in omnem benignitatem, quanto magis cum oratur in tali Nomine, & tali fine, ut nihil nisi secundum quod velit, donet. Si vos, inquit, cum sitis mali, nostis bona data dare filiis vestris, quanto magis pater vester de cælo dabit spiritum bonum petentibus se? Quartum denique, petentis dispositio quæ talis est ex hypotheti, ut nihil aliud velit quàm quod Deus, ac proinde si res petita negatur, cum ex voluntate Dei peræquè negetur ac si concederetur, profecto illud sequitur quod intentum obtinetur. Sic aptè Psaltes Regius, cum etiam puniretur; Castigans castigavit me Dominus, & morti non tradidit me: aperite mihi portas iustitiæ, ingressus in eas confitebor Domino: hac porta Domini, iusti intrabunt in eam. Confitebor tibi quoniam exaudisti me, & factus es mihi in salutem. Hoc est enim exaudiri, quando fit nobis Dominus in salutem, Id est, quando id nobis salubre redditur quicquid de nobis ordinaverit: vel potius, quando à nobis tanti fit Dominus, ut sit nostra salus illi servire ac placere. Ipse autem Medicus, salus est, ait ibi sanctus Augustinus.

2. Cor. 117. Castigans castigavit me Dominus, & morti non tradidit me: aperite mihi portas iustitiæ, ingressus in eas confitebor Domino: hac porta Domini, iusti intrabunt in eam. Confitebor tibi quoniam exaudisti me, & factus es mihi in salutem.

III. PUNCTVM.

NE dicas igitur te petere in nomine Domini, aut ne dicas te nihil obtinere; cum falsum & blasphemum alioquin loquereris, quandoquidem nil petitur in nomine Domini, quod non petatur secundum voluntatem Dei, & nihil ita petitur quod non obtineatur; Secundum propositum eius qui operatur omnia, secundum consilium voluntatis suæ ut sumus in laudem gloriæ eius, nos qui ante speravimus in Christo. Sic opportunè Apostolus, qui sic obtinuit quod petebat, licet negatum fuerit, neque enim aliter petebat quàm secundum illud Divinæ voluntatis consilium quod tale erat ut pateretur angelum Satanæ. Sic ipse Christus Dominus exauditus est pro sua reuerentia, licet Calicem biberit quem transire petebat; quia non aliter petebat quàm prout vellet Deus, Non mea voluntas, inquit, sed tua fiat. Itane oras?

Ephef. 1. Secundum propositum eius qui operatur omnia, secundum consilium voluntatis suæ ut sumus in laudem gloriæ eius, nos qui ante speravimus in Christo.

1. Cor. 11. Sic opportunè Apostolus, qui sic obtinuit quod petebat, licet negatum fuerit, neque enim aliter petebat quàm secundum illud Divinæ voluntatis consilium quod tale erat ut pateretur angelum Satanæ.

Hebr. 5. Sic ipse Christus Dominus exauditus est pro sua reuerentia, licet Calicem biberit quem transire petebat; quia non aliter petebat quàm prout vellet Deus,

1. Jo. 22. Non mea voluntas, inquit, sed tua fiat.

Pensate.

Pensate, inquit sanctus Gregorius, petitiones vestras, videte si ^{Hom. 27.} *in nomine Iesu petitis, id est, si gaudia salutis aeternae postulatis. In* ^{in Euang.} *domo enim Iesu Iesum non queritis si in aeternitatis templo importunè pro temporalibus oratis. Expende illud importunè, quod vitiosum esse potest in modo, & fine. In modo quidem, si nimis auidè temporalia peterentur: in fine vero, si ex affectu ipsorum temporalium minimè ordinato ad salutem: unde sanctus Iacobus, petitis* ^{Iac. 4.} *& non accipitis, eò quod malè petatis, ut in concupiscentiis vestris in-* ^{Coll. 3. c. 23} *sumatis; id est ut sic concupiscentiæ satisfaciatis. Quo in sensu apud Cassianum hæc sunt egregie dicta: Nihil caducum vult à se, nihil vile, nihil temporale aeternitatum Conditor implorari. Itaque magnificentia eius ac munificentia maximam irrogabit iniuriam, quisquis sempiternis petitionibus pratermissis, transitorium aliquod & caducum ab eo maluerit postulare; & offensam potius quàm propitiationem Iudicis sui, vilitate orationis incurret. Sic sanctus Augusti-* ^{In Ps. 34.} *nus: si illa petieris, iniuriam facies illi, & damnum tibi, praeponendo illi quod fecit, cum velit seipsum dare qui fecit. In hoc amore dixit illi anima quadam: Numquid ipse es pars mea Domine? Eligant sibi qui volunt quid possideant, faciant sibi partes de rebus: pars mea tu es, te mihi elegi. Et iterum; Dominus pars hereditatis meae: possideat te ut possideas illum: eris pradium ipsius, eris domus ipsius: possidet & possidetur ut prosit, Numquid ut aliquid ei tu ei prosis? nam dixi Domino: Deus meus es tu, quoniam bonorum meorum non eges.*

Huc etiam spectant hæ consequentes Veritates.

Discedat ab iniquitate omnis qui nominat nomen Domini.

In 1. parte, In die Circumcisionis, ex 2. Timoth. 2.

Sensitiuæ Deuotionis subtractio, veræ & solidæ Deuotionis est probatio.

In 1. parte. Die 12. Ianuarij.

Sicut in aduersis, ita & in prosperis inuocandus est Dominus.

In 1. parte, Dominica 2. post Epiph. Vbi ad nuptias vocatus est Iesus.

2. Pars.

Oooo

658 Dominica 5. post Pasc. Si quid petieritis Patrem, &c.

Si ad humanam gratiam diuina postulas, diuinam ipsam repellis gratiam.

In 1. parte, Feria 2. hebdom. 2. post Epiph. Vbi de Nazarenis miracula petentibus.

Nulla in aduersis conquerendi est ratio, aut nulla erit conquerentis oratio.

In hac 2. parte, Sabbato post Sexagesimam, Ad ipsa Euangelij hodierni verba iam supra exposita.

Si ordinatis ad salutem mediis non vteris, Mediatore Christo abuteris.

In 2. parte, Sabbato post Cineres.

Qua ratione terrena tantum & non coelestia desideras, eadem necesse est, vt coelestia tantum, & non terrena desideres.

In 2. parte, Feria 3. hebdomadae sequentis.

Erranti in dubiis, & non oranti, nulla est erroris excusatio.

In 2. parte, Feria 6. post Octauam Ascensionis. Vide ibi & sequens Sabbatum: Necnon Feriam 4. Pentecostes, de consulendo Deo.

De septem vero petitionibus orationis Dominicae quibus septem opponuntur vitia capitalia: Tota est in eis declarandis hebdomada 6. per singulas Férias, in 3. parte. Quae omnia sic in vnum conflare possunt vt demonstretur *Vsq̃ue modo non petiisse quicquam* eos qui suis prauis desideriis seu vitiis reprimendis non vacant. Sibi enim contradicunt & obstant in orando. Vnde haec ad fructuosam praxim formatur veritas:

Qui sibi non contradicit in suis malis desideriis: sibi contradicit in bonis.

RATIO EST, Quia ille sibi contradicit in bonis suis desideriis, qui sibi Dominicam oranti orationem contradicit.

Sed qui sibi non contradicit in suis malis desideriis; ille sibi Do-

Qui sibi non contradicit in suis malis desideriis, &c. 659

inimicam oranti orationem contradicit.

Ergo & sibi contradicit in suis bonis desideriis; ac proinde nihil obtinet, nihil orat, nihil quicquam petit; simulator est, hypocrita est, ex illis unus est de quo bene Isaias, & Christus Dominus ^{Is. 29.}
^{Matth. 15.} Populus hic labiis me honorat, cor autem eorum longe est à me.

I. PUNCTVM.

PRIMA propositio tam certa est, quàm verè sanctus Cyprianus de singulis orationis Dominicæ petitionibus scripsit: *Hac ubi petierimus à Deo, nihil remanet quod ultra debeat postulari.* Hoc enim est apertè dicere, nullum esse bonum desiderium, seu nullum esse bonum desiderandum ac petendū, quod illis septem petitionibus nō contineatur; ac propterea, qui sibi ralem oranti orationē contradicat, sibi manifestè contradicat & repugnet, in suis bonis desideriis. *Labia dolosa in corde & corde loquuti sunt,* ait Psalter: Cōtra vero Moses, *Iuste quod iustū est persequeris.* Id est, caue ne dum iusta iniustè prosequeris, tibi contradicas & obstes. Vnde & Sapiens, *Qui custodierint iusta iuste,* ^{Pf. 11.}
^{Dent. 16.} *iustificabuntur,* quasi diceret, Illi demum habebuntur iusti & integri qui suis in bonis operibus sibi cohærebunt, sibi consentient; non autem illi qui sibi metipsis contradicunt, dum ore aliud & corde aliud profitentur. *Væ duplici corde, & labiis scelestis!* ^{Ezech. 12.}

II. PUNCTVM.

SED qui sibi non contradicit in suis malis desideriis, ille sibi Dominicam oranti orationem contradicit.

Tria sunt hic enodanda. Primum est, quod quæcumque sint mala desideria seu vitia, referuntur ad illa septem quæ dicuntur capitalia, vt expresse docet Diuus Thomas, tūm autoritate ^{1. p. 4. 84.}
^{2. 4.} S. Gregorij, tūm Ratione quam fusè prosequitur, quod videlicet *finalis causa tot sint nec plures principales & primariae rationes* ^{L. 31. Mor.}
^{c. 31.} *mouendi appetitum.* Videri potest sanctus Doctor.

Secundum est, quod qui sibi non contradicit suis in malis desideriis seu vitiis, censetur ea velle, non tantum quando illis

660 Dominica 5. post Pasc. *Vsque modo non petistis quidquam.*

actu consentit, sed quamdiu voluntatem seruat illis consentien-
di quoties libuerit, quod est habitu vitiosum esse, quo in statu
sunt pene omnes qui suis malis desideriis reprimendis non va-
cant, quod idem est ac dicere, qui sic affecti sunt ut pro libito
2. Pet. 3. suo suis se sinant vitiis, *iuxta proprias concupiscentias ambulantes.*
O quam multi sic ambulant, quos deplorat Apostolus, *inimicos*
Philipp. 3. *crucis Christi, quorum finis interitus, quorum Deus venter est & glo-*
ria in confusione ipsorum, qui terrena sapiunt.

Tertium est, talem virum sibi oranti orationem Dominicam
contradicere & repugnare, quia volendo septem illa vitia, vel
vnum ex his aliquod, voluntatem habet oppositam septem illius
orationis petitionibus, aut earum vni vel alteri, prout magis aut
minus prauè affectam gerit voluntatem. Sicut enim vitia vir-
tutibus suis contrariis opponuntur, ita & opponuntur Domini-
cis illis, quas S. Chrysostomus vocat, *sententiis*, nos communio-
ri vocabulo, *petitionibus*, quæ septem singula, septem virtutes in-
cludunt, plane & directe pugnantes cum totidem vitiis capitali-
bus sat ex senotis.

Hæc essent declaranda singillatim, sed quia longius trahere-
tur oratio, viderique possunt quæ suo designato loco reseruan-
tur vberius explananda, sic in pauca contrahuntur. Primæ pe-
titioni respondet Humilitas, superbix seu vanitati repugnans.
Secundæ, Liberalitas seu quæuis alia virtus, avaritiæ contraria.
Tertiæ, Mansuetudo iræ opposita. Quartæ, Temperantia gulæ
contraria. Quintæ, Charitas inuidiæ aduersaria. Sextæ, Castitas
inimica Luxuriæ. Septimæ, Diligentia siue deuota sedulitas con-
tra pigritiam aut acediam.

Quibus ita manifestè propositis, iam accedat Vitiosus ad
orandum, iam effundat orationem Dominicam, iam pronuntiet
quod à Patre nostro cælesti petendum Filius docuit: voluat illud
& reuoluat quantum volet, nihil dicit, nihil nisi sibi met cōtradicit.
1. Math. 20. *Nescitis quid petatis*, dicebat Dominus duobus illis Discipulis
qui primas ambiebant sedes in ipsius regno: nam si sciuis-
sent quænam essent illæ sedes, & quid esset esse primum in regno
Christi, numquam illo postulassent animo talem primatum. Pri-
ma sedes in regno Christi est humilitas, humiliatio, contemptus
sui, contemptus mundi; *qui voluerit maior esse, sit omnium mi-*
1. Luc. 22. *nor, sit minister & seruus omnium*, ait Rex noster; at certè hoc non

petebant qui de primis contendebant sedibus, imò planè oppositum, quale sibi fingit appetitus cum ambit eminentiores gradus, & primas cathedras; vnde sibi totis repugnabant, nam petebant præesse simul & subesse cæteris: præesse quidem, prout ambitione mouebantur; subesse verò, prout Christus statuerat primos sui regni fore demissiores; quæ quàm essent pugnantia & contradicentia quis non videt?

Sic tu planè peccator, sic tu quisquis superbus oras *sanctificari nomen Dei*: vel omnino nescis quid ores, vel superbiam deponas necesse est, & veram induas humilitatem, vel tibi prorsus contradicis. Nam idem est sanctificari ac celebrari; vnde dicitur *sanctificate sabbatum*, id est, celebrate seu celebrem & festum diem Ier. 17.
Ez. 20. habetote: Quid est autem celebrari nomen Dei? quid est ante omnia primum hoc postulare, nisi sigillatim vnumquemque profiteri se nihil deliderare vehementius, quàm vt Deus in his omnibus quæ nos spectant, agnoscat Author & promotor: Illi v i gloria deferatur, non nobis Pater, non nobis, sed nomini tuo da gloriam: tu enim bonorum es author omnium; vnde si soli Bono debetur gloria, tibi vni debetur qui solus es bonus, & à te omne est bonum, omne laude dignum & glorià; quod verò nostrum est, sola est infirmitas, solum peccatum, sola malitia. Dan. 9.
Tibi Domine Iustitia, nobis autem confusio faciei.

Hoc est sanctificari, hoc est celebrari & glorificari nomen Dei, nec planè aliter. Vnde Diuus Chrysostomus, *digna prorsus oratio eo qui Deum patrem appellauit, nihil omnino prius quàm pro illius gloria supplicare: Iuxta illud scilicet Domini, sic luceat lux vestra coram hominibus, vt videant opera vestra bona & glorificent patrem vestrum qui in calis est.*

Itane verò superbus hoc primum & vehementius velit? itane velit de se nihil vt boni cogitetur? nihil reddatur gloriæ, nihil commendetur, nihil celebretur, non scientia, non nobilitas, non diuitiæ, non peritiæ; non pulchritudo, non vestes, non capilli; non quicquid gloriosum apparet, nihil horum in se spectetur? Deo cuius est totum, totum deferatur, nihil sibi præter suum nihilum & peccatum suum, cui non gloria, sed confusio reddenda est? Itane superbus hoc de se dicat & sentiat, quod reuera dicendum esset vel tacitè sentiendum, si verè primum & vehementius peteret Dei Nomen celebrari? Vel non esset superbus

si hoc sentiret, vel nisi hoc sentiat, superbus est; & quamdiu superbus est, tam alienus est ab illa mente, quā prima petitio debet fieri, quā aliena est ab humilitate superbia; tantumque sibi contradicit, quantum qui volebant primores gradus in regno Christi, & qui perebant primas sedes.

Sic avarus qui petit *vt adueniat regnum Dei*, nihil minus petit, nihil magis timet. Nam cum terrenis bonis suis sit valde affixus, & noua in dies congerenda & cumulanda cogitet, nihil magis timet quā mortem, nihil magis optat quā longæuam, & si fieri posset, perpetuam vitam. Petere autem *vt adueniat regnum Dei*, & simul petere diurnum vitæ tempus, ita sunt sibi opposita sicut mors & vita. Nam *vt adueniat regnum Dei*, regnum caeleste, regnum illud beatitudinis sempiternæ, necessum est omnino mori, & tamen si desiderium mortis expressum non exigatur ad hoc rite postulandum, debet tamen paratus esse animus, aut profecto non debet ita esse auersus. & alienus, qualis est avari animus, qui dum nihil magis timet quā mori, nihil minus petit quā quod petit regnum Dei. *O Mors quā amara est memoria tua homini pacem habenti in substantiis suis, viro quieto, & cuius via directæ sunt in omnibus*: Id est qui sibi sic prouidit in omnibus quæ sunt vitæ propagandæ opportuna, vt nihil timeat nisi mortem.

Eccl̃. 41

Hoc idem de Iracundo, de Gulosō, cæterisque notato vitiis, probatum habes in memorato tertiæ Partis loco. Sicut enim nulla re magis nota sit voluntas Dei, quā quæ necessitate aliquā implicatur, sic Iracundus qui orat vt voluntas Dei fiat, nihil magis alienum in animo versat. Quid est enim vnde magis irascitur & excandescit, nisi quia non potest quod vellet? at vnde illud non potest, nisi ex voluntate Dei, quæ tantō illi manifestius innotescit, quantō illud quod magis vellet, minus potest? Vnde in libro Iob rectè describitur: *Tetendit aduersus Deum manum suam, & contra Omnipotentem roboratus est; cucurrit aduersus eum erecto collo, & pingui cernice armatus est.*

Iob 15.

Cū verō gulæ addictus panem à Deo petit: quæro, an à solo expectat Deo quod petit, an ab alio? si ab alio, non leuem Deo facit iniuriam, qui quod minoris ducit, nempe panem, à solo expectet Deo: quod autem in maioribus habet deliciis, aliunde sibi procuret. Quod si suas simul delicias & lautiores cibos à

Deo postulet, nonne hoc rursus est iniuriosum Deo, sic ab eo postulare, quod gulæ suæ seruiat, quod peccati fomitem subministrat, quod diuinam incurrat offensam? *Adhuc esca eorum Ps. 77. erant in ore ipsorum, & ira Dei ascendit super eos.*

Quid porro petit Inuidus, quid acceptæ memor iniuriæ, quid ultionis appetens, quando sua sibi petit dimitti debita, sicut dimittit debitoribus suis? An reuera desiderat sibi remitti, vel fictè & simulatè tantum orat? affirmabit se reuera desiderare, vel desperatæ est mentis; sed falsò affirmabit: nam vox illa, *sicut*, quam interponit, manifestæ hunc arguit falsitatis; cum enim suis non dimittat debitoribus, nec aliter sibi velit dimitti, quàm sicut ipse dimittit, quid est nolle quod petit, nisi hoc sit? Et præclare Sapiens, *homo homini reseruat iram, & à Deo querit medelam? in Ecclesi. 28. hominem similem sibi non habet misericordiam, & de peccatis suis deprecatur? Ipse cum caro sit, reseruat iram, & propitiationem petit à Deo? quis exorabit pro delictis illius? Quasi diceret, nihil pugnantius fingi potest, quàm ut homini homo non parcat, & sibi à Deo parci petat!*

Audebis verò etiam, Impudice, Cælestem rogare Patrem, ne te inducat in in tentationem in quam teipsū effusè proicis? Caue id præsumas, caue id audeas, nam hoc aperte est irridere quem rogas; Deus autem impune *non irridetur.*

Gal. 6;

Restaret de pigro dicere, nisi de illo iam à Sapiente dictum esset, *vult & non vult piger*, quod tum maximè profitetur, cum petit à malo liberari. Vult enim quia petit, & tamè non vult quia piger est, *& abscondit manum sub ascella, nec ad os suum applicat eam, Ibid. 19.* Id est, illa præstare non vult quæ de suo conferre debet cum Diuino præsidio, ut à malo liberetur. *Pigrum deiicit timor, hoc est, Ibid. 28, faciliùcit, ut quantumuis velle videatur aliquid, non tamen velit, quia non facit quod ille faceret, qui verè veller.*

III. P V N C T V M.

QVI sibi ergo non contradicit in suis malis desideriis, sibi contradicit in bonis, vel certè nulla dici potest habere bona desideria: nam si quæ sint bona, non est dubium quin septem orationis Dominicæ petitionibus comprehendantur, ac si quando depromi debeant, tum vel illo maximè tempore quo talis pronun-

tiatur oratio: nam ut ait sanctus Cyprianus, *intentione sincera Dominum debet non vocis sonus, sed animus & sensus orare*, unde hoc primum rectè asseritur, quòd si tùm oranti sibi Viriosus contradicit, sibi contradicit in bonis desideriis; nonne id patet? At verò aliud non minùs est euidens, quòd ille ipse qui est vitiis implicitus, tum tibi oranti contradicit, cum vnique petitioni suum sit oppositum vitium, quo fit ut corde neget quod affirmat ore; Quis hoc non videat, & quidem ipsum tibi tot se diuersis modis opponere, quot habet vitia Dominicis opposita propositionibus? *Arguet te malitia tua.*

Ier. 2.

Et certè perniciofa malitia, quæ vel omnino non finet te orare, vel nili fictè & simulatè, quod peius est quàm si penitus non orares! vellefne sic interdici sacris omnibus, ut ipsa tibi Dominica vetaretur oratio, nec tibi plus relinqueres pietatis erga Deum, quàm si Deum prorsus ignorares? Possetne fingi status isto miferior? Et tamen, ô deplorandam vitiofa mentis perniciem! si Deum oras in tuis illis vitiis, quibus exuendis non vacas, miferius & damnosius est aliquid quàm status ille qui extremam miseriam tibi videbatur attingere. Nam sic fictè orando, vel cor tuum putas Deo notum vel ignotum; si putas ignotum, quem tu facis Deum? Deum nescientem! Deum ignorantem! ô blasphemiam! Quòd si Deo notum putas quod fingis, quem te ipsum facis qui hoc audeas? tu præfenti! tu scienti videntique Deo non verearis affingere, non erubescas illudere? Hoc est *audacter prouocare Deum*. Sic Scriptura, sic Iob Deo plenus loquitur, sic Deus ipse sentit; *Ad iracundiam me prouocauit Ephraim, in amaritudinibus suis*. Id est, in peccatis quæ mihi valde displicent, vel quæ fingit peccator aliquando sibi displicere. Quod est etiam *accedere malignè ad Dominum, & cor habere plenum dolo & fallacia*, quod quàm sit capitale, pluribus vrget Sapiens.

Iob. 12.

Osæ 12.

Ecclesi. 2.

Fictè locutus est, vel semel Adonias Salomonis frater quando Abisag Sunamitidem sibi vxorem dari petiit, quod cum sensisset Salomon, *hac*, inquit, *faciat mihi Deus & hac addat, quia contra animam suam loquutus est Adonias verbum hac*; Et nunc vixit Dominus quia hodie occidetur Adonias. Notanda verba illa, *contra animam suam*, nam & simul significant contra mentem id factum & contra salutem; quod euidentissimum est oranti vitioso accidere,

3. Reg. 2.

Qui sibi non contradicit in malis desideriis, sibi contr. &c. 665


dere, qui non semel, non vna in re, non in re temporali aut ciuili; sed quoties septenas illas iterat pteationes in quibus salutis nostræ summa vertitur, toties ille contra animam suam loquitur, contra mentem, contra salutem; *Oratio eius execrabilis, ORATIO* Prov. 18. Ps. 108.
eius in peccatum.

Certè si duntaxat vni deesset petitioni sincera mens, si vel vnum oranti adesset vitium quod vni è septem aduersaretur virtuti; solum hoc sufficeret vt quod ait sanctus Augustinus, tota penitus exhauriatur oratio; quantò magis id pauendum, quando vix vnum deest, quin omnes simul ex æquo pessundentur precandi formulæ!

Quamobrem non modò id manifestè patet, quòd *vsquemodò*, nihil quidquam vitiosus petierit, quod sanè est luctuosum; sed quod sibi etiam graues accersuerit pœnas, qui contra animam suam tam sæpe tam audacter loquutus est. Et quanti refert non in eo mori statu in quo nullus sit orationis vsus & fructus, tanti scito tua interessè, non in his viuere vitiis, quorum finis interitus, interitus fictionum, interitus precum, interitus salutis animæ.

Quæ de Oratione hîc plura suggeri possent, vide in sequenti Feria Rogationum.

Ad hæc verò Verba quæ supersunt ex Euangelio: *Ipse Pater amat vos quia me amastis*: Tota est hebdomada 3. Aduentus in 1. parte, vbi de amore Christi.



HAC HEBDOMADE, conformes Mystério Ascensionis Domini Considerationes & Veritates, ex primo Capite Actuum Apostolorum eruuntur: atque his velut stimulis & motiuis excitantur Corda nostra, *vt quæ sursum sunt quarant & sapiant, vbi Christus est in dextera Dei sedens.*

FERIA SECUNDA IN ROGATIONIBVS.

DE PRIMO MOTIVO COELESTIS DESIDERII.

QVOD IBI PROMISSVM NOBIS SIT
REGNUM DEI.

Præbuit seipsum vinum post Passionem suam in multis argumentis, per dies quadraginta, apparens eis, & loquens de Regno Dei. Actuum 1.

VERITAS PRACTICA.

Quantam in te vim habet desiderium Regni Cœlestis,
tantam tibi vim facies.

RATIO est, quia quantam in nobis vim habet desiderium rei cuiuslibet, tam potens est & efficax, vt complectatur medium quod ad eam obtinendam in primis est necessarium.

Sed ad Regnum cœlorum in primis est necessaria vis & violentia nobis facienda.

Ergo quantam in te vim habet desiderium Regni cœlestis, tantam tibi vim & violentiam facies: aut certe quantum deeris huic violentiæ, tantum & desiderio.

I. PUNCTVM.

IAMETSI Regnum illud de quo cum Apostolis fœpissime Christus egisse dicitur, possit Ecclesia intelligi, siue Religio Christiana, cuius sacramenta, præcipuasque ceremonias tunc ordinavit & suis obseruanda tradidit: quia ta-

men non alio fine militantem hîc Ecclesiam instituit, nisi vt
Thriumphantem in cœlo faceret & regnantem, neque alia lege
subditos sibi homines habere voluit nisi vt eosdem Reges con-
stitueret; Idcirco commode Regnum illud Dei, Regnum ipsum
est cœli, vbi non modo Deus regnat in Beatis, sed & Beati re-
gnant in Deo. *Accipient, inquit Sapientia, regnum decoris & dia-* Sap. 5.
demæ speciei de manu Domini. Et aperte Apostolus, *si sustinebi-* 2. Tim. 2.
mus, & conregnabimus. Denique sic agnoscunt omnes Beati di-
centes Domino; *Redemisti nos & fecisti nos Deo nostro Regnum.* Apoc. 5.
O qualis ille Rex est, & quale eius Regnum, cuius quotquot sunt
serui, tot sunt Reges! Quàm piè sanctus Augustinus: *Non timuit* In Ps. 49.
ille habere cohæredes quia hæreditas eius non fit angusta, si multi eam
possederint: Illi ipsi certe eo possidente fiunt hæreditas ipsius, & ille vi-
cissim fit hæreditas illorum.

Hoc itaque cogitandum esset attentius, atque inde motibura
efficax deducendum ad excitanda nostra desideria, hoc vel ma-
xime tempore, quo Christum illuc ascendentem colimus, vbi nos
secum aliquando regnare vult, & interim regni sui cupiditatem
accendi. Quale illud est, proh Deus immortalis! quale illud in
omnium hominum animis, *Regem esse!* & quanta regnorum
disparitas, Terreni & Cœlestis! Quidquid enim est in terreno
incommodi, longe abest à cœlesti! & quidquid in illo est foelici-
tatis & commodi, purius & abundantius in cœlo est. *Percipietis* 1. Petr. 1.
immarcescibilem gloria coronam. *DABO tibi coronam vitæ.* POSSI- Apoc. 2.
DETE paratum vobis regnum à constitutione mundi. O quis hæc Alut. 2. 25.
credat & non excitetur? O quis hæc audiat à Scripturis, & non
credat?

Verùm audienda est etiã proposita Veritas, & alte animo
infigenda: *Quod quantum est desiderium Regni huius Cœlestis, quan-*
tum est efficax, & quantam in te vim habet, tantam tibi vim & vio-
lentiam facies. Quando enim res desiderata non potest acquiri
sine aliquo medio, certum est tantum esse huius mediij deside-
rium, quantum & rei cuius est medium; vnde fit vt tanta in om-
nium mortalium animis infixæ sit pecuniæ cupiditas quanta sen-
titur; quia cùm multa desiderent homines & ad illa comparanda
medium singulare sit pecunia, quanto omnes honorem, commo-
ditates, vitamque ipsam diligunt, tanto pecuniam amant sine
qua commodè non putant posse vivere. Atque inde translatum

Prov. 2.

est ut si quid etiam valde opportunum ad Beatitudinem vel sanctitatem sacra nobis Scriptura commendatum velit, tamquam pecuniam illud commendet; *Si quaesieris eam*, inquit Sapiens de sapientia, *quasi pecuniam*, & *sicut thesauros effoderis illam*, id est, quanto affectu solet quaeri pecunia. Certe est pudor si non maiori affectu cœlestia & spiritualia prosequamur, sed longe magis pudendum, cum hæc etiam multo minus quam pecuniam inquiramus.

II. PUNCTVM.

SED ad Regnum Cœlorum in primis requiritur ut vim & violentiam nobis faciamus. *Math. 11.* Sic enim expresse Christus Dominus; *Regnum Cœlorum vim patitur, & violenti rapiunt illud.* Atque ita quando nihil aliud esset quam eius ordinatio & tale decretum, ut nullus regnum illud possideat, nisi sibi suisque motibus inordinatis violentiam faciat ad eos comprimendos, satis superque esset ad fidem & praxim. Quis enim in re tam aperta dubitare possit?

Hebr. 10.

Apoc. 3.

Verum & manifesta ratio est, cur ita necessario vis & violentia nobis sit adhibenda. Nam cum necessaria sit virtus, necessaria Humilitas, Castitas, Caritas & aliæ similes; non possint autem virtutes efficaciter exerceri nisi naturæ corruptæ vis & violentia inferatur; tam necessaria est hæc violentia, quam ipsa virtus; & sicut de vna virtute ait Apostolus, *patientia vobis necessaria est, ut voluntatem Dei facientes reportetis promissionem*, sic plane de vi nobis inferenda, cum alioqui nulla sit solida virtus. *Qui vicerit, dabo ei sedere mecum in throno meo, sicut & ego vici, & confedi cum patre meo in throno eius.* O SICUT ET EGO VICI, quam multa hic ad affectum & effectum! quasi aperte diceretur, non aliter sedebit mecum, nisi pugnet & nisi vincat; cum ego ipse non aliter sessionem illam meruerim quam pugnando & vincendo.

III. PUNCTVM.

QUANTAM ergo in te vim habet desiderium regni cœlestis, tantam tibi vim facias omnino necesse est; Quia hæc est certissima & vix nota veri desiderij ut sit efficax, & amplectatur medium

necessarium ad rem desideratam obtinendam ; aut si non illud amplectitur, non est efficax, non est verum desiderium sed casum, inane, & miserum ; vnde Sapiens : *desideria occidunt pigrum*, Prov. 21.
noluerunt enim quidquam manus eius operari, tota die concupiscit & ib. 13.
desiderat : qui autem iustus est tribuet & non cessabit. De illo scilicet pigro loquitur, de quo antea dixerat ; *vult & non vult piger*, id est vult finem, & non media, quod est absolutè nolle ; numquam enim finem assequetur, & hoc vnum habet ex desiderio suo ut valde torqueatur & penè occidatur sine vlllo fructu, quandoquidem non assumit media necessaria : qui autem iustus est, id est qui iustè de rebus iudicat, & qui in his comparandis ordinata servat media, tali rerum abundantia fruïtur, ut de suo etiam aliis liberaliter & indefinenter tribuat.

Hic tibi quis animus ? quale est tuum cœli desiderium ? qualis vigor & violentia quam tibi facis ? qualis esse soles in occursum difficultatum ? An emollescis ! an expugnas & vincis quidquid durum & asperum sese objicit ? Tùm enim maxime vis inferenda cùm reluctatur appetitus, tùm de Regno Cœlorum agitur, tùm ostendis quantum illud facias & appetas. O quam remissè & frigide, cùm vix vnumquam tecum pugnes & semper difficultati cedas ! Itane verò Regnum contemnitur ? Quæ bella, quæ vitæ discrimina non libenter suscipiunt homines, ut Regnum, ut provinciam, ut urbem, ut castellum acquirant aut conseruent ! Et pro immortalis gloriæ, pro numquam perituro Regno vix decertatur, cùm tamen nisi pugnetur non adueniat : certa vero sit & parata decertanti victoria & corona ! *Bonum certamen certavi*, ait 2. Tim. 4.
Athleta nobilissimus, cursum consummaui, fidem seruavi, in reliquo reposita est mihi Corona iustitiæ, non solum autem mihi, sed & iis qui diligunt aduentum eius. Et vero, inquit idem : *qui certat in agone*, Ibid. 2.
non coronabitur nisi legitime certauerit. Et rursum ; *Omnis autem qui in agone contendit, ab omnibus se abstinet, & illi quidem ut corruptibilem coronam accipiant, nos autem incorruptam.* Ego igitur 1. Cor. 9.
sic curro, non quasi in incertum ; sic pugno, non quasi aërem verberans : sed castigo corpus meum, & in seruitutem redigo, ne forte cùm aliis predicauerim, ipse reprobus efficiar. Audisne anima, & non expauescis ! Hem, nisi Apostolus pugnet, timet excidere regno, licet parato, & tu non timebis ! *Ecce venio cito, dicit Rex Regum, tene quod habes, ut nemo accipiat coronam tuam.* Apoc. 3.

AD Euangelium de Rogationibus, Lucæ vndecimo; præter illa quæ proximè præcedenti Dominica proponuntur de oratione, distribui possent in tres Rogationum dies, tria illa quæ à Domino commendantur, *petite, querite, pulsate*. Quæ tria verba licet vnum & idem, ad maiorem commendationem, videantur significare; non deest tamen in singulis, obseruanda vis aliqua, quæ rem magis augeat. Est enim in quærendo nonnihil amplius operæ quàm in petendo. Et dum moram quis patitur in pulsando, quis non videt ibi diutius persistendum, & aliquid grauius obeundum? Quamobrem ex potissimū seliguntur Veritates quæ & vnicuique Verbo conformes sint, & proponant præcipuè quid ex nostra parte desit, quò minùs rectè defungamur his quæ à Christo commendantur, vt detecto malo remedium facilius adhibeatur.

PETITE & dabitur vobis. Luc. II.

Nisi diligenter aduertas; Quod petis à Deo iustiùs; hoc est quod petis iniustiùs.

In 3. parte, Feria 3. & Sabbato hebdomada 7.

Si vis quod non habes, da quod habes.

In 1. parte, Dominica 2. post Epiphaniam.

Si forte times mediatorem Christum; non ille timet alios mediatores.

Tot ipse tibi exhibet, si velis, adhibendos; quot habet sanctos.

In 4. parte, Sabbato hebdomada 26.

QUÆRITE, & inuenietis. Luc. II.

Quò sæpe vehementiùs aliquid Deum oras, ore quidem illi astas propiùs, sed corde distas longiùs.

In 3. parte, Feria 4. hebdom. 14.

Si quod creditur necessarium, quærenti desit: creden-

Quantam in te vim habet desiderium regni coelestis, &c. 671
dum potius non illud esse necessarium, quàm quòd
querenti desit.

In 4. parte, Feria 2. hebdom. 21.

Sicut pietas valet ad omnia, sic omnia valent ad pietatē.

In 2. parte, Feria 6. hebdomadae Pentecostes.

PULSATE & aperietur vobis. Luc. II.

Nisi cor, lingua, & manus ad deuotionem simul con-
spirent, ipsa exspirabit deuotio.

*In 4. parte, Feria 5. hebdomada 26. Vbi quae dicuntur de deuotio-
ne, facile possunt de oratione & de perseuerantia intelligi.*

Vera fiducia, confidenti numquam infida.

In 2. parte, Feria 3. hebdomada 4. post Pascha.

Sicut qui nimis satagit, non satis Deo fedit, sic neque
is qui de suo non satis agit.

In 3. parte, Sabbato hebdomada 14. vbi de Cananea.

Vide & in 2. parte, Feria 5. hebdom. 3. in Quadragesima, vbi
de perseuerantia, quae, dum cetera pugnant virtutes, sola vincit.



FERIA TERTIA.

DE SECVNDO MOTIVO EXCITANDI

IN COELVM DESIDERII.

QVOD IBI OMNIA NOSTRA DESIDERIA

COMPLEANTVR.

Igitur qui conuenerant, interrogabant eum dicentes;

Domine si in tempore hoc restitues Regnum Israel?

Dixit autem eis: Non est vestrum nosse tempora,

672 Feria 3. Rogationum. Non est vestrum nosse tempora, &c.

vel momenta, que Pater posuit in sua potestate.

Act. 2.

VERITAS PRACTICA.

Qua ratione terrena tantum & non cœlestia desideras, eadem necesse est vt cœlestia tantum & non terrena desideres.

RATIO est, quia idcirco terrena tantum & non cœlestia desideras, vt appetitiones animi sic facilius expleantur.

Sed explendis appetitionibus animi necesse est potius vt cœlestia tantum, & non terrena desideres.

Ergo qua ratione terrena tantum & non cœlestia desideras, eadem necesse est vt cœlestia tantum & non terrena desideres;

Quod quam sit ad praxim perutile, diligenter inquirendum.

I. PUNCTVM.



VM nondum scirent Discipuli quo Christus tempore quoque modo, Regnum suum in hoc mundo manifestaret, vehementer id auebant rescire, ac propterea illum omnes interrogant, quasi vno omnes desiderio rei tantæ & tamdiu expectatæ tenerentur: *Domine, si in tempore hoc restitues Regnum Israel*: Id est Israelitico populo, cui à Romanis erat substractum & translatum ad Herodem Idumæum. At Christus volens eos auertere à cogitatione Regni temporalis ad Cœleste & æternum, hoc vnum eis respondit: *Non est vestrum, nosse tempora vel momenta qua Pater posuit in sua potestate*; quasi diceret, quamdiu hic viuatur, ponendus modus curiositati ac humanis desideriis; Non est hoc tempus neque locus cupiditatis etiam licitæ & honestæ adimplendæ; Cœlo ista reseruantur, vbi quidquid volet rationalis appetitus obtinebit; sicut ante illis expresse dixerat, *Non illo die me non rogabitis quidquam*, quia videlicet, vt ait sanctus Augustinus, *videbimus eum ubi iam nihil rogemus, nihil interrogeamus, quia nihil desiderandum remanebit, nihil querendum latebit.*

Joan. 16.

Hic

Hic ergo attentius cogitari posset de hac futura in Coelo foelicitate, quā plene satiabitur anima; & inde sic exardere desiderio Dei videndi, nihil vt præterea desideres, *Apparebo conspectui tuo*, Ps. 16.
satiabor cum apparuerit gloria tua! *QVAM dilecta tabernacula tua*, Ps. 85.
Domine virtutum, concupiscit & deficit anima mea in atria Domini.
Cor meum & caro mea exultauerunt in Deum viuum. Qui vt affectus solide & efficaciter ad fructum & effectum concitentur, opportuna est admodum Veritas qua sic vrgemur ad reprimenda quæque terrena & humana desideria, *Vt illā ipsā ratione quā terrena tantum & non celestia desideras, eādē necesse sit celestia tantum & non terrena desideres.*

Quænam porro est ratio cur terrenis adeo teneamur affectibus, vix autem celestia nos vllō modo moueant? Nempe vt rei desideratæ appetitus sic facilius expleatur. Est enim desiderium animæ, velut quædam fames corporis seu velut appetentia cibi quæ tamdiu corpus vexat, donec satiatur. Sic à Sapiente, *Concupiscentia comparatur sanguisuga cuius filia*, id est appetitiones Prov. 30. *semper dicunt, affer, affer: Quia scilicet hæc earum est natura vt semper appetant donec expleantur.* Atque hinc fit vt cum terrena sint magis sensibilia & præsentia quàm celestia, non modo magis illis afficiamur quàm celestibus, sed ita toti afficiamur, vt quod dicit Psalter, *transeamus in affectum siue in concupiscentiam cordis*, id est quidquid sumus, intellectu, voluntate, memoria, & totis affectibus, circa res terrenas & humanas occupemur, seu sperando, seu timendo, seu gaudento, seu dolendo, prout illæ occurrant, vixque aliquid superfit animi ad res celestes & diuinas cogitandas. *Pro nihilo habuerunt terram desiderabilem!* Imo et si cœlitus, vt sæpe fit, æternæ beatitudinis infunderetur cogitatio, statim repellitur, ne quid subducatur aut detrahat humanis illis affectibus quibus toti, terrenis bonis inhiamus. O Prop. Ps. 4. *curua in terras anima, & celestium inanes!* *FLII hominum vsque quo graui corde!*

Certe oportet humanum cor esse valde graue quod non obstantibus tot motiuis quibus ad celestia fursum attrahitur, semper deorsum recidat, & quærenti Prophetæ *vsque quò* sint homines tam graui & depresso corde, respondendum sit ita esse ab incunabulis, aut ab ephebis, vsque ad tumulum. *Hæc videlicet occupatio magna creata omnibus hominibus, & iugum graue super*

674 *Feria 3. Rogationum. Non est vestrum, nosse tempora, &c.*

Luc. 8. *filiis Adam, à die exitus de ventre matris eorum, usque in diem sepultura, in matrem omnium, ut ait Sapiens. Hæ sunt spinæ suffocantes sementem Evangelicam, ut nullum ferat fructum. Hæ sunt eorum excusationes qui ad coenam magnam inuitati nolunt venire. Hæc denique desideria multa inutilia & nocua, quæ mergunt homines in interitum & perditionem. Nempe ira immerguntur suis desideriis ad explendum rei desideratæ appetitum, ut potius intereant quam expleantur, & potius desinant viuere quam appetere. O verè nocua desideria.*

Ibid. 14.

1. Tim. 6.

II. P V N C T V M.

AT QVI ob hanc ipsam causam, nempe ut appetitiones nostræ plenius & facilius expleantur, res nobis tantum cælestes & non terrena desideranda sunt.

Ps. 102. Quia videlicet si solæ desiderentur, solæ sunt capaces explendis nostris desideriis, non in hac quidem præsentī vita, sicut in futura, plenissimè & superabundanter magis quam credimus: sed quantum interim idonei sumus præguitandæ illius supremæ felicitatis, tantum illa sola felicitas verè concupita, seu Deus ipse desideratus nostrum potest explere desiderium. *Qui replet in bonis desiderium nostrum.* Hoc illi tamquam proprium & singulare dicitur: hoc ille solus efficit, sed diuersimodè secundum statum nostrum: perfecte quidem & complere in cœlo à possidentibus; hic autem à desiderantibus inchoate & incompletè, si videlicet comparetur desiderium cum ipsa possessione.

At si fiat comparatio cælestis desiderij cum terreno, tunc cœleste dicendum est explere animum tam perfecte quam hic potest expleri, dummodo scilicet sit purum & defecatum desiderium, id est, nullius rei terrenæ affectu permixtum, siue ne ut illa permixtione inficiatur, siue ne in plura diuidatur & debilitetur. Hoc enim habent desideria cordis humani si pura sint & non permixta, ut rei desideratæ naturam & proprietates participant & quodammodo induant; vnde fit, ut sicut terrena desideria non possunt satiare appetitum quia res ipsa terrena quæ desideratur non est capax huius satietatis efficiendæ: ita plane cœlestia desideria nos replent & satiant, quia hoc est proprium rei cœlestis quæ desideratur, ut nos exsatiaret & repleat.

Qua ratione terrena tantum & non cœlestia desideras, &c. 675

Omnis qui bibit ex aqua hac sitiet iterum, ait Dominus de terre- *Ioan. 4.*
nis desideriiis: qui autem biberit ex aqua quam ego dabo ei, non si-
niet in æternum, sed aqua quam ego dabo ei, fiet in eo fons aqua salien-
tis in vitam æternam, NEMPE, inquit S. Chrysostomus, *qui habet*
in se fontem non afficitur siti, sic desiderium vitæ æternæ compa-
ratum cum desideriiis huius mortalis vitæ, fons quidam est quo
ita expleatur appetitus, vt non sitiat sicut sitit desiderando terrena.

Sitiunt certè desiderantes cœlum, sitiuunt in te anima mea, sed *ps. 62.*
sibi quadam suavi & beatifica, qualis in ipso cœlo reperitur, vbi
qui bibunt adhuc sitiunt, & in eum desiderant prospicere quem vident *Ecclesi. 2. 4.*
Angeli. Vnde sicut sitis & desideria in cœlo non impediunt satie- *1. Pet. 1.*
tatem Beatorum, ita neque hic sanctarum mentium quæ illuc de-
siderando aspirant. At vero sitis terreni cordis aspera est, inhu-
mana est, crudelis est & barbara quæ tanto magis inanem & va-
cuum reddit animum quo se magis explere putat. Sicut somniat
sitiens & bibit, & postquam fuerit expergesactus, lassus adhuc sitit & *1s. 29.*
anima eius vacua est, inquit Propheta: Et paulo post, Ecce serui
mei bibent, & vos sitietis: Ecce serui mei latabuntur, & vos confunde- *Ibid. 65.*
mini. Tum enim præcipue sentitur confusio cum aliter atque ex-
pectatur accidit, quod in siti terrena tam familiare est, quam de-
cipi & illudi in humanis & terrenis desideriiis, frequens est &
prope quotidianum.

Domine, da mihi illam aquam quam promittis vt non sitiam,
neque illuc amplius pergam haurire, vbi cisterna sunt cisterna disti- *1er. 2.*
pata quæ contingere non valent aquas.

III. PUNCTVM.

Q*UA ergo ratione terrena tantum & non cœlestia desideras, cœ-*
dem necesse est vt cœlestia tantum & non terrena desideres:
quia cum desideria sint velut quædam animi vacuitates quas desi-
derando animus vellet expleri, numquam explebit terrenis &
caducis, sed solum cœlestibus ac æternis: & sicut terrena deside-
rans auocatur à cœlestibus ne quid terreno desiderio detrahatur:
ita desiderantes cœlestia prorsus auocandi sunt à terrenis quæ
animum ita diuidunt & distrahunt, vt illis cœlestibus ac beatis
fatis digne desiderandis par & idoneus esse non possit. Hinc
Sponsus sponsæ: Pone me, inquit, vt signaculum super cor tuum, In *Cant. 8.*

676 FERIA 3. Rogationum. Non est vestrum, nosse tempora, &c.

signaculo scilicet sunt cauitates sicut in corde nostro vacuitates illæ quas diximus; si qua autem in materia impressum est & formatum signaculum, numquam replentur illæ cauitates nisi per ipsiusmet signaculi super-impositam formam: sic plane desideria nostra numquam replebuntur nisi per illum ipsum ad cuius imaginem & similitudinem formati sumus; Vnde illud tam frequens sancti Augustini: *Creasti nos Domine ad te, & inquietum est cor nostrum donec requiescat in te*: Necnon istud Diui Bernardi, *Capacem quippe Deo animum quidquid Deo minus est non implebit: Ceteris rebus occupari potest, at non repleri*. Quod non minus pie quam vere &

L. 3. de
Imit. Chr.
c. 16.

fuse Thomas Kempensis: *Quidquid desiderare possum vel cogitare ad solatium meum non hic expecto, sed in posterum. Expecta modicum anima mea, expecta Diuinum promissum, & habebis abundantiam omnium bonorum in cælo: si nimis inordinate ista appetis, perdes aterna & cælestia; sunt temporalia in usu, aterna in desiderio. Non potes aliquo bono temporalisatiari, quia ad hæc fruenda non es creata; Etsi omnia bona creata haberes, non posses esse felix & beata, sed in Deo qui cuncta creauit, tota beatitudo tua & felicitas consistit, non qualis videtur & laudatur à stultis mundi amatoribus, sed qualem expectant boni Christi fideles & prægustant interdum spirituales ac mundi corde quorum conuersatio est in cælis.*

Vide in 3. parte, in fine, Vbi de Votis Paupertatis & Castitatis. Necnon in 4. Sabbato hebdomadæ 18.



FERIA QVARTA.

QVÆ EST VIGILIA ASCENSIONIS

DOMINI. DE TERTIO MOTIVO DESIDERII.

SURSVM FERENDI.

QVOD ILLVC SVSPIRARE NOS FACIAT,

QVI IN NOBIS HABITAT SPI-

RITVS SANCTVS.

*Accipietis virtutem superuenientis Spiritus sancti,
in vos. Act. 1.*

Flabit spiritus eius, & fluent aqua. Psal. 147.

*Ad maxillam descendunt, & à maxilla ascendunt
usque ad cælum. Ecclesi. 35.*

VERITAS PRACTICA.

Lachrymarum descensus, ascensus est: quò est descen-
sus celerior, eò & ascensus velocior.

RATIO postremæ partis quæ priorem satis declarat, hæc est,
quòd descensus lachrymarum ex cœlesti desiderio manantium
quò est celerior, eo & cœli desiderium vehementius esse de-
signatur.

Sed quò cœli desiderium sic per lachrymas designatur esse vehemen-
tius, eò magis valet apud Patrem misericordiarum, & Deum
totius consolationis, quod est ascensum lachrymarum esse ve-
lociorem.

Ergo quo earum descensus est celerior, eo & ascensus velocior.

Ac proinde quando flabit spiritus & fluent aqua, fluant quan-
tum flabit, & cœleste desiderium magis ac magis semper ac-
cendatur.

I. P V N C T V M.

HÆC Spiritus sancti virtus quam illi erant accepturi qui-
bus Christus Dominus loquebatur, non erat tantū fortitu-
do ad corroborandos contra difficultates eorum animos,
sed etiam pietas ad eos ita emolliendos consideratione rerum
Diuiinarum & præsertim cœlestis Beatitudinis, vt, quod ait Apo-
stolus, ipsi intra se gement eò suspirantes & festinantes. *Et nos* Rom. 8:
ipsi, inquit, primitias spiritus habentes, & ipsi intra nos gemimus 2. Cor. 13:
adoptionem filiorum Dei expectantes, redemptionem corporis nostri.

Et rursum alibi; scimus enim quod si terrestris domus nostra huius habitationis dissoluatur, quod adificationem ex Deo habemus, domum non manufactam, aternam in calis, nam & in hoc INGEMISCIMVS, habitationem nostram quæ de cælo est, superindui cupientes.

Cum enim ex vna parte, mirum in modum afficerentur erga Deum, & res Diuinas; ex alia verò non parum inde retraherentur ob importunas corporis & vitæ præsentis necessitates; tanto inde desiderio tenebantur cœlestis illius libertatis consequendæ, quæ vni Deo tranquillè vacarent; vt quò magis accederent ad Beatam illam vitam, eò se longius adhuc positos crederent & ingemiscerent; quibus gemitibus illud inter alia boni accedebat vt sic minus mundo & creatis rebus adhærent, tamquam aduenæ & peregrini, imo vt exules nihil nisi patriam respirarent: Nam & qui sumus in hoc tabernaculo, inquit idem Apostolus, ingemiscimus grauati, scientes quoniam dum sumus in corpore, peregrinamur à Domino, audemus autem & bonam voluntatem habemus magis peregrinari à corpore, & præsentem esse ad Dominum.

Ibid.

O iucundiores omni terreno gaudio lachrymas! O vtinam mihi cœlitus depluant & de Dilecto annuntient, quando veniet, aut quando veniam & apparebo ante faciem eius? Ite gemitus pectoris mei, ite & nuntiate Dilecto quod eius amore langueo. Sic nos frequentissime monet Spiritus sanctus & sic postulat pro nobis gemitibus inenarrabilibus; Vnde illæ manant lachrymæ cœlestis desiderij, quæ quo descendunt ex corde & ex oculis vberius, eò in ybera Dei ascendunt verius, id est, Diuinam eius pietatem tangunt & mouent certius ad multas obtinendas gratias. Talium lachrymarum descensus, ascensus est; & quo descensus est celerior, eo ascensus est velocior. Quod certe est cogitatu pium & vtile.

Ps. 41.

Rom. 8.

Ac primo quidem paulo attentius illud est considerandum quod cum ex diuersis causis piæ lachrymæ possint excitari, tum vero ex duabus præcipuis quæ sunt irriguum illud superius, & irriguum inferius, de quo est mentio in libro Iudicum & in libro Dialogorum S. Gregorij. Irriguum inferius sunt lachrymæ promanantes ex peccati culpa vel pœna, quales illæ tam multæ Dauidis, Magdalenæ, & aliorum vere pœnitentium. Irriguum verò superius est quando ex desiderio cœlestis patriæ ita colliquescit anima, vt toti in lachrymas defluant oculi, siue ob prægustata illius aternæ beatitudinis gaudia, siue ob certam spem, ac fiduciam

Iosue 15.

Iud. 1.

3. Dial. 34.

quemdam teneriorem sensum eò perueniendi, siue ob dilatum dissoluendi corporis tempus, siue ob vehementius quoddam desiderium videndi Dei numquam à nobis offendendi, de quo desiderio hic potissimum agitur, quod tantam cum piis illis lachrymis cognationem habet, vt quò desiderium est vehementius, eo sint vberiores & celeriores lachrymæ: & quo sunt vberiores lachrymæ, eo magis significant desiderium illud esse altius, seu profundius & vehementius. Sic sanctus Augustinus, *quanto, inquit, quisque est sanctior, & desiderij sancti plenior, tanto fit eius in orando fletus vberior.* Et in Psalmos, ad hunc verticulum: *fuerunt mihi lachryma mea panes die ac nocte*, sapienter aduertit non esse dictum à Danide lachrymas fuisse potus, *ne si lachrymando potaret, videretur sitim qua inardescibat ad fontem vinum, extinxisse; sed cum dicit lachrymas velut panem manducasse, sic indicat manducando plus sitiuisse ad fontes.* Et cum additur, *die ac nocte*: sic explicat, *sive in prosperis sive in aduersis rebus, ego desiderij mei lachrymas fundo, ego desiderij mei aviditatem non desero.*

O SUPREMÆ ciuitatis mansio beatissima! ô dies aternitatis clarissima quam nox non obscurat, sed summa veritas semper irradiat. O utinam dies illa illuxisset!

L. 3. de
Imit. Chr.
4. 8.

II. PUNCTVM.

SED quò Coeli desiderium sic per lachrymas designatur esse vehementius, eò magis valet apud Patrem misericordiarum, & Deum totius consolationis, quod proprie est, ascensum illarum lachrymarum esse velociorem, quali gradu pari descendant & ascendant, seu qua vehementia descendant, eadem simul tangant & moucant sinum diuinæ pietatis.

Duo enim sunt quæ seorsim sumpta magnam apud Deum vim habent; nempe desiderium, & lachrymæ: at quanto magis simul iuncta poterunt apud ipsum? Sic agnoscebat David: *Posuisti lachrymas meas in conspectu tuo*; id est, vt habet quædam versio, *intra te, in sinu tuo*; quod illustrans sanctus Chrysostomus, nihil, inquit, ita conglutinat atque vnit Deo, vt lachryma. Itemque alibi: *Neque enim perinde amonium fontes, floridos reddunt hortos, vt plantam precationis fontes lachrymarum irrigantes faciunt in summam altitudinem excurrere.* Atque huc referas ex Eccle-

Psal. 55.
Symmachus
Rom. 6.
in Math.
orat. 2.
de Anna;

Eccl. 35. hystico quod suprà partim indicatum est: *Non despiciet Deus Dominus preces pupilli, nec viduam, si EFFVNDAT LOQUELAM GEMITVS, Nonne lachryma vidua ad maxillam descendunt & exclamatio eius super deducentem eas? A maxilla enim ascendunt vsque ad cælum; & Dominus exauditor non delectabitur in illis?*

Quæ postrema Sapientis verba duplicem possunt habere sensum & quidem contrarium, sed tamen ex æquò conuenientem. Primus quasi interrogando *Nonne delectabitur in illis?* Nonne placebunt illi eius lachrymæ? nonne se his sinet permoueri? Alius sensus quasi affirmando, *non delectabitur in illis*, id est, compatietur, condolebit, statim mouebitur ad id concedendum quod orant lachrymæ. *Nec erubescunt*, inquit iam supra relatus sanctus Ambrosius, *nec erubescunt in petendo, & impetrant in rogando. Causam non dicunt, & misericordiam consequuntur. Vtiliores lachrymarum preces sunt quam sermonum: sermo enim interdum non totum profert negotium, lachryma semper totum prodit affectum.* Adde quod sermo est longior, lachryma vero quantocypus sese explicat.

Atque hinc notant quidam interpretes quod dicente Scriptura, *Ezechiam fleuisse fletu magno*: dicit tamen Deus se *vidisse lachrymam eius*, sic enim ex Hebræo vertunt: *audiui orationem tuam & vidi lachrymam tuam*, quia videlicet, prima Regis lacryma quæ in tanto fletu caput defluere, Deum statim commouit. Non expectauit Deus postremas lachrymas, non tertiam non secundam; sed prima decidente, tum Dei viscera commota sunt. *Quis dabit capiti meo aquam, & oculis meis fontem lachrymarum, & plorabo die ac nocte non mortuos, sed me viuentem?* Esto vna tantum sufficeret lachryma, non oberunt aliæ, cum nulla vanè fluat coram Deo, & quæ suum non referat fructum ac meritum.

III. PUNCTVM.

LACHRYMARVM ergo descensus, ascensus est: & quo illarum descensus est celerior, eò ascensus est velocior seu potentior: quia sic vbertim & celerius fusæ lachrymæ indicant quale sit lachrymantis desiderium, quàm ardens, quàm incensum & spiritale: quo desideriorum ardore ita permouetur Diuina bonitas, vt

vt cum ad eminentem Beatitudinis locum præparare vult aliquos homines, sic disponat & emolliat per pia illa desideria & suspiria, vt aptè Psaltes regius: *Beatus vir cuius est auxilium abs te: Ascensiones in corde suo disposuit in valle lachrymarum, in loco quem posuit. Etenim benedictionem dabit legislator, ibunt de virtute in virtutem, videbitur Deus Deorum in Sion.*

Atque idcirco, vt ait sanctus Augustinus in hunc Psalmum, desiderium differtur vt crescat, crescit vt capiat, non enim paruum aliquid daturus est Deus desideranti, aut parum exercendus est ad capacitatem tanti boni: non aliquid Deus quod fecit daturus est, sed seipsum qui fecit omnia: ad capiendum Deum exercere: quod semper habiturus es, diu desidera. Reprobati sunt in populo Israel qui festinauerunt assidue: & affectus iste reprehenditur in scriptura, festinantium; nempe eorum, quibus præ desiderio sua quietis tædet longius vivere, & in illo tædio desistunt à propositis & retrò respiciunt.

Sic itaque desideria coelestia sunt temperanda vt quàm ardentius excitantur, tam patienter sustineantur; Quod vtrumque fuse & eloquenter coelesti eloquentia expressum habes apud Kempensem: *Fili mi, cum tibi desiderium aterna beatitudinis desuper infundi sentis, & de tabernaculo corporis exire concupiscis, vt claritatem meam sine vicissitudinis umbra contemplari possis: dilata cor tuum, & omni desiderio hanc sanctam inspirationem suscipe. Redde amplissimas superna bonitati gratias, qua tecum sic dignanter agit, clementer visitat, ardentius excitat, potenter subleuat, ne proprio pondere ad terrena labaris. Neque enim hoc cogitatu tuo, aut conatu accipis, sed sola dignatione superna gratia & diuini aspectus: quatenus in virtutibus & maiori humilitate proficias, & ad futura certamina te præpares, mihi quoque toto cordis affectu adhaerere, ac feruenti voluntate studeas deseruire.*

Euangelium Vigiliæ suprà in hac 2. parte declaratur, tota hebdomada Quinquagesimæ.



FERIA QUINTA.
ASCENSIO
DOMINI.

DE QVARTO MOTIVO COELESTIS
DESIDERII.

QVOD CHRISTVS IN COELVM ASCENDERIT,
IBIQUE REGNET.

*Et cum hac dixisset, videntibus illis eleuatus est, &
nubes suscepit eum ab oculis eorum. Luc. I.*

VERITAS PRACTICA.

Nemo veriùs ascendentis Christi Mysterium assequitur,
quàm qui veriori desiderio ascendentem Christum
sequitur.

RATIO est, quia nemo veriùs Christi ascendentis mysterium asse-
quitur, quam qui mysterij finem attingit.

Sed nemo veriùs mysterij finem attingit, quàm qui veriori deside-
rio Christam ascendentem sequitur.

Ergo & nemo veriùs ascendentis Christi mysterium assequitur,
quàm ille ipse qui sic ascendentem Christum prosequitur. Qua certe
consideratio plurimum valere potest augendis nostris desideriis.

I. PUNCTVM.



CONSIDERARI potest hodie Christus Dominus vno eodemque ferme tempore, in triplici statu valde diuerso. Primò quidem stat in monte oliuarum cum Apostolis, ceteraque illa beata turba quæ ex eius præscripto illuc conuenisse creditur, præsertim Beatissima Virgo mater. Deinde post extrema verba, post suauissimam valedictionem, atque impertitam benedictionem, *Ascendit in altum captiuam ducens captiuitatem*. Denique *sedet à dextris Dei, constitutus in cælestibus supra omnem principatum, & potestatem, & virtutem & dominationem*. Eph. 1.

Contemplare quàm sit amabilis in primo statu, cum Apostolico illo catu cui valedicens benedicit! Quàm sit admirabilis in secundo, cum beata illa captiuitate quam secum in triumphum ad cælos ducit! Quam adorabilis in cælo cælorum cum Angelis qui certatim sua illi deferunt obsequia, Regem agnoscunt, Reparatorem venerantur, Creatorem colunt & adorant. Dic illi cum Apostolis; *Surge Domine in requiem tuam, tu & arca sanctificationis tue*. Dic cum beatis comitibus: *Attollite portas, principes vestras, & eleuamini portæ aternales, & introibit Rex Gloria*. Ac denique cum Angelis alternatim canentibus: *Quis est iste Rex Gloria? Dominus fortis & potens, Dominus potens in pralio, Dominus virtutum, ipse est Rex Gloria*. O qui labores ante hanc Gloriam! o qualis Gloria post tot labores!

Sicpiè quidem & religiosè Christum Dominum ascendentem prosequeris & coles; sed longe verius & perfectiùs si verè cum Apostolo dicas: *Desiderium habens dissalui & esse cum Christo*; Di- ces autem & senties si attente consideras idcirco vel maxime Christum Dominum cælos ascendisse, vt hoc tui videndi desiderium excitaret; neque aliter quisquam verius ascendens Christi mysterium assequetur, quam qui veriori desiderio ipsum ascendentem sequetur.

Nam cum in hoc, atque in quolibet vitæ Christi mysterio, sit certus quidam finis ab ipso Christo intentus; nihil aptius ad mysterij intelligentiam & cultum dici aut cogitari potest, quàm quod spectat & attingit illum finem. Est enim finis in moralibus

686 FERIA 5. ASCENSIO DOMINI. VIDENTIBUS ILLIS ELEUATUS EST, &c.

1. 2. q. 1.
a. 2.

velut forma in physicis, quâ posita vel sublatâ ponitur aut tollitur res ipsa naturalis; sic posito vel sublato fine: unde hæc sunt expressa sancti Thomæ verba, *Causarum adinuicem ordinarum si prima subtrahatur, necesse est alias subtrahi. Prima autem est causa finalis.*

In Enchir.

4. c. 54.

Sic verò apte sanctus Augustinus vniuersim de mysteriis Christi: *Quidquid gestum est in Christi Cruce, in Resurrectione & Ascensione, ita gestum est vt his rebus consignaretur vita Christiana quæ in terris agitur: Quasi diceret, in quolibet mysterio, est aliquid certi propositum à Christo Domino ad imitationem, siue ad affectum nostrum concitandum, siue etiam ad effectum conformem producendum: quod quidem præcipue est in illo mysterio inuestigandum & recolendum. O singularem Christi Domini bonitatem, qui mihi sic intendit & consulit, vt non sibi magis quàm mihi vacet!*

II. PUNCTVM.

SED nemo veriùs Christi ascendentis mysterium attingit quàm qui superiori desiderio Christum ascendentem sequitur.

3. p. 9. 57.
a. 1.

Ioan. 14.

Nam hic est inter alios præcipuus Mysterij finis, vt quod ait sanctus Thomas, *nostra Charitatis affectus erigeretur ad cælestia, vt vbi est thesaurus noster, ibi sit & cor nostrum.* Atque hoc ipsum est quod Christus suis dixerat: *Vado parare vobis locum, & si abiero & praparaui vobis locum, iterum venio, & accipiam vos ad meipsum, vt vbi sum ego, & vos sitis.* Quid apertius? quid amabilius?

Et certè si de coelo venit in terras vt nos ad cælestia pertraheret, quanto magis putandum est illud ipsum spectasse quando coelos repetiit, cum id longe validius è coelo quàm è terra nobis hoc persuadere possit? Etenim quamdiu inter homines remansisset, præterquàm quod coelum minime obuium & apertum erat, vix etiam persuasisset hominibus, coelum terræ præferendum, cum ipse terram coelo præferret; & quò se amabiliorem redderet, eò minus se ab illo separari pateretur quotquot eum nossent, vt patet in Apostolis, quibus admodum grauis & molestus fuit sermo quem cum illis habuit de instanti suo discessu. Nunc verò cum terras deseruerit & in suprema Cœlorum ita conscenderit nunquam vt inde nisi ad Iudicium sese dimoueat, quis illum

Nemo verius ascendentis Christi mysterium assequitur, &c. 687

amet & illum videre non cupiat, illique perpetuo conuiuere & conregnare?

Nonne hoc ipsum est etiam quod dicebat, *& ego si exaltatus* Ioan. 12.
fuero à terra, omnia traham ad meipsum. Sic ergo ascendit, sicut *Dem. 32.*
aquila prouocans ad volandum pullos suos, & super eos volitans ex-
pandit alas suas; Et alius apte Propheta, Ascendit pandens iter ante Mich. 2.
eos; unde nihil prorsus restare potest dubij quin idcirco ascende-
rit vt nos ad se attraheret, sicut sponsa pridem exoptabat: Trahe Cant. 1.
nos; post te curremus in odorem unguentorum tuorum. Itane sentis,
itane reuera postulas?

III. PUNCTVM.

NEMO igitur verius Christi ascendentis mysterium assequitur,
quàm qui veriori desiderio Christum ascendentem sequitur:
quia cum in omni mysterio non modo Patris æterni suamue
Gloriam spectarit Christus, sed aliquod particulare nostrum
bonum quod voluit etiam à nobis particulatim intendi; quid
est quod cogitari possit vel Christo gloriosius vel nobis vtilius
quàm quod ipse Dominus sibi & nobis præfixit tamquam vnum
finem spectandum? quis autem ille præfixus finis nisi quem ipse
designauit, vt **VBI ILLE EST, ET NOS SIMVS**, nunc Ioan. 17.
qui lem mente & affectu, post verò corpore & effectū, seu præ-
sentia magis effectiua & reali. Sic de se ac de nobis luculentè
Apostolus, *sequor autem, si quomodo comprehendam in quo & com-* Phil. 3.
prehensus sum à Christo Iesu: qua quidem retrò sunt obliuiscens, ad
ea verò qua sunt priora extendens meipsum, ad destinatum perse-
quor, ad brauium supernæ vocationis Dei in Christo Iesu. Quicum-
que ergo perfecti sumus, hoc sentiamus. Et post pauca, quibus mi-
serandum eorum statum deplorauit qui terrena saperent, sic
pergit: *Nostra autem Conuersatio in Cælis est, unde etiam saluatorem*
expectamus Dominum nostrum Iesum Christum qui reformabit corpus
humilitatis nostræ configuratum corpori claritatis suæ. O quando erit
illa hora? Interim verò nostra Conuersatio sit in cœlis. De hac
præclare sanctus Bernardus Sermone quarto: *Vide, inquit, quid* Ser. 4 in
sit conuersari in vno loco: quam suauē sit conuersari in cœlo, quam Asc. Dom.
gloriosum & utile! Et verò vide quàm id tibi rarum & infre-
quens, in cœlo conuersari! Vnde hæc raritas? vnde hæc infre-

688. FERIA 7. Ascensio Domini. Videntibus illis eleuatus est, &c.

15. 11. quentia? Nimis terrena sapis; pluma infecta luto non potest ita sursum erigi sicut euolaret si non esset lutosa. Excutere de puluere, consurge, solue vincula colli tui: & audi sanctum Augustinum:

Ser. 175. de Temp. Ascendamus cum Christo interim corde, ut cum dies eius promissus aduenerit, sequamur & corpore. Et paulo post: si ergo recte si fideliter, si deuote, si sancte, si pie Ascensionem Domini celebramus,

Ser. 176. de Temp. ascendamus cum illo, & sursum corda habeamus. Itemque alio consequenti sermone: Elaboremus ergo carissimi ut quemadmodum Dominus hac die, nostro cum corpore ad superna conscendit, ita nos post illum quomodo possumus, spe ascendamus, & corde sequamur.

Ipsa affectu pariter & profectu ascendamus post illum, etiam per vitia, & passionem nostram. Si utique unusquisque nostrum subdere eas sibi studeat, ac super eas stare consuescat, ex ipsis sibi gradum construit quo possit ad superiora conscendere. Eleuabunt nos si fuerint infra nos. De vitiis nostris schalam nobis facimus, si vitia ipsa calcamus.

O quæ Diuina bonitas, quæ de malis nostris tanta bona eliciat! quis se audeat ab hac ascensione mentis excusare, cum nullus sit qui vitia non habeat per quæ possit ascendere!

Videnda sunt quæ hac tota proponuntur hebdomade; quorum omnium hic vnus & idem finis: Ad quem vehementius etiam excitandum adhiberi potest & hæc Veritas.

Tanti cuiusque refert se à terra retrahere, quanti ad cælum trahi.

Ratio est, quia tanti refert impedimentum boni possidendi tollere, quanti bonum ipsum possidere.

Cum videlicet alioquin nili sublati illis impedimentis vix aut ne vix tale bonum acquiri posset. Vsq; quod marceitis ignauia, & non intratis ad possidendam terram, quam Dominus Deus Patrum vestrorum dedit vobis? sic Iosue concitabat suos ad excutiendam illam ignauiam quæ tali obstabat bono possidendo.

Sed se à terra retrahere, hoc est tollere impedimentum cæli possidendi, seu diuinæ attractionis ad cælum desiderandum & possidendum.

Licet enim multa sint quæ sese opponant; aut potius licet vnum in lethali peccato versetur obstaculum: tamen vel illa om-

nia, vel hoc vnum lethale quod cælesti obstat bono, sic referuntur ad amorem terrenorum tamquam ad singularem cæli obicem, ut illo amore sublato vel mitigato, dicantur cessare cætera; vel quia terrenus ille amor quicquid est aliud impediementi complectitur; vel quia peccati labes inde damnosior effluit; vel quia cum humanus animus omni vacare affectu non possit, quaratque sibi semper aliquid, quo vel possidendo vel inquirendo se occupet, quando semel se terrenis exiit curis, tum facile se diuinis admiscet: vel quia cum secundæ siue sequentes gratiæ semper à nobis exigant ut primis obsecundemus, utque illa prima gratia quâ prouocamur in melius, ut à terrenis recedamus: sic proinde fit ut ille terrenorum recessus sit accessus ad cælum; neque aliter accedendi fiat potestas, quàm recedendo; quia sic est statuta diuinitus via, quam prætergredi nefas sit & præcipitium. Vnde beatus Iob: *vestigia eius secutus est pes meus, viam eius custodiui, & non declinaui ex ea.* Iob. 23.

Denique quocumque intelligatur modo, sic Scripturæ pene omnes, quando de cælis agitur, de terra primum loquuntur; quando ad cælestem nos excitant assequendam beatitudinem, à terrenis antè nos euocant cupiditatibus, ut euidenter liqueat hoc vnum interesse obstaculum, quo sublato cælum teneatur. Egre- Gen. 12.
dere de terra tua & de cognatione tua & de domo Patris tui, & veni in terram quam monstrabo tibi. CONSIDEREMVS, inquit sanctus Ambrosius libro de Abraham Patriarcha, *ne forte hoc sit exire de terra sua, de huius terra, hoc est, de corporis nostri quadam commoratione egredi, de qua exiit Paulus qui dixit, nostra autem conuersatio in cælis est.* Quod aperte declarans idem Apostolus sic de illo ipso Patriarcha: *Fide, inquit, demoratus est in terra repromissionis tamquam in aliena, in casulis habitando cum Isaac & Iacob cohæredibus repromissionis eiusdem. Expectabat enim fundamenta habentem ciuitatem cuius artifex & conditor Deus.* Id est, idcirco sic illi Patriarchæ sua deseruerant, ut quæ sibi à Deo essent promissa consequerentur, quia sic Deus iusserat, & quia sic figurabant deserenda esse vel effectu vel affectu terrena nostra, ut promissis cælestibus perfruamur.

Quod & confirmat exemplo cæterorum omnium veteris testamenti Principum ac virorum qui fide illustriores habentur, *qui- Ibid.
bus dignus, inquit, non erat mundus, ac proinde à Patria libentes*

exulabant, vt meliorem inuenirent nempe caelestem: Quos inter eximius Moyſes, grandis factus negauit se eſſe filium filiae Pharaonis, magis eligens affligi cum populo Dei, quàm temporalis peccati habere incunditatem, maiores diuitias aſtimans theſauro Aegyptiorum, improprium Chriſti: aſpiciat enim in remunerationem. Quali diceret, lic videbat contemptu temporalium, remunerationem prome-
rendam.

Sed quid vmbra & figuram conſectamur, cum ipſa lux & veritas Chriſtus Dominus tam apertè ſe prodat, vt alterum ex
Matth. 6. altero ſuadeat, Nolite, inquit, theſauriſare vobis theſauros in ter-
Ibid. 12. ra, theſaurizate autem vobis in calo. VADE, vende qua habes, & da pauperibus, & habebis theſaurum in calo. Quod cum Adoleſcens, cui loquebatur, renuiſſet; tum Ieſus Diſcipulis ſuis. Filioli quàm difficile eſt confidentem in pecuniis in regnum Dei intrare! Facilius eſt camelum per foramen acus tranſire quàm diuitem intrare in regnum Dei, nempe affectu ſuis bonis adhaerentem; quo affectu depoſito quàm facile protinus & peruium reddatur illud regnum, & iam ante dixerat docendo, Beatos eſſe pauperes quorum eſſet regnum caelorum, & conſequenter confirmat dum ait Petro inquirenti, quid ſibi relinquenti omnia futurum eſſet:
Matth. 10. Amen, dico vobis, nemo eſt qui reliquerit Domum, aut fratres, aut ſorores, aut patrem, aut matrem, aut filios, aut agros propter me & propter Euangelium, qui non accipiat centies tantum, nunc in tempore hoc; & in ſaculo futuro, vitam aeternam.

De quibus Domini verbis fuſè in 4. parte, tota hebdomada 17. vbi ex multis propoſitis Veritatibus, hæ viderentur præſenti argumento commodiores.

Hoc amanti cælum paupertas eſt: quod amanti terram, diuitiæ.

Quantò id minus verum putant diuites quod de ipſis Chriſtus dixit, tantò id magis verum eſt putandum. Non fit à Chriſto diuitibus difficultas regni caelorum, ſed illam ſibi faciunt diuites contra ipſum Chriſtum. Quanta eſt facilitas diuitiarum vt amentur, tanta eſt difficultas diuitum vt ſaluentur.

Quantumcunque ſint neceſſariæ & licitæ diuitiæ, nunquam

Tanti cuiusque refert se à terra retrahere, quanti ad, &c. 691
quam tamen est necessarium & licitum, velle esse di-
uitem, sicut omnes volunt.

Vix se vllus talem putat diuitem, qualis in Euangelio
improbatur; Et vix tamen vllus est qui non sit talis.

Nempe affectu omnes nimio suis adhærent commodis vel de-
licis, sub prætextu quodam necessitatis, vnde est illud impedi-
mentum cœli possidendi, de quo hic agitur, & ad quod aue-
rendum concluditur;

*Tanti ergo refert cuiuscumque nostrum se à terra retrahere, quanti
ad cælum trahi.* Quæ quidem vberius ex Apostolicis scriptis,
& sanctorum Patrum sententiis illustrari possent: sed Christus
hodie præsertim audiendus: ac propterea sequens etiam Veri-
tas erit opportuna:

Sedentem in Cælo Christum, & inde nobis loquentem
non audire, periculosius est, quàm dùm in terris lo-
queretur.

HOC IPSVM EST QVOD PROPONIT *Hebr. 128*
APOSTOLVS: *videte ne recusetis loquentem. Si enim*

illi non effugerunt recusantes eum qui super terram loquebatur:
multò magis nos qui de cælis loquentem nobis auertimus.

Id est, si consideremus illos qui olim in deserto sibi loquentem
Deum sæpe recusarunt; siue illos qui Christum Dominum in
Palæstina prædicantem repudiarunt, non est dubium quin vtri-
que grauiter peccauerint, ac meritas peccati pænas dederint; sed
id certum nobis esse debet, nos multò grauius peccaturos & pu-
niendos fore, si de cælis modo loquentem nobis Christum auer-
timus.

RATIO est, quia tantò grauius est peccatum eorum qui loquen-
tem sibi Christum recusant, quantò magis cognoscitur Christus
esse Deus.

Sed cùm è cælis modo nobis loquitur, magis cognoscitur esse Deus,
quàm cùm in terris loqueretur.

Ergo nos grauius & peccabimus & puniemur, si loquentem no-

bis Christum auertimus aut recusamus. Seu quod idem est, ergo id periculosius ad peccatum atque ad pœnam, quàm dum olim loqueretur & recusaretur.

I. PUNCTVM.

QUANDO Theologi tractant de obiecto quod vocant formale fidei, quo tanquam motiuo firmissimo innitmur ad credendum, vna voce omnes affirmant cum sancto Thoma, non esse aliud quàm ipsum Deum, vt est prima & infallibilis veritas, quæ nec decipi cogitando, nec loquendo potest decipere. *Nihil credimus*, inquit sanctus Doctor, *nisi quia Deus reuelauit*: At quando etiam scimus aliquid diuinitus reuelatũ, id tam certò debemus credere, quàm certum est nihil aliud fide diuina credendum esse. *Le rugiet, quis non timebit? Dominus Deus locutus est, quis non prophetabit?* Quasi Propheta diceret, sicut statim ad Leonis rugitum timent omnes; sic ad Deum loquentem minas, flagella, cædes, & aduersos quoscunque casus, licet à sua bonitate multum alienos, tam certo tamen timendum est id futurum quod dixit; Vnde infidelitatis peccatum, quo se loquenti quis opponit Deo, & quod primæ contradicit veritati, graue profecto peccatũ est grauiq; pœna dignum; sed cum peccati, pœnæq; grauitas maior aut minor esse possit ex variis qui circumstant peccatum casibus: tantò erit peccatum illud grauius, quantò quis magis scire poterat Deum esse qui loquitur & Cui loquenti resistit.

Sunt enim aliis alia notiora signa; *Signatum est super nos lumen vultus tui Domine*, ait Propheta Regius, id est, omnes hoc signum habent à naturali lumine, quod sit Deus, & quod sit colendus: ac propterea nullus excusari potest ab aliquo Dei cultu. Sed cùm ad illud rationis lumen magis illustrandum accedunt alia, siue à creaturis, siue à Deo; siue ex mirandis naturæ effectibus, siue à stupendis supra naturam signis; tunc illi minùs excusantur magisque peccant, qui clariùs Deum vident, nec tamen confitentur; Vnde ex Gentilibus illi perfidiores, qui Doctiores: supra Gentiles verò Iudæi nequiores, & ex Iudæis illi miserrimi, qui erant beatiores ex præsencia colloquioque Christi Domini, cuius Do-

Artinam respuerunt, mores contempserunt, vitam sustulerunt, qui & Dominum occiderunt Iesum & Prophetas, inquit Apostolus, *1. Thess. 2.* & nos persecuti sunt, & Deo non placent, & omnibus hominibus aduersantur, prohibentes nos Gentibus loqui ut salua fiant, ut impleant peccata sua semper: peruenit enim ira Dei super illos usque in finem.

Quale est enim illud incredulitatis portentum non illi credidisse, cuius Diuinitatem antiqua denuntiant oracula, noua in dies probabant signa, Dæmones expulsi corporibus loquebantur, cæli, aquæ, terra, totus vniuersum orbis confitebatur, ipsius denique Sanctitas vitæ & Doctrinæ palam demonstrabat! Quam dura illi ceruice & incircumcisis cordibus, qui tantæ obstitissent credulitati! Cui crederent nisi loquenti Deo? Quem verò Deum *3. p. 9. 43.* esse credent, nisi qui diuina patrat opera, Deum ut se testetur *2. 4.* esse? vnde & illis dicebat, *si non facio opera patris mei, nolite credere* *Ioan. 10.* *mihi: si autem facio, & si mihi non vultis credere, operibus credite, ut cognoscatis & credatis quia Pater in me est, & ego in Patre.* Sic ostendebat illis, inquit D. Chrysostomus, *se nihilo esse minorem patre ab operum qualitate, substantiam enim eius videre non poterant.* Quamobrem tantò grauius eorum peccatum fuit, qui loquentem recufarunt, quantò apertiùs scire poterant ipsum esse Deum, quia quicquid hoc nomine loqueretur, non poterat non esse veritas, & illi certò non poterant sine peccato veritati loquenti resistere.

II. P V N C T V M.

SED cùm modo de cælis nobis loquitur Christus, magis cognoscitur esse Deus, quàm cum in terris loqueretur.

Tria hic essent explananda nisi alibi fusiùs haberentur.

Primum, quomodo nobis iam è cælo loquatur Christus. Secundum, quid loquatur. Tertium, quàm verè modo magis cognoscatur esse Deus, cùm de cælo nobis loquitur.

De primo, vide in 3. parte, Dominicam vndecimam, vbi hæc veritas exponitur, *Qui non audit, non audiatur.*

Septem ibi producuntur voces seu modi, quibus Christus dici potest nobis loqui, iuxta septenarium illud quod in Psalmis refertur: *Vox Domini super aquas; vox Domini in virtute; vox Domini in magnificentia;* & quæ sequuntur, ex quibus satis modo nobis sit vnã aut alteram vocem seu formam loquendi nobis

694 FERIA 5. Ascensio Domini. Videntibus illis eleuatus est, &c.

proponere; magisque laboremus in re ipsa efficienda quam loquitur, quàm in modo indagando quo loquitur.

Complectemur itaque, breuitatis causa, secundum ex illis propositis cum illo primo, simulque proferemus quid & quomodo iam Christus nobis loquatur. Iam audiuiſtis, iam vox emissa est, iam vobis proclamatum, *Nolite thesaurizare vobis thesauros in terra, thesaurisate autem in celo.* Nonne vox Christi est? nonne ad nos perinde modo dirigitur, ac cum illam primò protulit Dominus? Nonne fides, nonne spes nostra tota posita est in eius verbis? Quorsum verò in eius verbis, nisi nos illa spectent verba? Vobis ministrabant, inquit opportunè S. Petrus, *vobis ministrabant ea quæ nunc nuntiata sunt vobis per eos qui euangelizauerunt vobis.* Quasi diceret, dum Christus loquebatur Iudæis aut Discipulis suis, vobis parabat quod modò vobis loqueretur. Vos habebat ita præſentes atque illos omnes quibuscum aderat. Tam probè norat futurum hoc tempus quo illa verba vobis erant nuntianda, quàm cum ea primùm enuntiaret. Nec minorem à vobis reposcet rationem de seruatis aut non seruatis suis verbis, quàm ab illis qui loquentem audierunt. *Qui crediderit, saluus erit; qui non crediderit, condemnabitur. Qui spernit me, & non accipit verba mea, habet qui iudicet eum: sermo quem locutus sum, ille iudicabit eum in nouissimo die.* Quasi diceret, sicut omnium ego sum Iudex, sic omnes ex sermone iam habito, quasi ex sententia iam prolata, iudicabo. At nonne tu ex illis es quorum Christus est Iudex? Quomodo vero te ex verbis suis iudicabit, nisi ad te verba illa sua prius retulerit?

Sed dices, non diffiteor ad me spectare illa Christi verba, verùm quod erat in quæſtione, quomodo quæ in terris olim pronuntiauit, iam de cælo proferre dicendus est? Respondetur primò, satis esse ad propositam veritatem, iam illum esse in cælo qui nobis olim in terra locutus est. Deinde verò, etiam de cælo nunc loquitur, quando nunc per me vobis hoc ipsum prædicat & commendat, nam ipse est qui per suos loquitur, ipse est qui reuera tam auditur, & spernitur; quàm verè dixit suis, *qui vos audit, me audit; & qui vos spernit, me spernit.* Vnde audacter Apostolus, *An experimentum quaritis eius qui in me loquitur Christus?* Nec oportet esse Apostolum ad hanc Christi personam exhibendam; satis est esse approbatum eius verbi ministrum; satis est si

1. Pet. I.

Ioan. 12.

Luc. 10.

2. Cor. 13.

quis legitimè & ordinatè verba eius enuntiet. Quæ quidem enuntiata Christi verba si quis sperneret, nonne ipsum diceretur Christum spernere? Quamobrem verò, nisi quia Christi sunt loquentis verba, Christus ipse representatur, ipse loquitur, ipse in dicente sicut in dictis suis spernitur aut honoratur; *Non te abie-* 1. Reg. 2.
cerunt, sed me.

Denique quando Christi verbum audis, nisi sis omnino fa-
xeus, nonne cor tuum emollitur, nonne accenditur, nonne pa-
uet, nonne terretur, nonne quoquo modo commouetur? At vnde
quæso est illa commotio? Non est profectò, non est humanæ vo-
cis opus. Non est in omnium potestate hominum vel exilem ve-
ræ pietatis commouere sensum. Diuina Christi vox & virtus è
cælo est, quæ quidquid boni sensus est, operatur. Vox loquentis
in Christi nomine, *vox est Clamantis*: Vox quidem solùm humana
est, sed non solus homo qui loquitur, quantũ ad vocis effectũ spe- 2. Ps. 28:
ciat; Vox Christi est in virtute, in magnificentia, vox confringentis ce-
dros, vox commouentis desertum. Sicut in Sacramentis humana
vox est pronuntians sacra verba, sed Vis diuina Christi est, effe-
ctum voci de cælo prabens: vnde Apostolus suis: *Christus exhor-* 2. Thess. 2:
tetur corda vestra, quasi diceret, aurem ferire possumus corporis,
at Christi solius est cor mouere; sufficientia nostra ex Deo est, qui 2. Cor. 3.
& idoneos nos fecit ministros noui testamenti.

Quamobrem quod tertium est & præcipuum propositionis no-
stræ caput, facile est explanare, quàm sit videlicet maius & illu-
strius ad declarandam Christi Domini Diuinitatem, quod sit ipse
in cælis, atque inde nobis modo loquatur, quam cùm in terris
esset. Nam & illa omnia suæ diuinitatis argumenta quæ Chri-
stus dabat Iudæis, nos habemus; & illud insuper eximium & sin-
gulare, quod non habebant, nobis collatum est, vt quod resur-
rexit & ad cælos ascendit, credamus & profiteamur omnes.
Dico illud esse eximium & singulare præ cæteris quæ conferre
possint ad certissimam diuinitatis Christi fidem roborandam;
nam vt notarunt Sancti Patres, in aliis Christi mortalis myste-
riis semper occurrit humanum & infirmum aliquid, quod tamen si
à Diuina non est alienum persona, tamen humanæ magis est pro-
prium naturæ quàm Diuinæ: Cùm autem in cælis est, cum se
illuc sua virtute promouet, cùm supra quidquid creatum est, ad
dexteram Patris sedet, & æqualis est cum illo potestatis; cùm

inde sanctum emittit Spiritum; quo totum in se conuertat mundum; cum nos denique ad se ita trahit, vt in odorem vnguentorum eius curramus, quid est quod in isto Mysterio non sit eximium & singulare, in quo totum est caeleste, totum diuinum? Quid est quod desideretur apertius ad Christum verum Deum agnoscendum? *Ad quem enim Angelorum dixit aliquando, sede à dextris meis, vt præclare Apostolus.*

Hêbr. 1.

Matth. 12.

Ibid. 22.

Ps. 109.

Ioan. 16.

Serm. 2. de
Asc. Dom.

Hoc est quod expetebant illi qui de cælo signum petebant, sed nobis erat reseruatum. Hoc est quo vno præcipue Christus suam ex veteri testamento Diuinitatem indicauit, cum à Iudæis quæreret, quid sibi videretur de Christo, cuius esse filium dicerent? Cumque respondissent esse Dauidis; at quomodo, ait eis, *quomodo ergo Dauid in spiritu vocat eum Dominum dicens, dixit Dominus Domino meo, sede à dextris meis.* Quasi diceret, nonne hinc manifestè videris supra hominem esse quem Dauid Dominum vocat, & tùm reuera Dominum apparere, cum sedet à Dextris Dei? Hoc illud ipsum est quo, vt supra est expositum, quidquid in vita Christus gesserat, quàm sanctè & iustè gestum esset, affirmabat manifestandum fore; *quia, inquit, ad patrem vado, quia sic patebit me esse Deum, ac proinde nihil nisi iustum egisse.*

Hoc est unde ipsi beati Apostoli qui, vt ait sanctus Leo, *tot miraculis confirmati, tot sermonibus eruditi, atrocitatem tamen Dominica Passionis expauerant, & veritatem resurrectionis eius non sine hesitatione susceperant: tantum de Ascensione Domini profecerunt, vt quicquid illis prius intulerat metum, verteretur in gaudium.* Totam enim contemplationem animi, in diuinitatem ad Patris dexteram sedentis erexerant, nec iam corporea visionis tardabantur obiectu, quo minus in id aciem mentis intenderent, quod nec à Patre descendendo abfuerat, nec à discipulis ascendendo discesserat. Tunc igitur, dilectissimi, filius hominis, Dei filius excellentius sacratiusque innotuit, cum in paterna maiestatis gloriam se recepit, & ineffabili modo cæpit esse diuinitate præsentior, qui factus est humanitate longinquior. Tunc ad aequalem Patri filium eruditior fides gressu mentis cæpit accedere, & contrectatione in Christo corporea substantia quæ patre minor est, non egere: quoniam glorificati corporis manente natura, eo fides credentium vocabatur, ubi non carnali manu sed spiritali intellectu par genitori unigenitus tangeretur.

Sic denique Diuus Thomas, vbi de rationibus Ascensionis Do-

Sedentem in cælo Christum, & inde nobis loquentem, &c. 697

mini, hanc in primis affert, *ut magis agnosceretur Deus, in cæli sede*, 3. p. 9. 57. & 58. inquit, *tamquam Deus & Dominus qui dona dat hominibus iuxta illud, ascendit super omnes calos ut impleret omnia, suis scilicet donis: Et augetur nostra reuerentia dum iam non existimamus Eum sicut hominem terrenum, sed sicut Deum cælestem*, citatque illud Apostoli, *cum cognouimus secundum carnem, Christum, id est, hominem mortalem, sed nunc iam non nouimus. Nunc magis eum considerantes in cælis quàm in terris, magis cum eo, ut Domino Deo, conuersamur quàm cum mortali homine. O felicem humanæ sortis commutationem! Cum hominibus conuersatus est in terris Deus, ut iam in cælis homines conuersentur cum Deo!*

II I. P V N C T V M.

SEDENTEM igitur in cælis Christum & inde nobis loquentem non audire periculosus est, quàm dum in terris loqueretur: periculosius est, inquam, ad lapsum, ad noxam, ad pœnam & detrimenta quæuis tantò grauius incurrenda, quantò facilius est & illum agnoscere Deum esse qui de cælo loquitur; & qui loquenti Deo repugnat, veritati manifestæ repugnare: qua repugnantia quid scelestius ad culpam? & ad pœnam quid grauius? *Reuelatur enim ira de cælo super omnem impietatem & iniustitiam hominum, eorum qui veritatem Dei in iniustitia detinent, quia quod notum est Dei, manifestum est in illis, Deus enim illis manifestauit. Propter quod iradidit* Rom. 1. *illos Deus in desideria cordis eorum in immunditiam, ut contumeliis afficiant corpora sua in semetipsis, qui commutauerunt veritatem Dei in mendacium.*

Videsne Apostolum hoc vno magis veteranos illos Infideles infectari, quo magis manifestæ veritati repugnarunt. Vnde & in alios, quibus etiam illustrior irradiarat veritas, vide quàm acerbius inuehatur: *O insensati Galata, quis vos fascinauit non obedire veritati?* Gal. 3.

Ac denique illorum miseriam qui ab Euangelio dissentirent, propterea vel maximè deplorandam ait, *eo quod charitatem veritatis non receperunt ut salui fierent, id est, veritatem practicam & agentem: ideo mittet illis Deus operationem erroris ut credant mendacio, ut iudicentur omnes, qui non crediderunt veritati sed consenserunt iniquitati.* Quasi diceret, primò quidem eorum fuit

culpa, quòd noluerint credere manifestæ veritati, cùm possent illi facile credere; post vero, hæc est eorum culpæ pœna, vt non possint tam facile, licet velint. Palpabunt in meridie. *Per diem incurrent tenebras, & quasi in nocte sic palpabunt in meridie.*

Quapropter attente modo nobis est audiendus Apostolus, vt deinceps attentius audiat Christus: *Videte ne recusetis loquentē.*

Videte quas illi subierint pœnas, qui loquentem in terris recusarunt. Videte quàm sit modo damnosius illum è cælis loquentem nobis auertere. Videte quis loquatur, quid loquatur, quibus modis & à quibus auertatur? *videte vosmetipsos ne perdatis quæ operati estis, sed vt mercedem plenam accipiat.* Videte quantis partibus supra cæteros omnes via vobis ad eam veritatis notitiam sit aperta. Videte quid inde vos auertat, quam sit vanum & ludicrum! Videte quòd si à vobis aliquid terrenum petitur, pro terreno cæleste, pro temporali æternum, pro modico summum & quod est vnicum bonum promittitur. Videte quòd res vestræ non tam postulentur quàm temperatus rerum affectus, vnde nihil vobis deperit, sed potius accedit plurimum & quietis & honoris & gratiæ. Videte quòd sit solus defectus fidei: quàm sit pauendum illud incredulitatis vitium, quo retardamini.

His & similibus, cum gratia, vehementius exardescite ad contemptum terrenorum & amorem cælestium iuxta illud etiam Apostoli: *festinemus ergo ingredi in illam requiem, vt ne in idipsum quis incidat incredulitatis exemplum.* Est enim festinare, non retardari terrenis affectibus, sed recta quòd vocamur, & indefinenter pergere. Quod & præclare sanctus Leo, sursum vocatos animos desideria terrena non deprimant, ad aterna prælectos peritura non occupent, viam veritatis ingressos fallaces illecebræ non retardent, & ita à fidelibus hæc temporalia decurrantur, vt peregrinari se in hac mundi valle cognoscant, in qua etiamsi quædam commoda blandiantur, non amplectenda nequiter, sed transcendenda sunt fortiter. Ad hanc enim nos deuotionem beatissimus Apostolus Petrus incitat, & secundum illam dilectionem quam pascendis Christi ouibus trina Dominici amoris professione concepit, obsecrans dicit, Charissimi obsecro vos tamquam aduenas & peregrinos abstinere vos à carnalibus desideriis quæ militant aduersus animam. Cui autem nisi Diabolo carnales militant voluptates, qui animas ad superna tendentes corruptibilitatem bonorum delectationibus obligare, & ab illis sedibus, de quibus ipse

Sedentem in cælo Christum, & inde nobis loquentem, &c. 699

ipse excidit, gaudet abducere?

Vide in 3. parte, Feriam 6. hebdomadæ 13. vbi ad verba Christi Domini, *ego sum panis viuus qui de cælo descendi*; quibus hæc Apostoli conformantur, *sicut portauimus imaginem terreni, portemus & imaginem cælestis*, exhibetur hæc veritas:

Qui cælesti pane sic viuunt vt cælestes fiant; sic in suis viuunt corporibus, sicut Cælites in assumptis.

Vide etiam in 4. parte, in festo Sanctorum omnium.



FERIA SEXTA.

DE QVINTO MOTIVO EXCITANDI IN COELVM DESIDERII:

*QVOD TAM IVSTE DEBITVM SIT HOC
DESIDERIVM, VT INIVSTI SIMVS ET
INDIGNI COELO CONSEQVENDO, NISI
COELVM DESIDEREMVS.*

*Viri Galilæi, quid statis aspicientes in Cælum? Hic
Iesus qui assumptus est à vobis in Cælum, sic
veniet, quemadmodum vidistis eum euntem in
Cælum. Aa. i.*

VERITAS PRACTICA.

Sic dignum est Cælum nostris desideriis, vt nisi cælum
desideres, cælo sis indignus.

RATIO est, quia nisi cælum desideres, cælum despicias.

Sed si cælum despicias, cælo es indignus.

Ergo sic dignum est nostris desideriis, vt nisi cælum desideres, cælo sis

700 FERIA 6. infra OCT. Ascensionis. Sic veniet quemadmodum, &c.
indignus, & omnino priuandus; Quod quàm sit pauendum sa-
tis patet.

I. P V N C T V M.

QUVM Apostoli ceterique spectatores Ascensionis Christi, ut refert sanctus Lucas, intuerentur in cælum euntem illum, ecce duo viri astiterunt iuxta illos in vestibus albis, qui & dixerunt; Viri Galilai quid statis aspicientes in cælum? Hic Iesus qui assumptus est à vobis in cælum, sic veniet quemadmodum vidistis eum entē in cælum. Quali dicerent, sic spectate & prædicate ascendentem Dominum ut sciant omnes sic eum iudicem aliquando descensurum ad exigendam vitæ actæ rationem & ad reddendum unicuique secundum opera sua. Quod præclare sanctus Gregorius; *Hom. 29.* Oportet, inquit, ut illum sequamur corde ubi cum corpore ascendisse credimus. Desideria terrena fugiamus: nihil nos iam delectet in infimis qui patrem habemus in cælis. Et hoc nobis est magnopere perpendendum, quia is qui placidus ascendit, terribilis redibit, & quidquid nobis cum mansuetudine præcepit, hoc à nobis cum districtione exiget, Nemo ergo indulta pœnitentia tempora paruipendat, nemo curam sui dum valet agere negligat, quia Redemptor noster tantò tunc in iudicio districtior veniet, quanto nobis ante iudicium magnam patientiam prærogauit.

Ex quibus sancti Doctoris verbis patet, quod sicut non est satis cælum desiderare nisi adhibeatur cura salutis comparandæ, ita etiam ad eam comparandam multum valere coeli desiderium; Neque aliter cogitare possumus interrogatos ab Angelis Apostolos, quid tamdiu mirarentur & cælum aspicerent, nisi ut monerentur, non esse quidem satis cælum intueri aut desiderare, nisi simul cælo laborarent; Et verò etiam ad hunc laborem suscipiendum non parum valere cogitationem & desiderium coeli, de quo agitur in illo labore & opere peragendo. Quod ut efficacius persuadeatur, sic est proposita Veritas, ut non modo desiderij coelestis utilitas aut dignitas demonstretur, sed & ipsa necessitas; Sic enim dignum est cælum nostris desideriis, nostris votis & suspiriis, ut nisi cælum desideres, cælo te indignum ad omnem aternitatem præstes.

Ratio est facilis & euidentis: Nam nisi cælum desideres, cælum despicias: sicut si proponeretur facili pretio, res æque commoda, & utilis, ac pretiosa & rara; Quis talis rei desiderio non tange-

Sic dignum est cœlum nostris desideriis ut nisi cœlum, &c. 701

retur? aut quis nullo rei tantæ tactus desiderio non diceretur vel insipiens vel rerum suarum negligens, vel ipsius rei propositæ contemptor & irrisor? Nam si res esset tantum præstans & non utilis, dici posset seruari pretium in res utiles ac necessarias: sed quando additur æque utilem esse siue necessariam atque est præstans; reuincitur talis excusatio. Quod si etiam res quidem esset utilis sed minime præstans, aut cuius pretium esset carius quàm ut quis eam sibi comparare posset, certe is excusandus esset; sed expresse est additum, rei tam utilis ac præstantis perfacile admodum esse pretium: ut si quis valde egeret veste, domo, libris: & percommode, is omnia si vellet, reperiret, quis porro nollet? Hoc motiuo fape nos excitat sacra scriptura; *Omnes sitientes venite ad aquas, & qui non habetis argentum, properate, emite, & comedite: venite, emite absque argento, & absque ulla commutatione vinum & lac.*

At Cœlum nonne tale est? proponitur tibi Cœlum ipsum, quantum quantum est, ipsa æterna Beatitudo, qua quid excellentius, quid utilius, quid magis necessarium? Requiritur vero tantum à te, efficax quoddam desiderium eius tibi comparandæ; quid facilius cum Dei Gratia, siue subiectum, siue obiectum spectes? Subiectum quidem, tua ipsa est voluntas cuius maxime proprium est desiderare suum bonum; at quid tam tuum quam tua voluntas? Obiectum vero est ipsum summum bonum quo quid est desiderabilius! Nonne ergo res valde utilis, valde præstans, & necessaria tibi proponitur, cum cœlum proponitur? Et nonne eius pretium perfacile, cum sola voluntas, solum eius desiderium à te exigitur? Quid est ergo rem tantam non desiderare, nisi eam despiciere? Quid est non desiderare nisi eam credere non esse desiderabilem, nisi vel non esse præstantem, vel non utilem vel nimis caram & difficilem? Quid hoc denique est nisi rei propositæ detrachere, nisi rem despiciere, & pro nihilo ducere? *Vsq; quò detraheth mihi populus iste? quousque non credent mihi?* Sic Num. 14. Deus contra detrahentes terræ promissæ.

II. PUNCTVM.

SED si cœlum despicias, cœlo es indignus. Nos quidem omnes cœlo indigni sumus si nos solos spectemus: *Erasmus na. Ephes. 2.*

702 FERIA 6. infra OCT. Ascensionis. Sic veniet quemadmodum, &c.

tur à filij iræ sicut & ceteri, ait Apostolus, Deus autem qui dives est in misericordia, propter nimiam Charitatem suam qua dilexit nos, & cum essemus mortui peccatis, conuiuificauit nos in Christo, cuius Gratia estis saluati, & con-suscitauit, & consedere fecit in cælestibus in Christo Iesu, vt ostenderet in sæculis superuenientibus abundantes diuitias gratiæ suæ in bonitate super nos in Christo Iesu. Quasi diceret, quod
Coloss. 1. alibi expressis ait verbis, qui dignos nos fecit in partem sortis sanctorum in lumine. Vnde iam non est dicendum nos, in gratia constitutos, cœlo esse indignos, cum Christus nobis cœlum ita meruerit & meritum applicauerit, vt nili ponamus obicem, nobis de condigno, vt vocant, cœlum detur. Ponit vero ille obicem, & se indignum cœlo facit qui cœlum despicit: quia id despicit quod Christus tanti fecit vt ad illud nobis promerendum, se suæ
Ecclesi. 8. que omnia dederit: *Quasi nihil est ante illum sanguis*, ait Sapiens de homicida, sic de contemptore cœli quasi nihil esset ante illum sanguis Christi qui pro cœlo est fusus, quod ipsum est contemnere & vt ait Apostolus, *conculcare filium Dei, & sanguinem testamenti pollutum ducere in quo sanctificatus est, & spiritui gratia contumeliam facere*. Potestne aliquid cogitari cœlo indignius?

Addo, quod qui cœlum despicit, non laborat pro cœlo, non
Matth. 22. hic seminat quod illic metat, non hic pugnat vt illic triumphet, non deferit villam aut iuga bonum vt inuitatus ad cœnam magnam veniat, vnde est illa pauenda sententia; *Qui inuitati erant, non fuerunt digni, nemo virorum illorum gustabit cœnam meam*.

Denique cur cœlum despicit nisi quia nimis terram & mundum diligit? qua in dilectione cum affectus omnes deprauentur, cumque ex deprauatis affectibus cuncta nascentur vitia, quid cœlo magis oppositum? quid cœlo magis indignum? *Foris canes & impudici*.
Apo. 22.

III. PUNCTVM.

SIC ergo dignum est cœlum nostris desideriis, vt nisi cœlum desideres, cœlo sis indignus; quia tale bonum desideranti propositum non desiderare, despiciere est; despiciere autem nemo illud potest quin se eius indignum faciat. *Quoniam repellitis illud, & indignos vos indicatis vita aeterna, ecce conuertimur ad gentes, dicebant Iudæis Apostoli; Quod & Christus Dominus illis & cœli*

Sic dignum est cœlum nostris desideriis, ut nisi, &c. 703

contemptoribus comminatus erat, *Auferetur à vobis regnum Dei, & dabitur genti facienti fructus eius. Et qui ceciderit super lapidem istum confringetur: super quem vero ceciderit, conteret eum.* *CA-*
DVNT super eum qui modo contemnunt, inquit sanctus Augusti-
nus, cadet vero super eos cum in pœnam contemptus, conteruntur &
perduntur, tamquam pulvis quem projicit ventus.


Math. ii.

*Lib. I de
Question.
Evang.
c. 30.*

Anteuerte hanc pœnam, agnosce quàm peccaueris, non satis desiderato cœlo tam desiderabili. Confitere quam inde indignitatem contraxisti; Dic cum Esdra Sacerdote: *Deus meus confundor, & erubesco leuare faciem meam ad te: Et cum Rege Manasse: Non sum dignus intueri & aspicere altitudinem cœli. Aut cum filio prodigo: Pater, peccavi in cœlum, & coram te; iam non sum dignus vocari filius tuus.*

1. Esd. 9.

*Oratio
Manassæ.
Luc. 15.*



SABBATO.

DE SEXTO MOTIVO ACVENDI

IN COELVM DESIDERII:

QVOD INDE GAVDIVM SPIRITVALE
REDVNDET.

Et ipsi adorantes regressi sunt in Ierusalem, cum gaudio magno. Luc. 24.

VERITAS PRACTICA.

Spes cœli, cœlum est.

SENSVS est, quod licet spes omnis quæ differtur affligat animam, afflictio tamen animæ sperantis cœlum, sic suavis est, ut quidam cœli prægustus videatur: & quo maior est afflictio, eò sit suauitas maior, & prægustus cœli suauior.

Pron. 13.

RATIO est, quia quò maior est animæ sperantis cœlum affli-

704 Sabbato infra Oct. Ascensionis. Regressi sunt in Ierusalē, &c.

Etio, eò maior est cæli possidendi seu futura Beatitudinis certitudo & fiducia.

Sed quò maior est talis certitudo, maior est suauitas, & prægustus cæli suauior.

Ergo & quò maior est afflictio, inde est maior illa suauitas : & sic abundat consolatio ut iam cælum possideri putetur, sicque spes cæli, cælum dici possit ; ac proinde etiam, mirum inde quantum cœlestia prouocentur & acuantur desideria.

L P V N C T V M.

DVBITARI non potest quā aliquam ex recessu Christi Domini mœstitiā omnes Discipuli senserint, & quò eum præsensem magis diligerent, quin eò dolentius absentem deplorarent ; Verū cū de illius cœlesti Gloria certi essent, & de sua futura bene sperarent, vbi eum aliquando reuiderent ; tanto omnes derepente repleti sunt gaudio, ut nihil nisi de eo colendo, adorando & benedicendo cogitarint, in eaque cogitatione & cœlesti gaudio permanerint toto vitæ decursu.

Hoc illud est scilicet gaudium de quo iam ante illis Dominus dixerat : *Gaudete quod nomina vestra scripta sunt in cælis.* **GAVDETE** & exultate quoniam merces vestra copiosa est in cælis. Et certe quid est aptius ad excitandum illud gaudium, quam talis cogitatio ? & quid potentius ad illam cogitationem crebro & frequenter vsurpandam, quam gaudium illud quod inde redundat ? Loquar, ait sanctus Bernardus, quod expertus nouit, inexpertus ignorat ; animalis enim homo non percipit ea quæ sunt spiritus Dei. Numquid non plerumque orantibus nobis omnia viscerum succutiuntur occulta, ad memoriam gaudij illius quod est in Ierusalem, quæ sursum est, quæ est mater nostra : & lachrymarū vnda vultus meditantium perfundit ? Si oblitus fuero tui Ierusalem, obliuioni detur dextera mea, adhæreat lingua mea faucibus meis, si non meminero tui, si non proposuerō Ierusalem in principio latitiæ meæ. Vere in principio latitiæ, quia finis illic repositus est. Principium gaudij illius quod hūc quandoque sentimus, stilla est, guttula est, de flumine illo descendens, cuius impetus iustificat ciuitatem Dei.

Luc. 10.
Matth. 5.

Ser. in verba
Apost.
non est
Regnum
Dei etc.
& potus.

Sed quod magis mirum est magisque perpendendum, cum *spes qua differtur, affligat animam*, ut ait Sapiens, & quotidiana sentitur experientia: quomodo spes cœli quæ coniuncta est cœlesti desiderio, & quæ tantopere hic differtur, quomodo inquam non affligit sperantem? aut si affligit quomodo eum consolatur, quomodo tali replet gaudio, quale iam dictum est?

Hoc ut declareretur apertius, præmittitur Veritas paucis quidem expressa verbis, sed multo plena sensu, *Spes cœli, cœlum est.* Prov. 13. Spes est quidem affligens quia differtur, sed afflictio illa tam suavis est ut quod magis affligit, magis afficiat suavitate quadam cœlesti quæ Cœlum dici potest in terris, quod ea prægustet gaudia quæ sunt in cœlis.

Ratio quæ affertur, in sua prima parte & propositione, continet duplex documentum valde vtile & scitu necessarium.

Primum est, quod afflictio spei cœlestis dilata quod maior est, eò maiorem invehit cœli possidendi & futuræ Beatitudinis certitudinem, quanta scilicet haberi potest in terris, talis enim afflictio manifeste indicat desideria terrena iam nulla esse, nullam terrenam sollicitudinem, nullum mundanum solatium; sed totum in cœlis defixum esse animum; totum ibi esse thesaurum & cor totum. Quæ certe animi dispositio magnam in se habet cœli certitudinem: Ut è contra, quod aliud est documentum, quem nullum mouet desiderium, quem nulla dilata spei tangit afflictio, signum est, ordinarie loquendo, vix ullam eius animi partem esse in cœlo, vix illum aliquid suum existimare in cœlis esse repositum; nam de hoc crebrius cogitaret, sicut frequenter cogitat de suis prædiis, de suis negotiis, de suis bonis. *Portio mea in terra viventium*, inquebat David, quasi diceret, non hic in terris sed in cœlo mea sunt omnia posita, unde quid in se sentiret desiderij & certitudinis pro futura sua felicitàte statim exprimit, *Educ de custodia animam meam, ad consistendum nomini tuo; me expectant iusti donec retribuas mihi.* Quod explanans S. Bernardus, sic nempe, inquit, *portio nostra in terra viventium, si ut decet memoriam affectio comitetur, & paucis interiectis: alioquin quid istud negligencia, quid pigritia, imo quid vecordia est ut non crebris suspiriis & feruentissima affectione abrumpere hinc, & in illa tam felicità agmina iaculari aminos studeamus. Ve nobis à durezza cordis nostri, ve à peccato gentium quas Apostolus memorat sine affectione fuisse.* Ps. 141.
Serm. 5. in festo Sancti omnium.

II. PVNCTVM.

SED quo maior est certitudo & fiducia possidendi cœli seu futura beatitudinis, eò maior est suauitas, & præ gustus cœli suauior.

HOC EST fortissimum solatium quod habemus, inquit Apostolus, qui confugimus ad tenendam propositam spem quam sicut anchoram habemus anima tutam ac firmam. Fuit autem & apte sanctus Augustinus in illud Psalmi, labores manuum tuarum manducabis, *QVASI* peruersè, inquit, videtur dicere non intelligentibus; debuit enim dicere, fructum laborum tuorum manducabis. Tum verò reddens rationem cur potius dictum sit labores manducabis, quam fructum laborum: Modo, inquit, labores habemus, fructus postea erit, sed quia ipsi labores non sunt sine gaudio, propter spem de qua paulo ante diximus, spe gaudentes, in tribulatione patientes, modò nos ipsi labores incundant, & letos nos faciunt de spe. Quod confirmans ex alio psalmo ubi dicitur, surgite postquam sederitis qui manducatis panem doloris: **ISTE** est, inquit, labor fructuum, panis doloris: nisi enim manducaretur non diceretur panis, nisi autem haberet aliquam suauitatem panis iste, nemo illum manducaret cum tanta suauitate. Plorat in gemitu qui orat: dulciores sunt lachryma orantium quàm gaudia theatrorum.

Itemque in hos versiculos, quare tristis es anima mea & quare conturbas me: spera in Deo. **ECC E**, inquit, iam quadam interiore dulcedine latati sumus: ecce acie mentis aliquid incommutabile superstrictim & raptim videre potuimus. Non dubitas de Deo tuo: Tam aliquid incommutabile persensisti, &c. Ac rursus in alium Psalmum, ubi hæc refert Ioannis verba: nunc filij Dei sumus, & nondum apparuit quid erimus. **QV I S** non exultaret, inquit, si subito nescio cui peregrinanti, & ignorantì genus suum, patienti aliquam egestatem & erumnam, & in labore constituto diceretur: filius senatoris es, pater tuus amplo patrimonio gaudet reuera, renoco te ad patrem tuum. Quasi gaudio exultaret, si hoc non fallax promissor diceret. Venit ergo non fallax Apostolus Christi, & ait: quid est quod vos affligitis, habetis patrem, habetis patrimonium, filij Dei sumus, nondum apparuit quid erimus, sed iam sumus in spe. Quali diceret; quàm certum est de præsentì nos esse filios Dei, tam verè nobis exultandum de futura patris hæreditate. O quæ patris hæreditas! O quæ filiorum beatitudo!

III. PUNCTVM.

SPES ergo cæli, cælum est; etiam si spes differatur, etiam si dilata sperantem affligat, tamen ipsa sperantis afflictio tam luauis est propter certitudinem & fiduciam quæ inde maior percipitur, ut quod est afflictio grauior, eo sit suauitas dulcior & securior: unde iam ex hac vita beati dicuntur qui sic sperando lugent & lugendo sperant: *labores manuum tuarum manducabis, beatus es & bene tibi erit.* **BEATVS** es, de presenti est, inquit sanctus Augustinus, *bene tibi erit, de futuro est: cum manducas labores fructuum tuorum, beatus es: cum perueneris ad fructum laborum tuorum, bene tibi erit quod dixit: Nam si bene tibi erit, utique beatus eris, & si beatus eris, bene utique tibi erit. Sed interest inter spem & rem. Si spes tam dulcis est, quanto res dulcior erit? Itemque aibi, sicut spe salui, ita & beati facti sumus.* Ps. 127.
l. 19. Cinit.
c. 4.

Quomodo verò fletus & gaudium simul sit de cælo, sic idem piè non minus quàm luculente in psalmum, *super flumina Babylonis illic sedimus & fleuimus, dum recordaremur tui Sion.* **INDE** oportet ut fleas recordando Sion: multi enim flent fletu Babylonico quia & gaudent gaudio Babylonis: gaudent lucris, & flent damnis: utrumque de Babylonia est. Flere debes sed recordando Sion. Si recordando Sion fles, etiam quando tibi secundum Babyloniā bene est, oportet ut fleas. Attendat quisque ipsam fælicitatem suam qua exultat: attendat si non fluat illa fælicitas, si potest certus esse de illa quod maneat in æternum. Si autem non est certus, & videt fluere unde gaudet, fluius Babylonis est, sedeat supra & fleat. Sedebit autem & plorabit si recordatus fuerit Sion. O pax illa quam videbimus apud Deum! O pax illa & sancta aequalitas Angelorum! ô illa visio & spectaculum pulchrum. Ecce in Babylonia, pulchra sunt qua ciues ipsius Babylonia tenent: sed non teneant non decipiant. Aliud est solatium captiuorum, aliud gaudium liberorum.

Quæ cum sanctus Doctor fusiſſimè toto illo psalmo explanando prosequatur, tum sic aptè concludit: *Quàm libenter audistis, tam libentius agite quod audistis, si non vultis esse salices Babylonia, pasti de fluminibus eius & fructum nullum afferentes. Sed suspirate in æternam Ierusalem: quod præcedit spes vestra, sequatur vita vestra: Ibi erimus cum Christo: Christus nobis modo caput, gubernat nos modo*

708 Sabbato infra Oct. Ascens. Regressi sunt in Ierusalem, &c.

desuper; amplectetur secum in illa ciuitate, cum aquales erimus Angelis Dei. Non auderemus hoc suspicari de nobis, nisi promitteret Veritas: Hoc ergo concupiscite fratres, hoc die nocteque cogitate. Quidquid de mundo feliciter arriiserit nolite præsumere, nolite libenter colloqui cum voluptatibus vestris. Si vultis armati esse contra tentationes in saeculo, crescat & roboretur desiderium Ierusalem aeterna in cordibus vestris.

Quod autem hic vno verbo dicit ad confirmandam nostram certitudinem, id promississe veritatem, paulo vberius & expressius sic in alium psalmum: qui promissit Deus est, crede crede, plus est iam quod fecit quam quod promissit. Quid fecit? mortuus est pro te.

Ps. 143.

Quid promissit? ut viuas cum illo. Incredibilius est quod mortuus est aeternus, quam ut in aeternum viuat mortalis. Iam quod incredibile est, tenemus. Si propter hominem mortuus est Deus, non est victurus homo cum Deo? non est victurus mortalis in aeternum, propter quem mortuus est qui viuit in aeternum? accepit ex te vnde moreretur pro te: Induit se ubi moreretur pro te. Induet te ubi cum illo viuas. Vbi se induit morte? in virginitate matris. Vbi te induet vita? in aequalitate Patris. Quiddam vestrum iam sursum est: quod hic accepit, ubi mortuus est, ubi crucifixus est. Iam quadam pramitia tua precesserunt, dubitas quia secuturus es?

Ne dubita, dum modo non desis Gratiae,





DOMINICA

INFRA OCTAVAM ASCENSIONIS.

Cum venerit Paraclitus, &c. Ioan. 15. & 16.

EX duobus diuersis capitibus depromptum Euangelium hodiernum duas etiam valde diuersas continet partes. Prima in promissione Spiritus sancti bonum omne complectitur. Secunda tota est in denuntiandis malis quæ sint passuri Apostoli.

Ad priorem partem tres referri possunt Veritates, ex consequenti verborum Christi textu.

Cum venerit Paraclitus quem ego mittam vobis à Patre Spiritum veritatis.

Sicut spiritus & veritas sunt simul & seorsim indiuisibiles, ita si hunc à Deo spiritum veritatis velis accipere, oportet te toto indiuisim Dei esse.

In 3. parte, Feria 5. hebdomada undecima, ubi de adorando Deo in spiritu & veritate.

ILLE testimonium perhibebit de me.

Quàm rarò cogitas Christum, tam crebrò resistis Spiritui sancto.

Vel sic

Nullà in re frequentius Spiritui sancto resistitur, quàm quòd infrequentius de Christo cogitatur.

Quia videlicet nulla res est ad quam Spiritus sanctus impellit frequentius, quàm ad pias de Christo cogitationes, cum propterea præci-

Vuuu ij

710 Dominica infra Oct. Ascensionis. Recordamini quia, &c.
pue sit de calo missus, prout declaratur in 1. parte, Feria 4. hebdomada
prima Aduentus.

*Et vos testimonium perhibebitis, quia ab initio me-
cum estis.*

In paruis maior est serui de Christo testantis fidelitas.

*In 1. parte, Feria 6. hebdom. 6. post Epiphaniam. Vbi & vide
qua de sanctis Martyribus in communi habentur circa finem.*

AD POSTERIOREM EVANGELII PARTEM
PLURES REDVCVNTVR VERITATES.

Hæc locutus sum vobis vt non scandalizemini.

Quantum obest aduersitas improuisa, tantum prauisa
prodest.

In 2. parte, Feria 6. sexagesime.

Sicut scandalizans, ita peccat scandalizatus.

In 1. parte. Dominica 2. Aduentus.

Quem pro Christo sperni pudet, Christi pudet.

In 2. parte, Feria 3. hebdom. 4. in Quadragesima.

ABSQVE Synagogis facient vos.

Beatius est magis carere omni solatio quàm abundare.

In 2. parte, Feria 4. maioris seu sancta hebdomada.

Beati estis cum maledixerint vobis.

In 3. parte, Feria 3. & 4. hebdom. 4.

*VENIT hora vt omnis qui interficit vos, arbitre-
tur obsequium se præstare Deo.*

Inter Dei seruos, tantò hic maiori præstat obsequio,
quantò illum qui persequitur, maius obsequium ar-
bitratur se præstare Deo.

Ratio est manifesta, quia tantò hic aliis maiori præstat obsequio,

Vel nulla Christi recoletur memoria vel nulla, &c. 7 ix

ceteris paribus, quantò molestius præstat obsequium.

Sed tantò illud est molestius obsequium, quantò illum qui persequitur, maius obsequium arbitratur se præstare Deo: sic enim qui persecutionem patitur, iustè pati iudicatur, tamquam impius & blasphemus, atque omni dignus supplicio: quod certè est in quavis pœna molestius.

Vnde est evidens Conclusio propositæ Veritatis, & colenda praxis. Neque tamen propterea nimis esse dolendum, docet hæc Veritas: Qui sibi innocenti factam iniuriam nimis dolet, suæ ipse innocentix iniuriam facit.

In 2. parte, FERIA 2. hebdom. 4. in Quadragesima.

HÆC facient vobis quia non noverunt Patrem neque me.

Quidquid de Christo se scire dicant impij, Christum nescire dicendi sunt.

In 4. parte, FERIA 4. hebdom. 19.

HÆC locutus sum vobis, ut cum venerit hora eorum, reminiscamini, quia ego dixi vobis.

Si dum adest occasio, Virtus abest, vix umquam aderit.

In 2. parte, FERIA 2. hebdom. 2. in Quadragesima.

Si quod Christus dixit, cogitetur difficile; hoc ipso reddetur facile, si cogitetur quòd Christus dixit.

In 3. parte, FERIA 5. hebdom. 5.

Vel nulla Christi recoletur memoria; vel nulla erit in eius cultu querimonia.

RATIO quæ hic debet expendi fusiùs, hæc est inter alias, quòd nulla erit in Christi cultu querimonia, si nullus est labor.

712 Dominica infra Oct. Ascensionis. Recordamini quia, &c.

Sed aut nulla Christi recoletur memoria, vel in eius cultu nullus erit labor.

Ergo nec ulla erit querimonia, vel nulla Christi recolretur memoria. Quod postremum nimis pudendum ne accidat, curanda potius frequens & familiaris eius recordatio, qua difficultates omnes mitigentur & querimoniae comprimantur.

LPVNCTVM.



Lyc. 10.

ÆC postrema Euangelij verba quibus præcipue Dominus recordationem sui, suis commendat Apostolis, iam illis aptè conueniunt, hoc toto tempore quo ab ascendente Domino simul iuncti & vniti promissum expectabant Spiritum sanctum. Quid enim aptius cogitarent aut inter sese conferrent quam de verbis & de rebus gestis Domini, quibus se ad ardua & difficilia quauis pro eius cultu suscipienda præpararent? ô beati non iam eorum oculi qui viderunt, nec tantum beatæ aures quæ audierunt; sed Beatissima mens quæ visa & audita recordatur!

Num. 21.

In hac porrò Recordatione verborum aut Personæ Domini tanta vis est ad agendum & patiendum, vt vere dictum sit; *vel nulla Christi recoletur memoria, vel in eius cultu nulla sit querimonia.* Et Ratio quidem aperta est, quoad primam præcipue partem qua dicitur, nullam fore querimoniae si nullus sit labor, qui non libenter subeatur: Hinc enim totæ disfluunt querimoniae, seu murmura, cum quid iubetur difficilius, aut quidquid sit quod iubetur, si non libenter acceptetur. *Et tædere capit populum itineris ac laboris, locutusque contra Deum, & Moysen, ait, Cur eduxisti nos de Aegypto vt moreremur in solitudine?* Audisne querimoniae? at vnde excitatur nisi ex prætento labore nimio quem nolebant ferre? vnde si nullus fuisset labor, aut si laborem lubentes sustulissent, profecto nullum fuisset murmur, nulla querimonia: quamobrem qui erant in misero illo populo sapientiores & fideiiores, licet eundem ferrent laborem atque alij, non ita tamen murmurabant aut querebantur de Domino, quia libenter hunc laborem sustinebant, atque ex hac libenti sufferentia quam in Dei cultu demonstrabant, probabatur eorum fidelitas, vt Sa-

piens illa Iudith optimè sentiebat, dum populum suum sic adhortaretur, *memores sint quia tentati sunt patres nostri ut probarentur si* ^{Iudith. 8.} *verè colerent Deum suum. Expende illud verè colerent*, nam aliud est colere, & aliud verè colere.

II. PUNCTVM.

SED, *vel nulla Christi recoletur memoria; vel in eius cultu nullus erit labor.* Quod perinde est ac dicere; *si recoletur Christi memoria, nullus est in eius cultu labor; vel si quis sit labor qui non libenter acceptetur, nulla eius recoletur memoria.*

Nam vel reuera nullus est in illo quod agitur opere labor, & nulla rationabilis difficultas, sed mera naturæ deprauatio quæ huic gratis repugnat & contradicit operi: aut certe est aliqua in opere difficultas. Si primum fatearis, recole Christum tuum, repræsenta tibi nascentem in præsepi, aut in Cruce morientem. Audi quid contra naturæ deprauatæ motus dixerit; *Qui vult venire post me, abneget semetipsum, tollat crucem suam & sequatur me.* ^{Math. 10.} *Qui non accipit Crucem suam & sequitur me, non est me dignus.* Aut pudebit te tui si hæc audias: pudebit te tui mollis & dissoluti animi in conspectu Christi tui: aut pudebit illum conspicere & clamabis, *tolle tolle, grauis est nobis ad videndum, contrarius est operibus* ^{Sap. 2.} *nostris. Factus est nobis in translationem cogitationum nostrarum, grauis est etiam nobis ad videndum, quoniam dissimilis est vita illius.* Sic scripturæ loquuntur, sic cedat animus quantumuis vitiosus Christo repræsento, aut tali cedat Christus animo, & se repelli patiatur.

Quod si reuera operi, nonnulla forte difficultas & labor inest, vt aliquando accidit, nonne si tùm Chriltus obuersetur animo quasi qui laborem hunc imperet, & sic ordinatum à se declarer, atque ad ipsum tolerandum persuadeat; nonne sic suauis quadam dulcedine laborantem afficiet, vt non modo non sit grauis labor sed suauis & iucundus, dicatque cum Apostolo, *ego non solum la-* ^{Act. 21.} *borare & alligari, sed & mori paratus sum pro Domino Iesu.* Hoc omnino sentias & dicas necesse est, aut inane esset quod Chriltus dixit: *Venite ad me omnes qui laboratis & onerati estis, & ego reficiam* ^{Math. 11.} *vos. Tollite iugum meum super vos, & discite à me quia mitis sum & humilis corde, & inuenietis requiem animabus vestris. Iugū enim meum*

714 Dominica infra Oct. Ascensionis. Recordamini quia, &c.

*suave est & onus meum leue. Credisne ita esse vt dixit Christus? Cre-
dis forte dum nihil pateris, sed dum laboras, diffiteris. At vide
quàm contrà sentiret S. Augustinus, vix credebat cum id audiret
à Christo dictum & nihil dum pateretur. Quando vero pro Chri-
sto patiendum fuit, tunc illud verius credidit. Audi enim vt lo-
quitur: *Compreſſiſti à timore superbiam meam, & mansuefecisti iugo
tuo cernicem meam. Et nunc porto illud, & leue est mihi, quia promi-
ſſiſti, & feciſti; & verè sic erat, & nesciebam quando id subire me-
tuebam.**

III. P V N C T V M.

VEL nulla igitur Christi recoletur memoria, vel nulla erit in eius
cultu & seruitio querimonia, Quia nullus erit labor quem
non libenter subeas, dum illum recoles; aut si quis esset labor
quem subire nolles, tu potius à tua mente Christum abiiceres,
quam hunc nolles laborem ferre. Durius enim tibi videretur, si
Christum diligis, pro dilecto præsente & vidente, nolle laborare,
quàm laborem quantumuis durum pro illo sustinere. *Tantum in
te recordemur nominis tui*, ait Propheta, quasi hoc ipsum diceret
quod Apostolus: *In his omnibus superamus propter Eum qui dilexit
nos*; Hanc tantum peto gratiam vt eius possim recordari.

Hoc inter alios patres, piè ac fuisse sanctus Bernardus, ad illud
Canticorum, *Fasciculus myrrha dilectus meus mihi inter ubera mea
commorabitur. NON fascem sed fasciculum dicit quod leue pra amo-
re ipsius ducat quidquid laboris immineat & doloris. Vnde & dilectum
nominat, monstrans dilectionis vim omnium amaritudinum superare
molestiam. Tu quoque si sapiſ imitaberis sponsa prudentiam, atque hunc
myrrha tam carum fasciculum, de principali tui pectoris nec ad horam,
patieris auelli; amara illa omnia quæ pro te pertulit semper in memo-
ria retinens, & assidua meditatione renouens, quo possis dicere tu,
fasciculus myrrha dilectus meus mihi.*

Et post multa: *Mihi hic salutaris fasciculus seruatus est, nemo
tollet eum à me, inter ubera mea commorabitur. Hæc meditari dixi sa-
pientiam, in his iustitia mihi perfectionem constitui. Hæc me erigunt
in aduersis, in prosperis reprimunt, & inter lata tristiaque vita præ-
sentis, viâ regiâ incedenti, tutum præbent utrobique ducatum, hinc
inde mala imminencia propulsando. Hæc mihi conciliant mundi Iudi-*

Vel nulla Christi recoletur memoria, vel nulla erit, &c. 715

cem, dum tremendum potestatibus, mitem humilemque figurant, dum non solum placabilem, sed & imitabilem repræsentant Eum qui inaccessibilis est principatibus, terribilis apud reges terra.

Propterea hæc mihi in ore frequenter, sicut vos scitis; hæc in corde semper, sicut Deus scit: Hæc stylo meo admodum familiaria, sicut apparet: hæc mea sublimior interim philosophia, scire Iesum, & hunc crucifixum. Hunc & vos dulcissimi tam dilectum fasciculum colligite vobis, hunc medullis inserite cordis, hoc munite aditum pectoris, ut & vobis inter vbera commoretur. Habete illum semper non retro in humeris, sed ante præ oculis, ne portantes & non odorantes, & onus premat, & odor non erigat. Si eum ante oculos habueritis quem portatis, pro certo videntes angustias Domini, lenius vestras portabitis. Quod brevius alibi repetens, Vbi est, amor, inquit, non est labor, sed sapor.

Vide in 1. parte, Dominica 4. Aduentus, vbi hæc proponuntur Veritates:


Sic facta sunt aspera in vias planas, ut tam iucunde per aspera quàm per plana viuamus.

Maius est Christi beneficium, amaritudines nobis reliquisse amabiles, quàm nullas nobis reliquisse.

Aut non amatur Christus, aut amatur asperitas.

Cui nimis adhuc durum videtur pati pro Christo, nimis etiam durum videtur amare Christum.

Huc etiam spectat tota hebdomada 22. partis 4.



HAC HEBDOMADA, quæ in Actis Apostolorum narrantur fecisse Discipuli Domini, dum ab eius Ascensione ad Pentecosten, expectarent Spiritum sanctum, referuntur ad sex Virtutes, totidemque Veritates Practicas, quæ nos ad Eundem spiritum sanctum plenius recipiendum disponant; ex quibus duæ nos propius spectant, duæ proximum, duæ ipsum Deum.

FERIA SECUNDA
DE CONTINUATA PER DECEM DIES
RECOLLECTIONE APOSTOLORUM:
ET DE NOSTRA INSTITVENDA, AD
RECIPIENDVM CVM EIS SPIRITVM
S AN CT VM.

*Et cùm introissent in coenaculum, ascenderunt ubi
manebant Petrus & Ioannes &c. Hi erant perse-
uerantes unanimiter in oratione, cum mulieri-
bus, & Maria matre Iesu, & fratribus eius.
Actuum 1.*

VERITAS PRACTICA.

Nulli magis necessario secedendum, quàm qui minus
necessarium sibi putat secessum.

*RATIO est, quia nulli magis necessario secedendum, quam qui
minorem sui cognitionem & curam habet.*

*Sed qui minus necessarium sibi putat secessum, minorem sui cog-
nitionem & curam habet.*

*Ergo nulli magis necessario secedendum, quam qui minus necessa-
rium sibi putat secessum.*

I. PUNCTVM.

*La. inc. 24.
Lucæ.*



QVOD refert sanctus Lucas in fine sui Euangelij, Apo-
stolos ab Ascensione Domini semper, siue assidue in tem-
plo fuisse, hoc Interpretes intelligendum docent post
Aduentum Spiritus sancti, cùm ipsemet S. Lucas in Actis Apo-
stolorum aperte dicat eos omnes in eandem conuenisse domum,

Nulli magis necessario secedendum, quam qui minus, &c. 717

vnde digressi non putantur nisi post Pentecosten, prout illis Dominus expresse dixerat; *sedete in Ciuitate, quoadusque induamini* Luc. 24. *virtute ex alto.*

Erat igitur *turba hominum simul*, vt Sacer Historicus refert, Act. 1. *fere centum viginti*; quod & sequenti capite repetens, *erant*, in- Ibid. 2. *quit, omnes pariter in eodem loco*, semoti scilicet ab omni alia conuersatione & quibuslibet negotiis, vt sic in vnum Recollecti melius sese disponderent, cum Diuina Gratia, ad maiores illas Gratias quas erant recepturi.

Notari vero potest triplex quoddam genus Recollectionis; Nam primò illa est quæ sic domi instituitur vt libertate vagandi per urbem sibi simul interdican; Deinde, ne quidem per domum diuagantur, sed vno omnes loco & cænaculo & cubiculo, quod erat in superiori domus parte, sese continent; Ac denique non modo corpore sed & animo, non solum externo secessu sed & interno, totis animæ viribus & facultatibus in vnum veluti recollectis, tanto propius Deo coniunguntur, quanto longius à Creaturis recedunt. O qualis illorum animus! qualis meditatio! quanam affectus! quanam colloquia!

Quantum autem, ad ampliora recipienda conferat ista Recollectio, vel ex hoc Diuino disce oraculo: *Propter hoc, Ecce ego* *lactabo eam & ducam in solitudinem, & loquar ad cor eius.* *Expende* *verbum illud lactabo*, id est alliciam, persuadebo, adducam ita suauiter, vt vnusquisque libenter veniat: quod fit vel per inspirationes internas, vel per considerationes vberimorum fructuum qui euidenter inde ad omnes permanent.

Qualis hic animus tuus? an se finit lactari & duci in Beatam illam solitudinem, an contrà reluctatur? Nec dicas tibi minus videri necessarium talem secessum: *Nam hoc ipso quo sic tibi videretur minus necessarius, magis necessario tibi secedendum esset.* Ratio est valde expendenda, quia videlicet nulli magis est necessario secedendum, quam qui minorem sui cognitionem & curam habet. Idcirco enim talis secessus est institutus vt quod spectat ad salutem, & quod in turba negotiorum minus commode peragi potest, illic opportunè conficiatur. *Statue tibi speculam,* *ter. 37* *pone tibi amaritudines; dirige cor tuum in viam rectam.* Quo de argumentò, & maxime de necessitate considerandi ac noscendi sui, præclare inter alios S. Bernardus in libris de Considera-

718 Feria 2. Oct. Ascens. Cum introissent in canaculum, &c.

L. 1. c. 5. tione ad Eugenium Papam, unde hæc ad rem nostram peridonea: Memento proinde non dico semper, non dico sæpe, sed vel interdum, reddere te ipsum tibi. Vtere tu quoque te inter multos. Quid indulgentius? Hoc enim dico secundum indulgentiam, non secundum iudicium, puto & ipso Apostolo indulgentiorem me in hac parte. Ergo plus quam oportet, inquis? Non inficior. Quod scita oportet? nam, ut confido, nostra non eris meticulosa informatione contentus, sed abundabis magis.

L. 2. c. 3. A te, tua consideratio inchoet, ne frustra in alia extendaris, te neglecto. Quid tibi prodest si uniuersum mundum lucreris, te unum perdens? Et si sapiens sis, deest tibi ad sapientiam, si tibi non fueris: quantum vero, ut quidem senserim ego, totum. Noueris licet omnia mysteria, noueris lata terræ, alta cæli, profunda maris, si te nescieris, eris similis edificanti sine fundamento, ruinam non structuram faciens. Quidquid extruxeris extra te, erit instar congesti pulueris, ventis obnoxium. Non ergo sapiens qui sibi non est sapiens; sibi sapiens erit, & bibet de fonte putei sui, primus ipse. A te proinde incipiat tua consideratio; non solum autem, sed in te finiatur. Quocumque euagetur, ad te reuocaueris eam cum salutis fructu. Tu primus tibi, tu ultimus. Sume exemplum de Summo omnium Patre, Verbum suum & emittente & retinente. Verbum tuum consideratio tua, quæ si procedit, non recedat: sic progrediatur, ut non egrediatur: sic exeat ut non deserat. In acquisitione salutis nemo tibi germanior unico matris tuæ. Contra salutem propriam cogites nihil. Minus dixi, contra: præter, dixisse debueram: quidquid se considerationi offerat quod non quoquo modo ad tuam ipsius salutem pertineat, respuendum.

Plura sequenti puncto: hæc sufficiant ut videas, quanti referat consideratio de propria sui notitia, & quam verè dicatur Nulli esse magis necessario secedendum quam illi qui se minus norit, cum idcirco præcipuè secessus commendetur, ut hæc sui notitia comparetur. Deus semper idem, nouerim me, nouerim te. Sic frequentissimè sanctus Augustinus.

II. PUNCTVM.

SED qui minus necessarium sibi putat secessum, minorem sui cognitionem & curam habet.

Quod enim sic de se sentiat & reputet, oriri potest ex tribus

Nulli magis necessario secedendum, quàm qui minus, &c. 719

causis quæ simul omnes declarant quàm modicam sui cognitionem & curam habeat. Prima ex tepiditate, quasi non putet sibi maiorem perfectionem esse necessariam, nec proinde illo secessu esse opus. Itaque verò est, se nosse & sui curam habere, sic de suo iudicare profectu! Quàm longe est alius sancti Bernardi & veritatis sensus! Audi ut ille ad Eundem Papam: *Rara vox est; nihil mihi conscius sum. Cautior in bonis ambulas, si & mala non lateant. Quamobrem ut dixi, noueris te, ut inter angustias quæ non desunt, fruaris conscientia bono: magis autem ut scias quid desit tibi. Nam cui non desit? OMNIA ILLI DESUNT QUI NIL SIBI DEESSE PUTAT.* Numquid quia summus Pontifex, ideo summus? Infimum noris esse, si summum putas. Quis summus? Cui addi non possit. Grauiterrè erras si te illum existimes. Absit: non tu de illis es qui dignitates, virtutes putant. Et post pauca: quomodo proficis, si iam sufficis tibi? non sit proinde tibi aut pigrum vestigare quid desit, aut fateri quid desit, verecundum. Loquere & tu voce Antecessoris tui: non quod iam acceperim, aut iam perfectus sum. Et rursum: Ego me non arbitror comprehendisse. Hæc scientia sanctorum, hæc longè ab illa quæ inflat. Hanc qui apponit, apponit & dolorem: sed dolorem hunc nemo unquam sapiens subterfugit. Est quippe medicinalis dolor per quem stupor ille lethalis animi duri & impenitentis excluditur. Et ideo sapiens qui dicere potuit: *Et dolor meus in conspectu meo semper.*

Secunda causa posset esse quod licet perfectioni suæ studeat, non putet tamen ad illam opus esse secessu, aut quid aliud esse necessarium quàm quod ordinarie facit. Atqui hoc est minus se nosse, hoc est minus nosse quàm sit procliuè cuius homini à seipso deficere & in perniciosum labi statum, nisi se aliquando introspiciat attentius, & in seipsum penitus redeat. Hoc est non nosse quod sacræ Literæ nos tam crebro monent de homine veterascenti renouando, quod sic egregiè sanctus Gregorius explicat: *Hoc ipsum enim in hac mortali vita consistere, quasi ad vetustatem ire est, & cum indiscussa mens relinquitur, in quodam senio torporis sopitur: quia sui negligens, propositum robur insensibiliter perdens à forma prioris fortitudinis dum nescit, senescit: unde & per Prophetam sub Ephraim specie dicitur, Comederunt alieni robur eius & nesciuit: sed & cani effusi sunt in eo, & ipse ignorauit. Cum vero semetipsam quarit, & subtiliter pœnitendo, se discutit: ab ipsa hac ve-*

720 *Peria 2. Oct. Ascensionis. Cum inuenissent in, &c.*

tustate sua, tota lachrymis & mœrore incensa renouatur: & qua iam pene inueterata frixerat, per subministrata interni amoris studia, nouum calet: unde Paulus Apostolus usu mortalis uitæ veterascentes Discipulos monet: Renouamini spiritu mentis vestre.

Eph. 4. Tertia denique causa est, quod cum naturæ corruptæ onerosus & odiosus esse possit secessus, sibi quis facile fingat, non illum sibi esse necessarium, ut quem timet laborem fugiat. Qua in re, vel aperta malitia est, sic secum dissimulare, ubi agitur salutis & perfectionis negotium; vel cæca sui, nec condonanda ignorantia, quasi adhuc nescias, nec videas sic naturam deprauatam dolis suis occultandis causas obtendere; & quidquid non vult, sic obuelare ut non appareat idcirco nolle illud quia molestum est & laboriosum: sed quia non est necessarium, non opportunum, non tempestiuum aut quid simile speciosum. *Att. 13.* *O plene omni dolo & omni fallacia! non desinis subvertere vias Domini rectas? Eris cæcus & non videns solem.* Sic Apostolus Elymæ cuidam seductori, quod tu tibi applies, teipsum seducenti.

III. P V N C T V M.

Apoc. 3. **N**VLLI ergo magis necessario secedendum, quam qui minus necessarium sibi putat secessum; Nam cum is cæca quadam sui labore ignorantia, cui curandæ opportunus est in primis secessus, profecto vel nulli est necessarius, vel isti cæco, qui cæcitatem suam si cognouit, cur non illuminari desideret? si autem non cognouit, nonne idcirco magis excitandus est ut secedat & audiat admonentem, *collyrio iniunge oculos tuos ut videas.*

Marci 7. Ibid. 8. Sic Christus Dominus ut surdum & cæcum sanaret, remouit eos seorsum à turba, ut expresse narrat sanctus Marcus, *& apprehendens eum de turba seorsum, inquit de surdo, misit digitos suos in auriculas eius.* Tum verò post de cæco: *Et apprehensa manu cæci, eduxit eum extra vicum, & expuens in oculos eius, impositis manibus suis interrogauit eum si quid videret.* Cur ita porro? cur sic Christus illos seorsum retrahit? Eratne id necessarium sanandis illis? Nonne id æque poterat cum essent in turba simul cum aliis, atque eum inde extracti sunt? Poterat sane, nec absolute id necessarium Christo fuit: potest tamen dici hoc fuisse necessarium condionate, ut vocant, ex hypothesi scilicet quod non aliter eos sanare

statuisset. Sic plane de secessu cogita, non esset quidem necessarius absolute, nec alia defunt Christo media quibus tuæ salutis & perfectioni consulat; sed cum iam nobis tot signis indicauerit hoc se singulari medio velle vti ad persanandos & renouandos animos, sane tam necessarius dici potest talis secessus ex illa præsupposita dispositione Diuinæ prouidentia, quàm necessaria dicuntur alia quædam media, certos ad fines, qui non aliter attinguntur.

Numquid, si naturam sacrificij spectes, erat necessarium Israelitis in Ægypto manentibus, vt inde secederent in desertum ad sacrificandum Domino? Non erat omnino necessarium, sed quia tamen sic ordinatum à Deo erat, non poterant omnino sacrificare in Ægypto. Nec mysterio vacat quod Pharaoni ne- Exodi 8.
ganti hunc secessum respondit Moyses: *Abominationes Ægyptiorum immolabimus Domino Deo nostro: quod si mactauerimus ea quæ colunt Ægyptij, coram eis, lapidibus nos obruent: Id est, arietes, vitulos, tauros sacrificare debemus, quos cum Ægyptij colant tamquam Deos, abominatio seu abominabile scelus apud illos erit nostrum sacrificium, nec patientur nos iugulare coram ipsis quos colunt Deos; ac propterea nobis est secedendum. Sic omnino dicendum cogitanti conuersionem aut renouationem animi; Sic prorsus immolandæ sunt Domino abominationes mundi; id est, quæ mundus colendo reddit abominabilia, vt sunt honores, deliciae, diuitiæ, fastus & similia quæ coram mundo sacrificare, mundus credet abominabile, nec quieret si nec sacrificium hoc, religiosè persolui. Quamobrem disiungendi tantisper sumus; atque ex Ægypto seu mundana conuersatione, si verè velimus egredi, parandum nobis in deserto verum nostri sacrificium, siue vt illud ipsum identidem confirmemus & renouemus quod iam aliquando capimus: siue vt de nouo aliquid inchoemus: dicamusque magno & volenti animo cum tribus pueris in fornace orantibus: *In animo contrito & spiritu humilitatis* Dan. 3.
suscipiamur, sicut in holocausto arietum & taurorum, & sicut in millibus agnorum pinguium, sic fiat sacrificium nostrum in conspectu tuo hodie, vt placeat tibi. Vel cum Dauid: Cogitavi vias meas, & Ps. 118.
*conuertere pedes meos in testimonia tua.**

Vide in 1. parte, die 14. Ianuarij. In 3. parte, Feria 2. hebdomadæ 13. In 4. die sexta Octobris.



FERIA TERTIA.
DE MODERANDA CVRA NOSTRI
OFFICII, AD EXEMPLVM PRINCIPIS
APOSTOLORVM, SANCTI PETRI.

*In diebus illis exurgens Petrus in medio fratrum,
dixit, &c. Actuum I.*

VERITAS PRACTICA.

Sic internis externa sunt temperanda, vt neutrum eorum importunè, & vtrumque opportunè sibi cedat.

RATIO EST, Quia sic internis externa sunt temperanda, vt nec vlli eorum præiudicium fiat, nec vlli virtuti.

Sed nisi temperamentum sic fieret, vt neutrum importunè vel vtrumque opportune sibi cedat: alterutri eorum præiudicium fieret & virtuti.

Ergo sic internis externa sunt temperanda, vt neutrum eorum importunè, & vtrumque opportune sibi cedat. Quod certe ad praxim est perutile.

I. P V N C T V M.

RAT vt diximus turba hominum simul ferè centum viginti, quos inter præcipui erant Apostoli, & inter Apostolos sanctus Petrus, qui cùm meminisset Scripturæ quæ de funesto Iudæ casu, deque alio in eius locum sufficiendo prædixerat, sic loquutus est omnibus: *Viri fratres, oportet impleri Scripturam quam prædixit Spiritus sanctus per os David de Iuda qui fuit Dux eorum qui comprehenderunt Iesum, qui connumeratus erat in nobis.*

Sic internis externa sunt temperanda, Ut neutram, &c. 723

nobis, & sortitus est sortem ministerij huius. Et hic quidem possedit agrum de mercede iniquitatis, & suspensus crepuit medius, & diffusa sunt omnia viscera eius. Et notum factum est omnibus habitantibus Ierusalem, ita ut appellaretur ager ille lingua eorum Aceldamach, hoc est ager sanguinis: Scriptum est enim in libro psalmorum, fiat commemoratio eorum deserta, & non sit qui inhabitet in ea: & Episcopatum eius accipiat alter. Oportet ergo ex iis viris qui nobiscum sunt congregati, restem Resurrectionis eius nobiscum fieri. Ps. 68.

Sed hæc postrema in sequentem diem, satis modò sit ex illo sermone, quem sanctus Petrus habuit ad omnes fideles congregatos, agnoscere singularem eius sollicitudinem & curam verè pastorem, quæ est exemplar illius quam vnumquemque par est suo in munere rite administrando profiteri. Vide & admirare quod neque præceps fuerit, neque tardus; Non statim ut fuerunt congregati, loquutus est sanctus Apostolus, sed aliquot dies posuit in Recollectione & oratione; Neque vero etiam Recollectioni tantum indulgit, quin illo ipso tempore de negotio tam utilicum aliis ageret, pro ratione sui Officij: sicque vtrumque sapientissimè temperavit & moderatus est, ut neque nimia eum sollicitudo exteriorum ab interna recollectione impediret; neque nimis continuata Recollectio ab officij ministerio retardaret.

O verè dignum Pastorem ouium qui non modo suos regeret & pasceret, sed quomodo etiam sic vnusquisque deinceps sui curam officij gereret, edocuit verbo & facto. Quod ut amplius extendatur & vberius ad praxim reuocetur, sic intelligendum est quod dicitur de officio seu ministerio proprio, ut externa quæuis opera siue ad illud spectantia siue ad quiduis aliud, pari sensu & nomine comprehendantur: sicque internis seu spiritualibus exercitiis externa quauis alia temperentur, & ita inter se conueniant, ut neutrum eorum importunè, & vtrumque opportunè sibi cedat.

Ratio est vniuersalis, & ad plura se proferens documenta, si diligenter expendatur: Nam quando agitur de his temperandis quæ cum sint inter se diuersa, temperari debent ut simul conueniant, sic vniuersim loquendo, temperamentum eorum debet fieri, ut neutri parti aut vlli virtuti fiat præiudicium. Quale enim esset temperamentum, si plus vni daretur quam alteri, contra Ra-

tionem & virtutem? Quid est temperamentum rei cuiuslibet nisi modus & moderatio inter extrema diuersa, seu inter excessum aut defectum, quibus res illa corrumpetur, nisi tali modo temperaretur? At verò cuius est talem modum adhibere nisi virtutis? aut quomodo concipi poterit modus sine virtute aut virtus sine modo?

1. de Con-
fid. 8.

Sic præclare sanctus Bernardus discurrens per ipsas quatuor virtutes Morales seu Cardinales, *Quid tam iustitia quam modus*, inquit, *Alioquin si quid extra modum reliquit, non plane cuique tribuit quod suum est, quod tamen suum ipse est facere. Quid tam rursum temperantia, quæ non aliunde profecto temperantia est nisi quod nil immoderatum admittit? Sed puto fatebere non minus esse fortitudinis cum vel maxime ipsa sit quæ ab irruentibus vitiis & quasi hinc inde suffocare conantibus, purum illud potenter eruit, & vindicat in quoddam stabile fundamentum boni, sedemque virtutis. Est autem prudentia quæ modum diu animi neglectu posthabitu & vitiorum inuidia quasi in abditis reclusum & coopertum, quadam vetustatis caligine prior reperit & aduertit: propterea dico tibi à paucis aduertitur, quia paucorum prudentia est. Itaque Iustitia quarit, prudentia inuenit, vindicat fortitudo, temperantia possidet.*

Ex quo sancti Patris discursu, manifestè patet, quòd sicut virtutis est modum & temperamentum adhibere, ita nullus erit modus nullumue temperamentum, si vel vni virtuti præiudicetur: quanto minus si pluribus?

II. PUNCTVM.

SED nisi temperamentum internorum atque externorum sic fieret, ut neutrum importunè, & utrumque opportunè sibi cedat, alterutri eorum præiudiciu[m] fieret & virtuti.

Tria sunt distinctè hic explananda. Primum, quid sit opportunè vel importunè aliquid fieri: Nempe illud est opportunè quod fit suo tempore, suo loco & modo, seruatisque aliis circumstantiis, sicut ait Sapiens: *Tempus & respon[s]ionem cor sapientis intelligit: omni negotio tempus est & opportunitas.* Importunum è contra est quod fit extra tempus vel locum vel indebito modo, *ut musica in luctu, importuna narratio*, inquit Ecclesiasticus, *Itemque, Ex ore fatui reprobabitur parabola: non enim dicit illam in tempore suo.*

Eccle. 8.

Ecclesi. 12.
Ibid. 20.

Secundum inde explicandum est, tunc interna & externa cedere importunè, quando alterutrius eorum exercendi peruerteretur tempus vel modus, sine graui & vrgenti causa: quando scilicet vacandum est orationi, si tùm vacares studiis literarum vel externo cuius operi: Vel contrà, quando ex officio tibi forte incumberet negotiari aliquid; Tu relicto negotio velles orare aut studere. Hoc est *perperam agere*, quod vera nescit Charitas. *Ce. 1. Cor. 13.* derent vero sibi opportunè, si tantum vni cedat aliud, quantum vtriusque exigit necessitas siue opportunitas & conuenientia. *Da Ecclesi. 19.* *locum timori Altissimi.* Sic enim ipse ordinat.

Tertium hinc denique deducendum est, quod nisi tale esset internorum & externorum temperamentum vt neutrum importunè, & vtrumque sibi opportunè cederet, præiudicium alterutri afferretur & virtuti. Nam eadem plane est vtrorumque ratio; atque ex iis quæ sunt aperta & manifesta, licebit alia minus fortè nota cognoscere. Nonne si importunè oratio cederet studio, tunc præiudicium fieret orationi? At vero si cùm est opportunum studendi literis tempus, si non cederet oratio studiis literarum, nonne etiam præiudicium fieret studiis & literis? Percurre porrò quatuor illas virtutes quarum est modum & temperamentum afferre rebus, & vide nùm ex æquo violentur, vel quando vnum alteri cedit importunè, vel quando non cedit opportunè? Prudentia certe læditur in importuno studendi tempore, quia prudentis est obseruare tempus. Iustitia violatur quia quod erat debitum orationi vel alteri negotio detrahitur, & iniuste studio cõceditur. Temperantia corrumpitur quia plus datur appetitui quam Ratio postulet. Fortitudo denique enervatur quia non resistit naturæ deprauatæ quæ se importunè atque inordinate projicit in opus alienum.

Iam verò sit opportunum studendi tempus, sit commoda negotij conficiendi opportunitas, & cuius operi sua vacandi hora: nonne si tū oratio non cederet aut quælibet mentalis exercitatio, non minus læderetur Prudentia, quia non seruaret debitum tempus: non minus violaretur Iustitia, quia non redderet quod cuique suum est; non minus denique Temperantia & Fortitudo corrumperebantur, quia plus cederent, aut non quantū est satis, resisterent appetitui quem Ratio non minus regere debet vt id fiat quod opportunitas exigit fieri, quàm ne id fiat quod fieret importunè.

Eccles. 3.

O quàm pauendè Sapiens qui postquam vnique rei suum esse tempus ostendit, miram hanc adjicit sententiam: *Iustum & impium iudicabit Deus, & TEMPVS OMNIS REI TVNCE ERIT.* Id est, tunc apparebit quantum momenti esset positum in cuiusque rei seruando tempore, quia hinc iustus & impius iudicabuntur, prout rerum tempus obseruarint.

III. PVNCTVM.

SIC internis igitur externa sunt temperanda, vt neutrum eorum importunè, & vtrumque opportunè sibi cedat; quia fieret alioquin alterutri præiudiciū & virtuti; sicque nullum esset temperamentum, sicut nullus est modus aut moderatio sine virtute, quemadmodum nulla est etiam virtus nisi suo modo temperetur inter extrema: Vnde toties in scripturis illud commendatum; *Non declines ad dexteram neque ad sinistram.* Quod sane grauitè his vrget verbis Apostolus: *Testor coram Deo & Christo Iesu, & electis Angelis, vt hæc custodias sine præiudicio, nihil faciens in alteram partem declinando.*

Deut. 5.

Iosue 1.

Prou. 4.

1. Tim. 5.

L. 18. Mor.

c. 25.

Sic aptè sanctus Gregorius: *Pleni superna sapientia discernunt qualiter debeant & ad aliquid vacare intrinsecus, & ad aliquid extrinsecus occupari; vt si forte occulta Dei ordinatione aliquid eis non appetentibus de huius sæculi curis imponitur, cedant Deo quem diligunt, & præ amore eius intrinsecus solam illius desiderant visionem: præ timore vero eius, impositam sibi extrinsecus humiliter expleant actionem, vt & vacare Deo appetant ex gratia dilectionis, & rursum curas superimpositas ex conditione expleant seruitutis.* Et paucis interiectis sic pergit: *Intrant ad cor suum, & ibi consulunt quid velit occulta voluntas Dei, seseque subditos debere esse summis ordinationibus cognoscentes, humiliant ceruicem cordis, iugo Diuinæ dispensationis.* Itemque in illud Canticorum: *Pone me vt signaculum super cor, vt signaculum super brachium tuum,* dilectam animam inuitari ait *vt in exteriori actione aque ac in meditatione pro signo habeat & ferat Christum suum.*

Cant. 8.

Serm. 49.

Sic fusè sanctus Bernardus, in illud etiam Canticorum: *ordinauit in me Charitatem, QVOD veritas indicat præponendum, id charius amplectendum, ordo postulat Charitatis.* Orantem hominem cum Deo loqui quis dubitet? Quoties tamen inde Charitate iubente abdu-

Ser. 50.

Sic internis externa sunt temperanda, ut neutrum, &c. 727

timur & auellimur propter eos qui nostra indigent opera & loquela? quoties piè cedit negotiorum tumultibus pia quies? quoties bona conscientia ponitur codex, ut operi manuum insudetur? quoties pro administrandis terrenis iustissimè ipsis supersedemus celebrandis missarum solemnibus?

Tum de se particulatim, *Patienter auellor ab infæcunda Rache-
lis amplexibus, ut de Lia mihi exuberent fructus profectuum vestro-
rum: orare, legere, scribere, meditari & si quæ sunt alia spiritualis stu-
dij lucra, hæc arbitratus sum propter vos detrimenta.*

O quanti est meriti Caritas rectè ordinata, cuius operâ fit ut opus externum quantumuis humile & temporale plurimum valeat: & cuius defectu fit ut opus internum quantumuis sublime & spirituale nihil proficit.

Vide in 4. parte, Feria 4. hebdomadæ 18. Vbi hæc exhibetur Veritas:

Sic est omni negotio tempus & opportunitas, ut nisi adsit tempus & opportunitas, vix vllum fiat negotium.



FERIA QVARTA.
DE PERFECTA OBEDIENTIA
QVAM CAETERI OMNES CONGRE-
GATI, SANCTO PETRO
PRÆSTITERVNT.
ET DE NOSTRA REDDENDA
SUPERIORIBVS.

Oportet ergo ex his Viris qui nobiscum sunt congregati, in omni tempore quo intrauit & exiuit inter nos Dominus Iesus, testem Resurrectionis

728 FERIA 4. OCT. Ascensionis. Oportet ex his viris qui, &c.
eius nobiscum fieri, unum ex istis. Act. 1.

VERITAS PRACTICA.

Qui rationes inquirit obedientiæ, rationem quærit suæ
inobedientiæ.

RATIO EST, Quia qui rationes inquirit obedientiæ, vix obe-
dit nisi videat rationes.

Sed qui vix obedit nisi videat rationes obedientiæ, rationem suæ
inobedientiæ quærit.

Ergo & qui rationes inquirit obedientiæ, rationem quærit suæ
inobedientiæ, quod certe est perniciosissimum.

I. PUNCTVM.

AD MIRATIONE plane dignum est, nullum vnum in
tanta Congregatorum turba extitisse, qui sancto Petro
proponenti hanc electionem restiterit, aut villo modo
contradixerit! Quam multi verò multa poterant illi obiicere?
Nempe ne verbum quidem hac de re à Christo Domino esse fa-
ctum, tametsi sapius illis post Resurrectionem suam apparuit &
de Regno Dei, siue de ordinanda Ecclesia disseruit: Quæ verò
ipse Dominus reliquit Apostolis disponenda, non nisi post acce-
ptum Spiritum sanctum disponenda videtur reliquisse, cum
Joan. 14. aperte de illo dixerit, *ille vos docebit omnia, & suggeret vobis om-*
nia. Cur ergo non illum expectat Petrus? cur in re tanti momen-
ti festinat? cur non expectat aliquot dies quibus ille venturus est,
à quo debent erudiri de omnibus! an ita certus est Petrus de psal-
mi citati intelligentia, vt de plano eius sensu dubitari non possit?
Nonne hæc & similia poterant Apostoli sancto Petro referre &
obiicere, ne quid de hoc negotio concluderetur? Et tamen nul-
lus contra obstitit! nullus ne verbum quidem opponit; sed om-
nes intellectu & voluntate subiecti, hoc vnum volunt quod
æquum bonum Superiori visum est S. Petro.

Sic nempe parendum erat; sic parandus erat aditus diuino

Spiritui per insignem obedientiam, quæ ut esset insignior sic sub-
liciendus erat intellectus, nullas ut prorsus inquirerent rationes
cur sic præciperetur, vel cur sic obedirent. *Nam qui rationes inqui-
rit obedientia, rationem quarit sua inobedientia.* Quæ certe Veritas
si bene intelligatur, multum valere potest ad imitandam illam
perfectam Apostolorum obedientiam. Ut autem melius intelli-
gatur, sic videtur ratiocinandum: Qui rationes inquirat obe-
dientiæ, sic paratum se exhibet ad obediendum, ut vix paratus sit
obedire nisi reddantur rationes quas inquirat cur id fiat quod iu-
betur, vel cur id sibi iubeatur. Licet enim forte obediret, etiam si
rationes non redderentur, non obediret tamen ex motiuo quod
vocant formali obedientiæ, sed vel motu naturali vel politica
consideratione, vel humano aliquo affectu, quod qui tantum agi-
tur non facit actum Christianæ obedientiæ, quæ cum Diuina
gratia debet supra naturam euehi, sicut expressè monet Aposto-
lus: *serui obedite Dominis carnalibus, cum timore & tremore in sim-* Ephes. 6.
plicitate cordis vestri sicut Christo, non ad oculum seruientes, quasi
hominibus placentes, sed ut serui Christi, facientes voluntatem Dei
ex animo, cum bona voluntate seruientes, sicut Domino, & non homi-
nibus, scientes quoniam unusquisque quodcumque fecerit bonum, hoc
recipiet à Domino, siue seruus, siue liber.

Hæc sunt videlicet motiua supernaturalia quibus moueri de-
bet Christianus & Religiosus, ut Christianè & Religiosè agat,
& quibus non videtur permouendum eum qui rationes inquirat
obedientiæ. Nam cum rationes illæ quas inquirat merè humanæ
sint: vel reddentur, vel non reddentur; si reddantur, propter il-
las tantum obediet, & sic humano tantum motiuo mouebitur:
vel si non reddantur, dolebit se obedire, murmurabit obediendo,
nec nisi valde oscitanter obediet, quod certe non est obedire
Christiane. Nam si Christo sic obedires, putaresne te obedire!
at debes obedire Superiori sicut Christo, aut si non obedis ut
Christo, non obedis ut Christianus. *Subiecti estote omni humane* 1. Pet. 2.
Creaturae propter Deum: siue Regi quasi præcellenti: siue ducibus tam-
quam ab eo missis. QVODCVM QVE facitis, ex animo operamini si- Coloss. 3.
cut Domino, & non hominibus, scientes quod à Domino accipietis re-
tributionem hereditatis. Domino Christo seruite. Quid expressius?

II. PUNCTVM.

SED qui sic obedit ut nisi videat rationes suae obedientiae, rationes suae inobedientiae querit.

Quando hoc vnum esset malum in eo qui rationes inquirat obedientiae quod non obediat, etiam si videatur obedire, satis grande esset malum, & satis potens consideratio ad illud euitandum; sed malum malo additur & quidem multiplex. Primum quidem rationes discutiet, & quam volet approbabit vel improbabit. Deinde improbando rationem, simul de superiore iudicabit & detrahet, quod quam damnosum sit non ita pridem supra satis aperte est demonstratum, ubi de peccato ariolandi actum est. Deinde quod extremum est malitiae, quando non obediet vel cum imperfecte tantum & ad oculos obediet, causas praetendit suae inobedientiae, vel suae fictae & simulatae obedientiae. Hoc enim ipso quod non probat rationes obedientiae, putat se habere rationes inobedientiae. Nam cum sibi persuasum & statutum habeat non esse obediendum nisi visa ratione, sicut quando rationem non videbit tunc non obediet, sic cum non obediet, rationem se habere dicet non obediendi: nempe vel quod nullam videat obediendi rationem, vel quod videat oppositam aliquam, ut sibi fingit. Tam facile est etenim fingere sibi rationem cur non obediat quam improbare rationem quare obediat. Qui porro non nisi visis rationibus obediunt, tam faciles sunt in improbandis rationibus, quam proclive & naturale est unicuique, suo abundare in sensu, quando praecipue deprauata est voluntas quae corrumpit iudicium & Rationem euertit.

Indus.

Num. 16. *Ve illis quia in contradictione Core perierunt*, inquit vnus Apostolus. Haec est videlicet eius contradictio contra Mosem, cum sibi rationem finxit non obediendi; quod tam graue scelus fuit ut quotquot huius contradictionis & inobedientiae fuerunt participes, viui & spirantes in infernum, terra dehisciente descenderint: Quod sic grauiter describit sanctus Ambrosius: *Immutans terra in medio plebis scinditur, aperitur in profundum sinus, abripiuntur noxii, & ita ab omnibus mundi huius ablegantur elementis, ut nec aërem haustu, nec caelum visu, nec mare tactu, nec terram contaminarent sepulchro.* Satinne tibi hoc poenae est, ad crimen indicandum?

III. PUNCTVM.

III. PUNCTVM.

SIC igitur, qui rationes inquirat obedientia, rationem querit sua *inobedientia*; nec parum graue crimen incurrit, quale est prætendere causam suo peccato, & quasi velle peccare cum causa; aut velle causam fingere, cur non peccetur, non obediendo vt peccetur liberius. *Vt filij desertores, dicit Dominus, vt faceretis consilium & non ex me, & ordiremini telam & non per spiritum meum, vt adderetis peccatum super peccatum.*

CVR praecepit vobis Deus vt non comederetis de omni ligno para- Gen. 3.
dysi? Audisne primum serpentis sibilum quo primos nostros parentes est aggressus; in inquirenda scilicet ratione cur praecepisset Deus ne comederent de fructu vetito? Nouerat enim Serpens callidus quod statim atque induxisset hominem ad inquirendam causam praecepti, tum facile eum auocaret ab obedientia, quia non videndo rationem cur non comederet, putaret se habere rationem comedendi; *sic enim*, vt ait S. Augustinus, In Ps. 70.
dum circa rationem praecepti & obedientia secum meditabatur, dicere poterat, si bona est arbor, quare non tango, si mala est quid facit in paradyso; & hinc fortasse periit, vt videas quam sit cauenda talis inquisitio.

Rectissime autem idem sanctus Augustinus ibidem obseruat, *in eo vel maxime positum fuisse primum illud praeceptum & meritum obedientia, vt ignorata causa, nec inquisita ratione praecepti, simpliciter obediret, quia iubebatur, quia Dominus erat qui iubebat, & seruus homo cui iubebat: hac tota causa quia seruus es & homo. Quasi si parua videtur esse causa, dedignaris esse Dei seruus.* Velle ne hoc dedignari? An te pudet esse Dei seruum? an te pudet ei obedire quia ille tuus est Dominus, tu eius seruus? Caue ergo ne inquiras rationes obedientia, nam sic aliud quæreretis vt obedires quam quod ille est Dominus, & tu seruus. *Ego Dominus diligens* 17. 84.
iudicium, & odio habens rapinam in holocausto. Hoc est vnum quod maxime diligit in obedientia nempe subiectum iudicium: hoc est quod holocaustum facit vel rapinam in holocausto, prout datur vel negatur iudicium, id est, prout rationes praecepti non quærentur vel quærentur. O quam frequens & crebra est in hoc holocausto rapina!

732 FERIA 5. quæ est Oſt. Aſcenſionis. Et ſtatuerunt duos, &c.

Vide in 1. parte, FERIA 5. hebd. in Aduentu. In 3. parte, de voto obedientiæ. In 4. FERIA 4. hebdom. 15. Vbi habetur hæc Veritas:

Nihil eſt in Abnegatione rationabilius, quàm quod in illa videtur minus rationabile.



FERIA QUINTA.
DE VNANIMI CONSENSV DISCI-
PULORVM IN ELECTIONE DVODE-
CIMI APOSTOLI:
ET DE NOSTRO SIMILITER PROCVRANDO.

Et ſtatuerunt duos, Ioseph qui vocatur Barsabas,
qui cognominatus eſt Iuſtus; & Matthiam.
Act. 1.

VERITAS PRACTICA.

Qui ſenſu ſuo priuato, ſaniorẽ ſe aliis putat, ſano ſe priuat ſenſu.

RATIO eſt, quia ſano ſe priuat ſenſu qui ſic de rebus ſentit & iudicat, vt ſoli proprio fidat iudicio.

Sed qui ſenſu ſuo priuato ſaniorẽ ſe aliis putat, ſic de rebus ſentit & iudicat, vt ſoli proprio fidat iudicio.

Ergo is ſano ſe priuat ſenſu. Et dum ſe ſolum bene ſentientem putat, ſolus eſt qui non ſentiat malum ſuum, quod certe eſt deplorandum.

P V N C T V M.

CONSIDERANTI quam faciles essent Apostoli, etiam præsente Domino, ad contentiones & amulatio-^{Luc. 22.} nes, mirum omninò videri poterit, quàm sint modo inter se & cum aliis congregatis vnanimis & idipsum sentientes. En duo tantum ex turba centum viginti hominum, statuuntur, quorum vnus eligatur in duodecimum Apostolum; & nullus contra pro se vel pro alio contendit, nullus refragatur, nullus ne verbum contra obicit; sed omnes tam vnanimi consensu conueniunt in vnum atque idem, vt iam de illis dici possit quod postea scriptum est, *multitudinis credentium erat cor vnum & anima vna.*^{Act. 4.} O quam euidenter apparebat inter eos ille esse *qui habitare facit*^{Pf. 67.} *vnus moris in domo!* Iam profectò sentiebant quod orauerat Christus Dominus, *vt omnes vnum essent sicut pater in filio, & filius in*^{Ioan. 17.} *patre.* Sic denique aptius disponendi erant ad ampliorem spiritus sancti Receptionem, vt de his canit Ecclesia, *inuenit eos concordēs Charitate, & collustrauit eos inundans gratia Deitatis.* Sicut enim anima non infunditur in corpus nisi organis omnibus apte dispositis; sic plane Spiritus sanctus dum ex pluribus vnum mysticum corpus facit quod inhabitet, requirit omnes inter se apte coherentes; & quò facilior ad communem eris consensum, eò facilius quanta quanta volet infundere Donorum Author, & recipies & conseruabis.

Quia vero vnusquisque suo in priuato sensu sic abundat & acquiescit, vt sibi semper melius sentire quam alij videatur: Idcirco tibi est diligentius attendendum, vt quantum vniciuique noceat suus priuatus sensus, probe intelligas. Neque vero melius intelliges quàm ex hac proposita Veritate: *Qui priuato suo sensu saniozem se aliis putat, sano se priuat sensu.* Quod quidem non potest etiam efficacius declarari, quam explicando quid sit sanus sensus, quid sit sane de rebus sentire & iudicare. Nempe hoc est, sic vnus cuiusque rei vel negotij naturam & proprietates inuestigare, vt in his dignoscendis non soli proprio fidas iudicio. Nam cum tanta sit in homine, rerum ingnorantia, & tanta iudiciorum de rebus diuersitas, vt quot sunt capita, tot sint diuersi sensus; quis sanæ mentis audebit in illa iudiciorum & sensuum

734 Peria 5. quæ est Oct. Ascensionis. Et statuerunt duos, &c.

diuersitate, sic sibi fidere in iudicando, vt sibi soli velit fidere? Nonne hoc est quod scripturæ toties monent: *Ne innitaris prudentia tua: ne sis sapiens apud te metipsum. VAE qui sapientes estis in oculis vestris. QUI confidit in corde suo, stultus est. SALVS vbi multa consilia. VIA stulti recta in oculis eius, qui autem sapiens est, audit consilia. VIDISTI hominem sapientem sibi videri: magis illi spem habebit inspiens.* Nam vt alibi iam dictum est, saltem insipiens qui se talem agnoscit, sibi diffidit & cauet; sed sapiens qui sibi videtur ita sapiens, vt non putet egere alterius consilio, sua se perdit sapientia: atque vt optime ait sanctus Bernardus: *illi omnia desunt qui nihil sibi deesse putat.*

Quod & de se Salomon sic aptè expressit: *dixi, sapiens efficiar, & ipsa longius recessit à me: multò magis quam erat: & alta profunditas, quis inueniet eam?* Quasi diceret, non est vnus priuati hominis sic posse sapienter de rebus iudicare vt suo soli fidat iudicio: nimis alta rerum profunditas, vt eas vnus inuestigare possit: Et quo propius se accedere ad intimam rerum notionem crederet: eò ipsa rerum notio longius ab illo recederet. Vnde euidenter patet quod sanus ille sit sensus qui sic de rebus sentit & iudicat, vt soli suo non fidat iudicio. Atque ita ex consequenti qui sic suo fidit ingenio vt non aliter de rebus sentiat quàm vt ipse solus sentit & iudicat, sano se hoc priuat sensu; pleneque aliud nihil restat nisi vt insanus aut insensatus dicatur. *Nos insensati!*

II. PUNCTVM.

SED qui suo priuato sensu sanio rem se aliis putat, sic de rebus sentit & iudicat, vt soli proprio fidat iudicio.

In hoc enim est priuatus sensus, vt nihil commune cum aliis habeat, diciturque proprium iudicium & consilium, de quo sic egregiè & aptè ad rem nostram sanctus Bernardus: *Lepra proprii consilij eò perniciosior quo magis occulta: & quanto plus abundat, tanto sibi quisque sanior esse videtur. Hac illorum est qui Zelum Dei habent, sed non secundum scientiam, sequentes errorem suum, & obstinati in eo ita vt nullis velint consiliis acquiescere. Hi sunt unitatis diuifores, inimici pacis, Charitatis expertes, vanitate tumentes, placentes sibi, & magni in oculis suis, ignorantes Dei iustitiam, & suam volentes constituere. Et qua maior superbia quam vt*

Serm. 3. in
Resurr.
Dom.

Qui sensu suo priuato saniozem se aliis putat, &c. 735

vnus homo toti congregationi iudicium suum preferat, tamquam ipse solus habeat Spiritum Dei!

Quæ sancti Patris dicta sufficient quidem ad iudicandum quis sit priuatus sensus, & quis in genere sic sentiat: sed te in particulari forsan, minus inde talem esse cognosces, quasi non sentias tot mala quot enumerat. At vero hoc vnum attende quod refert vnde alia possis timere, nempe occultum hoc esse malum, & eo magis damnosum quo est magis occultum.

III. P V N C T V M.

QUIS QVIS igitur sensu suo priuato saniozem se aliis putat, sano se priuat sensu, qui vel in eo maxime agnoscitur esse sanus, si quis de rebus ita sentit & iudicat, vt non soli suo fidat iudicio: Aut è contra si quis sic sentiat vt sibi soli credat & confidat, tam verè sano se ille priuat sensu, quàm vere priuatus est eius sensus. Quòd quàm sit damnosum & cauendum, præterquam quod iam satis visum est, tum vero amplius discere ex sanctis Patribus, quos inter sanctus Basilus in illud Isaia: *Et restituam Consiliarios tuos sicut antiquitus: SACRA*, inquit, *quædam res est consilium, voluntatum vnio, fructus dilectionis, humilitatis insigne. E diuerso intolerabile est superbia argumentum, existimare se nullius egere consilio, sed sibi vni attentum esse quasi solus possit sibi consilio decernere quæ optima sunt.* Et in regulis breuioribus, non est rationi consonum si quis in omnibus, suo stare velit iudicio: nec periculo aut contumacia suspitione caret, in congregatione multorum, nolle maioris partis sententia acquiescere. Sanctus item Ambrosius, *Negligere bonorum iudicia, vel arrogantia vel dissolutionis est: quorum alterum superbia adscribitur, alterum negligentia.* Integram hac de re Cassianus collationem habet, vbi hæc inter alia satis quidem vulgata, sed numquam satis perpenſa: *Nullo alio vitio tam præcipitem Diabolus monachum pertrahit ac perducit ad mortem, quàm cum neglectis consiliis seniorum, suo iudicio persuaſerit definitionique confidere.* Sanctus quoque Dorotheus: *Cum subiecti simus multis passionibus, prauisque affectibus, nostro iudicio non debemus omnino fidere: quando enim norma vel regula curua est & inflexa, numquam quod secundum eam dirigitur, rectum efficitur sed distortum.* Sanctus verò Bernardus hoc de se profiteretur: *Amor, rimatus aufert mihi verum*

736 Fria 6. post Oct. Ascensionis. Et orantes dixerunt, &c.

c. 66. de
inter domo.
l. i. c. 9.

iudicium: Idcirco parum mihi credo de meipso ut pote homini mendaci, timens ne si meipsum iudico, mentiatur iniquitas sibi. Author denique libri de Imitatione Iesu: Quis est ita sapiens qui omnia scire plene potest, Ergo noli nimis in sensu tuo confidere: si bonum est tuum sentire, & hoc ipsum propter Deum dimittis & alium sequeris, magis inde proficies.

Iam verò tu homo priuati sensus & consilij quid sentis de sensu horum Patrum? Rectene illi contra tuum priuatum sensum? Malè tu ergo contra illos hunc retinebis: neque deinceps, tantum communi aliorum hominum sensui repugnabis, sed ipsis sanctis patribus, ipsi sacrae scripturae, ipsi denique Christo, qui *se, vbi plures essent congregati, promittit in eorum affuturum medio, non vbi solus esses.*

Matth. 18.

Vide suprà in hac parte, Sabbato Septuagesimæ.



FERIA SEXTA.

DE FERVENTI ORATIONE

DISCIPULORVM:

ET DE NOSTRA CONSIMILI, AD
PETENDVM EVMEN IN DVBIIS.

Et orantes dixerunt, Tu Domine qui corda nosti omnium, ostende quem elegeris ex his duobus, vnum. Act. 1.

VERITAS PRACTICA:

Erranti in dubiis & non oranti, nulla est erroris excusatio.

RATIO est, quia tota excusatio tum peti posset vel ab ignorantia vel ab aliqua rei difficultate.

Erranti in dubiis & non oranti, nulla est erroris excusatio. 737
Sed non orantis Deum in dubiis, nulla est ignorantia vel difficul-
tatis excusatio.

Ergo neque erroris tum commissi. Quod pauci tamen aduertunt,
licet sint multi qui errent.

I. PUNCTUM.

AM suprà visum est, ex quo tempore simul congregari fuerant Discipuli, expectantes Spiritum sanctum, omnes vnanimiter in oratione perseuerasse. Nunc verò considerari potest attentius, triplex eorum orationis genus. Primò quidem vniuersim orabant variis illis modis qui ab Apostolo describuntur dum ait: *Implemini spiritu sancto loquentes vobismet-* Ephes. 3:
ipsis in psalmis, & hymnis, & Canticis spiritualibus, cantantes in cor-
dibus vestris Domino, & gratias agentes semper pro omnibus, in no-
mine Domini nostri Iesu Christi Deo & Patri. Et rursus; Obsecro, 1. Tim. 2.
inquit, primum omnium fieri obsecrationes, orationes, postulationes,
gratiarum actiones pro omnibus hominibus.

Deinde verò hærebant diutius in vno ex his orandi modis, postulantes ardentissime aduentum Spiritus sancti, quem quidem non ignorabant venturum ex promissione Domini, sed cum nescirent tempus, illud vrgebant vehementius sicut antiqui Patres aduentum Christi: atque eorum precibus forte est acceleratus Spiritus ille Diuinus qui se idcirco vult expectari & orari vt se abundantius communicet. O quæ illorum desideria! quæ suspiria!

Denique, si quid interea præsentius & particularius occurreret de quo dubitarent & ad quod perficiendum, opus esset Diuino lumine, tum illud vnanimiter obsecrabant, vt patet in hac electione duodecimi Apostoli pro quo orantes dixerunt, *Tu Domine* Act. 1;
*qui corda nosti omnium, ostende quem elegeris ex his duobus vnum, accipere locum ministerij huius & apostolatus de quo preuaticatus est Iudas, vt abiret in locum suum. Et dederunt sortes eis, & cecidit sors super Matthiam, & annumeratus est cum vndecim Apostolis. Qua de re in ipsius sancti Matthiæ festo dictum est fufius. Nunc verò expende accuratè quàm sit necessarium sic orare in dubiis & difficultatibus, cum alioquin vt habet proposita Veritas: *Errantis &**

non orantis, nulla sit erroris excusatio.

Ratio est apertissima, quod si quæ tūm prætendi potest excusatio, maxime videatur peti ab ignorantia & summa quadam rei difficultate; Nam quandoquidem ut supponitur, res est ita dubia ut in illa erres, & ita difficilis ut eam non conficias, quid est aliud quod ab errore vel ab omissione te excuset nisi rei ignorantia vel difficultas! si enim res plana esset & facilis, aut non errares aut te ab errore non excusares. *Si non venissem*, inquit Dominus, *& loquutus fuisset eis, peccatum non haberent, nunc autem excusationem, non habent de peccato suo.* Quasi diceret, quæ duo poterant illos excusare, ignorantia & difficultas, per me sublata sunt, nempe ignorantia per doctrinam, & difficultas per Gratiā; atque ideo nihil illis superest quod excuset. Sic & Apostolus, *propter quod inexcusabilis es, o homo omnis qui iudicas, in quo enim iudicas alterum, te ipsum condemnas, eadem enim agis qua iudicas.* Id est, ostendis te non ignorare mala quæ tu facis cum illa ipsa iudices & condemnes in aliis, ac proinde inexcusabilis es sicut qui sciens & volens facit malum. An putas istum excusari qui scienter peccet? Si te ergo putas excusatum, inde est quia peccas ignoranter.

Joan. 15.

Rom. 2.

II. PUNCTVM.

SED non orantis in dubiis nulla est talis ignorantia nec ullius difficultatis excusatio.

Nam cum orando impetrare potuisset Spiritum sanctum qui lumen in dubiis & robur in difficultatibus impertiisset, profecto quantumque ignores id in quo erras, aut quantumcumque labores in agendo: nulla est excusatio ignorantiae vel difficultatis. Tū enim est voluntaria & affectata quodammodo ignorantia & difficultas, cum sine ullo negotio utramque pervincere potuisses. *Deum non inuocauerunt, illic trepidauerunt timore ubi non erat timor*, Quid enim difficultatis in orando? An vero ignoras tibi esse orandum Deum maxime in dubiis & difficultatibus, aut quomodo sit tūm orandus? Audi Dauidem: *Inuenit seruus tuus cor suum ut oraret te.* Id est, inuenit in corde quid oraret. Hic etiam aptè quod sanctus Augustinus: *Deus impossibilia non iubet, sed iubendo monet & facere quod possis & petere quod non possis, & adiuuat ut possis.* Quam facile autem petendo obtrineatur Spiritus

Pf. 32.

2. Reg. 7.

L. de nam-
94 & gra-
216 c. 43.

ritus

ritus sanctus, vel ex his Christi Domini verbis collige: *Si vos, Luc. II.*
inquit, *cum sitis mali, noster bona data dare filiis vestris: quanto magis Pater vester de Cælo dabit Spiritum bonum petentibus se?* ô qualis promissio tanti Boni! ô quanta est orationis potestas, quæ illud promeretur! Sed ô qualis quantaque vecordia non orantis tale bonum quod est oranti promissum!

III. PUNCTVM.

ERGÓ erranti in dubiis & non oranti, nulla est erroris excusatio. Nam cum erroris excusatio vel ab ignorantia vel à difficultate peti posset, nulla autem, si orasses, ignorantia vel difficultas superfuissent, quid restat quod excuses? At verò multa sunt quæ te accusent, nempe orandi & impetrandi facilitas: errorum grauitas & multitudo quæ orationis defectu protegunt; orationis continuæ & numquam cessantis toties repetita in Scripturis commendatio; Sanctorum Patrum Exempla, & consilia; Motus interni Spiritus sancti; aliaque innumera quæ te negligentia vel malitia tam aperte accusant, vt nihil restet quam deplorare præterita, & in futurum serio perspicere quod ait Sapiens: *In omnibus deprecare Altissimum vt dirigat in veritate viam tuam.* Ecclesi. 37. Et quod Apostolus: *In omni oratione & obsecratione, cum gratiarum actione, petitiones vestra innotescant apud Deum.* Phil. 4.

Vide hic etiam libri 3. de Imitatione Christi caput tricesimum octauum: vbi de Mose semper recurrente ad oraculum & ad orationem, & de Iosue decepto à Gabaonitis quod eò non recurrisset.

Quæ plura verò de Oratione desideres, habentur suprâ, Dominica 5. post Pascha, & sequenti Feria Rogationum.



SABBATO

IN VIGILIA PENTECOSTES.

DE PERFECTA DISCIPVLORVM,

ET NOSTRA RESIGNATIONE AD RECI-

PIENDVM SPIRITVM SANCTVM.

a. Pars.

Aaaaa

740 Sabbato, Vigilia Pentecostes. De perfecta, &c.

Et cum complerentur dies Pentecostes, erant omnes pariter in eodem loco. Act. 2.

VERITAS PRACTICA.

Nemo paratior ad omnia Dei dona recipienda, quàm qui ad nulla sibi danda æque paratus est.

RATIO EST, Quia nemo paratior ad omnia Dei dona recipienda, quàm qui donantis voluntatem spectat potius quam donum eius, aut suum commodum.

Sed qui ad nulla sibi danda dona æque paratus est atque ad omnia recipienda, spectat potius voluntatem Donantis quam ipsius donum, aut suum commodum.

Ergo nemo paratior ad omnia Dei dona recipienda, quam qui ad nulla sibi danda æque paratus est: & qui possit perinde dicere ut recipiat vel non recipiat: paratum cor meum Deus: paratum cor meum.

Pf. 56.

I. P V N C T V M.



CVM nescirent Discipuli quo præcise die quæue hora Spiritus sanctus descenderet, sic Eum expectabant omni hora, ut æque essent parati ad eum iam iam recipiendum si adueniret, ac diutius expectandum si aduentum retardaret. Iam penè decem in illa suspensione animi fluxerant dies, & nullus eorum conqueritur, nullus se domo summoget, ac ne quidem cubiculo ubi congregati erant: sed omnes pariter siue vnanimiter consistunt in eodem loco, in eadem mente, in eadem positione corporis & animi quam decebat eos qui toti pendebant à nutu & voluntate Dei. Non anteuertunt tempus egrediendi foras sicut Saül; non definiunt dies expectandi Diuini auxilij sicut Betulitæ; nec velut parentes Tobix iunioris nimiam filij deplorant moram; Sed hoc vnum agunt, hoc vnum cogitant ut nihil agant aut cogitent nisi quod purè velit Deus. Sunt vi-

*1. Reg. 13.
Iud. 7.
Tob. 10.*

giles illi serui quos Dominus ita descripserat vt succincti lum- ^{Luc. 12.}
bos, & lucernas in manu tenentes, expectarent de nocte Domi-
num suum vt quando veniret & pulsaret, confestim illi aperirēt.

Hæc erat proxima eorum dispositio in perfecta quam vocant
Resignatione animi: Et hæcerat perfecta eorum Religratio, sic
æquali mentis statu consistere, vt vel expectarent diutius, vel re-
ciperent quantocyus Spiritum sanctum, prout veller aut noller
se illis communicare. Sic proinde nos ad eorum exemplum, sic
ad vtrumque semper parati sumus, vt numquam magis velimus
quod velit Deus, quam nolimus quod nolit. Quidquid aliud pa-
raueris, *Nemo paratior ad omnia Dei dona recipienda, quam qui ad
nulla sibi danda æque paratus est.*

Ratio quæ affertur continet documentum vitæ spiritualis exi-
mum quod spectat ad perfectionem Resignationis quæ est pro-
xima, Deo bene iuuante, dispositio ad omnia Dei dona recipien-
da: nempe vt spectemus magis Deum donatē, quàm eius dona.
Hoc enim non modo est nobilius & excellentius, sed magis inti-
mum, & vt vocant, essenziale ipsi Resignationi siue præparatio-
ni quæ in eo præcipue sita est vt nos totos integrè & perfecte sub-
dat Deo, nihil vt supersit quod nostrum reputemus & spectemus,
sed toti quodammodo in Diuinum mutati beneplacitum, hoc
vnum cogitemus, velimus & suspiremus quod ille. *Et nunc quæ
est expectatio mea: nonne Dominus? Et substantia mea apud te est.* ^{Pf. 38.}
*Quia inflammatum est cor meum, & renes mei commutati sunt; & ego
ad nihilum redactus sum & nesciui. Vt iumentum factus sum apud
te: & ego semper tecum. Tenuisti manum dexteram meam, & in vo-
luntate tua deduxisti me, & cum gloria suscepisti me. Quid enim mihi
est in Cælo? & à te quid volui super terram? Defecit caro mea & cor
meum: Deus cordis mei & pars mea Deus in æternum.* Hoc est vnum
spectare Dominum, hoc est esse resignatum, hoc est esse paratissi-
mum ad omnia Dei dona; hic est animus quem maxime Deus
respicit. Hic est homo de quo ait, *ecce seruus meus suscipiam eum,
electus meus, complacuit sibi in illo anima mea, dedi spiritum meum su-
per eum.* ^{Is. 42.} O qualis animæ nostræ status in qua tibi complaceat
ipsa Dei anima! in qua suæ Beatitudinis aliquod velut incremen-
tum inueniat!

II. PUNCTVM.

SED qui ad nulla sibi danda dona Dei, æque paratus est, atque ad omnia recipienda, ille est qui spectat potius Donantem quam ipsius donum aut ullum suum commodum.

Tr. de dilig. Deoc. 7

Vid. l. 2. de lmis. Ch. c. 9.

Nam cum dona spiritualia & coelestia sint præcipua bona, & quæ iustius atque auidius desiderari & recipi possint: profecto qui ad nulla recipienda, æque paratus est, atque ad omnia, prout dare vel negare voluerit Deus, sic se indicat purè spectare Diuinam voluntatem supra quiduis aliud: quandoquidem illa Bona superant dignitate & vtilitate cætera omnia: dummodo scilicet, vt supponitur, id faciat non ex negligentia vel incuria, sed ex intuitu Diuini Beneplaciti quod pluris facit quàm suum bonum, etiam spirituale & æternum. Sicut supra dictum Beatos in cælo magis gaudere, quod Diuina in ipsis voluntas impleatur, quam quod beati sunt, vnde sunt tam contenti in nouissimo atq; in primo loco vt ait S. Bernardus. Hic est excellentissimus perfectæ Resignationis actus qui tantopere celebratur in sancto martyre Laurentio, non quod tantum paratus fuerit pati cum Xisto Pontifice, sed potius, id auide cum expeteret, tam paratus fuerit ad minimè patiendum cum eo, quia sic voluntas Dei ferebat, quàm ad martyrium subeundum.

Pro. 11.

In homine sæculari & minus perfecto, perfectionis studiū esset, magna semper velle agere, & magna pati: In homine vero perfecto, imperfectionis nota esset sic velle magna semper agere vel pati, vt non æque parua vel nulla velit pati aut agere, prout purè Deus ordinarit. *Pondus æquum voluntas eius*, inquit Sapiens, id est voluntate Diuina sic ponderantur à sanctis omnia, vt siue parua siue magna sint, sint tamen illis æqua & æqualia, quia vnam Dei respiciunt voluntatem. Vel sic: sicut pondere suo feruntur omnia quocumque feruntur: ita sanctorum pondus est Diuina voluntas quæ ipsis videtur tam æqua & sancta in omnibus, vt eò indifferenter ferantur quo Diuina voluntate feruntur. Sic rursus dicuntur Beati sic colere Diuinam voluntatem vt si talis esset Dei voluntas, cælum desererent non modo vt terras iterum repeterent, sed in ipsas purgatorii vel æterni damnatorum ignis pœnas descenderent, dicerentque cum Iobo, *Dominus dedit,*

Dominus abstulit, sit nomen Domini benedictum: sed tanto id gloriosius & magnificentius dicerent supra Iobum, quàm coelum terræ præstat. O Diuinas sanctorum mentes! quam longe ab his absumus, qui terrenum nescio quid vix patimur nobis negari, cum coelum ipsum pro Deo deferendum esset!

III. PUNCTVM.

NEMO ergo paratior ad omnia Dei Dona recipienda, quam qui ad nulla sibi danda aque paratus est; Quia sic purius Deum respicit, sic donantem potius quam dona spectat: sic perfectius Deo subicitur & vnitur, quæ perfecta subiectio capacio- rem & paratiorem Deo recipiendo facit animam, cui propterea dicitur: *Dilata os tuum & implebo illud*. Id est, vt interpreta- Ps. 80. tur sanctus Augustinus, *angustias pateris in te, desere teipsum, vt in me transeas, sicque dilataberis vt magis implearis*. Quod & expressius idem Regius Psalter: *Doce me*, inquit, *facere voluntatem* Ps. 142. *tuam quia Deus meus es tu*, Tum verò statim subdit, *spiritus tuus bonus deducet me in terram rectam*; Quasi diceret, statim atque me ad voluntatem tuam comparauero, spiritus tuus me sibi comparabit & acquireret. Itemque alibi luculente; *Auferes spiritum* Ps. 103. *eorum & deficient, & in puluerem suum reuertentur, Emittere spiritum tuum & creabuntur & renouabis faciem terræ*, Tum enim auferitur spiritus noster & deficit cum perfecte subicitur Deo; at loco nostri spiritus, Diuinus ille substituitur qui replet vasa vacua, & cui potius deficient vasa quam ille valis, sicut de oleo 4. Reg. 4. Elizæi narratur.

Ossa arida audite verbum Domini, præclara est figura apud Eze- Ezech. 37. chielem. Vide locum, & illud maxime annota quod dicitur, *A quatuor ventis veni Spiritus*. Sic enim mystice à quatuor ventis super nos inuocatur & venit sanctus Spiritus, id est, per quatuor motiua representata per quatuor mundi partes vnde quatuor principales venti perflant, & continentur in hymno de Spiritu sancto. Sic enim primò venit velut ab oriente per beneficia commemorata: *Veni Creator Spiritus, &c.* Deinde secundo & tertio versu velut à meridie per Charitatem: *Qui paracletus diceris, &c.* Tum verò quarto versu velut ab occidete per infirmitates & pec-

744 *Sabbato, Vigilia Pentecostes. De perfecta Discipulorū, &c.*

cata nostra: *Accende lumen sensibus, infirma nostri corporis, &c.*
quinto denique versu velut à septentrione, propter hostes, *Hostem repellas longius, &c.* Atque hæc ardentè, constanter & purè
propter Deum, nihil aliud postulando quam quod ipse velit, &
quia sic ipse vult vt postules. Nihil in vacuo natura operatur; *contra, tota est in vacuo Gratia; Vt non gloriatur omnis Caro in conspectu eius.*





HAC HEBDOMADA, sic pergetur in historia
Actuum Apostolorum, vt inde diebus singulis manife-
stentur septem Dona Spiritus sancti, totidemque ex
illis erutæ Veritates.

DOMINICA

PENTECOSTES.

DE MISSIONE SPIRITVS SANCTI.
ET DE DONO SAPIENTIAE.

*Et factus est repente de Cælo sonus tamquam adue-
nientis spiritus vehementis, & repleuit totam do-
mum, ubi erant sedentes. Et apparuerunt illis
dispertita lingua tamquam ignis, seditque supra
singulos eorum. Et repleti sunt omnes Spiritu
sancto, & ceperunt loqui variis linguis, prout
spiritus sanctus dabat eloqui illis. Act. 2.*

VERITAS PRACTICA.

Humana sapientia sic Diuinæ opponitur, sicut huma-
næ stultitia.

RATIO est, quia idcirco humane Sapientie stultitia opponitur
quod priuet hominem usu Rationis naturalis sue quo nulla est

humana sapientia.

*Sed hac humana sapientia sic priuat hominem usu supernaturalis
Rationis, siue quo nulla est Diuina sapientia.*

*Sic ergo illi opponitur, ac proinde tam cauenda est quam stultitia
timeretur.*

I. P V N C T U M



V A N T O hic plura dici possent de admirabili
Myserio descendens in Discipulos congrega-
tos Spiritus sancti, tanto breuius constringen-
tur, quia plana sunt vnicuique & obuia. Tan-
tum vide ne multitudo vel varietas rerum quæ
considerari possunt, te obruant. Distingue sin-
gula, suas in partes & in certas circumstantias, nisi forte te occu-
pet & possideat Diuinus ille spiritus cui te totum debes permit-
tere possidendum.

*S. Aug. 8.
Serm. 185.
de Temp.*

Contemplare primo *Quis* descendat, quale donum detur ho-
minibus, *Donum ipsum essentiale*, vt ait sanctus Thomas, siue do-
num quo cætera omnia dona supernaturalia continentur: non
iam per gratiam visitationis & operationis, sed per ipsam præsen-
tiam maiestatis. O effusam Bonitatem!

Secundo *quibus* detur; *Erat*, vt dictum est, *turba hominum simul
ferè centum viginti*, quos inter, mulieres quædam sanctæ, & Maria
mater Iesu. Sed hac vna excepta, quales alij erant? pauperrimi
scilicet, ignorantes, idiotæ, peccatores, & tamen hos dignatur
inhabitare Deus!

*1. Cor. 3.
Hebr. 8.*

Tertio, quò descendat *loco & tempore*: Non enim vacat My-
sterio quod in Congregatos, ipso in coenaculo, vbi Sanctissimum
Sacramentum fuerat institutum, & quod erat in superiori domus
parte, descenderit; ac multo etiam magis quod ipso die Pente-
costes, quo lex olim data fuerat quam spiritus sanctus in corde fi-
delium erat superscripturus.

Quarto, *modus* ipse descendens Spiritus sancti maxime con-
siderandus; nempe ille repentinus de Coelo sonus, & illæ ignes
supra singulos sedentes linguæ. Quale prodigium! qualia Spi-
ritus sancti Symbola: *ventus, ignis, & lingua!*

Quinto;

Quinto, quo sine venerit & quos effectus produxerit. *Hac est* ^{ps. 76.} *mutatio dextera Excelsi* de qua Psaltes, plane tum mutati sunt & conuerſi homines cum ex peccatoribus sancti, ex superbis humiles, ex carnalibus spirituales, ex piscatoribus prædicatores omnium linguis loquentes, ex timidis fortes, ex terrenis denique Cœlestes & Diuini facti sunt. *Erant tum in Ierusalem,* ait Sacer Historicus, *habitantes viri Religiosi ex omni natione quæ sub cœlo est. Facta autem hac voce conuenit multitudo & mente confusa est quoniam audiebat unusquisque lingua sua illos loquentes. Stupebant autem omnes & mirabantur dicentes, Nonne ecce omnes isti qui loquuntur Galilai sunt! Et quomodo nos audiuimus unusquisque linguam nostram in qua nati sumus! parthi & medi, &c. Audiuimus eos loquentes nostris linguis magnalia Dei. Stupebant autem omnes & mirabantur, adinuicem dicentes quidnam hoc vult esse? Alij autem irridentes dicebant, quia musto pleni sunt isti.*

Videsne dum alij mirantur Apostolos, alij eos irrident? Mirabantur videlicet quidam excellentissimum illud *Donam Sapientie* quod eminebat inter alia, primoque se producebat, cum mirade Deo saperent, sentirent & loquerentur; Hoc est enim Sapientiæ donum, *sapor & connaturalitas ad res Diuinas*, inquit ^{2. 2. q. 45.} sanctus Thomas, id est, sapor & quidam veluti gustus tam suauis rerum Diuinarum vt connaturalis videatur.

Quidam verò & qui forte sapientiores videbantur, irridebant, seu vt habet aliaversio, subſannabant quasi ebrios & mente captos, iniuriis & conuitiis appetebant, quia scilicet humana sapientia non nisi stultam Diuinam putat, vnde fit vt ipsa humana in stultitiam degeneret quando sic Diuinæ opponitur. Quod certe est valde obseruandum, vt quantum naturalis stultitia timeri potest, tantum humana sapientia caueatur, *quæ sic est Diuina opposita, sicut ipsi humana sapientia opponitur stultitia naturalis.*

Et quidem Ratio est euidentissima; Quid enim clarius quam quod in declaratione Veritatis propositæ dicitur, idcirco humanæ sapientiæ stultitiam opponi, quod hominem priuet vsu Rationis siue qua nulla est humana sapientia? Siue enim sit priuatio mentis à natura, quæ dicitur proprie stultitia: siue à casu, quæ est amentia: siue à deprauatis moribus, quæ fatuitas nuncupatur, perinde nobis est vt intelligamus oppositionem omnem ad hoc

vnum redire quod priuet hominem vsu rationis, ac proinde omni humana sapientia quæ tota est in illo naturali rationis vsu. Vide quàm deplorandus stulti status! quanta dignitas rationis si probe regeretur ad suum finem! quanta eius deprauatio & malignitas! Quàm variæ species humanæ sapientiæ! quàm damno-
 sa illa quæ omnium sublimissima & foelicissima reputatur, quæ
 I. 10 Mor. que sic à S. Gregorio describitur: *Cor machinationibus tegere, sen-*
 c. 16. *suum verbis velare, quæ falsa sunt, vera ostendere, quæ vera sunt falsa*
demonstrare. Hæc nimirum prudentia vsu à iuuenibus scitur, hæc à
pueris pretio discitur: hæc qui sciunt ceteros despiciendo superbiunt:
hæc qui nesciunt, subiecti & timidi in aliis mirantur, quia ab eis
hæc eadem duplicитatis iniquitas, nomine palliata diligitur, dum men-
tis peruersitas, urbanitas vocatur. Nihilne in istis tuum esse
agnoscis?

II. PUNCTVM.

SED hæc humana sapientia priuat hominem vsu supernaturalis ra-
 tionis, sine qua nulla est Diuina sapientia.

Tria hic diuincte sunt reuoluenda ex multis ante dictis. Pri-
 mum quæ dicatur Ratio supernaturalis, nempe vt sanctus Tho-
 2. 2. q. 45. mas refert ex sancto Augustino, *quæ intendit rationibus supernis*
 a. 3. *seu Diuinis conspiciendis & consulendis, secundum quod per Diuina de*
humanis iudicat actibus, & per diuinas regulas dirigit actus humanos,
 Matt. 5. *vt si dixero & credidero Beatos pauperes spiritu quoniam ipsorum*
 Luc. 6. *est Regnum cælorum; VAE vobis diuitibus quia habetis consolatio-*
 ibid. 14. *nem vestram. CVM facis conuiuium, voca pauperes, debiles, clau-*
dos & cacos, & beatus eris quia non habent retribuere tibi, retribu-
tur enim tibi in Resurrectione Iustorum. In his enim & similibus
 Euangelicis sententiis, vides Rationem peti vel à Deo sit lo-
 quente, vel à promissis æternis & futura Beatitudine.

Deinde considera quomodo sapientia humana priuet homi-
 nem vsu supernaturalis Rationis; quia scilicet cùm attendat tan-
 tum ad causas & rationes naturales, humanas, temporales, &
 transitorias, id est, petitas à sensu naturæ humanæ corruptæ, ab
 opinione hominum secundum carnem viuentium, nihil aliud
 reputat bonum siue beatum, nihil aliud malum aut miserum
 æstimat, quàm quod sensus naturalis, & communis opinio tale

Humana sapientia sic Diuina opponitur, sicut humana stult. 749

sentit: vnde cum paupertas, iniuriæ & calumniæ humano iudicio mala sint; Diuitiæ vero, deliciæ & honores, bona censeantur; sic manifestè fit vt euertat rationes supernaturales; & quàm verum est secundum Deum Beatos esse pauperes, tam falsum sit secundum homines. *Va qui dicitis malum bonum, & bonum malum, s. 7. ponentes tenebras lucem, & lucem tenebras*; Sic differentem Dominum de Beatitudinibus Euangelicis deridebant auari & sapientes mundi, quibus tum Christus Dominus; *Vos estis qui iustificatis vos coram hominibus: Deus autem nouit corda vestra, quia quod hominibus altum est, abominatio est ante Deum*: Stupenda certe sententia. Luc. 16.

Hac autem euerfa Ratione supernaturali, simul euerteretur sapientia Diuina, quod erat tertium expendendum, quia hic eius propius & maxime natiuus effectus est per supremas illas causas sic illustrare & sic afficere hominem, vt quod cognoscit bonum animi, sapiat, gustet, prosequatur & amet, licet sit amarum sensibus; & quod cognoscit malum, oderit, fugiat & detestetur, licet sit suaue carni. Iam vero si tollantur illæ supremæ Causæ, tollitur hic effectus, quia res non cognoscuntur in veritate prout sunt, & sic non vere afficient & sapient. *Gens absque consilio est & sine prudentia; utinam saperent & intelligerent, ac nouissima providerent.* Deut. 32.

III. PUNCTVM.

SIC igitur humana sapientia Diuina opponitur, sicut stultitia humana sapientia.

Nam cum ratio & causa oppositionis sit eadem, nempe priuatio Rationis, quid sequitur nisi vt eadem sit oppositio? Et certe quid magis oppositum quam quod humana sapientia sentit, & Diuina? Quid magis oppositum quam amare Diuitias, aut contemnere? Miseram dicere paupertatem, aut beatam? Honores vel ambire vel fugere? Crucem & persecutiones odisse, vel amare? Hæc est videlicet oppositio humanæ & Diuinæ sapientia: nam quantum humana prosequitur Diuitias, honores & voluptates, tantum Diuina fugit: vnde aptè sanctus Iacobus: *Silicet, inquit, amarum habetis & contentiones sint in cordibus vestris, Luc. 3. quæ scilicet ex concupiscentiis proficiuntur, non est ista sapien-*

1. 2. 2. 7. 43. 6. 1. ad 5. *tia desursum descendens à patre luminum, sed terrena, animalis, Diabolica; quæ autem desursum est Sapientia, primum quidem pudica est, deinde pacifica, modesta, suadibilis, &c.*

Rom. 8. Denique sicut mors & vita sunt inter se opposita, oppositione maxima quæ est priuatiua: sic vtraque hæc sapientia, quarum vna quæ dicitur sapientia & prudentia carnis, *Mors est*, inquit, Apostolus, prudentia autem spiritus *vita & pax*, quoniam prudentia carnis, *inimica est Deo. Legi enim Dei non est subiecta, neque enim potest.*

1. Cor. 1. 2. Atque hinc facilius intelliges quod frequentissimum est in Scripturis, humanam sapientiam non nisi stultitiam coram Deo reputari, sicut Diuinam apud homines stultam æstimari. *Stultam*, inquit idem Apostolus, *fecit Deus sapientiam huius mundi. QVOD stultum est Dei, sapientius est hominibus, & quod infirmum est Dei, fortius est hominibus. Animalis homo non percipit ea quæ sunt Spiritus Dei, stultitia enim est illi, & non potest intelligere quia spiritualiter examinatur. Quorum omnium ratio est quam diximus, quia vtraque sapientia sunt inter se oppositæ, oppositorum autem plane est diuersa ratio, vnde quod vni bonum & dulce est, alteri sit malum & amarum necesse est.*

1. Cor. 3. At vero quæ verior est sapientia? Diuinam non dubitabis in Meditatione dicere, sed in praxi vide ne humanam anteponas. Illud videlicet obstat quod si secundum Diuinam sapientiam velis viuere, stultus habearis mundo, quod certe durum est; sed vide ne dum sapiens mundo vis haberi, stultus Deo existas. Vide ne dum stultitiam mundi velut sapientiam consecretaris, sapientiam Dei velut stultitiam reiicias. Alterutrum enim necessario est concludendum, aut Dei aut mundi sapientiam esse stultitiam. Vtrum è Duobus? O quam hic præclare Apostolus; *Nemo se seducat. Si quis videtur inter vos sapiens esse in hoc sæculo, stultus fiat, ut sit sapiens. Sapientia enim huius mundi stultitia est apud Deum, scriptum est enim, Comprehendam sapientes in astutia eorum; Et iterum, Deus nouit cogitationes sapientium, quoniam vana sunt. Nemo itaque gloriatur in hominibus.*

E O D E M D I E.

IN ILLVD APOSTOLI

Quod nos magis lætificat, hoc magis contristat, &c. 751
Nolite contristare Spiritum sanctum Dei. Ephes. 4.

VERITAS PRACTICA.

Quod nos magis lætificat, hoc magis contristat Spiritum sanctum.

RATIO EST, Quia hoc magis contristat Spiritum sanctum per quod magis illi resistimus.

Atqui per id magis illi resistimus, quod nos magis lætificat.

Ergo hoc ipsum est quod Eum magis contristat. Quod quia nimis est impium, idcirco corrigendum illud quod nos sic peruerse lætificat.

I. PUNCTVM.

RAT in lege veteri lex expressa de non contristandis peregrinis & aduenis: *Aduenam non contristabis, neque affliges eum.* *Exodi 22.* Ratio eius legis videtur fuisse quod cum aduenæ & peregrini, non minus à ludæis distarent moribus quàm patria, fieri facile poterat vt ludæi male illos tractarent, irriderent, & contemnerent; quod idcirco speciali lege cauetur.

At vero nobis hodie lex illa opportune videtur commendanda: sicut enim Spiritus sanctus dicitur hospes animæ nostræ, *Consolator optime, dulcis hospes anima, dulce refrigerium*: Ita nisi diligenter caueamus, facile est nobis illum contristare & affligere, propter diuersitatem morum & motuum nostrorum ab eius motibus & agendi modis. O quanta est illa diuersitas! Eapropter forte Apostolus, *Nolite contristare Spiritum sanctum Dei.*

Fierine verò potest vt ille Spiritus contristetur qui est gaudium indeficiens, & ipsa essentialis beatitudo? Ille qui est author purioris gaudij quod possumus percipere? Ille qui est purus spiritus, & omnis expertus perturbationis ac tristitiæ, quomodo contristari potest? quomodo verò à Christianis? à Religiosis, & à nobis? Hoc certe mirum, atque eò etiam magis mirandū, quod vno hoc præcipue contristetur quod nos magis lætificat.

752 *In die Pentecostes. Nolite contristare Spiritum sanctum.*

Ratio valde expendenda est, quod hoc vno potissimum contristatur Spiritus sanctus, per quod nos illi præcipue resistimus. Certum est quidem non Eum contristari sentibiliter sicut nos: sed tamen humano modo sic loquitur sacra Scriptura de Deo, vt intelligamus sic se Deum effectiue erga homines gerere, quando id eorum peccata exigunt, sicut si affectiue moueretur.

I. de Noe
c. 4.

Non irascitur quasi mutabilis, inquit sanctus Ambrosius, *sed ideo hac dicuntur, vt exprimatur peccatorum nostrorum acerbitas, tamquam eò vsque increuerit culpa, vt etiam Deus qui naturaliter non mouetur, aut ira aut odio, aut passionè vlla, prouocatus videatur ad iracundiam.* Sic breuius sanctus Hilarius; *pæna patientis, ita creditur esse decernentis.* Hoc autem non modo accidit quando peccamus, sed quando illi resistimus, quando illi monenti de culpis, & mouenti ad meliora, contradicimus, reluctamur, rebellamus, *Ipsi fuerunt rebelles lumini. VOS semper Spiritui sancto resistitis.* Sic Bonitas eius offenditur, si eius voluntas benefaciendi nobis aueritur: sic Christi meritum euacuatur; sic nostra salus aut perfectio periclitatur: sic Dæmon contra nos magis præualet, magis carni seruitur quàm spiritui, magis naturæ obtemperatur quam Gratiæ, magis mundo quam Christo.

Iob. 24.
Act. 7.

Propterea irritatur, commouetur, & contristatur suo modo Spiritus sanctus, sicut filij contristant parentes, aut subditi suos superiores quando non acquiescunt illorum monitis: Vnde Apostolus; *Vt cum gaudio hoc faciant & non gementes. Hoc enim non expedit vobis.* Et certe hi possent vt homines aliquando errare in re vel in modo: vnde idem Apostolus: *patres, nolite ad iracundiam prouocare filios vestros:* At Bonitas illa Diuina nullo plane modo aberrat; & in nobis videt meram malitiam oppositam suæ Bonitati: fallitatem veritati: & ignauiam suæ sollicitudini. Vnde Propheta grauitè æque ac piè: *Ad iracundiam prouocastis Deum, exacerbastis eum qui fecit vos, contristatis nutricem vestram.* Et rursus Apostolus. *Qui spiritui Gratia contumeliam fecerit.*

Hebr. 13.

Ephes. 6.

Baruch. 4.

Hebr. 10.

Nonne hæc tibi satis expressa sunt ad rem indicandam? Quoties vero voluit & noluit? Quoties vocauit & renuisti?

II. PUNCTVM.

AT QVI per id magis ei resistimus quod nos magis latificat.
Quid est enim quod nos magis latificat quàm quod na-

turaliter seu secundum inclinationem naturalem magis diligimus, magis appetimus & magis prosequimur! *exultatis in super-* Iac. 4.
biis vestris, ait sanctus Iacobus, quando scilicet quam appetitis laudem & gloriam, auide & peramanter recipitis, hoc est quod valde letificat: sed male, inquit idem Apostolus, *omnis exulta-* Ibid.
tio talis maligna est: Ac proinde nos inde Spiritus sanctus præcipue reuocat, quia illa læticia est, velut approbatio cupiditatis & quidam consensus illi datus. Nos vero Illi tum maxime resistimus; quia natura in eo quod diligit tenacissima est, difficilius cedit, & contra Gratiam contendit diutius, vnde dicitur *auersio contentiosa*, qua sic à Spiritu sancto auertimur, tumque Ter. 8.
vel maxime *Caro concupiscit aduersus Spiritum, Spiritus autem ad-* Gal. 5.
uersas carnem, nam in his sibi inuicem præcipue aduersantur.

Hæc ratio posset vrgeri vehementius à detrimentis quæ nobis importantur ex inordinato amoris affectu, quem ceteræ omnes sequuntur passionēs, vt est apud Prophetam: *In desiderio anima sue attraxit ventum amoris sui, nullus auertet eam.* Ibid. 2. Et tunc vere dici potest quod alius refert: *Omnia desiderabilia nostra versa sunt in ruinas.* Is. 64. Atque hoc est propterea quod Spiritus sanctus expugnat vehementius vt dictum est; *Fili hominis, ecce ego tollo* Ezech. 24.
à te desiderabile oculorum tuorum in plaga. AN putatis quia inaniter scriptura dicat: *ad inuidiam concupiscit spiritus qui habitat in vobis? Maiorem autem dat gratiam.* Egregius certe sancti Iacobi locus, Iac. 4.
& fulius reuoluendus, vbi aperte ostenditur quo Zelo Spiritus sanctus feratur erga animam in qua inhabitat, & quæ tamen mundo nimis afficitur; Zelotypia quædam est, amor sponsi est non ferens consortem & comparem: aut discedat ab illa mundus anima, aut spiritus inde discedat; *Adulteri nescitis quia amicitia huius mundi, inimica est Dei?* Ibid.

III. P V N C T V M.

QUOD nos ergo magis letificat, hoc est quod magis contristat Spiritum sanctum: quia videlicet hoc est quo illi magis resistimus: hoc est quod expugnabat vehementius, & quod à nobis præcipue volebat tolli: nos vero contra repugnantes & infanientes in medicum, in magistrum, & in patrem; ij verè sumus de quibus dictum est: *Ipsi autem exacerbauerunt eum in consilio suo.* Pf. 105.

754 *In die Pentecostes. Nolite contristare Spiritum sanctum.*

Sicut è contra, nihil illum magis lætificat quam quod nos magis contristat, si verè contristati sumus ad poenitentiam: quemadmodum dicebat Apostolus, *quis est qui me lætificet, nisi qui contristatur ex me?* Aut illum non oporteret esse bonum, & nostri amantem; aut nos oporteret esse dociliores & magis subditos: nam quamdiu ille erit Bonus, non desinet hîc nobis bene velle: & quamdiu nos ei resistemus, non desinet contristari, quod bona eius voluntas nihil nobis profit.

Sap. 12. O quàm bonus & suavis est Domine spiritus tuus in omnibus: ideoque eos qui exerrant, partibus corripis: & de quibus peccant, admones & alloqueris, ut relicta malitia credant in te, Domine. Sed quàm malus est spiritus noster qui sic resistat bono! Tantine facinus gaudium illud nostrum ut propterea non timeamus contristare Spiritum sanctum?

Rom. 14. Si propter cibum frater tuus contristatur, inquit Apostolus, iam non secundum Charitatem ambulas. Noli cibo tuo illum perdere, pro quo Christus mortuus est. Quantò hæc verius & iustius de Spiritu sancto? An vero possis anime, eo lætari gaudio quo ille contristetur? An tu verum & solidum putabis gaudium, quo is contristetur qui solus dare potest solidum gaudium? An tu possis gaudere, & videre tuo illum mœrentem gaudio, à quo expectas gaudium sempiternum? An possis cum illo viuefe & habitare cum quo tam malè conuenias ut quo lætaris, ille contristetur: & quo ille lætatur contristeris?

Amos 3. Numquid ambulabunt duo pariter nisi conuenerit eis? Quod si ad conueniendum simul, necesse est ut alteruter de suo cedat aliquid, cuius conuenit potius cedere? an velles potius Deum tibi concedere quod amas inordinate, quàm te ex illo affectu inordinato decedere? Non times te ab eo tandem deferendum quem non potes retinere, nisi deferas quod ille tantum odit, quantum tu illud amas? Si autem ab eo deferaris, quid facies? quid orabis? quid sperabis? quid vel loqui vel cogitare poteris cum nihil sine illo possis, cum nemo possit dicere, Dominus Iesus, nisi in Spiritu sancto? *ERV D I R E* Ierusalem ne forte recedat anima mea à te, ne forte ponam te desertam, terram inhabitabilem.

*1. Cor. 12.
Ier. 6.*

DE PECCATO IN SPIRITVM SANCTVM.

Proph. 1. En proferam vobis Spiritum meum.

O quàm

Peccati contra Spiritum sanctum malignitas sic est, &c. 755

*O quam bonus est Domine Spiritus tuus ! ideoque
eos qui exerrant corripis. Sap. 12.*

Vos semper Spiritui sancto resistitis ! Act. 7.

VERITAS PRACTICA.

Peccati contra Spiritum sanctum malignitas sic est singularis, vt multis iam peccatoribus sit communis.

RATIO est, quia peccati contra Spiritum sanctum malignitas, siue quoad culpam, siue quoad penam, in hoc maxime sita est, quod aperte contra bonitatem Dei peccetur.

Sed iam multis peccatoribus hoc est commune, vt aperte contra bonitatem Dei peccent.

Huius ergo peccati malignitas sic est singularis, vt multis iam peccatoribus sit communis. Quod quidem in hac materia precipue considerandum est, vt sic facilius unusquisque norit, in quantam veniat huius peccati partem ac serio sibi prospiciat.

I. PUNCTVM.

DIVINA Sanctissimæ Diuinitatis attributa sic Tribus indiuisim conueniunt sacris Personis, vt quod de vna vel affirmatur, vel negatur, pari modo de aliis sit prorsus intelligendum. *Sanctus, Sanctus, Sanctus Dominus Deus exercituum*, sic vniformiter, vno & eodem sensu ac consensu pariter de Tribus idem celebratur. H. 6.

Nil propterea tamen obstat, quin ex humano nostro concipiendi modo, quædam Patri præcipue, tum quædam præsertim Filio, quædam etiam singulariter sancto Spiritui referantur; quia videlicet Pater prius à nobis nominatur, & tamquam origo Diuinæ communicationis concipitur, idcirco quæcumque sunt potentia, potissimum illi assignantur, vt rerum creaturarum effectio. Et quia Filius per viam intellectus generatur, ideo quæcumque sunt Diuinæ Sapientia, qualis est rerum conseruatio

certosque suos in fines mira promotio, dicuntur huius esse Personæ. Sic denique quia Spiritus sanctus per viam amoris & voluntatis procedit, propterea quæcumque sunt bonitatis & gratiæ, qualis est totius humani generis reparatio, necnon particularis vniuscuiusque vocatio, iustificatio, glorificatio; Diuinus ille esse dicitur Spiritus qui singula prout vult singulis diuidit & largitur.

Atque hinc fit, vt quæcumque peccata Diuinam hanc præsertim bonitatem impetunt, præsertim etiam in Spiritum sanctum dicantur perpetrari: non quòd in alias duas non peccetur Personas, sed in tertiam potissimum eo sensu, quo de illa potissimum Bonitas prædicatur. *Nolite contristare Spiritum sanctum Dei in quo signati estis in diem redemptionis.* Id est, per quem accepistis gratiam sanctificantem. Neque vero etiam vllum omnino peccatum admittitur, quin aduersus Dei bonitatem committatur, verèque omni dicatur peccatori; *contristasti nutricem tuam*, id est, bonitatem diuinam te sustentantem: Sed sicut effusior aliquando est illa bonitas & miseratio largior, ita tùm proiectius in hanc peccatur, & tùm maxime peccata dicuntur in bonitatem atque in Spiritum sanctum, cùm sic directius & apertius diuinæ gratiæ pessundantur. *An diuitias bonitatis eius contemnis?*

Rom. 2.
2. 2 q. 14.
2. 1. Sic sanctus Thomas diuersis ea de re productis opinionibus, illorum sententiam refert & sequitur, *qui dicunt peccatum vel blasphemiam esse, quando aliquis peccat cõtra appropriatum bonum Spiritui sancto, cui appropriatur bonitas, sicut Patri appropriatur potentia, & Filio sapientia. Vnde peccatum in Patrem dicunt esse quando peccatur ex infirmitate; peccatum verò in Filium, quando peccatur ex ignorantia, peccatum autem in Spiritum sanctum, quando peccatur ex certa malitia, id est, ex ipsa electione mali.* Et nonnullis interiectis, explicans illam malitiam; *Contingit ex eo, inquit, quod per contemptum abjicitur & remouetur id, quod electionem peccati poterat impedire, sicut spes per desperationem, & timor per presumptionem.*

Quæ sancti Doctoris verba sunt valde obseruanda. Vnde tandem concludit, *quod sicut illa quæ peccati electionem impediunt, sunt effectus Spiritus sancti, sic à se illa remouere, est malitia quadam singularis, ex qua qui peccat, peccat in Spiritum sanctum.*

Quanta sit autem illa malitia siue malignitas vel culpæ vel pænæ consequentis, satis euidenter expressit Dominus, quando

dixit peccatum esse, quod non remittetur neque in hoc saculo, neque ^{Math. 12.} in futuro; Quod sanctus Marcus ad peccatorem referens, sic ait, ^{Marci 3.} non habebit remissionem in aeternum, sed reus erit aeterni delicti. Quæ formidanda Domini verba sic Idem sanctus Thomas intelligen- ^{2. 2. q. 14.} da quoad culpam fusè declarat, Sicut aliquis dicitur morbus in- ^{a. 3.} curabilis, secundum naturam morbi, per quem tollitur id per quod morbus potest curari, puta cum morbus tollit virtutem naturæ, vel inducit fastidium cibi & medicinæ, licet talem morbum Deus possit curare. Ita etiam peccatum in Spiritum sanctum dicitur irremissibile secundum suam naturam in quantum excludit ea per quæ fit remissio peccatorum. Per hoc tamen non præcluditur via remittendi & sanandi omnipotentia & misericordia Dei, per quam aliquando tales quasi miraculosè spiritualiter sanantur. Et paulò post in responsis ad ^{ad 3.} obiecta: Liberum, inquit, arbitrium remanet quidem semper in hac vita vertibile, tamen quandoque abjicit à se id per quod verti potest ad bonum, quantum in ipso est, unde ex parte sua peccatum est irremissibile, licet Deus remittere possit.

Quod quia plurimi refert probè intelligere, sic sancti Doctoris sententiam eruditus illustrat Estius in commentariis. Sensus ^{Marci 3.} est, inquit, quod eiusmodi peccata nihil in homine relinquunt, ex quo sperari possit eius pœnitentia, & per consequens, peccati remissio. Nam qui peccat etiam graviter ex ignorantia, præsumitur convertendus, si veritatem esset edoctus; qui autem ex infirmitate peccat, præsumitur acturus pœnitentiam, ubi vehemens carnis passio transierit. At qui sciens & prudens ex destinata voluntate peccat, nihil eiusmodi relinquit ex quo spem resipiscientiæ eius concipere liceat. Et fortasse hoc est peccatum ad mortem de quo Ioannes in prima Epistola, capite quinto. ^{1. Ioan. 5.}

Sunt verò innumera quæ ex scripturis proferri possent ad hoc ipsum confirmandum testimonia. Si mutare potest Æthiops pellem ^{Ier. 13.} suam, aut pardus varietates suas; & vos poteritis benefacere, cum dixeritis malum. MVLTO labore sudatum est & non exiit de ea nimia rubigo eius, neque per ignem. Immunditia tua execrabilis quia ^{Ezech. 24.} mundare te volui & non es mundata à sordibus tuis, sed nec mundaberis prius, donec quiescere faciam indignationem meam in te. Ego Dominus locutus sum, veniet & faciam. Non transeam, nec parcam, nec placabor; iuxta vias tuas & iuxta adinventiones tuas iudicabo te dicit Dominus. QUID faciam tibi Ephraim? quid faciam tibi Iuda? misericordia ^{osæ 6.} vestra quasi nubes matutina, & quasi ros mane pertransiens.

Id est, quicquid gratiæ contulero tam parum in vobis durat & agit, quàm parum nubes euanida vel ros matutinus qui primo sole siccatur. *An diuitias bonitatis eius & patientia & longanimitatis contemnis? Ignoras quoniam benignitas Dei ad penitentiam te adducit? secundum autem duritiam tuam & impenitens cor, thesaurizas tibi iram in die ira & reuelationis iusti iudicij Dei.* Vide hebræorum sexto, tum decimo. Ex quibus & aliis quæ satis ubique patent, qui non videat quàm sit singularis malignitas huius peccati, tantò magis in seipso id probat, quantò minus videt.

II. P V N C T V M.

SED iam multis peccatoribus, & tibi forte, Lector atque Auditor, hoc est commune & familiare, ut aperte contra Bonitatem pecces.

Cum enim contra Bonitatem aperte peccare nihil sit aliud quàm aperte scire & sentire primò quidem quod peccetur, deinde verò quod peccetur contra conscientiam, contra manifestum rationis lumen, contra reuocantes diuinæ motus gratiæ; nonne hoc multis commune est, ut sic præfractè peccent? Quodcumque tandem sit peccati genus ac species; siue sit superbia, siue inuidia, siue luxuria, siue auaritia, gula, ebrietas, aut quod simile vitium; primò quidem quando ex ipsa naturæ proclinitate patrat, simplex ac nudum est vitium contra virtutem sibi oppositam; sed procedente tempore cum peccator per gratiam resipiscit, cum iterum labitur, iterumque multiplicatis sæpe actibus cadit & resurgit, ac iam non sola fragilitate, sed malitia, sed impulsu prauæ voluntatis contra pungentes animi stimulos ipse se in peccatum sciens volens præcipitem agit; tunc illud peccatum, illud ipsum quod ex suo ante genere peccatum fuit luxuriæ vel auaritiæ, fit peccatum contra Dei bonitatem, nempe contra tot lumina, tot gratias, tot bonos motus quibus peccatum emendaretur, & quibus omnibus peccator restitit; mutatur quodammodo peccati species, aut accedente noua ista circumstantia Bonitatis diuinæ toties impugnata sic aggrauatur, ut aliud coram Deo censeatur quàm reputatum esset, si talis peccandi ratio non interuenisset. Quanta est enim bonitas Dei, sic multoties delinquentem auocare, deterrere, complecti, fouere, ac singularibus demereri gratiis, tanta est eius malitia, tantaque delicti labes & secutura perniciēs.

Peccati contra Spiritum sanctum malignitas sic est, &c. 759

Quia vocaui, & renuistis; obserua illud quia; sic enim suam *Prov. 1.*
Deus nostræ opponit malitiæ bonitatem, & idcirco grauiorem
sibi videri ait talem malitiam, quia tali repugnat bonitati.

Atque vt te ipsum hîc agnoscas, dic quotum agis annum? quibus subiaces vitiis? à quo incipiunt dominari tempore? quoties inde fuisti reuocatus? quantis propterea lancinatus animi stimulis? Ignorasne te peccare? desuntne tibi præsidia seu motiua quibus peccatum caueas? an illa tibi proponis vel abiicis? fatere quod est. Nonne sæpius in ipso peccati procinctu pedem retrahis, quasi nolens quod perpetras crimen: quasi audires contra monentem, quasi videres minitantem, quasi sentires auertentem? Et tamen, quæ est audacia tua, non delistis à crimine, non inde reuocas animum, contra stimulum calcitras, nec quiescis donec opere compleas quod mente percepisti! Quid tu iam vocas istud peccati, nisi certæ cuiusdam malitiæ diuinam impugnantis bonitatem? Quid aliud dicebat sanctus Thomas cum supra definiret istud peccatum, vel peccatorem? Nonne hoc vno veluti characterẽ designabat eius malitiam animi, quod remoueret à se id quod electionem peccati poterat impedire, velut timorem, præsumendo de Dei bonitate? At nonne hoc ipsum est in quo peccas? nonne sanctum illum peccandi timorem, quem Deus iniicit, tu peccando abiicis & pessumdas? nonne tibi fingis Deum ita bonum vt peccatis sit potius indulturus quàm iraturus? *Existimasti inique, quod ero tui* *Pf. 49.*
similis; Nam si timeres, si diuinam reformidares iultitiam, non ita præceps rapereris, quò te libido concitat. Etenim quia non profer. Eccl. 8:
tur cito contra malos sententia, absque timore villo filij hominum perpetrant mala.

III. PVNCTVM.

SIC est igitur singulare peccatum quod dicitur in Spiritum Sanctum, vt sit tamen multis commune peccatoribus. Singulare est in tua specie, singulare est in sua malitia, singulare est in sua consequente pœna; sed commune est & familiare tam multis, quàm multi sunt qui contra bonos illos motus à peccato auertentes, non timent sæpe obistere & scientes volentesque peccare; *Qui Job. 21.*
dixerunt Deo, recede à nobis, & scientiam viarum tuarum nolumus:
hoc enim ipse peccandi actus dicit, hoc ipso efficitur peccati

760 *In die Pentecostes. De peccato in Spiritum sanctum.*

facto. Repulsus recedit Deus, & viarum eius scientia repudiatur. Quàm multi porro sint qui sic libere viuunt & peccent, tam euidenter patet, vt vix de mundo sint alij, qui non sic libere viuunt & peccent. *Omnes conuersi sunt ad cursum suum, quasi equus impetu vadens ad praelium.*

Ier. 8.

Lib. de
praecepto
& dispē.
c. 14.

Quid verò inde sequitur, nisi quod peccatum illud quod multi leue putant, sit valde graue ac damnosum? *Elatio quippe contemptis atque impatientis obstinatio*, inquit sanctus Bernardus, *in minimis quoque mandatis, culpam facit non minimam, & conuertit in crimen grauis rebellionis, nauum satis leuem simplicis transgressionis.*

Prov. 1.

Non iam attenditur quid peccetur, sed qua fronte, quo animo, qua libertate peccandi. Non arguit peccatores illos Diuina Iustitia, quod se obscaenis inquinauerint cogitationibus; quod pecunia, quod deliciis plus æquo sese dederint; nihil horum commemorat, sed quod *extenderit manum suam, & non fuit qui aspiceret, quod despexerint omne consilium suum, & increpationes suas neglexerint.* Hoc illa in peccato considerat, hoc expendit & in ius vocat; hoc vnum denique est, vnde hæc peccatoribus tam grauis pœna decernitur: *Ego quoque in interitu vestro ridebo & subsannabo, cum vobis id quod timebatis aduenerit, cum irruerit repentina calamitas & interitus quasi tempestas ingruerit, quando venerit super vos tribulatio & angustia. Tunc innocabunt me & non exaudiam, mane consurgent & non inuenient me; eo quod exosam habuerint disciplinam, & timorem Domini non susceperint, nec acquieuerint consilio meo, & detraxerint vniuersæ correptioni meæ; Quasi non sufficeret primò vel semel dixisse, hanc eorum esse peccati pœnæ causam, quòd oblatas neglexerint gratias; rursus hoc repetit, & primum ac postremum hoc vt intelligamus fatagit, & omni modo prouidet, quia hoc vno maxime decipimur, quod quam ingrauescant in dies peccata nostra, quamque formidando interitu sint castiganda, non ponderamus.*

Hebr. 3.

Psal. 94.

Quapropter aptè Apostolus, dum ipse ait, *quapropter sicut dicit spiritus sanctus; hodie si vocem eius audieritis, nolite obdurare corda vestra.* Et quæ plura pergit ex psalmo regio: vnde tandem concludit, *videte fratres ne forte sit in aliquo vestrum cor malum incredulitatis discedendi à Deo viuo: sed adhortamini vosmetipsos per singulos dies, donec hodie cognominatur vt non obduretur quis ex vobis fallacia peccati.*

Perpende singula : Vide cur vocet in fidelibus cor malum incredulitatis. Nempe dum peccant non credunt se tam grauiter velle peccare, vt discedant à Deo viuo, priuati eius gratia & sempiterna gloria ; nolunt sibi hoc persuadere ne à peccato deterreantur ; quod certè incredulitatis genus est, & certum mali cordis signum, cui placet peccatum.

Deinde verò considera quàm opportune dicit, *adhortamini vosmetipsos*, nam quod extremum est humanæ malitiæ, sese mutuis homines sermonibus adhortâtur ad vitia, nec si adessent prauitatum probatores, vix essent prauitates. *Defecit sanctus, diminuta sunt* Ps. 111. *veritates à filiis hominum: vana locuti sunt unusquisque ad proximum* Sap. 2. *suum. VENITE & fruamur bonis quæ sunt, & utamur creatura tamquàm in iuuentute celeriter.* At cōtra, inquit Apostolus, aut simili si vultis modo in re dissimili, vosmetipsos excitate per singulos dies, donec hodie cognominatur. Quid verò istud, *donec hodie* ? Singuli forte dies, donec hic viuatur, possent intelligi, cum donec expirent homines, non expiret tempus gratiæ, non misericordiæ cesset dies. Verùm cū alludat ad verba Psalmi, *hodie si vocem Domini audieritis*, non alio sensu intelligendus est Apostolus quàm ipso Psalmistæ Regij, qui manifestè nobis indicat dies esse aliquos, quibus apertius vox è cælo fundatur, quam audire homines tanti referat, quanti recipere vel negligere quæ cum illa voce simul offeruntur dona cælestia. Non ita quidem semper certo ac definito tempore concluduntur illæ supremæ monitiones, quin se in plures extendant dies : At non ita verò sese illi effundunt dies quin sæpe contrahantur & contenebrescant ; quamobrem ab illo ipso sancto Spiritu qui luminum & gratiarum est diuisor & donator, admonemur vt *donec hodie cognominatur*, quo is videlicet die Lumen & vocem effudit, tum arreptos mentis oculos atque aures habeamus, ne quid ex oblatiis gratiis nobis depereat. *Nolite obdurare corda vestra, nolite sic prolatrare conuersionem, quali aliàs cum libuerit, tanta possitis facilitate conuerti.* Quod Christus Dominus apertè dixerat, *am-* Ioan. 12: *bulate dum lucem habetis, vt non vos tenebra comprehendant.* O R A-
T E vt non fiat fuga vestra hieme aut Sabbato.

Matth. 24:

Si quis autem illustris dies, si quis ex illis vnus est fortunatis & serenis, quibus nobis illuceat & loquatur Dominus, certe est hodiernus, quo effusi quondam Spiritus sancti memoria non

alio præsertim nomine celebratur, quàm vt eandem pro capto nostro participemus gratiam. Quamobrem hodie qui vocem eius audiistis, nolite obsurdescere, nolite obdurare corda vestra, ne forte nunquam audiatis. En vox hodierna quam audistis; peccatum vestrum, nisi diligentius cum gratia caueatis, *peccatum est in Spiritum sanctum*, peccatum est contra bonitatem Dei, peccatum est ex certa quadam malitia, peccatum est quod vix remittetur, peccatum est in quo moriemini si persistitis in eo viuere. Si contra hanc vocem cor induratis, cor illud erit durum, de quo Sapiens; *Cor durum habebit malè in nouissimo*: & qui amat, periculum in illo peribit. *CONVERTIMINI ad correptionem meam, En proferam vobis spiritum nouum*, quo id scilicet nunc possitis facere quod postea vobis erit tam arduum vt posse desperetis: eò enim tandem deuenitur, & pene omnis in desperationem transit præsumptio. Sicut nempe qui nimis differt, se semper posse præsumit; sic quando nimis distulit, iam se posse desperat. Nunc ergo donec dies est, donec hodie cognominatur, *conuertimini & agite pœnitentiam ab omnibus iniquitatibus vestris, & non erit vobis in ruinam iniquitas. Projicite à vobis omnes prauaricationes vestras in quibus prauaricati estis, & facite vobis cor nouum & spiritum nouum; & quare moriemini Domus Israel, quia nolo mortem morientis dicit Dominus Deus, reuertimini & viuite.*

Eccles. 3.

Prov. 1.

Ezech. 18.

Iungendus verbis affectus & effectus affectui.

Vide in 1. parte pro hac singulari materia, Dominicam 4. Aduentus. In 2. Dominicam Septuagesimæ. In 3. Dominicam 9. In 4. Feriam 5. hebdomadæ 19. & diem 22. Septembris, in Festo sancti Mathæi, vbi habetur hæc Veritas:

Qui differt sequi gratiam, spiritui gratiæ contumeliam infert.

QVOD si quis forte contenderet quæ hic dicta sunt de peccato in Spiritum sanctum, tum vera tantum esse, quando peccatum illud cum blasphemia coniungitur: Sit Veritas sequens, præcedentis confirmatio, & difficultatis solutio.

Qui peccant in Spiritum sanctum, vix peccant quin blasphement.

Ratio

Qui modo peccant in Spiritum sanctum, vix peccant, &c. 763

RATIO est, quia blasphemare in Spiritum sanctum hoc esse dicitur quando aliquid de illo affirmatur quod non est, vel negatur quod est. SED qui peccant in Spiritum sanctum, prout ordinarie modo peccatur, vix peccant quin affirment de illo quod non est, vel id negent quod est; ERGO & vix peccant quin blphement, quod est horrendum dictu.

Totus discursus ex Diuo Thoma colligitur, locis annotatis, *2. 2. q. 13. & 14.* vbi de hac expresse materia. Prima quidem propositio nullam difficultatem habet, & volenti rem explicare fusiùs, præsto sunt apud sanctum Doctorem variæ species quibus vniuersim in Deum, & particulatim in Spiritum sanctum blasphematur.

Secunda verò propositio sic declaratur: Qui modo peccant in Spiritum sanctum, his tribus modis, vt plurimum peccant, in quibus sigillatim ostenditur vix illos peccare quin affirment vel negent falsum de hac Diuina Persona.

Primus est, qui iam supra est explicatus, quando remouentur illa quæ peccati electionem possent impedire, vel quæ penitentiam possent inducere; tunc sine dubio peccatur directius in Spiritum sanctum, quia ille est, qui bonitate sua nos à peccato committendo retrahit, vel à commisso reuocat: vnde illud ex sapientia semper memorandum: *O quam bonus & suavis est Domine spiritus in omnibus! ideoque eos qui exerrant, partibus corripis, & de quibus peccant, admones & alloqueris, vt relicta malitia credant in te Domine.* *Sap. 11.* Econtrà verò exclamandum: ô quàm malignus & durus est Peccator, qui tantæ bonitati resistit! Sed quàm sit etiam blasphemus & impius, sic demonstratur, quia sic peccantem hominem si roges, cur ita benigne auocantem à peccato repudiet Spiritum sanctum; vel negabit se tantam experiri bonitatem, vel si tantam experitur, affirmabit se sperare semper illum tam bonum fore Deum, vt quoties ipse peccator velit resurgere, velit & bonus Deus, atque ita non timeat, & stimulum si quem sentit, retundat. *Sic stultus transilit & confidit, vt ait Sapiens.* At nonne hoc est vel negare verum vel affirmare falsum de Spiritu sancto? Quid verius quàm quod de hoc diuino spiritu iam dictum est, quod peccatores à prauitate auocat, & quid proinde falsius quam id negare? Quid deinde magis oppositum sacris scripturis, quam negare diuinam iustitiam, aut eam affirmare bonitatem quæ tota peccatis sic blandiatur & indulgeat, nunquam vt illa puniat, nunquam vt peccatorem destituat illis auxiliis, quibus ante foueba-

Eccles. 5. tur, cum expresse sit scriptum; *ne dixeris, peccavi, & quid mihi accidit triste?* Altissimus enim est patiens redditor; de propitiato peccato noli esse sine metu, neque adjicias peccatum super peccatum; & *ne dicas, miseratio Domini magna est, multitudinis peccatorum meorum miserebitur, misericordia enim & ira ab illo cito proximant, & in peccatores respicit ira illius. Non tardes conuerti ad Dominum & ne differas de die in diem: subito enim veniet ira illius, & in tempore ira disperdet te.* Poteratne Scriptura grauius & expressius denuntiare quàm timenda esset peccatori iustitia, & quam formidanda præsumptio, qua sibi palpat peccator de impunitate peccati? Potestne verò quidquam magis falsum de Spiritu sancto dici, quàm quod magis oppositum dicitur eius verbis?

Secundus modus, in quo præsertim iam peccant homines contra Spiritum sanctum, est impugnatio Veritatis agnitæ vel ira manifestæ, vt illam qui non vident, nolint videre. Nolunt intelligere, vt bene agant. Tales sunt non illi modo qui à fide catholica sunt alieni, sed quotquot moribus suis repugnant Euangelio, nonne & verbis illud impugnant, quibus sese tueantur in illis suis moribus? Quid clarius quàm quod de beata prædicatur paupertate? de beatis miseriis & iniuriis iniuste ac patienter latis? quis tamen se in illis foelicem credat? quis è mundo paupertatem tamquam summum malum non detestetur potius quam se in illa beatum putet? quis illatas sibi non doleat quantumuis leues iniurias? quis se denique vel de mundo esse censeat, licet totus sit in explendis concupiscentiis? vel se de mundo esse, quis perniciosum putet, licet apertè mundus sit in Scripturis proscriptus & damnatus? Iam vero si tam apertæ repugnare scripturæ sit apertam impugnare veritatem, & peccare in Spiritum sanctum, vt expresse docet *Diuis Thomas ex sancto Augustino*, nonne est simul negare verum & affirmare falsum de sancto illo Spiritu qui est *spiritus veritatis quem mundus non potest accipere*, quia se illius veritati opponit?

14. a. 2.
Iaan. 14.

Tertius denique modus est quo pene omnes peccant, cum vix vnus sit qui non sibi optet ingenium præstans & sublime, & vix tamem vllus sit qui Spiritum sanctum hoc sibi optet nomine, licet illo nullum præstantius & sublimius possit esse ingenium. Nonne si quem videres expresse affirmantem posse aliquid Spiritu sancto reperiri præstantius, non dubitares illum

affirmare falsum, & mentiri, & peccare in Diuinam illam personam? Tu verò qui humanum & naturale ingenium quo posses esse doctus, eloquens, & mundo illustris magis optas quam illud spirituale quo posses esse humilis, pauper, abiectus & patiens: quid hoc esse putas nisi affirmare aliquid præstantius diuino Spiritu? Quod enim illud tibi magis velles quam istud, non alia profecto potest esse causa, quam quod illud putares tibi melius, tibi vel commodius vel honorificentius vel delectabilius. At quæso te, quandoquidem illud vt aliquid melius optas, nonne hoc ipso affirmas esse melius? Fierine potest vt aliter aliquid magis optes, quàm vt simul existimes maius esse bonum? Cum enim bonum sit quod omnes appetunt, certe illud quod quis magis appetit, maius illi bonum videtur, nec aliter magis appetit quàm quod ita videtur. *Omnia probate, quod bonum est* 1. Thess. 5. *tenete*, inquit Apostolus, postquam expresse dixit, *Spiritum nolite extinguere*, quasi diceret, si qua donorum naturalium cum spiritualibus fiat comparatio, caute naturalia spiritualibus præferatis; quod bonum est, tenete, nempe quod est spirituale, quod est à bono & sancto Spiritu. Tu verò, qui aliud censes, nonne falsum censes de illo diuino Spiritu? nonne illum arguis de iudicio quasi sit infirmius, quasi tantum seclretur humilia, despecta & vulgaria; sicut ille mundū arguit de iudicio quod sit superbū, arrogans, animale, vanum & diabolicum? ô diuina & humana iudicia, quàm sunt dissita, quam sunt disparia, *sicut scilicet exaltantur cali à terra.* Is. 55.

Sic igitur qui modo peccant in Spiritum sanctum, hoc ipso contra blasphemant, quo peccant: aut vix certe peccant quin blasphemant, quia modò tribus illis modis qui recensiti sunt; frequentius contra peccatur, quibus qui peccant modis, pene semper vnà simul affirmant aut negant aliquid secus quam sentiendum esset de diuino Spiritu, quod est proprie blasphemare, quo sensu in Scripturis viurpatur. *Edne blasphemum extra castra; Leuit. 24.* *& ponant omnes qui audierunt, manus suas super caput eius, & lapidet eum omnis populus.* Tam graue scilicet crimen est, vt neque minori sit expiandum pæna. Nunc illa vero corporalis in spirituales pæna mutata est, & tanto magis aucta quanto Spiritus anteit corpori, & quanto æternitas temporis; dicente Domino, *qui blasphemauerit in Spiritum sanctum, non habebit remissionem in* Mat. 12.

aturnum. Id est, qui peccauerit quo iam solent modo peccare frequentius, qui peccant in illum diuinum spiritum.

2. Pet. 3.

Hi sunt illusores, de quibus Princeps Apostolorum, venient in nouissimis diebus, in deceptione, illusores: iuxta proprias concupiscentias ambulantes, quibus scilicet vt liberius indulgeant, illudunt sacris omnibus dictis, quibus inde auerti possent. Et licet nihil ore proferrent, hoc ipsum tamen corde loquuntur & cogitant, hoc ipsum suis præ se ferunt operibus, vnde est blasphemia cordis, oris, & operis, vt ait sanctus Thomas, cuius verba sunt valde obseruanda; Sicut, inquit, confessio fidei non solum consistit in protestatione oris, sed etiam in protestatione operis: ita etiam blasphemia Spiritus sancti potest considerari & in ore, & in corde, & in opere. Vnde illi omnes qui vitam agunt repugnantem illis veritatibus quas manifestè docet Spiritus sanctus; tametsi nihil aliud contra dicerent aut cogitarent, vita eorum loquitur, vita eorum tam vere blasphemat & irritat sanctum Domini, quàm suis verè operibus impugnant cognitam veritatem. Cui exprobrasti & quem blasphemasti? contra quem exaltasti vocem tuam, vitam tuam, & eleuasti in excelsum oculos tuos? contra sanctum Israël! NUNC verò deponite & vos omnem iram indignationem, malitiam, blasphemiam, & turpem sermonem de ore vestro.

9. 14. d. 1.
ad 1.

4. Leg. 19.

Col. 3.

De aliis verò quæ generatim spectant aut quæ referri possunt ad Solennitatem hodiernam, vel ad materiam de Spiritu sancto, præsto sunt hæc sparsim expositæ Veritates.

Si spiritu viuimus, spiritu & ambulemus.

Numquam est amor Dei otiosus.

Amor non nisi amore compensatur.

In 1. parte, Feria 4. 6. & Sabbato hebdomada 3. in Aduentu.

Sic Charitas & Constantia simul iunctæ constant, vt nisi sint simul iunctæ, non sibi constant.

In 2. p. Fer. 5. hebdomada Sexagesima.

Colloquendo de diuinis, quantò magis luces quàm ardes, tantò minus in te lucet Diuina Charitas.

In 2. p. Feria 6. hebdom. 2. post Pascha.

Aut nulla aut tota est Charitas in agendis, sicut Fides in credendis.

Quod intellectus confert actioni, hoc actio refert, &c. 767

In 2. p. Feria 4. hebdomada 4. post Pascha.

Affectum probat effectus.

In 3. parte, Feria 2. hebdom. 9.

Tantò vnusquisque est magis aut minus bonus & sanctus, quantò magis minusue participat de Spiritu sancto.

In 3. p. die 11. Iunij de S. Barnaba qui dictus est vir bonus & plenus Spiritu sancto.

Diminutio cupiditatis augmentum est Charitatis; & augmentum cupiditatis diminutio Charitatis.

In 3. p. Dominica 17. ubi & plura de Charitate.

Huc etiam referri possunt quæ tota sequenti hebdomade continentur.



FERIA SECUNDA
DE PRIMÆ PRÆDICATIONE
SANCTI PERTI, AD IUDÆOS:
ET DE DONO INTELLECTVS.

Stans autem Petrus cum undecim, leuauit vocem suam & locutus est eis; Viri Iudei, & qui habitatis Ierusalem vniuersi, hoc vobis notum sit, & auribus percipite verba mea, &c. Act. I.

VERITAS PRACTICA:

Quod intellectus confert actioni, hoc actio refert intellectui.

SENSVS & RATIO EST, quia quod intellectus confert actioni seu virtuti exercendæ, est cognitio eorum quæ sunt necessaria ad illius virtutis exercitium.

Sed ipsa virtus exercita, refert illam cognitionem, seu multum confert ad illam ipsam cognitionem augendam.

Ergo quod intellectus confert actioni, hoc actio refert intellectui: ac proinde si ad Veritatem Practicam requiris intellectum, require magis ad intellectum, Veritatem Practicam.

L P V N C T V M.

QUAM loquentes Apostolos omnium gentium linguis magnalia Dei, quidam e Iudæis irriderent & dicerent eos esse multo plenos & ebrios, tùm sanctus Petrus commodam inchoandæ Prædicationis nactus occasionem, silentium postulat. Et mox: *Non sicut vos aestimatis, inquit, hi ebrij sunt, cum sit hora diei tertia, sed hoc est quod dictum est per Prophetam Ioel: Et erit in novissimis diebus, dicit Dominus: effundam de spiritu meo, super omnem carnem.* Vide quæ fufius prosequitur, & mirare primò quanta facilitate Prophetias & Psalmos referat & intelligat. Deinde quanta foelicitate persuaferit quod volebat de Domino Iesu, adeo vt statim post finitam concionem, *Compuncti corde dixerint, quid faciemus, viri fratres? Petrus autem ad illos; pænitentiam agite, & baptizetur unusquisque vestrum in nomine Iesu Christi in remissionem peccatorum vestrorum, & accipietis donum Spiritus sancti: Et post multa: Saluamini à generatione ista praua. Qui ergo receperunt sermonem eius, baptizati sunt, & apposta sunt in die illa anima circiter tria millia. Erant autem perseverantes in doctrina Apostolorum, & communicatione fractionis panis, & orationibus.*

Hic erat status nascentis Ecclesiæ, & in eo manifestum apparebat Donum intellectus, quo non tantum Apostoli, sed & ipsi Iudæi tam citò intellexerunt quæ audierunt, & tam feruenter exequuti sunt quæ intellexerunt. *O quam velox est sermo sapientia, ait sanctus Leo, & ubi Deus magister est, quam cito discitur quod docetur.*

Serm. 1.
de Pent.

Valde exoptandum est istud Donum intellectus ad Veritates

Quod intellectus confert actioni, hoc actio refert intellectui. 769

nostras Practicas exercendas; sed & ipsæ Veritates ereberrimè sunt exercendæ ad recipiendum vel augendum istud Donum. Nam quod praxi seu actioni confert intellectus, hoc ipsum actio refert intellectui, nempe cognitionem eorum omnium quæ sunt ad illius veritatis aut virtutis exercitium, necessaria: seu ad quamlibet actionem rite peragendam.

Cùm enim actionis cuiuslibet perfectio multum dependeat à circumstantiis personæ, loci, temporis, finis, modi & aliis; plurimaque inde dubia & difficultates nasci possint, nisi animus cœlesti quodam lumine collustratur; hoc lumen confertur Dono intellectus, cuius proprium est *intus quodammodo legere*, vt ait ^{2. 2. q. 3.} sanctus Thomas, quæ alioquin nec in Scripturis, nec in libris, nec naturali nec fideli lumine capi possent. *Quæ Dei sunt*, inquit ^{1. Cor. 2.} Apostolus, *nemo cognouit nisi spiritus Dei. Nos autem non spiritum huius mundi accepimus, sed spiritum qui ex Deo est, vt sciamus quæ à Deo donata sunt nobis.* Itaque crebro cum Dauide dicendum. *Da mihi intellectum & scrutabor legem tuam, & custodiam illam in toto corde meo.* Et iterum; *Da mihi intellectum, & discam mandata tua.* ^{Pf. 118. Ibid.}

II. PUNCTVM.

SED ipsa virtus exercita, refert illam cognitionem, seu multum confert ad illam ipsam cognitionem augendam.

Hoc sacra passim Scriptura, hoc sãcti Patres, hoc Ratio & Experientia manifestè probant. *Intellectus bonus omnibus facientibus* ^{Pf. 110.} *eum*; id est verè illi sapiunt qui faciunt quod intelligunt; & faciendo prout intelligunt, merentur intelligere quod melius & perfectius agant. Sic datur manibus intellectus & consilium, ideoque de se suisque David affirmabat: *In intellectibus manuum* ^{Pf. 177.} *suarum deduxit eos.* Et Sapiens de forti muliere: *operata est consilio* ^{Pr. 31.} *manuum suarum*; nempe secundum intelligentiam quam agendo percepit. Vnde & idem Sapiens: *Da occasionem sapienti, & addetur ei Sapientia.* Itemque alibi: *post industriam sequetur sapientia.* ^{Pr. 9.} *Ecclesi. 10.* Quod & Psaltes regius sibi plurimùm profuisse testatur: *super omnes docentes me, & super senes intellexi, quia mandata tua quasiui.* ^{Pf. 118.} *QVIA* enim, inquit S. Gregorius, *studuit operando implere quod* ^{11 Mor. 9.} *didicit, accepit intelligere quod doceret.* Idemque in illud Prouerbiorum, *præpara foris opus tuum, diligenter exerce agrum tuum:* ^{Pr. 24.}

10. Mor. 16. *S*VNT nonnulla, inquit, cogitationis acumina quæ ex operatione nascuntur: sicut ab animo opus sumitur, ita ob opere animus eruditur: Mens imperat bona quæ fiant, sed ipsa suis exercitata actionibus, discit cum imperare bona inchoauerat, quantum minus videbat. Quod
 6. Mor. 4. & ante in libris Moralium sic clarius expresserat: Qui & idcirco ad intelligentiæ alta perueniunt quia agere quæ intellexerunt, vel minima nulla contemnunt, & dum sensum manibus adiuvant, sese ultra
 Prov. 30. altitudinem ingeniosorum leuant; unde bene per Salomonem dicitur: stellio manibus nititur, & moratur in adibus regis: quia illo simplex per intentionem recti operis peruenit quò ingeniosus minimè ascendit.
 Ioan. 13. Sic sanctus Augustinus ad illa verba Domini volentis lauare pedes Petri, Quod ego facio, tu nescis modo, scies autem postea. CVM scilicet meo exemplo lauabis aliorum pedes, hoc ipsum quod modo facio ad humilitatis praxim, melius intelliges.

Quid, quod tres omnium sapientissimi Viri, sic dicuntur actione & exercitio cognitionem rerum percepisse? Certe Adamo infusa erat scientia pene infinita, & tamen ex arbore scientiæ
 In Ps. 70. boni & mali, didicit, ut ait sanctus Augustinus, per experientiam quid esset bonum & malum; ac proinde sic dictam illam arborem volunt quod inde deducta esset scientia quadam experimentalis boni & mali.

Quis Salomone Doctior & Sapientior? Tam multa tamen se per actionem & experientiam didicisse profitetur, quanta hæc
 Eccl. 2. quæ sæpe vsurpat verba significant, tentavi, vidi, didici, intellexi, ecce hoc inveni: & similia.

Quod & magis mirum de Christo Domino, in quo cum essent
 Coloss. 2. omnes thesauri sapientiæ & scientiæ absconditi; & cum esset filius
 Hebr. 5. Dei, didicit tamen ex iis quæ passus est, obedientiam, inquit Apostolus; tùm paulò post quod subiungit, vide quam aptum; perfectorum est solidus cibus, eorum qui pro consuetudine exercitatos habent
 Ibid. sensus ad discretionem boni & mali: quali diceret, hi sunt qui perfecte intelligunt quid sit bonum & malum, qui sese exercent in illo faciendo & hoc declinando. Vnde non est mirum si tam parum in diuinis intelligas, qui tam parum operaris.

III. PUNCTVM.

QUOD igitur intellectus confert actioni, hoc intellectui refert actio: Et ad veritatum praxim si requiritur intellectus, ad intellectum

intellectum etiam requiritur praxis qua fit vt omnia melius cognoscantur. *Intellige quæ dico*, ait Apostolus suo Timotheo, post *2 Tim. 2.* commendatum impensè laborem; tum verò subdit, *dabit enim tibi Dominus in omnibus intellectum*; vt scilicet melius illà intelligas operando, quàm dum ipsa te doceo. Atque idcirco Idem Apostolus tam sæpe omnibus Christianis, vt opere exercerent quod docebantur, inculcat: *propterea abundantius oportet obseruare nos* *Hebr. 2.* *ea quæ audiuius ne forte percessuamus*; *SICUT* ergo accepistis Iesum *Col. 2.* *Christum Dominum, in ipso ambulate. QVAECVM QVÆ* sunt vera, *Phil. 4.* *quacumque pudica, quacumque iusta, quacumque sancta, quacumque amabilia, quacumque bona fama, si qua virtus, si qualams disciplina, hæc cogitate. Quæ & didicistis, & accepistis, & audistis, & vidistis in me, hæc agite, & Deus pacis erit vobiscum.*

Atque vniuersim Apostoli non tam multa prædicabant, quam multum inculcabant semel dicta, vt obseruarentur, *Confirmantes Act. 14.* *animas Discipulorum, exhortantesque vt permanerent in fide.* Quod in ipso nascentis Ecclesiæ exordio magis mirum est vt supra retulimus, cùm vix vnum aut aliud præceptum docuissent Apostoli, dicuntur tamen omnes fideles *perseuerare & perdurare in doctrina Apostolorum*, quasi iam doctrinam Christianam vniuersam plenè didicissent; Sed non tam multa scienda sunt vt faciamus, quàm multa facienda sunt vt sciamus. Exequamur pauca quæ nouimus & plura cognoscemus. *Quia vero plures magis scire desiderant* *1. de Imit.* *quam bene viuere*, inquit Thomas à Kempis, *ideo sæpe errant, &* *Chr. 3.* *pene nullum vel modicum fructum ferunt. O si tantam adhiberent diligentiam ad extirpanda vitia, & virtutes inserendas, sicut ad mouendas quaestiones! Tibi, tibi hæc dicuntur.*

AD Euangelium Feriæ: *Sic Deus dilexit mundum, &c.* Ioan. 3. Vide in 1. parte, Feriam 2. primæ Aduentus hebdomadæ: Vbi quæ de dono Filij dicuntur, accommodari rectè possunt dono Spiritus sancti: Quamquam, his diebus, non tanta debet haberi ratio propositi Euangelij, quanta Solennitatis exhibitæ, cui deseruiunt non modò quæ suprà iam ipso die Dominico dicta sunt, sed quæ singulis huius hebdomadæ Feriis referuntur.



FERIA TERTIA.
DE PRIMO VIVENDI GENERE
NASCENTIS ECCLESIAE:
ET DE DONO SCIENTIÆ.

Omnes qui credebant, erant pariter, & habebant omnia communia: possessiones & substantias vendebant, & diuidebant illa omnibus, prout cuique opus erat. Act. 2.

VERITAS PRACTICA.

Qui eminentior est in hac eminenti scientia, minus inter homines eminere cupit.

RATIO est, quia eminere in hac scientia est, perfecte cognoscere tantum res humanas valere quantum valent ad salutem.

Sed qui perfecte id cognoscet, non optabit inter homines eminere.

Ergo neque is qui hac in scientia eminebit: Quod certe est consideratione dignissimum.

I. PUNCTVM.

HOC erat primum viuendi genus nascentis Ecclesiæ, vt quotquot crederent simul omnes conuiuerent, simul omnia sua conferrent quæ omnibus essent communia, nihil vt suum quisquam diceret, sed singulis diuideretur quod cuiq; videretur opus. O cœleste & diuinum viuendi genus! Tanta erat certe in admiratione apud Iudæos vt tametsi non crederent, credentes tamen idcirco venerarentur quod ita viuerent. Sic aperte Diuus Hieronymus vbi de S. Marco & primis Chri-

stianis: Philo, inquit, disertissimus Iudaorum videns Alexandria pri-^{L. de Script. Eccles.} mam Ecclesiam adhuc Iudaizantem, quasi in Laudem gentis suae, librum super eorum conuersatione scripsit. Et quomodo Lucas narrat Ierosolyma credentes omnia habuisse communia, sic & ille quod Alexandria sub Marco fidei Doctore cernebat, memoria prodidit.

Quam verò iam mutata rerum vices! quam pauci modo sic suarum rerum contemptores! quam multi retinentes! Sed numquid mutatum Euangelium? numquid mutata veritas, numquid mutatus Christus? plane idem *heri & hodie*, ipse & in saecula, ^{Hebr. 13.} inquit Apostolus, sed illud est quod Propheta monuit: *Iudicum Domini cum habitatoribus terra: Non est enim veritas & non est misericordia, & non est scientia Dei in terra.* ^{Osee 4.} Donum erat Scientiae quo sic primi Christiani humana omnia contemnebant, quemadmodum de se Apostolus tam expresse affirmat: *Verum* ^{Phil. 3.} *tamen existimo omnia detrimentum esse propter Eminentem Scientiam Iesu Christi Domini mei, propter quem omnia detrimentum feci, & arbitror ut stercora, ut Christum lucrifaciam.* Dicitur eminens scientia quia valde eminent in vita Christi, & valde eminentes facit eos qui sic omnibus rebus creatis supereminent. Sed tamen quod mirum est & valde considerandum; *Qui eminentior est in hac scientia, minus eminere cupit inter homines.*

Quod ut intelligatur, perpendendum accuratè quid sit eminere in hac scientia, nempe id perfecte cognoscere, tantum res humanas valere, quantum valent ad salutem & perfectionem. Sic aperte sanctus Thomas, *Ad scientiam*, inquit, *proprie pertinet re-* ^{2. 2. q. 9.} *ctum Iudicium Creaturarum*; Tum ibidem; *Homo per rectum iudicium scientiae, creaturas ordinat in bonum Diuinum*, Quasi diceret paucis his verbis, quod alij fusius, quisquis ex hac scientia de rebus creatis & humanis iudicat, de his recte iudicat; Et qui de his recte velit iudicare, debet ex hac scientia iudicium sumere, quae propterea scientia animae dicitur de qua Sapiens: *ubi non est* ^{Pr. 19.} *scientia animae, non est bonum.*

Iam verò qui recte de his iudicat, non aliter eas aestimat nec aliter valere videt quam prout valent ad salutem seu bonum Diuinum, ad hunc enim finem sunt omnia condita; unde sequitur non aliud esse eminere in hac scientia, quam sic perfecte cognoscere tantum res humanas valere, quantum valent ad salutem, quia hoc solum est recte de his iudicare.

Prou. 30. O scientiam Diuinam supra ceteras vere eminentem ! ô quam
 vere Sapientissimus hominum dixit se *stultissimum esse virorum*,
Sap. 10. quod careret illa quam vocat *sanctorum scientia*, Hinc etiam ab
 eodem apte dictum de Domino quod *Iustum deduxit per vias re-*
ctas, & ostendit illi regnum Dei, & dedit illi scientiam sanctorum;
 nempe hæc est scientia qua sancti per vias rectas deducuntur inter
 huius vitæ prospera & aduersa, sic vtrisque vtendo quantum pro-
 sunt salutis comparandæ.

II. PUNCTVM.

SED qui id perfecte cognoscet, non optabit inter homines eminere.
 Quo scilicet modo naturaliter desideratur ad vanitatem, ad
 iactantiam & æstimationem; Nam cum hæc nihil profint, imo
 valde obsint ad salutem, quomodo is ea desideraret qui non ali-
 ter res æstimat & cupit, quam prout ad salutem valent? Certe si
 pro salute aliena, si pro iuuandis proximis, si pro defensione
 Ecclesiæ & veritatis, ac denique si ob similem aliquem bonum
 finem vellet quis eminere, vt quanto plus eminet tantò magis
 prodesse posset, laudabilis esset cupiditas: sed quotus quisque est
 qui sic pure & sincerè aliis præeminere velit, & non potius præ-
 esse quam prodesse cupiat? Quod cum ad salutem tantum obsit
 quantum cupiditas vehementius exardescet, nonne is qui probè
 id cognoscet, id omnino non optabit: aut sane salutem negliget?

Iud. 9. Numquid possum deferere pinguedinem meam, dulcedinem meam,
 & bonum meum, vt inter ligna cetera promouear? Sic oliua, sic ficus,
 & vitis dixerunt aliis lignis se in Regem suum volentibus consti-
 tuere, vt refert apologus in libro Iudicum. Quantò tu verius:
 Numquid possum deferere vocationem meam, salutem meam,
 pacem meam, & Christum meum, vt inter alios forte magis
 emineam?

III. PUNCTVM.

QVI ergo est eminentior in hac eminenti scientia, minus inter
 homines eminere cupit. Quia scilicet rectius de rebus iudi-
 cat, & hoc est rectum de rebus iudicium, sic eas æstimare quan-
 tum ad salutem valent, vnde cum sic vane eminere inter homines
 nihil ad coelum proficit, imo multum obsit, plane concludendum

est quod qui magis eminet in hac scientia, minus inter homines eminere velit, aut sibi ipse contradicat. *Qui altam facit domum suam, quarit ruinam.* Pron. 17. Atque inde infer nonnisi vanos, ignaros & stultos eos esse, qui nullo probato sibi proposito fine, honores ambiunt vel auide oblatos suscipiunt; cur enim superbiunt & in superbiis suis exultant, nisi quia bonum se aliquod adeptos putant? At si veram haberent scientiam, itane iudicarent? Si autem vera illis deest scientia, nonne ignari sunt? Nonne imprudentes? nonne errant? nonne idcirco dicitur: *Propterea captivus ductus est is. s. populus meus quia non habuit scientiam. Propterea dilatauit Infernus animam suam & aperuit os suum absque ullo termino.* Propterea etiam Sapiens factus Sapientior, *vanitas vanitatum*, inquit, *& omnia vanitas.* Eccle. 1. Non quod res creatæ & humanæ vanæ sint in se, quæ potius bonæ sunt, à Deo factæ & à Deo approbatæ: sed quia bonis male utitur homo; cumque sit quasi ordinarius rerum usus ut non aliter eis utantur homines quam ex inordinato appetitu, idcirco dicuntur vanæ & malæ, atque *in odium factæ, in tentationem animabus hominum, & in muscipulam pedibus insipientium.* Sap. 14.

Hinc propterea fit, ut licet possent bona temporalia, honores & dignitates licite appeti, quæri & conseruari, non modo ad hanc vitam temporalem, sed & etiam ad æternam; melius tamen deseruntur & contemnuntur, quia plus valent & proficiunt contempta quam possessa. Vix unquam tota vita plurimis actibus promotus ad dignitates promerebit quod vno semel actu is meretur qui omnia sua præsentia & futura reliquit effectui, vel affectui.

Atque huius eminentis Christi scientiæ tres sunt veluti classes; *Bethleem, Nazareth, & Caluaria.* Disces in Bethleem abstinere superfluis aut necessariis si quando permittat Deus. Disces in Nazareth Benè uti concessis. Disces in Caluaria, sustinere defectum rerum omnium, exemplo illius *qui cum dives esset, propter nos egenus factus est, ut illius inopia diuites esse possemus.* 2. cor. 8. O veras salutis diuitias, sic scire & humiliari, & abundare; ubique *Phil. 4.* & in omnibus institutum esse, & satiari & esurire, & abundare, & penuriam pati, & omnia posse in eo qui nos confortat.

Ad Euangelium Feriæ de Christo Pastore, ac eius ouibus quarum est ostium, ex Ioannis decimo, videnda tota hebdomada 21. in 4. parte.



FERIA QVARTA.
DE PRIMO MIRACVLO
QVOD REFERTVR AB APOSTOLIS
FACTVM:
ET DE DONO CONSILII.

*Petrus & Ioannes ascendebant in templum, ad horam
orationis nonam. Et quidam vir qui erat clau-
dus ex utero matris sue, baiulabatur, &c.
Act. 3.*

VERITAS PRACTICA.

Qui cum affectu incompósito Deum consulit, non
Deum sed Deo consulit.

Non à Deo consilium petere, sed Deo dare velle videtur.

RATIO EST, quia is Deo dare velle consilium dicendus est
qui pro affectu nimio quem circa rem habet aliquam, vellet
Deum permouere potius ad suum affectum, quam suum affe-
ctum subiicere diuinae voluntati.

Sed qui cum affectu incompósito Deum consulit, sic vellet ad se
permouere Deum.

Ergo ille non Deum sed Deo consulit. Non à Deo consilium pe-
tere sed Deo dare velle videtur. Quod cum sit supra modum
audax & impium, cauendus omnis affectus accedenti ad
Deum, qui non sit conformis eius consilio & voluntati.

I. P V N C T V M.

IAM dictum erat ab Historico sacro, multa prodigia & AR. 1.
signa per Apostolos in Ierusalem fieri, unde metus erat ma-
gnus in vniuersis; sed quod primum narratur certum &
determinatum miraculum, sanitas illius viri est qui claudus ex
utero matris baiulabatur, quem ponebant quotidie ad portam templi
qua dicitur speciosa, ut peteret eleemosynam ab introeuntibus in
templum. Is cum vidisset Petrum & Ioannem incipientes introire in
templum, rogabat ut eleemosynam acciperet. Intuens autem in eum
Petrus cum Ioanne dixit, Respice in nos; At ille intendebat in eos spe-
rans se aliquid accepturum ab eis. Petrus autem dixit, argentum &
aurum non est mihi, quod autem habeo, hoc tibi dabo; In nomine Iesu
Christi Nazareni surge & ambula. Et apprehensa manu eius dextera,
alleuauit eum, & protinus consolidata sunt bases eius & planta. Et
exiliens stetit & ambulabat, & intrauit cum illis in templum, ambu-
lans & exiliens & laudans Deum.

Videri possunt quæ sequuntur de conuersione quinque mil-
lium Iudæorum, statim post hoc miraculum facta: Sed quod præ-
cipue considerandum modò venit, illud est quod initio refertur,
Petrum & Ioannem ascendisse in Templum ad horam orationis nonam.
Non enim frustra locus & tempus hic singulariter commemo-
rantur, ut videlicet intelligamus illos tum Apostolos singulari
motu qui dicitur Spiritus seu Donum Consilij, fuisse motos ut
irent in templum, tali hora, quo loco & tempore tale patrarent
miraculum, talemque Iudæorum multitudinem erudirent &
conuerterent. Licet enim Deus non sit astrictus locis, temporibus
aut personis, sibi tamen eligit aliquando quædam loca &
tempora, in quibus illud per aliquos operatur quod aliàs non ef-
ficeret. Et quidem verum est quod ait Sapiens vniuersim, *omni* Ecc. 2.
negotio tempus est & opportunitas; sed id lóge certius particulatim
de quibusdam agendis quæ Deus vni inspirat aut alteri, certo
quodam & determinato tempore cui non deesse, tanti refert,
quanti consilium Dei sequi vel negligere. *Consilium Dei spreuerunt* Luc 7.
apud semetipsos, dicebat Christus Dominus de illis Iudæis qui
prædicante sancto Ioanne Baptista, non erant conuersi, sicut pu-

blicani ; Nempe illud erat tempus quo ex consilio Dei conuerti dederant.

O quam multi sic spernunt consilia Dei, etiam illi ipsi, quod magis mirum est, qui videntur eum consulere suis in negotiis, & rogare vt consulat siue inspiret quid sit ipsis agendum ! Quotquot nempe affectus inordinatos aut nimis tenaces retinent, nisi ante deponant quàm consulant Deum, nullum ab eo consilium referunt, nec tam videntur consilium à Deo petere, quàm velle illi dare, *Non Deum sed Deo consulunt.* Qua impietate cum nihil sit dementius, nihil scelerarius, visa est huius Veritatis Consideratio potētior, si sic proponeretur da componendos animos, quoties Deum adimus de re aliqua consulendum aut rogandum. Aut componendus antè affectus quàm Deum consulas : aut si cum affectu incomposito Deum consulis, hac te impietate obstringis vt Deo dare consilium magis velle videaris quàm ab eo petere vel expectare.

Ratio rem aperte declarat; Tum enim Deo consulere vel consilium dare velle dicendus est, qui Deo importunè suggerit quod faciat, & eum acrius permouet ad illud ipsum efficiendum: nam hoc est absolute & vniuersim loquendo consulere cuius personæ, quando vel petenti consilium vel non petenti, proponis vltro quid faciat: & rationes adhibendo cur ita faciat, in flectis voluntatem eius in id quod consulis: vnde sicut bonum est opus si bene consulis; sic plane malum, & consulenti pessimum si peruersè cuiquam consuleres; sic enim Sapiens, *facienti* *nequissimum consilium, super ipsum deuoluetur.* Longe est autem aliud, Deum orare quantumuis etiam vehementer & cum ardenti affectu; atque aliud, ipsum adire & rogare cum tali studio & affectu de quo hîc loquimur, qui scilicet tanta rei quam petit cupiditate teneatur, vt sibi potius Deum quam se Deo subiciat: qua de prauitate dictum est in prima parte, satisque patet quâ sit impium, cum vel ex ore impio sacra hæc verba profluxerint, *Iustum est, subditum esse Deo:* vel si maius loquentem de his prauis consultoribus audire Apostolum; *Ignorantes, inquit, iustitiam Dei, & suam quærentes statuere, iustitia Dei non sunt subiecti.* Quasi diceret, qui sic cum Deo agunt vt humanis suis rationibus magis consultum velint quàm Diuinis, videntur velle de Iustitia cum ipso Deo contendere, nec verentur etiam sese quodam:

quodammodo magis iustos & æquos profiteri. Hoc nempe est quod semper præ se fert qui sic alteri consulit, vt suo illum consilio velit ad se pertrahere.

II. P V N C T V M.

SED qui cum affectu incompósito Deum consulit, sic vellet si posset, Deo suggerere quid faciat, atque ad illud ipsum faciendum per-
movere.

Vellet enim Deum suo conformiter affectui respondere, & approbare, & indulgere quod concupiscit. Et licet verbis non exprimat, licet etiam aliud ore petat quàm quod affectu desiderat, tamen Deus qui affectum magis considerat quàm verba sibi loquentium, videt in illius animo qui se rogat, sic efformatum affectum vt si auderet, plane suggereret Deo quid secum ageret: atque vt ipsum quod suggerit ageret, quantum in se est permovere. *Quid clamas ad me*, dicebat Dominus Moyfi, cum Exodi 14. tamen nihil ille prorsus oraret; sed vt optimè ait sanctus Gregorius, *valentiores voces apud secretissimas aures Dei non verba faciunt sed desideria.*

Atq; illi propterea qui sic aliud desiderât & aliud orant, dicuntur esse *duplici corde & labiis scelestis*; dicuntur accedere malignè ad Dominum, & cor eorum plenum esse dolo & fallacia: de quibus vide Ecclesiasticum, primo & secundo capite: Satis hîc fuerit ad plenam propositionis elucidationem illud expendere quod expresse habet S. Augustinus de hoc argumento: *Vbiq; Veritas præsidet omnibus consulentibus te, simulque respondes omnibus etiam diuersa consulentibus. Lique tu respondes, sed non liquide omnes audiunt. Omnes vnde volunt consulunt, sed non semper quod volunt, audiunt. Optimus minister tuus est qui non magis intuetur hoc à te audire quod ipse voluerit, sed potius hoc velle quod à te audierit.* L. 10. Confess. c. 26.

Videsne quid voluntas consulentis Deum, vellet à Deo? nempe quod ipsa vult non quod ipse. At quænam est illa voluntas nisi quæ affectum habet incompósito & deprauatum? Quid est autem voluntatem velle potius à Deo quod ipsa velit, quàm quod ipse; nisi velle Deo suggerere quod nobis respondeat & indulgeat? Sit fas aut nefas quod petit, hoc vnum æquum ducit quod illa voluntas appetit. O peruersum peruersissima volun-

tatis affectum! peruersus certe affectus qui sic voluntatem cor-
rumpat, sed peruersissima voluntas quæ sic velit Deum sibi attra-
here! *Numquid Deum docebit quispiam scientiam, qui excelsos iu-
dicat?*


III. PUNCTVM.

QUIS QVIS igitur cum affectu in composito Deum consulit, non
Deum, sed Deo consulit: Non à Deo consilium petit, sed ipsi
dare velle videtur: Quia quod in affectu habet, vellet Deum sibi
respondere: vellet quantum amat illud quod amat, sic persua-
dere Deo ut id ipsum amaret & consuleret, quod est tam verè
velle Deo consulere quam vere Deus nobis consulit, quando
quid proponit quod sequamur si velimus. *Populus ad iracundiam
prouocans est, & filij mendaces, filij nolentes audire legem Dei, qui
dicunt videntibus, nolite videre, & aspicientibus, nolite aspicere ea
qua recta sunt. Loquimini nobis placentia, videte nobis errores. Au-
ferre à me viam, declinate à me semitam, cesset à facie nostra sanctus
Israel.*

Plane hoc ipsum est quod dicimus, hoc est quod tractatur in
eius animo qui cum affectu male composito Deum adit, siue
ipsum immediate adeat siue mediate, interponens quos putabit
efficaciores ad id obtinendum quod vehementius cupit. *Dic ut
sedent hi duo filij mei, vnus ad dexteram tuam, & vnus ad sini-
stram in Regno tuo.* Nonne hoc est consulere Christo, quid
faciat? Nonne hoc est quod tam sæpe facis quàm sæpe velles
non aliud tibi à Deo suggeri quam quod ipse desideras? nonne
vides quàm sit hoc peruersum & profanum cum sic velles detor-
quere cor Dei quod semper rectum est, ad prauitatem cordis tui, ut
ait sanctus Augustinus? Cum sic velles habere Deum te sequen-
tem & te illum præcedentem; Cum sic velles consilia tua di-
uinis anteferre; Cum sic velles Deum regere potius quam ab eo
regi! Num consiliarius Regis es? quiesce, ne interficiam te: Sic
Amasias cuidam Prophetæ; sic Deus tibi; sic tu Deo; sed quàm
longe diuerso modo! Expende pensiculatim, & hæc Apostoli
verba; *Quis cognouit sensum Domini? aut quis consiliarius eius fuit?*
ut fiat tandem quod monuit Sapiens: *Custodi pedem tuum ingre-
diens domum Dei, & appropinqua ut audias.* Id est, vide quomodo

Qui cum affectu incompotio Deum consulit non Deum, &c. 781
adeas Deum, quo cordis affectu, vt eum consulas, qua mentis
dispositione, vt consulentem audias & sequaris.

Vide in 4. parte, Feria 4. & 5. hebdomadæ 18. Et pro Euan-
gelio Feriæ, In 3. parte, Feria 5. 6. & Sabbato hebdom. 13.



FERIA QVINTA.
DE PRIMA PERSECVTIONE
APOSTOLORVM.
ET DE DONO FORTITVDINIS.

*Quid faciemus hominibus istis? Comminemur eis,
ne ultra loquantur in nomine hoc, vlli hominum.*
Act. 4.

VERITAS PRACTICA.

Qui non satis audet in magnis, nimis audet in paruis.

RATIO est, quia qui non satis audet in magnis, non satis fidit
Deo.

Sed qui non satis fidit Deo, nimis audet & in paruis.

Ergo qui non satis audet in magnis, nimis audet in paruis. Aut si
quid audet in paruis confisus Deo, sic confidenter audendum in
magnis.

I. P V N C T V M.

MIRACVLIS & prædicationibus sancti Petri res Chri-
stiana foeliciter admodum progrediebatur; At ecce in-
dignantur Sacerdotes illorum temporum, Magistratus
templi, Scribæ, Saducæi, & quotquot nomen Domini non li-
benter audiebant, injiciunt manus in Petrum & Ioannem, po-
Fffff ij

nunt eos in custodiam, aduocant ambos in concilium suum, interrogant in qua virtute aut in quo nomine claudum sanauerint, comminantur ne ultra loquantur in nomine hoc, iterumque denunciant, ne omnino doceant in nomine Iesu.

Contra vero Apostoli; *Si iustum est*, inquit, *in conspectu Dei, vos potius audire quam Deum, indicate; Non enim possumus quæ vidimus & audimus, non loqui.* At illi cōminantes tum quidem dimiserunt illos; sed cū non desinerent à prædicatione & à miraculis; magisque augetur credentium in Domino multitudo, virorum ac mulierum, fieretque concursus omnium ægrotoꝝ, & sanaretur omnes; Tū princeps Sacerdotum & Saducæi nouo repleti zelo rursus injiciunt manus in Apostolos & constringunt eos in custodia publica, vnde ab Angelo statim educti & confirmati ad prædicandum, accersuntur iterum à Magistratu, accusantur rebellionis & seditionis, & post multos vltro citroque sermones habitos cæsis denuntiatur, ne omnino loquantur in nomine Iesu, & dimittuntur. *Et illi quidem ibant gaudentes à conspectu concilij, quoniam digni habiti sunt pro nomine Iesu contumeliam pati. Omni autem die non cessabant in templo & circa domos docentes & Euangelizantes Christum Iesum.*

Hæc omnia fulius & distinctius, Actuum quarto & quinto capite, ex quibus non modo liquet quàm grauis Apostolorum persecutio fuerit, sed quanta eorum fortitudo & constantia; vt non solum patienti, sed læto & gaudenti animo contumelias & flagra pertulerint; Quod eò magis mirum est quòd non ita pridem ad vocem vnius ancillæ primus eorum turpiter Dominum suum negauerat. *O verè dextera Domini fecit virtutem, dextera Domini exaltauit eos.*

Donum illud erat fortitudinis quæ ad virtutem eiusdem nominis additur *ad peruincenda difficiliora, & consummanda inchoata, vsque in finem, cum singulari quadam fiducia Diuini auxilij contrarium timorem excludente*, vt ait sanctus Thomas. Hæc est fortitudo non modo Martyrum sed & eorum omnium qui vocati à Domino ad quæuis ardua munia, sic in eius confidunt potentia & auxilio, vt æque in magnis audeant atque in paruis, quia in illis æque potens est Dominus in quo confidunt atque in istis. *Confortamini in Domino, & in potentia virtutis eius.*

Tū in paruis quidem & facilioribus satis audes, sed in magnis

S. Greg.
Ps. 117.

2. 2. q. 139.
c. 1.

Ephes. 6.

& difficilioribus non ita forsan. At vero audi Veritatem propositam, *Qui non satis audet in magnis, nimis audet in parvis.* Quæ quidem Veritas non idcirco proponitur vt non in parvis audeas, sed potius vt à teipso discas etiam in magnis audere, cum sit eadem ratio in vtrisque. Atque hæc ratio magis vrgebit cùm ita concludet tam necessario in magnis esse audendum ac in parvis, vt si non satis in illis sit audaciæ & fortitudinis, nimis in istis audeas & præsumas. Sic autem facile declaratur: *Qui non satis audet in magnis non satis Deo fidit, non satis sperat in eius gratia & auxilio: quia si certo confideret sibi tale affuturum auxilium quale exigit actio quam aggreditur, cur timeret? cur non auderet?* *Confortate manus dissolutas,* ait Propheta, *& genua debilia roborate. Dicite pusillanimis, confortamini, & nolite timere.* Quasi diceret, idcirco infirmi estis corpore & fracti animo, quia timetis: inde vero timetis quia non speratis in Deo: at confortamini & iam nolite timere quia vobis non deerit Deus. Sic apte David: *In Domino sperans non infirmabor:* vnde si post infirmatus esset, *Ps. 158* nonne ipsi recte potuisses obiicere: Tu non speras in Domino, quia in Domino sperans non infirmaris: atque idcirco hoc vno sese cum Gratia confortabat si quando deficeret; *Quare tristis es Ps. 42: anima mea & quare conturbas me, spera in Deo.* Nonne tu idem posses dicere, nonne huius defectu fiduciæ nimis times, vbi erat audendum si Deo confidisses?

II. PUNCTVM.

SED *qui non satis fidit Deo, nimis audet in parvis.*

Nimis enim audet qui sine Deo aliquid quantumcumque; paruum & facile, se facturum putat, cum tam expresse Christus dixerit, *sine me nihil potestis facere;* vbi sanctus Augustinus, *sine Ioan. 15. parum sine multum, sine illo fieri non potest, sine quo nihil fieri potest.* At quisquis non satis fidit Deo, si quid audet in parvis, id audet sine Deo, id audet quasi ex se possit quod paruum est & factum facile. O rebellem audaciam quæ numquam longius se à Deo disiungit, quàm cum se fingit propius ad ipsum accedere per bonum aliquod opus quod à se putat factum! Quid iniquius & sceleratius quam hoc audere, quam dicere de suis factis: *Ma- Deut. 32. nus nostra excelsa, & non Dominus, fecit hæc omnia?*

Quod si dicas, te longe abesse ab hoc crimine, nec omnino putare te aliquid ex te posse in parvis sine gratia, cum id sit ita credendum ex fide: Quæro ab te, vndenam speres illam Gratiā, qua sic confisus audeas ut nihil in parvis dubites? Dices profecto à Scripturis, à promissione Dei, ab eius bonitate & misericordia. Recte omnino: sed insto, cur in magnis ad quæ te vocat Deus non æque speres illam gratiam, cum sit æque promissa in scripturis, & æque expectanda de Dei bonitate & providentia, qui non iuberet aliquid arduum cui sustinendo impar esses, & cui ferendo non conferret gratiam?

Respondebis puto, te non audere magna illa sperare auxilia quibus te nimis indignum iudicas, siue ex conditionis tuæ exiguitate, siue ex peccatorum tuorum magnitudine: tibi satis esse si parua facias, de magnis vero nec posse nec velle cogitationem fuscipere. Itane verò te dignum putes cui conferatur in parvis gratia, ut nihil quidquam denegetur quod in istis optes? Itane te iustum putes, ut nihil umquam grauius deliqueris propter quod non merearis obtinere quod roges in quibus placeat operam ponere! Itane Deo legem statues ut quidquid de magnis iubeat & promittat, tu quasi tuæ fortunæ faber & salutis author, magna relinquas aliis, tibi parua tantum assumes! Hoc est præsumere, hoc est nimis audere, hoc est non se nosse: nam si te vere peccatorem nosses, ut fingis te fateri, nec minimo gratiæ gradu te dignum crederes, sed potius extremis pœnis, & æternis suppliciis. Tu terra & cinis audes præsumere te dignum Diuinis Gratiis! Tu indurate peccator qui toties Infernum meruisti, etiam nunc audes tantum tibi palpare, ut non iudices te indignum gratiis quas toties conculcasti? Numquamne audiuisti Apostolum hæc intonantem: *Impossibile est eos qui semel sunt illuminati, gustauerunt etiam Donum cæleste, & participes facti sunt Spiritus sancti, & prolapsi sunt, rursus renouari ad pœnitentiam. Terra enim proferens spinas & tribulos reproba est & maledictio proxima, cuius consummatio in combustionem.* Et rursum: *voluntarie peccantibus nobis post acceptam notitiam veritatis, iam non relinquitur pro peccatis hostia, terribilis autem quadam expectatio iudicij.* Nonne tu vero sæpe prolapsus es? Nonne tu ille es voluntarius peccator post tot acceptas veritates? Et tamen non timebis! Hoc est nimis audere.

Hebr. 6.

Ibid. 10.

III. PUNCTVM.

QVIS QVIS ergo non satis audet in magnis, nimis audet in parvis.

Quia quod eum reuocat ab audendo in magnis, reuocare, etiam in parvis deberet: & si quid confidentiam præstat in parvis, præstat ex æquo in magnis, quando videlicet Deus ad illa magna vocat, aut quando coniuncta sunt vocationi vel officio, tunc non minus speranda est in magnis Gratia quàm in parvis; nec timendum quin sit satis potens gratia, cum sit omnipotentis virtus qui vt ait sanctus Bernardus, *in hoc maxime suam Sermon. 83. omnipotentiam manifestat quod omnipotentes facit omnes qui in se Cap. sperant.*

Et certe, sicut infirmitas humana magis cognoscitur quando quis in parvis peccat quam in magnis: ica virtus Diuina clarius innotescit quando in magnis homo plus potest & operatur quàm in parvis. Atque idcirco quia valde expedit nos id probe intelligere, sæpe Deus quos in magnis potentes facit, permittit in parvis infirmari; vt expresse obseruauit sanctus Chrysostomus de sancto Petro, qui cum auderet vocante Christo ambulare super ipsum mare effervescebat, timuit tamen ventum, & in aquas defiliit. Quod quidem ab Isaia magnifice prædicatum habes: *Qui dat lasso virtutem, & his qui non sunt fortitudinem, & robur Is. 40. multiplicat. Deficient pueri & laborabunt, & iuuenes in infirmitate cadent; qui autem sperant in Domino mutabunt fortitudinem, assumment pennas sicut aquila, current & non laborabunt, ambulabunt & non deficient.* Id est, dum alij qui videbantur fortes & robusti deficient, alij è contra qui erant debiles & infirmi, roborabuntur & nulla vi aduersa concident.

Quamobrem, vt alius ait Propheta, *Infirmus dicat: quia fortis Isai. 38. ego sum.* Dicat confidens Deo: Dicat in magnis æque in parvis: Dicat quoties de infirmitate sua cogitat: Dicat ad se acuendum: Dicat ad excitandam confidentiam: Dicat ad inchoandum quoduis opus difficile: Dicat ad continuandum: Dicat ad consummandum.

Vide suprà in hac 2. parte, Feria 2. Sexagesimæ. In 3. verò, Feria 3 & 5. hebdomadæ 7. Vbi hæ Veritates declarantur:

Non certius in spem itur, quàm contra spem.

Qua facilitate vincimur, eadem vincere possumus.

Denique pro Euangelio Ferie, videnda est hebdomada decima tertiæ partis.



FERIA SEXTA.

DE PRIMA ORATIONE PVBLICA ECCLESIAE.

ET DE DONO PIETATIS.

Vnanimiter leuauerunt vocem ad Deum, & dixerunt; Domine tu es qui fecisti Cælum, & Terram, mare, & omnia quæ in eis sunt, &c. Act. 4.

VERITAS PRACTICA.

Sicut pietas valet ad omnia, sic omnia valêt ad Pietatem.

RATIO est, quia idcirco Pietas valet ad omnia, quod in usu rerum respiciat Deum, & hoc respectu valorem & utilitatem spiritalem rebus impertiat.

Sed omnia valent ad hunc Diuinum respectum ex seipsis eliciendum.

Ergo & valent etiam ad pietatem, sicut pietas valet ad omnia: quæ certe praxis est utilissima.

I. PVNCTVM.



VM primum ex Apostolis duo, Petrus & Ioannes dimissi sunt è carcere in quem post sanatum Claudum, & conuersos inde Iudæos plurimos, coniecti fuerant, atque prohibiti

Sicut pietas valet ad omnia, sic omnia valent, &c. 787

prohibiti ne ultra loquerentur de Domino Iesu; Tunc ut ait Sacer Hiltoricus, *venerunt ad suos, scilicet Coapostolos, & annuntiauerunt eis quanta ad eos principes sacerdotum & seniores dixissent. Qui cum audissent, unanimiter leuauerunt vocem ad Deum & dixerunt, Domine tu es qui fecisti cælum & terram, mare & omnia quæ in eis sunt: qui Spiritu sancto per os patris nostri David pueri tui, dixisti, Quare fremuerunt gentes & populi meditati sunt inania? Astiterunt reges terræ & principes conuenerunt in vnum, aduersus Dominum & aduersus Christum eius; Conuenerunt enim verè in ciuitate ista aduersus sanctum Puerum tuum Iesum quem vnixisti, Herodes & Pontius Pilatus cum gentibus & populis Israel facere quæ manus tua & consilium tuum decreuerunt fieri. Et nunc Domine, respice in minas eorum, & da seruis tuis cum omni fiducia loqui verbum tuum, in eo quod manum tuam extendas ad sanitates, & signa & prodigia fieri per nomen sancti Filij tui Iesu.*

In qua quidem oratione apparet vel maxime Pietatis Do-
num quo filiali quodam affectu, ut ait sanctus Thomas, *mouemur in*^{2. 2. q. 11. a. 1.}
Deum tamquam Patrem: Eum laudamus in omnibus & benedicimus, etiam cum nobis aliquid aduersi contigerit, certissimum illud habentes, nihil paternam eius Prouidentiam fugere & nihil nisi bonum à tam bono Patre posse nobis accidere. Qui pietatis affectus etiam ad proximos extenditur, quando, ut videre est in Apostolis & primis illis Credentibus, coluntur omnes ut fratres, & fraternis se iuuant omnes subsidiis. Sic enim expressè habes in consequenti textu historiarum post supra dictam orationem: Multitudinis autem credentium erat cor vnum, & anima vna: nec quisquam eorum quæ possidebat aliquid suum esse dicebat, sed erant illis omnia communia, neque quisquam egenus erat inter illos. Quotquot enim possessores agrorum aut domorum erant, vendentes afferebant pretia eorum quæ vendebant & ponebant ante pedes Apostolorum. Diuidebatur autem singulis prout cuique opus erat: o pietatem eo magis comendandam, quo iam est rarior & magis necessaria!

Verum non modo in oratione ad Deum aut in his fraternæ Charitatis officiis pietas exhibetur, sed quod ait Apostolus, ad omnia se extendit, *ad omnia utilis est*, ad omnia valet; & ad
eius amplificandam utilitatem omnia etiam de suo conferunt, ut
habet proposita Veritas. Quod certe est consideratione dignis-
simum.

Ac primo quidem expende quod dicitur, idcirco pietatem valere ad omnia quod dum in usu rerum, respicit Deum; hic respectus Dei, talem rebus utilitatem confert, atque ipsarum usus tam spiritalem & pretiosum impertit valorem, ut quidquid agas quidquid opere tractes quantumvis temporale & terrenum, si pietatem adhibeas, id est, si Deum in eo tractando respicias, si eius statutum ordinem, si voluntatem & nutum attendas, tum spiritualis efficitur actio, & tanti fit opus meriti, quanta in opere fuerit pietas. Nonne hoc pretiosum & locuples in conspectu Dei?

1. Cor. 3. Hoc ipsum est quod dicebat Apostolus, *super idem fundamentum super-adificari aurum, argentum, lapides pretiosos, ligna, fenum & stipulam*. Nempe, quanta est differentia auri & ligni, argenti & foeni, lapidum pretiosorum & stipulae: tanta potest esse diuersitas meriti & valoris vniuscuiusque rei, seu actionis nostrae prout in illa Deum & Dominum Iesum spectaueris. Si temporalem tantum utilitatem vel delectationem, vel gloriam, vel simile aliquod transitorium lucrum & commodum in agendo respicias, hoc est aedificare lignum & stipulam, hoc est opus operari corruptibile de quo Sapiens, *quod in fine deficiet, & qui illud operatur, ibit cum illo*. Hoc est telas aranea texere; hoc est seminare multum & inferre parum. Hoc est serere super spinas; quod Prophetae multum deplorant. Sed qui *omne quodcumque faciunt in verbo aut in opere, omnia in nomine Domini nostri Iesu Christi faciunt, gratias agentes Deo & Patri per ipsum. Et siue manducant siue bibant, siue aliud quid faciant, omnia in gloriam Dei faciunt*, sicut commendat Apostolus: hi sunt videlicet, qui aurum & argentum & lapides pretiosos inde reportant, unde alij paleas & foenum reterunt.
- Ecclesi. 14. Hi sunt operarii sufficientes sibi, quorum vita condulcabitur, & in ipsa inuenient thesaurum, ut ait Sapiens: Hi sunt qui operantur non cibum qui perit, sed qui permanet in vitam eternam: quod consulebat Dominus. Tu quibusnam ex istis velles esse similior?
- Is. 59. Agg. 1. Ier. 4. Coloss. 3. 1. Cor. 10. Ecclesi. 40. Ioan. 6.

II. PUNCTVM.

SED omnia etiam iuuant & valent ad hunc Diuinum respectum ex seipsis eliciendum.

Nam primò quidem Creaturae omnes cum aliquem naturalis

Sicut Pietas valet ad omnia, sic omnia valent ad Pietatem. 789

gradum bonitatis contineant, quæ est participatio quædam bonitatis Diuinæ, nos intuitu suo permouent ad Deum Creatorem suum respiciendum & laudandum; *Sic cæli enarrant eius laudem*, Ps. 18. sic stellæ, sic terra, sic aer & omnia, quando nos ad eum laudandum excitant & pertrahunt, sic vna vox est Creaturarum omnium, aut potius vnus Concentus ex multis vocibus, quo perpetuas laudes Deo celebrant & beneficentiam eius deprædicant. *Tanta hæc formarum varietas atque numerositas specierum in rebus conditis, quid nisi radij sunt deitatis?* ait Diuus Bernardus. *Inuisibilia enim ipsius à Creatura mundi per ea quæ facta sunt, intellecta conspiciuntur, sempiterna quoque eius virtus, & Diuinitas*, inquit Rem. 1. Apostolus.

Quod & verius est in Creaturis sensibilibus aut etiam ratione præditis in quibus quo plus bonitatis animaduertitur, plus Diuinitatis sentitur; Neque longius à nobis progrediendum est vt intueri Deum possimus, cum à nobis non longe absit; *In ipso enim viuimus, & mouemur & sumus*. Quocumque igitur te motu moueas, quemcumque vitæ actum exerceas, quocumque in situ animi vel quauis corporis positione consistas; si non viuis, si non moueris si non existis nisi prorsus in Deo; nonne in omnibus illum potes respicere? Nonne omnia de suo conferunt ad illum in seipsis contuendum? *Proindebam Dominum*, inquit Psalter, *in conspectu meo semper, quoniam à dextris est mihi ne commouear, propter hoc latatum est cor meum & exultauit lingua mea; insuper & caro mea requiescet in spe*. O quantum illi errant qui se tristes futuros crederent si sic Deum semper prouiderent; Nihil lætius, nihil non modo utilius, & honestius, sed nihil etiam iucundius.

III. PUNCTVM.

SICVT igitur Pietas valet ad omnia, sic omnia valent ad pietatem; cum omnia valeant ad excitandum illum Diuinum respectum, quo fit vt dignitas, valor & tale meritum rebus atque actionibus nostris impertiatur, vt beatus ille vir, qui sic in omnibus Ps. 13. Deum respicit sit velut lignum quod plantatum est secus decursus aquarum quod fructum suum dabit in tempore suo. Et folium eius non defluet: & omnia quæcumque faciet, prosperabuntur.

Ggggg ij

Maxime vero propterea comparatur palmæ, quæ arbor est adeo fructuosa, vt supra trecentas, vtilitatum diuersæ species numerentur, quas cultoribus suis afferat. *Cant. 7.* *Statura tua assimilata est palma*, inquit Sponsus, quasi dicat, ipse situs & minima quauis actio sic vnix Deo animæ mirum quantum profit ad meritum. *Iob. 19.* Sic dicuntur *sicut palma multiplicari dies eorum*, nam licet numero non augeantur, merito tamen crescunt & sic multiplicantur, quo sensu dicitur à Sapiente, *senectus venerabilis non diuturna, neque annorum numero computata: cani autem sunt sensus hominis, & ætas senectutis vita immaculata, & consummatus in breui expleuit tempora multa.*

Cant. 7. DIXI, *ascendam in palmam & apprehendam fructum eius.* Dicit, qui serio statuit praxim propositam; Ascendit, qui seipsum supra quod videt in creaturis erigit: apprehendit autem fructum, qui sic erecta in Deum mente, illi vni in omnibus placere studet: quasi hoc vnum haberet studium, hoc vnum tractaret negotium: in quo tractando & conficiendo se beatiorem existimat quam si toti mundo vel cognoscendo vel possidendo vacaret. Sic præclare *L. 5. Conf. 4* re sanctus Augustinus: *Sicut melior est qui nouit possidere arborem & de usu eius tibi gratias agit, quamuis nesciat vel quot cubitis alta sit, vel quanta latitudine diffusa, quàm ille qui eam metitur, & omnes ramos eius numerat, & neque possidet eam, neque Creatorem eius nouit aut didicit: sic fidelis homo cui totus mundus diuitiarum est, & quasi nihil habens omnia possidet, inharendo tibi, cui seruiunt omnia, quamuis nec septentrionum gyros nouerit, dubitare stultum est, quin utique melior sit quàm mensor cæli & numerator syderum, & pensor elementorum, & negligens Tui, qui omnia in mensura, & numero, & pondere disposuisti.*

L. Tim. 4. EXERCE teipsum ad hanc pietatem: Et vide in 4. parte, hebdomada 26. quæ tota est de Pietate seu Deuotione.

Ad Euangelium verò Feriæ, videri debet in 1. parte, hebdomada 4. post Epiphaniam de Paralytico per tegulas summissio.



SABBATO.

DE PRIMA QUÆ REFERTVR IN

Amori potius ab amore timendum est quàm à timore. 791

*ECCLESIA, PERPETRATA CVLPA,
SEQUENTI QVE POENA.
ET DE DONO TIMORIS.*

*Dixit Petrus Anania, cur tentauit Satanas cor
tuum mentiri te Spiritui sancto, & fraudare de
pretio agri? Act. 5.*

VERITAS PRACTICA.

Amori potius ab amore timendum est, quàm à timore.

*SENSVS EST, quod amori Diuino quo nempe debemus
Deum diligere, maius instet damnum & periculum à falso
& supposito quodam amore, vel ab ipso etiam Diuino amore
seu potius diuini amoris abusu, quàm ab ipso timore quem
multi putant amori repugnare.*

*RATIO est, quia maius est damnum, magisque timendum Di-
uino amori, si nullus omnino sit amor qui putatur esse Diui-
nus, quàm si non sit omnino perfectus amor.*

*Sed ab amore potius quam à timore de quo est quaestio, proue-
nire potest, quod nullus omnino sit amor.*

*Ergo amori potius ab amore timendum est, quàm à timore. Quod
sane est diligenter perpendendum.*

IN PUNCTVM.

V*IR autem quidam nomine Ananias cum Sapphira uxore
sua, vendidit agrum & fraudauit de pretio agri, conscia
uxore sua: & afferens partem quandam, ad pedes Apostolo-
rum posuit. Dixit autem Petrus, Anania, cur tentauit Satanas cor
tuum, mentiri te Spiritui sancto, & fraudare de pretio agri? Nonne
manens tibi manebat, & venundatum in tua erat potestate? Quare*

posuisti in corde tuo hanc rem? non es mentibus hominibus sed Deo. Audiens autem Ananias hac verba, cecidit & expirauit. Et factus est timor magnus super omnes qui audierunt.

Sic Sacer Historicus in Actis Apostolorum, qui & similia narrare pergens de Sapphira vxore, addit iterum: *Et factus est timor magnus in vniuersa Ecclesia, & in omnes qui audierunt hac.* Et protectò erat quod expauescerent omnes ad talem poenā seu potius ad talem culpam! poena quidem grauissima, sic expirare repentina morte, sic puniri propter mendacium aut. tenacitatem aliquam cupiditatis; sed culpa longe grauior sic adhærere cupiditati, sic dissimulare, sic mentiri, si velle decipere. Itaque tametsi primo qui viderunt & qui audierunt impositam poenam, timuerint timore poenæ, cū tamen postea perpenderunt grauitatem culpæ, maiestatem, præsentiam, & iustitiam Dei offensi, credibile est eos magis timuisse timore culpæ seu timore qui dicitur reuerentialis & filialis, & qui proprie Donum est Spiritus sancti, quo, vt ait sanctus Thomas, Deum reueremur & refugimus, nos Ipsi Deo subducere. Non est dubium quin iste timor qui est ipse amor, sit perfectior alio quouis timore bono. Sed non propterea tamen quouis alius bonus timor est negligendus, quasi repugnet Diuino amoris quo Deum super omnia debemus diligere. Quin potius si quid sit timendum Diuino amoris, *ab ipso potius amore timendum est quam à timore.*

Quæ proposita Veritas sic expendi debet, non vt aliquid de dignitate & merito Diuini amoris detrahatur, sed potius vt magis ille Diuinus amor conseruetur conseruato timore sine quo vix amor vllus esse potest. Atque hinc Ratio sumitur cur sit amoris potius ab amore timendum quàm à timore: quia scilicet maius imminet damnū amoris Diuini si nullus sit omnino amor, quam si non sit forte perfectus. Quid hac prima propositione clarius? nihil enim timeretur nisi damnum seu malum: Quò vero maius est malum aut damnum, eò certe magis timendum est & cauendum. Quod verò damnum maius amoris Diuini inferri posset, quam si fictitiis & supposititiis pro vero sumeretur, aut si verus esset, destrueretur, atque à seipso deficeret, sicque tandem nullus vere esset amor Dei, sed tantum præsumptus, prætentus, adumbratus, & simulatus.

Nonne fatius esset aliqua saltem ex parte Deum diligere

quàm non omnino diligere? Certe à sancto Petro plus diligì visus est Dominus, quàm à cæteris Apostolis, cùm ab ipso quæsitus est an se plus his diligeret: *Simon Ioannis diligis me plus his?* Ioan. 21. At quis neget melius tamen esse saltem diligere Dominum sicut cæteri diligebant Apostoli, quàm non omnino diligere, sicut Iudæi quibus dicebat Dominus, *Cognoui vos quia dilectionem Dei* ibid. 5. *non habetis in vobis?* ô verbum! verbum penetrabilius omnigladio ancipiti. Expende singula. Cognoui vos, & quod *in vobis* Hebr. 4. non habetis dilectionem, quasi diceret. Ego noui quod non no-
stis, ego video quid sit intus in corde, & an reuera sit amor, vt vos fingitis, an in specie tantum, apparenter, & simulatè. *Quia ego sum scrutans renes & corda, & dabo unicuique vestrum secundum opera sua.* Apoc. 2. Id est, prout quisque opere & veritate diligit, non verbo & fictitiè.

II. PUNCTVM.

SED ab amore potius provenire potest quod nullus sit amor Dei, quam à bono timore.

Tribus id modis provenire potest; primo, cùm quis aliquem sentit pietatis affectum erga Deum, aut res Diuinas, neque tamen edomitas habet animi appetitiones, aut his edomandis non vacat, vnde nonnullis cupiditatibus & peccatis implicatur; tùm is forte quem sentit pietatis affectum, putabit esse Diuinum amorem, & errabit, illudetur, decipietur; Nam, vt ait S. Gregorius, *qui adhuc per illicita desideria diffluit, profectò Deum non* Hom. 30. in Euang. *amat, quia ei in sua voluntate contradicit.* Hoc autem sæpe accidit & iis potissimum qui vt sibi videntur aspirantes ad perfectiora, primo suæ ad Deum conuersionis impetu & feruore, alienum à se putant timorem illum qui dicitur initialis, & quo in via, quæ vocatur purgatiua, solemus expurgari à vitiis & concupiscentiis; vnde fit vt quod diximus, dum se putant altius prouehere, deprimuntur interius & grauius ab ipsis suis cupiditatibus demerguntur, quas salubri & sancto timore nesciunt vel nolunt coercere. Hinc aptè sanctus Gregorius: *Praua mens si non prius* Hom. 34. in Euang. *per timorem euertitur, ab assuetis vitiis non emundatur.* Atque hunc optabat timorem, qui sic orabât: *Confige timore tuo carnes meas;* Ps. 118. *à iudiciis enim tuis, timui.* Sic & ille in lege gratiæ qui aiebat,

1. Cor. 9.

Castigo corpus meum & in seruitutem redigo, ne cum aliis predicauerim, ipse reprobus efficiar.

Eccl. 9.

Secundo, etsi concederemus aliquos vel non ita suis vrgeri cupiditatibus, vt grauius peccent; vel in illis reprimendis non nihil studij ponere: si tamen propterea sic certi essent se Diuinum habere amorem vt omnem inde timorem excluderent, excluderent simul amorem si quem haberent: Et hoc ipso quo se ita certos faciunt de suo in Deum amore, vt non dubitent nec timeant: hoc ipso, inquam, deficit & nullus est eorum amor; quia nullus est verus Dei amor, vbi vera est præsumpcio spiritus quam Deus execratur: Ibi autem est præsumpcio spiritus vbi talis est certitudo amoris, nullus vt sit timor nullumue dubium quin sit amor. Nam cum aperte scriptura dicat de probis etiam & sanctis viris: *sunt iusti atque sapientes, & opera eorum in manu Dei, & tamen nescit homo utrum amore an odio dignus sit, sed omnia in futurum seruantur incerta*: quis se ita certum dicat vt non timeat, aut non simile euidenter præsumat? Quid est enim præsumere si sancto credimus

2. 2. de
Trin. c. 1.
In Ps. 58.

Augustino, *quàm quid asserere priusquam veritas pateat*? Quod ita nefas est vt inde sanctus Doctor concludat de nulla re præsumentum, *Quando, inquit, nec de iustitia, sit præsumentum, id est, de statu animæ nostræ; vnde in præsumentem manifeste Apostolus;*

Rom. 11.

Noli altum sapere, sed time.

1. 2. q. 64.
a. 4.

Tertiò denique quod magis mirum est, ipse Diuinus amor seipsum quodammodo destruit aut potius à non timente destruitur, quando plus affectat quàm potest & quàm debet. Licet enim non possit talis esse excessus in Charitate vt homo Deum diligat plusquam debet: cum è contra numquam satis prout debet diligat: potest tamen, inquit sanctus Thomas, *ex parte nostra reperiri quidam excessus quando quis ferretur in Deum supra mensuram suæ condicionis*. Quod egregie docet sanctus Gregorius vt est iam alibi obseruatum: *Cum miro, inquit, consilio author ac dispositor noster huic illa largitur quæ alij denegat: alij hac denegat quæ isti largitur: mensuras sibi positas egredi nititur quisquis posse plusquam acceperit conatur, vt fortasse is cui tantummodo datum est preceptorum occulta differere, tentet etiam miraculis coruscare*. Et post pauca: *In præcipitio enim pedem porrigis qui mensurarum suarum limitem non attendit: & plerumque amittit & quod poterat qui audacter ea ad quæ pertingere non valet, arripere festinat*. Ac nonnullis interiectis,

28. Mor. 2.

Bene

Bene itaque David Propheta intra acceptas ex diuina largitate mensuras pedem cordis presserat, cum dicebat: Neque ambulauit in magnis, neque in mirabilibus super me. Super se quippe in mirabilibus ambularet, si apparere magnus ultra quàm poterat quæreret. Super se namque in mirabilibus attollitur qui & in his ad quæ non sufficit, videri idoneus conatur. Bene inter has mensuras etiam in ipsa Paulus predicationis suæ se latitudine coarctabat cum diceret; Non enim audeo aliquid loqui eorum quæ per me non efficit Christus. Ps. 130.
1. Cor. 15.

Quod & Diuus Bernardus fusè prosequitur in illud Canticum, ordinauit in me Charitatem; postquam videlicet introducta est sponsa in cellam vinariam, periculum erat ne feruentiori Deuotionis æstu vel zelo raparetur, idcirco statim ait ordinatam in se charitatem ut se contineret. Nonne & illud legisti vel iam audiisti quod ait Dominus apud Kempensem; Quidam incauti propter Deuotionis gratiam, seipsos destruxerunt quia plus agere voluerunt quàm potuerunt, non pensantes suæ paruitatis mensuram, sed magis cordis affectum sequentes quàm rationis iudicium. Et quia maiora præsumperunt quam Deo placitum fuit, idcirco gratiam perdidierunt: facti sunt inopes & viles relictæ qui in cælum posuerunt nidum sibi, ut humiliati & depauperati discant non alis suis volare sed sub pennis meis sperare. Cant. 2.
Serm. 49.
L. 3. delmiz
Ch. 87.

Non sic temere non sic volassent inconsulto, si timorem Domini retinere voluissent, nec suo tantum amorì credere quasi amor non esset Diuinus si esset timoratus.

III. P. V. N. C. T. V. M.

AMORI ergo potius timendum est ab amore quam à timore: quia videlicet plus amorì timendum est, ne nullus omnino sit quam ne sit inchoatus, imperfectus, aut aliqua tantum ex parte mancus. At vero ab amore provenit quod nullus plerumque sit amor qui putatur esse, imo & quo maior & purior esse fingitur, eo minus reuera est quia totum absorpsit præsumptio, vanitas & elatio, euauerunt in cogitationibus suis. Quid mireris bonam ostendere viam tuam ad querendam dilectionem? Excellentior est quidem via, Charitas, ad salutem, ad perfectionem, ad omnia: de hoc dubitari non potest: sed excellentior etiam ad Charitatē via quæritur, & dum quisque nititur bonam. Rom. 1.
1er. 2.

ostendere viam suam ad illam Charitatem, verendum est ne quod quærit perdat, si suam ita deprædicat viam ut viuperet & condemner alienam.

Zacch. 13. Hæ sunt *plaga in medio manuum Christi quibus se plagatum dolet in domo eorum qui diligebant ipsum*, id est, qui profitentur ipsum diligere, & tamen dum de dilectione plus aut minus sapiunt quam oporteret, dilectionem scindunt & mysticum Christi corpus plagent.

1. Ioan. 4. At nonne perfecta Charitas foras mittit timorem? mittit sanè, sed non omnem, non castum, non reuerentialem, non filia-

Mal. 1. lem qui est ipse amor Diuinus. *Si pater ego sum, ubi est honor meus? & si Dominus ego sum, ubi est timor meus?* Pellit itaque seruilem & initialem illum qui est poenæ & seruorum, cuius loco sic perfecta succedit Charitas, ut nisi sit perfecta non succedat, neque omnino timorem pellat; sed qua proportionem crescit

2. 2. 7. 19. Charitas, decrescit ille timor; dumque interim timor manet donec perfecta sit Charitas, tum quidem aliqua ex parte sit manca & imperfecta necesse est, quandoquidem non est perfecta: sed nondum esse perfectam Charitatem in eo qui incipit, vel qui quotidie proficit, non est certe tantum Charitati seu amoris Diuini damnum, quantum est illud quod ex amore prouenit si omnis desit timor. Non quod perfecta Charitas non sit melior quam non perfecta, sed quod sit melius non præsumere se Charitatem perfectam habere, sicque ei perficiendæ semper vacare

Phil. 2. cum metu & tremore Domini, ac denique timendo simul & diligendo semper proficere.

Ecclesi. 40. Sic forte propterea dictum est à Sapiente; *Non est in timore Domini minoratio*: id est, nihil tibi deperibit à timore bene formato; nam quod ex vna parte Charitas videtur perdere dum se altius non extollit, recuperat ex alia, dum se in humilitate & sancto timore continet. Quamobrem si sapias sic cum sancto Bernardo semper senties: *In veritate didici nihil aque efficax esse ad gratiam promerendam, retinendam & recuperandam quàm si omni tempore coram Deo inueniaris non altum sapere sed timere. Beatus homo qui semper est pavidus. Time ergo cum arripserit Gratia time cum abierit, time cum denuò reuertetur.* Et alibi: *sicut securitas vel desidia causa est & mater omnium delictorum, sic timor Domini radix est & custos omnium bonorum*: unde scriptum est, *si non in ti-*

*Serm. 54.
in Cant.
Tract. de
donis Spir.
sancti.*

Amori potius ab amore timendum est quàm à timore. 797

*more Domini tenueris te instanter, cito subuertetur Domus tua. Omne
namque virtutum edificium illico vergit in precipitium, si huius gra-
tia amiserit prasidium. Descendit pluuia, & venerunt flumina, & fla- Matth. 7.
uerunt venti, & irruerunt in domum illam: & cecidit, & fuit ruina
illius magna.*

Vide in 1. parte, Feria 3. hebdomadæ 4. post Epiphaniam.
In 2. parte, Feria 6. Septuagesimæ: Feria 2. & 4. Sexagesimæ:
Feria 5. primæ hebdom. Quadragesimæ: & alibi passim de san-
cto timore Domini.

Ad Euangelium verò Feriæ, de Socru Petri sanata, in 1. par-
te, Feria 5. hebdomadæ 2. post Epiphaniam.

**FINIS SECVNDÆ PARTIS IN VITAM
DOMINI IESV.**



Hhhhh ij



VERITATES PRACTICÆ.

AD DIES FESTOS SANCTORVM
QVI INCIDVNT IN HANC
SECUNDAM PARTEM.

24. Febr. *DE SANCTO MATTHIA APOSTOLO.*

*Et dederunt sortes, & cecidit fors super Matthiam,
& annumeratus est cum undecim Apostolis. Act. 1.*

VERITAS PRACTICA.

Sicut in manu Domini fors nostra est, sic in sorte nostra,
manus est Domini.


*ID EST, Diuina directio, quam sequamur tanta fidelitate in
ministerio nostro exercendo, quantam habere oportuit in eo ex-
pectando, & suscipiendo de manu Domini.*

*RATIO est, quia idcirco magna opus est fidelitate ad ministerium
nostrum suscipiendum de manu Domini, ne deerremus à viis
eius, quæ sunt viæ salutis & perfectionis nostræ.*

*Sed nisi eâdem fidelitate sequamur Diuinam directionem in exer-
cendo ministerio nostro, deerrabimus à viis Domini & à viis
salutis nostræ.*

Sicut in manu Domini fors nostra est, sic in sorte nostra, &c. 799
Ergo tanta fidelitate sequenda est Divina illa directio in ministerio
nostro rite obeundo, quantam habere oportuit in eo expectando
& suscipiendo de manu Domini.

I. PUNCTVM.



QUAE suprà dicta sunt fufius in hac parte de electione sancti Matthiae sic possunt breuiter in tria contrahi, quæ triplicem temporis differentiam complectuntur. Primum ante electionem, quando nominatus fuit cum Iosepho qui eligeretur in locum proditoris Iudæ, nullus è tota turba fuit qui contradiceret, licet multa possent obijci quæ retardarent talem nominationem vsque ad aduentum Spiritus sancti. Secundum, in ipsa electione, licet Iosephus qui erat alter Candidatus, tantæ esset probitatis vt vulgo *Iustus* cognominaretur, tamen datis sortibus, id est, coniectis nominum chartulis in vnam, vt fieri solet, Matthias præelectus est à Domino, & *annumeratus cum vndecim Apostolis*. Tertium denique post electionem, Apostolatus dignitatem cumulauit insignibus meritis de quibus sic sanctus Antoninus; *Fuit in lege Domini Doctissimus, corpore mundus, animo prudens, in consilio prouidus, in sermocinatione expeditus, multorum signorum Patrator, ac tandem Martyr extensis in cælum manibus spiritum Deo reddidit.*

*Infra O-
 stendam
 Ascensionem.*

*1. p. Tit. 5.
 c. 2.*

Congaude sancto Apostolo, venerare sanctitatem, cole Gloriam, imitare virtutem in exercendo ministerio tuo, tanta cum fidelitate quantam adhibere oportet ad illud expectandum & suscipiendum de manu Domini. *Sicut enim in manu Domini fors nostra est, sic in sorte nostra, manus est Domini*, qua nos videlicet regat & cui nos rotos regendos in administratione nostri officij relinquamus, sicut non aliter quàm ab Eo ipsum officium seu ministerium fuit acceptandum.

Ratio plane est eadem & digna quæ sæpius expendatur, nempe ad eligendum vitæ statum siue ad acceptandum quodlibet officium & ministerium, opus omnino est magnam adhibere fidelitatem in exquirenda Dei voluntate & sequenda, ne si alium statum acceperimus quàm ille statuerit, deerrèmus à viis eius, & à

Initio ter-
tia partis.

viis perfectionis & salutis nostræ : Qua de re fusè in libris de ordine morum & vitæ, nec non in prima parte huius operis, tota hebdomada quinta post Epiphaniam, vbi de sancti Matthæi vocatione, atque in hac etiam parte, infra in considerationibus quæ sunt communes omnibus statibus, quibus hoc vnum addi modo sufficiat quod habet Lessius in eo quem scripsit libro de statu vitæ eligendo; vnde clarè patebit quanti momenti sit statum seu officium ac ministerium suum, fideliter à Domino expetere, & non nisi eo volente suscipere, quantum quidem eius voluntas hac in

quest. 12.
Num. 154.

parte potest explorari & cognosci. *Sunt enim, inquit, in mente Diuinæ mille auxiliorum ordines, & mille mediorum series quibus cum quolibet nostrum vti potest, & certissimè nouit quid ex qualibet serie esset secuturum. Nouit enim qua serie mediorum effès salutem consequuturus, cum qua in exitium & damnationem lapsurus. Nouit quod officium, quis locus, quæ habitatio, qui socij, quæ occasiones, quæ studia tibi forent ad salutem, quæ ad perniciem. Salus enim & interitus sapissimè à re modica & leui occasione pendent. Maximum beneficium est si salutarem mediorum seriem obtineamus, maximum incommodum si ab ea excidamus. Ex illa mediorum serie pendet donum perseuerantia sine quo nemo saluatur, cuius preparatio in mente Diuina, est nostra predestinatio.*

Hæ sunt videlicet viæ Domini, à quibus deerratur quando vitæ status eligitur non consulto & volente Deo. Quomodo verò salus & exitium pendeant à re modica quam nisi Diuina Prouidentia procurauerit vel auerterit, certissimè peribis, sic paulo ante declarat expressius. *Adit quis conuiuium, audit ibi verbum minus sibi honorificum, oritur rixa, occiditur. Alius exit vesperi ebrius vel domum redeat, incidit in aduersarium, contrahitur pugna, confoditur. Alij iter facienti occurrit binium, eligit viam quæ videtur commodior, incidit in latrones qui viatoribus ibidem insidiabantur, ab his spoliatur & interficitur. Similia quotidie plurima eueniunt: sicut ex minima scintilla saepe maximus accenditur ignis, ita ex modica occasione sapissime maxima perniciēs. Poterant ista occasiones innumeris modis à Deo qui omnia prouidet impediri, vel minima inspiratione auerti, nisi se homo reddidisset indignum, non inquirendo scilicet viam Domini seu vitæ degendæ statum & officium sicut par erat inquirere. Isti non cognouerunt vias meas, ut inquit in iramea, si introibunt in requiem meam.*

Pf. 104.

II. PUNCTVM.

SED nisi eadem fidelitate sequamur Diuinam directionem in exercendo ministerio nostro, deerrabimus à viis Domini, & à viis salutis nostrae.

Cur enim deerrasses à viis Domini si statum aut ministerium tuum non accepisses à Domino, nisi quia Domini voluntas erat & Gratia, vt in illo viueres statu? At nonne est eadem Domini voluntas vt in illo quem suscepisti statu recte & perfecte viuas? nonne ob id vel maxime Gratia datur? nonne idcirco directio Domini proponitur? nonne inde Diuina Gloria, tua perfectio, & quidquid ad salutem spectat, in eo vno sistit, vt sicut monet Apostolus, *videas ministerium quod accepisti in Domino, vt illud impleas?* coloss. 4.

An putares satis esse ad tenendam viam Domini si quis in eo quidem esset vitæ statu in quo eum vellet Dominus; nec ultra tamen de recta viuendi via cogitaret? Et quorsum tandem abirent tam crebræ voces Apostoli, vt *videamus vocationem nostram*, 1. Cor. 7. *vt sicut vocauit Deus, ita & ambulemus, & unusquisque in quo vocatus est, in hoc permaneat apud Deum?* Quid est videre vocationem, quid est secundum illam ambulare, aut in ea permanere apud Deum, nisi sic in ea viuere, vt secundum Diuinam eius directionem & voluntatem viuamus? Quod ita verum est vt satius esset non cognouisse viam Domini in statu eligendo, quàm non eam tenuisse in colendo statu prout à te coli volebat Deus. Vnde idem Apostolus: *Quandoquidem ego sum Gentium Apostolus, ministerium meum honorificabo.* Rom. 11. Quali diceret: non ita meum duco quod sim Gentium Apostolus; cùm ignorem quamdiu me talem esse voluerit Dominus, quàm donec talis fuero, recte perfungar hoc munere, & tam fideliter illud obeam, vt sicut mihi est honorificum munus, ita & ego munus honorificem.

III. PUNCTVM.

SICUT igitur in manu Domini fors nostra est & ministerium, vt ab illa fideliter quodcumque Dominus voluerit, acceptemus: sic in sorte nostra & ministerio, manus est Domini & directio quam sequa-

Jer. 2.

mur eadem prorsus fidelitate : Quia eadem est ratio & suscipiendi muneris à manu Dei, & exercendi per manum eius, ne alioquin videlicet à viis Domini aberremus, & ne nobis obiciatur in nostris inde nascentibus malis: Numquid non istud factum est tibi quia dereliquisti Dominum Deum tuum eo tempore quo ducebat te per viam?

Ps. 25.

Huius fidelitatis exemplum luculentissimum patet in Dauide qui cum fide Diuina certus esset se Saùli successurum, quidquid ille contrà moliretur; sic tamen se obseruabat & Diuinæ directioni collaborabat in omnibus, vt nihil eorū prorsus omitteret quæ quisque consultissimus prouideret, nihil plane committeret quæ supremam prouidentiam anteuertent aut retardarent.

Job. 23.

Pes meus stetit in directo : quasi diceret, neutram in partem declinaui, sed rectà quò me ducebat Deus per occurrentes quolibet casus, eò semper dirigebar. Quod & ante pari fidelitate Iob præstitit qui vt documento nobis esset similis obseruantia, sic de se loquebatur: vestigia eius secutus est pes meus, viam eius custodini, & non declinaui ex ea.

Epist. ad
Macarium.

Admirabile vero est, atque ad hanc quam consideramus Diuinam directionem religiosissimè, obseruandam, singulare prorsus exemplar quod refert sanctus Paulinus in Epistola ad Macarium de Valgio quodam sene Cathecumeno postea Victore appellato, qui cum solus è naufragio in naui iactabundus, mare æstuosissimum oberraret, sic eum Christus Dominus saluum & incolumem in portum duxit, vt indicaret singula quæ ab ipso fieri secum vellet, faceretque bonus senex cum Christo quod Christus cum sene conficiebat. Non poterat solus senex, nolebat solus Christus, simul ambo rem peragebant. Si essent explicanda vela, vela pro viribus mouebat senex, tum statim explicabantur & antennis alligabantur: si sentina exhaurienda, parabat senex situlam, indeque educebat, quantum semel aut iterum posset, tum siccitam illico nauim cernebat, sicque in aliis nauigandi muniis se strenuum exhibebat, vt manus Christi manifestè quidem cerneretur manum senis ad opus ad mouere, sed & manus senis ad Christi manum erat adiungenda. *Dixi, Deus meus es tu, in manibus tuis sortes meæ.*

Ps. 30.

Vide suprà citatos conformes locos.



DE SANCTO IOSEPHO, Die 19.
Martij.
SPONSO BEATÆ VIRGINIS.

Vide in prima parte, Sabbato primæ-hebdomadæ Aduentus Domini: quibus aptari potest & sequens Veritas.



DE SANCTO IOACHIMO, Die 20.
Martij.
PATRE B. VIRGINIS.

Laudemus viros gloriosos & parentes nostros in generatione sua: Qui de illis nati sunt reliquerunt nomen narrandi laudes eorum. Eccles. 44.

VERITAS PRACTICA.

Affinitas sanctitatis cum Beatissima Virgine, magis æstimanda, quàm sanguinis.

RATIO est, quia non potest æstimari affinitas sanguinis cum Beatissima Virgine, nisi propter bonum quod est, vel honestum vel utile vel delectabile.

Sed illa triplex ratio boni, melius reperitur in affinitate sanctitatis quàm sanguinis.

Ergo magis est æstimanda.

IN PUNCTVM.

ANTA est dignitas Beatissimæ Virginis Matris vt quicumque eam contingant sanguine, dignitatem & nobilitatem inde hauriant singularem; quamobrem cum

inter omnes, Pater eius sanctus Ioachimus attingat eam propius, nobiliorem etiam inde extrahit Claritatem, & ampliori mere-
tur à nobis honore coli. Verùm cum non modo sanguinis sed
& sanctitatis affinitate sanctissimam Filiam suam Pater optimus
tangat, sitque hæc sanctitatis affinitas longe maior quam san-
guinis, erit ad gloriam sancti Ioachimi nobilius, & ad profe-
ctum nostrum accommodatius si in veritate proposita attente
consideranda tantum immoremur. Sic ergo est, *Affinitas san-
ctitatis cum Beatissima Virgine magis est æstimanda quam sanguinis.*

Tota enim ratio æstimandæ cuiuslibet rei atque adeo affini-
tatis humanæ in id recidit, ut quantum est in illa re boni, tan-
tum æstimeretur; bonum autem cum sit triplicis generis, vel ho-
nestum, vel delectabile, vel utile, hinc profecto sequitur ut quan-
tum honesti, quantum utilis, & delectabilis boni reperitur in hac
humana cognatione, tanta erit & ratio illius æstimandæ. Sic re-
gia dignitas cum abundet istis bonis, omnium opinione supre-
ma est inter humanas & politicas, cæteræque hominum condi-
tiones & status tanto habentur in pretio quanta est illorum ad
regiam propinquitas & accessio. Quamobrem vide hinc quantus
sit honos, quanta utilitas & quanta vitæ iucunditas Patrem esse
illius Virginis quæ Mater est Dei. Certe sicut nulla umquam no-
biliores Mater matre Dei, sic nullus Pater nobilior patre Matris
Dei. Quod si veteres illi Patriarchæ Abrahamus, Isaacus & cæ-
teri tanto apud posteros in honore sunt habiti quod ad Christi
Domini stirpem spectarent, quanto maior est sancti Ioachimi
honus qui Dominum Iesum eo propior contingit sanguine quò
posterior est tempore.

Quanta porro utilitas in Beatissimum Virum emanarit, co-
gitare licet ex precibus & meritis sanctissimæ Filix quæ haud du-
bie non ingrata erat, & Gratitude debitum suo apud Deum
merito persoluebat. Restaret de vitæ iucunditate dicere nisi sa-
tis notum esset cogitanti, nihil esse posse Parenti iucundius
quam amabilem prolem, & cum maxime proles diu fuit expe-
ctata, cum antè longis expectita votis, & iis corporis atque animi
dotoribus exornata, quibus inter omnes Creaturas eminebat Vir-
go pulcherrima simul & sanctissima.

Sit ergo nobis vel hoc etiam nomine plurimum commen-
dandus sanctus Ioachimus, quòd Illam omnium proxime, san-

guinis affinitate contingat, quæ quantum in se boni continet & honesti simul & utilis & iucundi, quod certe est utrobique præcipuum & singulare, tantum à nobis meretur coli.

II. PUNCTVM.

SED illa triplex ratio boni, melius reperitur in affinitate sanctitatis quam sanguinis.

Dicitur affinitas sanctitatis inter eos qui non modo sunt in Gratia sanctificante, sed virtutum omnium actibus & præcipue Charitatis, conantur in dies sanctiores fieri & perfectiores, sicut sanctissima Virgo quotidie imo & per horas & momenta crescebat Gratia, meritis, & omni sanctitatis modo. Habent cum illa igitur affinitatem quotquot sancti sunt, id est, in Gratia & Charitate constituti, & eo quidem maiorem quo sanctitate propius ad eam accedunt. Verum, tanta esse dicitur illa affinitas ut minimus eius gradus superet omnem sanguinis affinitatem, quia videlicet plus continet boni honesti, utilis, & delectabilis.

Ac de honesto patet, cum tota ratio boni honesti sit in ea conformitate quam res habet ad rationem humanam & Diuinam: nihil autem sit conformius rationi vel humanæ vel Diuinæ, quam hominem in eo esse statu quo Deum Creatorem suum præcipue colat, & singulariter ab eo diligatur, sicque rectius ad finem cui conditus est, æternamque Beatitudinem perueniat: quod non alio verius præstatur modo quam per Gratiā illam Sanctificantem quæ adiunctam habet Charitatem & alios virtutum actus, qui quo sunt numero plures & merito præstantiores, eo & illa boni honesti ratio censetur amplior.

Bonum hic vero utile supra quam etiam in humana cognitione longe vberius reperitur, cum bonum illud sit animi non corporis, sit æternum non temporale, sit Diuinum non humanum; imo utrumque simul & animi & corporis, temporale & æternum, humanum & Diuinum. Nam quanta quanta est Diuinæ merces amicitiae, Diuinæ fecunditas vnionis, & Diuinæ visionis amplitudo, tanta est huius sanctæ per omne tempus & in omnem æternitatem affinitatis utilitas.

Delectabile porro esse quis dubitet supra omnem humanæ vitæ iucunditatem cum sit ipsa possidenda Beatitudo cuius semen

est Gratia, & cuius fructus est vita æterna, & gaudium ipsius Dei, quod nemo tollat à nobis.

Sep. 7. Quod quidem triplex Boni genus in hac sanctitatis affinitate contentum peropportune simul coniunxit Sapiens sub nomine Sapientiæ de qua dixit: *Venerunt autem mihi omnia bona pariter cum illa, & innumerabilis honestas per manus illius, & latatus sum in omnibus, quoniam antecedebat me ista sapientia, & ignorabam quoniam horum omnium mater est. Quam sine fictione didici & sine invidia communico, & honestatem illius non abscondo. Infinitus enim thesaurus est hominibus, quo qui vti sunt, participes facti sunt amicitie Dei, propter disciplinæ dona commendati. Itane æternas illum statum?*

III. PUNCTVM.

AFFINITAS ergo sanctitatis cum Beatissima Virgine magis est æstimanda quam sanguinis; cum quidquid ætimandam facit affinitatem sanguinis magis reperiatur in alia, videlicet triplex Boni ratio quæ est honesti, utilis & delectabilis.

Hom. 7. ad pop. Sic aperte S. Ioannes Chrysostomus de Timotheo quem suum sæpe Apostolus filium vocat: *Non fuisset, inquit, tam beatus Timotheus si Pauli filius à natura fuisset, quam nunc est admirabilis, quoniam secundum carnem nihil ad ipsum attinens, per Cognationem quæ est secundum religionem, in ipsius se adoptionem induxit, cum sedulitate disciplina illius characteres in omnibus seruans.*

Neque hinc deperit aliquid gloriæ sancto Ioachimo Patri sanctissimæ Virginis, imo multum accrescit, cum non modo eam attingat sanguine sed & sanctitate. Et patebat quidem eius sanctitas antequam filia nasceretur, cum totus esset in precibus, & partiendis in pauperes bonis suis, qua pietate tantum promeruit apud Deum, ut illam sibi, nobisque omnibus progeneraret filiam. O quale viri promeritum! ô quanta totius humani generis erga talem Virum debet esse gratitudo cui talem debet filiam; quam suam agnoscit Matrem! At vero cum hæc ei diuinitus nata est cumque suo viræ exemplo, suis precibus & meritis, sanctitatem patris haud dubiè, tam potenter promouerit quam erat potens & gratiosa: quis mente complecti possit quod ille perfectionis ascenderit?

In obitu tandem postremoque die perfungendo, quæ illi non subsidia derulit obsequentissima filia? quibus cum expirantem orationibus non est comitata ut eò Beatitudinis excellentiorem in cœlo gradum obtineret, quò depressiorem in terris eum videret & sanctiorem? Nisi enim dum viueret Sanctitatem coluisset, nihil illi fateor ad Beatitudinem, ne quidem continuatæ per totam vitam filia preces, potuissent; sed cum, ut dictum est, non minus Sanctitate quam Sanguine Filiam attigerit, duplici hac affinitate ita colendus est ut discamus tamen maiorem hanc esse magisque æstimandam Sanctitatis affinitatem quam sanguinis. Quod ita verum est, ut si quis affinitate tantum sanguinis contingeret Beatissimam Virginem, & non sanctitatis, inferior esset & disiunctior ab illa Virgine quam qui tantum ad illam accederet propinquitate Sanctitatis & non sanguinis.

Quod minime mirum videri debet cum illud ipsum de eadem Sanctissima Virgine circa Filium dici possit, ut iam supra notauimus; Nempe si hoc tantum haberet quod eius Mater esset, & non sancta Mater, minus ad illum accederet quàm qui Sanctus esset; *Quæ est Mater mea, aut qui sunt fratres mei*, dicebat Ille, cum *Matth. 12.* de Matre sua interPELLARETUR, *Et extendens manum in discipulos suos, dixit: Ecce mater mea & fratres mei: Quicumque enim fecerit voluntatem patris mei qui in cœlis est, ipse meus frater, & soror, & mater est;* Quasi diceret, si mea carnalis mater non faceret voluntatem Patris mei, non ita mihi diceretur mater aut propinqua, sicut qui faceret Patris voluntatem.

Sic sanctus Hieronymus, *non negat Matrem*, inquit, *sed docet carni spiritum preferendum.* Vbi & Diuus Chrysostomus; *Vna nobilitas est, Dei facere voluntatem.* Itemque Beda: *Christus docet religiosiorem cordium copulam quàm corporum.* Et cum alias prædicaretur beatus venter qui talem portasset filium, & vbera quæ suxisset; *Quin imo*, inquit, *Beati qui audiunt verbum Dei & custodiunt illud.* Quod explicans sanctus Chrysostomus; *Non est responsum*, inquit, *repudiantis matrem, sed ostendentis quod nihil ei paratus profuisset, nisi fidelis fuisset.* Sic rursum Beda: *Dei genitrix, inde quidem beata quod Verbi incarnandi ministra temporalis: sed inde multa beator, quia eiusdem semper amandi custos æterna.*

Sed omnium excellentissimè S. Augustinus post relata Christi Verba: *Ergo*, inquit, *& Maria, quia fecit voluntatem Patris. Hæc in* *Tr. 10. in Ioan. 10.*

ea magnificavit Dominus quia fecit voluntatē patris, non quia caro genuit carnē. Intendat Charitas vestra: Propterea cū Dominus in turba admirabilis videretur faciens signa & prodigia, & ostendens quid lateret in carne, admirata quaedam anima dixerunt, *fœlix venter qui te portavit*: Et ille, imo *fœlices qui audiunt verbum Dei & custodiunt illud*. Hoc est dicere: Et mater mea quam appellastis *fœlicem*, inde *fœlix*, quia verbum Dei custodiuit: non quia in illa verbum caro factum est, sed quia custodit illud ipsum verbum Dei per quod facta est, & quod in illa caro factum est. Homines non gaudeant prole temporali, exultent si spiritu iunguntur Deo. Et alibi: *Beatior fuit Maria percipiendo fidem Christi quā concipiendo carnem Christi*. Materna propinquitas nihil Maria profuisset, nisi *fœlicius Christum corde quam carne gestasset*. Sanctus denique Iulianus in quæstionibus, *non matrem debito honore fraudat Dominus, sed docet qua ex Maternitate virgo sit beatissima*.

I. de sancta
Virg.
c. 2.

q. 535.

Quæ cum omnia propositam valde confirment Veritatem, videſne anime quantum tibi ex Sanctitate boni accedat, qui dum sis sanctus, propior eris Beatæ Virgini quā propinquus eius, cui deesset sanctitas: Imo propior eris ipsi Christo Iesu, quā eius esset Mater, si sancta non esset. O Sanctitatem supra res omnes creatas exoptandam, cū supra Patrem Virginis matris, aut ipsam Dei supra Matrem, qua dignitate nihil sublimius, ipsa tamen Sanctitas præstet & emineat.

Vide in hac 2. parte, Feria 6. post Cineres, vbi de Sanctitate. Et in 3. parte. Die 26. Iulij de sancta Anna.



Die 21.
Martij.

DE SANCTO BENEDICTO

Inter Benedictos benedicetur. Ecclesi. 24.

VERITAS PRACTICA.

Inter benedictos benedicetur, non cui melius omnia: sed qui ex omnibus melior.

SENSVS & RATIO est, quod ex multis qui putantur in

Inter Benedictos benedicetur, non cui melius omnia, &c. 809

*hac vita benedicti, ille est vere benedictus dicendus, non cui
foelicius succedunt omnia, aut qui pluribus abundat bonis,
sed qui rebus aut successu rerum melius utitur.*

*Sed non est melior rerum aut bonorum usus quam si ipse qui ea
recipit, fiat ex eis melior & sanctior.*

*Ergo inter benedictos benedicetur non cui melius omnia, sed qui
ex omnibus melior: sicut ipse sanctus Benedictus.*

I. PUNCTVM.

BVIT Vir vitæ venerabilis, inquit sanctus Gregorius, ^{2. l. Dial.}
^{c. 1.} GRATIA BENEDICTVS ET NOMINE: ab ipso
sua pueritia tempore cor gerens senile: atatem quippe moribus
transiens, nulli voluptati animum dedit, sed dum in hac terra adhuc
esset, quo temporaliter libere uti potuisset, despexit iam quasi aridum
mundum cum flore: qui liberiori genere ex provincia Nursia exortus,
Roma liberalibus literarum studiis traditus fuerat: sed cum in eis mul-
tos ire per abrupta vitiorum cerneret, eum quem quasi in ingressu
mundi posuerat, retraxit pedem, ne si quid de scientia eius attinge-
ret, ipse quoque in immane præcipitium totus iret. Despectis itaque
literarum studiis, relicta domo rebusque patris, soli Deo placere deside-
rans, sanctæ conuersationis habitum quasiuit: Recessit igitur scien-
ter nesciens, & sapienter indoctus. Tum de vita eius & miracu-
lis sanctus ille Doctor toto Dialogorum secundo libro. Sed ex
illis paucis, imo ex solo Nomine cui res respondet, satis super-
que rerum est quæ considerentur.

Quid est enim Gratia BENEDICTVM esse & nomine nisi
tantis donorum coelestium abundare benedictionibus ut per
Antonomasiam & excellentiam præ cæteris BENEDICTVS
sit dicendus! Et certe legi non possunt sine stupore animi, quæ
de sancto Viro tam mira & stupenda referuntur; siue sanctita-
tem vitæ respicias, siue miraculorum multitudinem, siue Or-
dinis quem instituit religiosi præstantiam; Quæ à nobis quidem
fusus in vernacula meditatione descripta sunt. Verum, quod
mihi modo ex omnibus magis admirandum & ad praxim ac-
commodatius venit, non est illa Gratiarum copia, non bono-

rum etiam spiritualium abundantia, nec foelices instituti progressus ordinis : sed rectus & probatus rerum omnium vsus, quo non ad priuatam ille gloriam & singularem nominis commendationem, aut simile aliquod singulare commodum ; sed ad suam sanctitatem, ad communem totius Ecclesiæ prouentum & æternam animarum salutem, quæcumque sibi coelitus donarentur & acciderent, deriuabat. Hoc est reuera benedici ; Hoc est esse *Benedictum Gratia & nomine* : Hoc est quod de sapientia seu de sapientiori Viro scribit Sapiens, *inter Benedictos esse benedictum* ; *NON cui melius omnia fiant & succedant, sed qui ex omnibus fiat melior.*

Ratio præsupponit quod in comperto est, plures Benedictionum reperiri species quibus benedici contingat in hac vita.

If. 3. Sunt enim primo benedictiones quæ dicuntur mundi, seu quæ à mundo & mundanis dantur, cum, vt ait Propheta, *iustificatur impius & iniquus laudatur in iniquitate sua. VAE cum benedixerint vobis homines.* MALEDICAM benedictionibus vestris. Deinde sunt benedictiones terrenæ & temporales de quibus frequens est mentio in Scripturis. Ac denique dicuntur à Domino benedici qui plures vel singulares Gratias ab eo recipiunt siue in suum siue in aliorum vsum ; *hic accipiet benedictionem à Domino*, quasi diceret, non à mundo, non à terra, non ab hominibus, sed à Domino cuius quidem benedictio longe est aliis præferenda, ratione dantis & doni ; Sed tamen nisi recte quis datis donis vtatur,

Pf. 108. quid prodest illi benedictio ? audi Psalmittam : *Et dilexit maledictionem & veniet ei : & noluit benedictionem & elongabitur ab eo. Et induit maledictionem sicut vestimentum, & intrauit sicut aqua in interiora eius, & sicut oleum in ossibus eius.* Putasne sit aliquis qui nolit benedictionem Domini & qui maledictionem diligit ? non aliter est putandus quam qui accepta benedictione abutitur & in maledictionem conuertit, sicut Iudas traditor de quo est totus ille Psalmus.

Non est itaque satis ad veram benedictionem, siue vt quis vere benedictus dicatur, si benedictionem à Domino accipiat, si multa, vel singularia, si rebus abundet, si prosperis gaudeat euentibus : Sed si accepta benedictione & omni rerum abundantia fuerit recte vsus, multi enim benedicti à Domino, sed inter benedictos ille vnus benedicetur, qui cum Diuina Gratia sic bonis dat

Inter benedictos benedicetur, non cui melius omnia, &c. 817
tis bene utitur ut quod est in Scriptura, *Dominus impleat in eo be-* Tob. 7.
nedictionem suam. Inchoata est in aliis benedictio, sed impletur
in recte utentibus.

II. PUNCTVM.

IA M verò, non est melior rerum aut bonorum usus, quam dum
ipse qui bona recipit, fiet ex eis melior & sanctior.

Nam primò, etsi quis non abuteretur bonis in vitium, sed tan-
tum in temporale commodum, quis non videt non hunc esse fi-
nem propter quem sua Deus communicat qui *uniuersa propter* Pr. 16.
semetipsum operatur? Deinde si dixeris id Deo fore gloriosum,
dummodo Deum inde laudes & ames: at quænam eius laus di-
gnior quàm à digniori & meliori animo quem ipse Deus suis be-
nefactis semper prætendit & prouocat quantum in ipso est, ut
ait sanctus Psaltes, *Etenim benedictionem dabit legislator.* Ibunt Ps. 83.
de virute in virtutem. Et Apostolus: *Benedixit nos in omni* Ephes. 1.
benedictione spirituali in cælestibus: ut essemus sancti & immacu-
lati in conspectu eius in Charitate. Videsne finem quem habet
Dominus qui benedicit? Potestne vero esse alius illo melior?
Et quando esset alius finis, deberetne is qui recipit benedictio-
nem, aliud in ea spectare quam quod is spectat qui benedicit?

O quam acurè Sapiens: *Compedes in pedibus, stulto doctrina, &* Ecclesi. 1. 1.
quasi vinculum manuum super manum dextram: Id est, qui nescit
recte uti suis animi dotibus & quibuscumque donis acceptis,
perinde est ac qui pedibus manibusque constrictus, suorum vsu
membrorum priuaretur. Nescit autem illis animi donis recte
uti qui non inde sapientior & melior efficitur.

Quod & paulò antè, Idem Sapiens, sit per auari similitudi- Ibid. 19.
nem luculenter expresserat: *viro cupido & tenaci sine ratione est*
substantia, & homini linido ad quid aurum? Qui sibi nequam est,
cui alij bonus erit? & non iucundabitur in bonis suis. Qui sibi inui-
det, nihil est illo nequius, & hac redditio est malitia illius. Quasi
diceret, hoc est esse tibi malum, non esse bonum ex bonis suis: hoc
est tibi velut inuidere, quando quis mauult parcere suis bonis,
quàm inde tibi benefacere ac prodesse.

III. P V N C T V M.

INTER benedictos igitur benedicetur non cui melius omnia, sed qui ex omnibus melior, qui sic omnibus datis & acceptis recte utetur, ut ex omnibus & singulis sanctior, humilior, ad omne virtutis exercitium paratior, & ut ait Apostolus, *vas sit in honorem sanctificatum, & utile Domino, ad omne opus bonum paratum.* Hoc est non modo benedictionem accipere & implere, sed in ipsam quodammodo transire benedictionem, ut ait Dominus per Prophetam: *Saluabo vos, & eritis benedictio.* Id est, sic inter benedictos benedicimini ut ipsa sitis benedictio, non modo quia plus aliis benedictionis accipietis, sed quia benedictione accepta melius utemini, quando ad vestram salutem & perfectionem, eius usum conuertetis: sic enim sancti & salui facti, verè tunc eritis ipsa benedictio, cuius finis & effectus est sanctitas & salus vestra.

Ps. 117. Ecce sic benedicetur homo qui timet Dominum; qui timet scilicet quod dixit Dominus de his qui suis abutuntur donis: Quia ego dedi ei frumentum & vinum & oleum, & argentum multiplicavi ei, & aurum, quæ fecerunt Baal. Et ibidem: *argentum suum & aurum suum fecerunt sibi idola ut interirent.* Nec non quod dixit Dominus in Euangelio: *omni cui multum datum est, multum quæretur ab eo: & cui commendauerunt multum, plus petent ab eo.* Hoc enim si vere times, sic intentus tibi eris in omnibus, ut quemadmodum accepisti à Domino ut loquaris & agas, sic omnino perficias; sicq; fiet quod precabatur Moses, *Benedictus eris tu ingrediens & egrediens:* id est, vniuersim in omnibus, & singulatim in vnaquaque actione, dum eam inchoando, tu propones cum Gratia quod est perfectius, & finiendo recoles an id effeceris.

Vide in 1. parte, hebdomada 5. post Epiphaniam vbi duabus consequentibus Feriis hæ duæ Veritates proponuntur:

Gratitudo animi nulla formari potest digna beneficio

Vocationis, nisi se animus dignè cōformet Vocationi.

Non est minus perfectæ mortificationis, bene uti rebus, quàm omninò non uti.



IN F E S T O
ANNUNTIATIONIS Die 29.
Marij.
B. MARIÆ VIRGINIS.

QVÆ tribus primis Aduentus hebdomadis propo-
 sitæ sunt Considerationes & Veritates, siue de Mysterio
 Incarnationis, siue de Annuntiatione Mysterij, hûc
 opportunè referri possunt: quibus & nonnullas in pauca
 contractas addimus, quas vnicuique promptum erit
 aliunde latius producere.

DE CVLTV BEATÆ VIRGINIS.

IN PARVIS REBUS.

*Missus est Angelus Gabriel à Deo in ciuitatem Ga-
 lilææ, cui nomen Nazareth, ad Virginem despon-
 satam Viro, cui nomen erat Ioseph, de domo
 David, & nomen Virginis, Maria. LUC. I.*

VERITAS PRACTICA.

Sui quisque cultus ac pietatis in Beatam Virginem, sæpe
 fidem facit maiorem in paruis, quàm in magnis.

*RATIO est, quia maiorem sui cultus ac pietatis fidem is facit,
 qui magis indicat se purè colere Beatam Virginem.*

Sed sæpe id magis indicatur in paruis quàm in magnis.

KKKKK ij

Ergo sui quisque cultus ac pietatis in Beatam Virginem, fidem sæpe maiorem facit in parvis quàm in magnis. Quod præsertim Adolescentibus, aut plebeis viris, aut incipientibus est opportunum.

L. P V N C T V M.



QUID sibi voluit Euangelista, inquit sanctus Bernardus, homilia prima super MISSVS EST, Quid sibi voluit tot propria nomina rerum in hoc loco, tam signanter exprimere? Credo quia noluit nos negligenter audire quod tam diligenter studuit enarrare. Nominat si quidem nuncium qui mittitur, Virginem ad quam mittitur, Sponsum quoque Virginis; amborumque genus, Ciuitatem, ac regionem propriis designat nominibus. Putasne aliquid horum superuacue positum sit? Tum Ille sigillatim de vnoquoque differit. Sanctus vero Petrus Chrysologus sic de his vniuersim: *Locum, tempus, personam, sanctus Euangelista designat, ut relationis Veritas manifestis ipsarum rerum comprobetur indiciis.* Sic enim fit sæpius ut dum minutiora quæque recensentur, apertius innotescat quod narratur, quàm si maiora tantum proferrentur. Adde quod, vbi Mysterium describitur, in quo quæ magna sunt, facta sunt parua: & quæ parua erant, facta sunt magna, conuenientissimum fuit sic parua magnis jungere, ut paruis magna dignitatem conferrent, & magnis parua fidem astruerent. Denique nihil ad cultum Beatæ Virginis designandum aptius, quàm ut intelligamus sic magna esse paruis annectenda, ut neutra sibi præiudicent, sed se vtraque potius iuuent; & magnorum merito, parua nobilitentur: & paruorum numero, magna consistent. Si nostra quidem spectamus debita, nihil tam magnum reddimus quin paruum censei debeat: Si vero dignitatem eius quam colimus, nihil tam paruum est, quod non magnum fiat illius magnitudine. Nullum est itaque genus officij & pietatis omittendum in eius Cultu, quod præstare possimus cum Gratia.

Nec magna suis sumptibus aut difficultatibus nos deterreant; nec parua suis minutiis nos deludant, quasi nihil esset ad cultum & meritum quod in illis præstatur. Illam enim colimus quæ & satis potens est ut magna quæque compenset, & satis benigna

est vt parua quæque respiciat.

Et quia facilius est vnique parua quàm magna præstare, vnde & minus excusabiles sumus, si desimus in his quæ magis possumus; idcirco præcipue in his inuigilandum est, ne quid propositi prætermittamus officij, quantumcumque sit illud exiguum. Imo quo est magis exiguum, minus omittamus, siue quia vt dixi, facilius est factu, siue quia vt dicendum est ex propolita Veritate, magni est meriti. Sicut enim ex paruis illis *Galilæa, Nazareth, sexto mense*, & aliis minutionibus circumstantiis, sacer historicus historiæ suæ fidem apertiore facere dicebatur, sic plane licet ex paruis & quotidianis illis quæ potes reddere, *Tu maiorem fidem præstabis tuæ deuotionis & pietatis in Beatam Virginem, quàm si forte quid maius esset & dignius.*

Ratio quæ assertur iam supra partim aut infra magis agitur, in prima scilicet & tertia parte, locis in fine hic annotatis; vnde hæc pauca in rem præsentem deducuntur. Suæ quisque pietatis in Colendissimam Dei matrem, maiorem facit fidem qui melius & apertius indicat quàm purè illam colat, Id est, vel sincere & ex animo, vel purè propter eius meritum & dignitatem, vel purè propter morum & cordis puritatem, qui certe cultus quocumque horum trium modo sumatur, est excellentissimus & acceptissimus.

Quasi Libanus, inquit, non incisus vaporauit habitationem meam, Ecclesiæ. 24. & quasi balsamum non mixtum odor meus. Quali diceret, Et in me & in meis hoc est quod præferim eminet vt nihil sit mixtum & infectum, sed pura omnia & sincera, *Virgo erat, inquit sanctus Ambrosius, non solum corpore sed etiam mente, quæ nullo doli am-* *L. 2. de Virgin.*
bitu sincerum adulteraret affectum. Nec amare, nec amari: nec quidquam colere, aut à quoquam velle coli, nisi pure & sincere, Hoc est Parthenicum, hoc est Virgineum, hoc est Marianum.

II. PUNCTVM.

SED sæpe id magis indicatur in paruis, quàm in magnis.

Primo quàm purè & sincere, ex animo, & non verborum tenus: Nam illa parua sunt ordinariè magis voluntaria quàm magna; sunt illa quæ idcirco ex Deuotione dicuntur fieri, quia fiunt voluntariè, seu ex propria potius propensione bene affe-

Exod. 35.

etæ voluntatis, quàm ex vlla obligatione vel motiuo extrinsecus aduentante. *Omnis voluntarius & prono animo*, inquit Scriptura, *offerat aurum & argentum & æs, hyacinthum & purpuram, pilos caprarum, pellesque arietum rubricatas.* Id est, siue aurum siue æs offerat, siue purpuram, siue pilos caprearum, quæ certe sunt in se valde diuersa, si tamen voluntario & prono animo offerantur, perinde acceptantur omnia, nisi quod ea quæ magis voluntarie offeruntur, magis etiam placent, quia illa est voluntatis propensio quæ præsertim spectatur. Non est dubium quia si aurum tam propenso daretur animo, sicut æs, aut quid vilius, auri oblatio esset pretiosior, sed quia rara est non modo talis oblatio, sed & talis propensio voluntatis etiam in his qui commodè pretiosa possent offerre; idcirco verè dicitur, in paruis sapius & pene in solis paruis hanc animi pronitatem reperiri, atque propterea sic melius indicari quam purè & sincere ex animo colant Eam cui sic sua deferunt. *Corde perfecto & animo voluntario*, sic vtrumque simul scriptura jungit.

I. Par. 28.

Deinde quod est magis considerandum, cùm parua fideliter fiunt, non magna inde speratur merces, sicut in magnis; non id spectatur, non id attenditur, sed purè Dignitas & Excellentia Sanctissimæ Virginis Matris, quæ tanti est meriti, vt posse illi seruire, censeri debeat acceptum potius beneficium quàm officium persolutum: quod certe est purè illam colere, purè propter eius Dignitatem & meritum, cui licet valde impar & longe inferius sic illud paruum quod præstatur, quia tamen pure præstatur propter eius Celsitudinem, ab illa puritate haurit quod à paruitate deesse poterat. *Offeret vnusquisque secundum quod habuerit iuxta benedictionem Domini Dei sui, quam dederit ei.* Quidquid datur, purè detur propter eius excellentiam cui datur, sic excelleret omnibus donis.

Deut. 16.

Denique cùm nullus sit Virginis Cultor qui non audierit in seruanda cordis & corporis puritate cultum eius præcipue situm esse, quis nescit illam cordis & corporis puritatem tanto magis indicari, quanto minora erunt quæ propterea curabuntur? Quis è duobus purior & sanctior: aut qui ne primas quidem occurrentis vitij species quantumcumque leues ferre possit quin expugnet: aut qui solum illud quod est in vitio grauius caueat?

Ecl. 10.

Musca morientes perdunt suauitatem vnguenti. O præclare dictum

à Sapiante ! quantumcumque suaves & acceptæ sint illæ preces quæ offeruntur, si tamen ab impuro corde offerantur, perit eorum suauitas; Tanti refert cor illi purum seruare ! tanti refert primis & modicis inuigilare cordis motibus ubi tota consistit puritas !

III. PVNCTVM.

SIC igitur *sui quisque cultus ac pietatis in Beatam Virginem, sape fidem facit maiorem in paruis quàm in magnis rebus*, quia sic indicat se purius illam colere, in qua Cultus puritate tota versatur pieras quæ tantæ Dignitati & Bonitati debetur. *Accipite, inquit, Prou. 8. disciplinam meam, & non pecuniam : doctrinam magis quàm aurum eligit.* Quasi diceret, si quid mihi vultis offerre gratum & acceptum, nolite laborare in conquirendis exquisitis & pretiosis rebus, obuias & quotidianas prout edocemini, prout scitis & potestis, malim mihi à vobis præsentari. Sicut & à me non expectetis temporales diuitias & humanas illas dotes quibus inhiare solet naturalis cupiditas. Meo vos exemplo doceo, & quid petere, & quid dare debeatis. In paruis æque versata sum ac in magnis; Et quidquid in me fuerit magni, non ita magnitudinem meam sicut humilitatem & paruitatem, respexit Deus. *Dum esset Cant. 1. Rex in accubitu suo, nardus mea dedit odorem suum.* Id est, humilitate & exilitate mea potius attractus est ille Rex regum, quàm vlla virtute alia. Hæc est disciplina mea, hæc vitæ ratio quam tenui, vt semper parua magnificerem; & hæc est doctrina quam profiteor vt qui meus esse velit, hanc sequatur. *Si quis est paruulus ve- Prou. 9. niat ad me. NVNC autem filij audite me. Beati qui custodiunt vias meas, audite disciplinam, & estote Sapientes, & nolite abjicere eam.* 8.

Mirum certe quod Sponsa Sponso poma offerat & similes *Cant. 5.* quosdam vulgares fructus; quæ vt manifestius videas spectare ad Sanctissimam nostram Virginem, recordare quod alias ex sancto Ambrosio commemoratum est; quod illa quanta quanta *L. 2. de Virgin.* esset, se tamen pauperum precibus commendabat, & in eorum prece tantum ponebat quantum in diuitiis diuites huius sæculi. Potestne iam dubitare quin illi parua placeant: aut si non dubitas, potestne illi recusare? Et tamen in quantis parcus es & avarus, Quàm multis otiosis verbis abstinere posses, in eius cultū? Quàm multis cupiditatum motibus? Quàm multis mundanis & sæcula-

ribus nugis? Non commemoro positiuos quos vocant pietatis actus, qui multi parui & quotidiani possent exerceri, sed negatiuos illos vrgeo qui videntur actu minores, qui tamen merito ac beneplacito sunt maiores. Nam illa sunt quæ tam libenter recipit optima Parens nostra, quàm vehementer optat nostram salutem, quæ ex his negatiuis actibus magis pendet quam aliis.

Ecclesi. 14. *Qui operantur in me, inquit, non peccabunt, qui mihi colendæ vacant, qui mihi suo velint placere cultu, si me audiunt, non peccabunt, si mihi vere velint placere, hoc vno quod volunt agent, si non peccent, si se ab omni specie mala quantumuis leui, contineant.*

Vide in 1. parte, Feriam 6. infra hebdomadam sextam post Epiph. Et in 3. parte, Feriam quintam infra hebdomad. 8. post Pentecosten. Et in Festis B. Virginis.

DE SANCTITATE BEATIS-
SIMÆ VIRGINIS
UNICVIQUE MAGIS PROPONENDA.

Et ingressus Angelus ad Eam dixit: Ave Gratia plena: Dominus tecum: Benedicta tu in mulieribus. Luc. 1.

VERITAS PRACTICA.

Quod cuique magis ex Virgine Matre proponi debet, est eius Sanctitas: non quàm sit sancta, sed quàm tota sit sancta.

SENSVS & RATIO est, quia quod magis simul promouet maiorem Virginis gloriam, & nostram spiritualem utilitatem, illud est quod cuique magis ex Virgine proponi debet. Sed eius sanctitas sic proposita, ut non ita quàm sancta sit, quàm quod

Quod cuique magis ex Virgine proponere debet, est eius, &c. 819

quod tota sit sancta spectetur, magis simul promouet maiorem
Virginis gloriam, & nostram spirituales utilitatem.

Ergo illud est quod cuique magis ex Virgine Matre proponi de-
bet; omnibus quidem Christianis sed præsertim proficientibus
& perfectis.

I. PUNCTVM.

IGNARI viarum viatores si forte incidissent in triuium:
ne aberrarent longius, erant olim appositæ quædam sta-
tuæ seu acervi lapidum qui dicebantur Mercurij, vnde
vnaquæque via designabatur: cuius saltem nominis mentionem Prov. 26.
facit Sapiens in Prouerbiis. Sic opportunè dici posset Cœlestis
Nuncius iam nobis repræsentari, vt tanta in diuersitate rerum
quæ occurrunt tractandæ, determinetur nobis quid aptius &
quid tutius quò tendamus. *Aue*, inquit, *Gratia plena*. Quàm
multa præferri poterant in Eius quam salutabat laudem & glo-
riam? sed nihil aptius, nihil sublimius, nihil vtilius quàm vt eius
Sanctitas quæ est ipsa Gratiæ plenitudo, nobis proponatur,
siue ad Cultum, siue ad Imitationem huius sanctissimæ Virginis
Matris. Quod vt apertius patefiat, in hoc est posita Veritas modo
expendenda, & Veritatem Ratio sic demonstrat.

Quod magis simul promouet maiorem Virginis gloriam, &
nostram spirituales utilitatem, illud est quod cuique magis ex
Virgine proponi debet. Non alterum sine altero; neque nostra
sola spectetur utilitas, neque sola illius Gloria, quia vix aliter
commodius alterutrum promoueri potest quam si simul indiui-
sim proponatur. Quæ est enim nostra utilitas siue illius Glo-
ria? Aut quam apud nos consequetur gloriam, nisi quales illa
nos optat & procurat, efficiamur, aut effici studeamus? *Gaudium* Phil. 4.
meum & corona mea, dicebat Apostolus suis Philippensibus. Et
rursum aliis explicatius: *Quæ est enim nostra spes, aut gaudium, aut* 1. Thess. 2.
corona glorie? Nonne vos ante D. N. Iesum Christum? vos estis glo-
ria nostra & gaudium.

Certe nisi Paulus iam fuisset sic à Christo glorificatus vt exi-
mius esset Apostolus, nec Philippenses, nec Thessalonicenses
aut alij quibus prædicabat, tantam ex eo prædicante percepis-

sent vtilitatem; Et nifi multum hi ex Apostolo profeciffent, non tanta fuiffet Apostoli gloria, vnde manifefte pater quantum fe illa duo inuicem iuuent & promoueant.

Quod in Beata Virgine tanto potiozem habere locum neceffe eft affirmare, quanto nobis arctius intercedit cum illa vinculum eorum omnium quæ ad salutem fpectant. Illius gloria, noftra eft vtilitas; & noftra vtilitas, illius eft gloria. Quantò enim excellentiozem eam efle & fublimiozem audiuimus, tantò erit & Cultus nofter, & animus totus in illam propenfior; quantòque hæc noftra propenfio magis religiosa fuerit, tanto & Illa in nos effunderetur fplendidiùs. *Murenulas aureas faciemus tibi verniculatas argento.* Non vna tantum fed duæ fint oportet fimul ex vtraque parte pendent murenulæ, quæ quidem funt aureæ ex Virginis merito, & verniculatæ argento, ex noftra vtilitate fimul junctæ. *Flos eft campi & lilium conuallium,* ad vtilitatem fcilicet & eorum omnium opportunitatem qui ea velint vti.

Ibid. Illa eft quæ petit *fulciri floribus, & ftipari malis;* quafi diceret, fe florere nolle nifi fimul tructificet. Illa eft cui fic dilectus loquitur, *surge, propera amica mea, columba mea, formofa mea.* Nempe amica ex merito fuo, columba ex noftra vtilitate, & inde ex vtroque pulchra & formofa. Tùm quod fubiungitur, quàm apte & cohærenter! *ostende mihi faciem tuam, sonet vox tua in auribus meis; vox enim tua dulcis, & facies tua decora:* Nempe ad eius meritum cognoscendum defideratur facies; & ad vtilitatem hauriendam vox & fermo petitur.

Sic euolui poffent quæcumque in Canticis de illa referuntur fymbola, in quibus illa duo fic fimul junctæ, mutuam fibi feruant fidem, vt quod Deus fic coniunxit, nefas fit hominem feperare.

II. PUNCTVM.

SED eius Sanctitas fic propofita, vt non ita quàm sancta fit, quàm quod tota fit sancta, fpectetur, magis fimul promouet maiorem Virginis gloriam, & noftram fpiritualem vtilitatem.

Primo quidem quod Sanctitas quæ omnes internas gratias, & omnes externos virtutum actus comprehendit quàm longe fuperet dignitate & merito quafcunque alias animi feu corporis dotes, atque ipfius etiam Maternitatis eminentiffimam dignita-

tem, vide & recole quæ in Conceptionis festo & de S. Ioachimo relata sunt. *Gratia super gratiam mulier sancta & pudorata.* Dic Ecclesi. 26. quicquid voles de Virgine Matre, nisi dixeris eam sanctam, nihil dicis ad eius gloriam, quia quæcumque anima fuerit illa sanctior, erit & gloriosior, nam gloria in sanctitate est, *Magnificentia* Ps. 95. *in Sanctificatione eius.* *MAGNIFICENTIAM gloria sanctitatis tuæ* Ps. 144. *loquentur.* Hoc est quod in Cœlo à primoribus Angelis de Deo celebratur magnificentius: *Sanctus, Sanctus, Sanctus, Dominus.* Is. 6. Hoc est quod de Christo commendatur singularius, *Sanctus san-* Dan. 9. *ctorum.* *QVOD nascetur ex te sanctum, filius Dei vocabitur.* Hoc Luc. est quod de nostra Virgine primum & præcipuum commemorat Angelus, *Aue Gratiaplena,* Gratia illa omni videlicet quæ & sanctificans dicitur, & qua sanctificatio perficitur, qua qui abundat plenius, eo est sanctior, & quo est sanctior, eo est Deo propior & gloriosior. *Qui sanctus est sanctificetur adhuc,* nam sanctitati præ- Apoc. 22. cise adæquatur Beatitudo & Gloria.

De Sanctitate porro seu Gratia Beatissimæ Virginis cogitare volenti aut dicere, tria essent distincte proponenda, nempe qualitas, quantitas & plenitudo. Qualitas eius est, superioris cuiusdam ordinis supra omnes alias gratias tam excellens. ut minimus eius gradus excellat supremo gradui cæterarum, *omne desiderabile, ei non potest comparari.* Pr. 3. Quantitas vero talis, quæ respondeat Dignitati Matris quæ cum aliquo modo sit infinita, ut ait sanctus r. p. 9. 25. Thomas, sic Gratia & Sanctitas non nisi abyssus inscrutabilis, a. 6. & immensum quoddam mare dici potest; vnde hæc sunt præclara S. Augustini: *Maria dignitatis & gratia effectum, nec cor concipere, nec lingua valet exprimere. Ineffabilem enim sanctificationis gratiam quam Concipiendus præbuit, conceptus & natus non abstulit, sed auxit: quæ quantum in corpore valuerit Virginis, illi soli notissimum est, qui de eius natura naturam suscepit quam condidit.* Opusc. de Assumpt. Virginis.

Plenitudo denique hoc quantitati & qualitati addit, ut nulla fuerit animæ facultas, nulla pars corporis, nulla vitæ actio, nulla vno verbo res capax Sanctitatis, quæ ad sanctam spectauit Virginem, cui non infusa fuerit Sanctitas tam constanter & effuse ut nihil nisi sanctum toto vitæ decursu egerit, dixerit, cogitarit. *Tota pulchra es amica mea & macula non est in te; Nihil prorsus* Can. 4. *inordinatum. Sanctificauit tabernaculum suum Altissimus, Deus in* Ps. 45. *medio eius non commovebitur.* In medio eius, id est, in corde vnde

cæteri vitæ actus emanent & sancti fint. Vel potius in medio cuiuscumque eius actionis vt eam dirigat, purificet & omni Sanctitate repleat; *Non commouebitur*, id est, numquam inde recedet, numquam deficiet, sancta vbique & semper in omnibus sicut ipse Deus, non natura sua, sed gratia diuinitus communicata & conseruata: de cuius plenitudine quomodo à cæteris differat, vide in sequenti discursu.

Hoc est autem quod in sanctitatis gloria dico eximium, hoc est vel maxime quod de sancta Virgine gloriosum commendatur, non tam præcise quod sit sancta qualibet qualitate aut quantitate sanctitatis, quàm quod sit tota sancta, quàm quod nihil profus defuerit ad talem sanctitatem quæ maternitati Diuinæ competebar, nihil prorsus in vita eius vacuum & inane fuerit quod non sanctitas & Gratia totum impleuerit & meritis cumularit. *Et Dominus erat cum ea, & non cecidit ex omnibus verbis eius in terram.*

At quantumcumque sublimis & singularis fuisset eius Gratia, si quo in actu vitæ Virginalis defuisset, si qua in parte corporis, si quo in motu cordis defecisset, apparuisset lacuna & macula, nec tota pulchra & sancta fuisset, quod sane de eius gloria multum detraheret. Nunc vero cum dicitur plena, nihil lacunosum, nihil infectum, nihil inane, nihil naturale, nihil ne humanum quidem cogitatur, sed totum spirituale, totum cœleste, totum Diuinum. Quæ certe laus, laudis ipsius est gloria, seu ipsius corona gloriæ, id est, extremum quo humana Creatura possit ascendere.

Sicut aurum quantò est purius, tanto est pretiosius, sicut Angelus quanto magis est incorporeus, eo magis est spiritus & excellentioris naturæ, sicut & ipse Deus quanto est simplicior, & ab omni corpore, seu accidente remotior, tanto est in sua natura perfectior; Sic plane de quouis homine cuius perfectio est quam proxime ad Angelos aut ad ipsum Deum accedere, tantò magis eò promouetur, quanto magis totus euadit spiritualis, *non permutatione sua corporalis substantia, sed mutatione vitæ & morum*, vt ait S. Paulinus in illud Apostoli, *In carne non estis, sed in spiritu.*

Ep. 77. Hoc laboramus errore, inquit præclare Seneca, sic nobis imponitur quod neminem æstimamus. Eo quo est, sed adjicimus illi ea quibus adornatus est. At qui cum voles veram hominis æstimationem intrare

& scire qualis sit, nudum inspicere, ponat patrimonium, ponat honores, & alia fortuna mendacia, corpus ipsum exuat, animum intueri, qualis quantusque sit, alieno an suo magnus. Nos vero in sublimiore instituti schola, dicamus etiam, animum ipsum quodammodo exuendum esse, quantum quidem ad naturalem spectat statum & ordinem, inspiciendus est qualis quantusque sit in supernaturali statu & ordine, & tantò demum erit magis æstimandus & prædicandus, quanto magis in eo purius & sincerius erit statu, nulla ut rei cuiusquam inferioris permixtione deprauetur.

Sic autem perfecte pura & rota spiritualis dicitur sancta Virgo, cum plena Gratia dicitur, quasi diceretur nihil in ea posse aliud inueniri quod non in Gratiam transierit, quod non in se Gratia transmutaret, sicut ignis ferrum sic ignefacit ut non ferri quidem naturam destruat, sed suas illi qualitates ita communiceret ut in ignem ferrum transiuisse videatur.

Hoc probe intellexit sanctus Ambrosius cum explicaret illa verba sancti Ioannis de Beatissima Virgine Matre sibi à Domino data in matrem, *Et accepit eam discipulus in sua.* Quid est, inquit, in sua, cum reliquerit patrem & Christum sequutus sit: aut quomodo in sua, cum ipsi Apostoli dixerint, *Ecce nos reliquimus omnia & secuti sumus te?* Quæ sua habebat Ioannes qui mundana & secularia non habebat quia de mundo non erat? Bonus verbi sapientieque possessor, bonus præceptor gratiæ. Audite quæ Apostoli à Christo acceperunt, *Accipite, inquit Spiritum sanctum.* Neque enim mater Domini Iesu, nisi ad possessionem gratiæ demigrarit, ubi Christum habebat habitaculum. Hæc Ambrosius doctè & acutè; ait Cardinalis Toletus, *Beata enim Virgo inter spiritualia bona maxime putatur* In exhort. ad Virgin. *quæ Apostoli non reliquerunt, sed acceperunt; In temporalibus pauperissimi, sed in spiritualibus ditissimi.* In Ioan.

O qui sciret pretium gratiæ, o qui sciret longam illam & prope infinitam distantiam quæ intercedit inter naturæ opus & gratiæ: quantum illud superet in Virgine Matre, quod nullum nisi opus gratiæ toto in vitæ decursu ediderit: & quantum in cæteris hominibus miraretur, quod vix vllum eorum opus sit gratiæ, vix vllum quod naturæ non sit & naturæ corruptæ!

SVPEREST ut de spiritualli nostra vtilitate inde potissimum permanente consideremus. Quod quidem erit facillimum

agnoscere si duo hæc principia satis per se nota præsupponas. Primum est, ad spirituales profectum in primis valere solidum cultum & sinceram pietatem in Beatissimam Virginem, cui hæc propterea Sapientiæ voces communi totius Ecclesiæ sensu conueniunt, *Qui me inuenerit, inueniet vitam, & hauriet salutem à Domina. IN me gratia omnis via & veritatis: In me omnis spes vite & virtutis.* Qua de re infra fusius. Alterum est, hunc solidum cultum & sinceram pietatem non posse melius institui quam si pro nostra quique vacatione studeamus illam imitari, sicut Ipsa nos inuitat, *Beati qui custodiunt vias meas,* & sanctus Bernardus expresse monet; *ut impetres eius orationis suffragium, non deferas conuersationis exemplum.*

Prou. 8.
Ecclesi. 21.

Prou. 8.
Serm. 2.
super mis-
sus.

Quibus sic præsuppositis, nihil ad Imitationem aptius aut conuenientius proponi potest quam illa sanctitatis plenitudo sic declarata, per omnes vitæ degendæ partes. Quid enim imitemur in eius Gratia qualitate vel quantitate quâ nulli hominum aut Angelorum fas est non modo adæquare, sed nec æmulari? At vero plenitudinem eius sanctitatis & gratiæ sic possumus & debemus imitari, ut secundum gratiam nobis communicatam non vni aut alteri solum virtuti vacemus, sed omnibus vniuersim. Nec aliquibus duntaxat virtutum actibus aut aliquo tantum tempore, vel loco, vel motiuo, sed vbiq; semper, & eodem quo illa fine ac proposito, intendamus, inuigilemus, in senescamus, & immoriamur vniuersæ virtutis studio, nulla ut prorsus ex parte

Ecclesi. 14. *defraudemur à die bona; & particula boni doni nos non pratereat.*

Hoc est eam imitari, hoc est illi esse addictum, hoc est illi esse carum; hoc est in via esse ad profectum, hoc est impleri in omnem plenitudinem Dei, quod optabat Apostolus, id est, quantum ipse Deus velit; Hoc est quod aiebat S. Bernardus, *ne deferas eius Conuersationis exemplum.* Non dicit eius Contemplationis, non eius Zeli & ardentissimæ Charitatis, quæ forte essent sublimiora, sed *Conuersationis.* Id est, rerum in tuo vitæ statu agendarum spirituales industriam, nihil ut agatur perperam, improuide, negligenter, otiosè; sed omnia honeste, ordinate; in spiritu, ex virtute & ratione superiori; Quid iustius? Quid rationabilius? Sed expendenda sunt sancti Abbatis verba, *ne deferas eius exemplum.* Id est, vbiq; semper, in omnibus. In hoc enim vno sita est plenitudo gratiæ ut ad omnia se extendat ne

Ephes. 3.

Quod cuique magis ex Virgine proponi debet, est eius, &c. 825

cuiquam nostrum dicatur: *Non inuenio opera tua plena coram Deo* ^{Apoc. 3.}
meo: Sed potius, *Consummatus in breui, expleuit tempora multa,* ^{Sap. 4.}
placita enim erat Deo anima illius. Certe si est placita Virgini, erit
& Deo: placebit vero Virgini si Virginitatem illam quæ est
actionum integritas seruet, sicque non recedet ab eius Conuer-
sationis exemplo.

III. P V N C T V M.

SI Cergo quod cuique magis ex Virgine Matre proponi debet, est
Seius Sanctitas, non sic quidem proposita, vt qualis quantaque
fuerit, subtilius enarretur, sed quam fuerit integra, plena & per-
fecta, non in habitu solo, sed in actu simul & opere, seu potius
in tot gratiæ & Sanctitatis actibus quot eius vitæ fluxerunt dies,
quot fuerunt horæ, & momenta, quibus omnibus & singulis
præsidebat gratia, dominabatur virtus, & imperabat Sanctitas.
Considerauit semitas domus suæ, & panem otiosa non comedit.

^{Pr. 31.}

Sic enim primo intelligetur quàm fuerit digna Mater Dei, quo
vno Titulo quidquid ad eius gloriam dici potest, continetur.
Deinde vero, quod aliud est in his nostris quærendum exercita-
tionibus, apparebit quid fructus inde colligi, quid spiritualis
emolumenti possit in vitam & mores redundare. Nam quando
hoc vnum esset, quòd omiſſis cæteris quæ humana sunt & natu-
ralia, de Virgine Matre hoc vel maximè prædicatur, quòd sit
sancta, quod sit expers omnis culpæ, & totius Virtutis Domina,
quod vnum hoc in toto vitæ decursu agat, vt bene in omnibus
agat: certe sit euident, quid sit in rebus verè boni aut mali: &
quàm longe fallantur homines *qui dicunt malum, bonum: & bo-* ^{1. 5.}
num malum. Quis enim dubitet, si hæc diuitiæ & deliciæ quæ in
præcipuis ponuntur bonis, vere essent bona, quin eorum partem
bonorum non contemnendam Christus communicasset Matri?
Aut si paupertas tale esset malum quale sibi fingunt homines, cur
malum hoc non auertisset à suis Deus! Nunc vero cùm vnum
malum quod est peccatum à sacra Virgine Deus auocarit; & in
eam, vnum bonum quod est Gratia siue Sanctitas, plena manu
congeſſerit: Quis non discat aliter de rebus iudicare quàm mun-
dus iudicet: & de bono ac malo sentire aliter quàm Caro sen-
tiat?

If. 7.

Hoc autem qui perfecte didicerit, atque in quotidianam praxim adduxerit, nã is proficiet & iam multum profecerit, cum is Incarnandi Verbi præcipuus finis fuerit. Hoc est scilicet quod Propheta prædixit: *Ecce Virgo concipiet, & pariet filium, & vocabitur nomen eius Emmanuel: Butyrum & mel comedet ut sciat reprobare malum, & eligere bonum.* Id est, sic nobiscum erit Deus, in illo Virginis filio, ut ille Virginis filius sit simul Deus & homo. Atque ut appareat manifestius quod naturale & humanum corpus habeat, nutrietur & crescet illis alimentis quæ infantibus in Iudea subministrantur. Et sicut dum erit infans, ipso gustu sciet quid sit bonum & suaue palato, vel quid malum & amarum: ita per hanc ipsam experimentalem scientiam cognoscet, & procedente ætate cognoscendum mundo dabit, quid sit in aliis rebus omnibus verè bonum & malum. Nam hoc ipso quo ex malis omnibus, in se & in matre sua, solum peccatum reprobabit, hoc solum esse malum docebit. Et dum ex omnibus bonis, sola illa quæ sunt spiritualia & diuina sibi & matri præliget, hæc sola verè esse bona, declarabit. O verè Arborem scientiæ boni & mali, reparatricem funestæ illius quæ primum delusit hominem.

Serm. 143.

Atque hinc forte dictum à sancto Petro Chrysologo de illa Virginis gratia: *Hæc est gratia quæ dedit cælis gloriam, terris Deum, fidem gentibus, finem vitis, vita ordinem, moribus disciplinam.* Nempe ut si velimus, sic possimus ordinare vitam. Atque ut velimus, hoc vnum nobis in colenda & imitanda Virgine proponamus: hoc vno nos ab illa diligendos & in spiritua-lem nostrum profectum dirigendos cogitemus, sicque illi ex intimo dicamus corde. *Trahe me: post te curremus in odorem unguentorum tuorum.*

Tand. I.

DE NECESSITATE VIRGINIS MATRIS AD SALUTEM.

Ecce concipies in utero, & paries filium. Luc. I.

VERITAS

Non tam sibi quàm nobis, Christus elegit Matrem. 827

VERITAS PRACTICA.

Non tam sibi quam nobis, Christus elegit Matrem.

SENSVS & RATIO est, quod si non ita erat necessaria Christo mater vt esset Saluator noster, quàm necessaria nobis est vt salui simus: Verè dici potest, quod non tam sibi quam nobis, Christus elegit matrem.

Sed non ita erat necessaria Christo mater, ac nobis.

Ergo non tam sibi quam nobis, Christus elegit matrem: unde profecto constabit quantum illi debeamus Matri.

IN PUNCTVM.

ELECTIONIS Angelicæ hoc erat præcipuum caput, vt dùm intelligeret Virgo se electam in filij Dei matrem, huic Electioni consentiret, & mox Verbum in ea Caro fieret. *Virgo regia Davidica stirpis eligitur, inquit sanctus Leo, quæ sacro grauidanda fœtu, diuinam humanamque prolem prius conciperet mente, quàm corpore. Et ne superni ignara consilij ad inusitatos paueret effectus, sic enim aptius videtur legendum quàm, affatus, quod in ea operandum erat à Spiritu sancto, colloquio discit angelico. Nec damnum credit pudoris, Dei Genitrix mox futura. Recte autem & acutè sanctus Petrus Chrysologus, ad hæc Angeli verba; Ecce concipies in utero: PROPTER reuerentiam dixisse suffecerat, CONCIPIES: quod exaggerat IN VTERO, quid est? Vt Conceptus esset Veritas non figura: vt partus esset proprietas non imago: vt sicut de Deo vero, Deus verus natus est, sic de vero conceptu, veritas humani corporis nasceretur. In ortu Christi, fratres, humani corporis iniuria sublata est, non natura, nec est creatura deleta, sed culpa damnata. Est ergo hæresis quæ Christum ærëum corpus assumpsisse mentitur, nec habuisse carnem, sed hominem simulasse confingit.* Serm. i. de Natiuit. Dom.

At quis non miretur sic carnem de carne Deum assumpsisse? quis non obtupescat sic Deum esse factum infantem in utero Virginis? sic Deum voluisse in terris habere matrem qui solum

in coelis habebat Patrem! Sunt hæc certe stupenda, sed posito quod Deus esse vellet homo, non minus forte mirum, nec minus expendendum, *Quod non tam sibi quam nobis suam elegit Matrem.* Hoc certe ad praxim de necessario nobis illius Matris subsidio agnoscendo & demerendo, plurimum facit.

Sic autem aperte declaratur proposita Veritas, vt quod primo præmittitur non sit pluribus illustrandum. Quid enim clarius ex ipsis terminis, quàm si non ita erat necessaria Christo mater vt esset Saluator noster, quàm necessaria nobis est vt salui simus per ipsum Christum, vere dici possit quod non tam sibi quàm nobis elegerit in suam matrem? Nihil de certa necessitate hic agitur; sed ex hypothesi post declaranda, quod nobis magis necessaria fuerit quam Christo mater, nonne euidenter illud infertur, quod non ergo tam sibi quam nobis illam elegit matrem?

Nonne sic ratiocinatur Apostolus cum dicit Philippensibus se quidem aliquando ignorasse quid eligeret, an mori & esse cum Christo, an diutius viuere propter ipsos; hoc tamen potius elegisse, *quia, inquit, permanere in carne, necessarium propter vos.* Quasi diceret, si iam viuo, non tam mihi quàm vobis viuo, quia vobis est magis necessarium quàm mihi, vt viuam longius. O eximiam Apostoli Charitatem, qui cum in corpore velut in carcere se constrictum sentiret, maluit tamen sic viuere quàm dissolui, quia sic videbat suis esse oportunum! Sed quam longe hanc etiam superat Charitas Christi Iesu, Qui nostri causa, non in suo tantum sed in materno corpore sic constringi voluit quocæteri modo infantes constringuntur! Vide in Aduentu, hebdomada 3.

II. PUNCTVM.

SED non ita erat necessaria Christo mater, vt esset Saluator noster, quàm necessaria nobis est vt salui simus.

Ne quidem erat necessarium Deo fieri hominem, vt nos saluaret; cum multæ aliæ suppeterent viæ quibus id potuisset, sed quia sic erat conuenientius *sananda nostra miseria*, vt ait sanctus Augustinus, Homo fieri voluit. Iam vero vt homo esset, satis illi erat habere corpus humanum quale habent cæteri homines; neque ad hoc habendum corpus, magis ei erat necessaria mater

quàm Adamo & Eux qui duo primi progenitores nostri, vere corpus humanū habuerunt sine vlla Matre. Sic expresse sanctus Thomas, vnde quod matrem habuerit, alias oportet esse causas, ^{ibid. q. 31}
in quibus illa recenseretur non postrema, quòd sic nobis magis expediret, essetque ita necessarium vt vix alioquin sine illa Matre salui esse possemus. Non quod Christus ex se non sufficiat, non quod aliunde sine illo possit salus comparari: sed propter Rationem iam supra ex parte productam in prima parte, Feria sexta primæ Aduentus hebdomadæ, vbi quod de perseverantiæ dono dicitur, debet ad alias actuales transferri gratias, sicque vltorius declarari potest quàm sit nobis necessarium tantæ Matris patrociniū ad salutem.

Cum enim nulla sit salus post mortale peccatum nisi peccator per seriam poenitentiam relipiscat: Ad hanc autem poenitentiam ferio instituendam tanto sit opus maioribus gratiis & auxiliis, quantò peccator grauioribus oneratur peccatis: sit vero Diuinæ iustitiæ & æquitatis in pœnam præcipuè Recidui & toties reperiti peccati, denegare peccatori robustiores illas gratias quas accepisset, nisi Spiritum sanctum sua peruicacia contristasset; quo tandem modo & ratione peccator saluabitur nisi quis diuinam illam mitiget & flectat iustitiam? *Si iustus vix saluabitur, impius & peccator vbi parebunt?* ^{1. Pet. 4.}

Ne dicas, vt monet Sapiens, Misericordia Domini magna est, multitudinis peccatorum meorum miserebitur: misericordia enim & ira ab illo citò proximant, & in peccatores respicit ira illius. Nec dicas etiam Christum pro te passum, ea tibi meruisse quibus redires in gratiam, & salutem consequeris. Nam quas ille tibi gratias promeruit & obtinuit, tu toties neglexisti & conculcasti, vt iam in pœnam sic contemptæ gratiæ sanguis ille pro te fusus contra te clamet vindictam, & qui erat Redemptor tuus si redemptionis gratiæ & beneficio respondisses, factus sit aduersarius & Iudex tuus; qui talentum reposcat, & non habentem pu- ^{Math. 25.}
niet; qui seruum inutilem mittat in tenebras exteriores; qui dimissum debitum ab eo reuocet qui sibi debita non remittat; qui ^{18.}
violentem se regnare super se præcipiat coram interfici; qui denique statuatur hædum à sinistris suis & dicat ei, Ito maledicte in ignem æternum. ^{Luc 19.}
^{Math. 25.}

Voluntarie enim peccantibus nobis post acceptam notitiam Veritatis, ^{Hebr. 10.}

iam non relinquitur pro peccatis hofia; terribilis autem quadam ex-
pectatio iudicij, & ignis amulatio qua conſumptura eſt aduerſarios.
Irritam quis faciens legem Moysi, ſine vlla miſeratione duobus aut
tribus teſtibus moritur, quanto magis putatis deteriora mereri ſup-
plicia qui filium Dei conculcauerit, & ſanguinem teſtamenti pollu-
tum duxerit in quo ſanctificatus eſt, & ſpiritu gratiæ contumeliam
fecerit? Scimus enim qui dixit, mihi vindicta, & ego retribuam. Et
iterum, quia iudicabit Dominus populum ſuum. Horrendum eſt inci-
dere in manus Dei viuentis.

De verbis
Apoc. ſi-
gnum ma-
gnum.

Hæc ad verbum Apoſtolus, ex quibus videas ſic ſtante miſero
rerum tuarum ſtatu, quàm ſit opportunum aliquod & neceſſa-
rium ſubſidium quo Diuina concilietur iuſtitia. Hoc autem eſſe
dicitur Beatiffima Virgo mater, quæ pro materna ſua benigni-
tate peccatorem ad ſe recurrentem excipiat, & pro ſua poteſta-
te Filium exoret, & nobis abunde impetret quod numquam
niſi à matre Chriſtus exoratus, conceſſiſſet. Sic paſſim ſancti
Patres quos ſupra memorato loco retulimus, quibus hæc addi
poſſunt egregia ſancti Bernardi: Vehementer quidem nobis, dilectiſ-
ſimi, vir vnus & mulier vnâ nocuere: ſed gratias Deo, per vnum ni-
hilominus virum & mulierem vnâ, omnia reſtaurantur, nec ſine
magno ſœnore gratiarum. Et poſt pauca: Et quidem ſufficere pote-
rat Chriſtus, ſi quidem & nunc omnis ſufficientia noſtra ex eo eſt, ſed
nobis bonum non erat, eſſe hominem ſolum. Congruum magis, vt adeſ-
ſet noſtræ reparationi ſexus vterque, quorum corruptioni neuter de-
ſuiſſet. Fidelis planè & potens Mediator Dei & hominum homo Chri-
ſtus, ſed diuinam in eo reuerentur homines maiestatem. Abſorpta vi-
detur in deitatem humanitas, non quod mutata ſit ſubſtantia, ſed af-
fectio deificata. Valde notanda verba. Non ſola illi cantatur miſeri-
cordia, cantatur pariter & iudicium, quia etſi didicit ex his qua paſ-
ſus eſt compaſſionem vt miſericors fieret, habet tamen & iudiciariam
poteſtatem. Denique Deus noſter ignis conſumens eſt: quidni vereatur
peccator accedere, ne quemadmodum fuit cera à facie ignis, ſic percat
ipſe à facie Dei. Opus eſt mediatore ad mediatorem iſtum, nec alter no-
bis vtilior quam Maria. Quid ad Mariam accedere trepidet humana
fragilitas? Nihil aſterum in ea, nihil terribile, tota ſuauiſ eſt, omni-
bus offerens lac & lanam. Reuolue diligentius Euangelica hiſtoria ſe-
riem vniuerſam, & ſi quid forte increpatorium, ſi quid durum, ſi
quod denique ſignum vel tenuis indignationis occurrerit in Maria, de

Non tam sibi quam nobis, Christus elegit matrem. [83]

cetero suspectam habeas, & accedere verearis. Quod si, ut verè sunt, plena magis omnia pietatis & gratiae, plena mansuetudinis & misericordiae, quae ad eam pertinent, inueneris: age gratias ei qui talem tibi Mediatricem benignissima miseratione prouidit, in qua nihil possit esse suspectum. Et quæ plura ibi tuse pergit.

Tum verò etiam fusius in proxime consequenti discursu, vnde hæc pauca quibus alia confirmentur: Ecce coram tremendo Iudice, *Ad eam deprecatio.* peccatores assistimus, cuius manus terribilis gladium iræ suæ vibrat super nos. Et quis auertet eam? Nemo Domina, tam idoneus, ut gladio Domini manum pro nobis objiciat, ut tu Dei amantissima, per quam primum in terris suscepimus misericordiam de manu Domini Dei nostri. Ex omnibus finibus terra ad tuæ protectionis umbraculum confugimus, à facie formidinis fortitudinis Dei. Ad te Domina mea, stillant oculi nostri, te deuotionis clamore valido obsecramus, ut Filij tui Domini nostri iram quam grauiter peccando succendimus, erga nos mitiges: eiusque gratiam à qua ingrati excidimus nobis tua conciliet. Cuius linore sanati sumus, eius iterum medelam deposuimus, quia putruerunt & corruptæ sunt cicatrices nostræ, & non est in nobis sanitas.

Hæc non modo intellectum illustrant; sed affectum etiam incenderent vehementissimè, si quemadmodum ille Vir sanctus sentires peccati tui vulnera. O quæ sunt tua vulnera, si sunt ea sancti Bernardi quæ ipse plangit!

III. PUNCTVM.

NON tam ergo sibi quam nobis Christus hanc elegit matrem, quæ nobis magis quam ipsi est necessaria, necessitate salutis, necessitate poenitentiae, necessitate Gratiae: qua quidem necessitate nulla maior esse potest. Vnde si Apostolus considerata necessitate, vel ordinatione diuina volebat idcirco Christianos subditos *Rom. 13.* esse potestatibus sublimioribus, quanto id nos magis urgere debet ut subdamur & seruiamus tantæ Matri, quæ non ad temporalem aliquam vtilitatem, sed ad ipsam æternam vitam est necessaria; & quæ ita est ordinata nobis à Filio in colendissimam Matrem, ut in ea colenda salutis nostræ quodammodo summam posuerit.

Sic apte S. Bernardus: Intuere, ô homo, consilium Dei, agnosce *De aqua ductu.* consilium Sapientiae, consilium pietatis. Cælesti rore arcam rigaturus,

totum vellus prius infudit. Redempturus humanum genus, pretium
 vniuersum contulit in Mariam! Ut quid hoc? forte ut excusaretur
 Eva per filium, & querela viri aduersus feminam deinceps sopiretur.
 Ne dixeris ultra, o Adam, mulier quam dedisti mihi, dedit mihi de ligno
 vetito: Dic potius, mulier quā dedisti mihi, me cibauit fructu benedicto.
 Tum paulo post sic inde infert: Alius ergo intuemini quanto deuo-
 tionis affectu a nobis eā voluerit honorari qui totius boni plenitudinem
 posuit in Maria: ut proinde si quid spei in nobis est, si quid gratiæ, si quid
 salutis, ab ea nouerimus redundare quæ ascendit deliciis affluens. Tolle
 corpus hoc solare quod illuminat mundum, ubi dies? Tolle Mariam
 hanc maris stellam, maris utique magni & spatiosi, quid nisi caligo
 inuoluens & umbra mortis, ac densissima tenebræ relinquuntur? Totis
 ergo medullis cordium, totis precordiorum affectibus, & votis omnibus
 Mariam hanc veneremur, quia sic est voluntas eius, qui totum nos ha-
 bere voluit per Mariam. Hac inquam voluntas eius est, sed pro nobis.
 In omnibus siquidem & per omnia prouidens miseris, trepidationem
 nostram solatur, fidem excitat, spem roborat, dissidentiam abigit,
 erigit pusillanimitatem.

Et post multa sanè pia & efficacia, sic concludit vniuersim pro
 ipsa in Deum ac Christum Dominum pietate: Caterum quidquid
 illud est quod offerre paras, Maria commendare memento, ut eodem
 aluco ad largitorem gratiæ, gratiæ redeat quo influxit. Neque enim im-
 potens erat Deus & sine hoc aqua ductu infundere gratiam prout vel-
 let, sed tibi vehiculum voluit prouidere. Forte enim manus tuæ aut
 sanguine plena, aut infesta muneribus quod non eas ab omni munere
 excussisti: Ideoque modicum istud quod offerre desideras, gratissimis
 illis & omni acceptione dignissimis manibus offerendum tradere curas, si
 non vis sustinere repulsam.

Comment.
 tomo 2.
 Tract. 5.

Si quid denique ultra desideres ad ampliorem huius Veritatis
 notitiam, sic apte Salmeron ubi de plenitudine Gratiae seu de dif-
 ferentia plenitudinis gratiæ quæ de Christo Domino dicitur, &
 de Beata Virgine, ac de nonnullis aliis sanctis: Christus, inquit,
 ut fons & Caput omnium electorum, plenus est, de cuius plenitudine
 vniuersi electi ab initio mundi acceperunt, accipiunt, & in finem vs-
 que mundi accipient. Maria vero illi proxima, ac singulariter conjun-
 cta, plena dicitur gratia, quantam Matrem Messia habere decebat,
 quantumque pura creatura poterat esse capax, & quantum expediebat
 ut illa tamquam mater pietissima in nos omnes tamquam filios effun-

deret: ut pote qua assumpta fuerat à Christo, non ex vlla necessitate, aut impotentia sua, verum propter suam meram bonitatem & gloriam in matre communicandam, atque illustrandam: nimirum ut esset, si ita loqui licet, CORREDEMPTRIX, MEDIATRIX, ET COOPERATRIX SALVTIS HVMANI GENERIS, & ad quam, tamquam ad singularem aduocatam, qua semper pro sua reuerentia à filio exauditur, communi fidei instinctu & deuotione omnes fideles, iam iusti quam peccatores, ad impetranda omnia bona atque beneficia, tam corporalia quàm spiritualia, omni tempore, & omni loco confidenter accedere deberent atque confugere. Hac est plenitudo Gratia spectans ad Matrem Messie. Reliqui vero siue Apostoli, siue Martyres, siue Virgines, siue Confessores si pleni gratia dicuntur, intelligendi sunt eatenus Dei Gratiam participare, quatenus ratio officij sui, siue vocationis exigere & postulare videbatur.

Hæc ille in Commentariis, vnde ad rem nostram duo quædam particularius colligas. Primum, quod si vnumquemque Sanctorum merito credas suæ respondisse vocationi & gratiæ, quanto id certius affirmandum de sanctissima nostra Matre, quantumcumque excellentior & sublimior fuerit eius gratia & vocatio, quàm cæterorum omnium. Secundum est, quanta inde obligatio & necessitas Eius colendæ, quanta eorum securitas qui ad eam confugiunt, ut quæ suo non desit officio & muneri: quanta eorum miseria & calamitas qui non Eam debitè colunt, cum sic Eam Christus velit ab omnibus honorari; ut omnes ab ea pendeant pro sua spiritali vita, sicut ab illa pendere voluit pro sua temporali. Ratum fixumque est: Christus honorat in nobis Matrem: honorat autem cum eius Cultores remunerat, aut cum Eius punit Contemptores. Honorat, inquam, dum nihil per illam exoratum reculat; aut dum nihil nisi per eam donat.

DE IMITANDA BEATISSIMÆ VIRGINIS DOCILITATE.

Dixit autem Maria ad Angelum:

834 Die 25. Martij. In Feflo Annuntiationis B. Virginis.

Quomodo fiet iftud, quoniam virum non cognofco?

Luc. 1.

VERITAS PRACTICA.

Frufta Beatam Virginem oras, fi non quæris ficut illa, quod ignoras.

RATIO EST, Quia fi ultro & voluntariè manes in culpa, frufta Beatam Virginem oras.

Sed fi non quæris ficut illa, quod ignoras & quod eft tibi fcitu neceffarium, ultro & voluntariè manes in culpa.

Ergo frufta Beatam Virginem oras, fi non quæris ficut illa, quod ignoras.

Ergo ne frufta illam orës, imitanda eft eius docilitas, inquirendo diligenter quod nescis; & credendo firmiter quod didiceris.

L. PUNCTVM

De verbis
Apoc. fi-
gnum ma-
gnum.

RECTE sanctus Bernardus de firmo proposito feruanda Virginitatis quod Beata Virgo conceperat: Probat propositi immolabile fundamentum quod tam conftanter promittenti filium Angelo refpondit, quomodo fiet iftud, quoniam virum non cognofco? Forte enim propterea primo turbata eft in sermone eius, & cogitabat qualis effer ifta falutatio, quod benedictam fe fe audiffet in mulieribus, quæ nimirum benedici in Virginibus femper optabat. Et ex tunc quidem cogitabat qualis effer ifta benedictio, quod iam videretur effer fufpecta. Vbi verò in promiffione filij, manifeflum Virginitatis periculum videbatur, non potuit ultra difsimulare quin diceret: quomodo fiet iftud, quoniam virum non cognofco? Merito proinde & illam meruit benedictionem & hanc non amiffit: vt longe gloriofior fiat & Virginitas ex fœcunditate, & ex Virginitate fœcunditas, ac mutuis fe fe radiis illustrare hac duo fydera videantur.

In quibus verbis illud præcipue obferuandum quod ait de Beatiffima Virgine, cum in promiffione filij manifeflum Virginitatis

nitatis periculum animaduertit, tunc interrogasse Angelum quomodo id fieri posset, saluo scilicet Virginitatis proposito. Quasi Angelo diceret Virgo prudentissima: Nihil recuso quod velit à me Deus, sed cum sciam illum à me velle Virginitatem, Tu vero mihi de Maternitate loquaris cui repugnat Virginitas, quæro vt me accomodem Diuinæ voluntati, quomodo illa duo simul conuenire possint. Qua in quæstione proposita, luculentum prudentiæ & Docilitatis exemplum nobis dedit, vt quoties ex Euangelio, ex obedientia, ex Diuinis consiliis proponitur aliquid vel intellectu vel factu difficile, inquiramus modeste quomodo fiat istud; non idcirco repudietur quia non intelligitur vel quia repugnat naturæ, vel quidquid tandem appareat quod opponatur: sed suspendatur iudicium & affectus, expectetur vel quærat interpretatio difficultatis, ne anticipata præualeat opinio, ne pudeat nos ignorare aliquid, aut interrogare quod ignoramus; nam alioquin vel negabis te posse facere quod tamen posses, si quod nescis scires; vel indicabis te nolle quod tamen velle oportet; vel te excusatum putabis vbi nulla erit legitima se excusandi ratio; res est denique plena periculi, nec leue censeretur debet periculum vbi de diuina voluntate & de salutis negotio agitur.

Quamobrem in id serio inuigilandum, & attente consideranda Veritas qua excitamur ad hanc imitandam Beatissimæ Virginis docilitatem, efficaci sane motiuo, & acri stimulo. Quid enim Cultori Beatæ Virginis accommodatius atque ad agendum quod persuadere velis potentius quam nisi hoc agat, frustra Virginem oret, frustra illam colat & veneretur. Nihil illi cum Virgine, nihil cum illo Virgini. Nonne hoc pauendum? Hoc est autem quod dicitur, *Nisi quod ignoras interroges & inquiras sicut illa, quomodo fiet istud, frustra illam oras & colis.* Nam vt habet declaratio Veritatis, certum est quod si vltro in culpa quam vocant habituali & graui permaneas, neque velis aut satis cures ex illo damnofo statu emergere, nihil tibi profit quidquid ores aut colas Beatam Virginem. Quid enim profit quod neque gloriosum Virgini, neque tibi ad salutem opportunum esse possit? At quamdiu in lethali peccato vis viuere, quid illi à te gloriosum: quid ab illa tibi salutiferum esse potest? Peccauisse aliquando, & velle resipiscere, ac propterea vehementer illam orare, sanè

illi eft gloriofum & tibi faluberrimum : fed ita peruicacem eſſe in culpa , vt illam nolis vmquam deponere , facis & Virgini , & pietati , & animæ tuæ injuriam , ſi putes in eo ſtatu te colere Virginem & Salutem.

Rom. 2.
ſuper miſ-
ſus.

Quando vel omnium reus eſſes delictorum quæ tamen diſplicerent , accede nec deſperes vmquam , aut ſi vel in ipſum deſperationis barathrum , inquit ſanctus Bernardus , forte incideris , inclama Virginem , inuoca Virginem Matrem , nomen ipſum Mariæ cogita , nec fruſtra verbum effluet , nec cogitatio. Quando vero vel ſola vna lethalis hæreret culpa quam expiare nolles , etſi tum preces multiplicaueris , etſi dona , etſi vota , & quidquid pium cogitari poteſt addideris , nihil agis , quia hoc vnum vel maximè tibi eſſet agendum , vt culpam expiares , quæ te ab æterna felicitate procul excludit. Vel enim putas te cum illa culpa ſaluandum , vel minime. Si primum ais , falſum ais & blaſphemum : Si ſecundum , quid tibi vltro pereunti cum Virgine , quæ ſi pereuntem adiuuare velit , tu adiuuantem auertis ; aut ſe illa vltro auertet , &

Gen. 21.

ſicut olim Iſmaelis mater , *Non videbo* , dicet , *morientem puerum* ,

II. PUNCTVM.

SED ſi non quæras ſicut illa quod ignoras , vltro & voluntariè manes in culpa.

1. 2. q. 76.

2. 2.

Pſ. 35.

Quando illud ſcilicet quod ignoras , debes & potes ſcire , tunc niſi quæras , ignorantia eſt voluntaria & affectata , quæ ſane lethalis eſt vt expreſſe ait ſanctus Thomas , & tum perinde eſt ac nolle agere , iuxta illud Pſalmi : *Noluit intelligere vt bene ageret*. Illud autem quod ſic voluntariè ignorari poteſt cum ſit varium & multiplex , tum vero ad triplex reuocatur genus. Primum eſt eorum quæ ſunt omnibus Chriſtianis communia , vt *non eſſe de mundo* ; *Non eſſe in lata via* , *Nolle diuites fieri* , *Non eſſe tepidos* , Certum eſt ex ſcripturis , hæc eſſe vetita , hæc damnosa & condemnata : neque tu qui hæc legis , ignoras ita eſſe ; Sed noſtine quid ſit eſſe de mundo ? quid in lata via ? quid eſſe tepidum , aut ditari velle ? Si hoc ignoras , ignoras quod ſcire debes & potes , & illa eſt ignorantia voluntaria , inexcusabilis & peccato annexa. Cum enim procliue tibi ſit eſſe de mundo , niſi diligenter aduertas , non poſſis autem hanc adhibere diligentiam niſi probè ſcias quid ſit

esse de mundo; Certe hoc te scire tam oportet quam aliud quod non negas: ac proinde ignorari non potest sine culpa. *Propterea captivus ductus est populus meus, quia non habuit scientiam, propterea infernus dilatauit animam suam, & aperuit os suum, absque ullo termino.*

Secundum genus eorum est quæ sunt tui status aut officij, si Sacerdos, si Religiosus, si Confessarius, ignores autem quæ spectent ad ministerij tui exercitium in re graui, in peccati periculo; possisque tam facile quidquid ignoras scire, quam facile posses studere, vel interrogare, nec tamen studeas aut interroges, peccas ignorando, & ille es de quo Apostolus, *si quis ignorat ignorabitur*, I. Cor. 14. id est, relinquetur in peccato & peribit, quasi qui versatur in periculo unde non potest eripi nisi adiuuetur, nec tamen adiuuatur, quia ignoratur in tali esse periculo. Sic est qui ignorat quæ scire debet & potest. *Quia numquam noui vos.*

Matth. 7.

Tertium denique te magis adhuc spectat, si quo rei aut creaturæ prauo teneris affectu, de quo dubites an sit prauus, nec tamen dubij tui solutionem quæras, ne forte contra ac velles respondeatur tibi, & cogaris affectum deponere, quem tu mauis fouere: tunc ignoras esse mortale quod putas esse tantum veniale, & in illa tua ignorantia tibi blandiris & palpas, quasi securus inde sis quod si scires esse mortale, non cõsentires. Sed peruersa est illa securitas & ignorantia, fraudulenta est & dolosa peruersitas, *In dolo renuerunt scire me, ait Dominus.* Hi sunt qui apud Iob, *dixerunt Deo, recede à nobis, & scientiam viarum tuarum nolumus.* *Nolunt scire, inquit sanctus Gregorius, quid faciant: & quasi minus vapulaturos se existimant si nesciant quod operari debuerunt. Sed aliud est nescisse; aliud scire noluisse, nescit namque qui apprehendere vult & non valet: qui autem ut nesciat auerem à voce veritatis auertit, iste non nesciens sed contemptor addicitur.* Quod & paulo post apud eundem Iobum sic repetitur. *Quasi de industria recesserunt ab eo: & omnes vias eius intelligere noluerunt.*

Numquid hoc est esse in culpa? Numquid hoc est quod miseri lugent in Inferno, *viam Domini ignorauimus*, quia scilicet eam poterant & debebant scire, nec tamen voluerunt sed neglexerunt. *Talis negligentia facit ignorantiam esse voluntariam & peccatam.* Ipsa sunt sancti Thomæ verba. Ipsa sunt contra te manifesta testimonia & aperta iudicia.

III. PVNCTVM.

FRVSTRA igitur Beatam Virginem oras, si non quæris sicut illa, quod ignoras. Frustra, inquam, ad salutem tuam, & ad salutis media quæ ab illa seu per illam postulamus. Nam tu te illi & teipsum tibi opponis, quamdiu manes in illa voluntaria ignorantia, quæ tam mera est culpa, quàm si quid velles agere quod certo scires esse peccatum. Si quid enim te latet ex his quæ

2. Petri 3. scire debes & potes, te volentem latet; *Latet eos hoc volentes*, ait sanctus Petrus, quasi diceret, perinde est quantum ad culpam & poenam, ac si scirent, nam culpa est, velle nescire quod eos scire oportet.

At vero non dubitas quod si esses in manifesto crimine nec poenitere velles, nihil tuæ tibi prodescent orationes, nihil sanctissimæ Virginis suffragia, nihil quidquam diuinitus institutum; quia quod illa præstant est poenitentia, seu oblata Gratia qua possis poenitere si velis: aut profecto si nolis, non te impoententem saluabit Gratia, nec quantumcumque gratiosa Virgo, quæ & mediis sibi ordinatis ad salutem vsa est, & suos quosque

Pr. 8. ad hoc ipsum verbo & exemplo inuitans; *Nunc ergo, inquit, filij, audite me. Beati qui custodiunt vias meas. Audite disciplinam, & estote Sapientes, & nolite abjicere eam. AVDIENS sapiens sapientior erit, & intelligens gubernacula possidebit. Audi Fili mi disciplinam patris tui, & ne dimittas legem matris tua, ut addatur gratia capiti tuo, & torques collo tuo.*

Ibid. 1.

Hæc sunt prima Sapientiæ monita de quibus fufe in prima parte, tota hebdomada tertia post Epiphaniam. Certe hoc mirum! Vix est aliud negotium de quo non libenter instruamur à peritis, præter salutis negotium, quod vix tamen tutò geritur sine ductu Instructoris aut Superioris, à quo nisi quisque

L. I. de
Serm. D. in
montec. 3.
Is. 30. inuenitur, inquit sanctus Augustinus, nullo modo sibi est idoneus ut sese tantis miseriarum implicamentis expediat. *ET os meum non interrogasti*, ait Dominus, *habentes fiduciam in umbra Ægypti*. Quasi ad dissoluenda omnia Conscientiæ dubia satis esset respondere quod sic mundus docet & agit. Hæc est umbra Ægypti, hæc est adumbrata pene omnium ratio qui ne videant se peccare, se mundi velant umbra, se mundi regunt tenebris. *Erit vobis fiducia umbra Ægypti in ignominiam.*

Ibid.

**DE INIVRIA FACTA VIRGINI
MATRI, AB IIS QUI EXCVSANT
IMPOSSIBILE.**

Quia non erit impossibile apud Deum, omne Verbum.

LUC. 1. 37.

VERITAS PRACTICA.

Qui dicunt se non posse quod iubentur, non possunt id dicere sine iniuria Virginis Matris.

RATIO est, quia qui aliquid dicunt contra Bonitatem & Potentiam Virginis Matris, non possunt id dicere sine eius iniuria.

Sed qui dicunt se non posse quod iubentur, dicunt aliquid contra Bonitatem & Potentiam Virginis Matris.

Ergo id non possunt dicere sine eius iniuria, quod certe est impium & cauendum.

I. PUNCTVM.

IAM nouum illud erat & tam mirum quod Angelus nuntiabat Virgini, Virginem parituram, vt merito ad Diuinam omnipotentiam tale opus retulerit, dicens, *Non erit impossibile apud Deum, omne verbum*, siue omne opus quod dixerit se facturum. Hanc autem omnipotentiam breuiter explicans sanctus Bernardus: *Apud Deum*, inquit, *nec verbum diffidet ab intentione, quia veritas est: nec factum à verbo quia virtus* Hom. 4. super m̃f. *est: nec modus à facto quia sapientia est: ac per hoc non erit impossibile* sup. *apud Deum, omne Verbum.*

Hæc est diuina potentia quam præ cæteris Attributis sic magnificabat Virgo Deipara: *Quia fecit in me Magna qui potens est*, Verè magna, vere magnifica, vere magnificanda per omnes ætatum vices. Hic est diuinæ Potentiæ singularis actus quem Chri-

L. de ini-
tandis 9.
& de Sa-
crum. 4.

flus Dominus nafcens exercere voluit, relinquendo fuis caufis
fuos alios naturales effectus, & hoc vnum fibi affumens vt Ma-
trem Virginem conseruaret. Hoc est denique diuinæ opus om-
nipotentix quod fpectandum in primis proponunt sancti Patres
ad firmandam noftram fidem fiue in iis quæ fpeculatiua dicun-
tur, fiue in practicis. Sic certe sanctus Ambrosius pro veritate fan-
ctiffimi Sacramenti: *Numquid natura vfus præceffit cum Iefus Do-
minus ex Maria naceretur? Si ordinem quærimus, viro mixta fæmi-
na generare confuevit: liquet igitur quod præter naturæ ordinem,
Virgo generauit: & hoc quod conficimus Corpus, ex Virgine est; Quid
hic quæris naturæ ordinem in Chrifti corpore, cum præter naturam
fit ipfe Dominus Iefus partus ex Virgine?*

Serm. 9. de
Natiu. D.

Hom. 2.
in Matth.

Sic & sanctus Leo pro iis quæ ad mores fpectant & virtutum
praxim. Postquam dixit Dei effe Gloriam ex Matre Virgine
Chrifti nafcantis infantiam: *In terra autem, inquit, illa pax con-
ceditur quæ homines efficit bonæ voluntatis. Quo enim fpiritu de inte-
merata matris visceribus nafcitur Chriftus, hoc de fapcta Ecclefia vte-
ro nafcitur Chriftianus, cui vera pax est, à Dei voluntate non diuidi,
& iis folis quæ Deus diligit, delectari. Sanctus quoque Chryfosto-
mus: Auditu quidem mirabile est quod ineffabilis Deus, per Virginis
ad nos venit vterum, & fieri ex muliere dignatus est: Tum paucis
interiectis, quod fi ambigis de his quæ ad tuum fpectant honorem, ab
his quæ illius funt, etiam tua difce credere. Quantum enim confe-
qui poteft humana ratio, multò est difficilior Deum hominem fieri,
quàm hominem, Dei filium confecrari. Natus est fecundum carnem,
ut tu nacerere fpiritu: Natus est ex muliere, ut tu defineres filius effe
mulieris.*

Et tamen quàm multi etiam nunc caufantur ifta quæ ad falu-
tem aut perfectionem noftram iubentur & confulantur, effe im-
poffibilia, aut certe tam difficilia vt vix in mundo præftari pof-
fint! Difce incredule, difce ex iis quæ funt Chrifti & Virginis
Matris, etiam quæ tua funt credere. Credifne potuiffe Deum fe
hominem facere, & fuam Virginem Matrem? Cur non credes
illum poffete, fi velis, facere humilem, pauperem fpiritu, pa-
tientem, mitem, & reliquis ornatum virtutibus, atque etiam vt
libenter velis id poffe, nifi plane refiftas eius poteftati? Neque
enim renitentem coget. Sane hoc vnum fufficeret ad omnem
recundendam calumniam qua religionem impetunt non modo

Qui dicunt se non posse quod iubentur, non possunt, &c. 841

hæretici sed è Catholicis bene multi qui sibi fingunt non posse quod nolunt, & quod iubentur tamen facere. Religionis hæc est orthodoxæ iniuria, Diuinæ est violatio Potestatis, & cœlestis gratiæ non parua offensio. *Potens est enim Deus omnem gratiam abundare facere in vobis, ut abunderis in omne opus bonum,* inquit *2. Cor 9.* Apostolus, qua de re sæpe alibi.

Sed quia non tam defectu Diuinæ Potestatis, quàm effectu Diuinæ Iustitiæ qua priuantur gratiis, dicunt sibi contingere vt non possint quod vellent, opponamus illis Potentiam quam sibi etiam opponi voluit Diuina Iustitia, & demonstremus quod licet indigni essent Gratiis, digna tamen semper est Virgo Mater quæ nobis illas obtineat, *Vnde aut numquam debent dicere se non posse quod iubentur, aut non possunt id dicere sine illius Matris iniuria.* Nam li quid contra eius Potentiam & Bonitatem dicunt, nonne tam apertam ei faciunt iniuriam quàm qui alieno detrahit nomini, quod quidem scelus tam graue est, quàm Nomen cui detrahit, est gloriosum! Non defuerunt certe impij qui blasphemias in eam voces euomerent; *Nam illa est,* inquit S. Bernardus, *quondam à Deo promissa mulier, serpentis antiqui caput, virtutis pede contritura: cuius plane calcaneo in multis versutiis insidiatus est, sed sine causa, sola enim contriuit vniuersam hæreticam prauitatem.* *De verbis Apoc. signum magn.* Alius non de substantia carnis suæ, Christum edidisse dogmatizabat: alius paruulum non peperisse, sed reperisse sibilabat: Alius post partum viro cognitam blasphemabat; Alius Dei matrem audire non sustinens magnum illud nomen THEOTO-COS impiissimè sugillabat. Sed contriti sunt insidiatores, conculcati supplantatores, confutati derogatores, & beatam eam dicunt omnes generationes. Denique & continuò post Herodem Draco insidiatus est parienti vt nascentem excipiens filium deuoraret quod inimicitia essent inter semen mulieris & Draconis.

Hæc ille ad verbum sanctus Pater, ex quibus facile est intelligere quod qui de illa negant, quæ gloriose possidet, aut qui affirmant dedecorosa quibus exempta est, iniuriam illi faciunt; sic plane qui qualem habet potentiam & Benignitatem denegaret, non minus Ei foret iniurius, non minus eam laderet, & sacrum eius nomen violaret.

O quis ille tam impius qui modò vellet suam Draconi præstare operam, vt per se, Virginem sic oppugnaret?

II. PUNCTVM.

SED qui dicunt se non poffe quod iubentur, dicunt aliquid contra Bonitatem & potentiam Virginis Matris.

Nam dicunt se non habere gratias, se non audere petere, se non mereri obtinere. At faltem eant ad Beatiffimam Virginem quæ idcirco electa eft à Chrifto Domino in matrem noftram potius quam in fuam, vt fupra dictum eft. Negare certe non poffunt fe orando poffe illam adire, quid enim periculi, quid moleftiæ, quidue negotij? Quod vnum itaque fupereft, dicunt fe fruftra illam adituros cum non poffit aut nolit quod petant impertiri. Nam fi poffit & velit quod petunt, quid eft ex illius parte quod non obtineant? aut fi diffidant obtinere, quid eft quamobrem diffidunt, nifi quia vt dictum eft, vel non poffit, vel nolit conferre quod poftulant?

Quod autem verè poffit & velit vnumquemque ad fe vere & fincere accurrentem adiuuare: audi vt loquitur. *Ego diligentes me diligo: & qui mane vigilant ad me, inuenient me. Mecum funt diuitiæ & gloria, vt ditem diligentes me & thefauros eorum repleam.* Quod vel ex folo Nomine Matris Dei concludunt omnes fancti Patres. Hoc enim nomen meretur vt quidquid petat à filio, non neget filius, *Neque enim fas eft,* inquebat matri Salomon, *vt auertam faciem tuam.* At quanto magis id dicet qui plusquam Salomon eft pietate & fapientia? Vide in tertia parte in die Affumptionis, quibus addes ex Petro Damiano: *Accedit ad aureum illud diuina feueritatis tribunal, non rogans fed imperans: Domina non ancilla. Quomodo enim poteflati tue obuiare poterit illa potentia qua de tuis vifceribus traxit originem?*

De illius vero Bonitate feu Benignitate quis dubitet fi Dei matrem ac noftram cogitet? Nam vt mater eft Dei, tanta Charitate repleta eft, quantam illa decet matris Dignitas, & quantam effe oportet quæ eft omnium conftituta mater. At vero tanta Charitas poffetne recufare petenti quod poffet illi dare: cum præfertim id à Deo acceperit vt difpenfaret petentibus. Si fideli feruò dandam pauperibus dediffes pecuniam, effetne fidelis feruus fi fibi eam referuaret, neque eam opportunè daret? Et putares de Virgine Matre quod non communicet acceptam gratiam quam

quam idcirco accepit ut illam suis communicet? Vocanda in ius esset, & de tot gratiis compellenda quot negasset. Absit hoc à me vel ut cogitem, Virgo Sanctissima, sed tam constanter teneo te non minus esse fidelem in dandis, quam potentem in accipendis gratiis, ut malim credere te vocandam in ius esse, quod est auditu absonum, & creditu impium: quam te fidelem aut benignam non esse. Hoc enim de te audiui & credidi quod à tuo scriptum est, fidei Seruo, quodque velim ab omnibus sciri & credi: *Omnibus omnia facta est: sapientibus & insipientibus copiosissima Charitate debitricem se fecit: omnibus misericordia sinum aperit, ut de plenitudine eius accipiant uniuersi: captiuus redemptionem, aeger curationem, tristis consolationem, peccator veniam, iustus gratiam, Angelus letitiam, denique tota Trinitas gloriam, Filij persona carnis humana substantiam, ut non sit qui se abscondat à calore eius.*

*De verbis
Apoc. ap-
paruit si-
gnum.*

III. PUNCTVM.

QVI ergo dicunt se non posse quod iubentur, non possunt dicere sine injuria Virginis Matris; Quia non possunt dicere sine potentia eius potentia & Bonitate, quæ duo diuinæ Maternitatis insignia sic in illa relucet ut quàm certo quisque credit eam esse Matrem Dei, tam verè credere debeat eam esse satis potentem & benignam, ut se in cunctis adiuuet; aut si de hac eius potentia dubitet, dubitet eam esse Dei matrem, aut Deum eius filium non eam honorare. Sic planè sanctus Bernardus sic infert ex eius electione & assumptione, *Ascendens ergo in altum Virgo beata dabit ipsa quoque dona hominibus. Quidni daret? siquidem nec facultas ei deesse poterit, nec voluntas. Regina cælorum est, misericors est. Denique mater est unigeniti filij Dei. Nihil enim sic potest potestatis eius seu pietatis magnitudinem commendare: Nisi forte aut non creditur Dei filius honorare matrem, aut dubitare quis poterit omnino in affectum Charitatis transisse Maria viscera, in quibus ipsa quæ ex Deo est Charitas, nouem mensibus corporaliter requieuit.*

*Serm. i. de
Assumpti.*

Velle ne de his ambigere? Velle ne dubitare ytrum satis bona sit Virgo Mater ut quæ potest, tibi conferat: aut satis bonus eius Filius ut quàm possit illam honorare, non honoret? Nolles sane tam impie tam scelerate de utroque sentire; Et tamen quid dicis, quid sentis quando te excusas ab his quæ tibi in tuo vocationis

gradu præstanda essent? Quid tibi vel aliis tunc respondes? Cur non illum qui occurrit Humilitatis, aut Patientiæ vel Charitatis actum exerces, Responde modò quid dicas? Nonne statim impossibile clamitas, nonne statim illud ingeminas, tibi non esse satis virium, tibi non esse satis gratiæ? nam alioquin si posses, si valeres cum gratia, cur non faceres quæ tibi vides facienda? Dicendum esset necessario, te nolle, te liberum esse, tibi non placere; Quod cum erubesceres dicere, nil restat quam vt impossibilitatem excuses: Quod vnum & idem est, implicate, vt vocant, ac dicere quod vel non sit satis bona Virgo quæ te adiuuare velit, vel non sit satis potens vt possit. Nam si posset, nam si veller, quid est cur non posses? responde quid est quod non posses, cum tantum possis quantum illa tibi, si eius potestatem tibi aduocares. Quod autem non tibi aduoces, non est defectus potestatis sed voluntatis sed fidei sed pietatis, qui sane defectus non minus etiam injuriosi sunt Beatissimæ Virgini Matri, quàm alij de quibus diximus, quia sic aperte est contemnere eius beneficentiam, eius patrociniū, eius sollicitudinem, & suam inimicis animam prodere ac salutem.

Num. 14.

Recessit ab eis omne præsidium. Actum est de illis, nostri sunt, sicut panem ita eos possumus deuorare. Sic Iosue de Cananæis & Amorrhæis. Sic de te Dæmones, si non recurras ad Mariam. Recessit à te omne præsidium, actum est de salute tua, de fide tua, de castitate tua, quod vnum tenebricosos illos fugabat hostes, præsidium præsens Virginis, hoc illos excitabit dum recesserit; hoc se stimulo simul concitant ad nos audacius inuadendos, recessit ab eis omne præsidium.

O quisquis te intelligis! Vide in Natiuitate B. Virginis, & aliis eius festis, nec non Feria sexta primæ Aduentus hebdomadæ: & alibi verbo, *Difficultas, Salus.*

DE HUMILITATE ET CELSITUDINE
MATRIS DEI, SIMVL INCTIS
ET SIMVL COLENDIS IN BEATA
VIRGINE.

Talis superbi fastus est ut ne quidem Dei Matrem, &c. 843
Ecce ancilla Domini, fiat mihi secundum Verbum
tuum. Luc. 1.

VERITAS PRACTICA.

Talis superbi fastus est, ut ne quidem Dei Matrem
veneretur.

RATIO EST, Quia is Matrem Dei non veneratur, qui
ancillam eam & humilem non veneratur.

Sed talis superbi fastus est, ut ancillam eam & humilem non
veneretur.

Ergo neque ut Matrem Dei. Quod certe vix ullus credat su-
perbus, aut vix ullus se superbum credat.

I. PUNCTVM.

HABET hoc quidem vera humilitas & deuotus animus
ut quod ait sanctus Petrus Chryfologus, *infulis beneficio-*
rum crescat ad obsequium, augeatur ad gratiam, non ad arro-
gantiam prosiliat, non ad superbiam pertumescat. Sed vera hæ hu-
militas rara est anis in terris, ait sanctus Bernardus. Vnde & Serm. 142. de annis.
ipse admirans eam in Beata Virgine, *Qua est, inquit, hac tam su-*
blimis humilitas qua cedere non nouit honoribus, insolescere gloria
nescit? Mater Dei eligitur, & ancillam se nominat! Non mediocris
reuera humilitatis insigne, nec oblata tanta gloria obliuisci humilita-
tem. Non magnum est esse humilem in abiectiōe, magna prorsus &
rara virtus, humilitas honorata. Si me miserum homuncionem, meis
decepta simulationibus, ad aliquem vel mediocre honorem prouexit
Ecclesia, Deo nimirum hoc, vel propter mea, vel propter subditorum
peccata permittente, nonne statim oblitus qui fuerim, talem me puto,
qualis ab hominibus, qui cor non vident, putatus sum? Credo sane,
Conscientiam non attendo, & reputans non honorem virtutibus, sed
virtutes honore, eo sanctiorem, quo superiore me aestimo: Videas plerof-
que in Ecclesia de ignobilibus nobiles, de pauperibus diuites factos, su-
bito intumescere, pristina obliuisci abiectiōis, genus quoque suum
Ooooo ij.

erubescere, & infimos dedignari parentes.

Durum certe & impium quod hic sanctus Pater postremum ait de contemptis à superbo parentibus, sed quanto magis impium quod proposita Veritate asseritur, ut nec ipsam Christi Domini Matrem veneretur. Eo se scilicet extendit fastus superbi, *Vt qui non vult Beatam Virginem venerari ut ancillam & humilem, nec eam colat & veneretur ut Dei Matrem.* Tantæ notitia vesaniæ qua superbus intumescit, tortassis erit aptior ad deponendum hoc tam immane vitium, quàm proposita ipsius virtutis excellentia, cuius splendorem ne perspiciat, obest tumor mentis.

Perpendenda est itaque diligenter hæc prima propositio, quod qui matrem Dei non veneratur ut ancillam & humilem, nec eam veneretur ut matrem. Quia videlicet Maternitas Domini, prout consideratur in Beata Virgine, sic coniuncta est cum eius humilitate, ut nisi Virgo esset humilis humilitate ancillæ, non esset Mater Dei. Potuisset quidem non humilis esse Mater Domini,

L. de Con-
ceptu Virg.
c. 38.

sicut non Virgo & non sancta; Nam, ut ait sanctus Anselmus, Quamvis de mundissima Virgine Filius Dei conceptus fuit, non tamen hoc ea necessitate factum est, quasi de peccatrice parente, iusta proles nasci nequiverit; quia tamen non id decebat, & quia sic decretum erat ut non nisi ex Virgine nasceretur Dei Filius, vere dici potest, quod si Maria non fuisset Virgo non fuisset Mater Dei, & qui Mariam non coleret ut Virginem, non eam coleret ut Matrem Dei: sic plane de humilitate & multo magis, si Divum Bern-

Hom. 1. su-
per missus
est.

nardum audimus, cuius hæc sunt memoranda verba: Sine humilitate audeo dicere, nec Virginitas Mariæ placuisset. Super quem, inquit, requiescet spiritus meus nisi super humilem & quietum! super humilem dixit, non super virginem. Si igitur Maria humilis non esset, super eam spiritus sanctus non requievisset: si super eam non requievisset, nec imprægnasset. Quomodo enim de ipso sine ipso conciperet? Patet itaque quia ut de spiritu sancto conciperet, sicut ipsa perhibet, respexit humilitatem ancilla sua Deus, potius quam virginitatem. Et si placuit ex virginitate, tamen ex humilitate concepit. Unde constat quia etiam ut placeret virginitas, humilitas procul du-

1b Hom. 2.

bio fecit. Et paulo post: Ut igitur quæ sanctum sanctorum conceptura erat pariter & paritura, sancta esset corpore, accepit donum virginitatis: ut esset & mente, accepit humilitatis. Ex quibus inferas quod quò sanctitas mentis excellentior est & cōformior Mater-

nitati Diuinæ quàm corporis, eò magis humilitas per quam Dei Mater, sancta mente efficitur, coniuncta est cum ipsa maternitate: ac proinde sicut non crederes te venerari Matrem Dei nisi virginem & sanctam corpore venerareris: quanto id minus credendum est si non eam colas ut mente sanctam, id est, ut humilem & ut ancillam Domini?

Hoc ipsum, Idem sanctus Pater valde confirmat in hæc Canticorum verba: *Ecce tu pulchra es amica mea, ecce tu pulchra es.* Serm. 45.
in Cant.

QVÆRAMVS, inquit, *geminam anima pulchritudinem, hoc enim mihi videtur innuere. Decor anima, humilitas est. Non à me ipso hoc dico, cum Propheta prior dixerit: Asperges me hyssopo & mundabor, humili herba & pectoris purgatiua, humilitatem significans. Hac se post grauem lapsum rex & Propheta lauare confidit, & sic nunc quendam innocentia recuperare candorem. Verum in eo qui grauius peccauit, etsi amanda non tamen admiranda humilitas. At si quis innocentiam retinet, & nihilominus humilitatem iungit, nonne is tibi videtur geminum anima possidere decorem? Sancta Maria sanctimoniam non amisit, & humilitate non caruit, & ideo concupiuit rex decorem eius, quia humilitatem innocentia sociauit.*

Iam verò si humilitatem illam tollas, nonne eius tolles decorem? Nonne id tolles quo permotus est Deus ut eam sibi eligeret in Matrem & Nutricem? Nonne id tolleres sine quo non esset Dei Mater? Ac proinde nonne vides sic eius humilitatem esse coniunctam cum diuina maternitate, ut nisi fuisset humilis non magis fuisset Mater Dei, quàm si decora & innocens non fuisset.

O admirabile commercium tam excelsæ simul humilitatis, & tam profundæ Celsitudinis! quis tam audax & impius qui tam pie iuncta & connexa velit dissoluere?

II. P V N C T V M.

SED *superbus ancillam eam & humilem non veneratur.*

Nam cum duo sint ad cultum & venerationem Personæ necessaria, vnum ex parte venerantis ut id æstimet quod veneratur; & aliud ex parte personæ cui cultus & veneratio exhibetur, nempe ut gratam & acceptam habeat talem venerationem: duo illa desunt ex vtraque parte.

Primum quidem ex parte superbi, non æstimat humilitatem

& demissionem; nam si eam æstimaret & coleret, superbus non esset; imo superbiam ita dereftaretur sicut humilitatem coleret, cum sint contrarij contrariorum affectus & effectus: vnde ex opposito fit vt quandoquidem superbus est, humilitatem plane abominetur. Sic enim expresse Sapiens: *abominatio est superbo humilitas*, quod certe est magis emphaticum & expressum, quam si diceretur, superbus humilitatem abominatur, sic enim abominatur vt nomen eius ferre possit.

Quod si dicas, superbum quidem in se abominari humilitatem seu humiliationem, non tamen ita in aliis, imo eam suspicere & venerari. Nihil dices, nihil oppones; Nam quid est venerari Beatissimam Virginem vt ancillam Domini? Non est tantum æstimare eius humilitatem, sed est eam tanti æstimare vt te illi plane subiicias. Hoc est enim in genere seu generatim loquendo de cultu Beatæ Virginis, qui dicitur Hyperdulæ cultus, id est, debitæ supra sanctos alios seruitutis, hoc est eam venerari & colere, si te illi subiicias quocumque id modo fiat. At vero eam venerari vt ancillam, singularis quædam est ratio cultus quâ te illi subiicias vt humili & ancillæ, quod non sit tantum per externas quasdam demissiones corporis, neque per internos animi motus quibus te illi totum mancipis & submittas: sed per verum & realem affectum quo eius humilitatem in te ætimes, in te colas, & pro viribus imiteris. Quod eò vel maximè verum est cum ipsa considerata vt humilis, nihil aliud magis amet, nihil suggerat, nihil suadeat, nihil præcipiat & commendet vehementius, quàm ne superbias, quàm vt humiliëris, quam vt aliis cedas, quàm vt iniurias patienter tolères, quàm vt te infimum reputes. Hæ sunt eius viæ, viæ salutis quas docet custodiendas, hæc est disciplina qua suos erudit vt toties ex Sapiente audiuisti, *Nunc ergo filij audite me: Beati qui custodiunt vias meas. Audite disciplinam, & estote Sapientes, & nolite abjicere eam.* At nonne hæc sunt quæ in primis odit & detestatur superbus? quomodo ergo illam audiet? quomodo illi obsequetur! quomodo illi se subiiciet; ac denique quomodo illam colet & venerabitur vt ancillam cum venerari nihil sit aliud quam illi obedire? *Quomodo dicis quod amas me, cum animus tuus non sit mecum?*

ATQVE hinc aliud patet quod est ex parte ipsius Virginis

ut est humilis ancilla Domini, quàm parùm ipsi grata & accepta esse possit superbi veneratio, quæcumque tandem illa sit. Nam ut est humilis non minus detestatur superbiam quàm superbus humilitatem. Sic enim apud eundem Sapientem sub nomine Sapientiae, *arrogantiam*, inquit, & *superbiam*, & *viam pravam* & *os bilingue detestor*. ^{Prou. 8.} Neque id tantum in se, sed in aliis æque detestatur, unde aliqua versio habet, *arrogantem & superbum detestor*. Sicut cùm Deus dicit: *Detestor ego superbiam Iacob, & domum eius* ^{Amos 8.} *odi*: sic illa; detestor eius superbiam qui me colit; nihil enim commune superbo & humili. *Si quis est paruulus*, inquit, *veniat* ^{Prou. 9.} *ad me*; quasi diceret, ne elatus ne superbus veniat quia nihil mihi cum illo est: sic in suo Cantico postquam de humilitate sua egit; tùm in superbos, *fecit potentiam in brachio suo, dispersit superbos mente cordis sui, deposuit potentes de sede, & exaltavit humiles*. Adde quod cùm, ut vidimus, hoc vnum præcipue ancilla Domini à suis cultoribus exigit ut se humilient sui exemplo; quidquid aliud præstent, quid gratum illi esse potest cum id negatur quod sibi magis esse gratum significat? *Quis quasiuit hac de manibus vestris?* quidquid dicant quidquid orent, non exaudiam: *os bilingue detestor* simul cum superbia, id est, superbum mihi loquentem humilia, & superba cum aliis loquentem & agentem. Nonne tu sic bilinguis es?

III. P V N C T V M.

SUPERBVS igitur qui Matrem Domini non veneratur ut ancillam, nec veneratur ut Matrem: quia sicut non fuisset Mater Domini nisi eius ancilla fuisset, sic plane non coletur ut Mater Domini, nisi ut eius ancilla colatur: neque ut eius ancilla coletur, nisi sic ametur eius humilitas, ut reipsa & ipsis actibus exerceatur ab eo qui se dicet eam venerari; quod tam repugnat superbo, ut esse superbus desinat si se ita humiliet, aut nisi se ita humiliet, numquam humilitatem colet, neque humilem ancillam Domini, neque sublimem venerabitur Domini Matrem.

O quam vere dictum à sapiente: *omnes insipientes & infelices* ^{Sap. 15.} *supra modum anima superbi!* Quid enim insipientius quàm putare se superbum humili posse placere Deiparæ! Quid infelicius quam ei nolle placere, cum possis, si deponas superbiam!

Quid insipientius & inſœlicius quam dũ contendas te illi placere, magis in te concites eius odium & execrationem prouoces, atque inde conſequentes infaustos caſus! Neque enim humilis ancilla Domini aliter odit & deteſtatur ſuperbum, quam cum à ſe repellendo nec quomodolibet cõmunicando. Non eſt odium in affectu ſenſibile ſicut in nobis eſt, aduerſus odioſos: ſed eſt odium in effectu; id eſt, ita ſe gerit aduerſus ſuperbum, ſicut in aduerſarium & odioſum; neque tantũ non acceptat eius cultum & precès; ſed odit quodammodò ac deteſtatur.

Eitne vero quidquam inſipientius & inſœlicius? quid facies auerſa virginẽ à qua omnis deſpectus intereat neceſſe eſt: ſicut ab illa omnis aſpectus impoſſibile eſt vt pereat? Recole quæ ſupra dicta ſunt in hanc ſententiam, & ſanctum audi Bernardum ubi poſt multa de virginitate & humilitate ſanctiſſimæ matris:

Hom. 1. ſu-
per miſſus
eſt.

Si non potes, inquit, virginitatem humilis, imitare humilitatem Virginis. Laudabilis virtus, virginitas, ſed magis neceſſaria humilitas. Illa conſulitur, iſta præcipitur: ad illam inuitaris, ad iſtam cogeris: de illa dicitur, qui poteſt capere capiat; de iſta dicitur, niſi quis efficiatur ſicut paruulus iſte, non intrabit in regnum cœlorum. Illa ergo remuneratur, iſta exigitur: potes denique ſine virginitate ſaluari, ſine humilitate non potes.

Et paulo poſt: *Quid dicis virgo ſuperbe; Maria Virginem ſe oblita, gloriatur de humilitate, & tu negligendo humilitatem, blandiris tibi de virginitate! Reſpexit, ait illa, humilitatem ancilla ſua: Quæ illa? Virgo utique ſancta, virgo ſobria, virgo deuota: Numquid tu caſtior illa? numquid deuotior? Aut numquid tua forte pudicitia gratioꝝ caſtitate Maria, vt tu ſcilicet ſine humilitate placere ſufficiās, ex tua, quod illa non potuit ex ſua? Denique, quanto honorabilior es ex ſingulari munere caſticonia, tanto tibi tu maiorem iniuriam facis quod eius in te decorem fœdas permixtione ſuperbia. Vide quæ plura hic habet & expende quod ſi virgini tam neceſſaria eſt humilitas, & tam cauenda ſuperbia, quid impuro? quid impio?*

Serm. 45.
in Cant.

Propterea ſic ille idem alibi apte. Ergo beati qui cuſtodiuꝝ veſtimenta ſua munda, videlicet ſimplicitatis & innocentia, ſi tamen & decorem induere humilitatis adjiciant. Proſcẽto audiet quæ huiusmodi inuenitur: Ecce tu pulchra es amica mea. Vtinam vel ſemel dicas anima mea, Domine Ieſu, ecce tu pulchra es. Vtinam mihi humilitatem cuſtodias, nam primam veſtem ego male ſeruauĩ. Seruus tuus ſum ego.

neq

Talis superbi fastus est, ut ne quidem Dei Matrem, &c. 851
nec enim audeo profiteri amicum qui testimonium decoris mei cum re-
petitione non audio. Sufficit mihi si semel audiam. Sed quid si & hoc
in quaestione sit? Scio quid faciam. Venerabor amicam seruum, cumula-
tum in ea decorem deformis homunculus admirabor, gaudebo ad vocem
sponsi tantam nihilominus pulchritudinem admirantis. Quis scit si
saltem ex hoc inuenturus sim gratiam in oculis amicae, ut gratia ipsius
& ipse inueniar inter amicos? Sic nempe inchoanda est humili-
tatis praxis, agnoscendo se superbum, & sese humiliando quod
non sis humilis. Humiliemus illi animas nostras. REVERTE RE Iudith. 8.
Gen. 16.
ad Dominam tuam & humiliare sub manu eius.

DE PRÆCEPTO QVOD ACCEPISSE

AIT VIRGO DEIPARA VT INHABITARET

IN IACOB.

Tunc praecepit & dixit mihi Creator omnium. Et qui
creavit me requieuit in tabernaculo meo, & dixit
mihi: in Iacob inhabita, & in Israel heredita-
re, & in electis meis mitte radices. Ecclesi. 24.

VERITAS PRACTICA.

Qui praecepit & dixit Beatæ Virgini ut inhabitaret in
Iacob, tibi simul praecepit & dixit, ut quantum velles
illam in te habitare, tantum esse velles alter Iacob.

RATIO est, quia quando Deus alligavit finem certis quibusdam
mediis, tunc dicitur ita praecepisse media, ut quantum quis vel-
let finem, tantum velle deberet media.

Sed cum praecepit Beatæ Virgini ut inhabitaret in Iacob, sic finem
alligavit medio, ut non aliter in quoquam Virgo habitaret nisi
qui vellet esse ut Iacob.

Ergo tibi fimul præcepit & dixit vt quantum velles illam in te habitare, tantum effe velles alter Iacob. Quod certe motiuum eft efficax ad inquirendam & exprimendam fimilitudinem vitæ & morum cum antiquo illo Patriarcha.

VI X intelligi poteft Ratio nifi quibusdam ante prænotatis, quæ fi vel breuiter proponantur, ita euidenter patebit ratio, vt hîc aliud non fit opus quàm prænotanda illa paucis attingere.

Eccl. 9.

Primum eft quod licet nemo fciat, *vtum amore an odio dignus fit*, vtum falutem profequatur æternam, aut ab illa forte excidat: tamen vt cum gratia prouocemur vehementius ad capelfendam falutis viam, certa quædam eius impreffa funt veftigia, vt quemadmodum ait fanctus Bernardus & alibi infra fufius exponitur, *electis confolatio miniftratur, & fubtrahatur reprobis excufatio*. Cognitis fiquidem fignis vite, quifquis hæc negligit, manifefte conuincitur in vano accipere animam fuam, & pro nihilo habere terram desiderabilem comprobatur.

*Ser. 2. in
Oâ. Pafch.*

*In 3. parte
In Natiuitate
S. Ioan.*

Mal. 1.

Rom. 9.

Secundum eft, quod figna hæc præluxerunt in antiquo illo Patriarcha feu Patriarcharum Iudæorum duodecim Patre, qui dictus eft Iacob & Ifrael, filius Ifaac & frater Efau: Vnde eft illud apud Prophetam & Apoftolum, *Iacob dilexi, Efau autem odio habui*, quod primo quidem dictum eft de illis duobus fratribus, ac eorum pofteris, quantum fpectat ad maiorem curam quam Deus præ fe tulit habere de Iacob & de Iudæis potiùs quam de Efau & de Idumæis qui ab hoc descenderunt. Deinde vero tranflatum eft ad electos & reprobos qui hoc ipfo designantur tales effe, quo ad diuerfos mores Iacob & Efau videntur propius accedere, de quibus paulo poft,

Tertium obferuandum eft, quod cum Beatiffima Virgo Dei-para hoc inter alia fingulare priuilegium habuerit, vt fingularem electorum curam fufciperet, idcirco illi dictum effe *vt in Iacob inhabitaret*. Id eft, in illis qui fimilitudine morum Patriarcham Iacob exprimerent, imperium & dominationem exerceret, vt eos regeret, & dirigeret quemadmodum Rebecca Iacob: Atque illi etiam præcipuo quodam pietatis cultu mouerentur in Sanctiffimam illam Virginem velut in fuam Matrem, ac futuræ falu-

tis parentem optimam : sicque ille mutuus pietatis sensus quo & mater filios & filij matrem prosequerentur, esset quædam beatæ radix æternitatis, sicut gratia dicitur semen futuræ gloriæ. *Et in electis mitte radices.*

Quartum quod aduertas est, sic dictum esse Beatæ Virgini vt simul etiam præceptum fuerit inhabitare in Iacob. *Tunc præcepit,* inquit, *& dixit mihi,* hoc est, sic decretum est apud Deum, sic firmum fixumque est, vt in similibus Iacob inhabitem, tamquam si præceptum esset impositum, cui obseruando proinde sic astrictum vt mihi non liceat in alijs inhabitare. Aut Iacob similes inueniam oportet aut faciam, præceptum est & non præteribo.

Quintum, quod propius Veritatem propositam spectat, hinc planè sequitur quod quantum quis velit in se sanctam inhabitare Deiparam, tantum oportet vt velit esse alter Iacob, quia talem illa non faciet nisi volentem : & qui talis esse noluerit, numquam in eo Dei Mater inhabitabit. Quod vt firmitus apprehendatur, dicitur etiam esse simul præceptum cuicumque volenti hanc sanctam Virginis curam & inhabitationem, vt se vita & moribus velut Iacob exhibeat. Nam est quoddam veluti medium sic à Deo institutum ad illum finem consequendum ; quandoquidem non potest aliter Virgo in quoquam habitare qui talis esse nolit. Sicut cum præceptum est Apostolis vt neminem nisi baptizatum & poenitentem absoluerent à peccatis, simul etiam præceptum est omnibus qui absolui cuperent, vt baptisari vellent & poenitere ; cum alioquin illi aliter nullos possent absolvere. Sic planè cum præcipitur Beatæ Virgini vt in Iacob inhabitet, præcipitur etiam omni volenti hanc inhabitationem vt velit esse Iacob, quia medium quoddam est ad illam inhabitationem, sicut baptisma & poenitentia ad peccatorum absolutionem. Certum est autem quod quando Deus sic fines aliquos certis quibusdam medijs attexuit, tam necessariò vnique præcepit illa media quàm quisque volet illos fines.

DENIQUE quod sextum & postremum est ad praxim in primis opportunum, restat inquirere qualis fuerit Iacob, quoniam eius diuersi à suo fratre mores, quæ nobis cum illo similitudo vel discrepantia,

Septem ex Scripturis colliguntur differentia morum vtriusque fratris, quarum prima his continetur verbis ; *Factus est Esau Gen. 25.*

354 Die 25. Martij. In feſto Annuntiationis B. Virginis.

vir gnarus venandi & homo agricola, Iacob autem vir simplex habitabat in tabernaculis. Id eſt, quantum vnus ſeſe foras effundebat, tantum alter ſeſe domi continebat. Magna certe & notanda diuerſitas.

Secunda eſt quod Iacob erat pius vt patet ex multis ab eo
Hebr. 12. erectis altaribus; Eſau autem *profanus* ab Apoſtolo dicitur. O quantum vtriuſque interuallum.

Tertia, Iacob erat pudicus quantum illa ferebant tempora, neque vnumquam de Coniugio cogitauit niſi ex parentum conſilio & iuſſione. Eſau vero duxit vxores, *qua amba offenderant*
Gen. 26. *animum Iſaac & Rebecca*, vnde & *fornicatorem* eum vocat Apoſtolus.

Quarta, Iacob ſuis animi vacabat temperandis appetitionibus, vt apud Labanum ſocerum & ſæpe alias patuit: Eſau vero ſuis
Hebr. 12. indulgebat intemperantius, vnde & arguitur quod *propter vnã eſcã primitiua ſua vendiderit*.

Quinta, licet Eſau cogitaret interdum de diuinis & coeleſtibus: rarius tamen, ſecundariæ quodammodo erant illius curæ, cum longe magis addictus eſſet caducis bonis cumulandis: Iacob vero etſi bonis abundaret, non hæc erat tamen eius prima & præcipua ſolicitudo circa hæc bona ſibi comparanda, ſed potius vt bonorum Parentem omnium coleret, à cuius nutu totus pendebat. Quæ quidem differentia videtur apte comprehenſa in diuerſa benedictione quam à patre ſuo Iſaac, vterque
27. legitur accepiffe. Sic enim dictum Iacob, *Det tibi Deus de rore cæli, & de pinguedine terræ abundantiam frumenti & vini*: Eſau vero; *In pinguedine terræ & in rore cæli deſuper erit benedictio tua*, Nulla hic mentio Dei; *Et de rore cæli* pronuntiatur poſt pinguedinem terræ, cum eſt contra Iacob, nihil de terra dictum eſſet niſi poſt rorem cæli à Deo dandum, quaſi diceretur, quod vni primum eſt, poſtremum eſt alteri; Qui primus eſt in mente Iacob cultus Dei, poſtremus eſt in Eſau. Non propter bona, Deum Iacob colit, ſed quia Deum colit, bona conſequitur. Eſau vero vt bene ſibi ſit, Deo ſupplicat, non tam Deo quam ſibi ſeruieus. Videsne diſparitatem vitæ?

Sexta, ſi forte peccaſſet Iacob, poenitebat Eum ſui, redibat ſtatim in Gratiã cum Deo, & cum hominibus; frequenterque
Gen. 28. illud ore uſurpabat. *Erit mihi Dominus in Deum*. Eſau vero poſt

Graue crimen admissum, abiit parvipendens quod primogenita vendidisset, & tamen videretur aliquando resipiscere, non inuenit tamen penitentia locum, ait Apostolus. Quod certe multis accidit.

Septima denique: Iacob suorum talem habebat curam ut omnes in diuino cultu contineret. *Abjicite Deos alienos qui in medio vestri sunt.* Esau vero de his tam parum sollicitus fuit, ut eius posteritatem statim à vero Dei cultu defecerint: *Ipse est Esau pater Idumaeorum,* inquit Scriptura, quasi diceret, parens eorum qui nominati sunt inter Infideles. O quantum ab vno in multos boni vel mali derivatur!

Hic est itaque vitae & morum diuersus character qui Iacob ab Esau, qui electos à reprobis, & qui Parthenicos ac veros Virginis Matris Cultores à falsis certo discriminet. Quam quisque castus, simplex, sibi vacans & aliis ornatus erit virtutibus quas in Iacob spectauit, tantum erit apud illam in gratia, & tantum certitudinis ac firmitatis obtinebit ad aeternam salutem consequendam. Non illa sine virtutibus, sed nec virtutes sine illa. Sicut nempe parant Illi ad tempus in mente nostra virtutes habitaculum, sic parat Illa virtutibus & menti nostrae sempiternum in coelo domicilium. Non staret cultus Beatæ Virginis sine virtutum praesidio, sed neque virtutes consisterent, aut satis valerent apud Filium nisi cultus accederet Sanctissimæ Matris. Hac insignitæ notâ virtutes, tantam supra ceteras referunt dignitatem, quanta prope est Ipsa Mater super alias creaturas. O pondus Virtutis & pretium, quanta est ipsa dignitas Diuinæ Matris!

Quamobrem et si alia non adesset virtutum commendatio, singulari tamen hoc nomine quo nobis gratiam Beatissimæ Virginis demerentur, singulariter à nobis essent colendæ, non modo quia inde plus nobis referunt meriti & valoris; sed quia nos inde etiam plus adhibemus animi ad roborandas virtutes quæ tantæ Matri offerantur & placeant. Neque enim illa minutis virtutibus delectatur sed veris & solidis, non ore, non suspiriis, non hinc fuscitantur precibus exoratur, sed generoso conflictu cum vitiis, sed constanti castitatis cura, sed inuicta salutis comparandæ sollicitudine: Cum alioquin nisi precibus adiungantur opera, *Vox quidem vox Iacob est, sed manus manus sunt Esau.* In die Virginis sacro, vox quidem vox Iacob est, sed in aliis diebus, manus manus sunt Esau. In templo quidem vel dum orat, vox Iacob

est; sed dum aliis vacat muneribus, manus sunt Esau.

Isa. I.

Prov. I.

Perge ulterius hanc prosequi peruersitatem, & ingemisce tuis animi desultoriis leuitatibus. *Vir duplex animo inconstans in omnibus viis tuis. Vide potius ne dimittas legem Matris tue.*

Vide in 3. parte, Die 24. Iunij, vbi ad hæc verba quæ in Natiuitate S. Ioannis Baptiste dicebantur, *Quis, putas, puer iste erit*, hæc exhibetur Veritas:

Sicut prima & puerilis ætas index est secuturæ vitæ præsentis: ita hæc vita præsens indicium est futuræ post æternitatis.



Die 2.
Aprilis.

DE SANCTO FRANCISCO DE PAULA.

FVNDATORE ORDINIS MINIMORVM.

Ego Minimus in domo Patris mei. Iudicum 6.

VERITAS PRACTICA.

Hic erit verè maximus, qui verè est minimus.

RATIO EST, quia qui maximam in hac vita Gratiam seu Charitatem, & parem in alia Gloriam consequetur, Hic erit verè maximus.

Sed qui vere est minimus, maximam Gratiam & Gloriam consequetur.

Ergo hic erit verè maximus.

I. PVNCTVM,



*U*Æ duæ sunt in domo Domini seu in Christiana familia maximè commendatæ virtutes, Humilitas & Charitas, ex Ambæ præ cæteris eminent in sancto Francisco.

de Paula, Fundatore sanctissimi Ordinis PP. Minimorum: Humilitas quidem tanta ut se suosque omnium MINIMOS & dici & esse vellet: Charitas verò tam sublimis ut vnum Deum respiraret, vnum Eum ab omnibus diligendum vellet, vnam Charitatem in ore haberet, in corde gestaret & in opere exerceret. Hæc videri possunt fusius in eius vita, indeque colligi quò Sanctitatis & Gloriæ peruenerit, cum Gloria respondeat Charitati, siue Gratiæ, & Gratia humilitati, vnde eruitur hæc vniuersalis Veritas valde Practica & valde expendenda: *Hic erit verè maximus qui verè est minimus.*

Ratio quæ affertur est euidens quoad omnes suas partes, nec tanta eget probatione ad intellectum, quanta consideratione ad voluntatem & affectum. Quid enim clarius ex principiis nostræ Religionis quàm quod prima propositione dicitur, qui maximam in hac vita Gratiam seu Charitatem, & parem in alia Gloriam consequetur, hic erit verè maximus? Nam cum vera Magnitudo rei alicuius sit in commensurata proportionem ad suam Regulam; moralis autem nostræ magnitudinis nulla sit alia regula certior quàm Caritatis & Gratiæ Sanctificantis pro hac vita, & Gloriæ beatificæ pro alia; certe qui plus hic gratiæ & plus in cœlo Gloriæ consequetur, hic Diuino & humano iudicio dicetur maior. *Sic inter natos mulierum non est maior Ioanne Baptista*, quia nullus est Gratiâ sanctior. *Sic excellentiorem dicit Apostolus viam Charitatis*, quia nihil est excellentius ad promerendam Gloriam, cuius semen est Gratia, & via certa Charitas. Sic denique paucis sanctus Augustinus quod totâ fusissimè quanta quanta est scripturâ, continetur; *Ille tenet, & quod pater & quod latet in Diuinis eloquiis, qui Charitatem tenet in moribus.* Hinc Ille apte qui orabat, *ô veritas Deus, fac me vnum tecum in Charitate perpetua. Tacet me sape multa legere & audire, in te est totum quod volo & desidero.*

Matth. 11.

1. Cor. 12.

De Laudib.

Carit.

L. 1. delmia

Ch. c. 3.

II. PUNCTVM.

SED qui verè minimus est, maximam Gratiam & Gloriam consequetur. Vere minimus dicitur qui exemplo sancti Francisci se infra omnes alios demittit, qui quo plura & maxima bona facit, eò se magis etiam humiliat, quia se Deo videt magis obli-

Etum, & cum tam multas recipiat Gratias quibus forte alius fidelius vteretur, timeret sibi ab ingratitude & negligentia; qui denique quæ Dei sunt, Deo reddit, nempe gloriam & honorem totius boni, sibi autem quæ sua sunt perpetuò repræsentat, nempe nihilum & peccatum, dicitque cum Propheta Daniele: *Tibi Domine Iustitia, nobis autem confusio faciei.*

Talis autem maximam consequetur Gratiâ & Gloriam, quia sic Deus exaltat humiles, vt promisit; sicut enim Deum maxime honorant humiles; ita eos Deus, vt habet Sapiens: *Quandò magnus es, humilia te in omnibus, & coram Deo inuenies gratiam, quoniam magnam potentia Dei solius, & ab humilibus honoratur.* Sic aptissimi sunt ad Dei dona recipienda, quia seipsis vacui non ad inanem gloriam, non ad propriam commoditatem & iucunditatem, sed ad vnam Dei gloriam, illa recipiunt & referunt. Deus enim cum sit ex se propensissimus ad dona sua conferenda, hoc vno impeditur nobis ea conferre largius, quòd iis abuteremur, vnde quò humiles procul sunt ab illo Gratiarum abusu eò propius disponuntur ad earum receptionem. Refugit natura vacuum in quo nihil operatur: At Gratia qua non sunt eligit, vt quæ sunt destruat. *NON solidum sed inane & cauum intrinsecus facies illud, sicut in monte monstratum est*, nempe altare. Sic Denique præcessit in Capite vt quantum se humiliavit Dominus, tantum & exaltatus fuerit, vnde necesse est vt id sequatur in membris, quemadmodum ipse toties in Euangelio dixit: *Volo ut ubi ego sum, illic sit & minister meus*, qui scilicet mecum fuerit humiliatus, mecum erit in Gloria. Vnde Apostolus postquam de humiliato Christo Iesu: *Propter quod*, inquit, *& Deus exaltauit illum.* Et alibi: *Eum autem qui modico quàm Angeli minoratus est, videmus Iesum, propter passionem mortis, gloria & honore coronatum.* SIC ponit humiles in sublimē. Nonne melius est vt dicatur tibi ascende huc, quam vt humilieris coram principe? *SVPERBVM sequitur humilitas, & humilem spiritu suscipiet gloria.*

III. PVNCTVM.

ERG O hic erit verè maximus qui verè est minimus. Quia hic maximam assequetur Gratiâ & Gloriam in quibus vera est Magnitudo. *Erunt nouissimi primi, & primi nouissimi.*

fini. SIC HONORABITVR quemcumque voluerit Rex honorare. *Esai. 6.*
 Vult autem humilem & solum humilem. Sola est humilitas qua
 exaltat, inquit sanctus Bernardus, sola qua ducit ad vitam: qui ali- *Serm. 2.*
 ter vadit, cadit potius quam ascendit. O peruersitas, o abusus filiorum *de Asc.*
 Adam, quia cum ascendere difficillimum sit, descendere autem facilli-
 mum, ipsi & leuiter ascendunt, & descendunt difficiliter, parati ad ho-
 nores, ad celsitudines graduum Ecclesiasticorum ipsis etiam Angelicis
 humeris formidandas. Sic & grauiter sanctus Bauius: Hac est homi- *Hom. de*
 nis sublimitas, hæc gloria & magnificencia, verè cognoscere hoc quod *hum. th.*
 magnum est & illi conglutinari, ac gloriam à Domino gloria querere.

De necessaria vero conjunctione Charitatis & Humilitatis sic
 præclare sanctus Ambrosius, postquam ex Apostolo retulit Cha-
 ritatem esse patientem, non inflari, non esse ambitiosam; Inflatio
 ergo, inquit, & ambitio possunt destruere Charitatem, possunt euacua- *Lib. 10.*
 re Martyria: huic autem ruina nihil subuenit, quia aut difficile pecca- *Epist. 84.*
 tum suum superbus agnoscit, aut etiamsi intellexerit non currit ad me- *ad Dem. 17.*
 dicum. Hunc autem pestilentia flatum spiritus verae humilitatis &
 verae Charitatis excludit. In nullo enim hæc virtutes ab inuicem diui-
 duntur, & ambarum tam indiscreta connexio est ut qui in vna earum
 construitur, simul utraque potiatur. Sicut enim parens Charitatis est
 Humilitas, ita parens humilitatis est Charitas. Et si illa recolamus qua
 sine hono Charitatis infructuosa esse Apostolus definiuit, inueniemus ea-
 dem similem habere Charitatem, si eis humilitas vera defuerit. Quem
 enim fructum habebit aut cum inflatione scientia, aut cum humana
 gloria fides, aut cum iactantia largitas, aut cum elatione martyrism?

Hæc fructuose omnia, sed illud aptissimum quod ait vnum
 quodammodo totum conflare ex duabus partibus, Charitate &
 Humilitate. Illudque est quod scripsit sanctissimus Gebennensis
 Episcopus, Humilitatem nihil esse nisi Charitatem demissam,
 sicut Charitas est ipsa humilitas exaltata. Sicque in sancto Fran-
 cisco de Paula recte vtramque virtutem sic ad vnam reduxeris, si
 dicas humilitatem eius nihil nisi Charitatem exinanitam seu des-
 cendentem fuisse, & eius Charitatem nihil nisi ipsammet humi-
 militatem impletam & ascendentem. Vade & pete tibi vasa va- *4. Reg. 4.*
 cua non pauca quæ sacro repleantur oleo. Spiritum vobis & vi- *2. Macch. 7.*
 tam reddet sicut nunc vosmetipsos despicitis. SVS CITAT de pul- *1. Reg. 2.*
 uere egenum & de stercore erigit pauperem ut sedeat cum principi-
 bus. QVIA hæc dicit excelsus & sublimis habitans aternitatem & *Is. 72.*

*sanctum nomen eius in excelsis & in sancto habitans & cum contrito
& humili spiritu : ut viuificet spiritum humilium , & viuificet cor
Contritorum. Diuina plane verba.*

Vide plura passim de humilitate , ac præserim in hac 2. parte,
hebdomada 4. Quadragesimæ , Vbi hæc inter alias sat confor-
mis iam expositæ veritati Veritas demonstratur :

Quò quis inferior est in ordine hominum , eò superior
est in Christi ordine.



Die 25.
Aprilis.

DE SANCTO MARCO EVANGELISTA.

Similis factus est Leoni in operibus suis. 1. Macch. 3.

VERITAS PRACTICA.

Fortioris est animi , non vinci à bonis blandientibus,
quam ipsa vincere mala terrentia.

*RATIO EST, quia ubi reperitur maior conflictus & diffi-
cultas, tum fortioris opus est animi.*

*Sed maior est conflictus & difficultas cum bonis blandientibus
quam cum malis terrentibus.*

*Ergo fortioris est animi, non ab illis vinci quam ista vincere.
Quod tamen pauci putant.*

I. PUNCTVM.

L. I. contra
Iovinianum.

NON frustra sanctus Marcus comparatur Leoni, nec pro-
pter eam tantum causam quam refert sanctus Hierony-
mus, quia suum Euangelium inchoat à voce Clamantis in de-
serto , parate viam Domini rectas facite semitas eius ; sed quia vt

dicitur de Iuda Machabæo, *Similis factus est Leoni in operibus suis.* Fuit enim excelsus & generoso animo in superandis quibusvis difficultatibus: quod vel maxime patuit in ea vitæ forma quam Alexandriæ instituit & omnibus Christianis seruandam persuasit, vt refert idem sanctus Hieronymus. *Assumpto*, inquit, *Euangelio quod Ipse confecerat, porrexit in Ægyptum & primus Alexandria Christum annuntians, constituit Ecclesiam tanta doctrina & vitæ continentia, vt omnes Sectatores Christi ad exemplum sui cogeret.* Denique Philo disertissimus Iudeorum videns Alexandria primam Ecclesiam adhuc Iudaizantem, quasi in laudem gentis suæ librum super eorum conuersatione scripsit. Et quomodo Lucas narrat Ierosolymæ credentes habuisse omnia communia, sic & ille quod Alexandria sub Marco fidei Doctore cernebat, memoria tradidit.

Hoc ipsum Callianus Collator sic religiose commemorat *Qui à beata memoria Euangelista qui primus Alexandrina urbi pontifex præfuit, normam susceperè viuendi, non solum illa magnificare tenebant quæ primitus Ecclesiam, vel credentium turbas in Actibus Apostolorum legimus celebrasse, multitudinis scilicet credentium erat cor vnum, &c. verum etiam his multo sublimiora cumulauerant; etenim secedentes in secretiora suburbiorum loca, agebant vitam tanto abstinentiæ rigore distractam, vt etiam his qui erant religionis externæ, stupori esset tam ardua conuersationis eorum professio.*

Hoc igitur tam arduum vitæ institutum vt agrederetur sanctus Euangelista, vt proponeret, vt persuaderet suis, & ad fœlicem tandem exitum perduceret, nonne oportuit eum generosam Leonis indolem esse inuitatum, *Qui, vt ait Sapiens, ad nullius pa-* *Prou. 30.* *uet occursum?* Quot enim difficultates, quot pericula, quot obices non occurrerunt contra tale propositum: quæ omnia inuictus Marci animus superauit? Ipsa certe viuendi ratio cuius erat Author aut certe promotor & exemplar, cum tota fuerit in continentia & iis humanæ vitæ bonis abdicandis quibus carere difficillimum est, non aliter transigi potuit, quàm per continuatos fortitudinis actus qui longe insigniores sunt omnibus aliis qui ex hac virtute procedunt.

Hinc nata Veritas valde expendenda, *Quod fortioris est animi non vinci à bonis blandientibus, quam ipsa vincere mala terrentia.* Et quidem Ratio facilis quoad illam primam partem qua dicitur quando conflictus & difficultas est maior, tùm maioris & fortio-

ris esse argumentum animi, si non vincaris, quam si minor esset difficultas. Sic enim vel ad acuendam fortitudinem ante certamen excitamur, propositis hostium viribus, quemadmodum his
Ephes. 6. nos vrget Apostolus: *Non est nobis colluctatio aduersus carnem & sanguinem, sed aduersus principes & potestates, aduersus mundi retores tenebrarum harum, contra spiritualia nequitia in cœlestibus; Vnde infert, propterea accipite armaturam Dei ut possitis resistere in die malo: Vel quando pugna peracta est, sic victorum Virtus illustrius commendatur, quod plures & robustiores deiecerint: Quod trecenti milites Gedeonis, multa hostium fregerint millia: quod vnus Samson in maxilla asini, in mandibula pulli asinarum, vt ipse aiebat, deleuerit & percusserit mille viros in se irruentos: quod puellus Dauid præualuerit aduersum Philistæum illum Gygantem in funda & lapide: quod nos denique potestates omnes & spirituales nequitias, si volumus, peruincamus. O quanta fortitudo sic posse, ô quanta ignauia sic nolle vincere!*
iud. 15.
1. Reg. 15.

IL P V N C T V M.

SED maior est conflictus & difficultas ne vincaris à bono sensibili & blandienti, quam vt vincas mala terrentia.

Bona illa sensibilia sunt, pecunia, possessiones, delectationes, honores, dignitates & quæcumque appetitum concupiscibilem mouent; quæ quia mouent illum vehementissime, tantus est in his motibus reprimendis labor, vt paucissimos reperiās qui libidinem verè reprimant, vnumque illud allegant, quod sit difficilius. Hæc nempe est *arcta via* quam pauci tenent; contrà vero
Matth. 7. *spatiosa & lata via* quam cæteri omnes percurrunt. *Beatus dives,* inquit Sapiens, *qui inuentus est sine macula, & qui post aurum non abiit, nec sperauit in pecunia & thesauris: quis est hic & laudabimus eum?* Quali dicat rarissimus est, sicut & qui non sectetur honores & quas potest vitæ delicias. *Omnes enim,* vt ait Propheta, *conuersi sunt ad cursum suum: quasi equus impetu vadens ad prælium.* Hæc est caro quæ concupiscit aduersus spiritum. Hæc sunt carnalia desideria quæ militant aduersus animam. Hæc est denique militia & tentatio vitæ hominis super terram. *Inter omnia certamina Christianorum,* inquit sanctus Augustinus, *sola sunt ista prælia castitatis, ubi quotidiana est pugna, & rara victoria. Grauem namque sortita est*

Fortioris est animi non vinci à bonis blandientibus, &c. 863

Castitas inimicum, cui quotidie resistitur & semper timetur.

In sustinendis & vincendis quidem malis vt est morbus, paupertas, frigus, fames & similia, non desunt certe difficultates, sed rariores sunt casus, & hi sunt ita necessarij quando occurrunt, vt vix aliter possint expugnari quàm sustinendo; sicque necessitas facile in virtutem commutatur, & eò etiam facilius quo manifeste patet hanc esse Dei voluntatem vt sustineamus; quandoquidem nullum est aliud mali remedium. *Sustine sustentationes Dei,* Eccles. 2.
coniungere Deo & sustine, ait Sapiens.

At vero in continendis bonis sensibilibus, non ita rari sunt casus, neque rari conflictus sed quotidiani & ordinarij, vt qui carni adhæreant nec à nobis disiungantur; non est etiam illa physica & naturalis necessitas iis continendi quæ est sustinendi mala; nam quisque pro arbitrio, licet male agat, libere tamen potest vel cogitare vel concupiscere vel quouis modo suis indulgere cupiditatibus; Vnde à Sapiente quæritur, *qui potuit transgredi &* Eccles. 32.
non est transgressus, facere mala & non fecit, quia scilicet tam rarus est vt vix vnus aut alter inter sæculares reperiatur. Est ergo conflictus & difficultas longe maior ne vincaris ab his bonis quæ ita demulcent & alliciunt vt tantum absit quod expugnentur, quin potius exquiruntur, & vltro se abjiciunt & sese prouocant homines ad ea consecranda, tamquam ad vnum suæ vitæ bonum: *Venite, fruamur bonis quæ sunt, & utamur Creatura tamquam in iu-* Sap. 2.
uentute celeriter. Vide quæ sequuntur & ingemisce, vel quod ex illis sis, vel quod vt ait Apostolus, *in quibus & nos omnes aliquando conuersati sumus, in desideriis carnis nostræ, facientes voluntatem* Ephes. 2.
carnis & cogitationem.

III. P V N C T V M.

FORTIORIS est igitur animi non vinci à bonis blandientibus quàm ipsa vincere mala terrentia. Hoc est enim seipsum vincere, quod est certamen difficillimum, hoc est certamen forte quod Sap. 10.
Deus permittit sanctis vt vincant & triumphent. Hinc est illa Virtus quæ in perpetuum coronata triumphat, incoinquinatorum cer- 1bid. 4.
taminum præmium vincens. Hoc fusè & diserte sancti Patres, quorum grauissimis verbis non modo intellectus ad veritatis cognitionem instrui poterit, sed & affectus ad eiusdem praxim & quo-

Ep. 10. tidianam exercitationem cum Dei Gratia concitari. *Grandis virtus est*, inquit sanctus Hieronymus, *& sollicita diligentia, superare quod natus sis; in carne non carnaliter vivere, tecum pugnare quotidie, & inclusum hostem, Argi ut fabula ferunt, centum oculis observare.* Tum idem alibi de seipso: *O quoties ego ipse in cremo constitutus, & in illa vasta solitudine qua exusta solis ardoribus horridum monachis præstat habitaculum, putabam me romanis interesse deliciis!* Et quæ plura prosequitur.

L. 1. Offic. c. 36. Sic sanctus Ambrosius: *Reuera, inquit, iure ea Fortitudo vocatur, quando unusquisque seipsum vincit, iram continet, nullis illecebris emollitur atque inflectitur. Quid autem excelsius & magnificentius quam exercere mentem, afficere carnem & in servitutem redigere, ut obedias imperio, consiliis obtemperes?* Sanctus quoque Gre-

In Ps. 2. panis. gorius, *quid fortius, inquit, quam omnes animi sui motus rationi subigere, omnia carnis desideria spiritus virtute frangere, proprias voluntates abiicere, contemptis visibilibus ea qua non videntur amare?*

Lib. 1. In Ps. c. 9. Lactantius etiam egregie postquam illud ex Oratore retulit, *nulla est tanta vis qua non ferro ac viribus debilitari frangique possit; At animum vincere, iracundiam cohibere, fortissimi est qua ille nec fecit umquam nec potuit. Hæc qui faciat non modo cum summis viris comparo, sed simillimum Deo iudico. VELLE M*, inquit, *adjecisset de libidine, luxuria, cupiditate, insolentia ut virtutem eius impleret quem similem Deo indicabat.* Tum de singulis pergens dicere, ostendit fortitudinis gloriam in hoc præcipue sitam esse, *ne ab illis vincaris.* Et certe si turpe est à quoquam vinci, quanto magis ab ipsa turpitudine! *Quantum glorificavit se & in deliciis fuit, tantum date illi tormentum & luctum.*

Plures ex singulis partibus huc facile possunt referri Veritates de quibus vide in indice, Verbo *Fortitudo, Virtus.*



DE SANCTIS PHILIPPO, ET IACOBO APOSTOLIS.

Tanto tempore vobiscum sum, & non cognovistis

*Si tempus respicis comparanda tibi virtutis, vix ullam, &c. 865
me ! Philippe qui videt me, videt & Patrem.
Ioan. 14.*

VERITAS PRACTICA.

Si tempus respicis comparandæ tibi virtutis : vix ullam tibi comparatam respicies.

RATIO est, quia vix ulla est virtus si non respondet tempori aut Gratiis datis.

Sed si tempus respicis comparanda tibi virtutis, vix ullam respicies tempori aut Gratiis datis respondentem.

Ergo & vix ullam tibi comparatam respicies ; quod certe est expauendum.

I. PUNCTVM.

QVM in illo postremo sermone quem Christus Dominus post Coenam habuit cum Apostolis, multa de Patre suo differeret, dicit ei Philippus, *Domine ostende nobis patrem, & sufficit nobis* ; Tum Dominus Iesus ; *Tanto tempore vobiscum sum, & non cognouistis me ! Philippe qui videt me, videt & patrem ! Quomodo tu dicis, ostende nobis patrem ? Non creditis quia ego in patre, & pater in me est !* Et quæ plura pergit Dominus, satis indicant ignorantiam Discipuli non vacasse culpâ, in eoque potissimum omnes redarguit quod cum tanto iam tempore cum illis fuisset, & tam multis sermonibus ac miraculis de Diuinitate sua instruxisset, adhuc essent ita rudes & ignari vt peterent videre Patrem, nec crederent Eum esse in Filio, sicut Filius erat in Patre ; quod etsi tolerari posset cum primùm ad ipsum accedere ; iam vero postquam tamdiu simul sunt commorati, id penitus esse probrosum & intolerandum. Sic sanctus Hilarius ait arguisse Dominum Apostolos, *in cognoscendo se, ignorantes : cum toties vidissent ea quæ gerebat propria Deo esse, vt calcare undas, inbere ventis, peccata dimittere, mortuis vitam reddere.* Sed, vt ait sanctus Ioannes Chrysostomus, eorum ignorantia & imperfectio

nobis reuelatur, vt cognoscamus quales ex se, qualesue ex Spiritu sancto fuerint: Nam ille ipse Philippus qui tanto tempore tam parum profecerat in cognoscendo Christo, sic postmodum eum esse verum Deum agnouit & prædicauit, vt propterea Cruci affixus & lapidibus obrutus fuerit, Hierapoli Phrygiæ. Sanctus item Iacobus. cum interrogatus fuisset à Iudæis quid de Christo sentiret, respondit constantissime illum esse Dei filium; quamobrem in altissimum Ierosolymitani templi locum eum adduxerunt, atque inde præcipitatus, fuste fullonis occisus est. O si tandem aliquando perueniremus eò virtutis & perfectionis quo nos vocat Christus! ô si saltem agnosceremus nos nondum eo peruenisse, & quàm sit modica, aut prope nulla virtus nostra, probe nossamus! sed miseri miseriam nostram ignoramus! & nescis quia tu es miser & miserabilis, & pauper & cæcus & nudus.

Apo. 3.

Ad hanc autem miseriam & paupertatem agnoscendam, opportune ex verbis Domini quibus Apostolos arguebat, *Tanto tempore vobiscum sum, & non cognouistis me*, proponitur Veritas expendenda; *Quod si tempus respicis comparanda tibi virtutis, vix ullam tibi comparatam respicies*. Sicque saltem erit quo te, fauente Deo, possis agnoscere. Ratio vero propositæ veritatis & quæ ex Christi Domini verbis eruitur, hæc est: quod quæ virtus non respondet tempori aut Gratiis acceptis ad eam rectè formandam, non est sufficiens aut vlla virtus. Certum est enim primò virtutis multos esse gradus, & qui gradus sufficeret Nouitio non sufficeret Veterano. Deinde satis constat istam differentiam graduum virtutis ita pendere à Gratiis datis & acceptis vt cui plus datum est plus exigatur ab eo. Denique licet aliquando breui tempore plus gratiarum vni detur quàm alteri per multos annos; ordinarie tamen loquendo, progressus virtutis fit procedente tempore, si videlicet primæ datæ gratiæ & consequentibus respondeat anima, tum Gratia, simulque virtus, crescit velut aurora confurgens, aut vt ait Sapiens, *Iustorum semita quasi lux splendens procedit & crescit vsque ad perfectam diem*.

Luc. 12.

Pron. 4.

Luc. 2.

Sic de Christo Domino dicitur: *puer crescebat & confortabatur spiritu, plenus sapientia*: Et paulo post, *Et Iesus proficiebat sapientia & ætate & gratia apud Deum & homines*, Id est, edebat noua signa virtutis quæ corresponderent ætati, vt nos doceret sic virtutem

tutem nobis esse debere velut coætaneam & eiusmodi gradus ac
vigoris quem exigit temporis & gratiæ diuturnitas. *Ecce tres anni* Luc. 13.
sunt dicebat Dominus vineæ, ex quo venio quarens fructum in fi-
culnea hac, & non inuenio. Vides numerari tempus & annos, &
pro ratione temporis quæri fructum, & expendi virtutem an
adæquetur Gratiis: & si quidem respondeat, tum approbetur
& compenſetur: sin minus, tum reprobetur & puniatur. *Appen-*
sus es, Audi anima, audi quid vni dictum sit & in vno tibi: Nu- Dan. 5.
meravit Deus regnum tuum & complevit illud. Appensus es in sta-
tera, & inuentus es minus habens. Et alteri; *non inuenio opera tua* Apoc. 3.
plena coram Deo meo, quia scilicet non habebat in mente qualiter
accepisset & audisset; nec id ipsum ita seruabat. Vnde planissi-
mum est, virtutem eam quæ non respondet tempori aut Gratiis,
non esse sufficientem, non esse plenam, non esse viuam sed mor-
tuam, vno verbo, non esse virtutem; ac proinde illi viro dicitur
cuius non erant opera plena, *Nomen habes quod viuas, & mortuus* Ibid.
es. O infidum nomen quo virtus nominatur, & nulla est.

II. PUNCTVM.

SED si tempus respicis comparanda tibi virtutis, vix vllam respi-
cies tempori aut gratiis datis respondentem.

Cùm enim Deus sua natura sit liberalissimus & propensissi-
mus ad conferendas Gratias, nos vero contrà valde angusti &
restricti ad eas accipiendas, quòd earum pretium, dignitatem,
necessitatem & vtilitatem nesciamus, aut non cogitemus; certe
verendum est vnicuique, ne cùm multa sic dantur, pauca reci-
piantur: ne cum semen in agro feminatur, pars in spinas, aut la-
pides aut viam omnibus obuiam decidat & nullum fructum fe-
rat. Vndenam putas toties in scripturis conqueri Dominum
quod nullus sit cæcus aut nullus surdus, nisi ad quos misit nuncios seu 15. 42.
Prophetas? Nonne hinc, quia paucissimi sunt qui oblatas reci-
piant gratias: plurimi vero qui respuunt aut quam duntaxat vo-
lunt, particulâ sumunt. *Et locutus sum ad vos de nocte consurgens,*
& loquens: & non audistis. ET misit Dominus ad vos, omnes seruos Ier. 25.
suos Prophetas consurgens diluculo, & non audistis. Et verterunt ad Ibid. 32.
me terga & non facies, cum docerem eos diluculo, & erudirem, &
molles audire vt acciperent disciplinam. ET noluerunt attendere, Zacch. 7.

& auerterunt scapulam recedentem, & aures suas aggrauauerunt ne audirent, & cor suum posuerunt ut adamantem ne audirent legem. Quæ & similia quibus abundant Scripturæ satis indicant tantarum esse prouentum quàm frequentem sementem.

2. Cor. 13. Tu ipse Iudex esto, *Vosmetipsos tentate*, inquit Apostolus, *si estis in fide, ipsi vos probate.* A quo tempore vacas virtuti? quas non accepisti tum Gratias, lumina, motus & quæcumque tibi acquirendæ virtuti sunt necessaria? Iam vero qualis tua virtus? qualis humilitas, patientia, deuotio, mansuetudo, Caritas, Castitas & aliæ tuo magis conformes statui? Itane firmæ ac robustæ omnes prout requirit tempus studij, & Gratia profectus tui! Si tantum temporis posuisses in literis aut arte aliqua comparanda, nec plus profecisses quàm in humilitate profeceris, nonne aperte cognosceres literas tuas non respondere tempori studiorum? Cur non idem cognosces de virtute? an quia nescis ita diiudicare defectum virtutis ac literarum? ô te miserum & miserandum, qui nec dum didiceris agnoscere ipsum profectum vel defectum virtutis!

Etsi certe alia tui defectus argumenta deessent, hoc vnum plane sufficit vt agnoscas quàm longe distes ab eo qui esse deberes, pro ratione positi temporis: cum nec scias agnoscere vtrum ex æquo profeceris! Quàm tibi aptè Apostolus; *Etenim cum deberetis esse Magistri propter tempus, rursus indigetis vt vos doceamini quæ sint elementa exordij sermonum Dei, & facti estis quibus opus lacte sit non solido cibo. Omnis enim qui lactis est particeps, expers est sermonis iustitia, paruulus enim est: Perfeclorum autem est solidus cibus, eorum qui pro consuetudine exercitatos habent sensus ad discretionem boni ac mali.* Nota hæc postrema verba vt videas quicumque hanc non habet discretionem boni & mali, esse ignorantem vt puerum: & illum esse puerum de quo dicitur: *puer centum annorum morietur*; id est, cui virtus non respondet annis: qui est ætate centenarius, & virute decennis.


III. P V N C T V M.

SI tempus ergo respicis comparanda tibi virtutis, vix vllam tibi comparatam respicies: Quia vix vlla erit quæ respondeat tēpori & gratis datis, quibus si virtus non respondet, non est virtus, non

est virtus Sacerdotis quæ esset laici, non est virtus veterani Patris, quæ esset iunioris religiosi, sicut non esset scriptio Rhetoris quæ ^{1. Cor. 7.} posset esse Grammatici. *Unicuique sicut dinisit Dominus.* Hoc est scilicet quod illi clamant in Inferno: *Et virtutis quidem nullum signum* ^{Sap. 5.} *valuimus ostendere.* Putasne nullum prorsus valuisset? non est ita, cum vix sit ullus tam improbus qui non aliquod saltem in vita virtutis signum edat; sed vere tamen se nullum dedisse dicunt, quia tamen aliquam virtutis speciem præ se ferrēt, virtutem tamen reipsa non habebant, quia non habebant virtutem sibi convenientem, virtutem coæuam ætati, virtutem Gratiis respondentem: qui defectus veræ virtutis si anteriora illa tempora maculauerit, quanto magis verendum ne hæc nostra contaminet, cum aperte Apostolus prædixerit: *In nouissimis diebus fore tempora periculosa quibus homines essent seipsos amantes, cupidi, elati, superbi, voluptatum amatores magis quam Dei, habentes speciem quidem pietatis, virtutem autem eius abnegantes.* ^{2. Tim. 3.} Quænam est species pietatis aut humilitatis & Charitatis? Actus quidam exerciti. Quænam eorum actuum virtus abnegata? Illa vis scilicet & illud robur quod ex ætate deberent habere, si ætati responderent: vnde nihil restat nisi species & apparens quædam imago virtutis, virtus autem nulla.

Ephraim factus est subcinericius panis qui non reuerfatur. Comed- ^{Os. 7.} *runt alieni robur eius, & ipse nesciuit: sed & cani effusi sunt in eo & ipse ignorauit.* Aptissima prorsus Prophetæ verba: nam subcinericius panis qui non reuerfatur, licet diu sub cinere iacuerit, non est coctus, nec proinde bonus; sic virtus non exulta: robur autē comestum ab alienis, & effusi cani nescientis & ignari, ipsa est virtus animi deficiens ab ætate, cuius tamen defectum non aduertimus nec cogitamus, sicque fit vt quod ait Iob: *Gigantes ge-* ^{Iob. 25.} *munt sub aquis,* Id est, prouecti ætate laborant defectu virtutis, *Et quid facient cum inspicere caperit Dominus?* Hoc est modo ge- ^{Eccles. 1.} *mendum & prospiciendum.*

Vide in 3. parte, Dominicam 7. & vbi agitur de Renouatione votorum, in fine.



Die 3.
Maij.

IN FESTO INVENTIONIS SANCTÆ CRVCIS.

Notas facite in populis adinventiones eius. Is. 22.

VERITAS PRACTICA.

Si quid forte asperius inueniatur de quo conquereris, de inuenta Cruce conquereris.

RATIO est aperta, quia Crux id omne dicitur quod est asperum in virtute seu diuino cultu. Vt verò melius intelligatur quomodo hæ querimoniae & murmura redundent in ipsam Christi Crucem, sic alia videtur alteri subiicienda Veritas:

Inuenta Cruci tantum quis detrahit, quantum in poenis murmurat.

RATIO est, quia detrabere Cruci est virtutem eius diminuerè. Sed qui murmurat in poenis, tantum diminit virtutem Crucis quantum murmurat.

Ergo & illi tantum detrahit. Quod ne fiat, discè libenter pati.

I. P V N C T V M.

TRES possunt considerari adinventiones Crucis, seu triplex adinuentio Dei, circa Crucem.

Prima quæ hodie colitur quando Helena Constantini Mater Imperatoris Christiani diuino mota consilio, sacrum illud lignum in quo Christus Dominus pependit, inuenit Ierosolymis in monte Caluaria, vbi per trecentos pene annos latuerat. Inuentio est etiam Dei, seu Diuina adinuentio, non quia tantum

diuino, vt dixi, motu facta est, sed quia idcirco facta est vt Christiani hoc salutari signo per vniuersum orbem celebrato, salutis suæ instrumentum & Saluatoris sui memoriam præcipuo cultu venerarentur. *O Crux splendidior cunctis astris. Hæc est arbor dignissima, in paradysi medio situata, in qua salutis author propria morte mortem omnium superauit.*

Secunda Dei adinuentio circa Crucem, est admirandum Diuinæ Sapientiæ consilium quo reparandi humani generis hic adinuentus est modus; Quàm stupendum hoc consilium! qualis adinuentio! quis cogitasset salutem hominum, maximum illud diuinorum omnium opus, in tam vili & probrosa materia quale erat infame lignum Crucis, esse restaurandam? *Christus factus est Gal. 3. pro nobis maledictum, quia scriptum est: maledictus omnis qui pendet in ligno.* Quis vero non demiretur illam Crucis infamiam in tantam modo Gloriam & honorem esse commutatam, vt nihil Cruce sit gloriosius, nihil pretiosius? *Vobis honor credentibus, non 1. Pet. 2. credentibus autem lapis quem reprobauerunt adificantes, hic factus est in caput anguli: MIHI autem absit gloriari nisi in Cruce Domini nostri Iesu Christi, per quem mihi mundus crucifixus est, & ego mundo. Gal. 6.*

Tertia denique adinuentio est, cum ex honore & pretio Crucis in qua Christus Dominus salutem nostram est operatus, inferatur æstimatio & commendatio Mortificationis & tolerantiae, quæ est genus quoddam Crucis de quo Dominus: *Si quis vult post Luc. 9. me venire, abneget semetipsum, & tollat Crucem suam quotidie, & sequatur me.* Sicut enim quod erat infame lignum, per contactum Christi, factum est gloriosum, ita pœnæ & opprobria quæ secundum carnis & mundi sensum erant horrenda, nunc per Christum facta sunt suauia & amplectenda. *O bona Crux qua decorem de S. Andrea, membris Domini mei accepisti!* quod non tam dictum de ligno quam de tormento Crucis, seu de qualibet alia pœna, cuius Dominus tam verè abstulit opprobrium & aculeum, vt non sit minus honorificum & suaue pati quam gestare Crucem. Vndenam ergo nunc inter Christianos de pœnis quas inueniunt murmura? Certe vndecumque veniant & quicumque sint qui sic in pœnis murmurent, Iudaicum, Paganum & profanum aliquid redolere dicendi sunt; cum tantum detrahant honori Crucis cuius hodie honor commendatur, quantum in pœnis murmurant.

Hæc est proposita Veritas ad praxim non minus utilis quam

facilis ad intelligentiam. Quid est enim honori Crucis detraxe-
re, nisi vim eius & virtutem diminueret? Nonne si quis negaret
miracula, sanitates, expulsiões dæmonum, mortuos suscitatos
& alia innumera per sacrum Crucis lignum mirè patrata; si quis
ea derideret quasi per illud lignum nihil tale fieri posset, nonne
Cruci detraheret? Quia scilicet vim eius & virtutem negaret.
Nonne profiteris Crucis signo quod in fronte formas, eam inesse
vim vt dæmones pellat, tentationes arceat, diuinam conciliet
opem, & sexcentis abundet bonis? sit igitur hæreticus aliquis
qui hæcirrideat, nonne is Cruci detrahet? Cur porro nili quia
vim eius & virtutem diminuet? sed absit hoc erroris portentum,
& quod ab ipso nascentis Ecclesiæ primo exordio factum est, sic
semper fiat quod Tertullianus luculente scribit: *Ad omnem pro-*
gressum atque promotum, ad omnem aditum atque exitum, ad vesti-
tum & calceatum, ad lauacra, ad mensas, ad lumina, ad cubilia, ad
sedilia, quacumque nos conuersatio exercet, frontem Crucis signacula
terimus. Harum & aliarum disciplinarum si legem expostules, scri-
pturarum nullam inuenies. Traditio tibi prætenditur auctrix, consue-
tudo confirmatrix, & fides observatrix.

I. de coro-
na mil. c. 3.
& 4.

II. PVNCTVM.

SED qui murmurat in pœnis, virtutem Crucis tantum diminit,
quantum murmurat.

Hæc est enim virtus Crucis vt pœnas acceptas & gratas faciat;
Exodi 15. hoc est lignum, quod in aquis amaris positum dulces illas fecit;
4. Reg. 4. hæc est farina, quæ in ollam coniecta, omnem inde amaritudi-
Jud. 14. nem sultulit; hic fauus mellis, ex ore leonis eductus; hoc est oleum,
quo inunctum iugum computrescit & fit suaue iugum Christi, de
Is. 10. quo tam suauius sanctus Augustinus: *Mansuescisti iugo tuo cer-*
10. Conf. *uicem meam, & nunc porto illud & leue est mihi.* Hic fasciculus myr-
36. *rha*, qui dum inter vbera sponsæ morabitur, nihil est tam aspe-
Cant. 1. rum & insuaue quod non condiatur, vt de se suisque profitetur
Serm. 43. sanctus Bernardus. Denique sicut in Cruce est salus, ita in ea est
A. 2. c. 12. infusio supernæ suauitatis vt est apud Kempensem.

Vndenam porro illa suauitas, illa facilitas nisi à Cruce Chri-
sti? siue quod inde Christus Gratiā promeruerit, siue quod
eius intuitu nos ita formet: siue quod ex eius veneratione, ani-

mus in poenarum amorem facile transeat. Quocumque id denique modo fiat, prope illud est quod in templorum consecratione peragitur dum vnguntur Cruces. *Vos qui expertis estis, inquit sanctus Bernardus, ecce scitis quia vere Crux nostra inuncta est & per Gratiam spiritus adiuvantis, suavis & delectabilis est poenitentia nostra, & ut ita dicam, amaritudo nostra dulcissima.*

*Serm. i. in
Dedic. Ec-
cles.*

Tu vero quisquis murmuras, nonne hanc virtutem Crucis negas aut minuis? Vnde enim murmur tuum nisi ex aduerso animi sensu, quæ poenæ sēsus excitat? Quid porro est aduersus ille animi sensus nisi iudiciū quoddam de amaritudine & acerbitate doloris quem sustines? quod quidem iudicium tuum si verum est, falsum esse necesse est quod de virtute Crucis dicitur, sicque virtutem eius tantum diminuis per murmur, quantum per illud iudicas id esse malum quod per Crucem factum est bonum. Esto sit adhuc sensibilis dolor, non est sublatas per Crucem dolor, sed ille duntaxat animi angor & mœror quem ex dolore percipis, si modo velles ad Crucem Christi attendere; sicut Dæmon dicitur victus & mors mortua per mortem Christi, cum tamen nec Dæmon cesset tentare neque mors vitam abripere, sed quia per mortem Christi facile possumus Dæmoni resistere & aternæ mortis damna euitare, sic mors cogitur *non quidem non adesse sed non obesse*, ait sanctus Bernardus. Ita plane de poenis sentiendum, sic per Crucem Christi sunt mitigata, ut remaneat quidam dolor, sed non angor ille qui murmur excitat, si cum Diuina gratia cogitare velis sic te per poenas conformari Crucifixo, sic te salutem & perfectionem assequi, sic te, vno verbo, tibi certiores gratiæ, gloriæque thesauros cumulare. Vnde quàm verum est hanc esse vim & virtutem Crucis ut illum angorem & murmur possit compescere, tam certo liquet te hanc diminueret virtutem cum adhuc murmuras; nam illi te opponis, eius resistis Gratia, neque minus ei contradicis quàm si negares quod dicitur de eius virtute & potentia, palàmque diceres te contrarium experiri. O te miserum qui cum Christi hostibus expugnas Crucem, à qua poteras contra tuos hostes propugnari!


III. PUNCTVM.

SIC ergo quando quis inuenit aliquid asperum de quo conqueritur, & de inuenta Cruce conqueritur, & inuenta Cruci tantum is de-

trahit, quantum in pœnis murmurat, Quia sic virtutem eius dimi-
nuit quod est illi detrudere, & honorem qui hodie ab omnibus
illi confertur velle quodammodo subtrahere, perinde ac si Crucis
hostis, & de illis esset quos Apostolus vocat, *Inimicos Crucis Chri-
sti!* Certe non alios ita vocat quàm qui terrena sapiunt & delicias
præferunt veris bonis, atque hoc sæpe cùm à se dictum scribat,
nunc se flentem ait iterare ac rursus repetere, cum sic ad Philip-
pens scriberet. Quod & alius Apostolus his apte verbis expo-
nit: *Hi sunt murmuratores, querulosi, secundum desideria sua am-
bulantes.*

Videsne quò impietatis te murmur tuum adigat? Videsne
quàm grauius in pœnas deuoluaris cum de pœnis conquereris!
nihil enim ita celeriter ac seuerè punit Deus quam istos mur-
muratores, vt præclare Iudith suis Bethulitis, vnde & patientiæ
commendandæ sumit argumentum: *Omnes, inquit, qui placue-
runt Deo, per multas tribulationes transierunt fideles. Illi autem qui
tentationes non susceperunt cum timore Domini, & impatientiam
suam & impropriū murmurationis suæ contra Dominum protule-
runt, exterminati sunt ab exterminatore & à serpentibus perierunt.*
*Et nos ergo non vliscamur nos pro his quæ patimur, sed reputantes
peccatis nostris hæc ipsa supplicia minora esse, flagella Domini quibus
quasi serui corripimur, ad emendationem & non ad perditionem no-
stram euenisse credamus. Et dixerunt illi Ozias & Presbyteri; om-
nia quæ locuta es, vera sunt & non est in sermonibus tuis vlla repre-
hensio.*

Vellesne tu illam reprehendere? Nonne tu igitur reprehensi-
bilis es, si murmurare pergis! Custodite ergo vos à murmuratione
quæ non solum nihil prodest, vt monet Sapiens, sed & valde no-
cet vt visum est, vnde idem pergit; & à detractiōe parcite lingua,
quoniam sermo obscurus in vacuum non ibit, os autem quod mentitur,
occidit animam. Vide supra in Quadragesima, singulis pene heb-
domadis & ferijs.



CONSIDERATIONES ET
VERITATES COMMUNES OMNIBVS
STATIBVS.

PRIMA CONSIDERATIO.

NON SINE DEO STATVM
ESSE DELIGENDVM.

*Ua filij desertores, dicit Dominus, ut faceretis
consilium & non ex me; & ordiremini telam,
& non per spiritum meum, ut adderetis pecca-
tum super peccatum, & os meum non interrogastis.
Isaia 30.*

VERITAS PRACTICA.

Præcipitatio animi in statu vitæ deligendo, præcipi-
tium est animæ.

*SENSVS est, quod qui sine Deo temere statum vitæ presen-
tis eligit, timere debet ne statum eligat futura damnationis.*

*RATIO est, quia illi suo in statu timendum est in futuram vi-
tam, qui statum exercet sine ductu & Gratiis Dei.*

*Sed qui sine Deo temere statum vitæ presentis eligit, statum exer-
cet ordinarie sine ductu & Gratiis Dei.*

*Ergo timere debet ne statum eligat futura damnationis; sique
anima præcipitium illa præcipitatio animi quo mouetur in hoc
vel illud vocationis genus, non ritè prius consulto Deo.*

I. P V N C T V M.

VANTI sit momenti hæc Consideratio vel ex hoc liquet, quod non modo totius vitæ præsentis sed & futuræ, necnon æternitatis operosum illud Negotium agitur, cui vni operando creati sumus. Neque vero tantus est labor in cognoscendo & eligendo vitæ statu, si Deum consulas, quantum est periculum ne consulas, & quantum est damnum si statum eligas non consulto Deo. Quamobrem sic est formata Veritas quæ consideranda proponitur, vt serio apprehendas non esse quidquam statuendum sine Deo, de statu vitæ præsentis; cum sic alioquin statueretur de statu futuræ damnationis. Expende singulas propositiones quæ id declarant.

Prima est manifesta; quid enim speret Is aut quid non timeat qui sine ductu & Gratiis Dei statum exercet? An poterit aliquid boni sine Deo? aut si nihil boni præstet, an poterit rectè sperare salutem? an poterit non timere damnationem? Nonne à statu vitæ velut à certa viuendi regula, petenda est Ratio totius boni quod agas, orationum, eleemosynarum, ieiuniorum, & similium bonorum operum quæ ita dependent à proprio cuiusque statu, vt in quo vnus bene, male alius operari posset? Iam vero si status sit à Deo destitutus, neque eius ductus & gratia dirigatur, nonne velut distorta regula quidquid ad eum dirigitur

Math. 7. deprauabit? Si radix est amara, quales erunt fructus? *Numquid colligunt de spinis vnas, aut de tribulis ficus?* si scaturigo luculenta, quales riuuli fluent? si nequam oculus fuerit, nonne etiam,

Luc. II. quod aiebat Dominus, *corpus tuum tenebrosum erit? vide ergo ne lumen quod in te est, tenebra sint; nam si tenebra sunt, ipsæ tenebra*

Math. 6. *quanta erunt:* vide ne infauista illa in te cadant: *Va eis quoniam*

see 7. *recesserunt à me; sed & va eis cum recessero ab eis.*

& 9.

II. P V N C T V M.

SED qui sine Deo temere statum vitæ præsentis eligit, statum exercet ordinariæ sine ductu & Gratiis Dei.

Primo enim qui rem tanti momenti, qualis est electio status, sine Deo constituit, quæ minora sunt sine illo facile agredie-

tur, nec multum curabit ductum eius aut gratias quibus regatur. Illa illa libido quæ traxit animum ad talem vitæ statum, sic constanter inducet ad eum exercendum, vt vix vlllo alio moueatur motu. *Proverbium est*, inquit Sapiens, *adolescens iuxta viam præ suam, etiam cum senuerit non recedet ab ea. VNVS QVISQVE in 15. 53. viam suam declinauit.*

Deinde verò licet oraret, nonne hæc est ordinaria poena peccatorum vt eorum preces difficilius exaudiantur, cum præcipue circa id orant in quo peccauerunt? Si peccatum quidem suum agnoscerent & de instaurando statu cogitarent, forsitan ignosceret Deus, vt alia meditatione vdebitur; sed cum suo in errore permanentes efflagitarent gratias ad illum statum exercendum quem noluit Deus, aut certe in quo eligendo non est consultus, vix eas obtinerent, & iuste remitterentur ad illos quorum consilium potius quam Dei quæsierunt; *Surgant, & opulentur vobis, Deut. 32. & in necessitate vos protegant.* Nam si parentes filium qui se inconsultis matrimonium contraxisset, iure priuarent suis bonis, aut gratiâ quam illi alioquin contulissent, nonne eodem & potiori iure Deus filios illos subtractionis puniet, qui nec eo rogato *Hebr. 10. nec consulto, in statum vitæ se iniecerunt? Va qui pradaris nonne & ipse pradaberis, & qui spernis, nonne & ipse sperneris? Cum consummaueris depredationem, depradaberis, cum fatigatus deficeris 15. 33. contemnere, contemneris.*

III. P V N C T V M.

SIC ergo est, quod qui sine Deo temerè statum vitæ præsentis eligit, timere debet ne statum eligat futura damnationis.


Nam quicumque sit ille status, nisi Deus adsit, quis digne Deo poterit cum exercere? Quis sine Deo tutus, cum etiam adiuvante Deo, tam multi sua culpa cadant? Quis porrò iustus à Deo dici potest in statu exercendo deferri quàm qui dum statum eligeret, Deum deseruit? Nonne illis iam pridem dictum, *dereliquistis Dominum vt dereliqueret vos? quantumcumque sint 2. Par. 24. illi prudentes, peribit sapientia à sapientibus eius, & intellectus prudentium eius abscondetur. Va qui profundi estis corde, vt à Domino abscondatis consilium, quorum sunt in tenebris opera, & dicunt, quis videt nos, & quis nouit nos? peruersa est hac vestra cogitatio, quasi sc-*

878 2. *Consid. De non differenda status seu Vocationis, &c.*

lutum contra figulum cogitet & dicat opusfactori suo, non fecisti me, & figmentum dicat fictori suo, non intelligis.

Quamobrem id summo opere præcauendum, & audiendus in
Ecclesi. 32. primis Sapiens: *fili, sine consilio nihil facias, & post factum non pœ-*
nitebit. In via ruina non eas, & non offendes in lapides: nec credas te
via laboriosa, ne ponas anima tua scandalum. Rursumque Idem
Ibid. 37. & apertius. *Cor boni consilij statue tecum, non est enim aliud pluris*
illo. Anima viri sancti enuntiat aliquando vera, quàm septem Cir-
cumspectores sedentes in excelsa ad speculandum. Et in his omnibus de-
precare Altissimum, ut dirigat in veritate viam tuam. LOQVERE
I. Reg. 3. Domine quia audit seruus tuus. NOTAM fac mihi viam in qua am-
Pf. 142. bulem, quia ad te leuaui animam meam. Eripe me de inimicis meis Do-
mine, & doce me facere voluntatem tuam, quia Deus meus es tu.
Spiritus tuus bonus deducet me in terram rectam propter nomen tuum:
Domine viuificabis me in aequitate tua.

De Diuina autem voluntate agnoscenda circa statum, vide
plura in libris de Ordine, atque hîc in Meditatione vernacula.



CONSIDERATIO SECVNDA.

DE NON DIFFERENDA STATUS SEU VOCATIONIS COGNITAE ACCEPTATIONE.

*Non tardes conuerti ad Dominum, & ne differas
de die in diem. Ecclesi. 5.*

VERITAS PRACTICA.

Non euitat præcipitium sed mutat, qui ne nimis sit
præceps, nimis est lentus.


RATIO est, quia præcipitium euitandum de quo hic agitur, hoc est,
ne quid in statu eligendo fiat contra vel præter voluntatem Dei.

Non euitat præcipitium sed mutat, qui ne nimis, &c. 879

Sed si nimis sis lentus vel ad inquirendam vel acceptandam Diuinam voluntatem, fieri poterit aliquid contra ipsam Dei voluntatem.

Ergo non euitat præcipitium sed mutat qui ne nimis sit præceps, nimis est lentus; ac propterea sicut tamdiu deliberandum est de vitæ statu, donec cognoscatur Dei voluntas: sic eâ cognitâ, non est diutius dubitandum, nec differenda status acceptatio.

I. PUNCTVM.

 *V*Æ in omni negotio cauenda maxime sunt duo illa extrema, præcipitatio & tarditas: ea præcipue sunt in statu vitæ deligendo euitanda. Neque minus periculi aut detrimenti est in vno extremorum quàm in alio, cùm ex vtroque perinde, ni caueatur, periculum sit, ne quid præter aut contra Dei voluntatem fiat, quod est maximum in hac materia detrimentum. Quamobrem sicut antè prouisum est ne quid præcipientes, ita modò ne differas: & eadem prorsus vtriusque est ratio quæ à Diuina Voluntate petitur & in Veritate proposita continetur.

Sic ergo habe, totum hoc negotium in hoc vno verti, vt voluntas Dei de nobis agnoscatur & fiat. Hæc vna deliberandi causa, hæc vna præcipitationis cauendæ ratio; hæc vna est legitima ad illos responsio qui temerè contra postulantes religiosum habitum, fremunt & obijciunt, vbique & in vnoquoque statu Deum posse coli, ac salutem æternam comparari; Non est enim hoc aliter verum de vnoquoque singulari, quàm si fuerit in suo statu, id est, in eo quem destinauit illi Deus. *Secundum propositum voluntatis suæ*, inquit Apostolus, *secundum propositum eius qui opera-* Ephes. i. *tur omnia secundum consilium voluntatis suæ, vt simus in laudem gloria eius.*

Cùm enim Diuina Sapiencia sic mundum regat per varios hominum status, vt videmus; prouidit ipsa quem cuique statui potissimum applicaret, singulisque naturales dotes, talenta & gratias destinauit quibus non in hac tantùm vita rite suum illud munus obirent ad quod vocati sunt, sed & æternam inde vitam ac

beatitudinem promererentur. Sit vero aliquis qui temerè se in statum præcipitet non quem destinaret Deus, sed quem sua libido proposuit; illumne putas hominem tam certò suam salutem in hoc suo statu consequuturum quàm in illo alio cœlitus destinato? Caue id putes; non quod status ille sit malus, sed quod non ille sit quem volebat Deus, & cui propterea suas gratias attexuerat, quarum præsidio seruandus erat is qui earum defectu peribit in alio statu quem nolebat Deus. *Velut si quis festinet ad laqueum, & nescit quod de periculo animæ illius agitur.*

Pr. 7.

Id ergo plane pendet à prima illa Dei quam Apostolus vocat *Voluntate Bonitatis*, qua scilicet de vnoquoque benigne statuit non quidem absolute sed conditione adiecta si velit, si consentiat, si cooperetur; *Oramus*, inquit, *semper pro vobis ut dignetur vos vocatione sua Deus noster, & impleat omnem voluntatem Bonitatis*; Tum enim demùm beatus is qui se illi primæ voluntati accommodet & totum conformet; si quis vero dissentiat & aliter de se suisque ordinet, nihil nisi distortum, inordinatum, confusum, & perturbatum expectet, quia non habet Deum prouisorum & adiutorem, *quoniam obtriuuit Dominus confidentiam tuam, & nihil habebis prosperum in ea. NOLITE ascendere, non est enim Dominus vobiscum, ne corruatis coram inimicis vestris.*

Ier. 2.

Exodi 14.

Hæc est ergo ratio cur sic deliberandum est ante statum, ne quid scilicet contra hunc Diuinum ordinem statuatur, vnde in totam vitam atque ipsam etiam æternitatem pernicies importaretur. Errauerunt ab vtero, loquuti sunt falsa, furor illis secundum similitudinem serpentis, sicut aspidis surda & obturantis aures suas, qua non exaudiet voces incantantium, & venefici incantantis sapienter. Hæc si attente perpendas, videbis quàm apta sint & congrua. Sed & egregius est locus apud Isaiam qui his opportunè accommodari posset: *Et vos qui dereliquistis Dominum, qui obliti estis montem sanctum meum, qui ponitis fortuna mensam & libatis super eam. Numerabo vos in gladio, & omnes cade corruetis: pro eo quod vocavi & non respondistis: locutus sum & non audistis, & faciebatis malum in oculis meis, & quæ nolui, elegistis: Propter hoc, hæc dicit Dominus Deus: ecce serui mei comedent & vos esurietis. Et quæ plura pergit in hunc sensum quo declaratur tam male futurum his qui sibi sine Deo statum vitæ eligunt, quam bene aliis.*

Pf. 57.

Is. 65.

II. PUNCTVM.

SED si nimis sis lentus vel ad inquirendam vel ad acceptandam Diuinam voluntatem, periculum est ne quid fiat contra ipsam Dei voluntatem.

De inquirenda quantocyus Diuina voluntate satis per se patet & ex superiori Consideratione manifestum relinquitur. Nunc vero de acceptanda sine dilatione quando cognoscitur: seu de fugienda tarditate in acceptando statu cognito, ne forte vquam acceptetur si nimis differas, secunda hæc propositio potissimum est intelligenda. Ac primo quidem illa dilatio licet totum negotium non penitus destrueret, ita tamen displicet Deo qui *Prou. 3.* iubet statim dari quod noris dandum, neque in crastinum differri quod hodie possis, vt merito timeri possit ne quid periculi & detrimenti ab ea dilatione proueniat. Sic enim Sapiens postquam dixit: *Non tardes conuerti, nec differas*, statim addit, *subito enim* *Ecclesi. 5.* *ueniet ira illius, & in tempore vindictæ disperdet te.*

Secundo, minus paratum indicat animum quàm par esset ad cultum Dei: Quid enim nutas cum noris quid velit Deus? hoc vnum erat exquirendum, hoc vnum in deliberationem venerat, quod cum sit modo manifestum, quid est quod rursus deliberas? quid est quod dubitas aut longius differs? *Quid adhuc retardatis,* *Ecclesi. 5.* ait Dominus, *& quid dicitis in his*, quæ sunt scilicet tam manifesta vt non sit dubitandi locus!

Tertiò denique quod caput est, cum nihil sit leuius & inconstantius humana voluntate, hoc vnum cunctationes illæ producunt, vt nihil tandem fiat, nihil eorum quæ deliberaſti, aut quæ facta deliberatione statuisti; quod ex triplici capite prouenit. Primò quidem ab inconstantia humana quæ se facillimè diuersas rapit in partes quando sibi relinquitur. *fasciatio enim nugatio-* *Sap. 1.* *nis obscurat bona, & inconstantiā concupiscentia transuertit sensum.* Deinde verò à Dæmone qui si deliberationem impedire non potuit, conatur effectum retardare & penitus detorquere, sub prætextu consilij certioris capiendi, vel aliqua etiam pietatis prætentâ causâ: *permitte me primum ire, & sepelire patrem meum.* Ac *Matth. 8.* tandem ipse Deus tali offensus mora & tarditate, hominem deserit, lumen ab intellectu subtrahit, affectum & voluntatem, &

Prov. I.

Linc. 7.

Ps. 106.

Ps. 118.

cogitationem & memoriam subvertit omnem. *Vocavi & renuistis, despectistis omne consilium meum ! CONSILIVM Dei spreuerunt in semetipsos.* Vnde postremò fit vt miseranda illa anima quò se vertat nesciat, vbique tenebras, vbique luctus, vbique damnum timet. *Ascendunt vsque ad cœlos, & descendunt vsque ad abyssos, anima eorum in malis tabescat, Turbati sunt, & moti sunt sicut ebrii, omnis sapientia eorum deuorata est.* O quàm ille sapientius qui dicebat: *paratus sum & non sum turbatus, vt custodiam mandata tua.*

III. PUNCTVM.

Is. 48.

NON euitat ergo precipitium sed mutat, qui ne nimis sit praeceps, nimis est lentus: quandoquidem ex hac lentitudine & tarditate non minus est periculi ne diuina fiat voluntas in eligendo statu, quàm ex precipitatione, & inconsulta deliberatione. *Fertilis fuit Moab ab adolescentia sua, & requieuit in facibus suis, nec transfusus est de vase in vas, & in transmigrationem non abiit, idcirco permansit gustus eius in eo, & odor eius non est immutatus.* Tum post multa inde futura damna, sic Propheta pergit *pauor & fouea & laqueus super te, o habitator Moab, dicit Dominus. Qui fugerit à facie pauoris, cadet in foueam: & qui conscenderit de fouea, capietur laqueo.* Sic plane qui lentiores sunt: sic inopes redduntur consilij vt omnia timeant, & vnum fugiendo periculum in aliud incidunt. Posset quidem differri exequutio propter iustas causas, sed non acceptatio & præparatio animi ad exequendam Dei voluntatem, cum perinde periculum sit ne vmquam fiat si sic retardetur, atque si non esset deliberatum de illa Dei voluntate cognoscenda.

Iob. 17.

Si sustinero, inquit Iob, id est, si tardauero: infernus domus mea est. O quale verbum & quàm diligenter expendendum. Primo quidem intelligi potest de ipso loco tormentorum, qui certe tam timendus est si non fiat Dei voluntas, quam certum est nullam esse salutem non facienti voluntatem Dei. Secundò domus, id est, mansio, status exterior vitæ, infernus est retardanti, & non facienti voluntatem Dei, nam omnia inordinata, vt dixi, confusa, susq; deq; versa, *Ibi nullus ordo sed sempiternus horror inhabitat.* Tertiò, domus interior est Conscientia, & est Infernus ille inferior de quo Dauid, *eruisti animam meam ex inferno inferiori,* talis


Ps. 87.

vero.

Non euitat precipitium sed mutat, qui ne nimis, &c. 883

vero domus est Cunctatori, cum vndique stimuletur & quibusdam dubiorum atque angorum aculeis constringatur. *Expecta- lob. 30: bam bona & venerunt mihi mala, prestolabar lucem, & cruperunt tenebra: quia tu scilicet nimis expectasti. Huc etiam atque etiam refer & reuolue quod supra dictum est ex Propheta: omnes in is. 63: cade corruetis pro eo quod vocavi, & non respondistis, locutus sum & non audistis.* Nam si quis vnumquam in tumultu, vel in seditione aut repentino casu pereat, ille est ordinarie qui bonum distulit quod iam facere debuisset. *Caue: & Memor esto, quoniam Ecclesi. 14: mors non tardat, & testamentum inferorum quia monstratum est tibi:* Id est, decretum mortis, & infamiae mortis, ni caueas. Ac tandem: Quo longius differs, difficultatem difficiliter tolles.

Vide in 1. parte, Feria 2. hebdom. 4. post Epiphaniam.



CONSIDERATIO TERTIA.

QVO DIE SVSCIPITVR ADMINI-

STRATIO STATUS, VT PERFECTE

SECUNDVM DEVM EXPLEATVR:

VEL QVOCVMQVE DIE, DE OFFICIO

RITE ADMINISTRANDO

COGITETVR.

Dicite Archippo, vide ministerium quod accepisti in Domino, vt illud impleas. Coloss. 4.

VERITAS PRACTICA.

Sicut à Domino quærendum est officium: ita in officio quærendus est Dominus.

SENSVS planior est, quod quâ ratione probatur ministerium à Domino esse accipiendum, eadem prorsus concluditur, eius
2. Pars.

Tttt

administrationem ad Dominum esse referendam.

RATIO EST, quod idcirco precipue à Domino Deo ministerium est accipiendum, quia Dominus est, & sic Dominus vita nostra agnosci debet & coli.

Sed hæc eadem ratio exigit ut omnis administratio ad eum referatur.

Ergo æquè est referenda : Et sicut à Domino querendus fuit status seu officium, sic in officio exercendo querendus est Dominus ; non vanus honor, non mundi gloria, non emolumentum proprium, aut quid terrenum simile.

L P V N C T V M.

In Ps. 118.

VERISSIME & aptissimè sanctus Augustinus de omni negotio ac potissimum de officio suscipiendo ; Magni, inquit, interest cum aliquid boni facimus, cuius rei contemplatione facimus. Officium quippe nostrum non initio sed fine pensandum est, ut scilicet non tantum si bonum est, sed precipue si bonum est propter quod facimus, cogitemus. Hos oculos quibus contemplamur quare facimus quid facimus auerti poscit (David) ne videant vanitatem, id est, ne hanc attendat propter quam faciat cum boni aliquid facit: Et post multa de hac vanitate seu amore laudis humanæ sic pergit: Porro si vanum est propter hominum laudes bona facere, quanto vanius propter adipiscendam pecuniam, vel augendam sue retinendam, & si quid huiusmodi est commodi temporalis quod nobis accidit extrinsecus: propter ipsam denique temporalem salutem non debemus facere bona opera nostra, sed potius propter illam quam speramus eternam ubi bono immutabili fruamur, quod est ipse Deus.

Ex quibus sanctissimi Patris verbis collige quod nisi aduertatur initio suscipiendi muneris aut alterius boni operis faciendi, statim adrepunt animo tres illi Concupiscentiæ naturalis motus, *Vanitas, Voluptas & Commoditas*, in iisque tota intentio operis defigitur & deprauatur. Quamobrem id maximopere præcauendum, & discendum hodie, Quod si ministerium à Domino est accipiendum, eius quoque administratio prorsus ad ipsum est referenda. Eadem quippe est vtriusque ratio, ut attente conside-

Sicut à Domino querendum est officium, ita in officio, &c. 88

ranti patet. Quid est enim quod à Domino ministerium seu officium quodlibet sit sumendum, nisi quia Dominus sic vitæ nostræ Dominus agnosci debet & coli? Nam cum reuera simus eius serui & filij, atque nostræ seruitutis & obseruantiaë testimonia & notas proferre debeamus quoties sese occasio dederit, & maxime quoties postularit, id autem postulet & ratio suadeat, vt in officio suscipiendo quod est tanti momenti ad reliquam vitam, eius voluntatem & ordinationem spectemus; profecto ista subiectio & dependentia denegari non debuit cum à filiis deferatur parentibus, & nos longe plura Deo quam filij progenitoribus debeamus. *Numquid non ipse est pater tuus, qui possedit te, & fecit* Dent. 32. *& creauit te?* Vnde si quis hoc tam debito deesset officio, tantam incurreret ingratitudinem vt in eam prouocentur cœli & terra. *Audite cœli, & auribus percipe terra quoniam Dominus loquutus est: Isrl. filios enutriti & exaltaui, ipsi autem spreuerunt me: Cognouit bos possessorem suum, & asinus præsepe Domini sui, Israel autem me non cognouit, & populus meus non intellexit.*

II. PUNCTVM.

SED hac ipsa Ratio exigit vt ad Deum omnis administratio nostræ officij referatur. Sic enim verè Dominus vitæ nostræ agnosceatur, cum non modo præcipuam sed singulas eius partes in eius obsequium impendemus; *Per singulos gradus meos pronuntiabo ill-* Iob 31. *lum,* aiebat Iob: Sic verè à nobis id exigit vt cum nobis non sumus nati, non nobis etiam laboremus & operemur, sed ipsi à quo toti sumus & pendemus, cui totum debemus quod sumus, & cui totum postquam reddiderimus, *serui semper inutiles sumus, quod* Luc. 17. *debuimus facere, fecimus.* En omnes Creaturas nostro ministerio deputat, quin & Angelos nobilissimas illas intelligentias, nostræ salutis & incolumitatis administratos ordinauit, vt sic illi obsequi nosque totos illius obsequio mancipare disceremus, quale id probum esset non deferre Deo quod Creaturæ nobis non denegant! Audi quid omnes loquantur apud Hugonem Victorinum; *Vide homo, dicit mundus, quomodo amauit te qui propter te, fecit me: Seruio tibi quia factus sum propter te, vt seruias illi qui fecit & me & te: me propter te, & te propter se: si sentis beneficium, redde debitum; si accipis benignitatem, redde Charitatem.* Adde quod Crea-

- tor ipse & Dominus plus tibi quodammodo seruit quàm tu ipsi :
147. 17. In ipso enim ita viuimus, mouemur & sumus vt sine ipso ne pedem, ne manum mouere possimus; sine ipso nihil prorsus boni
2. Cor. 3. nec agere nec cogitare. *Non enim sumus sufficientes cogitare aliquid à nobis quasi ex nobis, sed sufficientia nostra ex Deo est*, Quid ergo non meretur ex quibuscumque ministerij & vitæ nostræ partibus, qui primus & præcipuus eius operator existit? An verò aliquid ipse agat nisi propter se? Potestne Deus alium habere finem
148. quàm seipsum? *Propter me, propter me, faciam, & gloriam meam alteri non dabo. Ego ipse, ego primus, & ego nouissimus*. Si autem nos cum ipso & ille nobiscum vna eademque simul operatione conuenimus, quid decentius quid rationabilius quam vt nos in idem vna etiam eademque prorsus intentione coeamus? ac proinde sicut ipse nihil quam se solum aut propter se alia, sic nos nihil aliud præter ipsum aut propter ipsum attendamus?
- Rom. 14. *Nemo nostrum sibi viuit & nemo sibi moritur*, ait Apostolus, *sive enim viuimus, Domino viuimus; sive morimur, Domino morimur. Sive ergo viuimus, sive morimur, Domini sumus. In hoc enim Christus mortuus est, & resurrexit, vt mortuorum & viuorum dominetur.*

Admiranda plane verba & quæ propositionem nostram valde confirment, siue consideres quid fecit viuens Christus & quid meruit moriens; siue expendas illud quod dicitur *vt viuorum dominetur sicut & mortuorum*. Videsne quomodo mortuorum dominatur? quomodo toti sunt eius, siue in cælo, siue in purgatorio, siue etiam in inferno: nullibi enim aliter quam prout ipse ordinauit, sese prorsus quisquam mouet: sic viuorum dominari posset si vellet: sed quia liberi sunt quamdiu viuunt, ideo non dominatur nisi velint, velle autem debent quia sic meretur Dominus: *& dignus est plane morte*, inquit sanctus Bernardus, *qui tibi Domine Iesu recusat viuere, & mortuus est, & qui tibi non sapit desipit, & qui curat esse nisi propter te, pro nihilo est & nihil est. Propter te ipsum Deus fecisti omnia, & qui vult esse sibi & non tibi, nihil esse incipit inter omnia. Quod & grauitè sanctus Cyprianus, ipse de seruo tuo exigis seruitutem & homo hominem tibi obedire compellis, & cum sit vobis eadem sors nascendi, conditio vna moriendi, corporum materia consimilis, animarum ratio communis: nisi tibi pro arbitrio tuo seruiatur, nisi ad voluntatis obsequium pareatur, imperiosus & nimis seruiutis exactor flagellas, verberas, fame*

Ser. 20. in
cant.

Contra De-
merid.

Sicut à Domino quaerendum est officium, ita in officio, &c. 887

sitque frequenter & carcere affligis & crucias; & non agnoscis miser Dominum tuum, qui sic exerceas in homine dominatum!

III. P V N C T V M.


SICUT ergo à Domino quaerendum est officium, ita in officio quaerendus est Dominus: seu quod idem est, qua ratione ministerium est à Domino accipiendum, eadem profus eius administratio est ad Dominum referenda; cum ut est Dominus non modo in principia vitae parte aut aliquo ministerij gradu sit à nobis colendus, sed in singulis quibusque partibus: adeo ut toti eius & voluntate & effectu simus, sicut debito toti sumus. *Reddite quae sunt Dei Deo, CORPVS, animam voluntatem,* inquit sanctus Hilarius; *ab eo enim hac profecta, atque aucta retinemus: proinde condignum est ut ei totum reddant cui debere se recolunt & originem & profectum.* *Math. 22.*

Et certe quid prodesset tantopere deliberare in statu deligendo, si cum statum accepimus & administramus, non Deum sed vanitatem, commoditatem aut quid aliud infimum quaereremus? Nonne propterea vel maxime cautio est adhibenda in electione status ne si Deum non consulamus, ut dictum est; ex vanitate, vel voluptate, aut aliis concupiscentiis in officium aliquod temere nos iniiciamus, unde illa detrimenta quae considerata sunt importarentur in totam vitam, imo in totam aeternitatem? Iam vero, esto elegeris qua par est religione & ratione statum tuum, nec quemquam acceptaris nisi quem putas velle Deum: Quid te iuuabit haec electio aut deuotio si dum administras statum, id administratione sequaris quod electione fugisti? Eligendo statum seu officium, cauebas Concupiscentiam: & in exercendo post officio non times ipsam consecrari? Quale hoc portentum & crimen putas nisi prauaricatorē te constituere, cum qua destruxisti Gal. 2. rursum adificas? Sic aperte Apostolus, qua de re supra fufissimē, & modo etiam satis, si quod idem vrget expendas: *Miror quod sic Ibid. 1. iam cito transferimi ab eo qui vos vocauit in Gratiam Christi.*

Nonne idem Deus & idem Dominus post electum & acceptatum statum atque in ipsa electione & acceptance status? Nonne idem debitum seruitutis tuae ut ne administres illum tuum statum nisi propter ipsum, sicut ne statum eligas nisi per ipsum? Nonne una & eadem ipsius voluntas est, ut ab eo pendeas, illique

888 4. *Consid. De ordinando statu, si forte sit inordinatus.*

vni viuas siue in inchoando siue in producendo aut perficiendo quolibet munere? An vna pars vitæ & muneris illius est & non alia? Num locus aliquis vbi non sit præsens: aut tempus aliquod vbi non sit Deus & Dominus tuus? Cur ergo tu alius, cur tu à te in alium translatus, aut potius cur à Deo in teipsum male immutatus & peruersus? Responde si vales, aut si non vales, caue sic interrogaris, & *Vide ministerium quod accepisti in Domino ut illud impleas*, nihil aliud in eo spectando quam quod ipse spectauit. Quidquid proponat mundus, quidquid suggerat Concupiscentia, semper illud Prophetæ vigeat & praualeat, qui postquam dixit: *Inimici hominis domestici eius: Ego autem, inquit, ad Dominum aspiciam, expectabo Deum Salvatorem meum.* Tota de his est hebdomada 5. post Epiph. in 1. parte: vbi & vide quarto Ianuarij. Et in 3. parte, Feria 6. hebdomadæ nonæ. Necnon suprâ Die 24. Februarij.



CONSIDERATIO QVARTA.

DE ORDINANDO STATV, SI FORTE SIT INORDINATVS.

Scrutemur vias nostras, & queramus & reuertamur ad Dominum. Thren. 3.

VERITAS PRACTICA.

Reuocanti hominem Deo ab errore viæ suæ, non obsequi peius est, quàm primò vocantem ne erraret, non sequi.

RATIO est, quia quod maiori Dei Bonitati opponitur, illud censendum est peius.

Sed maior est Bonitas Dei, reuocare errantem quàm primò vocare ne erret.

Ergo tùm peius est non illi obsequi.

I. PUNCTVM.

INORDINATVM statum hîc dicimus qui contra vel præter ordinem & dispositionem Dei est susceptus, vno ex his tribus modis. Primus cum nullo modo consultus est Deus, sed humano tantum consilio de re deliberatum est, vnde acciderit alium forte statum fuisse electum quem non luisset Deus: *Qua nolui, elegerunt.* Secundus, cum in suscipiendo statu aliqua iniustitia interuenit, vt sunt contractus dolosi, simoniæ, fraudes, circumuentiones, fallaciæ circa ætatem, capacitatem & similia de quibus dicitur: *Non est veritas non est misericordia, & non est scientia Dei in terra. Maledictum & mendacium & homicidium & furtum & adulterium inundauerunt, & sanguis sanguinem tetigit, propter hoc lugebit terra.* Tertius, cum sola vel ambitione, vel terrenæ commoditatis respectu, aut sensualis delectationis motu res tota transacta est, *concupierunt concupiscentiam.* Sicut enim terrena & humana vacatio bono & laudabili fine suscepta, laudem meretur & merito salutis æternæ deseruit; sic etiam Ecclesiastica licet & spiritualis si viriosâ & culpabili intentione assumatur, inordinata est. Sic expressè sanctus Augustinus, *finis quò referuntur ea qua facimus, id est, propter quem facimus quidquid facimus, si non solum inculpabilis sed etiam laudabilis fuerit, tunc etiam facta nostra, laude aliqua digna sunt: sin ille merito culpatur, quem spectamus & intuemur cum in aliquo versamur officio, id quoque officium nemo improbandum vituperandumque dubitauerit.* Quomodo vero status sic inordinatus ordinari potest, diceretur aptius tertio puncto, postquam animus ad debitum ordinem reuocandum exarserit consideratione Veritatis propositæ. Sic igitur habe & diligenter expende, *Quod reuocanti hominem Deo ab errore viæ suæ, siue ab inordinato statu, peius est non obsequi quàm primo vocantem ne aliquo ex tribus dictis modis errares, non sequi.*

Ratio est euident, quia quod maiori Dei Bonitati opponitur, illud censendum est peius. Cum enim malum sit oppositio quæ dicitur priuatiua, boni; certè quo bonum illud est melius, eò peior est etiam eius priuatio. Et licet omne peccatum opponatur Bonitati Diuinæ, atque ex ea parte sit graue malum, quia tamen

1f. 66.

osu. 4.

Pf. 105.

L. 2. de
Morib.
Manich.

890 4. *Confid. De ordinando statu, si forte sit inordinatus.*

Bonitas illa maior ac maior apparet in nonnullis casibus, tunc humana malitia quæ illi resistit, eo peior censenda est quo Bonitas maior. Sic peccata in Spiritum sanctum, id est, in Diuinam Bonitatem idcirco grauiora dicuntur aliis & eorum remissio
Math 20. longe difficilior. *An oculus tuus nequam est quia ego bonus sum?*
Act. 7. *DVR A ceruice & incircumcisis cordibus & auribus vos semper spiri-*
Matth 23. *tui sancto resistitis! NON habebit remissionem in aeternum, sed reus*
erit aeterni delicti.

II. PUNCTVM.

SED maior est Bonitas Dei, reuocare errantem quàm primò vocare, ne erret.

Certe magna est Bonitas primo vocare, præuenire, mentes excitare, si quis est paruulus, veniat ad me. BONITATEM feci, sibi cum seruo tuo. Sed longe maior apparet illa Bonitas quando iam semel aut pluries contempta fuit, quando iam vocanti est illi opposita via, quando iam latus præelectus, quando iam statuta vitæ degendæ ratio: quando iam notum fecit nobis Sacramentum voluntatis suæ, ut vocat Apostolus, & nos nulla eius ratione habita, facientes voluntatem carnis & cogitationem, nos tamen requirit, & reuocat, Redite ad cor, conuertimini filij reuer-
Dr. 9. *Ps 118.* *Ephes 1.* *1or 3.* *Sap. 12.* *tentes, dicit Dominus, quia ego vir vester: Ah tùm certe, diuitia sunt & thesauri Bonitatis.*

O quàm bonus & suavis est Domine spiritus tuus, ideoque eos qui exerrant corripis, & de quibus peccant admones ut relicta malitia credant in te Domine! Videsne hanc potissimum à Sapiente poni notam Bonitatis Diuinæ, quod errantes requirat & corripiat? sic agnoscebat sanctus Augustinus: Tu Domine licet in cunctis operibus tuis sis mirabilis, mirabilior tamen es in operibus pietatis. Si pœniteo, parcis: si reuertor, suscipis: dum differo, præstolaris: reuocas errantem: inuitas repugnantem, expectas torpentem, amplexaris redeuntem. Hoc est certe mirum! Vel tam bonum esse patrem erga tam malos filios: vel tam malos esse filios, erga tam bonum Patrem.

III. PUNCTVM.

III. P V N C T V M.

SIC igitur reuocanti hominem Deo, ab errore via sua, non obsequi peius est, quàm primò vocantem ne erraret, non sequi: Quia maior est bonitas Dei sic renocare hominem: & maior est malitia hominis sic maiori Dei bonitati resistere. Quod vtrumque Ieremias luculentè describit; *Tu autem fornicata es cum amatoribus multis, tamen reuere ad me, dicit Dominus, & suscipiam te. Ergo saltem amodò voca me: pater meus, dux virginis meae tu es. Numquid vidisti quæ fecit auersatrix Israel? abiit sibi super omnem montem excelsum, & sub omni ligno frondoso; Et fornicata est ibi. Et dixi: cum fecisset hæc omnia, ad me reuere, & non est reuersa. Quali diceret, in hoc apparet maxime eius malitia quod non reuersa sit, sicut apparebat mea bonitas cum illam reuocarem.*

Sic paucis sanctus Anselmus contra induratos quos ipso Dæmone peiores esse sic ostendit à bonitate Diuina cui resistunt: *Diabolus persistit in malitia, Deo reprobante; Ego vero Deo reuocante. Ille obduratur ad punientem, ego ad blandientem: Et si uterq; contra Deum, Ille contra non requirentem se, ego contra morientem pro me. Ecce cuius imaginem horrebam, aspicio in me horribiliorem. Potestne aliquid peius & deterius cogitari? potestne verò aliquid melius & opportunius repræsentari ad ordinandum statum si forte sit inordinatus, quàm hæc mali extremitas quæ vel incurrenda est, vel ordinandus status cum Gratia quæ se offert in hunc finem?*

Legenda essent quæ fusiùs habentur in libris de ordine de hac materia; sic vero paucis triplex Inordinatio de qua primo puncto, dictum est, ordinari potest. Primò si in eligendo statu Deum omnino non consulisti, agnosce culpam, agnosce supremum eius dominium, cui hoc erat deferendum vt rem tanti momenti non agredereris sine eius consilio & nutu. Subiice te illi in hoc ipso tuo statu. Et quidem si deponi potest, ostende te ad id paratum si noris Deum ita velle: aut si deponi non potest, depone saltem illam libertatem qua es abusus vt inconsulto Deo illum eligeres & exerceres. Non ita deinceps, non ita vt voluisti, sed purè & nude vt vult Deus cuius voluntas agnoscitur.

892 4. *Consid. De ordinando statu sit forte sit inordinatus.*

tur, & colitur in illa necessitate seu impossibilitate mutandi status. Quod enim aliter fieri non potest, ad Deum referri debet; & dum ex necessitate fiet virtus, fiet eius voluntas, & iam ordinatus erit status quando sic eum ex eius voluntate nec aliter exercebis. Sic apte sanctus Bernardus cuidam inordinato suadet ut
Ep. 87. dicat, *male quidem egi sed factum est, & iam non potest non fieri; quis scit si hoc mihi Deus expedire prouiderit, & de malo meo ipse qui est bonus, bonum mihi operari voluerit. Malum ergo puniat quod ego feci, bonum autem maneat quod ipse prouidit. Nostris quippe inordinatis seu voluntatibus seu actionibus nouit Bonitas Dei uti, semper quidem recte in sui ordinis pulchritudinem; saepe etiam pie in nostram utilitatem.*

Secundo, si quo contra iustitiam peccatum est, reparetur quo
Eccles. 10. efficaciore fieri potest modo, apud Deum & homines. *Nihil agas*
Eccl. 17. *in operibus iniustitiae. ATTENDITE ab omni iniquo.*

Tertio denique corrigantur prauæ illæ intentiones ex concupiscentiis ortæ, & re ipsa assumantur rectæ & puræ sicut supra dictum est secundum Dei voluntatem, ut quod intendit Deus ita
Is. 58. plane fiat. *Dissolue colligationes impietatis, solue fasciculos depri-*
Ps. 118. *mentes. COGITA VI vias meas & conuertere pedes meos in testimonia tua.* Sic cogita, sic statue, sic conuerte prauos affectus tuos, & statum ordinasti. O facilitatem Diuinæ bonitatis, o peruicaciam humanæ mentis, si tantæ bonitati se rursus opponit! *Ecce ego*
1. Reg. 3. *quia vocasti me. Ecce ego quia vocasti me.* Vide in fine 3. partis, de Renouatione: de qua est & illa Veritas in 1. parte, die 7. Ianuarij. Non aliud sed aliter.



CONSIDERATIO QUINTA. IN PONTIFICIS INAVGVRATIONE SEV CONSECRATIONE.

Christus non semetipsum clarificauit, ut Pontifex fieret. Hebr. 5.

VERITAS PRACTICA.

Dum consecratur Pontifex sic affectus esse debet, vt omnes affectus habeat consecratos.

RATIO hæc est inter alias quia sic affectus & dispositus esse debet Pontifex dum consecratur, vt tunc puram & rectam intentionem habeat.

Sed nisi omnes affectus suos habeat consecratos, tunc actu puram & rectam intentionem non haberet.

Ergo sic affectus esse debet dum consecratur, vt omnes affectus habeat consecratos & puros, sicut ipsam intentionem. Quod certe rarum est nisi diligenter aduertatur.

I. PUNCTVM.

MODIE incipiam exaltare te, coram omni Israel. Sic Deus Pontifici consecrando, quod olim Iosue. Nam quantumque nobilitate, scientia, vel authoritate, vel cæteris animi, fortunæue donis sit commendatus Pontifex, nulla re tamen ita exaltatur atque Pontificia dignitate, qui est supremus Ecclesiasticæ Hierarchiæ gradus. Et hæc quidem exaltatio tanta est vt Pontifici non sit parum timendum & cauendum ne hinc animo nimis exalteretur, & ne forte exultet in superbiis suis illa exultatione quæ à sancto Iacobo maligna dicitur.

Iac. 4.

Quamobrem audiat Sapientem; *Ne in die honoris tui extollaris*: audiat Apostolum, *Christus non clarificauit semetipsum vt fieret Pontifex*: audiat Veritatem sibi propositam: *Dum consecratur Pontifex sic affectus esse debet vt omnes suos affectus habeat consecratos*. Audiat denique & expendat Rationem quæ inter plures alias modò offertur, Quia dum consecratur, tunc quantum fieri poterit cum gratia puram & rectam debet habere intentionem quam habere non poterit nisi suos omnes affectus habeat consecratos & puros. Hoc itaque primò præmittendum & declarandum est quàm sit Pontifici necessaria in ipso consecrationis actu.

Ecclesiæ, 12.

pura & recta intentio, non modo vt consecratur in Pontificem, sed vt consecratur Pontifex in illum Sanctum finem qui à Christo prætenditur.

Certè, si nulla vmquam humana actio priuari suo recto & debito fine debet, quanto minus ista quâ consecratur Pontifex, quæ cum sit excellentissima, tanto dolentius deploranda esset eius iactura meriti, quæ à defectu finis & intentionis incurreretur.

Ecclesi. 14. Non defrauderis à die bono.

Adde, quod cum sit prima quædam actio vnde multæ in reliquam vitam & in suo genere multum excellentes pendent, velut à fonte riui aut à radice rami: profecto quanti refert riuos esse puros, & ramos virentes ac fructuosos, tanti plane interest præcipuam fontis & radice habere rationem. Recte enim sanctus

1. Mor. 17. Gregorius: omne quod in actione sequitur, eò purum mundumque non exit quo hac ab origine perturbatur.

Quod quidem in hac præcipue actione tantò magis timendum est, & tantò magis procurandum vt reipsa, actu pura & recta sit intentio, quãtò ex huius actionis obiecto natura prona est & facilis sibi prauos fines statuere. Quodnã est huius actionis seu consecrationis obiectum in quo naturalis desigi solet obrutus? Nonne est ipsa Pontificia dignitas? At nonne in hac dignitate omnia insunt quæ naturam deprauatam commouere possint ad deprauandum actionis finem? Dic enim quænam illa sunt quæ solent finem in nostris corrumpere & deprauare operibus? Nonne hæc sunt, honor, commoditas seu facultas, deliciæ, authoritas, ministrantium turba, & similes Concupiscentiæ naturalis fomites atque illecebræ, At nonne illa omnia in dignitate Pontificia reperiuntur? nonne illa ab oculos facillime obuersantur? nonne placent? nonne alliciunt? nonne blandiuntur, & ita mentem naturaliter occupant vt nisi oculus auertantur ab hac vanitate, vanitas excæcet oculos & finem actionis plane deprauet? At vero cuius est ab hac vanitate oculos auertere, nisi puræ cum Dei gratia intentionis? Aut quomodo pura hæc intentio talem cohibebit vanitatem, nisi actu & reipsa tùm formetur, tùm purificetur, tùm dominetur intentio, cum alioquin actu prauum & distortum sibi natura corrupta proponeret finem & omnem corrumpere actionem?

Apte rursus sanctus Gregorius ad illa Domini Verba; *Lin-*

cerna corporis tui est oculus tuus: QUID per oculum, inquit, exprimitur, nisi opus suum praeueniens cordis intentio? qua priusquam se in actione exercent, hoc iam quod appetit, contemplatur. Notanda valde verba, quibus manifeste ostenditur quod sicut in proprio Pontificiae Dignitatis exercitio multa sunt quae naturali appetuntur affectu, sic in prima dignitatis susceptione, illa ipsa sese representant quae amantur & quorum intuitu fuscatur oculus, nili diligenter aduigilet. Vnde infert sanctus Doctor: *Vigilanti igitur curâ intentio nobis nostra pensanda est, ut nihil temporale appetat, tota se in soliditate aternitatis figat, ne si extra fundamentum actionis nostra fabrica ponitur, terra dehisciente solvatur.* Tum pergens in explanando textu libri Iob ad illa verba, *super quo bases illius solidatae sunt: BASES*, inquit, *uniuscuiusque sunt anima, intentiones suae.* Nam sicut fabrica columnis, columna autem basibus innituntur, ita vita nostra in virtutibus, virtutes vero in intima intentione subsistunt. Et quia scriptum est, fundamentum aliud nemo potest ponere praeter id quod positum est, quod est Christus Iesus; tunc bases in fundamento sunt, cum intentiones nostra in Christo roborantur. In casum vero alta super se bases adificia erigunt si non ipsa in fundamento solidata consistunt; tantoque grauiora ruina super se damna adificant quanto altiora adificia extra fundamentum portant.

Overba, verba numquam satis ponderata: quasi diceret, cum Prælatura sit altissima dignitas, si absque pura intentione quae est eius fundamentum, suscipitur, nihil aliud expectari potest quam ingens ea ruina quae accideret excelso ædificio male fundato. Vnde tandem concludit: *Non ergo pensandum est, bases quid sustinent, sed ubi sustententur, quia profecto humana corda Diuinitus perscrutantur, non solum quid faciunt sed quid in operibus quarunt.*

II. PUNCTVM.

SED nisi suos omnes affectus consecratos & puros haberet Pontifex dum consecratur, tunc actu puram & rectam intentionem non haberet.

Cum enim puritas intentionis, ut dictum est, in eo sita sit ut purè Deum spectet, aut si quid aliud spectetur, purè referatur ad Deum, nec ut in se apperibile est, appetatur: profecto hinc aperte patet tam puros debere esse affectus, quam ipsam

- intentionem quæ nihil aliud videtur esse quàm ipsa interni affectus expressio & efformatio. *Et nunc quæ est expectatio mea? Nonne Dominus? & substantia mea apud te est.* Neque aliter vllō modo intelligi potest quod quis in vno actu vel obiecto pure velit placere Deo, nisi simul intelligatur nihil in eius animo esse contra eundem actum vel obiectum quod hanc voluntatem placendi Deo violet & corrumpat: tunc enim sibi contradiceret & mentiretur & Deum irrideret. Nisi vero sint puri affectus Prælati, dum consecratur, erit aliquid quod opponatur illi voluntati quam præ se fert placendi Deo, erunt impuri & inordinati affectus circa honores mundi, circa commoditates, blanditias, aut quidquid simile palpat & detinet animum: qui quidem affectus tam directè pugnant cum pura intentione seu voluntate seruiendi & placendi Deo, quàm impuritas cum puritate, quàm caro cum spiritu, quàm natura corrupta cum Gratia. *Qua enim participatio iustitiæ cum iniquitate! aut quæ societas luci ad tenebras! NVM QUID* fons de eodem foramine emanat dulcem & amarā aquam? Numquid potest ficus uvas facere, aut vitis ficus? sic neque salsa dulcem potest facere aquam, ait sanctus Iacobus: perinde ac si diceret, non potest impuritas cordis puram facere intentionē, pura intentio est Charitas, & Charitas est de corde puro & conscientia bona, & fide non ficta. *MVND A* prius quod intus est ut fiat id quod de foris est mundum. *COR* mundum crea in me Deus, & spiritum rectum in noua in visceribus meis: *V I D E* ordinem, inquit sanctus Gregorius, primò cor mundum, deinde spiritum rectum. Prius enim abrenuntiandum est tibi, omni peccato, & omnis à corde vitiorum seditas eliminanda, ut omne quod agitur aut dicitur, eò purum in conspectu Dei ac lucidum appareat quo ex bona intentionis origine quasi de puro quodammodo fonte manat. Quomodo enim poterit esse perspicuum quod in ipsa origine fuerit vitiatum? scriptum est enim, bonus homo de bono thesauro profert bona, & malus homo de malo thesauro profert mala.
- Ps. 38.
2. Cor. 6.
Iac. 3.
2. Tim. 1.
Math. 23.
Ps. 50.

III. P V N C T V M.

DV M ergo ergo consecratur Pontifex, sic affectus esse debet & dispositus ut omnes suos affectus consecratos & puros habeat; Quia cum puram actu debet habere intentionem seruiendi &

placendi Deo, quam non potest omnino talem habere si simul haberet impuros sibi placendi & sua conquirendi affectus. Vnde tam puri sint necesse est cordis affectus quàm puram habere voluerit mentis intentionem. *Quæ procedunt de ore, de corde* Matth. 15. *exeunt*, inquit hoc sensu Dominus, vt quæ procedunt de ore, sint tam pura aut impura coram Deo, quàm purū aut impurum Cor erit. *Quidquid dicas, Cor intuetur Deus.* Et sicut intentio placendi Deo quam debet habere Pontifex non est tantum pro tempore quo consecratur, sed quamdiu erit Pontifex in omnibus obeundi sui muneris partibus: ita puritas affectuum quam simul habere debet non est pro illo tantum actu consecrationis, sed pro reliquis vitæ actibus, & his præsertim quos in sancto suo ministerio exercebit. Nempe vt non se quærat in illis, sed Christum: non sua, sed suorum salutem: non suam sed Domini sui Gloriam. Nam vt apte ait sanctus Augustinus; *Qui hoc animo* Tract. 123. *pascunt oves Christi, vt suas velint esse non Christi, se conuincuntur* in Ioan. *amare non Christum, vel Gloriandi, vel Dominandi, vel acquirendi cupiditate: non obediendi, & proximo subueniendi, & Deo placendi Charitate.* In quibus sancti Patris verbis aduerte prauos affectus qui *gloriandi vel dominandi vel acquirendi cupiditate* comprehenduntur, sic opponi puræ intentioni quæ *obediendi & proximo subueniendi & Deo placendi Charitate* exprimitur, vt nisi prauī illi affectus purificentur & consecrentur, pura non possit esse intentio.

Quod Idem alibi sanctus Doctor ex ipso Episcopi ethymo L. 9. de Cl. seu nomine, grauiter & luculente confirmat: *In actione*, inquit, uit. Dei. *non amandus est honor in hac vita, siue potentia, quoniam omnia* c. 19. *vana sub sole, sed opus ipsum quod per eundem honorem vel potentiam fit, si recte atque utiliter fit, id est, vt valeat ad eam salutem subditorum quæ secundum Deum est.* Propter quod ait Apostolus: qui Episcopatum desiderat, bonum opus desiderat, Exponere voluit quid sit Episcopatus, quia nomen est operis non honoris. Gratum est enim atque inducendum vocabulum, quod ille qui præficietur, eis quibus præficitur superintendit, curam eorum scilicet gerens; *super*, quippe *super*, *superintendit* est: ergo *superintendere* possumus dicere: vt intelligat, Non se esse Episcopum, qui præesse dilexerit, non prodesse.

Sic conformiter sanctus Gregorius: Plerumque qui præesse con- 1. p. Past. cupiscunt ad usum suæ libidinis, instrumentum Apostolici sermonis c. 8.

accipiunt, quo ait: si quis Episcopatum desiderat, bonum opus desiderat, qui tamen laudans desiderium, in pauorem vertit protinus quod laudauit, cum repente subiungit: oportet autem Episcopum irreprehensibilem esse; ac si aperte dicat: laudo quod queritis, sed prius discite quid queratis, ne dum vosmetipsos metiri negligitis, tanto fœdior vestra reprehensibilitas appareat, quanto & à cunctis conspici in honoris arce festinatis.



CONSIDERATIO SEXTA.

QVO DIE SACER ORDO SVSCIPITVR.

Sancti eritis, quia ego sanctus sum. Leuit. II.

VERITAS PRACTICA.

In qua sanctitate Ordinandus debet esse, debet ordinatus semper esse.

SENSVS non est de præciso gradu sanctitatis, sed de ipsa quam vocant essentiali sanctitate, quæ tam necessaria est Ordinato, quàm Ordinando.

RATIO petitur à dignitate Sacri ordinis quæ tanta est ut non debeat suscipi nisi in aliqua sanctitate.

Sed hæc eadem ratio seu consideratio dignitatis valet ut in illa sanctitate saltem essentiali sit semper ordinatus, in qua est ordinandus.

Ergo indubitata veritas, ut in qua sanctitate Ordinandus debet esse, sic debeat ordinatus semper esse.

I. PUNCTVM.

I. Pet. I.



ICET ad omnes Christianos hæc verba Leuitici de Sanctitate transferat sanctus Petrus; tamen quia primò dicta sunt ad Leuitas seu Sacerdotes, his etiam maxime competunt

competunt & his præsertim incumbit sanctitatem excolere, *incensum enim Domini & panes Dei sui offerunt, & ideo sancti erunt.* Vnde sanctus Chrysostomus, *neceſſe eſt, inquit, ſacerdotem ſic eſſe purum ut ſi in ipsis cælis collocatus, inter cæleſtes illas virtutes me- dius ſtare.* *Leuit. xi.
In libris de
Sacerd.*

Sanctitas porro in tribus præcipue conſiſtit, quæ Ordinandi ſolent afferre ad ſacros ordines; Primum eſt Gratia Sanctificans, nempe extra ſtatum peccati mortalis ſint, & idcirco antè conſitentur. Secundum, Caſtitas quæ dicitur ſanctimonia, quia ſcilicet retrahit ab his cupiditatibus quæ immundam faciunt animam, & huius votum implicitum & tacitum faciunt quotquot ſacris ordinibus initiantur.

Tertium denique, deuotio ſeu deuotæ mentis oblatio quam præ ſe ferunt ordinandi ad ſpeciale cultum & miniſterium Dei. Sic ergo ſancti ſunt cùm ordinantur; ſed vt conſtanter ſic ſancti permaneant, admonentur Verbo Dei, & Veritate propoſita, quæ ſic declarata, diu multumque debet expendi.

Ratio cur ſanctitas requiratur ad ſuſcipiendos ſacros ordines hæc eſt præcipua, quod tanta ſit dignitas & meritum Sacramenti Ordinis, vt non aliter quàm in ſanctitate, id eſt, in tribus illis quæ dicta ſunt, ſuſcipi debeat. Confertur enim in illo Sacramento Character indelebilis, & poteſtas ex ſe perpetua, circa corpus Chriſti reale & myſticum, id eſt, circa Sanctiſſimam Eucharistiā quæ eſt verum & reale corpus Chriſti, cuius conſecrandi facultatem ſacerdotes habent; & circa fideles Eccleſiæ quæ eſt myſticum eius corpus, quorum peccata retinendi & remittendi poteſtatem accipiunt. Quæ certe dignitas patet quàm ſit eminens quàm cœleſtis quàm Diuina, & qualis ipſius Chriſti Domini Saluatoris cuius miniſtri ſunt Sacerdotes in tam ſacris & tremendis Myſteriis.

Ac proinde ſicut Ille ſanctus eſt & illi ſancti ſint; nam cùm arctiorem quandam ſimul affinitatem contrahant, ſimulque vniantur vt per modum vnius Sacramenta conſiciant; proſectò ad iſtam vñionem & ad operationem tam ſanctam, qualis eſt Sacramentorum Eucharistiæ & poenitentia conſectio, non poteſt non magna requiri Sanctitas. Etenim ſi ad ſuſcipiendam legem in tabulis ſcriptam iuſſi ſunt Iſraelitæ per triduum variis pietatis officiis & virtutum exercitationibus ſanctificare ſe & præparare; quanto magis ad ſuſcipiendum illud Sacramentum quo ad alia

Exod. 19.

etiam augustiora potestas confertur? ô dignitatem ipsis Angelis superiorem! ô Sanctitatem ipsis etiam beatis spiritibus maiorem si fieri posset, exoptandam! At saltem qualis afferri potest, non negligatur.

II. PUNCTVM.

SED hæc eadem ratio dignitatis valet, ut in illa saltem essentiali sanctitate sit semper ordinatus in qua est ordinandus.

Facile enim conceditur afferendam esse Sanctitatem, & vix ullus est ordinandus qui non ita sanctus accedat; verum an ita perseueret, aut sibi etiam persuadeat ita perseuerandum esse, dubium facit tanta peccandi facilitas quæ in Ordinatis cernitur, perinde ac si nulla post Ordinationem seu Consecrationem religionem tenerentur. *Polluerunt sancturia mea, inter sanctum & profanum non habuerunt distantiam; inter pollutum & mundum non intellexerunt.* At verò contra tùm maxime, aut certe tùm ex æquo sancti sint necesse est, aut omnino numquam necesse est; nam si, ut dictum est, tenentur ordinandi ad sanctitatem propter Diuinam illam Gratiam & potestatem quâ nouam affinitatem & vniõnem cum Christo Domino contrahunt; cur non ordinati ad eandem sanctitatem tenebuntur, cum eadem potestas eademque affinitas semper maneat, sintque semper velut alij Christi de quibus dicit Dominus, *Nolite tangere Christos meos, QUI tetigerit vos, tangit pupillam oculi mei.* Esto non sit nouum & distinctum peccatum quod in peccato sint, sicut distinctum peccatum esset si in peccato susciperent ordinem, nisi cum in peccato etiam suum illum ordinem seu ministerium exercerent: non desinit tamen eadem obligatio peccati euitandi seu sanctitatis conseruandæ, quòd eadem ipsa obligationis ratio manifeste valeat æque post atque ante ordinationem, siue ante susceptum ordinem. *Audite me Leuitæ & sanctificamini, mundate domum Domini, auferte omnem immunditiam de Sanctuario.* Nam ab immundo quid mundabitur?

III. PUNCTVM.

IN qua ergo Sanctitate Ordinandus esse debet, debet ordinatus semper esse. Quia eadem ratio dignitatis quæ in sacro est ordine Sanctitatem ex æquo requirit, siue dum ordinatur sacerdos, siue


dum ordinatus est. Mundamini qui fertis vasa Domini ; quanto magis qui estis vasa Domini. Et cum multa ex sacra Scriptura, ex sacris Conciliis, ex Decretis, ex Patribus & ex Ratione sint, unde se ad eam munditiam & sanctitatem excitare possint & debeant cum Diuina Gratia ; tum verò ex seipsis hoc motuum sumant, cogitando quales primò accesserint ordinandi ; Quamnam eos Ratio sic mouebat ad digne accedendum, nùm eadem modò æque & magis valeat ? An pro ipso tantum tempore quo erant consecrandi siue ordinandi, sanctitatem assumpserant, an pro reliquo vitæ spatio ? Respondeant neque dissimulent ; Si primum dicunt : sanctitatis fictio est & simulatio, de qua seuerè Sapientis : *ne sis incredibilis timori Domini & ne accesseris ad illum duplici corde. Ne fueris hypocrita in conspectu hominum, & non scandalizeris in labiis tuis. Attende in illis ne forte cadas, & adducas animam tuam in honorationem, & reuelet Deus absconsa tua, & in medio synagoga elidat te : quoniam accessisti malignè ad Dominum, & cor tuum plenum est dolo & fallacia.* Si secundum respondent, cur datam fidem violant ? cur infideles se & perfidos Christo faciunt ? Quoniam si inimicus meus maledixisset mihi, sustinuissem utique. Tu vero homo unanimes, dux meus, & notus meus, qui simul mecum dulces capiebas cibos ; in domo Dei ambulauimus cum consensu. Ecclesi. I.

Quod si timebant nouum peccatum suscipiendo sacrum ordinem in peccato, cur non etiam nouum timeant, peccando in ordine, vel contra votum Castitatis quod infert duplex peccatum, vel contra quiduis aliud quod infert scandalum, vel quoquo modo peccetur à sacerdote, tanto semper videtur peccari grauius, quanto magis videbatur, minus esse peccandum. Hinc apte sanctus Hieronymus : *Grandis Dignitas sacerdotum, sed grandis ruina eorum si peccent : latemur ad ascensum, sed timeamus ad lapsum : non est tanti gaudij excelsa tenuisse, quanti mæroris de sublimiori corruisse.* In c. 43. Ezech.

Sanctus quoque Gregorius : *Hinc quoque scriptum est per Prophetam : laqueus ruina populi mei, sacerdotes mali. Hinc rursus de sacerdotibus malis per Prophetam Dominus dicit. Facti sunt domui Israel in offendiculum iniquitatis. Nemo quippe amplius in Ecclesia nocet, quàm qui peruerse agens, nomen vel ordinem sanctitatis habet delinquentem. Namque hunc nemo redarguere præsumit, & in exemplum culpa vehementer extenditur, quando pro reuerentia ordinis pec-* I. Past. 2. 2.

902 7. *Consid. Quo die primum sacrum Sacerdos offert.*

cator honoratur. Indigni autem quique tanti reatus pondera fugerent, si veritatis sententiam sollicita cordis aure pensarent, quæ ait: qui scandalizaverit unum de pusillis istis qui in me credunt, melius erat ei ut ligaretur mola asinaria in collo eius, & projiceretur in profundum maris. Per molam quippe asinariam, secularis vita circuitus ac labor exprimitur, & per profundum maris, extrema damnatio designatur.



CONSIDERATIO SEPTIMA.

QVO DIE PRIMVM SACRVM SACERDOS OFFERT.

Hostiam Viventem, Sanctam, Deo placentem.
Rom. .12.

VERITAS PRACTICA.

Sacerdos sic cum Christo sacrificet, ut sit ipse sicut Christus, sacrificans & sacrificium.

RATIO EST, quia Sacerdos in ratione ministerij sui, debet se Christo similem reddere, quantum quidem potest cum Gratia. Sed potest esse cum Christo simul sacrificium sicut tunc ipse est sacrificans, nec potest melius illum assimilare quam si cum Christo sic sacrificet.

Ergo sic cum Christo sacrificet, ut sit ipse sicut Christus sacrificans & sacrificium.

I. PUNCTVM.



VANTA dignum præparatione sit illud diuinum opus quod Sacerdos aggreditur, res ipsa loquitur; sed in quo potissimum consistat illa præparatio non ita forte liquet. Hæc certe inter alias aptissima videbitur accuratè meditati, si

Sacerdos sic cum Christo sacrificet, ut sit ipse sicut, &c. 903

Sacerdos sic se aptet cum Gratia, faciendo sacro, ut sit ipse sicut Christus sacrificans & sacrificium. Ratio similitudinis fundatur in ratione ministerij & præsertim illius sacro-sancti quod Missa dicitur & quod cum indiuisim à Christo & à Sacerdote simul exerceatur, debet Sacerdos quantum quidem potest cum Gratia se Christo similem reddere.

Idcirco præcipue Sacerdotes dicuntur filij Dei; *afferte Domino Ps. 28. filij Dei, afferte Domino filios arietum.* Quia videlicet, ut ait sanctus Basilus in hunc versum, *Vero Dei Filio similes esse debent, qui solus potuit acceptum Patri offerre sacrificium, & qui Sacerdotes instituit ut idem secum sacrificium iugiter continuarent usque ad finem sæculi.* Quapropter Sacerdos ille Dei summi Melchisedech singulariter ab Apostolo dicitur *assimilatus Filio Dei*, quia præter cæteros Sacerdotes qui Christum præcesserunt præcipuam cum Christo retulit similitudinem. At vero quænam erat illa similitudo? quænam illa erant in quibus similes extiterunt? Hoc est valde obseruandum, Non enim propterea tantum Melchisedech dicitur similis filio Dei quod panem & vinum obtulit sicut Christus, sed ob multas alias conuenientias quæ ab Apostolo memorantur, ut videlicet intelligant Euangelici Sacerdotes sibi satis non esse ad hanc similitudinem cum Christo exhibendam si duntaxat cum Christo sacrificent in altari: sed quàm ultra potest extendi similitudo, tantum eniti debeant cum Gratia ut nihil omittant quo minus hanc similitudinem plene assequantur.

Et certe cum tantæ dignitatis sit sacrum illud munus quod obeunt Sacerdotes, dum missam celebrant, quid tandem satis dignum & satis conueniens tanto muneri facere poterunt? At saltem quod possunt non omittant; ut si quid desit, sit potius potestatis defectus, quàm voluntatis. Nonne id æquum? Nonne ita sentis? Nonne velles posse plura? at illa saltem quæ potes, *2. Macch. 2. ut ex iis sis qui corde magno & volenti animo Deum colunt, suasque Exodi 35. illi primitias mente promptissima atque deuota offerunt.*

II. PUNCTVM.

SED Sacerdos potest esse cum Christo simul sacrificium, sicut cum ipso est sacrificans, nec potest melius illum assimilare quàm si se cum Christo sic sacrificet.

Cogitandum hic primo quid sit se sacrificare cum Christo, nempe sibi suisque omnibus inordinatis affectibus velle mori, adeout sicut panis in Corpus Christi & vinū in Sanguinem conuertuntur, aut sicut ipse Christus Dominus se totum immolat, ita plane Sacerdos quantum ad vitam sensualem & animalem totus immoletur, vt iam non desideriis & ducta naturæ corruptæ moueatur, sed rationis & gratiæ diuino motu. Sic sanctus Paulinus illud Diui Apostoli explicans, *In carne non estis sed in spiritu: C A R O*, inquit, *transit in spiritum non substantia commutatione sed vita*: quasi diceret, in hoc est sacrificium carnis non vt caro mutetur in spiritum, sed carnalis vita in spiritualem.

Ep. 4.
Rom, 6.

Et ne putet Sacerdos id esse nouum aliquid & nimis sublime, perpendat quod ipse orans in altari dicet, expansis supra Calicem manibus: *Hanc igitur oblationem quam tibi offerimus, acceptam, ratam, Rationabilem, acceptabilemque facere digneris*; quid est *Rationabilem* esse oblationem? respondet sanctus Thomas, *id esse per quam à bestiali sensu exuamur*: Illudque ipsum quod Apostolus omnibus Christianis commendat, vt exhibeatis corpora vestra *hostiam uiuentem, Sanctam, Deo placentem, rationabile obsequium vestrum*. Et nolite conformari huic saculo, sed reformamini in nouitate sensus vestri, vt probetis quæ sit voluntas Dei bona, beneplacens & perfecta. Et rursum: *Mundemus nos ab omni inquinamento carnis & spiritus, perficientes sanctificationem in timore Domini*. Hoc est seipsum immolare: hoc est Sacerdotium sanctum, hoc est offerre *spirituales hostias*, acceptabiles Deo per Iesum Christum, sicut ait sanctus Petrus; Hoc est quod tam facile possumus cum Gratia, quàm peccatum euitare: cum in eo perfecte euitando tota sit praxis & executio huius spiritualis sacrificij.

Rom. 12.

2. Cor. 7.

1. Pet. 2.

Sed quod est præcipue considerandum, nihil restat ex nostra parte quò propius ad hanc Christi similitudinem accedamus; Nam præterquam quod ista Immolatio, Virtutem omnem, atq; vniuersam sanctitatem qua Christo similes reddimur, comprehendit; hoc insuper singulare habet, vt in materia subiecta seu in re de qua est quæstio, similitudo conueniens tota reperiatur. Sicut enim Efficacia in dicendo magis propria similitudo esset cum Christo prædicante; aut suauitas morum cum ipso Conuersante: sic cum ipso seipsum sacrificante nihil similius, nihil aptius & conuenientius quam sacrificium fieri. Hoc est quod innuebat

Sacerdos sic cum Christo sacrificet, ut sic ipse sicut, &c. 905

Sapiens ex septuaginta interpretum versione: *Quando sederis ut comedas cum principe, diligenter attende quae appositae sunt ante faciem tuam: & statue cultrum in gutture tuo, sciens quoniam oportet te talia preparare; NEMPE*, ut ait Salazar, *sicut Christus Dominus se hic sacrificat & ingulat, ita oportet te dare totum*, Vide hunc Interpretem, & Molinam Carthusianum qui de his fusius disserunt, ex sanctis Patribus. *Mentes nostras & corpora possideat quae sumus Domine, doni caelestis operatio, ut non noster sensus in nobis, sed ingiter eius praeueniat effectus.* Sic apte orat Ecclesia. Prou. 23.
Tr. 2. c. 2.
Dom. 15.
post Pent.

III. PUNCTVM.

IGITUR sic sacerdos cum Christo sacrificet, ut sit ipse, sicut Christus, sacrificans & sacrificium, Quia sic plenior quam possit referre similitudinem cum Christo referet, quae quidem similitudine sicut nihil est honorificentius, ita nec quidquam vtilius, nec Deo gratius. *Sicut in holocausto arietum & taurorum, & sicut in millibus agnorum pinguium, sic fiat sacrificium nostrum in conspectu tuo hodie ut placeat tibi: Et nunc sequimur te in toto corde.* Hoc nempe est sacrificium quod aequialet omnibus, sic se offerre. Sic porro in fornace loquebantur tres pueri: at quanto verius de spiritali sacrificio sacerdotis, iuncto cum Eucharistico dici debet; cum sic reuera Sacerdos sequatur Dominum in toto corde, sese immolando sicut Christus se immolat: & sic vnum & idem sacrificium fiat ex Christo & Sacerdote, sicut vnus ex utroque sit sacerdos & sacrificans. Hoc est verè adorare Deum in spiritu & veritate, quemadmodum sancti Patres interpretantur, non modo de reali & incruento sacrificio quod Christus offert cum sacerdote, sed de spiritali quod sacerdos offert cum Christo. Sic inter alios sanctus Athanasius: *Veri adoratores, inquit, sunt illi qui sic viuunt ut ipsi de domibus, de corporibus, de operibus, de verbis, de cogitationibus templa & sacrificia faciant.* Danielis 3.
Ioan. 4.
Serm. de natalis Domini.

Quanti sit autem meriti sic se offerre, docet sanctus Augustinus his verbis: *sunt multi qui vouent, alius pallam, alius oleum, alius ceram ad luminaria noctis, alius ut vinum non bibat per aliquot annos, alius ut ieiunia certo tempore faciat, alius ut carnes non comedat: non est istud votum optimum, nec perfectum, adhuc melius volo. Non eligit Deus nec speciem tuam, nec oleum tuum, nec ieiunium tuum, sed*


hoc quod te redemit, ipsum offer, hoc est animam tuam. Et si interroges me, quomodo animam meam, quam ipse habet in potestate, offeram? Respondebo tibi, quomodo: moribus sanctis, cogitationibus castis, operibus fructuosis, auertendo à malo, & conuertendo ad bonum.

Quàm vero sit necessarium Sacerdoti sic se offerre, sic paucis sanctus Gregorius Nazianzenus: *Nemo, inquit, sacrificio dignus est, nisi qui prius seipsum hostiam viucentem & sanctam Deo exhibuerit; quia scilicet nimis indignum & nimis alienum à statu sacrificantis Sacerdotis qui Sanctam & Diuinam illam Christi Vitam manibus suis immolet, si suam vilem atque animale vitam mactare nolit. Si de naturali vita tum ageretur, certe illam Christo si reposceret, negare iuste non posset: at quanto minus sensualem vitam, quam numquam viuere oporteret, etiam si Sacerdos non esset aut sacrificium non offerret? Absit ut fugiamus, inquebat*
1. Macch.
2. *Iudas Machabeus, & si appropianit tempus nostrum, moriamur in virtute propter fratres nostros, & non inferamus crimen gloriae nostrae. Crimen profecto inferitur gloriae tui Sacerdotij & Sacrificij, si dum Christus pro te & per te moritur, Sacramentale in illam quam viuit vitam immolando: tu mortem fugis, nec iudicas illum satis dignum cui miseram vitam tuam tradas in spiritualem & diuinam conuertendam! Eamus & nos & moriamur cum eo.*

Status esset nullo die velle viuere, quàm non omni die, sic velle cum Christo mori.

Declaratur hac Veritas in 3. p. Feria 5. hebdomadae. 2. Cui conformis hac est, in 2. p. Feria 5. Septuagesimae.

Ingratus est tanti beneficij, qui se tantum ex parte immolat, se totum immolante Christo.



CONSIDERATIO OCTAVA.

QVO DIE RELIGIOSVS INDVITVR HABITVS.

Gaudens gaudebo in Domino, & exultabit anima mea

Non est in nouo habitu nouum cordis gaudium, &c. 907
mea in Deo meo, quia induit me vestimentis sa-
lutis, & indumento Iustitiae circumdedit me:
quasi sponsum decoratum corona, & quasi spon-
sam ornatam monilibus suis. If. 61.

VERITAS PRACTICA.

Non est in nouo habitu nouum cordis gaudium, sed in nouo corde:

RATIO est, quia nouum illud gaudium quod percipitur hodie in
sumendo habitu Religioso, non est nisi à Gratia vocationis.
Sed illa vocationis Gratia non est in nouo præcise habitu, sed in
nouo corde sumentis habitum.

Ergo non est in nouo habitu nouum illud cordis gaudium, sed in
nouo corde: In corde scilicet eius nouitij qui deponendo habi-
tum secularem deponit seculares omnes affectus, & induendo
religiosum, simul induit affectus omnes suo conformes instituto.

I. PUNCTVM.

SANCTVS Augustinus agens de pace seu gaudio spi-
rituali, tale esse ait bonum, *ut in rebus terrenis atque mor-*
talibus nihil gratius soleat audiri, nihil desiderabilius concu-
pisci, nihil postremo possit melius inueniri. Et alibi sese apertius ex-
plicans: Scire, inquit, debetis quod quadam sunt bona quae non sunt
iucunda, quadam autem iucunda, quae non sunt bona; verbi gratia, *Ad fratres*
bona sunt ieiunia, vigilia, macerationes & similia; haec enim bona *in eremo*
sunt sed non iucunda quia caro in his non iucundatur sed leditur: Iu- *Serm. 2.*
cunda quippe sunt ebrietates, comestiones, sed non sunt bona: vix
poteris reperire in praesenti vnum quod sit bonum & iucundum: cupis
tamen illud inuenire? persequere pacem & amplectere eam; haec est
enim sola virtus quae habet bonum & iucundum. Quasi diceret, hoc
est plenius & cumulatius in suo genere bonum quod possideatur

2. Pars.

YYYYY

in terris, quia quod aliis deest, in eo vno reperitur, nempe vt sit
Phil. 4. verum simul & sensibile bonum. Licet enim *omnem sensum exuperet*, vt ait Apostolus, non desinit tamen esse sensibile: sed non est sensuale, id est, non est sensibile modo sensuali, at modo quodam spirituali qui est perfectior & sublimior quàm vt possit explicari. *1. Pet. 3.* *Abconditus est cordis homo, in incorruptibilitate quieti & modesti spiritus, qui est in conspectu Dei locuples*, ait sanctus Petrus.

Hoc est itaque gaudium quod sentitur hodie in sumendo habitu religioso, hoc est bonum religiosæ vocationis tam suaue, vt iam ex ipso ingressu sese reddat sensibile. Hoc est bonum supra omnia sæculi bona, quæ si iucunda sunt, non sunt vera bona, & si quædam verè bona reperirentur, non permittit sæculum illis
Ecclesi. 6. frui. At vero in religione, jamjam ex ipso limine. *In opere ipsius*, aiebat Sapiens, *exiguum laborabis, & cito edes de generationibus illius.* *Is. 61.* Propheta vero eximiè: *Gaudens gaudebo in Domino, & exultabit anima mea in Deo meo, quia induit me vestimentis salutis, & indumento Iustitia circumdedit me.* Nonne videtur ipse Nouitius loqui? Nonne videtur tale suum indicare gaudium quale diximus, bonum scilicet & iucundum, bonum sensibile & bonam sensibilitatem? *Gaudens*, inquit, *gaudebo in Domino*, quasi diceret non est simplex gaudium sed geminum, non est oris gaudium sed cordis simul & oris, non est gaudium futurum sed præsens, non præsens transitorium sed permanens; id est præsens simul & futurum; *gaudens gaudebo*, quod nunc incipio, semper erit, quia illud est in Domino qui fons est gaudij iugiter manans. Cur vero & vnde tale gaudium? *Quia*, inquit, *induit me vestimentis salutis*; O pretiosa vestimenta quæ salutem meam continent! O iucunda dies quæ his me vestimentis induit! ô sancta indumenta quæ mihi à Domino sic parata sunt, vt me iam non esse meum sed Domini cuius vestes induo, probe intelligam! Sic pluribus indulgeri posset affectui.

At vero vt fructuosior sit Consideratio, diligenter indagandum, quomodo inde hodie ex sumpto habitu tale sentiat gaudium. Non enim simpliciter & præcise, *ex nouo habitu, nouum est illud cordis gaudium: sed ex nouo Corde.* Quæ consideranda Veritas duplicem attineret fructum. Primus, vt cognitâ verâ causâ gaudij, causam constanter retineamus, quâ gaudium semper conseruetur. Secundus, vt sic ametur gaudium, non propter se aut propter

nos; sed propter illam nobilem & Diuinam causam vnde effluit, vt sic magis ac magis purum & Spirituale reddatur gaudium.

Ratio autem propositæ Veritatis plana est & expedita, cum dicitur sanctum illud gaudium quod in sumendo habitu percipitur, non esse nisi à Gratia vocationis, siue quod idem est, non esse nisi à Domino. Sicut enim non est nisi in Domino, non est nisi sanctum & spirituale, sic plane non est nisi à Domino, cui propterea Dauid dicebat: *Dedisti lætitiā in corde meo.* Solus ille est qui *ps. 41* dat veram cordis lætitiā, & sola est vera cordis lætitiā quæ cum religioso sumitur habitu. Sic probatur vnum ex alio, vt quàm verum est solam esse veram lætitiā quæ percipitur hodie, tam certum sit, illam esse à Domino. Neque enim vera est lætitiā quæ non sit à Domino, neque alia potest esse lætitiā quàm vera & certa quæ percipitur hodie cum nouo habitu. Cum enim falsæ lætitiæ tres esse possint tantum species, vna carnis, alia mundi, alia dæmonis, profecto neutra trium harum potest obuolui sacro religionis indumento. Non quidem carnis, aut mundi, quia renuntiatur omnibus eorum curis & desideriis; atque ex consequenti non etiam dæmonis quia non aliter facilius quàm per carnem aut mundum in nos agit. *Nihil in me funestè inuenies cruenta bestia,* dicebat Dæmoni sanctus Martinus: quod idem vere dici potest à quouis deserente mundum, si verè mundum deserit. Quamobrem superest vt sola vera sit lætitiā, solum illud sit gaudium quod est fructus & vnctio Spiritus, quod est centuplum promissum, quod est manna absconditum, quod est denique anticipata merces illius qui dixit, *venite ad me omnes qui laboratis* *Mat. 11.* *& onerati estis & ego reficiam vos. Tollite iugum meum super vos,* quod iugum suaue est & onus eius leue. Si quid videtur oneris, rotæ sunt in curru quibus mouetur commodius, & alæ sunt in auibus quibus iuuantur non quibus impediuntur.

II. PUNCTVM.

SED illa vocationis gratia non est in nouo præcise habitu, sed potius in nouo corde fumentis habitum.

Sicut enim habitus non facit religiosum sed cordis immutatio & conformatio ad illud religionis institutum quod suscipitur, sic plane vocationis gratia in hac cordis immutatione & nouitate

consistit. Quod ita verum est vt vocari aliquem à sæculo in religiosum statum, nihil aliud sit quam vocari ad hanc cordis mutationem & nouitatem, vt qui naturali affectu mundana & sæcularia diligeret, iam illa detestetur: & qui detestaretur aspera & humilia, iam illa velit amplecti, ac propterea sæculum deferat & religioso se aggreget instituto. Neque aliud concipi potest quid sit respondere vel non respondere vocationi quàm si quis velit aut nolit cor suum sic immutari & nouari, vt quæ amabat

L. 27. Mor. c. 13. oderit, & quæ oderat amet. Sic aptè sanctus Gregorius: vetusta vita protinus vsus mutatur, vt anima superno spiritu afflata, & in summis appetat quæ contempserat, & contemnat in infimis quæ appetebat. Ad hoc autem efficiendum, dicitur cor mutari & nouari quia de statu suo naturali quo tendit in carnalia & terrestria dimouetur in alium statum quo spiritualia quærat & coelestia.

Ezech. 36. Dabo vobis cor nouum & spiritum nouum ponam in medio vestri, & faciam vt in praeceptis meis ambuletis, & iudicia mea custodiat, & operemini.

Nonne hoc est de quo præcipuè interrogatur Nouitius, & de quo sincere debet respondere, an scilicet sit ad illa paratus omnia quæ natura magis exhorret nisi per Diuinam Gratiam ad illa paratus esset? Et nonne huic propterea datur nouitiatus seu tempus probationis quo & ipse religionem & ipsum probet religio, nùm constantem & perpetuam sic possit vitam producere? Si quando denique, quis inteperceret & de asperis vel abiectis officiis quereretur, nonne illud est quod ipse sibi objiciat & repræsentet: *Elegi abiectus esse in domo Dei mei, magis quam habitare in tabernaculis peccatorum*: quasi diceret, nulla est de his conquerendi ratio, cum ego ipse ea vltro elegerim, eligendo istum vitæ degendæ statum in quo essem abiectus & infimus. Hoc est potissimum in quo eligendo vocatio sita est, ad quod eligendum datur cor nouum, & in quo denique retinendo, tota vertitur vocationis Gratia.

III. P V N C T V M.

NON est igitur in nouo habitu nouum cordis gaudium, sed in nouo corde; cum in vocationis gratia sit nouum illud gaudium, & illa vocationis Gratia sit in nouo corde quod profecto

non gauderet in ingressu religionis, nisi nouum esset & mutatum sicut dictum est, quia gaudium non nisi ex amore nascitur, atque adeo vt sit gaudium spirituale debet esse amor spiritualis; vt sit gaudium de mortificanda carne debet esse odium carnis & amor spiritus, quod certe carnis odium & amor Spiritus non esset in Nouitio nisi cor eius mutatum esset. *Conuerte me & conuertar*, Ier. 31. ait Propheta, *quia tu Dominus Deus meus: postquam enim conuertisti me, egi pœnitentiam, & postquam ostendisti mihi, percussi femur meum.* QUID in femore, nisi voluptas carnis accipitur, inquit san. L. 24. Mor. c. 16. Gregorius, & quid est quod ait, *postquam ostendisti mihi, percussi femur meum*, nisi postquam superna spiritualiter vidit, omne quod in se inferius carnaliter vivebat extinxit, vt quanto magis summa paterentur, tanto amplius ima qua tenuerat non liberent. Nam quanto incipit quisque superius viuere, tanto & inchoat inferius interire.

Sicut enim mutata dicitur persona quia mutatus est eius vitæ status: sic etiam mutatus est vitæ status quia mutata est persona: sed vtraque mutatio tum personæ tum status vt sit vera & sincera, cor mutatum esse debet: *Cor est primum viuens, & vltimum moriens*; hoc vulgare dictum de vtraque vita, seu morte, tam naturali quam spirituali vere debet intelligi: sicut & illud Sapientis: *omni custodia serua cor tuum quia ex ipso vita procedit.* Quasi Nouitio diceretur: quia nunc, quando sumitur habitus, cor est nouum & in sua nouitate integrum, spirituales sentis affectus, amore commoueris & gaudio: bene habet, hoc est suaue Christi iugum, hæc est vitæ religiosæ suauitas; Sed quamdiu putas sic suauiter viues? audi & crede. Quamdiu scilicet cor tuum conseruabis in sua integritate & nouitate. Hic est scopus propositæ Veritatis, & totius finis discursus vt quantum gaudere semper velis, tantum in hac nouitate cordis persistas. Statim enim atque cor inueterascet, desinet gaudium. Tum autem inueterascet quando aliter de rebus senties ac modo sentis. Modo tibi omnia vana videntur præter Deum & salutem, & nihil tam abiectum in religione quod non libenter acceptes: si post aliter sentias & iudices, tum puta te inueteratum & ne mireris si te priuatum gaudio sentias quia non est gaudium nisi in corde nouo, nisi in corde nouitatem suam conseruante.

Mirum esset si modo non gauderes, qui modo agnoscis bonum quod possides: sic plane post, si non tibi sapit illud bonum;

15. 24.

In illa ver-
ba : Ecce
nos reli-
quimus
omnia.

non est mirum si non gaudeas, imo mirum esset si gauderes, quia
vt toties dictum est, gaudium ex amore, & amor ex apprehen-
sione boni formatur; quamdiu manebit illa boni apprehensio
quam modo habes, manebit eius amor & manans inde gaudium:
at quando illa desinet, desinent simul consequentes affectus. *In-
gemuerunt omnes qui latabuntur corde, cessauit gaudium,* inquit Pro-
pheta, quia videlicet vt ante dixit, *transgressi sunt leges, mutau-
runt ius, dissipauerunt fœdus sempiternum*: vno verbo, non ij fue-
runt corde qui prius erant. *Scrutetur proinde vias suas,* ait sanctus
Bernardus, & *studia sua qui promissam centupli gratiam sibi deesse*
causatur, & videbit profecto se non omnia reliquisse, nec propterea
miretur se non illud percipere quod non est promissum nisi his qui relin-
quent omnia, & inter omnia semetipsos. Quamobrem idem san-
ctus Pater ad se primo accedentes, & ad sumendum paratos ha-
bitum sic vrgebat vehementius: *Age ergo qui relinquere vniuersa*
disponis, te quoque inter relinquenda numerare memento. Imo verò
maxime & principaliter abnega temetipsum si deliberas sequi Eum
qui exinanivit propter te semetipsum: pone grauissimam sarcinam,
pone asinariam molam, terrenam molem, pone illa quinque non homi-
num planè iuga, sed boum quæ tibi insipienter emisti. Alioqui sequi
sponsum & venire ad nuptias spirituales quinarum hac pressus & op-
pressus corporis sensualitate non poteris. Vide quæ plura prosequi-
tur, & quæ opportuniùs referuntur in quarta parte, hebdomada
decima septima, quæ tota est de suis relinquendis, aut semel reli-
ctis, numquam resumendis: vbi quæ Religiosos spectant, & hoc
præsens argumentum: hæ præter plures alias exhibentur Veri-
tates.

Nulli melius sunt omnia quàm omnia relinquenti.

Plura dat Christo qui dat omnia, licet pauca & vilia,
quàm qui multa & pretiosa, non datis omnibus.

Væ Religioso non relinquenti omnia.

Sua omnia melius relinquit qui se relinquit non reli-
ctis bonis, quam qui sua bona relinqueret, se non
relictò.

Ne terrearis difficultate relinquendi omnia. Minor est

Non est in nouo habitu nouum cordis gaudium, &c. 913

difficultas omnia relinquenti quàm partem aliquam.
Qui se dicit sua omnia reliquisse, nec contentus uiuit;
mentitur, aut mendacem facit Christum.

Nisi ab omni cupiditate voluntas, sicut ab omni errore intellectus, verè conuertatur; vix vlla est vera
Conuersio.


Hac postrema proponitur in eadem 4. parte, Feria 2. Hebd. 16. sequens autem in 3. parte, Feria 6. Hebdom. 8. & Feria 3. Hebdom. 13.

Non tam spectatur in diuinis quid dones, quam quid non dones.

Non tam quid Christo afferas, quàm quid à te non auferas.

FINIS SECVNDÆ PARTIS.





INDEX

RERVM PRÆCIPVARVM SECVNDÆ PARTIS.

A *BNEGATIO.* Multos eius actus requirit fides. pag. 470.

Actio. Quod intellectus confert actioni, hoc actio refert intellectui, dum scilicet exercendo virtutem, magis ac magis intelligitur quid sit illa virtus. 767.

Aduersa. In his cauenda perturbatio. 75. seruanda constantia. 85. quantum obest aduersitas improuisa, tantum prauisa prodest. 87. nulla in his conquerendi ratio. 91. vide *Providentia*. Quo in cælis gloria sumetur vultu, hoc in terris calix sumendus est. 232. si propter scripturas aduersa sunt toleranda, sunt libenter toleranda. 237. tùm nimis conqueri valde damnosum est. 284. Quæ duo sunt magis aduersa, pœna & contemptus, ea sunt in Christiana Religione magis commendata. 298.

Affectus. Qui nimis suos diligit, non satis diligit. 367. v. *Inordinatio. Desiderium.*

Ambitio. Quàm cauenda. 46. 540. quæ sunt humili lucra, hæc sunt ambizioso detrimenta. 535. sex humilitatis actus illi oppositi. 527. & seq. tota hebdomada.

Amor. V. *Charitas, timor.*

Anima. Nihil æstimatione speculatiua nobis pretiosius, sed practica, nihil vilius. 522.

Anaritia. Quàm sit noxia. 64.

BEATITUDO. Sex eius desiderandæ motiua proposita. 665. primum, quod sit regnum æternum. 666. secundum, quod ibi nostra omnia desideria compleantur. 672. tertium, quod illuc sus-

2. Pars.

pirare nos faciat Spiritus sanctus. 676. quartum, quod Christus ibi regnet. 684. quintum, quod tale desiderium tam iuste est debitum, vt iniusti simus & indigni cælo nisi illud desideremus. 649. sextum, quod ex tali desiderio, spirituale percipiatur gaudium. 703.

S. Benedictus. Nomine & gratia benedictus. 808. inter benedictos benedicetur, non cui melius omnia, sed qui ex omnibus melior. *ibid.*

Blasphemia. Qualis sit in Spiritum sanctum. 765.

COELVM. V. *Beatitudo. Desiderium.* Tanti cuiusque refert se à terra retrahere, quanti ad cælum trahi. 688.

Charitas. In ferendis iniuriis. 28. constans in aduersis. 85. eius proprietates applicatæ mysteriis Resurrectionis Christi, siue apparitionibus. 495. Charitas patiens est. 496. benigna est. 501. sapientiam videtur esse charitas, & est magis carnalitas. 505. non æmulatur. 508. & quicquid acquiras æmulando, plus perdis quàm acquiras, cum charitatem perdas, quàm nihil est melius. 510. non agit perperam 512. non inflatur. 517. non est ambiciosa. 527. non quærit sua; & melius tamen sic inuenit. 580. non irritatur. 585. non cogitat malum. 592. non gaudet super iniquitate. 598. congau-det veritati 602. omnia credit. 624. omnia sperat. 627. omnia suffert. 632. non excidit. 637. charitatis & humilitatis coniunctio. 859.

Crisis. Corporum & animarum. 356.

Zzzzz

Christus D. Quantæ dignitatis. 20. quanta eius iactura & unde proveniat. 21. quod sit vera via. 81. tum præcipue cum consideratur patiens. 96. V. *Perfectio. Imitatio.* Quam se infirmum nostri causâ fecerit. 182. de illius doloribus tam internis quàm externis. à pag. 177. per totam quadragesimam. Quam tremenda hæc eius sententia, *qui non est mecum, contra me est.* 248. de illo nobis plus esse debet gaudij & amoris, quàm de nobis ipsis. 575. non minor eius auctoritas præcipientis aliquid quod agamus, quàm reuelantis quod credamus. 633. magis audiendus de cælo nobis loquens, quàm dum in terra loquebatur. 691. cogitatio eius omnem difficultatem mitigat. 712. *Cogitatio.* Quam sint perniciosæ humanæ nisi contineantur. 19. non est temerè de aliis cogitandum malum. 594. *Cognitio.* Quam necessaria sui cognitio. 717. cognitio quidem præcedit actionem, sed actione crescit & perficitur. 768. *Concordia.* Qui sensu suo priuato saniores se aliis putat, sano se priuat sensu. 731. V. *Contentio.* *Concupiscentia.* Causa est cur pauci saluentur, & cur ex illis paucis tu forte non sis. 9. V. *Mors,* cuius cogitatione reprimatur. *Mundus,* quem sola facit concupiscentia. *Confusio.* Quæ in malo bona est, in bono mala est. 192. Quem pro Christo sperni pudet, Christi pudet. 288. *Consideratio.* Bonum est otium, & quantum valeat ad bene operandum. 3. 466. quantum proficit ad sui cognitionem. 717. *Consilium.* Donum est Spiritus sancti. 766. nihil sine consilio. 878. *Consolatio.* V. *Gaudium.* *Contemptus.* Aut amandus tui contemptus & te contemnenti congaudendum, aut non amanda charitas quæ congaudet veritati. 602. contemptus terrenorum. 672. 689. 694. 698. 773. *Contentio.* Licet obtineres quod contendis & ambis, non esset contendendum: licet

verò contendas, non illud obtinebis. 44. Vide *charitas, concordia.*

Contritio. Dolorem sensibilem nec includit, nec excludit. 202. Quanto est de peccato maior tristitia, tantò est peccatori maius gaudium de fontibus Saluatoris. 482. V. *Lachryma, peccatum.*

Conuersio. Nisi verbum Dei te conuertat, tu peruerteris verbum Dei. 49. in vera contritione vera conuersio. 205.

Crux. Non quæsitæ cruces, magis exquisitæ. 317. & sequentes per totam hebdomadam Passionis. De Inuentione Crucis 870. V. *Mortificatio.*

DESIDERIUM. Pia etiã desideria debent esse ardentia & temperata 375. qui sibi non contradicit in suis malis desideriis, sibi contradicit in bonis, orando scilicet orationem Dominicam cui opponuntur mala desideria. 658. De desideriis cælestibus, fusè tota hebdomada Rogationum siue Ascensionis Domini, à pag. 666. Vide *Beatitudo.*

Deus. Magis timendus, quia bonus. 7. & quo magis apparet eius bonitas, eò peccatum est grauius illi resistere. 889. V. *Peccatum in Spiritum sanctum.* Cum bonis bonus est, seu liberalis & magnificus. 582. sicut à Deo cuncta, sic ad illum sunt referenda. 602. sicut creaturæ omnes nos ad eum ducunt si volumus, ita volendum est. 789. sicut ab illo quærendum est officium, ita ille in officio quærendus est. 888.

Dilatio. Cauenda in acceptando statu seu vocatione cognita. 878.

Diuitia. Quam sint illæ ac sollicitudines mundi damnosæ. 62.

Donum. Donatio nostri facta Deo, sit integra. 35. sic debetur Christo. 382. sic amplè cõpensatur à Deo. 483. in acceptandis donis diuinis, spectandus est potius qui donat, quàm quod donatur. 741. septem dona Spiritus sancti applicantur ad septem quædam Apostolorum nobiliora facta vel dicta post missionem ipsius

- Spiritus sancti. 745. donum sapientiæ. 747. donum intellectus. 761. donum scientiæ. 772. donum consilij. 776. donum fortitudinis 781. donum pietatis. 786. donum timoris. 791.
- Dotes.* Quæ sunt corporis gloriosi, communicantur animæ cum Christo suscitata, à pag. 445. *per totam hebdomadam Resurrectionis Domini.*
- EPISCOPVS.* Quid voce hac significetur. *Exclusio.* Nulla est sanctitatis acquirenda. 158. nulla imitandi Christi. 184. nulla irascendi. 585.
- FIDELITAS.* In minimis non minima 14. tanta fidelitate ministerium est exercendum quantam habere oportuit in eo expectando & recipiendo de manu Domini 798. V. *Ministerium.*
- Fides, fiducia.* Claritas est in tenebris. 469. hæc est victoria quæ vincit mundum fides nostra. Aut hæc est nostra ignominia si vincat mundus fidem nostram. 485. non est prius intelligendum, vt credas; sed primò credendum est, vt post intelligas. 624. vera fiducia confidenti nunquam infida. 628. fides tota est in credendis omnibus. 633. Christo loquenti de cælis magis credendum est quam loquenti in terris. 691. defectus fiduciæ quàm noxius. 783.
- Fortitudo.* Qui non satis audet in magnis, nimis audet in paruis 742. fortioris est animi non vinci à bonis blandientibus, quàm ipsa vincere mala terrentia. 860.
- S. Franciscus de Paula.* Verè minimus & verè maximus. 856.
- GAVDIVM.* Qui cum Christo dolente non dolet, non potest cum ipso gaudente gaudere. 178. beatius est carere omni sensibili consolatione, quàm ea abundare 371. vt fur de furto, sic mundus de mundo gaudet. 568. quomodo tristitia vertatur in gaudium. 569. gaudiū quod nemo potest à nobis tollere. 578. gaudium de iniquitate alterius peius est quàm ipsa iniquitas. 592. gaudium Re-
- ligiosi de nouo habitu. 906.
- Gratia.* Opportunè illi cooperandum. 217. 360. differentia gratiæ Angelorum & hominum. 464. multæ in vsu sacramentorum nobis nostro defectu pereunt. 646
- HOMO.* Vetus homo crucifigendus. 338. alioquin nouus iterum crucifigitur. 343.
- Honor.* Sicut vinum nouum, sic nouus honor maximè temperandus. 527.
- Humilitas.* Qui se Christi exemplo non humiliat, exemplo dæmonis humiliabitur. 29. quo quis inferior est in ordine hominum, eò superior est in Christi ordine. 294. humilitati tuendæ tutius est vix de se, quàm vel humiliter loqui. 517. videnda tota hebdomada 2. post Octauam Paschæ. Vndenam præsertim humilibus tot dentur gratiæ. 857. humilitatis & charitatis cognatio. 859.
- Hypocrita.* Quis censendus. 146.
- IACOB.* Figura electorum, & filiorum B. Virginis. 852. quàm diuersus esset à fratre suo Esaii. 852. quàm sit necesse eos qui velint subsidium B. Virginis, ipsum Iacob imitari. *ibid.*
- S. Iacobus.* Pro Christo necatus. 866.
- Ieiunium.* Quomodo sit celebrandum. 108. Vide Feriam 4. Cinerum.
- Imitatio.* Non quidquid Christus egit, sed quomodo. 128. 146. non excusat infirmitas ab imitando Christo. 183.
- Indifferencia.* Nemo paratior ad omnia Dei dona recipienda, quàm qui ad nulla sibi danda æquè paratus est. 740. adhibenda est orationi. 778.
- Infans.* Infantes esse oportet vel bona vel mala infantia. 491.
- Ingratitudo.* In quo consistat. 35.
- Innocentia.* Qui sibi innocenti factam iniuriam nimis dolet, suæ ipse innocentie iniuriam facit. 284.
- Inordinatio.* Quantumuis parua cordis & rationis, non est paruum malum. 512. 616. inordinatus animus seu affectus impuram facit intentionem.
- Intellectus.* Tantum ab actione illustratur,

- quantum ipse actionem illustrat. 767.
 sequi potius fidem debet quam præcedere. 624.
- Intentio.* Sicut à Deo, sic ad Deum omnia. 612. sicut à Domino querendum est officium, ita in officio querendum est Dominus. 883. V. *Respectus humanus*, Pontifex.
- Invidia.* Quam sit iniquum gaudere de iniquitate alterius. 592. V. *vindicta*.
- S. Iacchimus.* Quantæ vir Sanctitatis. 803.
- S. Ioseph.* In 1. parte.
- Ira.* Quantum fas est in ira loqui, tantum ex ira nefas. 253. quæ est ira suavior, eò est potentior. 273. Esto appareant aliquæ irascendi causæ, multò tamen plures sunt & validiores ne irascaris. 585.
- Iudicium.* Iudicare de rebus secundum rationes æternas, proprium Christiano. 300. Non est temerè iudicandum de aliis. 595. nostro non est fidendum iudicio. 734.
- LABOR.* Nullus est labor nisi sit in vinea Domini, & in vinea Domini nullus est labor. 5. cogitatione Christi mitigatur omnis labor. 713. 872.
- Lachryma.* Passionis Christi vicaria. 353. quæ manant ex cælesti desiderio, quò descendunt celerius, eò ascendunt velocius. 677.
- Liberalitas.* Quanta in Deo. 582.
- Liberitas.* Nemo liberior quam qui minus est liber. 431.
- Loquela.* Qui audaciùs loquitur inferiori, timidiùs superiori loquetur. 262. vix de se loquendum, etiam humiliter. 519.
- MANSUETUDO.* Quò quis mitior, eò generosior. 219.
- S. Marcus.* Quam benè per Leonem representetur. 680.
- S. Maria Virgo.* Valedicit illi passurus proximè filius. 401. adstat cruci. 358. Caritas eius patiens, etiam post resurrectionem filij. 497. Affinitas cum illa maior est sanctitatis quam sanguinis. 803. plus est, illam esse sanctam quam
- Matrem Dei. 867. in festo Annuntiationis eius per multas Euangelicæ narrationis partes. Vide primum Indicem.
- S. Mathias.* Eligitur in Apostolū. 737. 799.
- Memoria.* In obliuione cæterarum rerum, memoria Christi est. 478. vel nulla Christi recoletur memoria, vel nulla erit in eius cultu querimonia. 711.
- Ministerium.* Quà fidelitate sit exercendum. 724. 799. 884.
- Misericordia.* Diuinæ abusus. 118. 757. 889.
- Moderatio.* In aduersis & prosperis. 210. in internis & externis. 722.
- Mors. Mortificatio.* Mortificandis concupiscentiis opportuna mortis memoria. 133. Quæ viuenti res fuit gratior, hæc fiet morienti grauior. 140. vt vita mortem ordinat, sic mors vitam. 141. qui supra mortem est, infra se videt omnia. 225. V. *Crux & tota Passionis hebdomada. Resurrectio.* Quantam in te vim habet desiderium regni cælestis, tantam tibi vim facies. 666.
- Mundus.* Non excusamur inde à peccato. 105. mundum facit concupiscentia. 167. Qui sectatur honores mundi quos fugit Christus, à Christo fugit ad mundum. 280. vinci à mundo quam turpe. 485. vanum eius gaudium 566. quomodo eum arguat Christus de iustitia & de iudicio. 621.
- Murmur.* Cogitatione Christi reprimendum. 711. alioquin nulla oratio in eius nomine. 82. & sit iniuria sanctæ Crucis. 873.
- NECESSITAS.* V. *Virtus*.
- Negligentia.* In audiendo Dei verbo. 54. in salute procuranda. 193. in vsu Sacramenti 646.
- OBDIENTIA.* In omnibus sicut fides. 632. quasi peccatum ariolandi est repugnare, & quasi scelus Idololatriæ, nolle acquiescere. 648. Qui rationes inquirat obedientiæ, rationem querit suæ inobedientiæ. 728.
- Occasio.* Quanta peccandi. 41. si dum adest

occafio, virtus abest, vix vnquam ad-
rit. 215. 242.

Officium. V. Ministerium. Status.

Oratio. Facta in nomine Saluatoris. 82.
654. quomodo obtinetur quidquid
oratur. 629. 655. de oratione sat mul-
ta. 657. & seq. in Feriis Rogationum.
De oratione Dominica cui contradici-
tur in singulis capitalibus vitiis. 659.
orans debet esse compositis affectibus.
778.

Otium. Sicut nemo otiosus operatur in vi-
nea Domini, sic nemo bene operatur
nisi otiosus. 1. plus vitæ perdis quàm
vivas. 560.

PASCHA. Quid significet. 435.

Patientia. In audiendo Dei verbo, quæ si
desit, magis aliunde est patiendum. 66.
quàm multis scriptura doceat esse pa-
tiendum. 288. in patientia impassibili-
tas. 456. quàm verè charitas includit
in se patientiam, tam verè impatiens
excludit à se charitatem. 496.

Peccatum. Progressus peccati ab vno ad
aliud. 22. quantæ occasionēs peccan-
di. 41. peccatum ex negligentia. 54.
peccati grauitas ex Christo patiente
agnoscitur. 97. 392. nullum peccandi
tempus 103. societas & multitudo pec-
cantium magis auget peccatum. 106.
peccati continuatio quàm damnosa.
116. in omnibus operibus tuis memo-
rare nouissima tua, & in æternum non
peccabis. 143. principiis obsta. 175. re-
sistendum vsque ad sanguinem. 312.
gravius est Christo pati à peccato,
quàm pro peccato. 392. & seq. toto
Passionis Dominicæ dilectus. Propo-
situm certamen in septem Christi sta-
tionibus & verbis contra septem vitia
capitalia. 419. mors peccati seu vitæ
sensualis quomodo sit animæ quædam
immortalitas. 453. quo magis volunta-
rium peccatum, eò maius. 599. 641.

sapienter ille qui maluit liber peccato
possideri à dæmone, quàm leui cum
peccato liberare possessos. 606. singu-
lis septē petitionibus orationis Domi-
nicæ septem opposita peccata capita-
lia. 660. peccatum in spiritum san-
ctum. V. *Spiritus.* Vbi maior Dei con-
temptus, maius peccatum. 639. vbi ma-
ior Dei bonitas, maior Dei cōtemptus.
755. 889. V. *Inordinatio.*

Perfectio. Tres eius acquirendæ viæ, qui-
bus multum confert Christi patientis
consideratio. 96. tantò altius perfecti,
quantò magis Christo subiecti. 116.

Persuerantia. Ceteræ pugnant virtutes,
sola vincit persuerantia. 267. 379. sic
charitas & constantia simul iunctæ
constant, vt nisi sint simul iunctæ non
sibi consent. 83. melius erat viam iusti-
tiæ non introisse quàm retroisse. 638.

S. Philippus. Pro Christo cruci affixus
866.

Pietas. Sicut pietas valet ad omnia, sic
omnia valent ad pietatem. 786.

Pena. Quàm sit à Christo suavis. 298.
713. 872.

Penitentia. Nulla est sine proposito emen-
dationis. 150. interior. quæ est pecca-
torum dolor, nunquam deponenda.
328.

Pontifex. Quo die consecratur, confide-
randa veritas.

Præcipitatio. Præcipitatio animi in statu
vitæ deligendo præcipitium est ani-
mæ. 875.

Præsumptio. Quàm damnosa. 43. nimia fir-
mitas, infirmitas. 71.

Prosperitas. V. *Honor.*

Providentia. Multum confert eius conside-
ratio ne aduersis perturbemur. 76. ad-
uersa præuidere, quāti referat. 87. 228.

Prudentia. In rebus agendis. 516. V. *Con-
siliū.*

RATIO. Eius inordinatio licet parua,

- non paruum malum. 512. modum in rebus & medium inter extrema semper querit. 723. rationibus æternis & supernaturalibus potius quam humanis & naturalibus oportet duci. 300. 730. V. *Sapientia. Voluntas.*
- Religio.* Persecutionem patitur à malis Christianis. 113. quo die religiosus induitur habitus. 906.
- Renuntiatio.* Multæ sunt eius species, quarum omnium exemplar luculentissimū Christus dedit septem suis in cruce prolatis verbis. 347. & seq.
- Resignatio.* Vide *Indifferentia.*
- Respectus.* Humanus respectus, inhumanus Christi despectus. 306. cauendus prædicando. 545. V. *Intentio.*
- Resurrectio.* Nemo cum Christo mortuus qui cum ipso non resurgat: nemo cum Christo resurgit, nisi qui cum ipso sit mortuus. 436. quænam sint dotes resurgentis cum Christo animæ. 456. & seq. tota ferè hebdomada Resurrectionis Domini.
- SACERDOS.* In qua sanctitate ordinandus debet esse, debet ordinatus semper esse. Sic cum Christo sacrificet, ut sit ipse sicut Christus sacrificans & sacrificium. 902.
- Sacramentum.* In usu sanctissimi Sacramenti, tota nostri debet esse immolatio; alioquin ingratum est tanti beneficii, qui se tantum ex parte immolat, se totum immolante Christo. 34. quam gloriosum est Sacramento multum in nos posse, si velimus; tam ignominiosum est pauca posse quod nolimus. 642.
- Salus. Salus.* Pauci saluantur, & quæ causa est ut pauci salui sint, hæc in te causa est, cur ex illis forte non sis. 9. salutis æternæ pericula. 40. 59. nulla grauior persecutio quam quæ contra salutem animæ. 113. si ordinatis ad salutem mediis non vteris, Mediatore
- Christo abuteris. 166. frustra te Christi miseret, nisi te tui prius misereat, ut inde scilicet saluti diligentius prospicias. 188. indicia pro salute animæ sicut pro sanitate corporis. 357. V. *Animæ. Conuersio.*
- Sapientia.* Humana sapientia sic diuinæ opponitur, sicut humana stultitia. 745. donum sapientiæ. 747.
- Scandalum.* Sicut non est afferendum, ita est sufferendum. 25. 303.
- Scientia.* Qui eminentior est in illa quæ dicitur eminens scientia, minus inter homines eminere cupit. 772. ubi de dono scientiæ. V. *Zelus.*
- Scriptura Sacra.* Nisi te conuertat, hanc pervertes. 51. ubi de Verbo Dei. Non aliter scripturæ dicunt aduersa toleranda, quam libenter. 237.
- Secessus.* Nulli magis necessario secedendum, quam qui minus necessarium sibi putat secessum. 716. V. *Consideratio. Otium.*
- Silentium.* Qui loquendo vincereris, silendo vincis. 357.
- Sollicitudo.* Spinæ sunt suffocantes verbum Dei. 61. sollicitudo temperata sui officij. 722.
- Spes.* Non confundit. 628. spes cæli, cælum est; quasi iam illud prægustaret. 703.
- Spiritus sanctus.* Sex virtutes ad eum recipiendum disponentes. 715. septem eius dona. V. *Donum.* Quod nos magis lætificat, hoc illum magis contristat. 751. de peccato in Spiritum sanctum, quam sit singulare in malitia, & multum tamen commune. 755. Qui peccant in Spiritum sanctum, vix peccant, quin blasphemant. 762.
- Status.* Non debet eligi sine Deo. 875. alioquin sine Deo exercetur. 876. quam fideliter secundum Deum exerceri debeat. 883. V. *Fidelitas, ministerium.* Quis sit status inordinatus, &

quomodo possit ordinari. 888.

Superbia. Quam timenda. 31. odibilis Deo & hominibus. 46. reprimitur memoria mortis. 137. nimis audacem facit & nimis timidū. 263. non colit Virginem Matrem Dei, quia non eam ut humilem colit Ancillam. 845. humilitas illi opposita per omnes gradus. Vide. in quadragesima singulis penè Feriis; & tota secunda hebdomada post Octauam Paschæ. V. *Ambitio, humilitas.*

TEMPERANTIA. Ipsa est bona infantia. 491.

Tempus. Qui ad tempus credunt, nullo credunt tempore: qui temporales sunt, nullius sunt temporis. 58. Tempore carnis priuij, quibus armis impietas propugnatur, iisdem expugnatur. 100. Nihil vnquam Christiana Religio passa est grauius, quàm quod à Christianis tūm patitur. 111. Tempus Passionis Christi, crisis quædam est æternitatis. 396. quàm sit modicum vitæ tempus 552. quantum ex illo modico nobis etiam perit. 660. si tempus respicis comparandæ tibi virtutis, vix vllam tibi comparatam respicis, quia nulla est virtus, si non respondet tempori. 885.

Tentatio. Quantæ nos circumstent. 41. quàm salubris timor contra præsumptionem. 43. si tentatorem permiseris ingredi, non se permittet egredi. Facilius excluditur quàm eiicitur. 174. vbi plura de hac materia. In plagis Christi, sanitas siue remedium tentationis. 478.

Timor. Qua parte peccator à se timorem Dei excutit, eadem Deus peccatori timorem magis incutit, nempe à bonitate Dei. 6. hinc rectè dicitur: Posuisti firmamentum eius formidinem. 33. qui se existimat stare, videat ne cadat. 39.

272. vbi maius est peccandi periculum, ibi maior sit timor. 105. Amori potius timendum est ab amore quàm à timore. 791.

Tristitia. Quomodo vertatur in gaudium. 569. quæ à Christo est, magis iucunda est, quàm quæ à mundo incunditas. 573. V. *Contritio, gaudium, penitentia.*

VERBUM DEI. Quænam sint eius impedimenta 53. V. *Scriptura Sacra.*

Veritas. Quomodo illi congaudet charitas. 602. Deus est prima veritas, cui credendum est in omnibus. 633. Christus veritas est & vera via, in qua melius est claudicare quàm præter viam fortiter ambulare. 78. V. *Fides.*

Vindicta. Qui ruina gaudet inimici, ruina eius in se trahit. 275. illustrior de inimicis palma est, mori pro eis, ne moriantur; quàm ipsis perditis triumphare. 347.

Virginitas. Si non semper, vix vnquam. Vide *Occasio.* Si times difficultatem virtutis, maior est difficultas sine virtute. 67. virtutis commendatio ex Christo patiente 100. sicut ex necessitate virtus, ita ex virtute necessitas. 241. in infirmitate virtus. 460. septem virtutes in septem Christi stationibus contra septem capitalia vitia. 420. septem eadem virtutes comprehensæ in septem petitionibus orationis Dominicæ. 660. in modo & medio est posita. 723. nulla si non respondet tempori. 866.

Vita. Sic tota debetur Christo, ut nihil sit in vitæ nostræ vsu minus nostrum, quàm ipse vitæ vsus. 382. quàm sit brevis 552. quàm multò etiam breuiorem eam faciamus. 560. vita immortalis in morte, vita scilicet gratiæ in morte peccati. 451.

Vocatio. Quando est cognita, non est retardanda. 878.

Voluntas. In adimplenda Dei voluntate

nostra est virtus. 217. nostra etiam perfectio 129. impietatis quoddam est genus, velle aliter seruire Deo quàm ipse velit, quod his euénit, qui plura quàm possint, volunt facere; & quæ possunt, non faciunt. 363. in dubio certius est & rationi conformius, aliorum ratione conformare quàm propriæ, quia sic melius diuina voluntas cognoscitur & exercetur. 548. qui non orat in nomine

Domini, nihil orat; & qui non orat secundum diuinam voluntatem non orat in nomine Domini. 653. idem de spe ac fiducia dicitur. 628.

Z E L V S. Scientia sine zelo, arma sine milite: zelus sine scientiâ, miles sine armis 120. saluti alienæ vacandum sine præiudicio suæ propriæ. 540. ardere oportet potiùs quàm lucere. 544.

F I N I S.



<i>Pagina.</i>	<i>Linea.</i>	<i>Erratum.</i>	<i>Correctio.</i>
729	14	quò	quo
785	32	infirmite	infirmitate
802	30	antennis	antennis
816	26	sic	fit
819	27	sue	sine
834	18	immolabile	inviolabile
876	22	ductus	ducta
885	13	hoc	huic
889	31	errare	errare
906	24	statius	satiue




ERRATA SECUNDÆ PARTIS.

<i>Pagina.</i>	<i>Linea.</i>	<i>Erratum.</i>	<i>Correctio.</i>
32	33	<i>Ecclesi 18</i>	<i>Ecclesi 10</i>
41	21	<i>multa sunt</i>	<i>multa sunt</i>
46	23	<i>apud homines</i>	<i>apud homines</i>
67	19	<i>privant</i>	<i>privat</i>
	23	<i>qui sunt</i>	<i>quæ sunt</i>
	31	<i>veluti ipso</i>	<i>velut ipso</i>
89	3	<i>preurbatione</i>	<i>perturbatione</i>
137	26	<i>immolandorum</i>	<i>immolandarum</i>
142	29	<i>inordinatur</i>	<i>ordinatur</i>
144	6	<i>alterutro</i>	<i>alterutri</i>
176	35	<i>velocitate</i>	<i>velocitate</i>
191	31	<i>potentibus</i>	<i>petentibus</i>
192	13	<i>prædicationem</i>	<i>prædicationem</i>
221	35	<i>qua possident</i>	<i>quam possident</i>
240	4	<i>deest locus S. S.</i>	<i>Math. 21.</i>
282	28	<i>Christi ?</i>	<i>Christi !</i>
284	27	<i>meritis</i>	<i>meritis,</i>
332	1	<i>illis</i>	<i>illis</i>
353	17	<i>lachryma passionis</i>	<i>lachryma, passionis</i>
387	26	<i>animo</i>	<i>animo</i>
391	21	<i>illum</i>	<i>illud</i>
393	31	<i>consummabantur</i>	<i>consummabuntur</i>
401	10	<i>hoc</i>	<i>hac</i>
409	4	<i>beneficiat</i>	<i>benefaciat</i>
410	3	<i>rulerunt</i>	<i>rulerunt</i>
418	37	<i>sibi</i>	<i>tibi</i>
420	26	<i>sculpilia</i>	<i>sculptilia</i>
451	8	<i>eruntur</i>	<i>eruntur</i>
468	26	<i>currit nisi non</i>	<i>curru nisi</i>
476	1	<i>quod</i>	<i>quid</i>
	14	<i>si</i>	<i>hic</i>
477	4	<i>reddit</i>	<i>reddis</i>
480	22	<i>itaque</i>	<i>itaque</i>
481	18	<i>sum</i>	<i>sum</i>
489	16	<i>ademptione</i>	<i>adeptione</i>
490	6	<i>sine</i>	<i>sine</i>
492	1	<i>geniti</i>	<i>geniti</i>
	37	<i>2. Cor. 20.</i>	<i>2. Cor. 10.</i>
493	34	<i>inueterescat</i>	<i>inueterascat</i>
520	23	<i>raro</i>	<i>rara</i>
537	26	<i>solum</i>	<i>solium</i>
558	1	<i>258</i>	<i>558</i>
603	5	<i>diuina</i>	<i>diuinæ</i>
604	1	<i>504</i>	<i>604</i>
607	28	<i>sanitatem</i>	<i>sanitati</i>
	29	<i>sanitati</i>	<i>sanitatem</i>
649	1	<i>repugnare</i>	<i>repugnare</i>
666	1	<i>vinam</i>	<i>vinum</i>
678	23	<i>monet</i>	<i>mouet</i>

Biblioteka Jagiellońska



stdr0030902



Veritatum
medicinarum
Pars 2a.

A.
Med. Lat.
1728